


Tí Nuevo Testamento cuènte Inchéni Jesucristo

C'óna Nquìva



New Testament in Popoloca, San Juan Atzingo

**Tí Nuevo Testamento cuènte Inchéni Jesucristo C'óna
Nquìva
New Testament in Popoloca, San Juan Atzingo**

copyright © 1982 Wycliffe Bible Translators, Inc.

Language: Popoloca, San Juan Atzingo

Translation by: Wycliffe Bible Translators, Inc.

Popoloca, San Juan Atzingo [poe], Mexico

Copyright Information

© 1982, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Popoloca, San Juan Atzingo

© 1982, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
b9b09122-b3f6-59f0-9594-749907b32b5b

Contents

SAN MATEO	1
SAN MARCOS	52
SAN LUCAS	85
SAN JUAN	139
LOS HECHOS	179
ROMANOS	226
1 CORINTIOS	245
2 CORINTIOS	265
GALATAS	277
EFESIOS	284
FILIPENSES	291
COLOSENSES	296
1 TESALONICENSES	301
2 TESALONICENSES	305
1 TIMOTEO	308
2 TIMOTEO	314
TITO	318
FILEMÓN	321
HEBREOS	322
SANTIAGO	336
1 PEDRO	341
2 PEDRO	347
1 JUAN	350
2 JUAN	355
3 JUAN	356
SAN JUDAS	357
APOCALIPSIS	359

Tí tan jína chrónka ch'ín Mateo

Tí sín k'uaxrjeníxin ch'ín Jesús

(Lc. 3.23-38)

¹ Tíhi mé chrónka nkexro kaín tí sín k'uaxrjeníxin ch'ín Jesucristo. Mé jehe ch'án k'uaxrjeníxin ch'án tí ch'ín David la ko tí ch'ín Abraham.

² Ch'ín Abraham mé it'é tí ch'ín Isaac la ko ch'ín Isaac mé it'é tí ch'ín Jacob la jehe ch'án mé it'é tí ch'ín Judá la ko kaín kichó ch'án.

³ Ch'ín Judá mé it'é tí ch'ín Fares la ko ch'ín Zara la tí iné sín mé it'in Tamar. Ch'ín Fares mé it'é tí ch'ín Esrom la jehe ch'án mé it'é tí ch'ín Aram.

⁴ Ch'ín Aram mé it'é tí ch'ín Aminadab la jehe mé it'é tí ch'ín Naasón la jehe mé it'é tí ch'ín Salmón.

⁵ Ch'ín Salmón mé it'é tí ch'ín Booz la iné mé tjan Rahab. Ch'ín Booz mé it'é tí ch'ín Obed la iné tí ch'ín Obed mé tjan Rut. Tí ch'ín Obed mé it'é tí ch'ín Isai.

⁶ Ch'ín Isai mé it'é tí rey David la jehe ch'án la ko tí tjan k'uéchjién ch'ín Urías mé táha it'é la ko iné tí ch'ín Salomón.

⁷ Ch'ín Salomón mé it'é tí ch'ín Roboam la jehe mé it'é tí ch'ín Abías la jehe ch'án mé it'é tí ch'ín Asa.

⁸ Ch'ín Asa mé it'é tí ch'ín Josafat la ch'ín Josafat mé it'é tí ch'ín Joram la ch'ín Joram mé it'é tí ch'ín Uzías.

⁹ Ch'ín Uzías mé it'é tí ch'ín Jotam la ch'ín Jotam mé it'é tí ch'ín Acaz la ch'ín Acaz mé it'é tí ch'ín Ezequías.

¹⁰ Ezequías mé it'é tí ch'ín Manasés la ch'ín Manasés mé it'é tí ch'ín Amón la ch'ín Amón mé it'é tí ch'ín Josías.

¹¹ Ch'ín Josías mé it'é tí ch'ín Jeconías la ko kichó ch'án. Tí sín a mé k'uéjéjó sín tí yaon a ntá xriñahya ikui tí sín Babilonia sákjuiko sín tí sín israelita kixin ts'ejóchjina sín tí chjasén sín Babilonia.

¹² Ntá kjuixin sákjuí sín mé ch'ín Jeconías mé it'é tí ch'ín Salatiel la ch'ín Salatiel mé it'é tí ch'ín Zorobabel.

¹³ Ch'ín Zorobabel mé it'é tí ch'ín Abiud la ch'ín Abiud mé it'é tí ch'ín Eliaquim la ko ch'ín Eliaquim mé it'é tí ch'ín Azor.

¹⁴ Ch'ín Azor mé it'é tí ch'ín Sadoc la ko ch'ín Sadoc mé it'é tí ch'ín Aquim la ko ch'ín Aquim mé it'é tí ch'ín Eliud.

¹⁵ Ch'ín Eliud mé it'é tí ch'ín Eleazar la ch'ín Eleazar mé it'é tí ch'ín Matán la ch'ín Matán mé it'é tí ch'ín Jacob.

¹⁶ Ch'ín Jacob mé it'é tí ch'ín José la ch'ín José mé k'óna xii tjan María la jehe tjan María mé iné tí ch'ín Jesús. Tí ch'ín Jesús la mé nchek'in sín Cristo.

¹⁷ Mé xikaha catorce t'áchrji k'uaxrjeníxin tí ch'ín Abraham ntá kjuák'e ch'ín David la í jnko catorce t'áchrji k'uaxrjeníxin tí ch'ín David la ntá tí sín Babilonia sákjuiko tí sín israelita chjasén sín la ntá í jnko catorce t'áchrji k'uéjéjó la ntá kokjîhi Cristo.

Kokjîhi Jesucristo

(Lc. 2.1-7)

¹⁸ Tí kokjîhi Jesucristo mé xikihî kónhen. Tí tjan María iné ch'án mé tsotêhe tjan ch'ín José. A ntá naxá kuákjahya kichó sín ntá kónoxín kixin jehe tjan la ó tjejá tjan kixin tíha la kjuachaxién Nchakuen Dios.

¹⁹ Ch'ín José mé tí nkexro ts'óna xii tjan María, mé ijnko chojni jína la tjinkakonhya ch'án noxín chrók'óxroan ch'án tjan ntá kjuenkayáxin ch'án imó chrókjuáqêhe ch'án tjan kixin tjinkakon ch'án kixin ninkexró tsoñoehya.

²⁰ Ntá tí naxá tjenkayáxin ch'án kixin xikaha sich'e ch'án ntá kotáchríen ch'án chrónkaxín titáyá k'uikuèn ch'án ikui ijnko ángel kuènte Ìnchéni nixja, chrónka kixin:

—José jaha mé k'uaxrjeníxian David. Tóxakuanhya la ko chrakonhya chrókjuákjá tjan María ts'óna ichjián kixin tí xjan tsochóna tjan la kjuachaxin kuènté Nchakuen Dios ikui mé k'óna tí xjan a.

²¹ Sinchekokjîhi tjan ijnko xjan ntoa la its'in xjan Jesús mé xikaha its'in xjan kixin jehe xjan tsjakjîin ijîe chojni —mé xikaha chrónka tí ch'ín ángel.

²² Kaín tíha kónhen kixin tsoxitéyá tí nkehe chrónka Ìnchéni k'uénixja tí sín k'uéchrónka itén ch'án ósé. Mé ntáchro xikihî:

²³ Ijnko tjan naxá chónahya chojni ntoa mé tsjak'eyá tjan la tsochóna tjan ijnko xjan,

la sinchek'in sín ch'án Emanuel,*

la tíha t'axrxjexín kixin Dios tjejókoni. Mé xíkaha chrónka itén Dios.

²⁴ Ntá k'uàya ch'in José ntá kjuínchexiteyá ch'án tí nkehe k'uetóan tí ángel kuènte Ìnchéni la kuákja ch'án tjan María ts'óna ichjién ch'án.

²⁵ A ntá kjónté xíkaha la naxá kójnkojiéhya sín tí naxá kokjiéhya xjan la ntá tí xjan mé kjuínchek'in sín Jesús.

2

Tí sín mago kjuítsjehe sín xjan

¹ Tí kokjixín ch'in Jesús tí chjasin Belén estado Judea la tí yaon a kjuák'e ijnko ch'in rey it'in Herodes mé k'uetuenhen ch'án tí nación a. A ntá xrinahya iso chojni ntoa kjuixín ijnko chjasin nó tjtjoxín yaon mé kjuíji sín chjasin Jerusalén. Jehe sín mé sín mago mé tónoexín sín tí konotsé.

² Ntá kjuanchankí sín kixin:

—¿Nketí tjen tí xjan tsíkójihi ts'óna tí rey ts'etuenhen tí sín judío? K'uíkoxínni tí konotsé kuènte ch'án nó tjtjoxín yaon na ntá ó kjuíni kixin tsochjéheni ch'án kjuasáya —ichro sín.

³ Ntá kuínhin tí ch'in rey Herodes tí xíkaha ichro sín ntá imá tóxakonhen ch'án la ko tóxakonhen kaín tí sín chjasin Jerusalén.

⁴ Ntá tí ch'in rey k'uetóan kixin síxrakoa kaín tí sín nchat'á t'etóan la kaín tí sín tjako tí ley la ntá kjuanchankíhi sín ch'án nketí chrókokjixín tí nkexro Cristo.

⁵ Ntá jehe sín kjuátehe sín kixin:

—Tsokjixín xjan chjasin Belén estado Judea mé xíkaha tsíkjin tí sín tsíchronka itén Dios. Ntáchro xíkíhi:

⁶ Jaha chjasin Belén nonte Judá,

jaha la jehya ijnko chjasin imá ntsí;

kixin tí nonte ts'axrxjexín tí nkexro antsí t'etóan,

la jehe ch'án ts'ayakonhen tí chjasin kuèntana mé chjasin Israel.*

Mé xíkaha nixja itén Dios.

⁷ Ntá imó k'uúyehé ch'in Herodes tí sín mago la kjuanchankíhi ch'án sín nkesá kjuankixin k'uíkon sín tí konotsé.

⁸ Ntá chrónka sín ntá tuénxín k'uetóan ch'án kixin sátsji sín chjasin Belén la ntáchro ch'án kixin:

—Sátjirá ntíha la tjéyará tí xjan la tió ts'itjará xjan la tsochronkará kixin ntá kjaxian janhan sátsjia ntíha tsotjahá xjan kjuasáya —mé xíkaha k'uetóan ch'in Herodes.

⁹ Ntá kuínhin tí sín mago tí nkehe k'uetóan tí ch'in rey ntá sákjuí sín la xík'ikon sín tí konotsé inaá la kjuítaon va ntíja la ntá chréhe sín hasta kjuák'e va chritaón tí nchia tjen tí xjan a.

¹⁰ Ntá tió k'uíkon tí sín mago nketí kjuák'e tí konotsé la imá kóchéhe sín.

¹¹ La k'uixenhen sín tí nchia la k'uíkon sín tí xjan kjuák'eko tí tjan María ìné xjan. Ntá k'uéjoxín toch'in sín la chjéhe sín kjuasáya ntá kuakitjehé sín tí nkehe kjuíkao sín la kjuanjon sín chica oro la ko ihnti tsochéxín chjincó la ko xroan xraxé náxrjón.

¹² Ntá chr'éxín kotáchrién sín chrónkaxín kixin chrókanhya sín tí tjen ch'in Herodes. Méxra kjanxin sín í jnko ntíja la sákjuí sín chjasén sín.

Ch'in José la ko tjan María sákjuí sín chjasin Egipto

¹³ Ntá tió kjuixín sákjuí tí sín mago la ntá kotáchrién ch'in José chrónkaxín titàya k'uíkon ch'án ijnko ángel kuènte Ìnchéni chrónka kixin:

—T'ayá sátsjikoa xjan la ko ìné xjan la sátsjirá chjasin Egipto la ntahó ts'ejorá hasta tsoxrxjankajia, kixin tí ch'in Herodes xritjeyá tí xjan chrók'óyan ch'án xjan —mé xíkaha chrónka tí ángel.

¹⁴ Ntá ch'in José k'uàya la ntá sákjuíko ch'án xjan la ko ìné xjan la sákjuí sín chjasin Egipto tí tie a.

¹⁵ Ntahó k'uéjó sín hasta ik'uén ch'in Herodes. Mé xíkaha kónhen kixin tsoxiteyá kaín tí nkehe chrónka Ìnchéni, k'uénixja tí sín tsíchronka itén ch'án. Mé ntáchro sín kixin: “Chjasin Egipto kjuák'e xjannta ntá k'uíyahá ch'án”.†

Ch'in Herodes mé k'uetóan its'en xjan

¹⁶ A ntá kónohe ch'in rey Herodes kixin tí sín mago mé kjuích'iyehé sín ch'án ntá imá kónínkaon ch'án la k'uetóan ch'án kixin its'en kaín tí chánjan ntoa siin chjasin Belén ó chóna iyó nánó la ko tí xjan naxá chóntahya iyó nánó. Mé xíkaha k'uetóan ch'án kixin ó xraxínkaon ch'án nkehe kuínhin ch'án chrónka tí sín mago.

* 1:23 Isaías 7.14 * 2:6 Miqueas 5.2 † 2:15 Oseas 11.1

¹⁷ Mé xikaha ó xiteyá tí nkehe tsíkjin tí ch'ín Jeremías ntáchro ch'án kixin:

¹⁸ Kuínhin sín itén chojni chjasin Ramá mé tsjánka sín.

Tiha mé tí tjan Raquel la tsjánkama tjan xjeen tjan.

Kohya nkexro sinchechéhe tjan kixin ó kaín xjan tsík'en xjan.*

Mé xikaha chrónka itén Dios.

¹⁹ Ntá tió kjuixin k'uén ch'ín Herodes ntá ijnko ángel kuente Ìnchéni mé k'uikónxin ch'ín José kotáchrién ch'án tí kjuák'e ch'án chjasin Egipto mé ntáchro kixin:

²⁰ —T'áya sátsjikoa tí xjan la ko tí iné xjan la tsokjan chjasin Israel kixin ó kjuixin k'uén tí nkexro chrók'óyán tí xjan a —mé xikaha k'uetqan tí ch'ín ángel.

²¹ Ntá ch'ín José mé k'uàya ch'án la sákjuíko ch'án tí xjan la ko tí iné xjan la sákjuí sín chjasin Israel.

²² A ntá kuínhin ch'ín José kixin ch'ín Arquelao xjeen ch'ín Herodes mé k'uetqan ch'án tí estado Judea la ntá chrakon ch'án la sáchrókjuihya ch'án ntiha. A ntá kotáchrién ch'án chrónkaxín Dios kixin sáchrókjuí ch'án estado Galilea.

²³ Ntá tió kjuíji sín ntiha ntá sákjuí sín ijnko chjasin it'in Nazaret la ntaha k'uejó sín. Mé xikaha xiteyá tí nkehe tsíchrónka tí sín k'uénixja itén Dios senó. K'uéntáchro sín kixin jehé ch'án mé tsíkítexín sín nazareno.

3

Juan el Bautista mé kjuák'e ch'án nteje

(Mr. 1.1-8; Lc. 3.1-9, 15-17; Jn. 1.19-28)

¹ A ntá tí yaon a kjuák'e ch'ín Juan Bautista nteje Judea la kjuako ch'án.

² Ntáchro ch'án kixin:

—Títghérá ijjárá la t'jínkírá tí nkehe tjenkayáxinrá kixin í séhya itsi kjuachaxién Dios.

³ Tí ch'ín Isaías, mé ijnko ch'ín tsíchrónka itén Dios, mé tsíkjin ch'án kuente tí ch'ín Juan mé chrónka ch'án kixin:

Tsinhin sín itén ijnko nkexro tsjak'e nteje ts'èya tsontáchro kixin:

“Tóxakonhanrá ncheyóxinrá ntia tsixin Ìnchéni.

Takitjehérá ijnko ntia ntoí.*”

⁴ Tí iké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko itsjen kotsjenta tónoxin nteje.

⁵ Itsjé chojni kuxin sín chjasin Jerusalén la ko í so chjasin síin estado Judea la ko chjinaxón tí ntario Jordán kixin tsinhin sín nkexri tjechrónka ch'án.

⁶ Ntá chrónka sín ijje sín ntá ch'ín Juan kuikítexín ch'án sín tí ntario Jordán.

⁷ Ntá xringhya k'uikón ch'ín Juan ikui nchónhya tí sín fariseo la ko tí sín saduceo kixin tjinkaon chrókuikite sín la ntá ntáchro ch'án kixin:

—Jahará tsík'axrjenixínrá konche. ¿Xá nkexro kjuintanohará kixin chrókuikéhérá tí kjuanínkaon kuente Dios ó tsi?

⁸ T'ichjánxin kixin chrók'uejorá jnkójina chrókjuákoxinrá kixin chaxín kjuítoxinhínrá tí nkehe tjenkayáxinrá.

⁹ Jahará nchehnkerá ntáchrórá kixin k'uaxrjenixínrá ch'ín Abraham. Janhan ntáxrxjan kixin kjónté tí xro i la Dios tsjacha chrókjuich'éna ch'án chojni k'uaxrjenixín ch'ín Abraham.

¹⁰ Tí chica hacha ó tjechónhen tsochrínjinxín tí nta. A ntá kaín xín nta t'ónahya to jina mé tsochrínjin kixin tsoche.

¹¹ Janhan mé intá tikítexián chojni kixin tsjakoxin sín kixin ó kjuítoxinhin sín ntjé sín. A ntá tí nkexro itsi chr'énin mé tsíkítexínrá tí Nchakuen Dios la ko xrohi. Antsí tjetóxin t'etqan ch'án a ntá janhan la kánhyó. Méxra chrókósuána sáchrókjuikjan tokaté ch'án.

¹² Jehé ch'án la ó tjexraá ch'án pala sinchetjuáxin ch'án noatrigó kixin tí ntachjiji trigo la ókjé ts'ejo ch'án a ntá tí noatrigó la tsjenájín ch'án la ts'enkachjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochrixín —mé xikaha kjuako ch'ín Juan.

Kuikite ch'ín Jesús

(Mr. 1.9-11; Lc. 3.21-22)

¹³ Ntá ch'ín Jesús kjuixin ch'án nó estado Galilea ikui ch'án tí ntario Jordán tí tjan ch'ín Juan kixin ch'ín Juan tsíkíte tí jehé ch'án.

¹⁴ A ntá tí saoxin chroya ch'ín Juan chrókuikite tí ch'ín Jesús ntáchro ch'án kixin:

—Náhi. Jeheni t'ichjánxinhinni jaha chrókuikite tí jeheni. A ntá jaha k'uinka jeheni chrókuikitia tí jaha —ichro ch'ín Juan.

¹⁵ Ntá kjuátghe ch'ín Jesús kixin:

—A ntá jie la t̃t̃oghé tí x̃ikaha t̃jenkayáxian k̃ixin t'ichjánx̃in tsikiteni k̃ixin sinchexiteyáni tí nkehe k'uet̃oan Dios.

Ntá ch'ín Juan kuítekaon ch'án la x̃ikaha k̃juích'e ch'án.

¹⁶ Ntá tió kuíkite tí ch'ín Jesús la ntá x̃rínahya tit̃aya xit̃jeh̃e nkajní la k'uikon ch'án tí Nchakuen Dios, éxí kontóá tsjehe, k'uínkaj̃inx̃in nkaya nkajní ntá k̃juák'e chr̃itaón kja ch'ín Jesús.

¹⁷ Ntá x̃rínahya kuínhin sín ijnko tan kuix̃in nkaya nkajní ntá chro k̃ixin:

—Tíhi mé x̃janna la imá t̃juaḡa ch'án la imá ch̃ana k̃ixin nchexiteyána ch'án.

4

Ch'ín Tsochren chrók̃juachroe ch'ín Jesús

(Mr. 1.12-13; Lc. 4.1-13)

¹ Ntá tí Nchakuen Dios mé sák̃juiko ch'ín Jesús tí nteje ḡ ntá ch'ín Tsochren t̃jinkaon chrók̃juachroe ch'ín Jesús.

² Tí nteje a mé k̃juák'e ch'án k̃jonehya ch'án cuarenta t̃je la ko cuarenta tie la ntá chr'éx̃in kónohe ch'án ik'uén ch'án k̃jinta.

³ Ntá ch'ín Tsochren mé kóchjinehe tí ch'ín Jesús k̃ixin t̃jinkaon chrók̃juach̃ax̃in ch'án. Ntá chro ch'án k̃ixin:

—Tí chax̃in jaha X̃jeen Dios la ntáche tí x̃ro i k̃ixin chrók'óna niot̃ja.

⁴ Ntá k̃juátehe ch'ín Jesús ntá chro k̃ixin:

—Náhi. Ntá chro x̃roon itén Dios k̃ixin: “Jehya niot̃ja ó chrók'uejóchónx̃in chojni. Náhi. Kaín tí tán nix̃ja Dios t̃jejóchónx̃in chojni”^{*} —ichro ch'án.

⁵ Ntá ch'ín Tsochren mé sák̃juiko ch'ín Jesús tí chjasin t̃jóá mé chjasin Jerusalén, la sák̃juiko ch'án tí chr̃itaón tí kja ñjnko a

⁶ la ntá chro ch'án k̃ixin:

—Tí chax̃in X̃jeen Dios jaha la t̃t̃oghé t'anót̃jex̃ian tí noi nt̃ihi k̃ixin ntá chro x̃roon itén Dios k̃ixin:

Dios mé ts'et̃uenhen tí sín ángel kuènte ch'án k̃ixin ts'ayakonhan sín.

Tsotsé sín it̃já

k̃ixin tsot̃ehya tot̃á ts'it̃ja x̃ro tí ts'anót̃jen†

—ichro ch'ín Tsochren.

⁷ Ntá k̃juátehe ch'ín Jesús ntá chro ch'án k̃ixin:

—Náhi. K̃jax̃in ntá chro x̃roon itén Dios k̃ixin: “Ch̃jinihya chrók̃juásix̃ian k̃juax̃roon k̃juachax̃in kuènte Ìnchéni Dios”[‡] —ichro ch'ín Jesús.

⁸ A ntá tió k̃juix̃ix̃in sák̃juiko ch'ín Tsochren tí ch'ín Jesús ijnko j̃nḡ imá noi ntá k̃juako tí Jínahya kaín x̃in tí nacióon síin chjasintajni la ko tí nkehe t'et̃oan kuènte.

⁹ La ntá chro ch'ín Tsochren k̃ixin:

—Kaín tíha mé tsot̃jaha tí tsjak'éx̃ian tóch'ian ts̃jikosáyana tí janhan —mé x̃ikaha ichro ch'ín Tsochren.

¹⁰ Ntá k̃juátehe ch'ín Jesús ntá chro ch'án k̃ixin:

—Sát̃jia Satanás k̃ixin x̃roon itén Dios ntá chro k̃ixin: “Chrók̃juikosáyehé Ìnchéni Dios la jehó ch'án chrók̃juích'ehé x̃ra”[§] —ichro ch'ín Jesús.

¹¹ A ntá ch'ín Tsochren mé kuít̃ohe tí ch'ín Jesús la iso tí sín ángel ikui ts̃jink̃itsa tí jehé ch'án.

Ch'ín Jesús k̃juank̃ixin ch'án tí x̃ra kuènte ch'án estado Galilea

(Mr. 1.14-15; Lc. 4.14-15)

¹² A ntá ch'ín Jesús mé kuínhin ch'án k̃ixin tí ch'ín Juan mé t̃jehjina ch'án nt̃oq̃chiso a, a ntá jehé ch'án mé sák̃juí ch'án estado Galilea.

¹³ Kuít̃ohehya ch'án chjasin Nazaret nt̃iha. Náhi. Sák̃juí ch'án chjasin Capernaum la k̃juák'e ch'án nt̃iha. Tí chjasin a mé t̃jen chr̃inta nt̃ayaon ch̃jino estado Zabulón la ko estado Neftalí.

¹⁴ Mé x̃ikaha k̃juích'e ch'án k̃ixin ts̃oxiteyá tí nkehe ts̃íkjin ch'ín Isaías, ijnko nkexro k'uechrónka itén Dios. Ntá chro ch'án k̃ixin:

¹⁵ Tí estado Zabulón la ko Neftalí tí nt̃ja

chr̃inta nt̃ayaon la tí nó chók'á t̃j̃it̃ox̃in yaon tí nt̃arío Jordán,

mé tí estado Galilea tí t̃jejó tí sín jehya judío.

¹⁶ Mé nt̃iha t̃jejó tí sín síin tí s̃itié mé ts'ikon sín ijnko x̃rohi jíé,

la tí sín éxí ts̃ík'en x̃rit̃jejó sín

mé ts'inkaséyanx̃in ts'ejó sín.

* 4:4 Deuteronomio 8.3 † 4:6 Salmo 91.11-12 ‡ 4:7 Deuteronomio 6.16 § 4:10 Deuteronomio 6.13

¹⁷ Ntá kjuankixin kjuako ch'in Jesús ntáchro ch'án kixin:

—Tjitóxinhrá ntjará. Tsákjára ijnko ntja nixin kixin kjuachaxin kuente Dios tjen nkaya nkajni la í séhya tsi.

Ch'in Jesús k'uíyehé noó chojni k'uétsé koche
(Mr. 1.16-20; Lc. 5.1-11)

¹⁸ Ntá sákjuí ch'in Jesús chrínta ntayaon Galilea ntá xrinahya k'uíkon ch'án yaá sín jnkokoá kichó sín, ijnko mé it'in Simón mé kjaxin it'in ch'án Pedro la ko í jnko it'in Andrés. Jehé sín mé koche xritsé sín. Ntá tinkák'e sín nchísén chrínki ntá.

¹⁹ Ntá ch'in Jesús nixjehé sín ntáchro ch'án kixin:

—Chréhérá tí janhan ntá tsotjahará xra tsjéyará chojni.

²⁰ Ntá tuénxin kuitohe sín tí nchísén k'uétséya sín koche, ntá sákjuíko sín ch'án.

²¹ Ntá kjinhya kjuíji ch'án ntá k'uíkon ch'án ijnko yaá sín, jnkokoá kichó sín, mé tí ch'in Jacobo la ko ch'in Juan, mé xjeen tí ch'in Zebedeo. Tjejóko sín it'é sín tí ntabárcjo la tjejótjoníte sín tí nchísén tséya sín koche. Ntá kjaxin tí sín a k'uíyehé ch'in Jesús.

²² La ntá tuénxin kuitohe sín tí ntabárcjo la ko tí it'é sín ntá sákjuíchréhe sín tí ch'in Jesús.

Kjuakohe ch'in Jesús nchónhya chojni
(Lc. 6.17-19)

²³ Ntá sákjuí ch'in Jesús nkuíxín tí estado Galilea la kjuakoxin ch'án tí nínko Israel siín jnkojnko chjasin mé kjuako ch'án tí tan jina chrónka nkexrí tí kjuachaxin kuente Dios la ko kjuínchekitöhe ch'án jina kaín chojni chónka kaín xín chin la ko kaín kjuatjoté.

²⁴ Ntá kaín xín tí sín tjejó tí estado Siria mé kuínhin sín kuente Jesús la kjuikao sín kaín xín tí sín níhi chónka kaín chin la ko tí sín imá tjetéhe sín la ko tí sín chónka nchakuen tí jinhya la ko tí sín t'aniáte sín la ko tí sín sixénká toté sín, la ntá ch'in Jesús mé kjuínchekitöhe ch'án sín jina.

²⁵ Ntá itsjé chojni kjuíchréhe tí ch'in Jesús, mé kjuíxin sín estado Galilea la ko tí chjasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjitoxin yaon tí ntarjo Jordán.

5

Kjuakoxin ch'in Jesús ijnko jna

¹ K'uíkon ch'in Jesús kixin k'uéjó nchónhya chojni la ntá chrín ch'án ijnko jna la ntaha kjuák'etjaxin ch'án. Ntá tí sín k'uájiko ch'án a mé kóchjina sín chjinaxón tjejontaxin sín tí tjen ch'án.

² Ntá ch'in Jesús kjuankixin kjuakohe ch'án sín kixin:

Tí nkexro tjejó náxrjón
(Lc. 6.20-23)

³ —Náxrjón tjejó tí sín nohe kixin t'ichjánxinhin sín nkehe kuente Dios kixin ntá jehé sín mé tsochónka sín tí kjuachaxin kuente Dios.

⁴ Náxrjón tjejó tí sín t'ává kixin Dios mé sinchechéhe asén sín.

⁵ Náxrjón tjejó tí sín hnkehya asén kixin jehé sín mé ts'áyéhe sín tí nonte tsjanjon Dios.

⁶ Náxrjón tjejó tí sín éxi yóhe chrók'uenxín sín kjinta la chrók'uenxín sín ntá kixin xikaha imá tjinkaon sín sinchexiteyéhe sín Dios ntá Dios tsjinkitsa sín kixin ts'áyéhe sín tí nkehe tjinkaon sín.

⁷ Náxrjón tjejó tí sín tikonóhehe kichó sín kixin ntá Dios kjaxin tsikonóhehe tí jehé sín.

⁸ Náxrjón tjejó tí sín kótjóá asén kixin ntá jehé sín sátsjik'íkon sín Dios.

⁹ Náxrjón tjejó tí sín tjinkaon kjuaxróxin kixin Dios sinchek'in ch'án xjeen ch'án tí jehé sín.

¹⁰ Náxrjón tjejó tí sín kjonté tjejótjasótexin sín kixin kjuínchexiteyéhe sín Dios kixin ntá jehé sín mé kuente sín nkaya nkajni.

¹¹ Náxrjón tjejorá kjonté t'antaxinhanrá sín la ko ntachakonrá sín la ko kaín nkehe náxrjónhya ntáchro sín kixin tinkachónkirá tí janhan.

¹² Chrókócháhará la ko kjuaxróxin chrók'uejorá kixin ntá chr'éxin jahará ts'ayéhérá ijnko nkehe antsí má jina nkaya nkajni. Mé xikaha kjuasóte tí sín k'uéjó ósé k'uechrónka sín tí itén Dios.

Jahará la éxi yóhe xjnta la ko éxi xrohi t'inkaséyanxín chjasintajni
(Mr. 9.50; Lc. 14.34-35)

¹³ Jahará mé yóhe éxi xjnta chjasintajni. A ntá tí chrók'uánkéhé tí jní tí xjnta la ntá xitjahya chrókójni inaá. Ninkehó chrókjuich'ehya xra la chrók'uikitjí ntója la ko chrókuinkátja chojni.

¹⁴ A ntá jahará la mé tí xrohi t'inkaséyanxín chjasintajni. Ijnko chjasin itjen chrítaón jna la xitjahya tsjak'emá.

¹⁵ La ko kohya nkexro sinchek'ákjen ijnko lámpara ntá tsjak'e chrínkí ijnko ntacajón. Íchá jína tsjak'e ch'án xrohi noi kixin ntá ts'inkaséyanxín kaín nkexro síin tí nchia ntíha.

¹⁶ Mé xíkaha tí jahará chrókóyóghará éxí tí xrohi t'inkaséyanxín kixin ts'ikon kaín chojni tí xra jína tjejoch'erá la ntá chrókjuanchehe sín kjuasáyé It'eni tjen nkaya nkajní.

Kjuako ch'in Jesús kuénte tí ley

¹⁷ Jahará chróntáchrohará kixin k'uinka kixin tsjakjían tí ley tsík'etqan ch'in Moisés la ko tí nkehe kjuako tí sín k'uechrónka itén Dios. Náhi. Jehya xíkaha k'uinka kixin tsjakjían tíha. Náhi. K'uinka janhan kixin tsjákoxian nkehe chaxín t'axrjéxín tíha.

¹⁸ Chaxín xrjanka kixin tí naxa tjen nkajní la ko chjasintajni la kohya ninkehó ley tsjiihny, mé tsjiihny nijnko punto la nijnko letra kuénté tí ley tsjixinjian tsxiteyá kaín tí nkehe t'ichjánxin tsxiteyá.

¹⁹ Mé xíkaha tí nkexro tsitekakonhya tí nkehe k'uetqan tí ley kjónté ijnko nkehe imá intsí, la ko chrókjuako kixin xíkaha chrókuitekakonhya chojni, la jehe sín la imá tsontsí sín tí tsí tí kjuachaxin kuénte Dios. A ntá tí nkexro tsitekaon la ko tsjákohe ókjé nkexro tsitekaon sín, mé antsi imá ts'etqan sín tí tsí kjuachaxin kuénte Dios.

²⁰ Méxra tjonkará kixin t'ichjánxin kixin antsi jína ts'ejorá la tsoyóghará tí sín tjako ley la ko tí sín fariseo kixin tí tsyóghará sín la ntá xitjahya tsákjárá tí kjuachaxin kuénte Dios tjen nkaya nkajní.

Kjuako ch'in Jesús kuénte tí kjuanínkaon

(Lc. 12.57-59)

²¹ Jahará tsikinhínrá kixin tí sín ósé tsík'ítuenhen sín kixin: "T'oyánhyará kichuárá* kixin tí nkexro t'óyán kichó mé t'ichjánxin tsjasóte sín."

²² A ntá janhan tjonkará kixin jnkojín nkexro tsóninkakonhen kichó mé t'ichjánxin tsjasóte. A ntá tí nkexro t'ántaxinhín kichó la mé tí sín t'etqan mé sinchekitqexín ijje ch'án. La ntá tí nkexro tsontáche kichó kixin tsixénká ch'án la tíha mé sátsji tsjasótéxín tí sín xrohi.

²³ A ntá tí tsjikuehérá Dios nkehe tsotchjehérá ch'án ntá tsjasánrá tí altar ntá tsoxráinkáonrá tí jnkojín kichuárá kjuánjonkoará sín

²⁴ La ntá tí xíkaha la tjtóhérá tí nkehe tí altar la sátsjirá tsonixjehérá ch'án jnkojína kixin í tsokohya kjuanínkaon. La ntá tsjixin la ntá tsjhará tsjánjonrá tí nkehe tjinkáonrá tsjánjonrá.

²⁵ Tí síin jnkojín nkexro tjanchia jie tí jahará la tjinkaon chrókjuikoará ch'án juzgado, a ntá íchá jína jnkokoá chrókjuenkayáxinrá, jehe ch'án la ko jahará, ntía ó, kixin ntá sáchrókjuihyará tí tjen ch'in juez. Kixin sáchrókjuirá tí tjen ch'án ntá jehe ch'án ts'etuenhen ch'án tí policía kixin ts'ixenhenrá ntqechiso.

²⁶ A ntá chaxín tjonkará kixin tí ts'ikjahará sín ntqechiso la ts'axrjéxínhyará ntíha tsjixinjian tsjenkeherá sín kaín xín chichaon chontará.

Ch'in Jesús kjuako kixin chrókjuasinhya sín jie, chróchóntahya sín chojni chjin ókjé

²⁷ Jahará tsikinhínrá tí nkehe tsík'ítuenhen tí sín ósé ntácho kixin: "Chrókjuásinhyará jie, chróchóntahyará chojni chjin ókjé."[†]

²⁸ A ntá janhan tjonkará kixin tí nkexro tsokomá ijnko tjan ókjé tjak'e asén chrókuákja ch'án la ó kjuixín kjuasin ch'án jie nkaya asén ch'án.

²⁹ A ntá tí ikuan chjina chrókjuásixián jie la chrókuakitsjenkiá ikuan la chróchr'an ikjín kixin íchá jína ts'ítjáyan it'o cuerpo kuéntá kixin jehya kuenté cuerpo kuéntá sátsji tsjasótéxín tí síin xrohi.

³⁰ A ntá tí itja chjina chrókjuásixián jie la chrókóchrínjian tí tjá a la chróchr'an ikjín kixin íchá jína ts'ítjáyan it'o cuerpo kuéntá kixin jehya kuenté cuerpo sáchrókjuí tsjasóte tí síin xrohi.

Ch'in Jesús kjuako kixin chrók'uitjéhya kichó sín

(Mt. 19.9; Mr. 10.11-12; Lc. 16.18)

³¹ Kjaxin tsík'ítuenhen tí sín ósé kixin tí nkexro tjinkaon chrók'uitjéhi ichjién t'ichjánxin ts'óna xroon tsakja tí ichjién kixin ts'itjéxín kichó sín.[‡]

³² A ntá janhan tjonkará kixin ijnko nkexro tsjákehe ichjién tí chróchóntahya tjan ókjé nkexro la jehe ch'án kuitqhe ch'án tjan kixin tsjasin tjan jie. A ntá tí nkexro tsqtehe ijnko tjan tsíkítsinkehe la kjaxin ó kjuasin ch'án jie.

Ch'in Jesús kjuako kixin chjiníhya chrók'uákjenxinni ihnié Dios

³³ Kjaxin tsikinhínrá tsík'ítuenhen tí sín ósé kixin: "T'ichjánxin sinchexiteyará tí nkehe tsintáchorá kixin chrók'uákjenxinhyará ihnié Inchéni chjini."[§]

³⁴ A ntá janhan mé tjonkará kixin chrók'uákjenxinhyará ihnié Dios ninkehó la ko chrók'uákjenxinhyará nkajní kixin ntaha tjen Dios t'etqan.

* 5:21 Éxodo 20.13; Deuteronomio 5.17 † 5:27 Éxodo 20.14; Deuteronomio 23.21 ‡ 5:31 Deuteronomio 24.1-4

§ 5:33 Números 30.2; Deuteronomio 23.21

³⁵ La ko chrók'uákjenxinhyará chjasintajni kixin ntaha tjejókjen toté ch'án la ko chrók'uákjenxinhyará chjasin Jerusalén kixin ntaha la itjen tí Rey t'etoan.

³⁶ La tjenkayáxixínhyará ikjárá ó kixin jahará xitjahya tsjakérá ijnko kaxihi tjóá o nijnko kaxihi tié.

³⁷ Tí nkehe tsontáchrórá chaxín la chaxín la tí nkehe náhi la náhi la kohya nkehe chrókuakét'oxinrá chróchrónkará. A ntá ichrén nkehe tjakét'oxinrá tsochrónkará la táha mé jínahya.

Ch'in Jesús tjako ch'án kuènte tí sín t'itjáyenhya ichrén kjuanínkaon
(Lc. 6.29-30)

³⁸ 'Jahará mé ó tsíkinhínrá tsík'ítuenhen tí sín ósé kixin tí takitsjenkí sín ikonrá la kjaxinrá chrókuakitsjenkírá ikon sín. A ntá tí chrókuakitsjenkí sín nënorá la kjaxinrá chrókuakitsjenkírá neno sín kjaxin.*

³⁹ A ntá janhan mé tjonkará kixin tí jnkojín nkexro ichrén nkehe jínahya sit'ahará la jahará ch'ehyará xikaha. Náhi. Tí chjéhe ijnko nkexro ijnko tuagan la ntá tjóka tí í jnko nánko tuagan.

⁴⁰ La tí síin jnkojín nkexro tjanchia jie la tjinkaon sín chrókuakitsjaha sín camisá la tjtóhé sín sátsjiko sín tí ka t'ínkayate kjaxin.

⁴¹ La tí t'etuáhanhá sín tsámárá nkehe ijnko kilómetro la tjakét'oxinrá í yaá kilómetro.

⁴² Tí jnkojín nkexro tsjanchia nkehe la tí tjinkaon ch'án nkehe la chróntáchróhyará kixin "náhi", chrókuinchejjenrá ch'án.

Tjuèhérá tí sín nínkakonhanrá sín
(Lc. 6.27-28, 32-36)

⁴³ 'Kjaxin ó tsíkinhínrá tsík'ítuenhen tí sín ósé kixin: "Tjuèhérá tí nkexro choxinrá la tsonínkákonhénrá tí sín jínahya kjuít'ahará." †

⁴⁴ A ntá janhan mé tjonkará kixin chrótjuèhérá tí sín nínkakonhanrá la chrókuincheyaonrá tí sín jínahya kjuít'ahará la jina chrókuinkitsará tí sín tjinkakonhya tí jahará la chrónixjehérá Dios kixin chrókuinkitsa ch'án tí sín t'ántaxínhanrá la ko tí sín t'ahará tí jínahya.

⁴⁵ Tí xikaha sjch'erá la ntá jahará chaxín xjeen It'eni tjen nkaya nkajni kixin jehe ch'án mé t'etoan ch'án tsjiton ygon ts'inkaséyehenhen tí sín jínahya la ko tí sín jina la ko kjaxin t'etoan ch'án kixin ts'aniá ichrin tí sín tí sín jina la ko tí sín jínahya.

⁴⁶ Tí jehó tjuèhérá tí nkexro tjuáhará, ¿la ntá nkehe chrókuachará? A ntá kjaxin tí sín nchejjenkí la xikaha ch'e sín.

⁴⁷ La tí jehó nixjehérá tí sín kichuárá la ntá, ¿á chaxín imá jina tíha ní? Kixin tí xikaha la kjaxin tí sín chónhya Dios la xikaha ich'e sín.

⁴⁸ Kjaxinrá jahará ntoá chrók'uejorá kixin It'eni tjen nkaya nkajni la antsí má ntoá tjen ch'án.

6

Kjuako ch'in Jesús kuènté tí xra jina

¹ 'Chrókuásixínhyará kjuaxroan tí nkehe tinkachónkirá kixin tjinkáonrá chrók'uikon chojni ó. A ntá jahará tí xikaha chrókuich'erá ntá It'eni tjen nkaya nkajni la ninkehó nkehe tsotjáhyará ch'án.

² Tí tjinkitsará ijnko chojni nòla la ninkexró chróchenkahyará. Jahará chrókóyóahyará tí sín ntoáhya tjenkayáxin ixri t'óxroan kixin mé xikaha ch'e sín t'óxroan sín nkaxenhen njnko la ko tí ntia kixin chrók'uikon chojni la chrókuikosáyehe sín tí jehe sín kixin jina tjejóch'e sín. A ntá janhan ntáxrjan kixin ó kjuixin k'uáyéhe sín nkehe la í ts'áyéhya sín inaá.

³ A ntá tí jahará tió chrókuinkitsará ijnko chojni chaxín nòla la íchá jina kixin chrókónoehya ninkexró kjónté ijnko nkexro tjuá jina.

⁴ A ntá jahará tí chrókuánjonrá ichrén nkehe la ninkexró chrókónoehya la ntá tí It'eni ts'ikon ch'án kixin xikaha ch'erá la ninkexró noehya la ntá tí jehe ch'án mé tsotjáhará ch'án nkehe.

Tjako ch'in Jesús nkexrí tsonixjeheni Dios
(Lc. 11.2-4)

⁵ A ntá tió nixjehérá Dios la jehya éxí tí sín jnkojínxónhya tjenkayáxin sín chrónixjará. Jehe sín mé tóxrjínhin sín ts'ejóxin toté sín nkaxenhen njnko la ko ts'ejó sín esquina calle kuènte ntsin kixin ts'ikon kaín chojni kixin tjejónixjehé sín Dios. Ntá janhan chaxín ntáxrjan kixin jehe sín la xikaha kjuich'e sín la ó kjuixin k'uáyéhe sín nkehe la í ts'áyéhya sín inaá.

⁶ A ntá tió nixjehérá Dios la t'ixenhnénrá nchia ntógará la t'ikjehérá tí puerta la nixjehérá It'eni kixin ntaha tjejóará ch'án. A ntá jehe ch'án ts'ikon kixin xikaha ninkexró ts'ikonhya ntá jehe ch'án tsjanjon ch'án nkehe ts'ayéhérá.

* 5:38 Éxodo 21.24; Levítico 24.20; Deuteronomio 19.21 † 5:43 Levítico 19.18

⁷ Ntá tió chrónixjehérá Dios la chrókjatgehya chrónixjará kixin chrókóyóahyará éxi tí sín chónhya Dios kixin jehe sín tjenkayáxin sín kixin nchónhya tsonixja sín, la mé xikaha mé chrókuinhin Dios, ichro sín.

⁸ A ntá jahará chrókóyóahyará éxi tí jehe sín. It'eni ó nohe ch'án nkehe t'ichjánxinhanrá kjónté naxá tjanchéhyará ch'án.

⁹ Méxra xikihi chróntáchrórá:
It'eni tjen nkaya nkajní jaha imá tjóá.

¹⁰ Chrókui tí kjuachaxin kuénta.

Chrókjuich'e tí nkehe tóxrjínhan jaha ntihi chjasintajni éxi tjech'e nkaya nkajní.

¹¹ Ijie la tsjánjuan tí niqtja t'ichjánxinhinni.

¹² T'oxíka tí nkehe jínahya kjuich'eni kixin kjaxin jeheni ts'itjáyenhenni tí nkehe kjuich'eheni chojni.

¹³ Tjtoéhyani kixin xrahya chrókjuasinni jie. Nchekaáni kain tí jínahya chrókhenni, kixin jaha mé kuéntá tí kjuachaxin kixin ó noheni kixin jaha tjetétoan tí kjuachaxin jnkochrixin. Amén.

¹⁴ Tí jahará ts'itjáyánhanrá tí nkexro kjuasinhanrá ichrén jie la mé kjaxin It'eni tjen nkaya nkajní mé ts'ikon ch'án kixin xikaha kjuich'erá la ntá kjaxin jehe ch'án ts'óxíka ch'án tí jie kjuásinrá.

¹⁵ A ntá tí jahará ts'itjáyánhyará tí jie kjuasinhanrá í jnko chojni la ntá kjaxin It'eni tjen nkaya nkajní ts'ikon kixin xikaha kjuich'erá k'uitjáyánhyará la ntá kjaxin jehe ch'án la ts'óxíkahya ch'án tí jie chontará.

Ch'in Jesús kjuako kixin chrók'óxroanhya sín kixin kjónehya sín

¹⁶ A ntá tí jahará tí naxá kjóntehyará kixin tjinkáonrá tsonixjehérá Dios la ntá chrók'uejohyará éxi t'avará éxi ch'e tí sín jehya jnkojinxón tjenkayáxin sín. Mé xikaha ch'e sín kixin tjinkaon sín ts'ikon chojni kixin naxá kjónehya sín. Tí xikaha ch'e sín la janhan ntáxrjan kixin ó kjuixin k'uáyéhe sín nkehe la í ts'áyéhya sín inaá.

¹⁷ A ntá tí jahará kjónté naxá kjóntehyará kixin tjinkáonrá tsonixjehérá Dios la t'ontirá ikonrá la tjétoará kjará

¹⁸ kixin tsonoehya chojni kixin naxá kjóntehyará. Jehó It'eni tjekoará ntiha mé jehe ch'án nohe ch'án xikaha ntá tsjanjon ch'án nkehe ts'ayéhérá.

Tí nkehe chaxín tjete siín nkaya nkajní

(Lc. 12.33-34)

¹⁹ Jahará chrókjuásitonhyará nkehe tjete ntihi chjasintajni kixin ntihi la ts'in kué tí nkehe tjete sinchek'itjáyánhanrá va la ko tsochjisen tí chichaon la ko xichee ts'ixenhen tsaáhará.

²⁰ Íchá jína tjásitonrá tí nkehe tjete nkaya nkajní kixin ntaha kohya iko sinchek'itjáyán nkehe la tsochjisenhya tí nkehe la ko kohya xichee ts'ixenhen tsee.

²¹ A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

Tí xrohi t'inkaséyanxín cuerpo

(Lc. 11.34-36)

²² Tí ikonrá mé éxi yóhe ijnko xrohi t'inkaséyanxín tí cuerpo kuéntará. Tí jína ikonrá la ntá kjaxin kuénté tí cuerpo kuéntará mé chónxa xrohi.

²³ A ntá tí ikonrá la jínahya la ntá kuénté tí cuerpo kuéntará la sítié tjen. A ntá tí chrókjuak'ehya tí xrohi la ntá antsí má chrókjuinchetié tí sítié.

Dios la ko tí chichaon

(Lc. 16.13)

²⁴ Kohya ninkexró tsjacha sich'ehe xra yaá lamó. Tí xikaha chrókjuich'e ch'án la ntá ijnko tsonínkakonhen ch'án la tí í jnko tsojtuehe ch'án o ijnko la tsitekakonhen ch'án la tí í jnko la tsitekakuenhya ch'án. Méxra xitjahya chrókjuich'ehe chojni xra Dios tí tjinkaon sín chróchónxa sín itsjé chichaon.

Dios mé t'áyakonhen tí xjeen ch'án

(Lc. 12.22-31)

²⁵ A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uitsará. ¿Á jehya antsí má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya antsí má sínkí tí cuerpo kuéntará, a ntá kánhyó sínkí tí ka chrók'uitsará?

²⁶ Xráxinkáonrá nkexrí siín tí koxroxé xritjaka. Jehe va la t'enkahya va noa la ko tjáhya va la ko chóntahya va nketí ts'inkáčhjinayá va tí noa, la kjánchó It'eni tjen nkaya nkajní la tjanjon ch'án nkehe sine va. A ntá jahará mé antsí tjetóan a ntá tí koxroxé la kénhyó.

²⁷ ¿Á tjejó njkojinrá tjenkayáxinrá kixin tí chrókóxakonhanrá imá a ntá naxa chrók'uankirá it'o metro ntetoxinrá inaá?

²⁸ ¿Nkekuènté kixin imá tóxakonhanrá ikará ó? Tsjehérá nkexrí sit'ánkí tí catsjo siín nteje. Tí itsjo la ní ch'ehya xra la ko tjonhya.

²⁹ La tjonkará kixin kjónté ch'in rey Salomón k'uechénta itsje chichaon la naxa kjuíncheyóehya ch'án nkexrí náxrjón tsjehe tí tsjo a.

³⁰ A ntá tí Dios la nchek'litsa tí ka yoa siín nteje kjónté ijie síchón ka la ntóye tsochexín tí nkaxenhen tja, a ntá jahará mé antsí chrókjuintak'itsará ch'án. ¿A ntá nkekuènté titekákonhyará ch'án?

³¹ Méxra xikaha chrókóxakuanhyará chrókjuanchankíhyará kixin nkehe chrókjónterá o nkehe chrók'uirá o nkehe chrók'uitsará.

³² Kaín tí nkehe la tí sín chónhya Dios mé tóxakonhen sín tíha. A ntá jahará chontará It'eni tjen nkaya nkajni la mé nohe ch'án kaín nkehe t'ichjánxinhanrá.

³³ A ntá senó mé chrókjuéyará tí kjuachaxin kuénté Dios la chrókjuínchexiteyará tí nkehe jina tjinkaon ch'án, a ntá jehe ch'án mé tsjanjon ch'án kaín nkehe t'ichjánxinhanrá.

³⁴ Tóxakuanhyará tí nkehe tsonhen ntóye xikaha kixin ntóye la í jnko yaon táha la jnkojnko yaon tjikao kjuaxikaon kuènte.

7

Chrók'uantaxíenhyará kichuára

(Lc. 6.37-38, 41-42)

¹ Chrókuékahyará ókjé chojni jié kixin ntá Dios kjaxin chrókjuanchahya jié tí jahará.

² A ntá Dios la tsjanchia ch'án jié tí jahará tí tsékará ókjé chojni jié. A ntá tí xikaha sích'erá la mé xikaha tsonhanrá kjaxin.

³ ¿A ntá nkekuènte tsjehé tí chjíninó ntsí tjenkánkí ikon tí kichuá tí naxa antósán tí inta jié tjenkánkí ikuan?

⁴ A ntá tí chonta jaha tí nta jié tjenkánkí ikuan, ¿a ntá nkexrí kixin chróntáche tí kichuá kixin: "Tjohé tsakitsjenkíni tí chjíninó ntsí tjenkánkí tí kuan?"

⁵ A ntá jaha la ntoáhya tjenkayáxian. Senó chrókuakitsjenkiá tí nta jié tjenkánkí ikuan kixin ntá chrók'uikuan tsakitsjenkiá chjíninó ntsí tjenkánkí ikon tí kichuá.

⁶ Chróchjeéhyará tí nkehe tsikótjóá tí konja kixin jehe va tsokjan va tsonínkakonhanrá va ntá sinchekuenrá va. La ko kjaxin chróchjeéhyará tí cochíno tí xro perla tjete kixin tsinkátja va la tsokuen.

Tjanchia la tjéyá la t'inka puerta

(Lc. 11.9-13; 6.31)

⁷ Tjanchiará nkehe la Dios tsotjáhará. Tjéyará nkehe la ts'itjará. T'inkará puerta la ntá tsoxitjehe.

⁸ Kixin tí nkexro tjanchia nkehe la ts'áyehé tí nkehe la tí nkexro tjeyá nkehe la ts'itja la tí nkexro t'inka puerta la tsoxitjehe.

⁹ ¿Á tjejó njkojin nkexro ntíhi chrókjuanjon xro chrókjón xjeen tí chrókjuanchia xjan niotja? Kja náhi.

¹⁰ O tí chrókjuanchia xjan ijnko koche la, ¿a chróchjehe ch'án tí xjeen ch'án konche chrókjóné ní? Kja náhi.

¹¹ A ntá jahará kjónté jínahyará la ó nohará nkehe jina chjehérá xjaanrá. A ntá It'eni tjen nkaya nkajni kjaxin antsí tsochjehe ch'án nkehe jina tí nkexro tsjanchia nkehe.

¹² Méxra xikaha chrókjuikosáyehehérá kichuára éxi yóhe nkexrí tjinkáonrá chrókjuikosáyahará sín mé xikaha k'ueqoan ch'in Moisés la ko xikaha ntáchro tí xroon kuènte tí sín k'uechrónka itén Dios ósé.

Tí puerta tekahya

(Lc. 13.24)

¹³ T'ixgenxínrá tí puerta tekahya. Kixin tí puerta la ko tí ntja ts'itjáyaxín chojni la imá iton la ko teka la nchónhya chojni sátsji tí ntja ntíha.

¹⁴ A ntá tí puerta la ko tí ntja sátsjixínni tí kjuachón la tekahya ntíha la ko tsjéhya chojni ts'itja tí ntja a.

Tí to mé tjátsənxínni tí nta

(Lc. 6.43-44)

¹⁵ Méxra tóxakonhanrá tí ts'ikonrá itsi tí sín ch'ia tsontáchro sín kixin kjaxin sín nixja sín itén Dios. Jehe sín la chrítaón ó tjeé kolélo ó, a ntá nkaya la kolobo jiéhe.

¹⁶ Jahará la chrókjuátsənxínrá tí jehe sín kixin tí xra ch'e sín kixin tí ntach'í la xitjahya chrók'óna to uva la ko tí kach'í xitjahya chrók'óna to higo.

¹⁷ Méxra kaín inta jína la t'óna to jína la ntá tí nta jínahya la kjaxin tí to la jehya to jína.

¹⁸ Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína.

¹⁹ Kaínxín tí nta t'ónahya to jína mé tsochrínjin la tsoche.

²⁰ Mé xíkaha chrókjuatsqanxínra jahará tí sín jehya jína kixin tí xra tjejóch'e sín.

Jehya kaín chojni ts'ixenhen tí kjuachaxiën Dios tjen nkaya nkajní

(Lc. 13.25-27)

²¹ Kénhya chojni tsontáχρο: “Ínchéni, Ínchéni”, mé ts'ixenhen sín tí kjuachaxiën Dios tjen nkaya nkajní. Náhi. Jehó tí nkexro sinchexiteyá tí nkehe tóxrjínjin T'aná t'etqan tjen nkaya nkajní.

²² Tsjixraká tí yaon a la ntá itsjé sín tsontáχρο sín kixin: “Ínchéni, Ínchéni, k'uénixjaxínni ihnjá la ko tí ihnjá mé kuakitsjexínni nchakuen tí jínahya la ko kjuachaxiën ihnjá kjuasixínni nchónhya kjuaxroan.”

²³ A ntá janhan tsjataha kixin: “Janhan la chonhya tí jahará. Títónará sáttjirá kixin jahará imá jínahará.”

Ch'in Jesús kjuíncheyóexin ch'án kixin yaá nchia

(Lc. 6.47-49; Mr. 1.22)

²⁴ Méxra tí nkexro tinhin tí nkehe ntáxrjan la titekaon ch'án la jehe ch'án mé éxi yóhe ijnko nkexro chóntha kjuaxrexinkaon jína la kjuích'éna nchia chrítaón tjo.

²⁵ A ntá xrinahya xrakoa chrin, ikui yeé ntánniche la tjan chjéhe xrinto la kjónté xíkaha la xíkaha tí nchia kixin itjo tjekjen nchia.

²⁶ A ntá tí nkexro tinhin tí xrjanka la titekakonhya mé jehe la éxi yóhe ijnko nkexro lónti la kjuích'éna ch'án ijnko nchia tí síin nchesen.

²⁷ La ntá xrinahya xrakoa chrin ntá antsí kóyee ntánniche tí tsaka la ko chjéhe xrinto la ntá xíka tí nchia, la ijnko kjuachrakon kónhen tíha.

²⁸ A ntá tí kjuixin nixja ch'in Jesús la ntá imá chrakon tí chojni kixin nkexrí kjuako ch'án.

²⁹ Kixin kjuako ch'án éxi ijnko nkexro chóntha imá kjuachaxin la tóyóehya ch'án tí sín maestro kjuako tí ley.

8

Ch'in Jesús kjuínchekitohe jína ijnko chojni chóntha chin lepra

(Mr. 1.40-45; Lc. 5.12-16)

¹ A ntá ch'in Jesús k'uínkajínxin ch'án tí jna la chréhe nchónhya chojni.

² La ntá kóchjina ijnko ch'in níhi chóntha chin lepra la kjuák'exin toch'in ch'án nkayakon ch'in Jesús la ntáχρο ch'án kixin:

—Ínchéni tí tjinkávan la jína chrókjuínchekitohéni jína —ichro ch'án.

³ Ntá ch'in Jesús mé kjuak'etja itja ch'án chrítaón tí ch'in a la ntáχρο ch'án kixin:

—Méxra xíkaha tjínkavan. Ntá jie sintakitoha jína.

A ntá tuénxín kuítóhe ch'án jína la ó kjuilin tí chin k'uéchóntha ch'án.

⁴ La ntá ntáχρο ch'in Jesús kixin:

—Ninkexró chenkahya ntihi. Jehó sáttja tjácohé tí ch'in nch'á kixin kuítóha jína la ko sáttjioa tí nkehe tsík'etqan ch'in Moisés* kixin ntá xíkaha tsoñoexin kaín xín chojni kixin ó kuítóha jína —mé xíkaha k'uetoan ch'in Jesús.

Ch'in Jesús kjuínchekitohe jína ijnko nkexro ch'ehé xra ijnko capitán romano

(Lc. 7.1-10)

⁵ A ntá tí k'uixenhen ch'in Jesús chjasin Capernaum la ntá xrinahya kóchjina ijnko capitán romano la chrónða ch'án

⁶ ntáχρο ch'án kixin:

—Ínchéni ntoeni itjen ijnko ch'in ch'eheni xra mé níhi ch'án, tjetsínka ch'án, tsík'en toté ch'án la imá tjetéhe ch'án —ichro ch'án.

⁷ A ntá ch'in Jesús kjuátéhe ch'án ntáχρο ch'án kixin:

—¿Á sátsjia sintakitoha jína tí ch'in a? —ichro ch'án.

⁸ Ntá tí ch'in capitán kjuátéhe kixin:

—Náhi, Ínchéni, tósuéhéni kixin chrók'uixenhen ntoeni kixin jehya chojni jínani. Jehó chrókjuánjuan kjuachaxin kuéntá, ntá tí ch'in ch'eheni xra chrókuitohe ch'án jína.

⁹ Janhan na kjaxin chonta chojni t'etuanna la ko kjaxin janhan tétuanhan tí sín soldado. Tíó tétuanhan ijnko sín sátsji sín la ntá ó sátsji sín. La kjaxin tíó tétuanhan ijnko sín kixin xrakoa sín la mé tji sín. La ko tíó tétuanhan ijnko nkexro ch'ena xra kixin sich'e xra la ich'e xra —ichro ch'án.

* 8:4 Levítico 14.1-32

¹⁰ Ntá kuínhin ch'ín Jesús ntá kóxakonhen ch'án kixin xíkaha chro tí ch'ín a, ntá nixjehe ch'án tí sín chréhe ch'án ntá chro ch'án kixin:

—Chaxín ntáxrxjan kixin kuénté tí nación Israel la k'uitjahya janhan ninkexró tinkáchónki xíkaha éxi tinkáchónki tí ch'ín i.

¹¹ Janhan xrxjanka kixin nchónhya chojni ókjé tjiixin tí tjióxin yaon la ko tí tjiátóxin yaon la sineko sín tí ch'ín Abraham la ko Isaac la ko Jacob tí tjen tí kjuachaxin kuénte Dios.

¹² A ntá itsjé tí sín chrók'uejó tí tjen tí kjuachaxin kuénte Dios la ts'axrxjén sín ntíha, sátsji sín tí sitié la ntaha tsotsjánka sín la sinetaón neno sín.

¹³ La ntá ch'ín Jesús mé nixjehe ch'án tí ch'ín capitán ntá chro ch'án kixin:

—Sátjia ntóa. Éxi kuítekáván jaha la tsoxiteyá tsonhen tíha —ichro ch'án.

La ntá tí ch'ín ch'e xrxá la o tuénxín tí hora a tsíkítóhe ch'án jína.

Ch'ín Jesús kjuínchekítóhe ich'ee ch'ín Pedro jína

(Mr. 1.29-31; Lc. 4.38-39)

¹⁴ A ntá sákjuí ch'ín Jesús tí ntóe ch'ín Pedro la ntaha k'uikon ch'án kixin tí ich'ee ch'ín Pedro la níhi tjan tjetsínka tjan la chóna tjan sóa.

¹⁵ Ntá itsé ch'án itja tjan la ntá kjuínhin tjan tí sóa la ntá k'uínkatjen tjan la kjuánkixin yaxínhin tjan kixin tsjanjon tjan nkehe sine sín.

Ch'ín Jesús kjuínchekítóhe nchónhya tí sín níhi jína

(Mr. 1.32-34; Lc. 4.40-41)

¹⁶ La ntá tí ó kóntanonte ntá kjuikohe sín ch'ín Jesús nchónhya chojni chóna nchakuen tí jínahya. La ntá jnkokoá nixja ch'án la k'uaxrxjén tí nchakuen tí jínahya tí jehe sín la kjaxin kjuínchekítóhe ch'án jína kaín tí sinníhi.

¹⁷ Mé xíkaha kjuich'e ch'án kixin tsoxiteyá tí nkehe tsíchronka tí ch'ín Isaías tí ch'ín k'uéchronka itén Dios. Mé ntá chro ch'án xíkíhi: “Jehe ch'án kuákja ch'án tí chin chóntani la ko jehe ch'án kuámá ch'án tí kjuatjoté.”† Mé xíkaha ichro itén Dios.

Tí sín tjínkaon tsochréhe tí ch'ín Jesús

(Lc. 9.57-62)

¹⁸ Tíó k'uikon ch'ín Jesús kixin nchónhya chojni k'uántatjen sín ch'án la ntá k'ueqoan ch'án kixin ts'atóye sín í jnko chrínta ntá.

¹⁹ La ntá ijnko tí sín maestro tjako tí ley mé kóchjinehe ch'án tí ch'ín Jesús la ntá chro ch'án kixin:

—Maestro tjínkaonni chróchréheni tí jaha kjónté nketi tjínkáván sátsjia —ichro tí ch'ín a.

²⁰ La ntá kjuátéhe ch'ín Jesús ntá chro ch'án kixin:

—Tí koxróntá chóna va itjueé va la ko tí koxroxé chóna va kaké va. A ntá tí Xjen Dios K'óna Chojni mé chónahya nketi ts'ok'èxin ch'án.

²¹ A ntá ijnko tí chojni k'uájiko ch'án, mé ntá chro ch'án kixin:

—Ínchéni, títohéni senó sátsjikjaván it'eni —ichro ch'án.

²² La ntá kjuátéhe ch'ín Jesús ntá chro ch'án kixin:

—Náhi, chréhe tí janhan. Títohé kixin tí chojni tsík'en la jnkokón sín tsík'en tsjavá kíchó sín —mé xíkaha ichro ch'ín Jesús.

Ch'ín Jesús kjuínchek'ixrata tí xrintó la ko tí ntá

(Mr. 4.35-41; Lc. 8.22-25)

²³ Ntá ch'ín Jesús k'uixenhen tí ntabárcó la k'uixenko ch'án tí sín k'uájiko ch'án.

²⁴ La ntá xrxínahya imá síchrica ntá la ó chjina sitíkia ntá tí ntabárcó. La kjánchó ch'ín Jesús la tjeua ch'án.

²⁵ La ntá tí sín k'uájiko ch'án kjuínchek'àya sín ch'án la ntá chro sín kixin:

—Ínchéni nchekaáni kixin tí ntabárcó la ó meró ts'aniánki ntá —ichro sín.

²⁶ Ntá kjuátéhe ch'án ntá chro ch'án kixin:

—¿Nkekuénté kixin imá chrakonrá? Intsíkoá tinkachónkirá Dios —ichro ch'án.

Kjuixin ntá chro ch'án xíkaha ntá k'uàya ch'án la k'ueqoanhen ch'án tí xrintó la ko tí ntayaon la ntá tuénxín k'uixrata.

²⁷ La ntá imá chrakon sín la ntá chro sín kixin:

—¿Xá nkexro tíhi? Kjónté xrintó la ko ntayaon la mé nchexiteyéhé ch'án —ichro sín.

Tí sín chóna nchakuen tí jínahya tí nonte Gadara

(Mr. 5.1-20; Lc. 8.26-39)

²⁸ Ntá tíó k'uátóye ch'ín Jesús tí ntayaon a ntá kjuíji sín tí nonte Gadara. La ntá yaá chojni chóna nchakuen tí jínahya k'uaxrxjén tòyé chojni tsík'en la kóchjinehe sín ch'án. Jehe sín mé imá jiehe sín la kohya ninkexró tjacha ts'atsínka tí ntja ntíha.

²⁹ La ntá kjuankíxin k'óyako sín ntáchro sín kíxin:

—Tjiatéhya jaha tí jeheni jaha Jesús mé Xjeen Dios. ¿Á k'uinka ntihi kíxin sijnchekjasóteni kjonéte naxá kjuixrakáhya tí yaon tsjasóteni? —ichro sín.

³⁰ A ntá ntiha kánhyó kjín síin itsjé cochíno xrine va.

³¹ La ntá tí nchakuen tí jínahya mé chrónóghé tí ch'ín Jesús kíxin:

—Tí tsétəan kíxin sátsjini la chrókjuánjuan kjuachaxin chrók'uixenhenni tí cochíno —ichro sín.

³² Ntá ntáchro ch'ín Jesús kíxin:

—Tí xikaha la sátsjia —ichro ch'án.

La ntá tí nchakuen tí jínahya a mé k'uaxrjexín tí chojni la k'uixenhen tí cochíno. La ntá kaín xín tí cochíno kuinká va, k'uínkajinxín va ntiha kjuítsinkayá va tsaka, ntá kjuítsinkankí va nta, kjuínhin va nta.

³³ La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankíxin chrónka sín kaín tí nkehe kónhen la ko kaín nkehe kónhen tí sín k'uéchénta tí nchakuen tí jínahya.

³⁴ A ntá kaín tí sín chjasin ntiha sákjuítsjehe sín ntá kjuíji sín tí tjen ch'ín Jesús ntá k'uíkon sín kíxin xikaha tsikónhen la chrónóghé sín ch'án kíxin sáchrókjuí ch'án ókjé.

9

Ch'ín Jesús kjuínchekitohe jina ijnko chojni tsík'en toté

(Mr. 2.1-12; Lc. 5.17-26)

¹ La ntá kjuíxin tíha ntá ch'ín Jesús mé k'uixenhen ch'án ijnko ntabárcə la k'uátsínka ch'án íjnko lado chrínta ntá la kjuíji ch'án chjasén ch'án.

² A ntá ntiha kuíkəo sín ijnko ch'ín tsík'en toté la tjetsínkaták'á ijnko kania. Ntá k'uíkon ch'ín Jesús kíxin chaxín tinkáchónki sín ch'án la ntá nixjehé ch'án tí sijníhi ntáchro ch'án kíxin:

—Xjeenni nchechéhé asán. Tí jje chonta la ó kjuíxin kjuínhan —ichro ch'án.

³ La ntá iso tí sín maestro tjako tí ley mé jehó sín ikjo sín asén sín, ntáchro sín kíxin:

—Tí ch'ín í mé ncheyóghé ch'án asén ch'án Dios kíxin xikaha nixja ch'án.

⁴ Ntá ch'ín Jesús mé ó nohe ch'án kíxin nkehe tí kjo sín asén sín ntá ntáchro ch'án kíxin:

—¿Nkekuénté kíxin xikaha jínahya tjenkəyáxinrá?

⁵ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kíxin ó kjuíxin kjuínhin ch'án tí jje yámá ch'án ó á antsí xrahya chróntátjan ch'án kíxin chrók'uínkatjen ch'án sáchrókjuí ch'án?

⁶ Méxra tsjáxəxiə kíxin tí Xjeen Dios K'óna Chojni mé ntihi chjasintajni chóna kjuachaxin tsjakjínhin íjé chojni.

Ntá ntáche ch'án tí sijníhi a kíxin:

—Ije la t'ínkatjen tjatsíyan kaniəa na sátsjia ntəa —ichro ch'án.

⁷ Ntá tí ch'ín tsík'en toté na tuénxín k'uínkatjen ch'án la sakjuí ch'án ntəe ch'án.

⁸ Ntá kaín tí sín síin ntiha k'uíkon sín kíxin xikaha kónhen la imá chrakon sín la kjuanchehe sín Dios kjuasáya kíxin tí nkexro imá kjuəxəxín ch'án kjuachaxin kuénté Dios.

Ch'ín Jesús k'uíyehé ch'án tí ch'ín Mateo

(Mr. 2.13-17; Lc. 5.27-32)

⁹ A ntá ch'ín Jesús sákjuíxin ch'án ntiha la k'uíkon ch'án ijnko ch'ín it'ín Mateo tjetjəxín ch'án ntiha nchekjənkí ch'án. Ntá ntáchro ch'ín Jesús kíxin:

—Chréhé tí janhan —ichro ch'án.

Ntá ch'ín Mateo tuénxín k'uínkatjen ch'án chréhe ch'án tí ch'ín Jesús.

¹⁰ A ntá chr'éxín ch'ín Jesús kjuák'e ch'án ntəe tí ch'ín Mateo la ntaha xranjon nkehe sine ch'án la ntá itsjé tí sín nchekjənkí la ko í so sín chóna jje mé kjuíji sín la kjəxín kjonəko sín tí ch'ín Jesús la ko tí sín k'uájiko ch'án.

¹¹ La ntá tí sín fariseo kjəxín k'uíkon sín xikaha la kjuanchankíhi sín tí sín k'uájiko ch'ín Jesús, ntáchro sín kíxin:

—¿Nkekuénté kíxin tí ch'ín maestro kuéntará mé neko ch'án tí sín nchekjənkí la ko tí í so sín chóna jje? —ichro sín.

¹² Ntá ch'ín Jesús la kuínhin ch'án nkehe tí tjo sín la ntáchro ch'án kíxin:

—Tí sín níehya la t'ichjánxienhya sín nkexro sich'e xroən. Náhí. Jehó tí chojni níhi mé t'ichjánxínhin sín nkexro sich'ehe sín xroən.

¹³ Sátjirá la ts'ítjará nkexrí t'axrjexín tí nkehe ntáchro xroon itén Dios. Mé ntáchro kíxin: "Janhan tjínkəvan kíxin chrókjuíkonəghérá chojni la tjínkəkonhya kíxin chrók'oyánrá iko

chrókjuánjonrá.”* Mé xikaha ichro itén Dios. Janhan na k'uinkahya ntihi kixin chrók'uíyaha chojni jina tjejó. Náhi. K'uinka kixin ts'iyaha tí chojni chóna jie kixin chrókuítøhe sín tí ijje sín ntá chrókuínkí sín tí tjenkayáxin sín —ichro ch'án.

Kjuanchankí sín kuènte tí nehya sín
(Mr. 2.18-22; Lc. 5.33-39)

¹⁴ Ntá iso tí sín k'uék'ajiko tí ch'ín Juan Bautista mé kóchjinehe sín ch'ín Jesús la kjuanchankíhi sín ch'án, ntáchro sín kixin:

—Jeheni la ko tí sín fariseo la jnkoyaxon nehyaní, a ntá tí sín xrikoá la, ¿nkekuènte xikahya ch'e sín? —ichro sín.

¹⁵ Ntá kjuátøhe ch'ín Jesús, ntáchro ch'án kixin:

—¿Xá chrók'uává kaín tí sín tsík'íyehø sín tsochjina tsoøøhe ijnko chojni kixin naøa tjen tí ch'ín tsíkóøtehe tjejóko sín ntiha? A ntá tsjixraká ijnko yaon tsotsé sín tí ch'ín tsíkóøtehe sátsjiko sín ch'án ntá kaín tí sín tsíkóchjina mé ts'avá sín la í sinehya sín.

¹⁶ Nijnko chojni chrókjuak'eniøhe tí ka ó ntaxin it'ø ka nixin kixin ntá chrókjuixéhe tí ka nixin chrók'uitjjan tí ka ntaxin ntá antsí má chrók'úichje.

¹⁷ La ko kjaxin éxí yóøe chrókjuikjahya chojni xranvino nixin ijnko tjuaxran ó ntaxin kixin tí xikaha chrókjuich'e sín ntá chrók'úichje tí tjuaxran ntaxin. Ntá chrók'uitjýan tí xran la ko chrok'uitjýan tí tjuaxran. Ntá tí xranvino nixin chrókuika ijnko tjuaxran nixin la ntá xikaha la yóí nkehe chrók'uitjýanhya.

Ch'ín Jesús kjuínchexechón tí tjachjin xjeen ch'ín Jairo la ko kjuínchekitøhe jina ijnko tjan kuákóxin iké ch'án

(Mr. 5.21-43; Lc. 8.40-56)

¹⁸ Ntá naøa tjenixja ch'ín Jesús la ntá ikjui ijnko ch'ín t'etøan kuènte tí sín judío la kjuak'exín toch'ín ch'án nkayakon tí ch'ín Jesús la chrónøøhe ch'án kixin:

—Tí xjanna na ntá kjuixin k'uén. Xrjanóøaha sáchrókjuini chrókjuakétja tjá jehe tjan ntá chróøechón tjan —ichro ch'án.

¹⁹ Ntá k'uínkatjen ch'ín Jesús ntá sákjuíko ch'án tí ch'ín a la ko sákjuíkotoxin ch'án tí sín k'uaájiko ch'án.

²⁰ A ntá itjen ijnko chojni chjin níhi tjan, ó teyo nánó chóna tjan ijnko chin ts'ítji tjan jni. Ntá kóchjina tjan nóton tí ch'ín Jesús ntá kuákóxin tjan tí iké ch'án

²¹ kixin tjenkayáxin tjan kixin kjónté chrínta iké ch'án ó chrókuákóxin tjan, la táhó chrókuítøexín tjan jina.

²² Ntá nkátjía ch'ín Jesús la k'uíkon ch'án tí tjan a ntá ntáchro ch'án kixin:

—Xjeenni, nchechéhé asán jaha. Jaha la ó kuítøha jina kixin kuítékávan tí janhan —ichro ch'án.

Na ntá tuénxín ó kuítøhe tjan jina.

²³ Ntá tió kjují ch'ín Jesús ntøe tí ch'ín judío t'etøan la k'uíkon ch'án kixin ó yaxínhin tí sín músico kixin ó sátsjixravá xjan. La kaín tí chojni tsíkójnkotsé la tsjánkamá sín xjan.

²⁴ La ntá ntáchro ch'ín Jesús kixin:

—Tí xjan méøe tjtøhéra, kixin tsík'enhya xjan, la tjejuá xjan ó —ichro ch'án.

Ntá kjuanoá sín ch'án.

²⁵ A ntá tí k'uaxrje kaín chojni la ntá ch'ín Jesús la k'uíxenhén ch'án la itsé ch'án itja tí tjan a la ntá tuénxín k'uínkatjen tjan.

²⁶ Ntá kuénté chjasin ntiha la kuínhin sín kixin xikaha kónhen.

Ch'ín Jesús kjuínchekitøhe jina yaá sín t'ikonhya

²⁷ Ntá sákjuixin ch'ín Jesús ntiha la ntá yaá chojni t'ikonhya kjuíchréhe tí jehe ch'án la k'uíyehø sín ch'án ntáchro sín kixin:

—Tikonóøhéni jaha tsík'axrjeníxian David.

²⁸ Ntá k'uíxenhén ch'ín Jesús ijnko nchia na ntá kóchjina tí yaá sín t'ikonhya la ntá ch'ín Jesús kjuanchankíhi sín ch'án, ntáchro ch'án kixin:

—¿Á títékávan kixin tsjácha sit'a xikaha? —mé xikaha kjuanchankí ch'án.

Ntá kjuátøhe sín kixin:

—Jeén, Ínchéni, titekaonni.

²⁹ Ntá ch'ín Jesús kjuak'etja tja ch'án chrítaón ikon sín la ntáchro ch'án kixin:

—Tí xikaha kuítékávan la tsoxiteyá —mé xikaha ichro ch'án.

³⁰ La ntá tuénxín ó jina t'ikon sín. Ntá ch'ín Jesús k'uetøenhén sín ch'án kixin:

—Ninkexró tsochenkahyará —ichro ch'án.

³¹ Ntá tuénxín sákjuí sín la nkuíxin chjasin ntiha chrónka sín tí kjuaxroan kjuasin ch'ín Jesús.

* 9:13 Oseas 6.6

Ch'in Jesús kjuínchekitohe jína ijnko ch'in nósin

³² Tíó sákjuú tí sín k'uék'ikonhya, a ntá iso chojni kjuikao sín ijnko ch'in nósin ch'án la chóna ch'án nchakuen tí jínahya.

³³ Ntá ch'in Jesús kuakitsje tí nchakuen tí jínahya ntá tí ch'in nósin la ó kjuankixín nixja ch'án. Ntá kaín chojni la k'uikon sín la ntácho sín kixin:

— Nunca t'ikonhyéni ijnko kjuaxroan xikaha kuénté tí nació Israel —ichro sín.

³⁴ A ntá tí sín fariseo ntácho sín kixin:

— Tí nkexro t'etuenhen tí nchakuen tí jínahya tsíkjanjon kjuachaxin mé xikaha takitsje tí ch'in i tí nchakuen tí jínahya —mé xikaha ichro sín.

Ch'in Jesús kuíkonóehé ch'án chojni

³⁵ Ntá k'uátsínka ch'in Jesús itsjé chjasin jié la ko chjasin ntsí la kjuakoxín ch'án jnkojnko njnko Israel. Chónka ch'án tí tan jína nkexrí tjen tí kjuachaxin kuénte Dios. La ntá kjuínchekitohe ch'án jína chojni níhi chóna kaín xín chin la ko chojni chóna kjuatjoté.

³⁶ K'uikon ch'án kixin nchónhya chojni k'uéjío sín ntá kuíkonóehé ch'án sín kixin imá tóxakonhen sín la k'uéjío sín éxi kolélo chónahya nkexro t'ayakonhen.

³⁷ Ntá ntáche ch'án tí sín k'uájiko ch'án kixin:

— Chaxín ntáxrjan janhan kixin imá tsík'óna, kjánchó chojni sich'e xra mé tsjéhya.

³⁸ Chrókjuancheherá tí Inché tí nonte kixin chróchr'án ch'án itsjé chojni chrókjuich'e xra —mé xikaha ichro ch'in Jesús.

10

Ch'in Jesús kjueyá teyó sín ts'ajiko ch'án

(Mr. 3.13-19; Lc. 6.12-16)

¹ Ntá ch'in Jesús mé kjueyá ch'án teyó sín ts'ajiko ch'án la kjuanjon ch'án kjuachaxin tsakitsje sín kaín tí nchakuen tí jínahya t'etuenhen asén chojni la ko sinchekitohe sín jína kaín chojni chóna kaín chin la ko kaín xín kjuatjoté.

² Na mé tí teyó sín k'uájiko ch'án mé it'in sín xikihi: saoxín mé ch'in Simón na mé kjaxin it'in ch'án Pedro la ko kichó ch'án Andrés la ko ch'in Jacobo la ko kichó ch'án Juan mé tí xjeen ch'in Zebedeo.

³ La ko kjaxin ch'in Felipe la ko ch'in Bartolomé la ko ch'in Tomás la ko ch'in Mateo mé tí ch'in nchekjénki la ko ch'in Jacobo xjeen ch'in Alfeo la ko ch'in Lebeo, mé jehe ch'án kjaxin it'in ch'án Tadeo.

⁴ La ko kjaxin ch'in Simón, mé kuénte tí sín cananista, la ko kjaxin ch'in Judas Iscariote, mé tí nkexro chr'éxin kjuínchekji tí ch'in Jesús.

Ch'in Jesús k'uetuenhen tí teyó sín kixin sátsjikako sín kjuachaxin kuénte Dios

(Mr. 6.7-13; Lc. 9.1-6)

⁵ Ntá k'uetuenhen ch'in Jesús tí teyó sín kixin sátsji sín la k'uetóan ch'án kixin:

— Tjhyará tí tjejó tí sín jehya judío la ko t'ixenhyará tí chjasin siín estado Samaria.

⁶ Náhí. Íchá jína sájtjirá tí tjejó tí chojni éxi kolélo kjuíchroé kuénte nació Israel.

⁷ Sájtjirá tjákohérá sín kixin kjuachaxién Dios tjen nkaya nkajni la í séhya tsi.

⁸ Sinchekitohérá jína chojni níhi la ko sinchekitohérá jína tí sín chóna chin lepra la ko sinchexechónrá chojni tsík'en la takitsjerá tí nchakuen tí jínahya. Jahará kjaxin kuitonhanrá tí kjuachaxién Dios, méxra chrókjuachahyará jahará kjaxin.

⁹ Chrókjuikuahyará ninkehó chichaon oro la ko ninkehó chichaon plata la ko ninkehó chichaon cobre

¹⁰ La ko tí sájtjirá ntja la chrókjuikuahyará ka bolsa la chrókjuikuahyará yaá ka chrók'uinkayaterá la ko chrókjuankahyará tokatárá la ko chrókjuikuahyará nta tjixiná. Tí nkexro ch'e xra la jehí siín kjuachaxin niha chrókjóné.

¹¹ A ntá tíó tsjasánrá ijnko chjasin jié ó ijnko chjasin ntsí la tjéyará ijnko nkexro tsjanjon kjuachaxin la ntóe sín ntahó chrókuitohará ntá tsjixin tí xra ntá sátsjirá.

¹² A ntá tíó t'ixenhénrá ntóe sín la nixjehérá sín tjákojínrá jnkojína.

¹³ A ntá tí chaxín jína asén sín la ts'áyéhe sín tí kjuaxroxín, a ntá tí náhi la sájtjikorá tí kjuaxroxín.

¹⁴ A ntá tí tsochrohya sín tsjanjon sín kjuachaxin tsitohará la tjinkakonhya sín tsinhin sín tí nkehe tsochronkará na mé t'axrxjénrá tí ntóe sín o tí chjasén sín la t'oxénjinrá tí inche chóna totará.

¹⁵ A ntá chaxín tjonkará kixin tíó tsjixraká tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchóna sín jié la kánhyó tsjasóte sín, a ntá tí sín chjasin a la antsí tsjasóte sín kixin k'uéjóróxinhya sín tí tan chrókuaáxin sín.

Ókjé sín tsonínakonhen tí sín kuénte Cristo

¹⁶ 'Janhan tsochr'an tí jahará éxí yóhē chróchr'an kolélo ts'ejóyákan kolóbo. Listo chrók'uejorá éxi konche xíkaha la chrók'uejorá éxi kontóá chrókójiyahará.

¹⁷ Chrókóxakonhanrá kixin itsi chojni tsotsé sín tí jahará la sátsjikoará sín tí tjejó tí sín t'et'otan la ko nkaxenhen tí nñkqé sín tsjatiaxínrá sín.

¹⁸ La ntá tsjikaánrá sín tí tjejó tí sín t'et'otan la ko tí sín tí sín rey kixin tinkachónkirá tí janhan. Ntá jina tsochrónkará kixin tinkachónkirá tí janhan nkayakon tí jehe sín la ko nkayakon tí sín chónhya Dios.

¹⁹ A ntá tíó sátsjikoará sín tí tjejó tí sín t'et'otan la tóxakuanhyará nkehe tsontáchrórá q nkexri tsonixjará kixin tíó tsjixraká tí hora la ntá Dios mé tsjinkqitsará tsonixjará.

²⁰ Kixin jehya jahará tsonixjará. Náhi. Tí Nchakuen It'eni mé tsochrónka nkehe tsonixjará.

²¹ 'Ntá iso chojni mé tsjikaán sín tí kichó sín kixin its'en la ko tí it'é mé tsjikaán tí xjeen. A ntá tí xjan mé tsokjan tsonínkakonhen tí it'é kixin its'en.

²² Kaínxín chojni chjasintajni tsonínkakonhanrá sín kixin tinkachónkirá tí janhan. A ntá tí nkexro tsítóehya tsínkáchónki sín tí janhan hasta tsjeje chjasintajni mé tsaá.

²³ Tíó má chónkíhará sín ijnko chjasin la ntá sátsjirá í jnko chjasin. La ntá chaxín tsoxrjanka kixin tí Xjeen Dios K'óna Chojni mé tsokjan tí naxá tjixinhya ts'atsínkará káin tí chjasin Israel.

²⁴ Tí nkexro xrakohē la kánhyó tjeotan la tí maestro la antsí tjeotan, la ko kjaxin tí nkexro ch'e xra la tjeotoanhya la antsí tjeotan tí lamo.

²⁵ A ntá tí nkexro xrakohē chrókjuakoxin ch'án éxi tí nkexro kjuakohē ch'án la ko tí nkexro ch'e xra chrókjuakoxin ch'án éxi tí lámóé ch'án ch'ehe ch'án xra. Tí ch'in inché nchia la kjaxin nchek'in sín Beelzebú la kjaxin tí sín kjéhya xíkaha nchek'in sín.

Nkexro tí chróchrakonhénrá

(Lc. 12.2-9)

²⁶ Méxra chróchrakuénhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kixin chrókónoehya chojni chr'éxin.

²⁷ Tí nkehe tjonkará sítié la t'ichjánxin tsochrónkará tíó itsi xrohi t'inkaséyanxín tí yaon. La ko tí nkehe tjonkará ijie ninkexró noehya la t'ichjánxin chrónkará chrókuinhin káin sín.

²⁸ Chróchrakuénhyará tí sín t'óyan cuérpoé chojni kixin asén chojni xitjahya ts'óyan sín. Íchá jina chróchrakonhénrá tí nkexro tsjacha sinchek'itjáyánxin cuérpoé chojni la ko asén chojni tí xrohi ts'ankahya.

²⁹ '¿Á chrókóxiñhya yaá koxroxé ntsínsi ijnko chichaon ntsí? A ntá kjónté xíkaha la chrók'uanójtjenhya nijnko tí jehe va nonte tí chrókjuanjonyha It'eni kjuachaxin.

³⁰ A ntá kjónté tí kaxihí chóna ikjárá la ó nohe ch'án nkekjaín ka chontará.

³¹ A ntá jahará chróchrakonhyará kixin tóyóahyará tí koxroxé kixin antsí sínkí tí jahará, a ntá tí koxroxé, kjónté nchónhya va, la kánhyó sínkí tíha.

Tí sín tósuéhya tsochrónka sín kixin tinkáchónki sín Cristo nkayakon chojni

(Lc. 12.8-9)

³² 'Káin tí chojni tsochrónka kixin tinkáchónkina sín nkayakon chojni la janhan mé kjaxin tsoxrjanka kixin choxian tí jehe sín nkayakon T'aná tjen nkaya nkajní.

³³ A ntá tí nkexro sinchemána tsontáchro sín kixin chónhya sín tí janhan nkayakon chojni la kjaxin janhan tsontáxrjan kixin chonhya tí jehe sín nkayakon T'aná tjen nkaya nkajní.

Jnkokóahya tsjenkayáxin chojni kixin ó kui Inchéni Jesús

(Lc. 12.51-53; 14.26-27)

³⁴ 'Tjenkayáxinhyará kixin k'uinkakian kjuaxróxin chjasintajni. Náhi. Janhan k'uinkakianhya kjuaxróxin. Tsjanjonko kichó chojni kixin k'uinka janhan.

³⁵ Janhan k'uinka kixin tsonínkakonhen chojni it'é, la ko tí xjeen sín chjin mé tsonínkakonhen iné, la ko tí tiktántá tsonínkakonhen ich'ee.

³⁶ Mé xíkaha tí sín tsonínkakonhen kichó la mé tí sín naxá kjéhya sín.

³⁷ A ntá tí nkexro antsí tjeuēhe it'é sín la ko iné sín la kánhyó tjeuēhe tí janhan la mé xitjahya ts'óna sín kuéntana, la ko tí nkexro antsí tjeuēhe xjeen sín la kánhyó tjeuēhe sín la mé xitjahya ts'óna sín kuéntana.

³⁸ La tí nkexro tamáhya ntacruz, chrèhya sín tí janhan la mé xitjahya ts'óna sín kuéntana.

³⁹ Tí nkexro tjinkaon kixin kohya nkehe chrókónhen sín mé ts'itjáyán sín, a ntá tí nkexro chrókjuinchek'itjáyánxin asén kixin tinkáchónki sín tí janhan la mé tsaá sín.

Tí nkexro ts'áyéhe nkehe

(Mr. 9.41)

⁴⁰ Tí nkexro chrókjuanjon kjuachaxin chrók'uejorá la mé éxi chrók'uáyéhe sín tí janhan la ko tí nkexro chrók'uáyéhe tí janhan la éxi yóhē chrók'uáyéhe sín tí nkexro ichr'ánna k'uinka.

⁴¹ La tí nkexo chrókjuanjon kjuachaxin tsjak'e ijnko nkexo nixja itén Dios kixin táha la Dios ichr'án la mé ts'áyéhe nkehe éxí ts'áyéhe tí nkexo kjuako. La ko tí nkexo chrókjuanjon kjuachaxin tsjak'e ijnko chojni jína kixin jína ch'án mé xjkaha ts'áyéhe sín nkehe éxí ts'áyéhe tí nkexo jína.

⁴² A ntá tí nkexo sinchekitonhen ijnko vaso ntá kin kjónté ijnko chojni noehya má, chréhe tí janhan, la mé chaxín ntáxrjan kixin tí ch'ín a mé chaxín ts'áyéhe ch'án nkehe jína kixin xjkaha kjuích'e ch'án.

11

*Ch'ín Juan Bautista k'uetuenhen iso sín
(Lc. 7.18-35)*

¹ Ntá ch'ín Jesús kjuixin kjuakohe ch'án tí teyó sín xriko ch'án la ntá sákjuixin ch'án ntiha la sákjuikako ch'án iso chjasin chjinaxón ntiha.

² A ntá ch'ín Juan mé tjechjina ch'án ntqechiso ntá xrinahya kuínhin ch'án nkerí xra tjech'e Cristo. La ntá k'uetuenhen ch'án iyó tí sín k'uék'ajiko ch'án kixin sátsitsjehe sín tí ch'ín Jesús.

³ Ntá sákjuí sín kjuíji sín ntiha ntá kjuanchankíhi sín ch'án ntáchro sín kixin:

—¿Á jaha tí nkexo itsi ní o á naxá tsochónhenni í jnko nkexo? —ichro sín.

⁴ A ntá kjuátehe ch'ín Jesús, ntáchro ch'án kixin:

—Sátjirá tjičenkará tí ch'ín Juan tí nkehe k'uikonrá la ko tí nkehe kuínhínrá.

⁵ Chenkará ch'án kixin tí sín k'uék'ikonhya la ó t'ikon sín jie la tí sín xitjahya k'uékji la ó tji sín la ko tí sín k'uéchóna chin lepra la ó kótjóa sín kuítóhe sín jína la ko tí sín k'uékienhya la ó tinhin sín jie. Kjaxin tí sín tsík'en na ó xechón sín inaá la ko kaín tí sín nòda mé síxraqhe sín tí tan jína tsaáxin sín.

⁶ Méxra imá náxrjón tí nkexo kohya nkehe t'inkákonhen tinkáchónki tí janhan.

⁷ Tió sákjuí sín ntá ch'ín Jesús kjuankixin nixjehe ch'án tí sín k'uéjío la chrónka ch'án kuènte ch'ín Juan ntáchro ch'án kixin:

—Tí sákjuítsjehérá ch'ín Juan nteje la, ¿nkexi k'uikonrá tí jehe ch'án? ¿Á k'uikonrá ch'án éxí ijnko tji nchexrayehe xrinto?

⁸ Tí náhi, la ¿nkehe k'uikonrá? ¿Á k'uikonrá ch'án éxí ijnko nkexo tsík'itsa jína? Jahará ó nohará kixin chojni tsík'itsa jína la tjejó sín tí nchia kuènte tí sín rey.

⁹ ¿A ntá nkehe k'uikonrá? ¿Á ijnko nkexo chrónka itén Dios? Jehe chaxín la antsí chóna ch'án kjuachaxin la tí sín k'uéchóna itén Dios la kánhyó.

¹⁰ Ch'ín Juan mé tí nkexo kui éxí xjkaha chrónka xroon itén Dios ósé. Mé ntáchro xjikihi: Janhan mé tsochr'an ijnko nkexo tsochrónka itan kuèntana tsitónxin ntja, kixin tsjasiyóxin ch'án ntja kuèntá.*

Mé xjkaha chrónka itén Dios.

¹¹ Ntá ijnko nkehe chaxín tsojtonkará kixin kaín tí nkexo k'uéjío senó la kánhyó tjeoan sín la antsí tjeoan tí ch'ín Juan Bautista. Kjánchó ijnko nkexo kjónté tjetuanhya la tí ts'áyéhe sín tí kjuachaxién Dios tjen nkaya nkajní la antsí tjeoan sín la ntá jehe ch'ín Juan la kénhyó.

¹² Tí ikui ch'ín Juan Bautista hasta ijie la imá tjanjonxin tí sín tjinkaon ts'ikon sín tí kjuachaxin kuènte nkaya nkajní. La jehó tí sín imá chóna kjuachaxin mé tsjacha sín.

¹³ Kaín tí sín profeta la ko tí ley kuènte ch'ín Moisés mé chrónka nkexi tí kjuachaxin kuènte Dios hasta ikui ch'ín Juan.

¹⁴ A ntá tí jahará chrókuítekaónrá tíhi; kixin ch'ín Juan la mé ikui kixin tí xra kuènte ch'ín Elías tsjintaxin sích'e ch'án kixin ch'ín Elías la t'ichjánxin chrókuí ch'án inaá.

¹⁵ Tí nkexo tjinkaon chrókuinhin la chrókuinhin.

¹⁶ ¿Nkexi chrókjuintayóaxian tí chojni tjejó ijie? Tóyóhe sín tí chánjan tjejótjaxin sín ntasin tsítan sín la t'íyehé sín kichó sín

¹⁷ Ntáchro sín kixin: "K'uánoani flauta kjánchó jahará la tēhyará. Itsjeni isón kuènte chojni tsík'en la ntá k'uaváhyará la ko tsjankahyará."

¹⁸ Kixin tí ikui ch'ín Juan la kjónehya ch'án la k'uíhya ch'án vino la jahará ntáchrorá kixin ijnko nchakuen tí jínahya mé chóna ch'án.

¹⁹ A ntá tió kui tí Xjeen Dios K'óna Chojni ntá kjóne ch'án la ko ik'ui ch'án, ntá ntáchrorá kixin imá itsjé kjóne ch'án la imá ik'ui ch'án la ko imá t'ito ch'án tí chojni chóna tjeje la ko tí sín nchekjènkí, ichrorá. A ntá tí kjuachaxin kuènte Dios mé tjakoxin tí xjeen ch'án.

*Tí chjasin titekakonhya
(Lc. 10.13-15)*

²⁰ Ntá ch'ín Jesús mé kjuankixin ch'án ntáche ch'án tí sín tjejó iso tí chjasin imá kjuasixin ch'án kjuaxroan kixin kjónté xjkaha la naxa kuinkáchónkihya sín Dios.

* 11:10 Malaquías 3.1

²¹ Ntá ntáchro ch'án kixin:

—Nòará jahará tjejórá chjasin Corazín la ko nòará jahará tjejórá chjasin Betsaida. Tí chrók'uxin tí kjuaxroan tí chjasin Tiro la ko chjasin Sidón éxi k'uikonrá jahará ntá tí chrók'ójehe sín la tjoka chrókuinkáchónki sín Dios la tjoka chrók'juakoxin sín chrók'uinkáya sín ka tié la ko nteso chrók'juinchek'ia sín asén sín.

²² Ntá ntáxrjan kixin tí yaon tsitoxén ijíe chojni a ntá jahará antsí tsjasótiará, a ntá tí sín chjasin Tiro la ko chjasin Sidón la kénhyó tsjasóte sín.

²³ A ntá jahará chojni chjasin Capernaum tjenkayáxinrá kixin imá nohará a ntá sátsjirá nkaya nkajní, ichrorá, kjánchó chaxínhya. Jahará la tsjasinkajinxinrá ntiha sátsjirá tsjasótiará tí siín tí sín tsik'en. Tí chrók'juásian tí kjuaxroan tí chjasin Sodoma éxi kjuásian chjasánrá la tí chjasin la kjá naxa chrók'uxin sín naxa chrók'uitjányanhya sín tí yaon ijie kixin tjoka chrókuitekaon sín.

²⁴ A ntá tjonkará kixin tió sinchekitóéxín Dios ijíe chojni la antsí tsjasótiará la tí sín chjasin Sodoma la kénhyó tsjasóte sín.

*Xrákirá tí tjén janhan la ts'ok'áhará
(Lc. 10.21-22)*

²⁵ Ntá tí yaon a ch'in Jesús mé nixjehe ch'án It'é ch'án ntáchro ch'án kixin:

—Tjáncháha kjuasáya It'éni mé Inché nkaya nkajni la ko chjasintajni kixin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin kixin ts'itja tí sín noehya.

²⁶ Mé xikaha It'éni jaha kóxrjínhan kixin xikaha tsonhen —ichro ch'in Jesús.

²⁷ Ntá ntáchro ch'in Jesús kixin:

—T'aná mé chjina kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsíkjeýá ch'án tsochóxin sín ch'án.

²⁸ Xrákirá kaín rá tí tjén janhan tí jahará imá tsikóxrjérá kjuich'erá xra la yamará nkehe iye la ntá janhan mé sintak'ok'áhará.

²⁹ Tákjárá tí xra kuéntana la ts'itjará kuéntana kixin janhan mé jina asenná la ntahnkehya. Ntaha mé ts'itjará ts'ok'èxin asánrá.

³⁰ Tí xra tsotjahará la xrahya la tí nkehe tsotjahará la yehya.

12

*Tí sín k'uajiko ch'in Jesús mé ik'uín sín iso noatrigó ijnko yaon t'ok'éhe tí sín Israel
(Mr. 2.23-28; Lc. 6.1-5)*

¹ A ntá ijnko yaon la ch'in Jesús k'uatínska ch'án ijnko nonte siín noatrigó tí yaon t'ok'éhe tí sín Israel. Na ntá tí sín xriko ch'án mé tsik'en sín kjinta la ntá kjuankixin sín ik'uín sín iso noatrigó a kixin sine sín.

² A ntá iso tí sín fariseo k'uikon sín kixin xikaha kjuich'e tí sín xriko ch'in Jesús la ntá ntáchro sín kixin:

—Tsjehé tí sín xrikoa mé tjejóch'e sín xra tí yaon t'ok'éheni na mé kohya kjuachaxin tsonhen xra tí yaon i —ichro sín.

³ Ntá kjuátehe ch'in Jesús kixin:

—Jahará za kjuinchekuáxinhyará tí xroon chrónka nkehe kjuich'e ch'in David la ko tí sín k'uajiko ch'án tió k'uén sín kjinta?

⁴ A ntá jehe sín mé k'uixenhen sín tí nchia kuénte Dios la kaín sín kjóne sín tí niotja tsikóyaon kuénte Dios kjónté kohya kjuachaxin sine ch'án ni tí sín k'uajiko ch'án. Jehó siín kjuachaxin sine tí sín nchat'á.

⁵ Jahará za nchekuáxinhyará tí xroon tsíkjin ch'in Moisés ntáchro kixin tí sín nchat'á kuénte ninko mé t'ok'éhya sín tí yaon sábado la kjónté xikaha la jehya jje tíha?

⁶ Ntáxrjan kixin itjén janhan la antsí má chonta kjuachaxin la ntá tí njnko la kénhyó.

⁷ Jahará la tiénxinhyará nkexrí t'axrxéxin tí nkehe ntáchro xroon itén Dios. Mé ntáchro kixin: “Janhan Dios tjínkavan kixin chrók'ujikonóghérá chojni la tjínkakonhya kixin chrók'oyánrá iko chrók'juánjonrá.”* Tí chrók'uiéxinrá tíha la ntá chrók'óninkákuénhyará tí janhan kixin ninkehó jje chontahya.

⁸ A ntá tí Xjeen Dios K'óna Chojni mé chónka kjuachaxin ts'etóan nkexrí tsonhen tí yaon t'ok'éheni —ichro ch'in Jesús.

*Ch'in Jesús kjuinchekitóhe jina ijnko chojni tsixámá tjá
(Mr. 3.1-6; Lc. 6.6-11)*

⁹ Ntá ch'in Jesús mé sákjuáxin ch'án ntiha la k'uixenhen ch'án ijnko njnko Israel.

* 12:7 Oseas 6.6

¹⁰ Mé ntiha itjen ijnko ch'ín tsíxamá tja. Na ntá tjejóntaxín iso sín fariseo a tjínkaon sín tsjanchia sín jie. La ntá kjuanchankíhi sín ch'án kíxín:

—¿Á síin kjuachaxín sinchekitoheni jína ijnko chojni níhi tí yaon t'ok'éheni ní? —ichro sín.

¹¹ Ntá kjuátehe ch'ín Jesús ntáχρο ch'án kíxín:

—Jnkojín tí jahará chontará ijnko kolélo chrókuítsínkáya ijnko tòye tí yaon t'ok'éheni ¿á chrókuíuhará chrókuakítsjetaónrá va tòye ní?

¹² Kjánchó tí chojni antsí má tjete sínkí a ntá tí kolélo la kénhyó. Méxra jína sich'eni tí xra jína kjónté tí yaon t'ok'éheni.

¹³ Méxra níxjehe ch'án tí ch'ín níhi a, ntáχρο ch'án kíxín:

—Tjéntoá tjá —ichro ch'án.

A ntá tí ch'ín níhi tja kjuentoá tja ch'án la ó kjuixín kuitóhe jína éxí tí í jnko tja ch'án xíkaha.

¹⁴ Ntá tí sín fariseo kónínkaon sín k'uaxrjexín sín ntiha sákjuí sín la kjuenkayáxín sín nkexrí ts'óyan sín tí ch'ín Jesús.

Itén Dios senó chrónka kuènte ch'ín Jesús

¹⁵ A ntá ch'ín Jesús mé kónohe ch'án kíxín xíkaha tjenkayáxín sín la ntá sákjuixín ch'án ntiha la itsjé sín chréhe sín ch'án. Kjuínchekitóhe ch'án jína kaín tí sínníhi

¹⁶ la k'uetóan ch'án kíxín tsochrónkahya sín noxín kíxín nkexro tí jehe ch'án.

¹⁷ Mé xíkaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsíntáχρο ch'án xíkíhi:

¹⁸ Ntihi tjen tí nkexro ch'ena xra la janhan mé kjuéyá ch'án, janhan tjuahá ch'án la chàna kíxín itjen ch'án.

Tsotjahá ch'án tí nchakuenná

la jehe ch'án mé tsochrónka ch'án nkexrí sántakitóaxián ijíe chojni chjasintajni.

¹⁹ Tsónínkakuenhya ch'án chojni la chjíníhya ts'óyako ch'án,

la ko kohya nkexro tsínhin itén ch'an tí ntja.

²⁰ Ts'óchjenjinhya ch'án kjónté itji tsíxréya,

la ts'ók'ankahya ch'án kjónté ijnko nkehe sínhchikoá.

Jehe ch'án naxa sich'e ch'án xra tsjixrakája tí yaon ts'etóan ch'án.

²¹ La kaín xín chojni chjasintajni mé tsitekaon sín tí jehe ch'án.†

Mé xíkaha chrónka itén Dios ósé.

*Tí sín fariseo mé ntáχρο sín kíxín ch'ín Tsochren t'etuenhen qsen tí ch'ín Jesús
(Mr. 3.19-30; Lc. 11.14-23; 12.10)*

²² Ntá iso chojni sákjuíkohe sín ch'ín Jesús ijnko ch'ín t'íkónhya la ko níxjahya kíxín chóna ch'án nchakuen tí jínahya. A ntá ch'ín Jesús mé kjuínchekitóhe ch'án jína la ntá jína níxja ch'án la ko jína t'íkon ch'án.

²³ Ntá kaín xín chojni la chrakon sín la tjanchankíhi kíchó sín ntáχρο sín kíxín:

—¿Á jehya xjeen David tíhi? —ichro sín.

²⁴ Ntá kuínhin tí sín fariseo la ntáχρο sín kíxín:

—Tí ch'ín a takítsje ch'án nchakuen tí jínahya kíxín chóna ch'án tí kjuachaxín kuènte ch'ín Beelzebú, mé tí ch'ín mé Tsochren t'etuenhen kaín tí nchakuen tí jínahya.

²⁵ Ntá ó kónohe ch'ín Jesús tí nkehe tjenkayáxín sín ntá ntáχρο ch'án kíxín:

—Jnkojín gobierno jnkokóáhya tjenkayáxín sín ntá tjanjonko kíchó sín na mé ts'itjáyán tí kjuachaxín ts'etóanxín sín, la ko kjáxín tí sín jnkokóá chjasín o tí sín jnkokóá nchia jnkokóonha tjenkayáxín sín la kjáxín xíkaha ts'itjáyán sín.

²⁶ A ntá tí chaxín ch'ín Tsochren chrókuakítsjexín asén ntihi kjá í chróchóntahya kjuachaxín naxa chrók'uetóan.

²⁷ Jahará ntáχροrá kíxín janhan kuakítsjexián tí nchakuen tí jínahya kjuachaxín kuènte ch'ín Beelzebú. A ntá tí chaxín xíkaha la ntá ¿nkexro chjéhe kjuachaxín tí sín chréhe tí jahará kíxín tjacha sín takítsje sín nchakuen tí jínahya? Jehe sín mé tjákojín sín kíxín ntoáhya tjenkayáxínrá.

²⁸ A ntá janhan mé kuakítsjexián tí nchakuen tí jínahya kjuachaxín kuènte Nchakuen Dios la tíha mé chrókónoaxínrá kíxín tí kjuachaxién Dios mé ó kui tí tjejórá.

²⁹ ¿Nkexrí chrók'uixenhen ijnko nkexro ijnko ntóe ijnko ch'ín jiehe la chrókuakítsjehe ch'án tí nkehe chóna ch'án? Senó la chrókónteto ch'án kíxín jína chrókueéhe sín ch'án.

³⁰ Tí nkexro titekakonhya tí janhan la mé nínkakonna sín. A ntá tí nkexro tjínkakonhya tí janhan mé t'ínkákonhen tí xra it'a.

³¹ Méxra xrjanka kíxín Dios tsjakjlin jnkojnko jie tjasin chojni la ko kaín nkehe jínahya níxja sín. A ntá tí t'ántaxínhin sín Nchakuen Dios la xitjahya tsjin ijíe sín.

† 12:21 12.18-21 Isaías 42.1-4

³² La ko xrxjanka kixin kaín nkehe t'ántaxínhínrá tí Xjeen Dios K'óna Chojni la tsjakjlin Dios. A ntá tí ts'antaxínhínrá Nchakuen Dios la ntá mé í tsjinhya tí ijjará kjónté ntihi chjasintajni la ko kjónté tí chr'éxin.

Tí nta chrókjuatsqanxin sín tí to jina
(Lc. 6.43-45)

³³ Tí nta tsík'ánkí jina la t'óna to jina la tí nta tsík'ánkíhya jina la t'ónahya to jina. Méxra tí nta mé chrókjuatsqanxinni tí to a.

³⁴ Jahará tsík'axrjenixínrá konche. ¿Nkexrí jina chróntáchrórá jahará tí jehya jínará? Tí nixja ir'vará la éxí ntáχρο asánrá mé nixja ir'vará.

³⁵ Ijnko chojni jina mé jina nixja kixin jina asén ch'án. A ntá injko chojni jínahya mé nixja tí nkehe jínahya kixin tí asén ch'án kjaxin jínahya.

³⁶ Ntá tjonkará kixin itsi tí yaon tsjixixin tió sinchekitqexin Dios ijje chojni ntá tsonohará kaín nkehe chjini tsínixjará.

³⁷ Kixin tí nkehe nixjará tsjakoxin á kjuásinrá jie ní o náhi.

Tí sín jehya jina tjanchehe sín ch'in Jesús kixin tsjakoxin ch'án injko kjuaxroan jie
(Mr. 8.12; Lc. 11.29-32)

³⁸ Ntá iso tí sín fariseo la ko tí sín maestro tjako tí ley mé nixjehe sín ch'in Jesús ntáχρο sín kixin:

—Maestro, tjinkaonni chrók'uikonni chrókjuásian injko kjuaxroan náxrjón tsonoxinni kixin nkexro jaha —ichro sín.

³⁹ Ntá kjuátqhe ch'in Jesús ntáχρο ch'án kixin:

—Tí sín jínahya la ko tí sín kuitqhe Dios mé tjanhia sín chrókjuásian kjuaxroan náxrjón. Kjánchó tsjakoxinhya í jnko kjuaxroan la jehó tí kjuaxroan kónhen ch'in Jonás, tí nkexro k'uéchronka itén Dios ósé.

⁴⁰ Éxí yóhe kjuák'e ch'in Jonás iní yaon la iní tie nkaxenhen tseq koche jie mé xikaha tí Xjeen Dios K'óna Chojni tsjak'e nkaxenhen tóye tsoxravá iní yaon la iní tie.

⁴¹ A ntá tí yaon tsitqexin ijje chojni la ntá tí sín chjasin Nínive mé tsjanhia sín jie kixin tí sín tjejó jie, kixin tí sín chjasin Nínive mé kuitqhe sín ijje sín tió kuínhin sín itén Dios chrónka ch'in Jonás. A ntá ijje itjén janhan la antsí má chonta kjuachaxin. A ntá tí ch'in Jonás la kénhyó k'uéchóna ch'án kjuachaxin, kjánchó jahará kuitekákonyará tí janhan.

⁴² Kjaxin tí yaon tsitqexin ijje chojni la tí tjan reina k'uetqan kjuixin nó Sur mé tsjanhia tjan jie kixin tí sín tjejó ijje kixin jehé tjan kjuixin imá ikjin kixin chrókuinhin tjan tí kjuaxrexinkaon jina k'uékjako ch'in Salomón. A ntá ijje itjén janhan la janhan antsí má nóna a ntá ch'in Salomón la kénhyó k'uénohe ch'án.

Tió tsokjan tí nchakuen tí jínahya
(Lc. 11.24-26)

⁴³ A ntá injko nchakuen tí jínahya tsík'axrxjén injko chojni la mé ixri tí nonte xámá xritjeyá nketí náxrjón ts'ok'éhe. A ntá k'uitjahya nketí náxrjón ts'ok'éhe.

⁴⁴ La ntá kjuenkayáxin kixin: “Áxri tsokjan ntóna k'uaxrxjéxian”, ichro. A ntá tió ikjan tí nchakuen la t'íkon éxí injko nchia kohya ninkexró la éxí injko chojni tsík'ánjón ntqé la náxrjón tsjehe tí nkaxenhen nchia.

⁴⁵ A ntá k'uikon tí jínahya xikaha tjen nchia la ntá sákjuikakjin í jnko yato nchakuen tí jínahya antsí má jínahya. A ntá kaín k'uixenhen tí ntiha. A ntá antsí má jínahya kónhen tí ch'in a, a ntá tí senó la kénhyó. Mé xikaha tsonhen kaín tí sín siin ijje titekakonhya.

Tí iné la ko kichó ch'in Jesús
(Mr. 3.31-35; Lc. 8.19-21)

⁴⁶ Ntá ch'in Jesús naxá tjenixjehe ch'án chojni la ntá xrinahya kjuíji iné ch'án la ko kichó ch'án. Ntá kuitqhe sín ntója ó la tjinkaon sín chrónixjehe sín ch'in Jesús.

⁴⁷ Ntá injko nkexro ntiha sákjuíchénka tí ch'in Jesús, ntáχρο ch'án kixin:

—Iná la ko kichua tjejó sín ntója la tjinkaon sín chrónixjaha sín tí jaha.

⁴⁸ A ntá ch'in Jesús kjuátqhe ch'án nixjehe ch'án tí nkexro chrónka a, ntáχρο ch'án kixin:

—¿Xá nkexro tí naná la ko nkexro tí kichiná? —ichro ch'án.

⁴⁹ Ntá kjuakoxin tja ch'án tí sín xriko ch'án la ntáχρο ch'án kixin:

—Tí sín i la mé naná la ko kichiná.

⁵⁰ Tí jnkojin sín i nchexiteyá nkehe tjinkaon T'aná tjen nkaya nkajni na mé táha mé naná la ko kichiná mé xikaha t'íkuan tí jehé sín —ichro ch'án.

13

Ch'in Jesús mé kjuíncheyóexin ch'an éxi ijnko chojni t'enka nontee

(Mr. 4.1-9; Lc. 8.4-8)

¹ A ntá tí yaon a ntá ch'in Jesús k'uaxrjexin ch'an nchia la sákjuá ch'an kjuák'etjajxin ch'an chrínta ntayaon.

² Ntá k'uixikóchjina nchónhya chojni tí tjen ch'an la ntá jehe ch'an mé k'uit'ótjen ch'an ijnko ntabarco kjuák'etjajxin ch'an la kain sín na tí chrínta nta ó kuitohe sín.

³ A ntá nchónhya nkehe kjuako ch'an kjuíncheyóexin ch'an, ntáchro ch'an kixin:

—Éxi ijnko ch'in sákjuá'enká nontee

⁴ mé xíkaha sákjuá'enká ch'an iso tí noatrigó a. Ntá iso noa la tsík'ánótjen ntia ntá ikui koxroxe k'uinka va noa.

⁵ A ntá iso noa na mé k'uitji chrík'á xro tí kohya itsjé nche ntá tjoka k'uayan kixin ntaha tjinhya chóntha nche.

⁶ Ntá tí kjuítjon yaon la ntá tí ka la xamá kixin njnkahya chóntha nuèe.

⁷ A ntá í so noa kjuítsínkak'á tí síin kach'j na k'uánkí tí kach'j a na ntá í xitjahya k'uánkí tí noatrigó a kixin tsíkjate tí kach'j.

⁸ A ntá tí noa tsík'it'ij nche jina na ntá tió k'uánkí la mé k'óna jina. Iso tí no na jnkokoá noatje mé k'óna ciento neno noa, a ntá í jnko mé k'óna sesenta neno noa, a ntá í jnko mé k'óna treinta.

⁹ Tí nkexro tjinkaon chrókuinhin la chrókuinhin —ichro ch'in Jesús.

Nkekuènté kjuíncheyóexin ch'in Jesús

(Mr. 4.10-12; Lc. 8.9-10)

¹⁰ Ntá iso tí sín k'uájiko ch'in Jesús mé kóchjinehe ch'an sín la ntá kjuanchankíhi sín kixin:

—¿Nkekuènté xíkaha nixjehé sín ncheyóexián? —ichro sín.

¹¹ A ntá ch'in Jesús kjuátehe ch'an ntáchro ch'an kixin:

—Jahará la Dios me tsjinkitsa tsonohará tí nkehe noehya í so chojni kuènte tí kjuachaxin kuènte Dios. A ntá tí jehe sín a la náhi.

¹² Tí nkexro ó chóntha nkehe la antsí ts'áyehé sín kixin antsí má tsochóntha sín. A ntá tí nkexro chónthaha la kjónté tí ntsí chóntha sín la ts'axrjehe sín.

¹³ Mé xíkaha kjuíntayóaxuán kjuákuaxián sín kixin jehe sín t'ikon sín la ntá kjónté tjátsqanhya sín la tjejóntinhin sín a ntá kjónté kienxínhya sín.

¹⁴ Mé xíkaha ó xiteyá tí nkehe k'uéchrónka ch'in Isaías tí nkexro k'uéchrónka itén Dios, mé ntáchro ch'an xíkíhi:

Jehe sín tsinhin sín a ntá tsienxínhya sín

la ts'ikon sín la tsjatsqanhya sín tí nkehe ts'ikon sín.

¹⁵ Imá icha asén tí sín chjasin í.

Chóntha sín ntatsjon kjánchó ts'íkjehe

la chóntha sín ikon sín kjánchó t'ikonhya sín,

kixin chrók'uikonhya sín

la chrókuienhya sín la ko

xitjahya kienxín sín,

kixin í tjinkakonyha sín chrókjan sín kixin janhan mé chrókuíntakitohá sín jina.*

Mé xíkaha tsíkjin ch'in Isaías.

¹⁶ Ntá ntáchro ch'in Jesús inaá kixin:

—A ntá jahará la imá náxrjón tjejórá kixin t'ikonrá la ko tinhínra.

¹⁷ Chaxin xrjanika kixin itsjé tí sín k'uéchrónka itén Dios la ko tí sín jina mé k'uétjinkaon sín chrók'uikon sín tí nkehe t'ikonrá la ntá k'uikonhya sín la ko k'uétjinkaon sín chrókuinhin sín tí nkehe tjejóntinhínra la ntá kuíenhya sín.

Ch'in Jesús chrónkaxin nkexrí t'axrjexin tí nkexro sákjuá'enká

(Mr. 4.13-20; Lc. 8.11-15)

¹⁸ Tinhínra nkexrí t'axrjexin tí ch'in sákjuá'enká nontee.

¹⁹ Tí nkexro kuínhin tí itén Dios chrónka nkexrí tí kjuachaxin kuènte Dios la ntá kienxínhya sín la yóhe tí noa xènjintja ntia. Ó kui ch'in Tsochren ntá kjuínchek'itjáyán ch'an tí itan jina kuínhin sín.

²⁰ A ntá tí tje kjuítsínkak'á xro la mé t'axrjexin kixin tí chojni kuínhin itén Dios la tjoka kóxrjinhin sín la kuínkáchónki sín.

²¹ Kjánchó njnkahya chóntha nuèe na ntá itsi tí kjuaxróxinhya ó tsochónkíhi sín chojni chrók'óyán sín kixin tí itén Dios kuitekaon sín, a ntá tsítóhe sín tí tñnkáchónki sín Dios.

* 13:15 13.14-15 Isaías 6.9-10

²² A ntá tí tje kjuítsinkak'á kach'í na mé éxi yóhe ijnko chojni kuínhin itan jína kjánchó tjitoxienhya nteje sín kíxin tóxakonhen sín tí xra chóna sín chjasintajni la ko tjinkaon sín tsochóna sín itsjé nkehe. Kaín tíha mé t'ínkákonhen tí itén Dios kuínhin sín la ntá xíkaha xitjahya sich'ehe sín xra Dios.

²³ A ntá tí tje k'uínka tí nonte chóna nche jína na mé yóhe tí chojni kuínhin tí itén Dios na ko kiexín sín la ntá xíkaha jína ch'ehe sín Dios xra. Na iso sín la yóhe éxi tí tje k'óna ijnko ciento neno noa la iso sín la yóhe tí k'óna sesenta neno noa la iso sín la yóhe tí k'óna treinta neno noa —mé xíkaha chrónka ch'ín Jesús.

Ch'ín Jesús kjuíncheyóexin ch'án éxi tí kajnto k'uánkúé tí noatrigó

²⁴ Ntá ch'ín Jesús kjuíncheyóexin ch'án inaá ntáchro ch'án kíxin:

—Tí kjuachaxin kuénte Dios mé éxi ijnko ch'ín k'uénka noa jína nontee ch'án.

²⁵ A ntá tío k'u'éjójua kaín sín ntá ikui ijnko nkexro nínkakonhen sín la k'uénka ch'án kajnto chrík'á tí noa a la ntá sákjuí ch'án.

²⁶ La ntá tí noatrigó k'uánkúé la ntá ó sítinta a la ntá ntiha kjaxin kónoxixin k'uánkúé tí kajnto. ²⁷ Ntá tí sín ch'e xra mé sákjuínixjehé sín tí lámge sín la ntáchro sín kíxin: “Tí noa k'uénka nontaa la noa jína tíha. A ntá ¿nketi kjuixín tí kajnto tsík'ayan?” ichro sín kjuanchankí sín.

²⁸ Ntá kjuátehe tí inché tí nonte ntáchro kíxin: “Kjá ijnko nkexro nínkakonna mé kjuích'e xíkaha”, ichro ch'án. Ntá tí sín ch'e xra mé kjuanchankí sín kíxin: “¿Á tjinkávan kíxin sátsjini tsakítsjenkíni tí kajnto?” ichro sín.

²⁹ A ntá kjuátehe ch'án kíxin: “Náhi. Tí sátsjia tsakítsjenkiá tí kajnto la kjá chóna tí katrigó ts'axrjenkí.

³⁰ Ichá jína títóhé kíxin ts'ánkúé tsjixin tsojtájiani. Ntá ts'etueñhenni tí sín tsojtá kíxin senó ts'ejo sín tí kajnto la sinchenteto sín kíxin tsoche la ntá chr'éxin tsojtá sín tí noatrigó ntá ts'ínkachjina tí noa a” —mé xíkaha chrónka ch'ín Jesús.

*Ch'ín Jesús kjuíncheyóexin ch'án éxi tí xroqñ ijnko ntayoa it'ín mostaza
(Mr. 4.30-32; Lc. 13.18-19)*

³¹ Ntá ch'ín Jesús kjaxin kjuíncheyóexin inaá ntáchro ch'án kíxin:

—Tí kjuachaxin kuénte Dios mé éxi yóhe ijnko tje mostaza k'uénka ijnko chojni nontee ch'án.

³² Tí tje a mé antsí má ntsí la ntá tí í so tje la kánhyó, a ntá chr'éxin ntá ts'ayan tí nta mostaza la ts'ánkúé ijnko nta imá jíé la tí í so nta la kánhyó. Ntá koxroxé xritjaká mé itsi va sich'éna va kaké va tí chrík'á tí chaon nta.

*Ch'ín Jesús kjuíncheyóexin ch'án éxi tí xroqñ t'ánkíxin niotja
(Lc. 13.20-21)*

³³ Kjaxin kjuíncheyóexin ch'án tíhi mé ntáchro ch'án kíxin:

—Tí kjuachaxin kuénte Dios mé éxi yóhe tí xroqñ t'ánkíxin niotja. Kjuinkíkjanxin ijnko chojni chjin iní medida harina ntá tí ch'o mé k'uánkúé.

*Tí nkehe kjuíncheyóexin ch'ín Jesús tí nixja ch'án
(Mr. 4.33-34)*

³⁴ Ch'ín Jesús kjuakóhe ch'án tí chojni la kjuíncheyóexón ch'án la nixjahya ch'án ninkehó tí kohya nkehe chrókjuíncheyóexin ch'án.

³⁵ Mé xíkaha kjuako ch'án kíxin tsoxiteyá tí nkehe tsíchrónka ijnko nkexro k'uéchrónka itén Dios ntáchro xíkíhi:

Mé tsoníxjaxian sjntayóaxión nkehe

tsontáxrjan tí nkehe nínkexró noehya desde k'óna chjasintajni.†

Ch'ín Jesús chrónkaxín ch'án nkexrí t'axrjexín tí kjuíncheyóexin ch'án tí kajnto la ko tí notrigó

³⁶ Ntá kjuixín nixjehé ch'ín Jesús tí sín a ntá sákjuí sín kaín sín la jehé ch'án k'uixenhen ch'án nchia. Ntá kóchjina tí sín k'uájiko ch'án la ntáchro sín kíxin:

—Chrónkaxián nkexrí t'axrjexín tí kajnto k'uánkúé tí noa trigo tí nonte —ichro sín.

³⁷ Ntá ch'ín Jesús kjuátehe ch'án ntáchro ch'án kíxin:

—Tí nkexro k'uénka tí noa jína mé tí Xjeen Dios K'óna Chojni.

³⁸ A ntá tí nonte mé chjasintajni tíha. Tí noa jína mé éxi yóhe tí chojni kuákja kjuachaxin kuénte Dios. La ntá tí kajnto mé éxi yóhe tí chojni t'etueñhen Tsochren.

³⁹ Tí nkexro nínkakonhenni mé k'uénka tí kajnto mé Tsochren tíha. A ntá tí tsojtá sín la mé tsjeje chjasintajni. A ntá tí sín tsojtá la mé tí sín ángel.

⁴⁰ Éxi xrenájín tí kajnto la tsoche mé xíkaha tsonhen tío tsjixixín tsjeje chjasintajni.

⁴¹ Tí Xjeen Dios K'óna Chojni mé ts'etueñhen tí sín ángel kíxin tsakítsjexín sín tí tjet'etqan Dios kaín tí chojni tjachroe í so chojni la ko tí sín ch'e tí nkehe jínahya.

† 13:35 Salmo 78.2

⁴² La tsochr'án sîn sátsji sîn tí tja siín xrohi la ntaha tsotsjánka sîn la sinetaón neno sîn.

⁴³ Ntá kaín xín tí sîn nchexiteyá tí nkehe tjínkaon Dios mé éxí tí yaon xíkaha tsotsjehe sîn tí tjet'etqan It'éni Dios. Tí nkexro tjínkaon chrókuinhin la chrókuinhin —mé xíkaha ichro ch'ín Jesús.

Ch'ín Jesús kjuíncheyóexin ch'án éxí ijnko nkehe tjete tjemá

⁴⁴ Tí kjuachaxin kuènte Dios mé éxí yóhe ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuak'emā ch'án inaá ntahó. Ntá chéhe ch'án sákjuí ch'án la kjuínchekji ch'án kaín nkehe chóna ch'án la ntá ikjan ch'án la k'uena ch'án tí nonte a.

Ch'ín Jesús kjuíncheyóexin éxí ijnko xro perla tjete

⁴⁵ Ntá ntáchro ch'ín Jesús kíxin:

—Kjaxin tí kjuachaxin kuènte Dios mé éxí yóhe ijnko nkexro tjejá xro perla náxrjón.

⁴⁶ Ntá tió ts'itja ch'án ijnko xro imá tjete la ntá sátsji ch'án sinchekji ch'án kaín nkehe chóna ch'án kíxin ts'ena ch'án tí xro perla.

Ch'ín Jesús kjuíncheyóexin éxí ijnko nchísén tséya sîn koche

⁴⁷ Ntáchro ch'ín Jesús kíxin:

—Kjaxin tí kjuachaxin kuènte Dios mé éxí yóhe ijnko nchísén tséya chojni koche t'enkí sîn tí ntayaon la ntá tsotsé nchónhya clase koche.

⁴⁸ Ntá tió tsíkaón koche tí nchísén tséya sîn va la ntá tsakitsjenkí sîn la tsjak'e sîn chrínta ntá la ntaha ts'ejótjaxin sîn la tsíchéhe sîn koche jína la t'enka sîn ntaxra. La ntá tí jehya koche jína la it'e sîn.

⁴⁹ Mé xíkaha tsonhen tió tsjeje chjasintajni. Sátsji tí sîn ángel la tsakitsjekjan sîn chojni jínahya la tsitohe tí chojni jína.

⁵⁰ La tsochr'án sîn tí sîn jínahya sátsji sîn tí tjen tja tí siín xrohi la ntaha tsotsjánka sîn la ko sinetaón neno sîn.

Tí nkehe tjete nixin la tí nkehe tjete ntaxin

⁵¹ Ntá ch'ín Jesús mé kjuanchankí ch'án kíxin:

—¿Á tiénxinrá jahará kaín tí nkehe ní? —ichro ch'án.

Ntá kjuátehe sîn kíxin:

—Jeén, Inchéni, ó kíenxínni —ichro sîn.

⁵² Ntá ntáchro ch'ín Jesús kíxin:

—Ijnko maestro nohe tí nkehe kuènte ley la ntá ó nohe ch'án kuènte tí kjuachaxin kuènte Dios la jehe ch'án la éxí yóhe ijnko inché nchia chóna itsjé nkehe tjete tjejóchjina la ntá nohe ch'án tsakitsje tí nkehe tjete nixin la tí nkehe tjete ntaxin —mé xíkaha ichro ch'ín Jesús.

Ch'ín Jesús kjuák'e ch'án chjasin Nazaret

(Mr. 6.1-6; Lc. 4.16-30)

⁵³ Ntá kjuixin nixja ch'ín Jesús kjuíncheyóexin ch'án tíha na ntá sákjuíxin ch'án ntíha.

⁵⁴ La ntá sákjuí ch'án chjasén ch'án Nazaret. Ntaha kjuankíxin kjuakoxin ch'án tí njnko Israel. Ntá itsjé sîn la kóxakonhen sîn kuínhin sîn tí tjako ch'án la ntáchro sîn kíxin:

—Tí ch'ín i la, ¿nketí tsíxrakohé ch'án kíxin imá nohe ch'án la ko nkexrí kíxin tjasin ch'án kjuaxroan?

⁵⁵ ¿Á jehya tíhi xjeen tí ch'ín carpintero la iné ch'án mé María? La ko chóxinni tí kíchó ch'án a mé ch'ín Jacobo la ko ch'ín José la ko ch'ín Simón la ko ch'ín Judas.

⁵⁶ Kjaxin tí sîn chjin kíchó ch'án na ntíhi tjejó sîn. Méxra ¿nkexrí nohe ch'án kaín tí nkehe? —ichro sîn.

⁵⁷ Mé xíkaha chrohya sîn tsitekakonhen sîn ch'án. Ntá ntáchro ch'ín Jesús kíxin:

—Nkuíxín tjikosáyehe chojni ijnko nkexro chrónka itén Dios. A ntá tí sîn chjasén ch'án la ko kaín tí sîn ntqes ch'án mé tjikosáyehya sîn ch'án —ichro ch'án.

⁵⁸ A ntá tsjéhya kjuaxroan kjuasin ch'án ntíha kíxin kuítekakuenhya sîn ch'án.

14

Ik'uén ch'ín Juan Bautista

(Mr. 6.14-29; Lc. 9.7-9)

¹ A ntá tí yaon a ntá tí ch'ín Herodes mé tí nkexro k'uetqan tí estado Galilea mé kuínhin ch'án nkexrí ichro ch'ín Jesús.

² Ntá nixjehé ch'án tí sîn ch'ehe ch'án xra, ntáchro ch'án kíxin:

—Kjá tíha la ch'ín Juan Bautista ó tsíxechón ch'án inaá. Mé xíkaha chóna ch'án kjuachaxin tjasin ch'án kjuaxroan —ichro ch'ín Herodes.

³ Méxra tí ch'ín Herodes mé tsík'etōan kixin ch'ín Juan tsōntetoxín cadena la ko tsjak'echjina ch'án. Mé xikaha kjuich'e ch'án kixin xikaha tsíkjanchia tí tjan Herodías, tí tjan ichjién tí ch'ín Felipe, kíchó ch'án.

⁴ Tí ch'ín Juan tsíntáche ch'án tí ch'ín Herodes kixin:

—Jehya jína tsochonta tí ichjién tí kíchuá —mé xikaha tsíntácho ch'án.

⁵ Ntá ch'ín Herodes tjinkaon ch'án chrók'óyán ch'án tí ch'ín Juan kjánchó chrakonhen ch'án tí chojni kixin kaín sín ntácho sín kixin ch'ín Juan mé nixja itén Dios, ichro sín.

⁶ A ntá tí yaon kia tsíkjitoxinhin nánó ch'ín Herodes la tí xjeen tjan Herodías mé ité tjan tí tjejó tí chojni tsík'iyehé ch'án. A ntá imá kóxrjínhin ch'ín Herodes nkexrí ité tjan.

⁷ La ntá nixjehé ch'án tjan k'uákjexxin ch'án ihnié Dios ntácho ch'án kixin tsochjéhe ch'án tjan kjónté jnkójin nkehe tsjanchia tjan, ichro ch'án.

⁸ Ntá jehe tjan la senó kjuikjanchankíhi tjan iné tjan ntá iné tjan tsíntácho kixin ikja ch'ín Juan mé tsjanchia tjan ntá jehe tjan mé nixjehé tjan tí ch'ín Herodes inaá ntácho tjan kixin: —Chjehéni ijnko plato tsjak'enkaya kja ch'ín Juan Bautista —ichro tjan kjuanchia tjan.

⁹ Na ntá ch'ín Herodes la mé imá k'uává ch'án kixin xikaha kjuanchia tjan. Na ntá kaín tí sín siín ntiha ó kuínhin sín kixin kjuínchenohe ch'án Dios kixin ichrén nkehe tsjanchia tjan tsjanjon ch'án.

¹⁰ Méxra k'uetōan ch'án kixin ts'óchrínjin sín ikja ch'ín Juan tí tjan ch'án ntōechiso.

¹¹ Ntá kjuikāo sín kjuikōyá sín tí kja ch'ín Juan ijnko plato la chjéhe sín tí tjan tjarisoá ntá jehe tjan la sákjuikénhen tjan iné tjan.

¹² Ntá tí sín k'uék'ajiko ch'án a mé sákjuikakitsje sín tí cuérpōé ch'án la sákjuikjává sín. La ntá chr'ēxin la sákjuí sín sákjuíchénka sín tí ch'ín Jesús kixin xikaha tsíkónhen ntiha.

Ch'ín Jesús kjuínchekine ch'án in'ó mil chojni

(Mr. 6.30-44; Lc. 9.10-17; Jn. 6.1-14)

¹³ Ntá tí kuínhin ch'ín Jesús kixin xikaha tsíkónhen la ntá jehó ch'án sákjuí ch'án k'ujit'ótjen ch'án ijnko ntabároo la sákjuí ch'án ijnko nonte ninxexró tjihya. A ntá kaín tí chojni la kuínhin sín nketí tjan ch'án la ntá k'uaxrxjén sín chjasén sín la ntá totó sín sákjuichréhe sín ch'án.

¹⁴ A ntá k'uaxrxjén ch'ín Jesús tí ntabároo a, a ntá k'uíkon ch'án kixin nchónhya chojni siín ntiha ntá kuíkonóehé ch'án tí jehe sín na ntá kjuínchekitōhe ch'án jina tí sín níhi tsíkjikāo sín.

¹⁵ La ntá ó k'uúxin tie na ntá tí sín k'uájiko ch'ín Jesús a mé kóchjinehe sín ch'án, ntácho sín kixin:

—Ntá ó kóntó la kohya nkexro tjejó ntihi. Na ntá jaha chrókuétuēnhén sín kixin sátsji sín tí chjasin ntsí chjinaxón tsjik'ēna sín nkehe sine sín —ichro sín.

¹⁶ Ntá kjuátēhe ch'ín Jesús, ntácho ch'án kixin:

—T'ichjánxinhya sátsji sín. Chjehérá sín nkehe sine sín —ichro ch'án.

¹⁷ Ntá kjuátēhe sín kixin:

—Chóntahyani itsjé nkehe. Jehó in'ó niotja la ko yaá koche chóntani —ichro sín.

¹⁸ Ntá ntácho ch'ín Jesús kixin:

—Xrakoanará tí nkehe méhe ntihi —ichro ch'án.

¹⁹ Ntá k'uetōan ch'án kixin kaín xin sín ts'ixitjāxin sín tí chrítaón kaxi a. Ntá kuákja ch'án tí in'ó niotja la ko tí yaá koche ntá konta ch'án nkajní la kjuanchehe ch'án kjuasáyé Dios. Ntá kóchrít'ō ch'án tí niotja chjéhe ch'án tí sín k'uájiko ch'án la jehe sín mé k'óxikāyehé sín chjéhe sín tí chojni siín a.

²⁰ Ntá kaín sín kjuixin kjóne sín kókjehe sín. Ntá kjuixin ntá tí sín k'uájiko ch'ín Jesús kjuenájín kaín tí nkehe sixēhe sín la mé teyó ntaxra kaón.

²¹ Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjaín tí sín a.

Ch'ín Jesús mé tjetjitaón ch'án nta

(Mr. 6.45-52; Jn. 6.16-21)

²² Ntá kjuixin tíha ntá k'uetuēnhen ch'ín Jesús tí sín k'uájiko ch'án kixin ts'it'ótjen sín tí ntabároo ts'atōye sín í jnko nánko ntāyaon. Ntá jehe ch'án naxā kuítōhe ch'án nixjehé ch'án tí sín siín ntiha.

²³ Ntá kjuixin xíkayehé sín na ntá jehó ch'án chríin ch'án ijnko jnā tsonixjehé ch'án It'é ch'án tjan nkaya nkajní. Na ntá ó k'uúxin tie la jehó ch'ín Jesús itjen ch'án ntiha.

²⁴ La ntá tí ntabároo na mé tjenkátaón ntā jnkōsiné ntāyaon. Ntá imá chjéhe ntā tí ntabároo kixin tí xrinto la chjéhe la xitjahya sátsji ntabároo.

²⁵ Na ntá las tres nantōye a mé sákjuichréhe ch'án sín. Totó ch'án mé sákjuítónxin ch'án tí ntāyaon la ntá kóchjinehe ch'án tí tjejó sín.

²⁶ Na ntá tí sín k'uájiko ch'án mé k'uíkon sín kixin tjetjitaón ch'án tí ntāyaon na ntá imá chrakon sín la k'óyako sín. Ntácho sín kixin kjuacha sín ichro sín, chrakon sín.

- ²⁷ Na ntá nixjehe ch'ín Jesús tí jehe sín ntá ntáchro ch'án kixin:
—Nchefuérte asánrá, chrakonhyará. Janhan kjuihá —ichro ch'án.
- ²⁸ Ntá ch'ín Pedro mé nixjehe ch'án Ìnchéni, ntáchro ch'án kixin:
—Ìnchéni tí chaxín jaha la ntá chrókjuánjuan kjuachaxin chrókjuitaónni tí ntá tsjjini tí tjen jaha —ichro ch'án.
- ²⁹ Ntá ntáchro ch'ín Jesús kixin:
—Xrákiá.
- Ntá k'uínkajinxin ch'ín Pedro tí ntabáro la kjuankixin ch'án tjetjitaón ch'án ntá sákjuichréhe ch'án tí tjen ch'ín Jesús.
- ³⁰ A ntá xringhya ntá kónohe ch'án kixin imá chjéhe xrjnto chrítaón ntá, ntá chrakon ch'án la kjuankixin tinkák'aniánki ch'án ntá, ntá k'uèya ch'án ntáchro ch'án kixin:
—Ìnchéni, nchekaáni —ichro ch'án.
- ³¹ A ntá tuénxin ch'ín Jesús mé itsé ch'án tja ch'ín Pedro la ntáchro ch'án kixin:
—Intsíkoá tinkachónkia tí janhan. ¿Nkekuénté titekákonhya? —ichro ch'án.
- ³² Na ntá tió k'ujt'ótjen sín yó sín tí ntabáro la ntá tuénxin k'uixratá tí xrjnto.
- ³³ Ntá kain sín tí sín tjejóxehen tí ntabáro mé k'uéjoxin tochr'in sín nkayakon ch'ín Jesús la ntáchro sín kixin:
—Jaha mé chaxín Xjeen Dios —ichro sín.
- Ch'ín Jesús mé kjuínchekitqhe jina tí chojni níhi nonte Genesaret*
(Mr. 6.53-56)
- ³⁴ Ntá tió k'uátòye sín tí ntáyaon ntá kjuiji sín tí nonte Genesaret.
- ³⁵ Ntá tí sín síin ntiha tjoka kjuátsoan sín kixin jehe ch'ín Jesús tíha, ntá kuínhin tí sín chjasin chjinxón ntiha la ntá kjuíkao sín kain tí sín níhi tí tjen ch'án.
- ³⁶ Na ntá chrónóqhe sín ch'án kixin chrókuítqhe ch'án kixin kjónté chrínta iké ch'án chrókuákoxin sín, la ntá kain tí sín kuákoxin iké ch'án mé kuítqhe sín jina.

15

Tí jie tjasin chojni (Mr. 7.1-23)

- ¹ A ntá chjasin Jerusalén kjuixin iso sín fariseo la ko iso tí sín maestro tjako tí ley la kjuichréhe sín tí ch'ín Jesús. Ntá kjuanchankíhi sín ch'án kixin:
- ² —¿Nkekuénté kixin tí sín xrikoa la nchexiteyáhya sín tí nkehe k'uékinkáchónki tí sín tsík'axrjenixinni kixin t'óntihya sín itja sín ntá kjónté ine sín? —ichro tí sín fariseo a.
- ³ A ntá kjuanchankí ch'ín Jesús kixin:
—¿Nkekuénté jahará kjaxin titekákonhyará nkehe tsík'etqan Dios? A ntá jahará tjinkáonrá naxa chrókuinkachónkirá tí nkehe kuinkáchónki tí sín tsík'axrjenixinrá.
- ⁴ Ntáchro Dios kixin: “Tsochontehérá kjuasáya it'ára la ko inárá”, la ko ntáchro ch'án kixin:
“Tí nkexo t'ántaxínhin it'é la ko iné la chrók'uen.”*
- ⁵ A ntá jahará tsintáchrórá kixin ó nchoxon kixin ijnko nkexo tsochéna it'é la ko iné kixin:
“It'éni, inéni, chrokjuahya tsjinkitsani tí jaha kixin kain nkehe chóntani la ó chjéheni Dios.”
- ⁶ A ntá jnkojín nkexo tsontáchro ch'án tíhi ntá í t'ichjánxinhya tsjinkitsa tí it'é la ko tí iné, mé xíkaha tsixrorá. Mé xíkaha jahará kujtqhérá tí nkehe k'uetqan Dios kixin tjinkáonrá chrókjuich'erá éxi kjuich'e tí sín tsík'axrjenixinrá.
- ⁷ Jahará la jehya jnkojinxón tjenkayáxinrá. Ntoá tsintáchro tí ch'ín Isaías, tí nkexo k'uéchrónka itén Dios ósé. Mé chrónka ch'án kixin nkexrí tjejorá la xíkaha tsíkjin ch'án kixin:
- ⁸ Tí chojni tí chjasin í ir'va ó xraxinkakonxin sín tí janhan
a ntá tí asén sín la ikjín kuitqhe sín tí janhan.
- ⁹ Méxra ó chónko tóchjina sín xraxinkaon sín tí janhan
kixin tí nkehe tjako sín la tí nkehe tsík'etqan chojni ó.†
Mé xíkaha ichro itén Dios.
- ¹⁰ Ntá k'uíyqhe ch'ín Jesús tí chojni inaá la ntáchro ch'án kixin:
—Chrókuinhínra la ko chrókuéinxinrá.
- ¹¹ Kain nkehe ine chojni la ó nchoxon, jehya jie. Tí jie la tí nkehe t'axrjéxin ir'va chojni
—mé xíkaha ichro ch'ín Jesús.
- ¹² A ntá tí sín k'uájiko ch'ín Jesús mé kóchjinehe ch'án la ntáchro sín kixin:
—¿Á noha kixin tí sín fariseo mé kónínkaon sín tí kuínhin sín tí nkehe ntáche sín? —ichro sín.
- ¹³ Ntá kjuátqhe ch'án ntáchro ch'án kixin:
—Kain tí ka jehya T'aná tjen nkaya nkajni k'uénkaxin la mé ts'axrjenkixin nuèe.

* 15:4 Éxodo 20.12; 21.17; Levítico 20.9 † 15:9 15.8-9 Isaías 29.13

¹⁴ Nté t̄t̄ohé sín. Tí jehe sín la ntakótán sín la t'et̄uēnhen sín í so sín ntakótán. A ntá tió ijnko chojni ntakótán t̄jitaón nt̄ia la ntá yóí sín ts'anót̄jenyá sín ichrén t̄oye —ichro ch'án.

¹⁵ Ntá ntáchro ch'ín Pedro k̄ixin:

—Chronka nkexr̄í t'axr̄jexín tíha —ichro ch'án.

¹⁶ Ntá k̄juát̄ehe ch'ín Jesús ntáchro ch'án k̄ixin:

—¿Á k̄j̄axinrá jahará tiēnxinhyará?

¹⁷ ¿Á tiēnxinhyará k̄ixin kaín tí nkehe ineni na s̄át̄ji nkaya t̄seēni na ko x̄ík'axr̄jexín tí cuér̄poeni inaá?

¹⁸ A ntá tí nkehe t'axr̄jexín ir'va chojni la t'axr̄jen̄ixin as̄én chojni la tíha la mé tí j̄ie t̄jasixín chojni.

¹⁹ Kaín tíha mé t'axr̄jen̄ixin as̄én chojni, mé tí j̄inahya t̄jenkayáxin sín la ko tí t'óyán k̄íchó sín la ko tí t̄jachehe k̄íchó sín la ko tí chón̄ta sín í jnko chojni ch̄jin ók̄jé la ko teé sín la ko tí k̄juach'ia la ko tí t'ántax̄in̄h̄in k̄íchó sín.

²⁰ Tí nkehe a mé t̄jasixín chojni j̄ie. A ntá tí sineni k̄jonté nchexiteyáhyani ts'ónti t̄jani la tíha la jehya j̄ie —mé x̄íkaha ichro ch'ín Jesús.

Ijnko t̄jan jehya sín is̄raelita mé kuinkáchónki tí ch'ín Jesús

(Mr. 7.24-30)

²¹ Ntá ch'ín Jesús mé k'uaxr̄jexín ch'án n̄tiha la ntá s̄ák̄juí ch'án nó ch̄jasin Tiro la ko ch̄jasin Sidón.

²² Ntá ikui ijnko chojni ch̄jin na mé ijnko t̄jan cananea na k̄juák'e t̄jan tí ch̄jasin n̄tiha. Kóch̄jinehe t̄jan tí ch'ín Jesús la k'uèya t̄jan ntáchro t̄jan k̄ixin:

—Inchéni, X̄jeen David, t̄ikonóh̄éni k̄ixin tí x̄j̄eenni ch̄jin la mé níhi t̄jan chón̄ta t̄jan ijnko nchakuen tí j̄inahya —ichro tí t̄jan a.

²³ A ntá ch'ín Jesús la ninkehó k̄juát̄eheya ch'án. A ntá tí sín k'uáj̄iko ch'án na kóch̄jina sín la ntáche sín ch'ín k̄ixin:

—Tét̄uēnhén t̄jan s̄át̄s̄ji t̄jan k̄ixin tinkák'óyako t̄jan chréhe t̄jan tí jeheni —ichro sín.

²⁴ Ntá ntáchro ch'ín Jesús k̄ixin:

—Dios mé ichr'án̄na ts̄jéyá jehó tí kolélo k̄juíchr̄oe kuēnte nació̄n Is̄rael —ichro ch'án.

²⁵ A ntá tí t̄jan a kóch̄jina la k̄juák'ex̄in toh'ín t̄jan nkayakon tí ch'ín Jesús la ntáchro t̄jan k̄ixin:

—Inchéni, t̄jink̄itsani —ichro t̄jan.

²⁶ A ntá ch'ín Jesús k̄juát̄ehe ch'án ntáchro ch'án k̄ixin:

—Jehya tí j̄ina chrókuakits̄jahá niót̄ja tí x̄jan ntá chrót̄jahá kon̄j̄a chrók̄jone va —ichro ch'án.

²⁷ A ntá jehe t̄jan la ntáchro t̄jan k̄ixin:

—Chaxín x̄íkaha, inchéni. K̄jánchó k̄jonté tí kon̄j̄a na tí nkehe ts̄jix̄en̄jinnk̄i mesa kuēnte inché la ine va —ichro t̄jan.

²⁸ Ntá ntáchro ch'ín Jesús k̄ixin:

—Jaha imá tinkachón̄kia tí janhan. Tí nkehe t̄jinkáv̄an la tsoxiteyá —ichro ch'án.

Ntá tuén̄x̄in tí hora la tí x̄jeen t̄jan ó kuít̄ohe j̄ina.

Ch'ín Jesús mé k̄juínchekit̄ohe j̄ina nchón̄hya chojni n̄hi

²⁹ Ntá ch'ín Jesús mé s̄ák̄juixin ch'án n̄tiha la k̄juíji ch'án chr̄inta nt̄ayaon Galilea. Ntá chr̄in ch'án ijnko j̄n̄a la n̄tiha k̄juák'et̄j̄ax̄in ch'án.

³⁰ Ntá k̄ojnkotsé its̄jé chojni tí t̄jen ch'án la k̄juík̄ajo sín tí s̄jinn̄hi, mé tí sín xit̄jahya t̄ji la ko tí sín t'ikonhya la ko tí sín nix̄jahya la ko tí sín ts̄ix̄enká la kaín x̄in tí í so s̄jinn̄hi. K'uejo sín tí s̄jinn̄hi toté tí ch'ín Jesús k̄ixin jehe ch'án mé sinchekit̄ohe ch'án sín j̄ina.

³¹ Kaín chojni la imá chrakon sín k̄ixin k'uíkon sín k̄ixin tí sín k'uénix̄jahya la ó nix̄ja sín la tí sín ts̄ix̄enká la ts̄ikit̄ohe sín j̄ina la tí sín xit̄jahya t̄ji la ó t̄j̄i sín la ko tí sín k'uék'ikonhya la ó t'ikon sín. Méx̄r̄a k̄juanchehe sín k̄juasáyé tí Dios kuēnte tí sín Is̄rael.

Ch'ín Jesús mé k̄juínchek̄jine noó m̄il chojni

(Mr. 8.1-10)

³² Ntá k'uíyēhe ch'ín Jesús tí sín k'uáj̄iko ch'án la ntáchro ch'án k̄ixin:

—Imá t̄ikonógh̄a kaín tí chojni k̄ixin ó ní yaon t̄j̄eókoni sín ntá k̄juēhe sín nkehe sine sín. T̄jink̄akonhya chrókuét̄uān̄h̄an sín s̄áchrók̄jui sín nt̄oē sín k̄ixin nax̄a nehya sín la nt̄ja ó ts̄ot̄iēnx̄in sín k̄jinta —ichro ch'án.

³³ Ntá ntáchro tí sín k'uáj̄iko ch'án k̄ixin:

—Ntá jaha la ó noha k̄ixin ntej̄e t̄j̄eó̄ni la kohya nkehe tsoch̄jeheni kaín x̄in tí chojni a —ichro sín.

³⁴ Ntá ch'ín Jesús mé k̄juanchank̄ihi sín, ntáchro ch'an k̄ixin:

—¿Nkekj̄aín niót̄ja chontará? —ichro ch'án.

Ntá ntáchro sín k̄ixin:

—Yato niotja chóntani la ko iso koche ntsíntsi —ichro sín.

³⁵ Ntá ch'in Jesús k'uetóan ch'án kixin kaín xín sín ts'ixitjaxín sín nonte, ichro ch'án.

³⁶ Ntá kuákja ch'án tí yato niotja la ko tí koche ntsíntsi la kjuanchehe ch'án kjuasáyé Dios. Ntá kóchrít'ó ch'án tí niotja a la ntá k'uetuénhen ch'án tí sín k'uájiko ch'án kixin ts'óxikayehe sín tí niotja la ko tí koche kaín xín tí sín síin a, sine sín.

³⁷ Na mé kaín xín sín kjóne sín na kókjehe sín ntá kjuenájín sín yato ntaxra tot'ó tí nkehe naxa tsíxehe.

³⁸ A ntá tí sín kjóne mé noó mil chojni ntoa. A ntá tí chojni chjin la ko chánjan la mé kuákjaha sín cuenta nkekjaín tí sín a.

³⁹ Ntá ch'in Jesús mé nixjehe ch'án sín sákjuí sín la ntá k'ujt'ótjen ch'án ntabárcó la sákjuí ch'án nó Magdala.

16

Tí sín fariseo la ko tí sín saduceo tjanchia ijnko kjuaxroan náxrjón

(Mr. 8.11-13; Lc. 12.54-56)

¹ A ntá iso tí sín fariseo la ko iso tí sín saduceo mé sákjuítsjehe sín tí ch'in Jesús. Tjinkaon sín chrókjuachaxín sín ch'án la kjuanchehe sín ch'án kixin chrókjuakoxín ch'án ijnko kjuaxroan kixin á chaxín jehe ch'án tsíkixín ch'án tí tjen Dios.

² A ntá ch'in Jesús na kjuátehe ch'án, ntáchro ch'án kixin:

—Jahará ntáchorá kixin ijje ntá kónjin ó tsi ijnko yaon jina kixin kjátse nkajní.

³ La ntá nchítjen ntáchorá kixin ijje la náxrjónhya kixin kjátse nkajní la tjenkáyá tjuj. Méxra jahará ntoáhya tjenkáyáxinrá. Ó nohará tjátsoanrá tí nkajní, a ntá tjátsoanhyará tí kjuaxroan sítónhen jie.

⁴ Tí sín jínahya la tí sín titekakonhya la tjanchia sín ijnko kjuaxroan jíé. A ntá ts'ikonhyará í jnko kjuaxroan, jehó tí kjuaxroan kuènte ch'in Jonás mé ts'ikonrá —mé xíkaha ichro ch'in Jesús.

Ntá kuítóhe ch'án sín la sákjuí ch'án.

Ch'in Jesús ntáchro kixin chrókuitekakonhya sín tí nkehe tjako tí sín fariseo

(Mr. 8.14-21)

⁵ Ntá tí sín k'uájiko ch'in Jesús mé k'uátóye sín ntaoyaon la ntá k'uitjáyenhen sín tsíkjikohya sín niotja.

⁶ Ntá ntáchro ch'in Jesús kixin:

—Chrókóxakonhanrá kixin tí xroan ts'ánkíxin niotjé tí sín fariseo la ko tí sín saduceo.

⁷ Ntá tí sín k'uájiko tí ch'in Jesús mé ikjo sín kichó sín ntáchro sín kixin:

—Mé xíkaha ichro ch'án kixin tsíkjikohyani niotja —ichro sín.

⁸ Ntá kónohe ch'in Jesús kixin nkehe tí kjo sín kichó sín, ntá ntáchro ch'án kixin:

—¿Nkeuènté tjórá kixin chontahyará niotja? Jahará la intsíkoá tinkachónkirá tí janhan.

⁹ Jahará zá naxa tiénxinhyará la ko á xráxinkákonhyará tí in'ó niotja k'óxikayehehi kjóne tí in'ó mil chojni la ko á xráxinkákonhyará nkekjaín ntaxra kjuenájínrá tí nkehe tsíxehe?

¹⁰ La ko zá xráxinkákonhyará jahará tí yato niotja xikayehe kjóne tí noó mil chojni la ko á xráxinkákonhyará nkekjaín ntaxra kjuenájínrá tí nkehe tsíxehe?

¹¹ A ntá ¿nkeuènté kixin kuiénxinhyará kixin janhan la jehya kuènte niotja tjénixja tíó ntáxrjan kixin chrókóxakonhanrá kixin tí xroan ts'ánkíxin niotjé tí sín fariseo la ko tí sín saduceo? —mé xíkaha ichro ch'in Jesús.

¹² Na ntá kuienxín sín kixin nixjahya ch'án kuènte tí xroan t'ánkíxin niotja. Náhi. Tjenixja ch'án kixin chrókóxakonhen sín kixin tí nkehe tjako tí sín fariseo la ko tí sín saduceo.

Chrónka ch'in Pedro kixin ch'in Jesús mé tí nkexro Cristo

(Mr. 8.27-30; Lc. 9.18-21)

¹³ Kjuíji ch'in Jesús chjino tí chjasín Cesarea de Filipo ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kixin:

—¿Nkehe tjo sín kixin nkexro tí Xjeen Dios K'óna Chojní? —ichro ch'án.

¹⁴ Ntá jehe sín kjuátehe sín ntáchro sín kixin:

—Iso sín mé ntáchro sín kixin Juan Bautista, ichro sín. A ntá í so sín na mé ntáchro sín kixin Elías, ichro sín. A ntá í so sín mé ntáchro sín kixin Jeremías ó í jnko nkexro k'u'échrónka itén Dios —ichro sín.

¹⁵ Ntá ntáchro ch'in Jesús kixin:

—¿A ntá jahará nkechorá kixin nkexro tí janhan? —ichro ch'án.

¹⁶ A ntá ch'in Simón Pedro kjuátehe ch'án ntáchro ch'án kixin:

—Jaha mé tí Cristo mé Xjeen Dios tjechón —ichro ch'án.

¹⁷ Ntá kjuátehe ch'in Jesús ntáchro ch'án kixin:

—Náxrjón tjen jaha Simón xjeen Jonás kixin kohya nijnko chojni kjuakoha tíha. Jehó T'aná tjen nkaya nkajni mé kjuakoha tíha.

¹⁸ Méxra ntáxrjan kixin jaha mé Pedro mé t'axrjexín kixin ijnko xro la chrítaón tí xro mé sit'ána njnko la kjónté tí kjuachaxin kuènte kjuach'én la tsjachahya sinchek'itjáyán.

¹⁹ Méxra jaha mé tsotjaha tí llave kuènte kjuachaxin nkaya nkajni la ntá tí nkehe tjánjonhya kjuachaxin tsonhen ntihi chjasintajni la kjaxin nkaya nkajni tsochóntahya kjuachaxin. A ntá tí nkehe tsánjuan kjuachaxin tsonhen ntihi chjasintajni la ntá kjaxin nkaya nkajni siin kjuachaxin.

²⁰ Ntá ch'ín Jesús mé k'uetuenhen ch'án tí sín k'uájiko ch'án kixin ninkexró tsochénkahya sín kixin jehe mé tí Cristo.

Ch'ín Jesús chrónka ch'án kixin its'en ch'án

(Mr. 8.31—9.1; Lc. 9.22-27)

²¹ Ntá ch'ín Jesús kjuankixin ch'án chénka ch'án tí sín k'uájiko ch'án kixin t'ichjánxin satsji ch'án chjasin Jerusalén la ntaha la tí sín t'etóan kuènte njnko la tí sín nchat'á tjetóan la ko tí sín maestro tjako ley mé imá sinchekjasóte sín ch'án. La chrónka ch'án kixin ts'óyán sín ch'án kjánchó tí nixin yaon mé tsoxechón ch'án inaá.

²² Ntá ch'ín Pedro mé kuakitsjenta ch'án tí ch'ín Jesús la kjuankixin nixjehe ch'án ntáχρο ch'án kixin:

—Kjá Dios tsjanjonhya kjuachaxin xikaha tsonhan Inchéni kixin jaha la xitjahya tsjasóte xikaha —ichro ch'ín Pedro.

²³ A ntá ch'ín Jesús mé kuinátjía ch'án la nixjehe ch'án tí ch'ín Pedro, ntáχρο ch'án kixin: —Sátjia ntáha, Sátanas. Tjiatéhya tí jaha tí nkehe tsonna. Jaha chrók'uínkakahén tí nkehe tjinkaon Dios. Jaha tjenkayáxinhya éxi tjinkaon Dios. Náhi. Tjenkayáxian éxi tjenkayáxian chojni ó —ichro ch'ín Jesús.

²⁴ Ntá nixjehe ch'ín Jesús tí í so sín k'uájiko ch'án, ntáχρο ch'án kixin: —Jnkojinrá tjínkaonrá tsochréhérá tí janhan la t'ichjánxin tsitohérá kain tí nkehe tjaké asánrá, ntá tsámárá tí ntacruz kuéntará, a ntá tsochréhérá tí janhan.

²⁵ A ntá tí nkexro tjinkaon jehó sinchekaa asén la ts'itjáyán. A ntá tí nkexro chrókjuinçek'itjáyánxín asén kixin tinkáchónki sín tí janhan la tsaá.

²⁶ ¿A ntá nkehe tsonhen tí chrókjuacha ijnko chojni chróchónta kain nkehe siin chjasintajni a ntá tí kjuachón chrókjuinçek'itjáyán? ¿Nkehe chrókjuenká chojni kixin chróchónta tí kjuachón?

²⁷ Tí Xjeen Dios K'óna Chojni tsjkaó ch'án tí kjuachaxin jié kuènte It'é ch'án tjen nkaya nkajni la kain tí sín ángel tsjkaó ch'án na ntá tsjenkehe ch'án jnkojnko chojni nkexrí tí xra kjuich'e jnkojnko tí jehe sín.

²⁸ Chaxín xrxjanka kixin isorá tjejorá ntihi la naxa ts'énhyará naxa ts'ikonjjará kixin nkexrí tí kjuachaxin tsochónta tí Xjeen Dios K'óna Chojni tí tsjkaó ch'án kjuachaxin jié —ichro ch'ín Jesús.

17

Ch'ín Jesús mé k'uixitóxin nkexrí tsjehe ch'án

(Mr. 9.2-13; Lc. 9.28-36)

¹ Ntá injón yaon chr'éxin ntá ch'ín Jesús mé sákjujko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'uit'ótjen sín ijnko jna imá noi.

² Ntá ntiha tjejó sín ntá xrináhya k'uikon sín kixin ch'ín Jesús mé k'uixitóxin nkexrí tsjehe ch'án. Tí nkayakon ch'án la imá tjáqini tsjehe éxi yaon la ko iké ch'án la k'óna imá tjóá la tsjehe éxi yóhe ijnko xrohi t'inkaséyan.

³ Na ntá xrináhya k'uikon sín itjen ch'ín Moisés la ko tí ch'ín Elías tjejóto sín tí ch'ín Jesús.

⁴ Na ntá ch'ín Pedro mé ntáche ch'án tí ch'ín Jesús kixin:

—Inchéni, jina kixin tjejóni ntihi. Tí tjinkávan la chrókjuich'énani iní nchia la mé ijnko kuéntá jaha la ijnko kuènte ch'ín Moisés la í jnko kuènte ch'ín Elías —ichro ch'án.

⁵ Ntá naxa tjenixja ch'ín Pedro na ntá xrináhya ikui ijnko tjuj imá t'inkaséyan kjuák'etja chrítaón tí jna tjejó sín. Ntá xrináhya chríkjan tí tjuj kuínhin sín itén ijnko nkexro nixja na mé ntáχρο kixin:

—Tíhi mé xjanna. Imá tjuaha ch'án la ko chàna kixin itjen ch'án. Chrókuinhínrá tí nkehe tjako ch'án —ichro Dios.

⁶ Kuínhin tí sín k'uájiko ch'án xikaha la ntá kjuitsínka sín nonte kixin imá chrakon sín.

⁷ Na ntá ch'ín Jesús mé kóchjina tí tjejó sín la kuákóxin sín ch'án la ntáχρο ch'án kixin:

—T'áya chrakonhyará —ichro ch'án.

⁸ Na ntá xrináhya k'uikon sín kixin kohya ninkexró. Jehó ch'ín Jesús mé tjen.

⁹ Na ntá tí k'uinkajinxin sín tí jna ntá k'uetóan ch'ín Jesús, ntáχρο ch'án kixin:

—Ninkexró chēnkahyará tí nkehe k'uíkonrá ijie hasta tsoxechónjian tí Xjeen Dios K'óna Chojni —ichro ch'án.

¹⁰ Ntá tí sín k'uájiko ch'ín Jesús mé kjuanchankí sín, ntáchro sín kixin:

—¿Nkekuēnté ntáchro tí sín maestro tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹¹ Ntá kjuátēhe ch'ín Jesús, ntáchro ch'án kixin:

—Chaxín senó itsi ch'ín Elías kixin tsjasiyóxin ch'án kaín nkehe.

¹² Kjánchó ó xrjanka kixin chaxín ó kúi ch'ín Elías la tí sín chjasintajni la mé kjuátsoanhya sín ch'án la kjuínchekjasóte sín ch'án éxi kóxrjínhin sín. Mé xikaha kjaxin tí Xjeen Dios K'óna Chojni la mé kjaxin sinchekjasóte tí jehe sín —mé xikaha ichro ch'ín Jesús.

¹³ Ntá tí sín k'uájiko ch'án mé kónohe sín kixin ch'ín Jesús la nixja ch'án kuēnte Juan Bautista.

Ch'ín Jesús mé kjuínchekitohe jína ijnko xjan t'aniáte

(Mr. 9.14-29; Lc. 9.37-43)

¹⁴ Ntá tió k'uúji sín tí siín nchónhya chojni la ntá kóchjina ijnko ch'ín tí tjen ch'ín Jesús la kjuák'exín toch'ín ch'án nkayakon ch'án. La ntáchro ch'án kixin:

¹⁵ —Inchéni, tikonóhéni kixin xjeenni la níhi, chóna ch'án chin t'aniáte. Nchónhya veces tjítsínkate ch'án xrohi la tjítsínkankí ch'án nta.

¹⁶ Ntá kjuíkaoñi ch'án ntihi la tí sín xrikoá la kjuachahya sín kjuínchekitohe ch'án jína.

¹⁷ A ntá kjuátēhe ch'ín Jesús ntáchro ch'án kixin:

—Jahará la chaxínhya tinkachónkirá tí janhan la imá tjasinrá jie. ¿Xá hasta nkesá tjínkáonrá naxa ts'ejóni? ¿Hasta nkesá tsjácha tsjak'é tsjákoahará? Xrakoa tí xjan méhe ntihi —ichro ch'án.

¹⁸ Ntá ch'ín Jesús mé k'uētēnhen ch'án tí nchakuen tí jínahya la ntá k'uaxrjexín tí nchakuen tí jínahya tí chānjan la tuénxín kuítōhe xjan jína.

¹⁹ Ntá kjuixín sákjuí sín la jehó ch'ín Jesús tjen ch'án la ntá tí sín k'uájiko ch'án mé kjuanchankíhi sín ch'án, ntáchro sín kixin:

—¿Nkekuēnté kixin kjuachahyani kuakitsjeni tí nchakuen tí jínahya a? —ichro sín.

²⁰ Ntá ntáchro ch'ín Jesús kixin:

—Jahará la kjuachahyará kuakitsjerá nchakuen tí jínahya kixin intsíkoá tinkachónkirá tí janhan. Chaxín xrjanka kixin tí chrókuinkachónkirá kaín asánrá kjónté intsíkoá éxi ijnko tje mostaza intsí la ntá chróntácherá tí jnā kixin: “Sátjixian ntihi la sátsjia ókjé”, chróchrórá chróntácherá tí jnā la ntá tí jnā sáchrókjuxin ntiha. Mé xikaha kaín nkehe chrókjuachá chrókjuih'erá tí chaxín tinkachónkirá tí janhan.

²¹ A ntá tí tsakitsjerá ijnko nchakuen tí jínahya la t'ichjánxin tsonixjehérá Dios la ko sintehyará.

Ch'ín Jesús chrónka ch'án inaá kixin its'en ch'án

(Mr. 9.30-32; Lc. 9.43-45)

²² Naxa k'uék'aji sín jnkokoá tí estado Galilea la ntáchro ch'ín Jesús kixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí siín chojni t'ētoan sinchekjasóte sín ch'án

²³ La ts'óyán sín ch'án. A ntá tí yaon níxin ntá tsoxechón ch'án inaá, ichro ch'án. Ntá tí sín k'uájiko ch'án mé kuínhin sín la imá k'uává sín.

Ch'ín Jesús kjuenkā ch'án tí nkehe kjuanchia tí sín kuēnte njnko

²⁴ Ntá tió kjuíji ch'ín Jesús la ko tí sín k'uájiko ch'án tí chjasin Capernaum la ntá tí sín nchekjēnkí kuēnte njnko mé sákjuitsjehe sín tí ch'ín Pedro la kjuanchankí sín kixin:

—Tí maestro kuēntá la, ¿a tjenkahya ch'án tí nkehe tjanchia tí sín nchekjēnkí kuēnte njnko? —ichro sín.

²⁵ Ntá kjuátēhe ch'ín Pedro, ntáchro ch'án kixin:

—Kjá tjenkā ch'án —ichro ch'án.

Ntá k'uixenhen ch'ín Pedro tí nchia la ch'ín Jesús mé senó nixja ch'án ntáchro kixin:

—¿Nkechrúa, Simón? ¿Nkexro chrókjuenkā tí nkehe tjanchia tí sín t'ētoan chjasintajni, á tí sín kuēnte ntiho ó á tí sín tsíkjixín ókjé? —ichro ch'ín Jesús.

²⁶ Ntá kjuátēhe ch'ín Pedro, ntáchro ch'án kixin:

—Tí sín tsíkjixín ókjé mé tjenkā sín —ichro ch'án.

Ntá ntáchro ch'ín Jesús kixin:

—A ntá tí sín chjasén sín la t'ichjánxinhya chrókjuenkā sín.

²⁷ Kjánchó tjínkakonhya tsonínkaon ninkexró ntihi. La ntá sátsjia tí ntayaon sátsjikoá tí ichjōn chóna gancho tséxin sín koche la ntaha itsé tí chjōn chrínki ntayaon. Ntá tsákjá tí koche saoxín sítse gancho. Ntá takitjēhe nkaya ir'va va la ts'itja ijnko chichaon. Táha mé

tsjacha tsjenka kaín tí tjásikáha sín la ko tí tjásikehé sín jaha. Táha mé sátjikoá tjènka —ichro ch'ín Jesús.

18

¿Nkexro tí imá ts'etoan?

(Mr. 9.33-37; Lc. 9.46-48)

¹ A ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kíxin:

—¿Nkexro tí antsí má ts'etoan tí kjuachaxin kuènte nkaya nkajní? —ichro sín.

² Ntá ch'ín Jesús mé k'uíyehé ch'án ijnko chánjan la kjuak'e jnkosiné tí tjejó tí jehe sín

³ la ntáchro ch'án kíxin:

—Chaxín xrjanka kíxin tí ts'ónahyará éxí ijnko xjan ntsí ntá xitjahya tsákjará tí kjuachaxin kuènte Dios.

⁴ Tí jnkójín nkexro ts'óna éxí tí chánjan ihnekeha la mé antsí tjeotoan ntiha.

⁵ A ntá tí nkexro ts'áyehé ijnko chánjan kíxin tinkáchónki sín tí janhan la mé xíkaha éxí chrók'uáyehé sín tí janhan —mé xíkaha ichro ch'ín Jesús.

Tí chojni tjasin jie mé tsjasóte sín

(Mr. 9.42-48; Lc. 17.1-2)

⁶ Tí jnkójín nkexro chrókjuachroe ijnko chánjan ntsí tinkáchónki tí janhan la íchá jína chrókjuincheteyá sín ch'án ijnko xro tsík'óna xrochre ntá chrókjuikakánkí ch'án ntáyaon ninka.

⁷ Imá náxrjónhya tjejó tí sín chjasintajni kíxin siin nkehe tjasixín chojni jie. Xrácín la jehí siin, a ntá nòa tí nkexro tjasin tí nkehe tsjasixín chojni jie.

⁸ Tí itjá ó totá tjásixián jie na chrókójína chrókochrínjan chróchr'an ikjín kíxin íchá jína chróchonta kjuachón kjónté it'óó itjá ó it'óó totá. Á ntá tí yóí itjá ó yóí totá chróchonta tsjásixián jie la tíha mé sátsjixián tí síche xrohi jnkochrín.

⁹ La ko kjaxin tí ikuan tjásixian jie na chrókójína chrókuakitsjenkiá tí ikuan chróchr'an ikjín kíxin kjónté náyo ikuan na chróchonta kjuachón. A ntá tí yóí ikuan chróchonta tsjásixián jie la tíha mé sátsjixián tí síche xrohi jnkochrín.

Kjuíncheyóexin ch'ín Jesús éxí ijnko kolélo tsík'itjáyán

(Lc. 15.3-7)

¹⁰ Chrókókjoniéhyará nijnko tí chánjan ntsínsí. Tjonkará kíxin nkaya nkajní la tí sín ángel kuènte tí xjanntsí la xrácín tjejó sín tí tjen T'aná nkaya nkajní.

¹¹ Tí Xjeen Dios K'óna Chojni la mé ikui kíxin chrókjuinchekaá tí chojni xrichroe.

¹² ¿Jahará nkechrórá? Ijnko chojni chóna ijnko ciento kolélo ntá chrók'uitjáyán ijnko va na z'á chrókuítgehya ch'án tí noventa y nueve va tí jnā ó a ntá á chrókjuikjeyáhya ch'án tí ijnko tí ko k'uitjáyán ní?

¹³ A ntá tí tsjacha ch'án ts'itja ch'án va ntá antsí tsochéhé ch'án kíxin tí kolélo k'uitja ch'án la ntá kánhyó tsochéhé ch'án kíxin tjejó tí noventa y nueve ko tsík'itjáyánhya va.

¹⁴ Mé xíkaha kjaxin It'eni tjen nkaya nkajní la tjinkakonhya ch'án kíxin chrók'uitjáyán ninkexró kjónté ijnko chojni kánhyó tjeotoan.

Chrók'uitjáyánhanrá tí jie kjuasinhanrá kichuárá

(Lc. 17.3)

¹⁵ Tí kichuá tí chrókjuít'aha ichrén nkehe jínhya la ntá jahvá chrónixjehé ch'án la nhexraxinkaon ch'án tí jie kjuasin ch'án. A ntá tí kjuacha nixjehé tí kichuá la í kohya kjuaníkaon.

¹⁶ A ntá tí tahya ch'án kuentá nkechrua la ntá ntáche á jnko ó yaá chojni sátjikoá kíxin tsinhín sín á chaxín titekakonhya ch'án.

¹⁷ A ntá tí kjónté xíkaha náxa titekakuenhya ch'án sín la ntá chenka tí sín tsíkójnksé nkehe tí jie kjuasin ch'án la ntá tí náxa titekakuenhya ch'án tí sín tsíkójnksé la ntá ts'íkonrá ch'án éxí ijnko chojni tinkáchónkihya Dios ó éxí ijnko chojni nchekjénki.

¹⁸ Chaxín ntáxrjan kíxin tí tsjánjonhyará kjuachaxin nkehe tsonhen ntihi chjasintajni la ntá kjaxin nkaya nkajní tsjanjonhya Dios kjuachaxin la ko tí tsjánjonrá kjuachaxin nkehe tsonhen ntihi chjasintajni la kjaxin ntaha nkaya nkajní tsjanjon Dios kjuachaxin.

¹⁹ Kjaxin ntáxrjan kíxin tí tjejó yaará ntihi chjasintajni la tí jnkokoá tjejótjenkayáxinrá chrókjuancheherá Dios ijnko nkehe tjínkáonrá la ntá jehe ch'án mé tsotjáhará ch'án.

²⁰ Kíxin tí tjejó yaá ó iy'á chojni tjejó jnkokoá t'ákjenxin sín níná la janhan koína tjéntaxian tí tjejó sín ntiha.

²¹ Ntá kóchjina ch'ín Pedro mé kjuanchankí ch'án ntáchro ch'án kíxin:

—Inchéni, ¿nkekjáin veces chrók'uitjáyenhenni tí jię kjuasin kíchó ni? ¿Á yato veces ó ni? —ichro ch'án.

²² Ntá kjuátehe ch'ín Jesús, ntáchro ch'án kixin:

—Náhi, jehya yato veces ó. Náhi, hasta setenta veces tí yato.

Ch'ín Jesús kjuíncheyóexin ch'án ijnko chojni ch'exón xra k'uitjáyenhya ch'án ijie kíchó ch'án

²³ Tí kjuachaxin kuente Dios la éxi yóhe ijnko rey tjinkaon ch'án tsjentoáko ch'án kuentá tí sín ch'ehé ch'án xra.

²⁴ Ntá kjuankixin ch'án tsítsínkaxin cuenta la ntá xrinahya kóchjina ijnko ch'ín ch'e xra síka nchónhya millones chichaon.

²⁵ Tí ch'ín a mé chóntahya ch'án chichaon ts'ókjenhen ch'án tí ch'ín rey la ntá tí ch'ín rey mé k'uetqan ch'án kixin tí nkexro a mé tsoxi ch'án la koí tí ichjién ch'án la ko xjeen ch'án la ko kaín nkehe kuente ch'án kixin ntá xikaha mé tsoxenka kaín tí síka ch'án.

²⁶ A ntá tí nkexro ch'e xra mé kjuák'exín toch'ín ch'án nkayakon tí rey la chrónóhe ch'án, ntáchro ch'án kixin: “Jaha Inchéni tikonóehéni la kjónté kjaxón tsjenkahani kaín tí síkahani”, ichro ch'án.

²⁷ A ntá tí ch'ín rey kujikonóhe ch'án tí ch'ín a kjónté itsjé síka ch'án, ntá kuitqhe ch'án sákjuí.

²⁸ A ntá tí sákjuí tí ch'ín a ntá xrinahya xéta ch'án ijnko nkexro ch'eko ch'án xra mé ijnko nkexro síkéhe ch'án iso chichaon. La ntá tí ch'ín a mé tsénkíhi ch'án isin la ntáchro ch'án kixin: “iTsjenkana tí nkehe tjasíkana ní o náhi!” ichro ch'án.

²⁹ A ntá tí ch'ín chóxin ch'án mé kjuák'exín toch'ín ch'án nkayakon ch'án la chrónóhe ch'án ntáchro ch'án kixin: “Tikonóehéni ijie la kjónté kjaxón tsjenkahani kaín tí nkehe síkahani”, ichro ch'án.

³⁰ A ntá tí jehe ch'án la kujikonóehya ch'án. K'uetqan ch'án kixin tí ch'ín a mé tsjak'echjina ch'án tsjixinjian tsjenka ch'án kaín tí síka ch'án.

³¹ Ntá tí í so sín ch'exón xra mé k'uíkon sín la ntá imá kóxakonhen sín la sákjuíchénka sín tí lámoé sín nkexrí kaá kónhen tí ch'ín síka.

³² A ntá tí lamo mé k'uetqan tsjik'íyehé sín tí nkexro jínahya la ntá ntáchro ch'án kixin: “Imá jínahya jaha. Janhan mé kjuíntak'itjáyanhan tí nkehe tjasíkana kixin jaha chronóana.

³³ A ntá jaha mé kjaxin chrókujikonóehé tí nkexro choxian éxi janhan kujikonógha tí jaha”, ichro tí ch'ín lamo.

³⁴ A ntá imá kónínkaon tí lamo a la k'uetqan ch'án kixin tsjasóte tí ch'ín a tsjixinjian tsjenka ch'án kaín tí síka ch'án.

³⁵ A ntá tí ch'ín Jesús ntáchro ch'án kixin:

—Mé xikaha T'aná tjen nkaya nkajni xikaha sit'ahará jahará tí jehya kaín asánrá ts'itjáyanhanrá tí jię chóna kichuárá —ichro ch'ín Jesús.

19

*Tjako ch'ín Jesús kuente tí sín t'itjili kíchó
(Mr. 10.1-12; Lc. 16.18)*

¹ A ntá kjuixin nixja ch'ín Jesús kaín tíha, ntá sákjuíxin ch'án estado Galilea la kjuíji ch'án estado Judea nó tóhe tí ntárió Jordán.

² Ntá nchónhya chojni kjuíjichréhe sín ch'án ntá ntiha mé kjuínchekitqhe ch'án jína tí chojni níhi.

³ Ntá iso sín fariseo mé kóchjinehe sín tí ch'ín Jesús kjuanchankíhi sín ch'án kixin tsotsjehe sín nkexrí tsixro ch'án, ntáchro sín kixin:

—¿Á siín kjuachaxin tsjákehe jnkojín chojni ichjién kjónté kohya jię jié? —mé xikaha kjuanchankí sín.

⁴ Ntá kjuátehe ch'ín Jesús ntáchro ch'án kixin:

—¿Á nunca kjuínchekuáxinhyará jahará kixin ntáchro xroon itén Dios kixin tí nkexro kjuich'éna kaín chojni siín chjasintajni tí xrankixín, la tí nkexro mé “kjuich'éna ch'án chojni ntoa ko chojni chjin”?*

⁵ La ko ntáchro kixin: “Mé xikaha tí chojni ntoa la tsítqhe sín it'é sín la ko íné sín la tsakja sín ichjién sín la yóí sín la éxi ó jnko chojni xikaha ts'óna sín.”†

⁶ Mé xikaha la í jehya yaá chojni tí jehe sín. Náhi. Ó jnko chojni k'óna tí jehe sín la mé Dios kjuanjón kjuachaxin kixin kuákja kíchó sín, la í xitjahya ts'itjili kíchó sín.

⁷ Ntá tí sín fariseo mé kjuanchankíhi sín ch'án kixin:

—¿Ntá nkexrí kixin tí ch'ín Moisés k'uetqan kixin ts'óna ijnko xroon tsakja tí ichjién kixin tsjákeexín kíchó sín?‡ —ichro tí sín fariseo.

* 19:4 19.4: Génesis 1.27; 5.2 † 19:5 Génesis 2.24 ‡ 19:7 Deuteronomio 24.1-4

⁸ Ntá ntáchro ch'ín Jesús kixin:

—A ntá jahará titekákonhyará. Méxra ch'ín Moisés kjuanjon ch'án kjuachaxin kixin ts'óna tí xroon ts'itjéxin kichuárá. Kjánchó tí xrankixixin la xikahya kónhen.

⁹ Méxra ntáxrajan kixin jnkojin sín tjákehe ichjién tí kjuasinhya jie, chóntahya tjan í jnko chojni, ntá kjuákehe ch'án tjan ntá tsakja ch'án í jnko chjin mé xikaha la ó jie tíha. La ko kjaxin tí jnko chojni chjin tsikítsinke ntá tsakja í jnko chojni la kjaxin jie tíha.

¹⁰ La ntá tí sín k'uájiko ch'ín Jesús ntáchro sín kixin:

—Tí xikaha tjanjonko kichó sín chrók'uitjihi kichó sín la íchá jina chrókóteehya sín.

¹¹ Ntá ntáchro ch'ín Jesús kixin:

—Kénhya chojni tsjacha tienxín tíha. Jehó tí sín kjuanjon Dios kjuachaxin tienxín sín.

¹² Sín iso chojni tí tsik'ónaxin sín la chóntahya sín kojé sín la xitjahya tsochónta sín ichjién sín. La í so sín la chrokjuahya tsakja kichó sín kixin ókjé chojni kjaxin kjuich'ehe sín xikaha, la ko í so sín la takjahya kichó sín kixin tjinkaon Dios kixin xikaha sich'ehe sín ch'án xra. Tí sín tsjacha sich'e tíha la chrókjuich'e sín xikaha.

Ch'ín Jesús mé kjuíncheyaon ch'án chánjan

(Mr. 10.13-16; Lc. 18.15-17)

¹³ Ntá ikjui chojni kjuikao sín iso xjan kixin tjinkaon sín tsjak'etja tja ch'ín Jesús chrítaón tí chánjan la sincheyaon ch'án sín. Ntá tí sín k'uájiko ch'án mé kónínkakonhen sín tí sín kjuikao tí xjan.

¹⁴ A ntá ntáchro ch'ín Jesús kixin:

—Nté títóhérá tsoxrakoa xjan tí tjén janhan la t'ínkakuènhyará xjan kixin tí sín kuènte kjuachaxin nkaya nkajní la mé tóyóhé éxí tí jehe xjan —ichro ch'án.

¹⁵ Ntá kjuak'etja tja ch'án chrítaón tí xjan la ntá kjuixin ntá sákjuí ch'án ókjé.

Jnko ch'ín ntasoá rico mé kjuínixjehe ch'án tí ch'ín Jesús

(Mr. 10.17-31; Lc. 18.18-30)

¹⁶ A ntá ijnko ch'ín ntasoá sákjuitsjehe ch'án tí ch'ín Jesús la kjuanchankíhi ch'án kixin:

—Jaha la ijnko Maestro jina. La ntá ñneke jina chrókjuich'ení kixin chróchóntani kjuachón jnkochríxín? —ichro ch'án.

¹⁷ Ntá ch'ín Jesús kjuátehe ch'án, ntáchro ch'án kixin:

—¿Nkeuènté ntáchrúa kixin jina tí janhan? Jehó jnkokoá nkexro la mé jina la tíha mé Dios. A ntá tí tjinkávan tsochonta kjuachón jnkochríxín la titekávan tí nkehe k'uetqan Dios —ichro ch'ín Jesús.

¹⁸ Ntá ntáchro tí ch'ín ntasoá kixin:

—¿Nkehe tíha? —ichro ch'án.

Ntá ntáchro ch'ín Jesús kixin:

—Chrók'oyánhya chojni la ko chrókjuich'iyehya nijnko chojni chjin la ko chrókueehya la ko chrókjuich'énahya kjuach'ia kuènte ókjé chojni

¹⁹ la ko chrókjuíkosáyehé it'á la ko iná la ko chrótjuéhé kichuá éxí tjuèxian asán.[§] —mé xikaha ichro ch'ín Jesús.

²⁰ Ntá ntáchro tí ch'ín ntasoá kixin:

—Kaín tíha la kjuínchexiteyáni desde tí ntasoáni. ¿A ntá nkehe tí naqá t'itjáyán? —ichro ch'án.

²¹ Ntá ntáchro ch'ín Jesús kixin:

—Tí tjinkávan antsí ntoá sinchexiteyá la sátjia sinchekjia kaín tí nkehe chonta la sinchekjtonhén tí sín nóa. Ntá kaín tí nkehe tjete la tsochonta nkaya nkajní. Ntá tsjixin ntá tsjihá la chréhé tí janhan —ichro ch'ín Jesús.

²² Ntá kuínhin tí ch'ín ntasoá a xikaha ntá t'ává ch'án sákjuí ch'án kixin imá itsjé nkehe chónta ch'án.

²³ Ntá ch'ín Jesús mé nixjehe ch'án tí sín k'uájiko ch'án, ntáchro ch'án kixin:

—Chaxín tjonqará kixin tí chojni chóna imá itsjé nkehe na imá xra ts'áyéhe sín tí kjuachaxin kuènte nkaya nkajní.

²⁴ Kjatée xrjanka kixin antsí xrahya chrók'uatsínka ijnko kocamello ijnko tjar'i ntachica tjexrja. A ntá antsí xra kixin tí sín chóna itsjé nkehe chrók'uáyéhe tí kjuachaxin kuènte Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kichó sín kixin:

—Tí xikaha la ¿xá nkexro chrókjuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchro ch'án kixin:

§ 19:19 Éxodo 20.12-16; Deuteronomio 16.20; Levítico 19.18

—Chojni chjasintajni la xitjahya xikaha sich'e. A ntá Dios mé tsjacha sich'e xikaha —ichro ch'in Jesús.

²⁷ Ntá ntáchro ch'in Pedro kixin:

—Inchéni, jeheni kaín ni la kuitoheni kaín nkehe chóntani kixin tsochréheni tí jaha. A ntá ¿nkehe ts'áyéheni? —ichro ch'an.

²⁸ Ntá kjuátéhe ch'in Jesús kixin:

—Chaxin ntáxrjan kixin tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochónta kjuachaxin jié la ntá kjaxinrá jahará chréhérá tí janhan la ts'ejorá teyó trono sínchekitogexinrá ijíé kaín tí sín tsík'axrjenixin tí teyó xjeen ch'in Israel.

²⁹ La ko kaín tí sín kuitóhe sín ntóe sín la ko kuitóhe sín tí kichó sín la ko kuitóhe sín it'é sín o iné sín la ko kuitóhe sín ichjién sín la ko xjeen sín la ko nontee sín kixin tinkáchónki sín tí janhan, na ntá antsi má tsochónta sín la ko kjaxin tsochónta sín kjuachón jnkochrín.

³⁰ A ntá nchónhya tí sín t'etóan ijie, mé tsjixixin tsochréhe sín. A ntá nchónhya tí sín t'ituenhen ijie la tí sín a mé ts'etóan sín tí ntiha.

20

Ch'in Jesús kjuíncheyóexin ch'an éxi tí sín ch'e xra

¹ Tí kjuachaxin kuénte Dios la éxi yóhe ijnko chojni chóna xra nontee ch'an la ntá ijnko yaon imá nchítjen sákjuikjeyá ch'an chojni tsotjéhe ch'an to uva.

² Ntá tí k'uitja ch'an tí sín sich'ehe ch'an xra ntá ikjo ch'an sín kixin ijnko denario tsjenkehe ch'an sín tí xra sich'e sín nontee ch'an tí yaon a.

³ Ntá chr'éxin como las nueve nchítjen ntá sákjuí ch'an ntasin la k'uúkon ch'an í so sín tjejó ntasin chóntahya sín xra.

⁴ Ntá nixjéhe ch'an sín ntáchro ch'an kixin: “Kjaxinrá sáchrókjuirá chrókjuich'erá xra nonteeni la jina chrókjuénkahará”, ichro ch'an. La ntá jehe sín sákjuí sín.

⁵ A ntá tí inché nonte la sákjuí ch'an inaá chonkixin naxá xik'itja ch'an í so sín ch'ehe ch'an xra la nta tí las tres kónjin la xikaha naxá xik'itja ch'an í so sín inaá.

⁶ A ntá las cinco kónjin sáxikji ch'an ntasin inaá la k'uitja ch'an í so chojni ntaha chóntahya sín xra la ntá kjuanchankíhi ch'an sín kixin: “¿Nkekuénté tjejórá ntíhi ch'ehyará xra kuenté yaon? —ichro ch'an.

⁷ Ntá ntáchro sín kixin: “Kohya nkexro kjuanjon xra chrókjuich'eni”, ichro sín. Ntá ntáchro ch'an kixin: “Kjaxinrá chrókjuirá chrókjuich'erá xra nonteeni la jina chrókjuénkahará”, ichro ch'an.

⁸ A ntá ó kóntó ntá tí inché nonte mé nixjéhe ch'an tí ch'in t'etóan sítónhen xra nontee ch'an la ntáchro ch'an kixin: “T'iyehé kaín tí sín kjuich'e xra tjénkehé sín. Tjankixian tjénkehé tí chojni kjuixixin k'uúxenhén xra la chr'éxin tjénkehé tí sín saoxín k'uúxenhén xra”, ichro ch'an.

⁹ A ntá kóchjina kaín tí sín k'uúxenhén xra las cinco kónjin la jnkojnko sín k'uáyéhe sín jnkojnko denario.

¹⁰ Ntá chr'éxin, tió kóchjina tí sín k'uúxenhén xra nchítjen la ntá kjuenkayáxin sín kixin antsi itsjé chichaon chrókjuacha sín, ichro sín. Kjánchó kjaxin sín k'uáyéhe sín jnkojnko denario ó.

¹¹ A ntá tí kjuachahya sín tje te ntá kjuankixin sín kóninkakonhen sín tí inché nonte

¹² la ntáchro sín kixin: “Tí sín ikui kjuixixin la kjuich'e sín xra jnkokoá hora la ntá kjaxin kjuénkehé sín jnkokón éxi kjuacha tí jeheni. La ntá jeheni kjuich'eni xra kjónté sóa la kuenté yaon kjuich'eni xra”, ichro sín.

¹³ A ntá kjuátéhe tí inché nonte nixjéhe ch'an ijnko tí jehe sín, ntáchro ch'an kixin: “Janhan la kjuít'ayahyará ninkehó. Ó kuitogexinni kixin ijnko denario tsjénkahará tí yaon.

¹⁴ Ntá tsákjá ch'ichákoan la sáttja. Janhan tjínkavan tsjénkahá tí sín k'uúxenhén kjuixixin éxi tí kjuénkaha jaha.

¹⁵ ¿Á chontahya janhan kjuachaxin xikaha chrókjuénkaha sín kixin tíha la ch'ichákonna? ¿Nkekuénté tóchjinoxinhan jaha kixin xikaha kjuénkaha sín?” ichro ch'an.

¹⁶ Mé xikaha iso tí sín tsjixixin chréhe sín la tí sín a senóxin ntíha la ntá itsjé tí sín senó la mé tsjixixin tsochréhe sín ntíha kixin nchónhya sín k'uúyahá kjánchó tsjéhya sín k'uitja —ichro ch'in Jesús.

Chrónka ch'in Jesús inaá kixin its'en ch'an

(Mr. 10.32-34; Lc. 18.31-34)

¹⁷ Ntá ch'in Jesús sákjuí ch'an ntja nó chjasin Jerusalén la ntá k'uaxrjentako ch'an tí teyó sín k'uájiko ch'an la ntáchro ch'an kixin:

¹⁸ —Jahará ts'ikonrá ó sátsjni chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'an tí sijn tí sín nchat'á t'etóan la ko tí sín maestro tí tjako ley. Ntá jehe sín ts'etóan sín kixin its'en ch'an.

¹⁹ Ntá tsjikaán sín ch'án tí sín chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkanı sín ch'án ijnko ntacruz kjánchó yaon nixin mé tsoxechón ch'án inaá —mé xikaha chrónka ch'ín Jesús.

Tí nkehe kjuanchia tí iné ch'ín Jacobo la ko ch'ín Juan
(Mr. 10.35-45)

²⁰ A ntá tí iné tí xjeen ch'ín Zebedeo mé kjuikao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exín toch'in tjan nkayakon tí ch'ín Jesús la chrónóhe tjan ch'án.

²¹ Ntá ch'ín Jesús kjuanchankíhi ch'án tjan kixin:

—¿Nkehe tjinkávan? —ichro ch'án.

Ntá kjuátêhe tjan ntáchro tjan kixin:

—Tió tsétoanxián tí kjuachaxián jié la tsjánjuan kjuachaxin kixin tí iyó xjeenni chrók'uejío sín ijnko la itjá chjina la í jnko la itjá ikjon —ichro tjan.

²² Ntá kjuátêhe ch'ín Jesús, ntáchro ch'án kixin:

—Jahará la noahyará nkehe tjanchiará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxi tsikite janhan? —ichro ch'án.

Ntá kjuátêhe sín, ntáchro sín kixin:

—Kja tsjachani —ichro sín.

²³ Ntá ntáchro ch'ín Jesús kixin:

—Chaxín kjónté chrókjuachará chrók'uirá éxi tí nkehe itsjá its'ia la ko chrókuikiterá éxi tsikite janhan, kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná ikjon kixin janhan la tónahya tocar kixin tsjánjuan tíha. Jehó T'aná tjen nkaya nkajni mé nohe kixin nkexro tsikjeyá ch'án ts'áyêhe tíha —ichro ch'ín Jesús.

²⁴ Ntá kuínhin tí ite sín kixin xikaha tsikjanchia tí sín a ntá kóninkakonhen sín tí yaá a.

²⁵ A ntá ch'ín Jesús mé k'uúyêhe ch'án tí jehe sín ntá ntáchro ch'án kixin:

—Jahará ó nohará kixin tí sín t'etóan chjasintajni la imá t'etuenhen sín kain chojni la tí sín t'etóan imá nchehnkehe asén sín kixin ihyé sín t'etóan sín.

²⁶ Kjánchó jahará la xikahya chrókjuich'erá. Náhi. Tí jnkojínrá tjinkáonrá chrókuétóanrá la chrókjuínkítsará tí í so sín.

²⁷ A ntá tí jnkojínrá tjinkáonrá chrókuétóanrá mé t'ichjánxin senó chrókjuákoxínrá chrókjuich'eherá kíchuará xra.

²⁸ Mé xikaha tí Xjeen Dios K'óna Chojni mé kuihya kixin chojni chrókjuich'ehe xra. Náhi. Ikui ch'án kixin sich'ehe ch'án sín xra la ko ts'enyákonhen chojni kixin tsaáxin nchónhya sín.

Ch'ín Jesús kjuínchekitêhe jina yaá chojni t'ikonhya
(Mr. 10.46-52; Lc. 18.35-43)

²⁹ Ntá k'uaxrxénin sín chjasin Jericó la nchónhya chojni chrêhe tí ch'ín Jesús.

³⁰ Ntá ntaha chrínta ntia tjejótjaxin yaá sín t'ikonhya. La ntá kuínhin sín kixin k'uatsínka ch'ín Jesús la ntá kjuankixin t'iyêhe sín ch'án ntáchro sín kixin:

—Ínchéni, jaha tsík'axrjeníxian David, tjkonóhéni —ichro sín.

³¹ Ntá nchónhya chojni mé ntáche sín tí sín t'ikonhya kixin:

—Tánirá tí jahará —ichro sín.

Ntá tí jehe sín antsí itsén k'uèya sín, ntáchro sín kixin:

—Ínchéni, jaha tsík'axrjeníxian David, tjkonóhéni —ichro sín.

³² Ntá ch'ín Jesús kjuák'echónhen ch'án ntá k'uúyêhe ch'án tí sín t'ikonhya la kjuanchankíhi ch'án sín ntáchro ch'án kixin:

—¿Xá nkehe tí tjinkáonrá chrókjuít'ahará? —ichro ch'án.

³³ Ntá jehe sín kjuátêhe sín ntáchro sín kixin:

—Jaha Ínchéni, tjinkaonni chrókjuínchek'ikuanni —ichro sín.

³⁴ Ntá ch'ín Jesús mé kujkonóhe ch'án tí jehe sín la kjuínchekúákóxin tja ch'án tí ikon tí sín t'ikonhya. Ntá tuénxin k'uíkón sín la chrêhe sín tí ch'ín Jesús.

21

K'uixenhen ch'ín Jesús chjasin Jerusalén
(Mr. 11.1-11; Lc. 19.28-40; Jn. 12.12-19)

¹ Ntá kjuíji chjina sín chjasin Jerusalén, mé kjuíji sín tí chjasin ntsí Betfagé itjen chjinaxón tí jna Olivo. Ntá ch'ín Jesús k'uétuenhen ch'án iyó tí sín k'uájiko ch'án

² ntáchro ch'án kixin:

—Sátjirá tí chjasin ntsí itjen tóhe ntiha. Ntiha mé ts'ítjará ijnko kolócho tjechroé va la ko ijnko kolóchóxjan. Ntá tjasintankehérá va ntá tsjikuanará va ntihi.

³ A ntá tí jnkojin nkeexo tsjanchankíhará nkekuènté tjasintankehérá va la ntá tsonotáchroá kixin “Ínchéni t'ichjánxinhin va la ntá tió tsjixin ntá tuénxín tsjikaáni va”, ichrorá —ichro ch'ín Jesús.

⁴ Mé xíkaha kónhen kixin tsoxiteyá tí nkehe chrónka ijnko ch'ín k'uéchrónka itén Dios ósé ntáchro xíkíhi:

⁵ Ntáche tí chojni chjasin Sión kixin:

“Tsjeherá ó kui tí ch'ín Rey kuèntará.

Ihnkehya ch'án la ijnko kolócho ó tjejen ch'án,

mé ijnko kolóchóxjan, xjeen ijnko kolócho támá nkehe.”*

Mé xíkaha ichro tí itén Dios ósé.

⁶ Ntá tí iyó sín mé sákjuí sín la kjuínchexiteyá sín tí nkehe k'uetoan ch'ín Jesús.

⁷ Ntá kjuíkáo sín kolócho la ko xjeen va la kuakitsje sín ika titsáte sín ntá kjuínchekamá sín va ntá kjuák'ekjen ch'ín Jesús.

⁸ Ntá itsjé chojni kuakitsje sín ka titsáte sín na kjuentoá sín ka tinkák'ikjínxin sín ka tí ntia ts'atsínkaxín ch'ín Jesús. La iso sín xraá kajni la ko chaon nta yoa tsikóchrínjin sín la tinkákjasin sín ntia a.

⁹ Ntá iso sín tsitaón ntia la ko í so sín chréhe iton ch'án mé kjuankíxin sín itsje sín kixin:

—Tjancheheni kjuasáyé tí nkeexo k'uaxrjenixin tí rey David. Jína tí nkeexo kjuixín kjuachaxién ihñié Ínchéni. Tjancheheni kjuasáyé Dios —ichro sín itsje sín.

¹⁰ Ntá k'uixenhen ch'ín Jesús tí chjasin Jerusalén la ntá kaín tí sín ntiha mé kóxakonhen sín la itsjé sín kjuanchankí sín kixin:

—¿Xá nkeexo tíhi? —ichro sín.

¹¹ La ntá nchónhya sín kjuátéhe sín ntáchro sín kixin:

—Tíhi mé tí nkeexo Jesús chrónka itén Dios kjuixín ch'án chjasin Nazaret estado Galilea —ichro sín.

Ch'ín Jesús kjuínchetjóá tí nínko

(Mr. 11.15-19; Lc. 19.45-48; Jn. 2.13-22)

¹² A ntá ch'ín Jesús mé k'uixenhen ch'án tí nínko la ntá kuakitsje ch'án kaín tí sín nchekjixin nkehe ntiha la ko tí sín t'ena nkehe ntiha. La kótéka ch'án tí mesa tjinkítóxixin sín chichaon la ko tí silla tjejókjen tí sín nchekji kontóá.

¹³ La ntá ntáchro ch'án kixin:

—Tí xroon itén Dios tsíkjin sín ósé mé ntáchro kixin: “Tí ntóna imé it'in nchia tsonixjanaxian sín.” A ntá jahará tí nchia í tsíkjich'énará itjuéé xíche[†] —mé xíkaha ichro ch'ín Jesús.

¹⁴ Ntaha nkaxenhen nínko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitohe ch'án sín jína.

¹⁵ A ntá tí sín nchat'á tjeoan la ko tí sín maestro tjako tí ley mé k'uikon sín kaín tí kjuaxroon kjuíche' ch'án la ko kuínhin sín kixin iso chánjan mé itsje sín nkaxenhen nínko ntáchro sín kixin: “Chjéheni kjuasáyé tí nkeexo k'uaxrjenixin rey David”, ichro sín. Ntá kuínhin tí sín a xíkaha ntá kónínkaon sín

¹⁶ la nixjehe sín tí ch'ín Jesús ntáchro sín kixin:

—¿Á kuínhin tí nkehe itsje tí chánjan? —kjuanchankí sín.

Ntá ntáchro ch'ín Jesús kixin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios? La xíkíhi chro: Jaha kjuánjuan kjuachaxin kixin tí sín chánjan hyé la ko chánjan naxá tjejótakí mé tsotsje sín[‡]

—mé xíkaha ichro ch'ín Jesús.

¹⁷ Ntá jehe ch'án mé kuítóhe ch'án sín la k'uaxrjexín ch'án chjasin Jerusalén la sákjuí ch'án chjasin Betania la ntiha k'ók'éhe ch'án tí tie a.

Ch'ín Jesús kónínkakonhen ch'án ijnko nta t'óna to higo

(Mr. 11.12-14, 20-26)

¹⁸ A ntá tí kóyaon nchítjen ntá kjan sín chjasin Jerusalén inaá la ikui sín ntia ntá ch'ín Jesús mé ik'uén ch'án kjinta.

¹⁹ Ntá k'uikon ch'án itjen ijnko nta t'óna to higo chjino ntia. La ntá sákjuitsjehe ch'án tí nta, ntá k'uikon ch'án kixin jehó ka itsa tí nta, naxá k'ónahya to. A ntá jehe ch'án mé nixjehe ch'án tí nta, ntáchro ch'án kixin:

* 21:5 Isaías 62.11; Zacarías 9.9 † 21:13 Isaías 56.7; Jeremías 7.11 ‡ 21:16 Salmo 8.2

—Í nunca ts'ónahya to ínaá —ichro ch'án.

Ntá tí nta t'óna to higo mé tuénxín xamá.

²⁰ Ntá tí sín k'uájiko ch'ín Jesús mé k'uikon sín kixin xikaha kónhen tí nta, ntá chrakon sín la kjuanchankíhi sín tí ch'ín Jesús kixin:

—¿Nkeuènté kixin tí nta t'óna to higo tuénxín xamá? —ichro sín.

²¹ Ntá kjuátèhe ch'ín Jesús, ntáchro ch'án kixin:

—Ntá chaxín ntáxrxjan kixin tí tinkachónkirá Dios chaxín la ntá jehya jehó tí nta xikaha kónhen, la kjaxin chrónixjeherá tí jnà i kixin: “Sátjixian ntihi sátjijkjaníkiá ntayaaon”, la mé xikaha tsonhen.

²² Tí tinkachónkirá Dios kaín nkehe tsjancheherá ch'án la ts'ayéhérá —ichro ch'ín Jesús.

Tí kjuachaxin chóna ch'ín Jesús

(Mr. 11.27-33; Lc. 20.1-8)

²³ Ntá kjuixin ntá ch'ín Jesús mé k'uixenhen ch'án tí nínko ntiha. Ntá tíó tjetjako ch'án ntá kóchjina iso tí sín nchat'a t'etqan la ko tí sín táda judío t'etqan la kjuanchankíhi sín ch'án ntáchro sín kixin:

—¿Nkehe tí kjuachaxin chonta kixin xikaha ch'e la ko nkexro tí kjuanjon kjuachaxin? —mé xikaha kjuanchankí sín.

²⁴ Ntá kjuátèhe ch'ín Jesús ntáchro ch'án kixin:

—Ntá kjaxian janhan tsjánchánkíhará ijnko nkehe siná tsjateherá ntá janhan tsotjonqará nkehe tí kjuachaxin chonta tjet'a tí xra i.

²⁵ ¿A ntá nkexro k'uètuènhen ch'ín Juan kixin tsíkíte ch'án chojni? ¿Á Dios ní o á chojni ó? —mé kjuanchankí ch'ín Jesús.

Ntá jehé sín itjo sín kichó sín kixin:

—A ntá tí tsontáchroni kixin Dios tsík'etuènhen tí ch'ín Juan ntá tsjanchankí tí ch'ín a kixin nkekuènté kuitekakuenhyani ch'án.

²⁶ A ntá tí tsontáchroni kixin chojni ó tsík'etuènhen ch'án la ntá chrakonhenni tí chojni kixin kaín sín kuitekaon sín kixin ch'ín Juan la nixja ch'án itén Dios —ichro sín.

²⁷ A ntá kjuátèhe sín ntáche sín tí ch'ín Jesús kixin:

—Náhi, noehyani —ichro sín.

Ntá ntáchro ch'án kixin:

—La ko kjaxin janhan tsóxrxjan kahya nkexro kjuanjon kjuachaxin kixin tjet'a tí xra —ichro ch'án.

Ch'ín Jesús mé kjuíncheyóexin ch'án kixin éxi yaá xjan

²⁸ Ntá ntáchro ch'ín Jesús kixin:

—¿Nkehe tsixrorá? Itjen ijnko chojni chóna yaá xjeen ch'án la ijnko yaon nixjehé ch'án ijnko xjan ntáchro ch'án kixin: “Xjeenni ijie la sátsjia t'akjínjián to uva nonteeni”, ichro ch'án.

²⁹ Ntá kjuátèhe tí xjan kixin: “Náhi tjinkakonhyani”, ichro ch'án. A ntá chr'éxin ntá k'uixitoxin tí kjuenkayáxin ch'án la sákjuikjich'e ch'án tí xra a.

³⁰ A ntá tí it'é xjan a mé kjuínixjehé ch'án tí i jnko xjan la jnkokón k'uètuènhen ch'án la kjuátèhe tí xjan kixin: “Jeén, ó sátsjini”, ichro ch'án. La ntá chaxínhya sátsíkji ch'án —ichro ch'ín Jesús.

³¹ Ntá kjuanchankí ch'ín Jesús kixin:

—¿Nkexéhe tí yaá chánjan kjuínchexiteyá tí nkehe k'uètuènhen it'é? —ichro ch'án.

Ntá kjuátèhe sín kixin:

—Tí xjan saó —ichro sín.

Ntá ntáchro ch'ín Jesús kixin:

—Méxra chaxín tjonkará kixin tí sín nchekjènkj la ko tí chojni chjin ch'iyehé nchónhya chojni ntoa la saoxín ts'ixenhen sín tí kjuachaxin t'etqan Dios la ntá jahará la náhi.

³² Kixin ch'ín Juan Bautista mé ikui ch'án kjuaqohará ch'án nkexrí chrók'uejorá la ntá jahará kuitekákuenhyará tí chrónka ch'án. A ntá tí sín nchekjènkj la ko tí chojni chjin ch'iyehé nchónhya chojni ntoa mé kuitekaon sín. A ntá jahará kjónté xikaha k'uikonrá la kjuítóxiénhyará tí tjenkayáxinrá la ko kuitekákonhyará —ichro ch'ín Jesús.

Ch'ín Jesús kjuíncheyóexin ch'án kixin éxi chojni ch'e xra la jínahya qsén sín

(Mr. 12.1-12; Lc. 20.9-19)

³³ Ntá ch'ín Jesús ntáchro ch'án kixin:

—Tsinhínrá ijnko nkehe sintayóaxian. Éxi ijnko ch'ín k'uènkaxin ch'án tsjé ntona t'óna to uva nontee ch'án. Ntá kjuích'éna ch'án ijnko corral. La ko ijnko tjó kjuích'éna ch'án tóye kixin ts'énya sín inté to uva. La ko kjuích'éna ch'án ijnko tjet'ó noi kixin ts'it'ójen ch'án tsotsjehé ch'án nkúixín. §

ʼA nta kjuínchekjen chʼán tí nontee chʼán iso tí sín chʼe xra nta kjuixin nta sákjuí chʼán imá ikjín.

³⁴ A nta tí kjuixraká tí yaon kʼóna nkehe nta jehe chʼán mé ichrʼán chʼán iso tí chojni chʼehe chʼán xra kixin tsjikjanchehe sín tí sín chʼe xra nontee chʼán kixin tsjanjon sín tí nkehe tsakja chʼán.

³⁵ A nta tí sín tʼayakonhen tí nonte mé itsé sín tí sín kjuíkjanchia tí nkehe la kjuate sín iso la ko í so la kʼóyán sín la í so la ixro kʼuíchexín sín.

³⁶ A nta tí inché nonte a xíchrʼán chʼán iso chojni chʼehe chʼán xra inaá, a nta tí sín chʼe xra la kjaxin xikahó kjuíchʼehe sín tí sín kjuíji.

³⁷ ʼA nta xikaha tsikónhen nta kjuenkayáxin chʼán ichrʼán chʼán tí xjeen chʼán, la kja chróchónthehe sín kjuasáyé tí xjeen chʼán, ichro chʼán.

³⁸ A nta tí kʼuíkon tí sín chʼe xra tí xjeen chʼán la nta jehó sín kjuenkayáxin sín kixin: “Tí chʼín i mé tsʼáyéhe chʼán kaín nkehe. Tsʼóyáni chʼán kixin nta tsitgekoni kaín tí nkehe kuènte chʼán”, ichro sín.

³⁹ Nta itsé sín tí xjeen chʼán nta kuakitsjexín sín chʼán tí nonte ntaha nta kʼóyán sín chʼán —mé xikaha kjuako chʼín Jesús.

⁴⁰ Nta kjuanchankíhi chʼín Jesús tí sín kóchjina, ntáchro chʼán kixin:

—Tíó itsi tí inché tí nonte a la, ¿nkehe sichʼehe chʼán tí sín chʼe xra? —ichro chʼín Jesús.

⁴¹ Nta kjuátehe sín kixin:

—Mé tsjiji chʼán la tsikonóghya chʼán tí sín jínahya la tsʼóyán chʼán sín la tsjeyá chʼán ókjé chojni sinchekjen chʼán tí nonte a. Tsjeyá chʼán chojni jína tsjanjon tí to tsjixraká tí yaon tsʼínjin sín to —ichro sín.

⁴² Nta ntáchro chʼín Jesús kixin:

—¿A nunca kjuínchekuáxinhyará tí xroon itén Dios tsikjin sín ósé? Mé ntáchro xíkíhi:

Tí xro náxrojónhya kuítgenta tí sín chʼéna tjatʼo,

a nta mé jie kʼóna tí xro tjeotan.

Mé xikaha kjuíchʼe Inchéni Dios,
na nta tíha mé ijnko nkehe kjuachrakon kʼuíkonni.*

Mé xikaha ichro itén Dios.

⁴³ Nta ntáchro chʼín Jesús kixin:

—Tjonkará kixin Dios tsakitsjahará tí kjuachaxin kuènte chʼán la nta sinchekʼáyéhe chʼán tí sín chʼe xra jína.

⁴⁴ A nta jnkojín nkexro tsjitsínka chrítaón tí xro i mé tsókuen chʼán la tí tsʼánótjen tí xro tsoxratja ijnko chojni la jehe sín tsʼóna inche —mé xikaha ichro chʼín Jesús.

⁴⁵ Nta tí sín nchatʼá tjeotan la ko tí sín fariseo mé kuínhin xikaha kjuíncheyóexin chʼín Jesús nta kienxín sín kixin kaín tí ntáchro chʼán kjuíncheyóexin chʼán kixin tí jehe sín xikaha tsonhen sín.

⁴⁶ La nta tjinkaon sín chrókjuínchekjasóte sín chʼán kjánchó chrakonhen sín tí chojni kixin kaín sín ntáchro sín kixin chaxín tí nkehe nixja chʼín Jesús la kuènte Dios.

22

Chʼín Jesús kjuíncheyóexin éxi ijnko kia kótehe sín

¹ Nta chʼín Jesús mé kjuankixin nixja chʼán inaá la kjuíncheyóexin chʼán ntáchro chʼán kixin:

² —Tí kjuachaxin kuènte Dios mé éxi yóhe ijnko chʼín rey kjuasin chʼán ijnko kia kixin tsqtehe xjeen chʼán.

³ Kʼuētuenhen chʼán tí sín chʼehe chʼán xra kixin tsjikʼíyehé sín tí sín kjueyá chʼán, kjánchó jehe sín mé tjinkakonhya sín tsochjina sín.

⁴ A nta kʼuētuenhen chʼán inaá í so tí sín chʼehe chʼán xra ntáchro chʼán kixin: “Chenka tí sín ó kʼuíyahá kixin kaín tí nkehe sineni la ó tjechónhen. Ó kuétgan itsʼen tí koxinta la ko í so ko tsanká la kaín nkehe la ó síchónhen. A nta chróxrakoa sín tí siín kia”, mé xikaha kʼuētgan chʼán.

⁵ A nta tí sín tsíkʼíyehé chʼán mé ántosén sín. Ijnko sín la sákjuí nontee la í jnko la sákjuí chʼán í jnko xra chóna chʼán.

⁶ La í so tí sín a mé tsítsé sín tí sín tsíkʼuētuenhen tí chʼín rey la kʼóka tí sín a hasta ikʼuén tí jehe sín.

⁷ Nta tí chʼín rey mé kónínkaon chʼán nta kʼuētuenhen chʼán tí sín soldado kixin itsʼen tí sín kjuáya la ko tsoche tí chjasén sín.

⁸ Nta nixjehé chʼán tí sín chʼehe chʼán xra inaá ntáchro chʼán kixin: “Kaín nkehe la ó síchónhen kixin tí nkexro tsqtehe la nta tí sín kʼuíyahá kuítekakonhya sín la kjuíhya sín.

* 21:42 Salmo 118.22-23

⁹ Méxra sátsjirá tí esquina tí ntja jíé la t'jyehérá kaín tí sín tsoxetará kixin itsji sin ti kia", ichro ch'án.

¹⁰ Ntá tí sín ch'e xra mé sákjuí sín la k'uíyehé sín kaín tí sín t'átsínka tí ntja ntiha, mé chojni jina la ko chojni jínahya hasta k'uixíkaón chojni tí nchia ntiha.

¹¹ Ntá tí ch'ín rey mé kuitsjehe kaín tí sín tsík'íyehé ch'án la ntá k'uíkon ch'án ijnko ch'ín ntiha chóntahya ka jina kuènte tí kia a.

¹² La ntá nixjehe ch'án, ntáchro ch'án kixin: "Amigo, ¿nkexri k'uixenhen kixin tsík'ítsahya kuènte kié chojni tsoṭeṭe?" ichro ch'án. Ntá tí ch'ín a kjuátēehya ch'án ninkehó.

¹³ A ntá tí ch'ín rey mé k'uíyehé ch'án tí sín ch'ehe ch'án xra la ntáchro ch'án kixin: "Sínchenteto toté la ko itja tí ch'ín a la ité ntója sítié la nta ntiha a mé tsoxsjánka ch'án la sinetaón ch'án neno ch'án."

¹⁴ Ntá ntáchro ch'ín Jesús kixin:

—Nchónhya sín k'uíyaha la séhya sín k'uítja —mé xíkaha kjuako ch'án Jesús.

*Ch'ín Jesús ntáchro ch'án kixin ó nchoxon tsjenkehe sín gobierno
(Mr. 12.13-17; Lc. 20.20-26)*

¹⁵ Ntá tí sín fariseo mé sákjuí sín ókjé la jnkokóá kjuenkayáxin sín kixin tsjachaxín sín tí ch'ín Jesús kixin ách'e ichrén jje tsjasin ch'án la ntá tsjanchia sín jje.

¹⁶ Ntá ichr'án sín iso tí sín ch'ehe sín xra la iso tí sín ch'ehe tí ch'ín Herodes xra kixin tsjachaxín sín tí ch'ín Jesús. Ntá tí sín a nixjehe sín ch'án ntáchro sín kixin:

—Maestro, ó noheni kixin tí nkehe ntáchrúa jaha la chaxín, la ko ntoá tjákua ntje Dios, la ko jehya nkexri tsjehe chojni tjenkayáxixián kixin á jina sín.

¹⁷ A ntá jaha chronka nkehe tjenkayáxian. ¿Á jina chrókjuenkeheni tí gobierno romano o náhi? —ichro sín kjuanchankí sín.

¹⁸ Ntá ch'ín Jesús kónohe ch'án kixin ntoáhya tjenkayáxin sín ntá ntáchro ch'án kixin:

—Jahará ntoáhya tjenkayáxinrá. ¿Nkekuènte chrókjuáchaxínráni?

¹⁹ Tjákonará tí chichaon tjenkehérá sín méhe —mé xíkaha k'uetóan ch'ín Jesús.

Ntá kjuikohe sín ch'án tí chichaon a.

²⁰ Ntá k'uíkon ch'ín Jesús ntá kjuanchankí ch'án kixin:

—¿Nkexro tí tsík'axrjexín tjenkáni tí chichaon méhe la ko nkexro ihnié chóna? —ichro ch'án.

²¹ Ntá kjuátēhe sín kixin:

—Tí ch'ín t'etóan mé tjenkáni ch'án —ichro sín.

Ntá ntáchro ch'ín Jesús kixin:

—Chróchjehérá tí ch'ín gobierno t'etóan tí nkehe kuènte ch'án la kjaxin tí nkehe kuènte Dios la chróchjehérá Dios —mé xíkaha chro ch'ín Jesús.

²² Ntá tí kuínhin sín xíkaha la chrakon sín la komá sín ch'án ntá sákjuí sín.

*Kjuanchankí sín kixin á tsoxechón chojni
(Mr. 12.18-27; Lc. 20.27-40)*

²³ Ntá tí yaon a la iso sín saduceo sákjuítsjehe sín tí ch'ín Jesús. A ntá tí sín saduceo mé titekakonhya sín kixin tsoxechón chojni tsík'en la mé xíkaha chrókjuáchaxín sín ch'ín Jesús. Ntáchro sín kixin:

²⁴ —Maestro, tsintáchro ch'ín Moisés kixin tí its'en ijnko chojni la naxa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuaqja ch'án tí tjan k'án, a ntá tí xjeen sín mé ts'óna éxi xjeen tí ch'ín saó tsík'en.

²⁵ Ntá ntihi k'uejó yato sín jnkokóá kichó sín. Ntá tí ch'ín saó kóṭeṭe ch'án. La ntá ik'uén ch'án. A ntá k'uéchóntahya sín xjeen sín la ntá tí ichjién ch'án kóṭeṭe tjan tí ch'ín tsoyo.

²⁶ A ntá tí ch'ín yóxin ik'uén kjaxin la tí ch'ín nixin kuákja ch'án tjan la ntá xíkaha kónhen inaá. La kayatoé tí sín k'uéchóna sín tjan xíkaha kónhen sín kaín sín ik'uén sín.

²⁷ A ntá kjuixixín ntá kjaxin tjan ik'uén tjan.

²⁸ Ntá tió tsoxechón kaín xín chojni tsík'en, ¿ntá nkexro ts'óna xii tí jehe tjan kixin kayatoé sín kóṭeṭe tjan? —mé xíkaha kjuanchankíhi sín tí ch'ín Jesús.

²⁹ Ntá ch'ín Jesús kjuátēhe ch'án ntáchro ch'án kixin:

—Jahará la ntoáhya tjenkayáxinrá kixin noahyará nkehe chro xroon itén Dios la ko chonhyará tí kjuachaxin kuènte Dios.

³⁰ A ntá tí chojni tsík'en tió tsoxechón la tsoṭeṭehya sín la ko tsoṭeṭehya tí xjeen sín kixin tí sín tsík'en la éxi tí sín ángel kuènte Dios ts'ejó sín nkaya nkajni.

³¹ A ntá tí kaín tí sín tsík'en tsoxechón, ¿á kjuínchekuáxinhyará nkehe ntáchro Dios? Jehé ch'án xíkíhi chro ch'án:

³² “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.”* Méxra tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóchón —mé xíkaha ichro ch'ín Jesús.

³³ Ntá kuínhin sín nkexrí kjuako ch'án ntá chrakon sín.

Ch'ín Jesús chrónka tí nkehe imá tjeoan
(Mr. 12.28-34)

³⁴ Ntá tí sín fariseo mé tsíkójnkotsé sín tió kónohe sín kixin nkehe chro ch'ín Jesús la ninkehó kjuátēehya tí sín saduceo.

³⁵ La ijnko tí sín maestro tjako tí ley mé tjinkaon ch'án chrókjuachaxin ch'án tí ch'ín Jesús. Ntá kjuanchankí ch'án kixin:

³⁶ —Maestro, ¿nkexéhe tí nkehe imá tjeoan kuènte tí ley? —ichro ch'án.

³⁷ Ntá ntáchro ch'ín Jesús kixin:

—“Chrótjuèhérá Ìnchéni Dios kaín asánrá la ko kaín kjuaxrexinkaon kuèntará.”†

³⁸ Mé tíha mé tí ley imá tjeoan la ko saoxín k'uetōan Dios tíha.

³⁹ A ntá tí nkehe yóxin la tóyóhé la mé ntáchro xíkíhi: “Chrótjuèhérá kichuárá éxi tjuèxinrá asánrá.”‡

⁴⁰ Tí iyó nkehe i la mé antsi tjeoan kuènte tí ley tsík'etōan Moisés la ko tí nkehe kjuako tí sín k'uechrónka itén Dios.

¿Xá nkexro it'é tí Cristo?
(Mr. 12.35-37; Lc. 20.41-44)

⁴¹ A ntá tí sín fariseo la naxa jnkokóá tjejó sín

⁴² la ntá ch'ín Jesús mé kjuanchankí ch'án ntáchro ch'án kixin:

—¿Nkehe tjenkayáxinrá jahará? ¿Nkexro tí Cristo la nkexro tí tsík'axrjeníxin ch'án? —kjuanchankí ch'án.

Ntá ntáchro sín kixin:

—Tí Cristo mé tsík'axrjeníxin ch'án ch'ín David —ichro sín.

⁴³ Ntá ntáchro ch'ín Jesús kixin:

—¿Ntá nkexrí kixin Nchakuen Dios chénkaxín ch'ín David kixin David chróntáchro ch'án kixin Ìnché ch'án tí Cristo? Ntáchro ch'ín David xíkíhi:

⁴⁴ Ìnchéni Dios ntáche tí Ìnchéni kixin:

“Tjak'e tjaná chjina ntíhó tsétōan,

tsjixinjian kaín xín tí sín ninkakonhan la tsjachahya sín ts'etōan sín kixin jahvá mé tsétōan.”§
Mé xíkaha chro itén Dios.

⁴⁵ A ntá ¿xá nkexrí kixin Cristo chrók'óna xjeen David a ntá jehe ch'ín David kujkítexín ch'án Ìnché ch'án tí Cristo? —ichro ch'ín Jesús.

⁴⁶ A ntá ninkexró xitjahya kjuátēhe sín ninkehó la desde tí yaon a chrakon sín la í nínkehó kjuanchankiehya sín ch'án.

23

Ch'ín Jesús tjanchia jje tí sín fariseo la ko tí sín maestro tjako tí ley
(Mr. 12.38-40; Lc. 11.37-54; 20.45-47)

¹ Ntá kjuixin tíha ntá ch'ín Jesús mé nixjehē ch'án tí chojni la ko tí sín k'uájiko ch'án, ntáchro ch'án kixin:

² —Tí maestro tjako tí ley la ko tí sín fariseo mé chóna sín kjuachaxin tsochrónkaxín sín tí ley kjuako ch'ín Moisés.

³ Méxra chrókjuinchexiteyéhérá kaín tí nkehe t'etōan la ko chrókjuich'erá kaín nkehe ntáchro sín kjánchó chrókuankiehyará tí jehe sín kixin jehe sín la ijnko nkehe ntáchro sín la ókjé nkehe ch'e sín.

⁴ T'etūnhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. A ntá jehe sín na nijnko dedo tja sín chrókjuinkitsa sín tí nkehe imá ye yamá chojni.

⁵ Ich'e sín kaín xín nkehe kixin tsotsjehe chojni. Tóxrjnhin sín tsjak'enkání totjen sín la ko itja sín ijnko xroon kjínjin iton ts'ínixín itén Dios la tjinkaon sín iké sín síxinkání nkehe tjákjini.

⁶ Tjinkaon sín tsochóna sín silla jina ts'ejókjen sín sine sín tió sátsji sín tí siin kia la ko xritjeyá sín tí silla antsi náxrjón chrók'uejóya sín nkaxenhen njnko.

⁷ La ko tjinkaon sín kixin chojni chrókjuikosáyehe sín tsoxeta sín tí ntja la ko tjinkaon sín kixin tsochtáchro chojni kixin maestro tí jehe sín.

* 22:32 Éxodo 3.6 † 22:37 Deuteronomio 6.5 ‡ 22:39 Levítico 19.18 § 22:44 Salmo 110.1

⁸ A ntá jahará la t̄t̄oéhyará k̄ixin tsontáchro sín k̄ixin maestro tí jahará k̄ixin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha.

⁹ La ntá chróntáchrohyará k̄ixin ninkexró mé it'árá ntihi chjasintajni k̄ixin jahará la chontará jnkokoá It'árá mé itjen nkaya nkajní.

¹⁰ La ko jehe sín chróntáchrohya sín k̄ixin jefe tí jahará k̄ixin jehó Cristo mé jefe.

¹¹ Tí nkexro antsí tsjink̄itsa iso chojni la jehe ch'án mé antsí t'et̄oan ch'án.

¹² K̄ixin tí nkexro ntáchro k̄ixin imá ijíé la mé imá tsq̄ntsi. A ntá tí nkexro nchehnkehya la antsí tsq̄jié.

¹³ 'Nòará tí jahará maestro tjàkorá tí ley la ko tí jahará chojni fariseo. Jahará la jnkójnxónhya t̄jenkayáxinrá. Jahará la t'ikjéherá tí puerta ts'ixenx̄in chojni tí kjuachaxin kuente Dios k̄ixin t̄t̄oéhyará ts'ixenhen ókjé chojni. A ntá ni jahará la xitjahya t'ixenhyará la ko tjánjonhyará kjuachaxin ts'ixenhen tí sín tjinkaon chrók'uixenhen.

¹⁴ 'Nòará tí jahará maestro tjàkorá tí ley la ko chojni fariseo. Jnkójnxónhya t̄jenkayáxinrá. Jahará takitsjeherá ntoe tí chojni tsikók'án la ntá isé nixjehérá Dios k̄ixin ch'iyexinrá chojni k̄ixin jina tí jahará. A ntá x̄ikaha k̄juich'erá jahará la antsí tsjasótiará.

¹⁵ 'Nòará tí jahará maestro tjàkorá tí ley la ko chojni fariseo. Jahará la jnkójnxónhya t̄jenkayáxinrá. Jahará sájtjirá nonte la chrítaón n̄tayaon k̄ixin tsjákohérá ijnko chojni tsinkáchónki x̄ikaha tí t̄inkachónkirá la ntá tió kjuachará kjuachroerá sín la ntá jehe sín antsí má tsjasótexin sín tí xrohi la kánhyó jahará.

¹⁶ 'Nòará tí jahará k̄ixin t̄et̄oanrá kjánchó ntakótánrá. Ntáchorá k̄ixin tí jnkójn chojni tsontáchro k̄ixin sinchexiteyá sín nkehe la t'ákjenx̄in sín tí n̄jnko la ntá t'ichjánx̄inhya sinchexiteyá sín. A ntá tí tsontáchro sín k̄ixin sinchexiteyá sín nkehe la t'ákjenx̄in sín tí chica oro siin nkaxenhen n̄jnko la ntá t'ichjánx̄in sinchexiteyá sín.

¹⁷ Imá l̄ontjirá la ko ntakótánrá. ¿Á imá t̄jetoan tí chica oro o á imá t̄jetoan tí n̄jnko k̄ixin tí n̄jnko mé kótjuáxin tí chica oro?

¹⁸ K̄jxin ntáchorá k̄ixin: "Tí jnkójn chojni tsontáchro sín k̄ixin sinchexiteyá sín nkehe la t'ákjenx̄in sín tí altar la ntá t'ichjánx̄inhya sinchexiteyá sín. A ntá tí tsontáchro sín k̄ixin sinchexiteyá sín nkehe la t'ákjenx̄in sín tí nkehe t̄jokehe sín Dios chrítaón tí altar la ntá t'ichjánx̄in sinchexiteyá sín tí nkehe tsintáchro sín."

¹⁹ Imá l̄ontjirá la ko ntakótánrá. ¿Á imá t̄jetoan tí nkehe tsochjehérá Dios o á imá t̄jetoan tí altar k̄ixin tí altar mé tótjuáxin tí nkehe tsjánjonrá?

²⁰ K̄ixin tí nkexro tsontáchro k̄ixin sinchexiteyá nkehe la t'ákjenx̄in ch'án tí altar la jehya t'ákjenx̄in ch'án tí altar ó. Náhi. K̄jxin t'ákjenx̄in ch'án kaín tí nkehe siin chrítaón ntiha.

²¹ A ntá tí nkexro tsontáchro k̄ixin sinchexiteyá ch'án nkehe la t'ákjenx̄in tí n̄jnko la jehya t'ákjenx̄in ch'án n̄jnko ó. Náhi. K̄jxin t'ákjenx̄in ch'án tí Dios itjen ntiha.

²² A ntá tí nkexro t'ákjenx̄in nkaya nkajní la ntá k̄jxin t'ákjenx̄in sín tí trono kuente Dios la ko tí nkexro t̄jet'et̄oan ntiha.

²³ 'Nòará jahará maestro tjàkorá ley la ko jahará chojni fariseo. Jahará jnkójnxónhya t̄jenkayáxinrá. Jahará la chjehérá Dios ijnko ite parte kaín tí kaxroan tsjiko tí nkehe ineni, mé tí menta la ko anis la ko comino. Kjánchó tahyará kuentá tí nkehe imá t̄jetoan kuente tí ley. Mé ntoá chrókjuenkayáxinrá la ko chrókujikonóghérá kichuárá la ko chrókuiinkachónkirá Dios. Tíhi la antsí t̄jetoan chrókjuinchehiteyará la k̄jxin chrókujit̄oéhyará chrókjuich'erá tí í so nkehe.

²⁴ Jahará la t̄et̄oanrá kjánchó ntakótánrá. Jahará la nchek'ankihirá kjónté ijnko kochjisen intsí chóna tí nkehe its'irá, a ntá ijnko kocamello kjónté ijíé va la t'ínkará.

²⁵ 'Nòará tí jahará maestro tjàkorá ley la ko jahará fariseorá. Jahará la jnkójnxónhya t̄jenkayáxinrá. Jahará la imá nchetjórá chrítaón tí vaso la ko tí plato, a ntá tí nkaxenhen tsíkaón kjuachee la ko jahórá tjinkaónrá chróchontará itsjé nkehe.

²⁶ Jahará chojni fariseorá imá ntakótán jahará. Saoxin chrókjuinchetjórá tí nkehe nkaxenhen tí vaso la ko tí plato la ntá ó chrókótjóa tí chrítaón k̄jxin.

²⁷ 'Nòará jahará maestro tjàkorá tí ley la ko chojni fariseorá. Jnkójnxónhya t̄jenkayáxinrá. Jahará la éxi yóhe ijnko t̄oye tsíxravá chojni, imá náxrx̄ón tsjehe ntója, a ntá nkaxenhen mé tsíkaón huésoé chojni tsik'en la ko kaín nkehe t̄jáhya.

²⁸ Mé x̄ikaha tí jahará la tsjehe éxi chojni jina x̄ikaha, a ntá jnkójnxónhya t̄jenkayáxinrá la ko jínahyará.

²⁹ 'Nòará tí jahará maestro tjàkorá ley la ko chojni fariseorá. Jahará la jnkójnxónhya t̄jenkayáxinrá. Jahará la k̄juich'énará t̄jät'o náxrx̄ón chrítaón tí t̄oye tsíxravá tí sín k'uékjako itén Dios ósé la ko nchek'itsará t̄jät'o chrítaón t̄oye kuente tí sín jina asén.

³⁰ La ntá ntáchorá k̄ixin tí chrók'uejorá tí k'uéjío tí sín tsík'axrx̄inixinrá la ntá chrókjuink̄itsahyará chrók'uén tí sín kjuako itén Dios.

³¹ Méxra xikaha jahorá ntáchrorá kixin chaxin tsík'axrjenixinrá tí sín k'óyan tí sín k'uéjkako itén Dios.

³² Méxra ijie la tjinkáonrá tsjixinhanrá tí xra kjuích'e tí sín tsík'axrjenixinrá.

³³ Jahará la tsík'axrjenixinrá konche. ¿Ntá nkexrí chrókuaará kixin itsi tí tsjasótíará?

³⁴ Méxra janhan mé tsétuanhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín ntacruz la í so sín la tsjatexínrá sín nkaxenhen nínko la ko tsochonkíhírá sín chjasin la chjasin.

³⁵ Méxra jahará la yamará tí jie kixin tí sín jina k'uitjixin ijnjé senó. Méxra tsamará tí jie kixin ik'uén ch'in Abel, tí nkexro jina, la ko kain tí í so sín hasta ik'uén ch'in Zacarías, xjeen Berequías, tí nkexro k'oyánxinrá chjino tí altar.

³⁶ Chaxin tjonkará kixin kain tí jie a mé yamá tí chojni siin ijie.

*Tsjánka ch'in Jesús
(Lc. 13.34-35)*

³⁷ Ntá ntáchro ch'in Jesús kixin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuinkitsará. Nchónhya veces tjínkavan chrókójkotsérá la chrók'uáyakonhánrá éxi ijnko cochiká mé t'ayakonhen xjeen va chrínki kanenge va mé xikaha tjínkavan chrók'uáyakonhánrá tí jahará. Kjánchó jahará la tjínkákonyhará xikaha.

³⁸ Ntá jie la Dios la tsítóhe tí jahará.

³⁹ Ntáxrjan kixin í ts'ikonhyará tí janhan inaá tsjixrakája tí yaon tsontáchrorá kixin: “Imá jina tí nkexro kujxin kjuachaxién ihnjé Inchéni” —mé xikaha ichro ch'in Jesús.

24

*Chrónka ch'in Jesús kixin ts'itjáyan tí nínko
(Mr. 13.1-2; Lc. 21.5-6)*

¹ Ntá ch'in Jesús k'uaxrjexin ch'án tí nínko la ntá ó sáchrókjuí ch'án la ntá tí sín k'uájiko ch'án mé kóchjina sín kixin tsochónhen ch'án kixin kjaxin ch'án chrótsjehe ch'án kixin náxrjón tsík'óna tí nínko a.

² A ntá ch'in Jesús mé kjuátehe ch'án kixin:

—Jahará ¿á tjeotsjehérá kain tíha? Chaxin tjonkará kixin tsjixraká tí yaon ts'oya kuenté nínko. Nijnko xro ts'ejókhjenja kichó kixin kain tíha la tsqxíka —ichro ch'án.

*Tí nkehe tsonhen tió tsjixixín
(Mr. 13.3-23; Lc. 21.7-24; 17.22-24)*

³ Ntá sákjuí sín chrítaón tí jna Olivo la ch'in Jesús kjuá'etjaxin ch'án la ntá tí sín k'uájiko ch'án mé kjuanchankíhi sín ch'án kixin:

—Tjínkaonni tsochronka nkesá tsonhen tíha. ¿Nkexrí tsoexoínni tió ts'inca tí jaha la ko nkexrí tsoexoínni tí itsi tí tsjixixín chjasintajni? —ichro sín.

⁴ Kjuátehe ch'in Jesús kixin:

—Tóxakonhanrá útjéhyará kixin ninxeró chrókjuít'áyahará.

⁵ Nchónhya chojni itsi sich'iyaxín njina tsontáchro kixin: “Janhan mé tí Cristo” tsixro sín, la sich'iyehé sín nchónhya chojni.

⁶ A ntá tió tsinhínrá tsontáchro chojni kixin ó siin kjuanínkaon la ko ts'ixin kjuachrakon kixin tsjanjonko kichó sín la kiónté xikaha tsonhen la chrakonhyará. Ó jehí tsonhen tíha tí naxa ts'itjáyanhya chjasintajni.

⁷ Ijnko nación tsjanjonko í jnko nación la tsjanjonxin sín tí xra ts'etoan sín. La ko itsjé chjasin na tsokjinta la ko tsóníhi chojni la ko ntihi la ntaha tsínki nonte.

⁸ Kain tíha la ntá tsoxrankíxixón tí kjuatjoté tsonhen chojni.

⁹ A ntá tsotsérá chojni la tsjikaánrá sín tí tjeó tí sixreé kixin sinchekjasótíará sín la ntá ts'oyánrá sín. La ko kain xin chojni siin chjasintajni tsónínkakonhanrá sín kixin tinkachónkirá tí janhan.

¹⁰ Ntá tí yaon a la itsjé sín la tsítóhe sín tsínkáchónkihya sín tí janhan la ko tsónínkakonhen sín kichó sín la ko sinchekjí kichó sín.

¹¹ Ntá itsi nchónhya chojni ntoáhya tsjako la ntá sich'iyehé sín nchónhya chojni.

¹² La ts'ixin nchónhya jie jínahya la ntá ts'ixin itsjé chojni tsotjuehya sín kichó sín.

¹³ A ntá tí nkexro naxa tjeótinkáchónki tí janhan hasta tí tsjixixín la mé tsaá.

¹⁴ La ko tí itán jina chrónka nkexrí tjeen tí kjuachaxin kuente Dios la t'ichjánxin tsinhin sín kuenté chjasintajni, la tió tsjixin tsinhin sín kuenté chjasintajni la ntá ó ts'itjáyan chjasintajni.

15 'Ch'ín Daniel k'u'échrónka itén Dios mé tsíkjin ch'án k'ixin tsjixraká ijnko yaon tsjak'e ijnko nkehe jínahya nkaxenhen n'jnko tjóá.* Ntá jahará ts'ikonrá tíha. A ntá tí nkexro nchekuáxin mé tsiénxin nkehe tíha.

16 Ntá kaín tí sín tjejó estado Judea tsochrin sín jnā sátsji sín.

17 A ntá tí sín tjejó chrítaón nchia ntóé sín la í xitjahya tsakitsje sín ninkehó.

18 Ntá tí tjejóch'e sín xrā nontee sín la kjá í tsokjanhya sín tsjikakja sín iké sín.

19 Ntá nòà tí chojni chjin tjejóyá sín la ko nòà tí sín nchekakí xjan tí yaon a.

20 Chrókjuanchehérá Dios k'ixin tí tsonhen tíha la chrókójehya nchakuen kin la ko chrókójehya tí yaon t'ok'éhe chojni.

21 K'ixin tíha mé ijnko kjuachrakon imá ijié la desde tí xrankíxixín chjasintajni la nunca xikahya kónhen.

22 Ntá tí chrók'uegotanhya Dios k'ixin tjoka ts'atsínka tíha ntá chrókuaáhya ninkexró. Ntá ts'etóan ch'án k'ixin tjoka ts'atsínka tí kjuachrakon jié k'ixin jehe ch'án mé imá tjuèhe ch'án tí sín tsíkjeýá ch'án.

23 'Ntá tí tsontácho chojni k'ixin: "Tsjehé ntihi itjen Cristo", o "Tsjehé ntiha itjen ch'án", la ntá chrókuétekákuénhyará sín.

24 K'ixin ntá itsi iso sín tsontácho sín k'ixin Cristo tí jehe sín la ko kjaxin itsi í so sín ntoáhya tsjako la ko tsjanin sín kjuaxroan jié k'ixin tjinkaon sín chrókjuich'iyehé sín chojni kjónté tí sín tsíkjeýá Dios.

25 Ó xrjanka senó nkehe tsonhen k'ixin tsonohará.

26 Méxra tí chróntácho sín k'ixin: "Tsjeherá tí nteje ntiha tjen ch'án", la ntá tsjih-yará nó ntiha. O tí chróntácho sín k'ixin: "Tsjeherá ntihi tí cuarto mé tjen ch'án", la chrókuétekákonhyará.

27 Méxra éxí tsjónk'ixin la t'ikon chojni t'inkaséyanxín tí tjtóxin yaon hasta tsjiatóxin yaon mé xikaha ts'ikon chojni tió itsi tí Xjeen Dios K'óna Chojni.

28 Mé éxí yóhe tí tjen ijnko cuerpo tsík'en la ntiha tsjónkotsé tí kontexjuen.

Tsoktan tí Xjeen Dios K'óna Chojni

(Mr. 13.24-37; Lc. 21.25-33; 17.26-30, 34-36)

29 'A ntá séhyó tí tsjixixín tí kjuachrakon jié la ntá tí yaon la tsotie a ntá tí nitjó la í ts'inkaséyanxínhya. La ko tí konotsé la tsoxènjinxín nkajni la kjaxin kaín nkehe siín nkaya nkajni la tsínki.

30 La ntá ts'ikon chojni k'ixin nkajni tsjixín tí Xjeen Dios K'óna Chojni. La ntá kaín chojni chjasintajni tsochrakon sín la tsotsjánka sín la ts'ikon sín k'ixin itsi tí Xjeen Dios K'óna Chojni, mé chríkjan tjuí mé tsjak'enkakjan ch'án tsíkəo tí kjuachaxin jié.

31 Ntá tsochr'án Dios tí sín ángel k'ixin ts'ánao sín tí trompeta itsen k'ixin tsəhjin kaín tí nkexro kjueýá Dios tsjixín kanóé lado chjasintajni.

32 Chrók'uitjará nkexrí sintayóaxian kuente ijnko nta to higo. Éxí yóhe tió chóna ntahnte la ko ts'ixin kayoa la nta tsoñoaxínrá k'ixin í séhya tsoktan ichrin.

33 Mé xikaha tí ts'ikonrá ts'atsínka kaín tíha la ntá xikaha tsoñoaxínrá k'ixin í séhya itsi Ìnchéni.

34 Ntá tjonkará chaxín k'ixin kaín tíha senó tsonhen tí naxə ts'enhya tí chojni siín jie.

35 'A ntá tí nkajni la ko tí chjasintajni mé ts'itjáyan. A ntá tí nkehe ntáxrjan la nunca ts'itjáyanhya tsoxiteýá tíha.

36 Á ntá tí yaon la ko tí hora tsoxiteýá tíha la kohya ninkexró nohe. Ni tí sín ángel tjejó nkaya nkajni noehya sín la ko ni tí Xjeen Dios noehya. Ó jehó tí It'é mé nohe.

37 'Éxí yóhe tí nkehe kónhen tí yaon k'u'ékjak'e ch'ín Noé mé xikaha tsonhen tí tsoktan tí Xjeen Dios K'óna Chojni.

38 Tí naxə titjiéhya sín ntə la kaín chojni la jina k'u'éjó sín la kjóne sín la ko ik'uí sín la ko sitótehe sín kjuixrakájia tí yaon k'uixenhen ch'ín Noé ntábáro.†

39 'A ntá jehe sín mé kienxínhya sín hasta kuijia tí k'uániá chrin ntá ikui ntə la k'uátjóá kaín sín. Mé xikaha tsonhen tió itsi tí Xjeen Dios K'óna Chojni.

40 'A ntá yaá chojni ntoa tjejóch'e sín xrā nonte la ntá ijnko la sátsji la í jnko la tsitöhe.

41 La ko yaá chojni chjin mé tjejó't'o sín la ijnko la sátsji la í jnko la tsitöhe.

42 Chrók'uejotsjeherá k'ixin noahyará nkehora la ko nkesá ts'inka janhan.

43 Chrókónohará tíhi: tí chrókónohe ijnko Ìnché nchia nkehora tie chrókjui ijnko nkexro tseé la ntá chrókjuak'echónhen tí Ìnché tí nchia ntá xitjahya ts'ixenhen tí nkexro tjinkaon chrókueé.

44 Méxra jahará la jina chrók'uejorá k'ixin tí Xjeen Dios K'óna Chojni me titáya itsi.

* 24:15 Daniel 9.27 † 24:38 Génesis 6.5-8

*Tí nkexro jina ch'e xra la tí nkexro ch'ehya xra jina
(Lc. 12.41-48)*

⁴⁵ *Tí nkexro chaxín ch'e xra jina la ko imá nohe la ntá tí lámoché ch'án ts'etuenhen kixin ts'ayakonhen ch'án tí sín siín ntóe ch'án la ko tsjanjon ch'án nkehe sine sín ch'ntjti tí hora a.

⁴⁶ Náxrjón tjen tí nkexro ch'e xra tió itsi tí lamo la ts'ikon kixin xíkaha tjenchexiteyá ch'án tí xra k'uítuenhen ch'án.

⁴⁷ Chaxín tí lamo la tsjanjon ch'án kaín tí xra chóna ch'án ts'etóan tí ch'ín a.

⁴⁸ A ntá ijnko chojni ch'ehya xra jina la ntá tsjenkayáxin ch'án kixin kjá tjokahya tsokjan tí lámoché ch'án

⁴⁹ la ntá tsjankixin ch'án tsjanjonko ch'án tí í so sín ch'e xra la ko tsjankixin sineko ch'án la ko its'ikao ch'án kaín tí sín sítókoan.

⁵⁰ Ntá xringhya tsokjan ti lamo ijnko yaon la ko ijnko hora noehya tí nkexro ch'e xra.

⁵¹ La ntá jehe ch'án la sinchekjasóte tí ch'ín kuitgehe xra kjuínchexiteyáha la ts'etóan ch'án kixin tsjasóte tí ch'ín a éxí tí sín jnkojínxónhya tjenkayáxin. Ntá ntíha la tsotsjanka ch'án la ko sinetaón neno ch'án.

25

Ch'ín Jesús kjuíncheyóexin ch'án kixin ite sín tjarisoá

¹ Ntáchro ch'ín Jesús kixin:

—Tí kjuachaxin kuénte Dios mé éxí yóhe ite sín tjarisoá sátsji tí tsótehe chojni chuénko linterna tjia aceite la sákjuíchónhen sín tí ch'ín tsíkótehe.

² In'ó sín la tsíkóyaxíenhya sín la in'ó sín ó tsíkóyaxínhin sín.

³ Tí sín tsíkóyaxíenhya na kjaxin la tsikjijiko sin linterna kjánchó tsíkjijikohya sín aceite tsíkja ínaá.

⁴ A ntá tí sín tsíkóyaxínhin la sátsíkjiko sín xro tjia aceite la ko tí linterna kuénte sín.

⁵ A ntá tí ch'ín tsíkótehe la tjokahya kui ch'án la ntá jehe sín mé tsíkíhi sín kotáchrín la tsík'ejóua sín kaín sín.

⁶ A ntá kuichjina k'áxrótjen la kuínhin sín t'èya ijnko chojni kixin: “Ó kui tí ch'ín tsíkótehe na t'axrjerá ntója tsoxetará ch'án”, ichro ch'án.

⁷ A ntá kaín tí sín tjarisoá la k'uàya sín la kjuasiyóxin sín tí linterna kuénte sín.

⁸ A ntá tí in'ó sín tsíkóyaxíenhya la nixjehe sín tí sín in'ó tsíkóyaxínhin ntáchro sín kixin: “Chjehéni intsi aceite kuéntará kixin ó k'uànká aceite tjia linternéni”, ichro sín.

⁹ A ntá tí sín tsíkóyaxínhin mé ntáchro sín kixin: “Náhi, tí aceite tí xíkaha tsjanjonni intsi jahará la antsi jeheni la tsjachahya. Íchá jina sátsjik'ènará tí sítoxin ntíha”, ichro sín.

¹⁰ Ntá tí in'ó sín kóyaxíenhya mé sákjuik'èna sín aceite la ntá ó kui tí ch'ín tsíkótehe. Tí in'ó sín tjejóchónhen mé sákjuiko sín ch'án tí kia tsíkótehe sín la ntá ó tuénxín k'uikjéhe tí puerta.

¹¹ Ntá chr'èxin ikui tí in'ó sín tjarisoá tsíkóyaxíenhya la t'ínka sín puerta ntáchro sín kixin: “Ó kuini takitjehé nchia.”

¹² A nta jehe ch'an kjuáttehe ch'án ntáchro ch'án kixin: “Chaxín tí jahará la ní chonhyará”, ichro ch'án.

¹³ Ntá ntáchro ch'ín Jesús ínaá kixin:

—Méxra xíkaha tí jahará chrók'uejótjehérá kixin noahyará nkeyaon la nkehora itsi tí Xjeen Dios K'óna Chojni —ichro ch'án.

Ch'ín Jesús kjuíncheyóexin ch'án kuénte chichaon

¹⁴ Ntá ntáchro ch'ín Jesús kixin:

—Tí kjuachaxin kuénte Dios la yóhe ijnko chojni tjinkaon sáchrókjui ch'án í jnko nación la ntá k'uúyehé ch'án tí sín ch'ehe ch'án xra la ntá chjéhe ch'án sín tí chichaon a kixin ts'ayakonhen sín.

¹⁵ *Jnko ch'án la k'uáyéhe ch'án in'ó mil chichaon, la í jnko la k'uáyéhe ch'án iyó mil chichaon, la í jnko la k'uáyéhe ijnko mil chichaon. Tí nkexro kjuanjón chichaon la mé kónohe ch'án nkexro tí tsjacha sich'e jnkojnko xra. Ntá jehe ch'án tió kjuixin kjuanjón ch'án la ntá sákjuí ch'án ikjín.

¹⁶ Ntá tí nkexro k'uáyéhe in'ó mil chichaon la kjuích'eko ch'án xra tí chichaon kuákja ch'án la kjuacha ch'án í jnko in'ó mil.

¹⁷ Kjaxin tí nkexro k'uáyéhe iyó mil chichaon mé xíkja ch'án í jnko iyó mil.

¹⁸ A ntá tí nkexro k'uáyéhe ijnko mil chichaon mé sákjuí ch'án la kjuích'èna ch'án ijnko tòye kjuavá ch'án tí chichaon kuénte lámoché ch'án.

¹⁹ A ntá nchónhya nánó k'uátsínka la ntá ikjan tí lámoché sín kixin ntá tsjentoáko sín ch'án cuenta.

²⁰ Saoxín kui tí nkexro k'uáyéhe tí in'ó mil la chjéhe ch'án tí lamo í jnko in'ó mil la ntáχρο ch'án kixin: “Jaha me chjehéni in'ó mil la ó kjuachani í jnko in'ó. Tákjá tjinhin tí chichaon í”, ichro ch'án.

²¹ Ntá tí lamo mé ntáχρο kixin: “Nchoxon tí xikaha. Jaha la ijnko chojni jína ch'e xra. La ó kjuinchexiteyá jína. Kjónté jehya xra jíé la kjuinchexiteyá jína la ntá tsotjaha ijnko xra antsí jíé la tjak'e tsochéheni.”

²² Ntá chr'exín ikui tí nkexro k'uáyéhe iyó mil la ntáχρο ch'án kixin: “Jaha mé chjehéni iyó mil la kjuachani í jnko iyó. Tákjá tjinhin tí chichaon í”, ichro ch'án.

²³ La ntá tí lamo ntáχρο kixin: “Nchoxon jaha mé ijnko nkexro jína ch'e xra la ó kjuinchexiteyá. Kjónté jehya xra jíé la kjuinchexiteyá jína la ntá tsotjaha í jnko xra antsí jíé. Tjak'e tsochéheni”, ichro ch'án.

²⁴ A ntá ikui tí ch'in k'uáyéhe ijnko mil la ntáχρο ch'án kixin: “Ó nòna kixin ijnko chojni imá jíehé tí jaha la itjaa tí nonte jehya jaha k'uénkaxian la tsákjá nkehe kjónté k'uénkahya.

²⁵ Méxra chrakonni la sákjuikjak'emáni tí chichaon chrínkí nche. Tákjá chjchakqan tjinhin”, ichro ch'án.

²⁶ A ntá kjuátehe tí lamo kixin: “Jaha ijnko chojni jínahya la ko séhe. Jaha la ó noha kixin chrótjaa tí nonte k'uénkahya la chrókuákjaa tí nkehe k'uénkahya.

²⁷ A ntá tí chichaon chróchr'an banco. Ntiha chrókuich'exín xra ntá tí ikjan janhan ntá chrók'uayáha antsí itsjé chichaon chrókjuacha kichó chica”, ichro tí lamo.

²⁸ A ntá nixjehé ch'án tí í so sín tjejó la ntáχρο ch'án kixin: “Taktisjehérá tí mil chóntha ch'án la chjehérá tí nkexro chóntha tí ite mil chichaon

²⁹ kixin tí nkexro kjónté itsjé chóntha la mé ts'áyéhe antsí la ntá tí nkexro chóntahya la kjónté tí intsi chóntha la ts'axrjehé.

³⁰ A ntá tí nkexro ch'ehya xra la tsétuénhén sátsji ch'án tí síti ntója la ntá ntiha la tsotsjánka ch'án la ko sinetaón ch'án neno ch'án.”

Tsitoxín ijé chojni chjasintajni

³¹ A ntá tí tsi tí Xjeen Dios K'óna Chojni la tsikao ch'án kjuachaxián jíé éxi ijnko Réy la ko tsikao ch'án kaín xín tí sín ángel ntá ntaha tsjak'etjaxín ch'án tí trono ts'etqanxín tí kjuachaxián jíé.

³² Ntiha kaín xín tí chojni tsikjixin nkuíxín nación tsochjina tí tjeen ch'án la jehe ch'án tsakitsjekjan ch'án ijnko la í jnko. Éxi ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixín va la ko tí koténtsó la ókjé ts'ixín.

³³ Méxra ts'etqan ch'án kixin tí kolélo la ts'ixín nó tja ch'án chjina, a ntá tí koténtsó la nó tí tja ch'án kjon.

³⁴ Ntá tí Rey tsonixjehé tí sín tjejó tja ch'án chjina tsontáχρο kixin: “Xrákirá jahará tí tjeen kjuachaxin kuénte T'aná kixin T'aná ó kjuíncheyonrá ch'án. Tí nağa kjuich'énahya Dios chjasintajni la xráxín kjuenkayáxín ch'án xikaha tsonhen.

³⁵ Janhan mé k'uén kjinta la jahará kjuánjonrá nkehe kjoné. La ik'uén ntá la jahará kjuánjonrá nkehe ik'uaia, la k'uájia éxi ijnko chojni kjuixin ikjín la jahará kjuánjonrá nketí k'ók'ána.

³⁶ La ko k'uéchontahya kaná la jahará kjuánjonrá ika k'uítsa, la ko kónina la jahará kjuasántssehérá tí janhan, la kjuak'échjina la ntá jahará kjuasántssehérá tí janhan.”

³⁷ A ntá tí sín jína la tsjanchankí sín kixin: “Inchéni, ¿nkesá k'uíkonní kixin ik'uén kjinta ntá kjuanjonní nkehe kjónté? ¿La nkesá k'uíkonní kixin ik'uén ntá la kjuanjonní nkehe ik'uaia?

³⁸ ¿La ko nkesá k'uíkonní kixin ikjín kjuixian ntá kjuanjonní nketí k'ók'ána? ¿La ko nkesá k'uíkonní kixin chontahya iká la kjuanjonní ika k'uítsa?

³⁹ ¿La nkesá k'uíkonní kixin kóniha o kjuák'echjina la ntá kjuíjtsjeheni tí jaha?” mé xikaha tsjanchankíhí sín ch'án.

⁴⁰ A ntá tí Rey tsontáχρο kixin: “Tió kjuínkítisará ijnko kichó ni kjónté ijnko chojni nóè la mé yóhe kixin tí janhan chrókuínkítisará.”

⁴¹ A ntá tí Rey t'etqan mé tsonixjehé tí sín tjejó nó tja ch'án kjon tsontáχρο kixin: “Sátjirá jahará kixin jahará tsjasótiará. Sátjirá tsjasótiará tí tjeen tí xrohi ts'ankahya. Mé tí xrohi tjechónhen kixin tsöhe tí ch'in Tsochren la ko kaín tí sín ángel kuénte ch'án.

⁴² Tí ik'uén kjinta la jahará kjuánjonhyará nkehe kjoné la ko ik'uén ntá la jahará kjuánjonhyará nkehe ik'uaia.

⁴³ K'uájia éxi ijnko nkexro kjuixin kjín la jahará kjuánjonhyará nketí k'ók'ána la ko k'uéchontahya kaná la jahará kjuánjonhyará ka chrók'uítsa la ko k'uénina la kjuak'échjina la jahará kjuasántssehérá tí janhan.”

⁴⁴ Ntá tí jehe sín la tsjanchankí sín kixin: “Inchéni, ¿nkesá k'uíkonní kixin ik'uén kjinta la ik'uén ntá la ko kjuixian kjín la ko chontahya iká la ko níha la ko kjuák'echjina? ¿Mé nkesá k'uíkonní xikaha la ntá kjuínkítisahyani tí jaha?” tsixro sín.

⁴⁵ La ntá tí Rey tsjat̄ehe ch'án tsontáchro ch'án kixin: “Tí xikaha kaín tíha kjuínkítsahyará ijnko chojni imá nóe la éxí xikaha kjuínkítsahyará tí janhan.”

⁴⁶ A ntá tí sín jínahya xikaha kjuích'e la mé sátsjixin sín ntihi tsjasóte sín jnkochrixin. A ntá tí sín jína la sátsji sín ts'áyéhe sín kjuachón jnkochrixin —mé xikaha chrónka ch'ín Jesús.

26

Tí sín nínkakohen ch'ín Jesús tjenkayáxin sín kixin nkexrí ts'óyán sín ch'án
(Mr. 14.1-2; Lc. 22.1-2; Jn. 11.45-53)

¹ Ntá kjuixin chrónka ch'ín Jesús kaín tíha, ntá nixjehé ch'án tí sín k'uájiko ch'án, ntáchro ch'án kixin:

² —Jahará ó nohará kixin t'itjáyán iyó yaon ntá tsjasin sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etjoan ntá tsjak'enkani sín ch'án ijnko ntacruz —ichro ch'ín Jesús.

³ Ntá tí sín nchat'á t'etjoan la ko tí sín maestro tjako tí ley la ko tí sín táda kuente tí sín judío mé kójnkotsé sín tí ntásin kuente tí nchia kjuák'e ch'ín Caifás tí ch'ín nchat'á t'etjoan.

⁴ Ntaha tjenkayáxin sín kixin nkexrí tsotsé sín ch'ín Jesús la ts'óyán sín ch'án.

⁵ A ntá ntáchro sín kixin:

—Tí siín kia la chrótséhyani ch'án kixin imá tsonínkaon tí chojni —ichro sín.

Ijnko tjan kjuíkqao aceite xraxé kuíkqite tjan ikja ch'ín Jesús
(Mr. 14.3-9; Jn. 12.1-8)

⁶ Ch'ín Jesús tjen chjasin Betania ntqoe ch'ín Simón tí ch'ín k'uéchónta chinlepra.

⁷ Ntá xrinahya kóchjina ijnko tjan kjuíkqao tjan ijnko xro tsik'óna xro mármol mé kuikaón aceite xraxé náxrjón la imá tje te k'uíte. A ntá tí tjene ch'ín Jesús ntá tí tjan a mé kuíkqite aceite ikja ch'án.

⁸ A ntá tí sín k'uájiko ch'ín Jesús mé k'uúikon sín xikaha ntá kónínkaon sín la ntáchro sín kixin: —¿Nkekuénté kóxénhen tí xroan a?

⁹ Íchá jína chrókóxixín itsjé chichaon tí xroan ntá tí chichaon a chrókjuinkítsa tí sín nóe a —ichro sín.

¹⁰ Ntá kuínhin ch'ín Jesús tí nkehe tjo sín, ntá ntáchro ch'án kixin:

—¿Nkekuénté t'antaxínhínrá tí tjan í? Ó nchqxon ijnko nkehe jína kjuích'e tjan.

¹¹ Tí sín nóe la ó xráxín ts'ejókoará sín, a ntá janhan la jnkochrixinhya ts'ejóni.

¹² Tí nkehe kjuích'e tjan mé kjuíncheka tjan aceite xraxé tí cuerpo kuéntana la mé xikaha kjuakoxin tjan kixin xikaha tsoxravána.

¹³ Ntá chaxín tjonkará kixin kuenté chjasintajni tió tsjako sín tí tán jína tsaáxin sín ntá tsochrónka sín kixin xikaha kjuích'e tjan ntá tsoxraxinkakonxín sín kixin nkehe tí kjuích'e tjan —ichro ch'ín Jesús.

Ch'ín Judas kjuínchekji tí ch'ín Jesús
(Mr. 14.10-11; Lc. 22.3-6)

¹⁴ A ntá ijnko tí teyóxin sín k'uájiko ch'ín Jesús mé it'in Judas Iscariote sákjuínixjehé ch'án tí sín nchat'á t'etjoan

¹⁵ la ntáchro ch'án kixin:

—¿Nkekjaín tsochjinará tsoxrjanka nketí tjen tí ch'ín Jesús? —mé xikaha chro tí ch'ín Judas. Ntá tí sín nchat'á t'etjoan kjuenkehe sín ch'án treinta chichaon plata.

¹⁶ Ntá tuénxín tí hora tí ch'ín Judas mé xritjeyá ch'án nkexrí tsochénka ch'án sín nketí tjen tí ch'ín Jesús.

Kjuixixín kjóneko sín tí ch'ín Jesús

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Ntá ikui tí yaon xrankixixín kia sine sín niqtja tsikjikhoya tí xroan t'ánkixin niqtja. Ntá tí sín k'uájiko ch'ín Jesús mé kóchjina sín kjuanchankihi sín ch'án kixin:

—¿Ínchéni, nketí tjínkávan sincheyaxixinni tí sineni tí kia pascua? —ichro sín.

¹⁸ Ntá ntáchro ch'án kixin:

—Sátsjirá Jerusalén la tsjasánrá ntqoe ijnko ch'ín la nixjehérá ch'án tsontáchrorá kixin: “Ntáchro Maestro kuénténi kixin í séhya naxa tsjak'e ch'án la ntá ijie ntqoa ntihi tsoyaxixín kixin sineko ch'án tí sín xriko ch'án tí kia pascua”, tsixrorá —mé xikaha ichro ch'ín Jesús.

¹⁹ A ntá tí sín k'uájiko ch'ín Jesús mé kjuínchexiteyá sín la kjuíncheyaxixín sín ntiha tí nkehe sine sín kia pascua.

²⁰ Tió ntá kóntó la ntá ch'ín Jesús k'uéjóko tí teyó sín k'uájiko ch'án kjóne sín.

²¹ La ntá tió naxa tjejóne sín la ntáchro ch'ín Jesús kixin:

—Chaxín tjonkará kixin jnkójínrá tjejórá ntihi mé sinchekjirána —ichro ch'án.

²² Ntá kaín sín la kjuankíxin kóxakonhen sín k'uává sín la ntá kjuankíxin sín jnkojnko sín kjuanchankíhi sín tí ch'ín Jesús kíxin:

—Inchéni, zá jeheni ní? —ichro sín.

²³ Ntá kjuátēhe ch'ín Jesús kíxin:

—Tí nkexro tsochr'ánkikian niotja tí plato a mé tí nkexro a mé sinčekjina ch'án.

²⁴ Tí Xjeen Dios K'óna Chojni xíkaha tsjasóte ch'án éxí nixja xroon itén Dios, a ntá ñòà tí ch'ín sinčekji ch'án. Íchá jina chrókokjehya ch'án —mé xíkaha ichro ch'ín Jesús.

²⁵ Na ntá tí ch'ín Judas tí ch'ín sinčekji ch'ín Jesús, mé ntá chro ch'án kíxin:

—Maestro, zá janhan? —ichro ch'án.

Ntá ntá chro ch'ín Jesús kíxin:

—Méxra xíkaha tsintáchrúa —ichro ch'án.

²⁶ Ntá tió tjejóne sín na ch'ín Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrif'ò ch'án tí niotja ntá chjéhe ch'án kaín tí sín k'uájiko ch'án sine sín. Ntá ntá chro ch'án kíxin:

—Sinterá tíhi mé cuerpo kuéntana —ichro ch'án.

²⁷ Na ntá kuákja ch'án ijnko vaso tjíá inté to uva na ntá kjuanchehe ch'án kjuasáya Dios ntá kjuixin ntá chjéhe ch'án kaín tí sín tjejóko ch'án ik'ui sín. Ntá ntá chro ch'án kíxin:

—Tíhi mé kaín rá it'irá

²⁸ Kíxin tíhi mé jñina mé chrónkaxín ijnko nkehe nixin tsónhen. Mé tí jñina ts'tíji na mé tsjacha tsjinkítsa nchónhya chojni kíxin ts'íjmáxin ijíé sín.

²⁹ Tjonkará kíxin ts'íhya janhan tí inté to uva inaá tsjixrakájia tí yaon ts'ayàja kjuachaxin kuénte T'aná ntá xík'ini inté to uva inaá —mé xíkaha ichro ch'ín Jesús.

Ntá chrónka ch'ín Jesús kíxin ch'ín Pedro sinchemá ch'án kíxin chónhya ch'án tí ch'ín Jesús

(Mr. 14.26-31; Lc. 22.31-34; Jn. 13.36-38)

³⁰ Ntá itsje sín ijnko himno ntá kjuixin ntá sákjuj sín tí jñá Olivo.

³¹ Ntá ntá chro ch'ín Jesús kíxin:

—Jahará tsítónaráni kaín rá ijie tie kíxin ntá chro tí xroon itén Dios kíxin: "Its'en tí nkexro Pastor t'ayakonhen kolélo ntá kaín tí ko mé tsjichroe va."*

³² Na ntá tió tsoxechónna ntá sátsjia senó estado Galilea, a ntá jahará la chr'éxin tsochréhérá —ichro ch'án.

³³ Ntá kjuátēhe ch'ín Pedro ntá chro ch'án kíxin:

—Kjónté kaín sín tsítóha sín ntá janhan la náhi —ichro ch'án.

³⁴ Ntá ntá chro ch'ín Jesús kíxin:

—Chaxín tsqxrjanka kíxin tí tie i naxa tsotsjehya kochíntoá la ó sijnchemána níya —ichro ch'án.

³⁵ Ntá ntá chro ch'ín Pedro kíxin:

—Kjónté koína its'én la sñtamáhya tí jaha —ichro ch'án.

La ntá kaín tí sín k'uájiko ch'án na xíkaha ichro sín kaín sín.

Ch'ín Jesús chrónóēhe ch'án It'é ch'án tí tjen ch'án tí Huerto Getsemaní

(Mr. 14.32-42; Lc. 22.39-46)

³⁶ Ntá ch'ín Jesús la ko tí sín k'uájiko ch'án mé kjuíji sín tí nonte ntiha mé nček'in sín Getsemaní. Ntá jehe ch'án mé ntá chro ch'án kíxin:

—Tjejorá ntihó ntá janhan sátsjia tsonixjahá T'aná —ichro ch'án.

³⁷ Ntá sákjuiko ch'án tí ch'ín Pedro la ko tí iyó xjeen ch'ín Zebedeo la kjuankíxin kóxakonhen ch'án la ko k'uává ch'án.

³⁸ Ntá ntá che ch'án tí iy'á sín kíxin:

—Imá t'ává asenná éxí its'én ntá ts'axrje asenná. Ntá jahará ntihó tsitohará ts'ejotsjehekoarána —ichro ch'án.

³⁹ Ntá sákjuí ch'án antsí kjínxin ntá kjuák'exín toch'in ch'án k'uísén ch'án hasta caxín kja ch'án nonte ntá chrónóēhe ch'án It'é ch'án tjen nkaya nkajni, ntá chro ch'án kíxin:

—It'eni, tí tjinkávan chrókjünchekaáni kíxin chrók'uíhyani tí nkehe tsjá tjíá tí copa i. Kjánchó jehya éxí tjinkaonni jeheni. Náhi. Éxí tjinkávan jaha —ichro ch'án.

⁴⁰ Ntá ikjan ch'án tí kuítóhe sín la ó k'uíkon ch'án kíxin tjejóua sín. Ntá nixjehé ch'án tí ch'ín Pedro ntá chro ch'án kíxin:

—Xá xitjahya chrók'uejótsjehekoarána ijnko hora.

⁴¹ Titohará tsjotsjehérá la nixjehérá Dios kíxin tsjinkítsará ch'án kíxin chrókjuaehyará ch'ín Tsochren. Asánrá tóxrjñin kjánchó tí cuerpo chontará la imá ntá —mé xíkaha ichro ch'ín Jesús.

⁴² Ntá sákjuí ch'án yóxin inaá chrónóēhe ch'án It'é ch'án, ntá chro ch'án kíxin:

* 26:31 Zacarías 13.7

—Jaha It'eni tí xitjahya tsjakjían tí nkehe tsjasótexínni la ntá tjinkaonni éxí jaha tjinkávan —mé xíkaha ichro ch'án.

⁴³ Ntá ikjan ch'án la k'uikon ch'án tjejóua tí sín k'uájiko ch'án inaá kixin tjeheya sín kotáchrin.

⁴⁴ Ntá kuitóhe ch'án sín inaá la nixin sáxíkji ch'án ntá ó xíkahó xínixja ch'án inaá.

⁴⁵ Ntá kjan ch'án tí k'uejó sín la ntáchro ch'án kixin:

—¿A ntá jie, tjejochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chóna jie tsjikaán sín ch'án.

⁴⁶ Ntá ijie t'inkatjenrá sátsjini kixin ó kjuí tí ch'ín sinchekjina —ichro ch'án.

Sákuuko sín tí ch'ín Jesús tsjak'echjina ch'án ntóechiso

(Mr. 14.43-50; Lc. 22.47-53; Jn. 18.2-11)

⁴⁷ Ntá naxa tjeixja ch'ín Jesús ntá xrinahya kui ch'ín Judas, mé ijnko tí teyóxin sín k'uájiko ch'án. A ntá jehe ch'án kuikao ch'án nchónhya chojni kjuíjiko sín ch'ína espada la ko inta. Na mé kjuachaxién tí sín nchat'á t'etóan la ko tí sín táda kuente tí sín judío mé kui sín.

⁴⁸ Ntá ch'ín Judas, tí ch'ín kjuínchekji, mé tsintáchro ch'án kixin:

—Tí ch'ín tsákiha tuéen ch'án na mé tsonoxínrá kixin jehe ch'án. Ntá itsérá ch'án —mé xíkaha tsintáchro ch'ín Judas.

⁴⁹ Ntá kóchjinehe ch'án tí ch'ín Jesús la nixjehe ch'án ntáchro ch'án kixin:

—¿Á jina tjen, Maestro? —ichro ch'án.

Ntá kjóneko ch'án kochíto.

⁵⁰ Ntá kjuatéhe ch'ín Jesús, ntáchro ch'án kixin:

—Amigo, á ó k'uinka tí xra tjinkávan sích'e?

Ntá xíkaha kaín sín kóchjinehe sín ch'án la itsé sín ch'án.

⁵¹ Ntá ijnko ch'ín k'uájiko ch'ín Jesús mé kuakitsje ch'án ch'ína espada kóchrinjin ch'án tatsjon ijnko tí sín ch'ehé tí nchat'á t'etóan xra.

⁵² Ntá ntáchro ch'ín Jesús kixin:

—Chr'axenhén tje ch'ína espada méhe. Kaínxín tí sín tjayaxín ch'ína espada la xíkaha ts'énxín sín.

⁵³ ¿Á noahyará kixin janhan jina chrókjuáncháha T'aná la ntá tuénxín chróchr'án ch'án teyó ejército sín ángel?

⁵⁴ Kjánchó tí xíkaha chróknhen la chróxiteyáhya éxí nixja xroon itén Dios kixin itén Dios mé chrónka kixin t'ichjánxín ó jehí xíkaha tsonhen —ichro ch'ín Jesús.

⁵⁵ Ntá ch'ín Jesús mé ntáche ch'án tí sín ikuí kixin:

—Jahará k'uinkakoará ch'ína espada la ko inta kixin tsotserána éxí chrótserá ijnko síchee xíkaha. A ntá kaín yaon kjuak'é nkaxenhen nínko kjuáuka ¿na ntá nkexrí ntíha mé tsexinhyarána?

⁵⁶ Kjánchó jehí kaín tíha tsonhen kixin tsoxiteyá tí chrónka tí sín tsíkjin xroon itén Dios óse —ichro ch'án.

Mé xíkaha ntá kaín tí sín k'uájiko ch'ín Jesús na mé kuitóhe sín ch'án, ntá sákuí sín.

Ch'ín Jesús kóchjina ch'án tí síxreé t'etóan

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ntá tí sín itsé ch'ín Jesús la sákuíko sín ch'án ntóe ch'ín Caifás, tí nchat'á t'etóan. Ntaha mé tsikójkotsé kaín tí sín maestro tjako tí ley la ko tí sín t'etóan kuente nínko.

⁵⁸ Ntá ch'ín Pedro ikjín tinkáchréhe ch'án ntá kjuíji ch'án tí ntásin ntóe tí nchat'á t'etóan la kjaxin k'uixenhen ch'án tí ntásin la kjuák'eko ch'án tí sín policía kuente nínko kixin tsotsjehe ch'án nkerí tsonhen.

⁵⁹ Ntá tí sín nchat'á t'etóan la ko tí sín táda la ko kaín tí sín t'etóan mé kjuéyá sín nkexrí ts'eka sín jie tí ch'ín Jesús kixin jina chrók'óyán sín ch'án.

⁶⁰ Ntá kjónté nchónhya chojni kuikjanchia sín jie kjánchó k'uitjahya sín nkerí jie t'íká ch'án. Ntá kjónté la kóchjina iyó testigo ntoáhya chrónka sín

⁶¹ la ntáchro sín kixin:

—Ó kuínhini ntáchro ch'án kixin: "Janhan na ts'oxíka tí nínko kuente Dios la ntá iní yaon koá la ó tsjaké inaá"† —mé xíkaha chro sín.

⁶² Ntá tí nchat'á t'etóan k'uínkatjen la kjuanchankíhi ch'án tí ch'ín Jesús, ntáchro ch'án kixin:

—¿Nkekuénté jtáéheya ninkehó? ¿Á chaxín xíkaha tsintáchrúa éxí xíkaha ichro sín? —ichro ch'án.

⁶³ Ntá ch'ín Jesús la tánikoá ch'án nixjahya ch'án. Ntá ntáchro tí nchat'á t'etóan kixin:

—Kjuachaxién ihnjé tí Dios tjechón t'akjénxian chrónka ntoá, ¿á jaha tí Cristo Xjeen Dios? —kjuanchankí ch'án.

⁶⁴ Ntá kjuatéhe ch'ín Jesús ntáchro ch'án kixin:

—Éxí tí ntáchrua jaha. Ntá kjaxin xrjanka kixin chr'éxin ts'ikuan kixin tí Xjeen Dios K'óna Chojni mé tsjak'etjaxin nánko tí tja chjina Dios chóna kaín xín kjuachaxin la ko ts'ikuan itjui mé tsixin ch'án nkaya nkajni —ichro ch'in Jesús.

⁶⁵ Ntá kuínhin tí nchat'á t'etqan la ntá imá kónínkaon ch'án ntá kótséchje ch'án tí iké ch'án la ntáchro ch'án kixin:

—Tí ch'in a k'uántaxínhin ch'án Dios kixin xikaha nixja ch'án. Méxra t'ichjánxinhya í so chojni tsochrónka. La ntá jahará la ó kuínhínrá kixin nkexrí nixja ch'án.

⁶⁶ ¿A ntá jahará la, ¿nkechorá? —mé ichro tí nchat'á a.

Ntá kjuátehe sín ntáchro sín kixin:

—Chóna ch'án jie la chrók'uen ch'án —ichro sín.

⁶⁷ Ntá iso sín la kuikite sín ntate sín nkayakon ch'án na í so sín na kjuate sín ch'án la í so la chjéhe sín ikon ch'án.

⁶⁸ La ntáchro sín kixin:

—Tí chaxín tí Cristo jaha la tónoha nkexro kjuatia —ichro sín.

Ch'in Pedro kjuínchemá ch'án kixin chónhya ch'án tí ch'in Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Ntá ch'in Pedro naxa tjetjaxin ch'án tí ntasin la ntá ikui ijnko tjan ch'e xra ntiha kóchjinehe ch'án, la ntáchro tjan kixin:

—Kjaxian xríkoa tí ch'in Jesús tsíkjin estado Galilea —ichro tjan.

⁷⁰ A ntá ch'in Pedro kjuínchemá ch'án nkayakon kaín sín la ntáchro ch'án kixin:

—Nonahya nkehe tí ntáchrua —ichro ch'án.

⁷¹ Ntá sákjuí ch'án kjuíji ch'án chjina tí puerta. La ntá í jnko tjan k'uikon tí jehe ch'án la nixjéhe tjan kaín sín tjejontaxín, la ntáchro tjan kixin:

—Tí ch'in í la kjaxin k'uájiko ch'án tí ch'in Jesús tsíkjin chjasin Nazaret —ichro tjan.

⁷² Ntá ch'in Pedro kjuínchemá ch'án inaá, k'uájkjén ch'án ihnié Dios, ntáchro ch'án kixin:

—Chonhya tí nkexro a —ichro ch'án.

⁷³ Ntá antsí chr'éxin tí sín k'uéjontaxín kóchjinehe sín ch'in Pedro la ntáchro sín kixin:

—Chaxín jaha kjaxin jnkojín tí sín a kixin tjátqanxinni tí nixja jaha —ichro sín.

⁷⁴ Ntá k'uájkjén ch'án ihnié Dios ntáchro ch'án kixin:

—Chonhya tí nkexro a —ichro ch'án.

Na ntá xrínahya itsje kochintqa.

⁷⁵ Ntá ch'in Pedro mé xraxinkaon ch'án kixin nkexrí chrónka ch'in Jesús senó kixin: "Naxa tsotsjehya kochintqa mé ó tsjixin sjnchemána niya kixin chonhyana."* Ntá xikaha xraxinkaon ch'in Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuanchenihi, la sákjuí ch'án.

27

Kjuikénhen sín ch'in Jesús tí ch'in Pilato

(Mr. 15.1; Lc. 23.1-2; Jn. 18.28-32)

¹ Ntá tí kóyqan k'uínkaséyan ntá kaín sín nchat'á t'etqan la ko tí sín t'etqan kuènte tí sín judío kjuenkayáxin sín nkexrí ts'óyan sín tí ch'in Jesús.

² Ntá tjechronteto ch'án sákjuiko sín ch'án tí tjen tí ch'in Poncio Pilato, tí ch'in gobernador romano.

Ik'uéen ch'in Judas

³ Ntá tí ch'in Judas, tsíkjinckjé ch'in Jesús, mé k'uikon ch'án kixin ts'óyan sín tí ch'in Jesús. La ntá xraxinkaon ch'án tí jie kjuasin ch'án la sákjuikénhen ch'án sín inaá tí treinta chichaon plata kuákja ch'án, mé chjéhe ch'án tí sín nchat'á t'etqan la ko tí sín táda.

⁴ La ntá ntáchro ch'án kixin:

—Ó kjuasiní jie kixin kjuínckjéini ijnko nkexro tjóá —ichro ch'án.

A ntá jehe sín kjuátehe sín kixin:

—Ntá janhanna la nonahyana tíha. Tíha la ó jie kuènta —ichro sín.

⁵ Ntá ch'in Judas mé sákjuik'e tí chichaon nkaxenhen njnko ntá sákjuí ch'án kjuisik'á isin ch'án nta.

⁶ Ntá tí sín nchat'á t'etqan kjuenájín sín tí chichaon la ntáchro sín kixin:

—Tí chichaon la kóxixin ijnié chojni la chrokjuahya chr'áxenhenni tí caja kuènte ofrenda —ichro sín.

⁷ La ntá kjuenkayáxin sín jnkokoá kixin tí chichaon la ts'enaxín sín ijnko nonte it'in Nontje Tí Ch'in Ch'éna Nchésen kixin tsochóna sín nketí soxravá tí chojni tsíkjin ikjin.

⁸ Mé xikaha kjuínchek'in sín tí nonte mé Campo Kuènte Jnì la hasta ijie la naxa xikaha nchek'in sín.

⁹ Mé xikaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjón tí sín israelita kuènte tí ch'ín a),

¹⁰ la k'uèñaxín sín tí nonte kuènte tí ch'ín ch'èna nchésen kixin xikaha kjuínchexiteyá sín tí nkehe k'uètuanna Ìnchéni.”*

Ch'ín Jesús kóhchina nkayakon tí gobernador Pilato

(Mr. 15.2-5; Lc. 23.3-5; Jn. 18.33-38)

¹¹ Na ntá ch'ín Jesús sákjuiko sín ch'án nkayakon tí ch'ín gobernador la ntá jehe ch'án kjuanchankí ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús, ntáchro ch'án kixin:

—Éxí ntáchrúa jaha —ichro ch'án.

¹² Na ntá tí sín nch'at'á t'etqan la ko tí sín táda t'etqan t'eka sín jiè tí ch'ín Jesús kjánchó la ch'ín Jesús la ninkehó kjuáteheya.

¹³ A ntá ch'ín Pilato kjuanchankí ch'án kixin:

—¿Á kiénhya kaín tí jiè t'eka sín tí jaha? —ichro ch'án.

¹⁴ Kjánchó ch'ín Jesús la ninkehó kjuáteheya ch'án. Ntá tí ch'ín gobernador la chrakon ch'án.

K'uètuqan sín kixin its'en ch'ín Jesús

(Mr. 15.6-20; Lc. 23.13-25; Jn. 18.38—19.16)

¹⁵ A ntá tí kié pascua mé kuèñhen tí ch'ín gobernador kixin jnkojnko nánó takitsjexín ch'án nteochiso ijnko chojni tjechjina. Ntá tí chojni mé tsjanchia sín nkexro tí tsítohe ch'án sátsji.

¹⁶ Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé it'in ch'án Barrabás.

¹⁷ Ntá itsjé chojni kójnkotsé la ntá ch'ín Pilato mé kjuanchankí ch'án kixin:

—¿Nkexro tjínkáonrá ts'atjánta, á tí ch'ín Barrabás o á tí ch'ín Jesús nchek'in sín Cristo? —ichro ch'án.

¹⁸ Kixin tí ch'ín Pilato la ó nohe ch'án kixin kjuachjínqínhin chóna tí sín kjuíkaán tí ch'ín Jesús.

¹⁹ Ntá jehe ch'án naxa tjetjaxín ch'án tí nchekitoexixin ch'án ijie chojni la ntá tí ichjién ch'án mé k'uètuèñhen tjan ijnko chojni tsjichénka ch'án kixin tsjiatehya ch'án tí nkexro jina kixin kóntó náxjónhya k'uíkonxín tjan kotáchríen tjan kixin tí jehe ch'án.

²⁰ A ntá tí sín nch'at'á t'etqan la ko tí sín táda t'etqan a mé nixjehé kaín tí chojni tsíkóhchina kixin chrókjuanchia sín kixin chrókuítohe ch'án tí ch'ín Barrabás sáchrókjui, a ntá ch'ín Jesús mé chrók'uen.

²¹ A ntá tí ch'ín gobernador mé nixjehé ch'án sín inaá kjuanchankí ch'án kixin:

—¿Nkexro tí yaá sín tjejó ntihi tjínkáonrá ts'atjánta? —ichro ch'án.

Ntá kjuátehe sín ntáchro sín kixin:

—Ch'ín Barrabás mé chrók'uatjánta ch'án —ichro sín.

²² A ntá ch'ín Pilato mé kjuanchankí ch'án kixin:

—¿A ntá nkehe sjt'ahá tí ch'ín Jesús tí ch'ín nchek'inrá Cristo? —ichro ch'án.

Ntá kaín sín kjuátehe sín kixin:

—¡Tsjak'enkáni ch'án ntacruz! —ichro sín.

²³ Ntá ch'ín Pilato kjuanchankí ch'án ntáchro ch'án kixin:

—¿Xá nkehe tí kjuích'e tí ch'ín i kixin? —ichro ch'án.

Ntá antsi má itsen k'uixite sín, k'óyako sín, ntáchro sín kixin:

—¡Tsjak'enkáni ch'án ntacruz! —ichro sín.

²⁴ Ntá ch'ín Pilato k'uíkon ch'án kixin í kohya tsjitóxínhin sín tsjenkayáxin sín la antsi má k'uixité sín, nínkaon sín, la ntá kjuanchia ch'án xraqo sín inta, la nkayakon kaín tí sín tsíkójnkotsé ntaha k'ònti ch'án tja ch'án. La ntáchro ch'án kixin:

—Janhan tsámahya jiè tí its'en tí nkexro í chónthaya jiè. Jahará xikaha tjínkáonrá tsqñhen —ichro ch'án.

²⁵ Ntá kaín sín kjuátehe sín kixin:

—Jeheni la ko xjeenni mé yámáni tí jiè tí its'en tí nkexro í —ichro sín.

²⁶ Ntá ch'ín Pilato kúitohe ch'án kixin sáchrókjui tí ch'ín Barrabás. Ntá tuénxín k'uètuqan ch'án kixin tsjate sín tí ch'ín Jesús la ntá kjuínchek'áyéhe ch'án tí sín tsjak'enkáni sín ch'án ntacruz.

* 27:10 Zacarias 11.12-13

²⁷ A ntá tí sín soldado a mé sákjuiko sín tí ch'ín Jesús tí palacio kuènte tí ch'ín gobernador. Ntaha kójnkotséxin kaín tí sín soldado romano la k'uántatjen sín tí jehe ch'án.

²⁸ Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié.

²⁹ La kjuak'enkaya sín kja ch'án ijnko corona tsikjich'éna sín ntach'í la ko kjuanjón sín ijnko nta vara kixin tjenkáya tja ch'án chjina. La ntá k'uéjóxín toh'in sín nkayakon ch'án la kjuanoá sín ch'án, ntáχρο sín kixin:

—Jnkochrín tsjak'é tsétuènhén tí sín judío —ichro sín.

³⁰ La ko kjaxín ntaté sín kuikite sín nkayakon ch'án la ko kuákja sín tí nta tjexraá ch'án la t'ichjéxin sín kja ch'án.

³¹ Ntá kjuixin kjuanoá sín ch'án na ntá kuakitsjehe sín ch'án tí ka kjátse tié ntá kjuínchek'inkáya sín tí iké ch'án xráxin. Ntá sákjuiko sín ch'án kixin tsjak'enkani sín ch'án ntacruz.

Kjuák'enkani ch'ín Jesús ntacruz

(Mr. 15.21-32; Lc. 23.26-43; Jn. 19.17-27)

³² A ntá sákjuixin sín ntiha la xéta sín ijnko ch'ín kjuixin ch'án chjasin Cirene, mé it'in ch'án Simón. Ntá k'uétuènhén sín ch'án kixin tsamá ch'án tí ntacruz tsjak'enkani ch'ín Jesús.

³³ Ntá kjuíji sín ijnko tjo it'in Gólgota na mé nkívee sín t'axrjéxin Nta Hueso Kja Chojni Tsik'en.

³⁴ Ntá chjéhe sín ch'ín Jesús xranvino tsik'ixinkíkjanxin xroan tsjá kjánchó jehe ch'án k'uíhya ch'án.

³⁵ A ntá tí sín soldado kjuixin kjuak'enkani sín ch'án tí ntacruz ntá tí iké ch'án kjuích'exín sín suerte kixin nkexro tsakja. Mé xíkaha xiteyá tí nkehe nixja tí sín k'uéchrónka itén Dios ósé, ntáχρο kixin: “Nchónhya suerte kjuích'exín sín tí kaná.”[†]

³⁶ Ntá tí sín soldado ntaha k'uéjóna sín t'ayakonhen sín ch'án.

³⁷ Ntá kjuak'enkani sín tí ikja tí ntacruz ijnko ntachiso ntáχρο kixin: “Ch'ín Jesús mé tí ch'ín Rey t'etuènhén tí sín judío.”

³⁸ Kjaxín yaá tí síchee k'uéjónyáni sín ntacruz ijnko la nó tja chjina la í jnko la nó tja kjon.

³⁹ Ntá tí sín tinkák'atsínka mé kjuanoá sín ch'án tinkátjía kja sín

⁴⁰ la ntáχρο sín kixin:

—Jaha ntáχροa kixin chrók'oxíka tí nínko a ntá iní koá yaon la ó chrókjuixin chrókjuích'éna inaá,[‡] ichrua. Méxra ijie jahvá nchekaá asán. Tí chaxín jaha Xjéen Dios la jahvá tjasinkajinxíán tí ntacruz méhe —ichro sín.

⁴¹ La ntá kjaxín tí sín nchát'á t'etóan la ko tí sín maestro tjako tí ley la ko tí sín fariseo la ko tí sín k'uétóan kuènte nínko kjuanoá sín ch'án, ikjo sín kíchó sín kixin:

⁴² —Jehe ch'án mé kjuínchekaá ch'án ókjé chojni ntá jehe ch'án xitjahya sinchekaá asén ch'án. Kja tí chaxín jehe ch'án tí Rey kuènte Israel ntá jehó ch'án chrókjuinkajinxín ch'án asén ch'án tí ntacruz kixin ntá kjaxinni chrókuitekaonni tí jehe ch'án.

⁴³ Jehe ch'án tsintáχρο ch'án kixin Dios tjinkítsa tí jehe ch'án la ntá tsotsjeheni á chaxín tjinkaon Dios sinchekaá tí jehe ch'án kixin tsintáχρο ch'án kixin Xjéen Dios tí jehe ch'án —ichro sín.

⁴⁴ Kjaxín tí síchee sínkáni ntacruz k'uántaxínhin sín ch'án.

Ik'uén ch'ín Jesús

(Mr. 15.33-41; Lc. 23.44-49; Jn. 19.28-30)

⁴⁵ Ntá chonkixin hasta las tres kónjin mé k'uíxin tie chjasintajni.

⁴⁶ Ntá tí hora a ch'ín Jesús itsen k'uèya ch'án, ntáχρο ch'án kixin:

—Elí, Elí, ¿lama sabactani? —mé tíhi t'axrjéxin kixin: It'éni, It'éni, ¿nkekuènté kujtohéni?[§] —mé xíkaha ichro ch'án.

⁴⁷ Ntá iso sín tjejontaxín kuínhin sín ntá ntáχρο sín kixin:

—Tí ch'ín a mé t'íyehé tí ch'ín profeta Elías —ichro sín.

⁴⁸ Ntá ijnko ch'ín kuínka ch'án sákjuikakja ch'án ijnko ka ntá chr'ánkí ch'án xranvino isán ntá tí ka a kjuak'ekjen ch'án ijnko nta kjínjin ntá kjuínchechrín ch'án kixin chrók'ui ch'ín Jesús.

⁴⁹ Ntá í so sín ntáχρο sín kixin:

—Nté tjtóhé ch'án. Tsotsjeheni á tsi ch'ín Elías sinchekaá tí jehe ch'án —ichro sín.

⁵⁰ Ntá ch'ín Jesús itsen k'uíyato ch'án inaá, ntá kjuixin ik'uén ch'án.

⁵¹ Mé ntá tuénxin k'uíchje tí ka tjenkáuènxín nkaxenhen nínko. Mé k'uíchje tí ka k'óna yaá tí kjuankíxín noi hasta nonte. La ko kuínkí nonte la ko tí tjo la kjaxín xitjehe.

⁵² La ko ó xitjehe tí tóye tsixravá chojni la ko ó xechón itsjé tí sín k'uékinkáchónki Dios.

⁵³ Kaín tí sín a mé k'uaxrjexín sín tí tòye, la tió kjuixin xechón ch'ín Jesús ntá k'uúixenhen sín tí chjasin tjóá mé chjasin Jerusalén la ntaha itsjé chojni k'uúikon kixin xíxechón tí sín a.

⁵⁴ Ntá tí ch'ín capitán la ko tí sín k'uéjoko ch'án, mé tí sín t'ayakonhen ch'ín Jesús, na ntá k'uúikon sín kuínkí nonte la kaín tí í so nkehe la ntá imá chrakon sín, la ntáchro sín kixin:

—Chaxín tí nkebro a mé Xjeen Dios.

⁵⁵ Ntá ntíha nchónhya chojni chjin ikjín tjejó sín, tjejótsjehe sín. Jehé sín k'uékinkáchréhe sín ch'ín Jesús tí kjuixín ch'án estado Galilea kixin mé ntíha kjuankixixín sín k'uékinkjitsa sín ch'án.

⁵⁶ Ntaha kjaxin tjeen tjan María Magdalena la ko tjan María, iné tí ch'ín Jacobo, la ko ch'ín José la ko tí iné tí xjeen tí ch'ín Zebedeo.

Ntá xrává ch'ín Jesús

(Mr. 15.42-47; Lc. 23.50-56; Jn. 19.38-42)

⁵⁷ Ntá tí ó ntá kóntó ikui ijnko ch'ín it'ín José, mé ijnko ch'ín rico. Chjasén ch'án mé Arimatea la jehé ch'án kjaxin k'uéchréhe ch'án tí ch'ín Jesús.

⁵⁸ Ntá tí ch'ín José sákjuítsjehe ch'án ch'ín Pilato kjuikjanchia ch'án tí cuérpóé tí nkebro Jesús. Ntá ch'ín Pilato mé kjuanjon ch'án kjuachaxin.

⁵⁹ Ntá ch'ín José mé kuákja ch'án tí cuerpo ntá kjuínchek'isímá ch'án ijnko ka tjóá.

⁶⁰ Na ntá kjuak'enkaya ch'án ijnko tòye nixin kuénte ch'án kixin senó tsíkijch'éna ch'án. Ntá ijnko xro jie k'uúkjéxin ch'án tí ntója tí tjo, ntá kjuixin ntá sákjuí ch'án.

⁶¹ Ntaha kjuák'e tí tjan María Magdalena la ko í jnko tjan María tjejótxaxin sín ntóí chok'éxin tjeen tòye.

Tí sín soldado k'uáyakonhen tí tòye xrává ch'ín Jesús

⁶² A ntá tí yaon ó kjuixin kjuasiyóxin sín nkehe kuénte tí yaon t'ok'éhe sín, la ntá tí sín nchat'á t'etqan la ko tí sín fariseo sákjuítsjehe sín tí ch'ín Pilato

⁶³ la ntá ntáchro sín kixin:

—Ó xraxinkaonni kixin tió naxa kjuák'echón tí nkebro kjuích'ia la tsíntáchro ch'án kixin ts'atsínka iní yaon ntá tsoxechón ch'án inaá, tsíchro ch'án.

⁶⁴ Méxra tsétuenhén tí sín soldado kixin ts'ayakonhen sín tí tòye tsoxétjajia tí nixin yaon. Tí náhi, la kjá tie itsi tí sín k'uájiko ch'án la tseé sín tí cuerpo kuénte ch'án la ntá chr'éxin tsochénta sín chojni kixin ó xíxechón tí nkebro a, mé xíkaha sich'ia sín. La ntá tí xíkaha sich'e sín qantsí má sich'ia sín que tí xrankixixín —mé xíkaha ichro sín.

⁶⁵ Ntá ntáchro ch'ín Pilato kixin:

—Ntíhi tjejó soldado. Sátsjirá la ts'ayakonhenrá jína tí tòye éxí tjínkáonrá —ichro ch'án.

⁶⁶ Na ntá sákjuí sín la kjuak'e sín ijnko sello chritaón tí xro tjejkéxin tí tòye la kuítqhe sín tí sín soldado ntahó kixin ts'ayakonhen sín.

28

Ó xechón ch'ín Jesús

(Mr. 16.1-8; Lc. 24.1-12; Jn. 20.1-10)

¹ Ntá ó k'uátsínka tí yaon t'ok'éhe sín. Ntá chjino t'inkaséyan tí yaon xrankixixín semana, la ntá tjan María Magdalena la ko tí í jnko tjan María sákjuítsjehe sín tí tsíkijxará Jesús.

² Ntá xrinahya kuínkí nonte imá tjián kixin ijnko ángel kuénte Inchéni k'uúinkajinxin nkaya nkajni la kjuíji ch'án tí tsíxaráv Jesús la kjuakjii ch'án tí xro a tjejkéxin tòye la ntá chritaón tí xro a kjuák'ekjen ch'án.

³ Tí ángel la imá tjákiní tsjehe éxí ijnko xrohi la tí iké ch'án la imá tjóá tsjehe éxí chrinta.

⁴ Tí sín soldado mé k'uúikon sín xíkaha la ntá síxranká sín chrakon sín la éxí tsík'en sín xíkaha k'uéjó sín.

⁵ La ntá tí ángel mé ntáche ch'án tí chojni chjin kixin:

—Chrakonhyará. Janhan ó nòna kixin xritjéyará tí nkebro Jesús mé tí nkebro tsíkjak'enkání ntacruz.

⁶ Kjánchó í kohya ch'án ntíhi ó tsíxechón ch'án inaá éxí chrónka ch'án senó. Xrákirá tsjehérá tí tsíkjak'e sín ch'án, í kohya ch'án.

⁷ Ntá sátsjirá tjoka tjíchenkará tí sín k'uájiko ch'án kixin: “Tí nkebro la ó tsíxechón. Ó kuítónxin ch'án ntja sátsji ch'án estado Galilea. Ntíha ts'ikonrá ch'án”, mé xíkaha tsochronkará. Kaín tíha mé tjonkará —mé xíkaha chrónka tí ch'ín ángel.

⁸ A ntá tí chojni chjin tjoka sákjuixin sín tí tsíxaráv tí nkebro Jesús, la chrakon sín la ko chéhe sín la sákjuíchénka sín tí sín k'uék'ajiko ch'ín Jesús.

⁹ Ntá xrinahya titáya k'uúkuén sín kixin itjen tí ch'ín Jesús la nixjehé sín ch'án. Ntá kóchjinehe sín ch'án la kjóá sín toté ch'án, kuítekaon sín ch'án.

¹⁰ La ntáchro ch'án kixin:

—Chrakonhyará sájtírǎ tǎjchenkará tí sín kǐchó ní kǐxín sáchrókjui sín estado Galilea la ntaha ts'ikon sín tí janhan —mé xǐkaha ichro ch'ín Jesús.

Tí nkehe chrónka tí sín soldado

¹¹ Tió sátsǐkǐjǐ tí chojni chjin la nta iso tí sín soldado k'uáyakonhen tí tsǐxravá ch'ín Jesús mé sákuǐ sín chjasin Jerusalén la chénka sín tí nchat'á t'etǒan kaín tí nkehe tsíkónhen tí k'uéjǐ sín ntiha.

¹² Ntá tí sín nchat'a t'etǒan kjuínixjehé sín tí sín táda la ntá jnkokoá kjuenkayáxin sín ntá chjéhe sín nchónhya chichaon tí sín soldado.

¹³ La ntáchro sín kǐxín:

—Chronkará kǐxín tí tie naxǎ tjejochrinrá ikui tí sín k'uék'ajiko tí nkexro Jesús, mé kueé sín cuerpo kuénte ch'án, ichrorá.

¹⁴ A ntá tí chrókónohe tí ch'ín gobernador tíha la ntá jeheni tsonixjeheni ch'án kǐxín tsonínkakuanhyará ch'án —mé xǐkaha ichro tí sín nchat'á.

¹⁵ La ntá tí sín soldado k'uáyéhe sín tí chichaon la sákuǐ sín la xǐkaha kjuích'e sín éxǐ k'uítuennen sín. La mé xǐkaha chrónkaxín tí sín judío, la hasta tí yaon ijie la xǐkahó ichro sín, chrónkaxín sín.

Ch'ín Jesús k'uetuennen ch'án tí sín k'uék'ajiko ch'án tí xraq sich'e sín

(Mr. 16.14-18; Lc. 24.36-49; Jn. 20.19-23)

¹⁶ A ntá tí tejnko sín k'uék'ajiko ch'ín Jesús sákuǐ sín ijnko jnǎ estado Galilea kǐxín xǐkaha tsík'etǒan ch'ín Jesús.

¹⁷ Ntá k'uíkón sín ch'ín Jesús la ntá kuinkáchónki sín ch'án kjónté iso sín naxǎ kjuenkayáxin á chaxín jehé ch'án ǒ náhǐ.

¹⁸ Ntá ch'ín Jesús kóchjinehe tí jehé sín la ntáchro ch'án kǐxín:

—Dios mé chjǐna kaín xín kjuachaxin nkaya nkajní la ko chjasintajni.

¹⁹ Méxraq sájtírǎ kaín xín nación la tjákohérǎ chojni kǐxín tsitekaon sín tí janhan. Tíkǐtǐxǐnrǎ sín kjuachaxién ihnjé It'éni la ko ihnjé tí Xjeen la ko Nchakuèn Dios.

²⁰ Tjákohérǎ sín kǐxín sinchexiteyá sín kaín xín nkehe kuétuanhanrá. Ijie la ó nohará kǐxín tsjak'é ts'ejokoará jnkochrǐxín hasta tsjeje chjasintajni. Mé xǐkaha tsonhen. Amén —ichro ch'ín Jesús.

Tí tan jína chrónka ch'ín Marcos

Nteje mé kjuakoxin ch'ín Juan Bautista

(Mt. 3.1-12; Lc. 3.1-9, 15-17; Jn. 1.19-28)

¹ Xíkíhi mé xrankíxixín tí tan jína kuènte Jesucristo mé tí Xjeen Dios.

² Ósé mé kjuák'e ch'ín Isaías mé ijnko nkexro tsíchr'án Dios chrónka itén ch'án k'uékjin ch'án nkexrí nixjehe Dios tí Xjeen ch'án ntáχρο kixin:

Janhan tsochr'an ijnko nkexro tsochrónka tan kuèntana tsítónxin ntja,

kixin tsjasíyóxin ch'án ntja kuèntá.*

³ Ntá tsinhin sín itén ijnko nkexro tsjak'e nteje ts'èya tsontáχρο kixin:

“Tóxakonhanrá ncheyóxinrá ntja tsixín Ìnchéni, takitjehérá ijnko ntja ntoí.”†

⁴ Tíha mé xitéyá ikui ch'ín Juan Bautista, mé xíkaha kjuák'e ch'án nteje kuíkite ch'án chojni. Kjuakohe ch'án chojni ntíha kixin chrókjuinkí sín tí nkehe tjenkayáxin sín chrókuítoghe sín tí ijje sín ntá chrókuikite sín kixin xíkaha mé chrókjuin ijje sín.

⁵ Itsjé chojni kuixín estado Judea la ko tí chjasin Jerusalén ikui sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jie yámá sín ntá ch'ín Juan mé kuíkítxin sín ch'án ntario Jordán.

⁶ Tí ké ch'ín Juan mé tsík'óna kaxree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxin nteje.

⁷ Mé kjuák'ekjakoghe ch'án chojni ntáχρο ch'án kixin:

—Itón tí janhan mé tsíchréhe ijnko nkexro antsí má chóna kjuachaxin, a ntá janhan la kánhyó. Méxra chrókósuàna chrókjuasintangka tí correa tí tokaté ch'án.

⁸ Janhan mé intá ó kuíkítxínrá. Ntá jehe ch'án mé tsíkítxínrá ch'án tí Nchakuen Dios —ichro ch'ín Juan.

Ch'ín Juan kuíkite ch'án tí ch'ín Jesús

(Mt. 3.13-17; Lc. 3.21-22)

⁹ Ntá tí yaon a ch'ín Jesús, k'uaxrxjén ch'án chjasin Nazaret estado Galilea. Na ntá ch'ín Juan mé kuíkítxin ch'án tí ntario Jordán.

¹⁰ Tíó k'uaxrxjénkixin ch'ín Jesús tí intá, ntá xrínahya titàya k'uikuèn ch'án na ó xitjehe nkajní la ntá tí Nchakuen Dios éxi kontóá k'uinkajinxín ntíha ntá kjuák'e chrítaón kja ch'án.

¹¹ Ntá xrínahya kuínhin sín nixja Dios nkaya nkajní, ntáχρο kixin:

—Janhan mé xjanna imá tjuaha tí jaha. Imá chàna kixin nchexiteyàna tí jaha —mé xíkaha kuínhin sín.

Ch'ín Tsochren chrókjuachroe tí ch'ín Jesús kixin chrókjuasin ch'án jie

(Mt. 4.1-11; Lc. 4.1-13)

¹² Ntá tí Nchakuen Dios mé sákjuíko tí ch'ín Jesús nteje.

¹³ Kjuák'e ch'án cuarenta yaon tí nteje la ko ntíha mé k'uúxin ko jiehe ntá ch'ín Tsochren a na mé tjinkaon chrókjuachroe ch'án. La ntá tí sín ángel kui k'uàyakonhen tí jehe ch'án.

Ch'ín Jesús kjuankíxixín kjuako ch'án estado Galilea

(Mt. 4.12-17; Lc. 4.14-15)

¹⁴ Kjuixin kjuák'echjina ch'ín Juan ntogechiso ntá ch'ín Jesús na mé sákjuí ch'án nó estado Galilea sákjuíkjakohe ch'án tí sín ntíha tí tan jína kuènte Dios.

¹⁵ Ntá ntáχρο ch'án kixin:

—Ó kjuixraká tí yaon, la ó tsi tí kjuachaxin kuènte Dios ts'etoan ch'án. Chrókuítogherá tí nkehe jínahya k'uékjenkayáxinrá a ntá chrókuítekónrá tí tan tsaáxinrá —mé xíkaha kjuako ch'ín Jesús.

Ch'ín Jesús k'uúyehé noó tí sín itsé koche

(Mt. 4.18-22; Lc. 5.1-11)

¹⁶ Ch'ín Jesús tjetji ch'án chrínta ntayaon Galilea ntá xrínahya k'uíkon ch'án tí ch'ín Simón la ko tí kichó ch'án mé it'in Andrés, mé koche xritsé sín, ntá tinkák'e sín tí nchísén chrínki ntá.

¹⁷ Ntá ntáχρο tí ch'ín Jesús kixin:

—Chréhérá tí janhan, ntá tsotjahará xra tsjéyará chojni —ichro ch'án.

¹⁸ Ntá tuénxin kuitoghe sín tí nchísén k'uétséya sín koche ntá sákjuíko sín ch'án.

* 1:2 Malaquías 3.1 † 1:3 Isaías 40.3

¹⁹ Ntá k'jínhya k'juíji ch'ín Jesús ntá k'uíkon ch'án tí yaá xjeen ch'ín Zebedeo. Ijnko mé it'in Jacobo. A ntá tí í jnko la mé it'in Juan. Jehé sín la ko tí it'é sín tjejóxehnen sín tí ntabárcō tjejójtjonité sín tí nchísén tséya sín tí koche.

²⁰ Na ntá ch'ín Jesús mé k'uíyehé tí jehé sín k'ixin k'jaxin tsochréhe sín ch'án. A ntá tuénxín kuitōhe sín tí it'é sín ch'ín Zebedeo kuitōeko ch'án tí ntabárcō la ko tí sín tjinkitsa ch'án ch'e xra. A ntá jehé sín sákjuiko sín ch'ín Jesús.

Ijnko chojni chóna injno nchakuen tí jínahya
(Lc. 4.31-37)

²¹ Ntá k'juíji sín tí chjasin it'in Capernaum. Na ntá tí yaon t'ok'éhe sín mé k'uixehnen ch'ín Jesús tí nínko Israel. Na ntá ntaha mé k'juankixin ch'án k'juako ch'án.

²² A ntá tí chojni sín ntiha mé chrakon sín kuínhin sín tí nkehe k'juako ch'án k'ixin k'juakōxin ch'án k'ixin chóna ch'án k'juachaxin, la jehya éxí tí sín maestro tjako tí ley, ichro sín.

²³ Ntá tí nínko Israel chjasin ntiha itjen injno chojni chóna injno nchakuen tí jínahya k'uíyato ntáchro k'ixin:

²⁴ —¿Nkekuénté t'jaté tí jeheni kaín ní? Jaha Jesús k'juíxian Nazaret. ¿Á k'uinka k'ixin s'inchek'itjáyanni? Janhan mé ó k'juátsōan tí jaha, la ko nōna k'ixin jaha tí nkexro t'jóá kuénté Dios —mé xikaha ichro tí nchakuen tí jínahya.

²⁵ Ntá ch'ín Jesús mé k'uetuēnhen tí nchakuen tí jínahya ntáchro ch'án k'ixin:

—Tániá, t'axrjéxian tí jehé ch'án —mé xikaha ichro ch'ín Jesús.

²⁶ A ntá tí nchakuen tí jínahya mé k'juínchek'aniáte tí ch'ín a la ko k'uíyatōxín tsen ntá k'uauxrjéxín tí ch'ín a.

²⁷ A ntá kaín sín chrakon sín ntá k'juanchankíhi sín k'ichó sín, ntáchro sín k'ixin:

—¿Xá nkexro tíha k'ixin tjako ch'án nkehe n'ixin? Jehé ch'án chóna k'juachaxin k'ixin t'etuēnhen ch'án tí nchakuen tí jínahya la titekakonhen —mé xikaha ichro sín.

²⁸ A ntá imá tjoka k'uíxikónohe kaín xín sín estado Galilea k'ixin nkexrí tí k'juachaxin chóna tí ch'ín Jesús a.

Ch'ín Jesús k'juínchekitōhe jína tí ich'ee tí ch'ín Simón Pedro
(Mt. 8.14-15; Lc. 4.38-39)

²⁹ Ntá tí ch'ín Jesús mé k'uauxrjéxín ch'án tí nínko, a ntá tuénxín sákjuiko ch'án ch'ín Jacobo la ko ch'ín Juan, sákjuí sín ntōe ch'ín Simón la ko ch'ín Andrés.

³⁰ Ntá tí ich'ee ch'ín Simón na tjetsínka tjan, níhi tjan k'ixin chóna tjan sóa. Ntá chénka sín tí ch'ín Jesús.

³¹ Ntá kóchjina ch'án tí tjetsínka tjan ntá itsé ch'án tja tjan k'uíkatjen tjan. Ntá tuénxín k'juínhin tjan tí sóa chóna tjan. Ntá k'juanjōn tjan nkehe sine sín.

Ch'ín Jesús k'juínchekitōhe jína nchónhya chojni níhi
(Mt. 8.16-17; Lc. 4.40-41)

³² A ntá tíó k'juíátaōn yaon tíó k'uíxín tie k'ujkōhe sín tí ch'ín Jesús kaín tí sín níhi la ko tí sín chóna nchakuen jínahya;

³³ na ntá kuénté chjasin kójnkontsé sín k'uíxintankí sín ntója tí nchia a.

³⁴ Ntá k'juínchekitōhe ch'án jína kaín tí chojni níhi chóna nchónhya clase ch'in la ko kuakitsje ch'án kaín tí nchakuen tí jínahya. Na í k'juanjōnhya ch'án k'juachaxin k'ixin tsonixja tí nchakuen tí jínahya k'ixin ó k'juátsōan tíha nkexro tí jehé ch'án.

Ch'ín Jesús mé k'juako ch'án estado Galilea
(Lc. 4.42-44)

³⁵ Ntá naxá sítié k'uàya ch'ín Jesús k'uauxrjéxín ch'án tí chjasin a sákjuí ch'án nteje k'ixin ntiha nixjeexín ch'án It'é ch'án t'jen nkaya nkajní.

³⁶ Ntá ch'ín Simón la ko tí sín xriko ch'án mé sákjuík'jeyá sín ch'án.

³⁷ Ntá k'uitja sín ch'án ntá chénka sín k'ixin:

—Kaín sín xritjeyá sín tí jaha —ichro sín.

³⁸ Ntá ntáchro ch'ín Jesús k'ixin:

—Sátsjini ókjé chjasin chjinaxón k'ixin ntaha k'jaxin tsjákōhā sín tí tan jína, k'ixin xikaha mé tí k'uauxrjéxian chjasin ntiha.

³⁹ Ntá nkúixín estado Galilea sákjuí ch'án kuinkákjako ch'án jnkojnko nínko la ko kuakitsje ch'án tí nchakuen tí jínahya chóna sín.

Ch'ín Jesús k'juínchekitōhe jína injno ch'ín chóna chinlepra
(Mt. 8.1-4; Lc. 5.12-16)

⁴⁰ Ntá kui injno ch'ín chóna chinlepra k'juák'exín toch'in ch'án nkayakon ch'ín Jesús ntá chrónóghé ch'án ntáchro ch'án k'ixin:

—Tí tjinkávan jaha la jína chrókjuínchekitohéni jína —ichro ch'án.

⁴¹ Ntá ch'ín Jesús na imá kuikonóhe ch'án tí ch'ín a na ntá kjuentoá tja ch'án kjuak'e tja ch'án chrítaón tí ch'ín níhi a ntá ntáchro ch'án kixin:

—Méxra xikaha tjínkavan. Ntá jie sntakitoha jína —ichro ch'án.

⁴² A ntá xikaha ntáchro ch'án ntá tuénxín kjuín tí chinlepra ntá kuitohé ch'án jína.

⁴³ Ntá k'ueuhenen ch'ín Jesús tí ch'ín a kixin tjoka sátsji ch'án, ntáchro ch'án kixin:

⁴⁴ —Ninkexró chenkahya ntíhi; jehó sátsjia tjákehé tí ch'ín nchat'á kixin ó kjuínhan tí chinlepra la ko tjánjuan tí nkehe tsik'etqan ch'ín Moisés[‡] kixin tsoñoexín kaín xín chojni kixin ó kuitoha jína —ichro ch'án.

⁴⁵ A ntá tí ch'ín tsíkitohe jína, a ntá sákjuí ch'án kjuankíxin ch'án chénka ch'án kaín xín chojni kixin nkexrí kuitohé ch'án jína. Méxra xitjahya ts'ixenhen ch'ín Jesús noxín nijnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixín sín nkuixín chjasin.

2

Ch'ín Jesús mé kjuínchekitohé jína ijnko chojni tsík'en tote

(Mt. 9.1-8; Lc. 5.17-26)

¹ Ntá ó k'uátsínka iso yaon ntá ch'ín Jesús mé xíkjan ch'án chjasin Capernaum. Ntá k'uixikónohe chojni kixin ijnko nchia ntíha kjuak'e ch'án.

² Ntá tuénxín nchónhya chojni kóchjina ntá kjuachahya tí nchia k'uixixenhen sín la ko kjaxin kjuachahya tí ntója nchia chrók'uixintankí sín. A ntá ch'ín Jesús kjuako tí tan jína kuente Dios.

³ Ntá kui noó sín tinkátsénki sín ijnko ch'ín tsík'en toté ch'án.

⁴ Kjánchó xitjahya kóchjina sín tí tjen ch'ín Jesús kixin nchónhya chojni síin. La ntá k'ujt'ótjen sín tí chrítaón nchia a ntá k'óxrat'q sín. Na ntá ijnko hno kjuak'ete sín tí kania tjenkáya tí sínníhi a ntá kjuinkajin sín ntoí tí tjen ch'ín Jesús a.

⁵ Tió k'uikon ch'ín Jesús tí nkehe kjuích'e sín ntá ó nohe ch'án kixin chaxín imá tinkáchónki sín tí jehe ch'án. Ntá nixjehe ch'án tí sínníhi ntáche ch'án kixin:

—Xjeenni, ó kjuixín kjuínhan tí jie chonta —mé xikaha ichro ch'án.

⁶ Na ntá iso tí sín maestro tjako tí ley tjejótjaxín sín ntíha na ntá jehó sín mé kjo sín asén sín kixin:

⁷ “¿Nkeuènté xikaha nixja tí ch'ín i ncheyóhe ch'án asén ch'án Dios? Kixin ninkexró xitjahya tsjatsiin ijie kixin jehó Dios mé chónka kjuachaxin tsjatsen ijie chojni”, mé xikaha ikjo sín asén sín.

⁸ Ntá ch'ín Jesús la ó nohe ch'án nkehe tjenkayáxin sín. Ntá ntáchro ch'án kixin:

—¿Nkeuènté kixin xikaha tjenkayáxinrá?

⁹ ¿Nkehe antsí má xrahya chróntátjan ch'án? ¿Á antsí xrahya chróntátjan ch'án kixin ó kjuixín kjuínhan ch'án tí jie yámá ch'án, o á antsí xrahya chróntátjan ch'án kixin chrók'uinkatjen ch'án chrókjuenájín ch'án kaníee ch'án ntá sáchrókjuí ch'án?

¹⁰ Méxra jie tsjácoxian kixin tí Xjeen Dios K'óna Chojni mé ntíhi chjasintajni chónka kjuachaxin tsjakjuínhan ijie chojni —ichro ch'án.

Ntá ntáche ch'án tí ch'ín xitjahya tji kixin:

¹¹ —Jaha tétuanhan t'inkatjen, tjenájian kaníaa na sátsjia ntqo —ichro ch'án.

¹² A ntá tí sínníhi na tuénxín k'uinkatjen ch'án kjuak'exín toté ch'án na kjuenájín ch'án kaníee ch'án na kuámá ch'án k'uaxrjexín ch'án nchia sákjuí ch'án. Na ntá kaín tí sín síin a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kixin:

—K'uikonhyéni tí nkehe i —ichro sín.

Ch'ín Jesús k'uíyehé ch'ín Leví

(Mt. 9.9-13; Lc. 5.27-32)

¹³ A ntá chr'éxin ch'ín Jesús mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án.

¹⁴ Ntá k'uátsínka ch'án k'uikon ch'án tí ch'ín Leví xjeen ch'ín Alfeo tjetjaxín ch'án tjenchekjénki ch'án. Ntá ch'ín Jesús mé k'uíyehé ch'án, ntáchro ch'án kixin:

—Chr'éhé tí janhan —ichro ch'án.

Ntá ch'ín Leví mé tuénxín k'uinkatjen ch'án chr'éhe ch'án tí ch'ín Jesús.

¹⁵ A ntá ch'ín Jesús kjuak'e ch'án ntqo tí ch'ín Leví, la ntá kjuanjón sín nkehe sine ch'án la ko kjaxin k'uejó nchónhya tí sín nchekjénki la ko kjaxin í so chojni chónka jie. Mé kaín tí sín a mé tjejótjaxín sín tjejóneko tí ch'ín Jesús la ko tí sín k'uájiko ch'án, kixin nchónhya chojni chr'éhe sín tí jehe ch'án.

‡ 1:44 Levítico 14.1-32

¹⁶ Na ntá tí sín maestro tjako tí ley la ko tí sín fariseo k'uúkon sín kixin ch'ín Jesús tjejóneko kain tí sín nchekjènkì la ko tí í so sín chóna jje, a ntá ntáche sín tí sín k'uájiko ch'án kixin:
—¿Nkekuènté kixin tí maestro kuèntará neko ch'án la ko t'íkəo ch'án tí sín nchekjènkì la ko tí í so sín chóna jje? —ichro sín.

¹⁷ Na ntá ch'ín Jesús kuínhin ch'án nkehe tí tjo sín a. Ntá nixjehə ch'án tí sín a ntáchro ch'án kixin:

—Tí sín níehya t'ichjánxjenhya sín nkexro sich'e xroən. Náhí. Jehó tí sín níhi mé t'ichjánxjinhin sín nkexro sich'ehe sín xroən. Janhan na k'uinkahya ntihi kixin chrók'uíyaha chojni jína tjejó sín. Náhí. K'uinka kixin ts'íyaha chojni chóna jje —ichro ch'án.

Tjanchankíhi sín tí ch'ín Jesús kixin á chrókjónehya sín tió tsonixjehə sín Dios

(Mt. 9.14-17; Lc. 5.33-39)

¹⁸ Ijnko yaon na mé kain sín tí sín k'uék'ajiko ch'ín Juan Bautista la ko tí sín fariseo a mé kjónehya sín kuenté yaon kixin mé xikaha ts'áyehə sín kjuaxróxin, ichro sín. A ntá kui iso chojni nixjehə sín tí ch'ín Jesús ntáchro sín kixin:

—¿Nkekuènté kixin tí sín k'uék'ajiko sín tí ch'ín Juan la ko tí sín fariseo la nehya sín jje, a ntá tí sín xrikoa la ine sín? —ichro sín.

¹⁹ Ntá kjuátəhe ch'ín Jesús ntáchro ch'án kixin:

—¿Xá chrókjónehya tí chojni tsík'íyehə sín kóchjina ijnko kia tsotəhe chojni tí naxə tjejóko sín tí nkexro tsotəhe? Tí naxə tjen tí nkexro tsotəhe la xitjahya kixin chrókjónehya sín.

²⁰ A ntá itsi ijnko yaon itsi chojni sátsjiko sín tí ch'ín tsíkótəhe, ntá tí yaon la chaxín sinehya sín.

²¹ Ninkexró chrókjuak'eniəhe ijnko ka ó ntaxin it'ə ka nixin kixin ntá chrókjuixəhe tí ka nixin ntá antsí má chrók'uichje tí ka ntaxin a.

²² La ko kjaxin ninkexró chrókuiqja xran vino nixin ijnko tjuaxran ó ntaxin; kixin tí xran vino nixin la chrókótsəche jí tjuaxran ntaxin ntá chrók'uitjəyan tí xran la ko tí tjoə. Méxra tí xran vino nixin chrókuiquia ijnko tjuaxran nixin —mé xikaha ichro ch'ín Jesús.

Tí sín k'uájiko ch'ín Jesús mé ik'uín sín iso neno noatrigo ijnko yaon t'ok'əhe sín

(Mt. 12.1-8; Lc. 6.1-5)

²³ Ijnko yaon t'ok'əhe sín na ch'ín Jesús la ko tí sín k'uájiko ch'án mé k'uátsínka sín ijnko nonte síin noatrigo. Na ntá tí sín k'uájiko ch'án kjuankixin sín ik'uín sín iso noatrigo.

²⁴ Na ntá iso tí sín fariseo kjuanchankíhi sín tí ch'ín Jesús a kixin:

—¿Nkekuènté kixin tí sín xrikoa tjejóch'e sín xra ijje? Na mé kohya kjuachaxin tsonhen xra tí yaon t'ok'əheni —ichro sín.

²⁵ Ntá kjuátəhe ch'án ntáchro ch'án kixin:

—¿Á kjuinchekuáxinyarə jaharə tí xron chrónka nkehe kjuich'e ch'ín David la ko tí sín k'uájiko ch'án tí k'uén sín kjinta?

²⁶ A ntá jehe ch'án k'uixenhen ch'án ntoə Dios tió kjuák'e nchat'á Abiatar k'uetəoan, a ntá kjónə ch'án tí niotja tsíkóyaon kjónté jehó tí sín nchat'á mé k'uéchóna kjuachaxin sine sín la kjaxin chjəhe ch'án tí sín k'uájiko ch'án* —ichro ch'ín Jesús.

²⁷ Kjaxin ntáchro ch'ín Jesús kixin:

—K'óna tí yaon ts'ok'əhe chojni kixin t'ichjánxin sín, la jehya kixin chrókjuikosáyehe tí yaon a.

²⁸ A ntá tí Xjeen Dios K'óna Chojni mé chóna kjuachaxin ts'etəoan nkehe tsonhen tí yaon t'ok'əheni —ichro ch'án.

3

Ijnko chojni tsixámá tja

(Mt. 12.9-14; Lc. 6.6-11)

¹ Ntá ch'ín Jesús k'uixenhen ch'án ijnko nínko Israel inaá. Na mé ntiha tjen ijnko ch'ín tsixámá ijnko tja ch'án.

² Na ntá kóchjina iso chojni tsáyehe sín ch'ín Jesús ts'ikon sín kixin á sinchekitəhe ch'án jína tí ch'ín tsixámá tja tí yaon t'ok'əhe sín kixin mé jína tsjanchia sín jje, ichro sín.

³ Ntá ch'ín Jesús mé ntáche ch'án tí ch'ín tsixámá tja a kixin:

—T'inkatjen, tjak'e jnkosiné ntihi —ichro ch'án.

⁴ A ntá kjuanchankíhi ch'ín Jesús tí sín síin ntiha kixin:

—¿Nkehe síin kjuachaxin tsonhen tí yaon t'ok'əheni? ¿Á chrókjuich'eni tí jína ní ə á chrókjuich'eni tí jínahya? ¿Á chrókjuinchekitəheni chojni jína ní ə á chrók'óyánni chojni? —ichro ch'án.

A ntá jehe sín la tánikóá sín.

* 2:26 1 Samuel 21.1-6; Levítico 24.5-9

⁵ Na ntá ch'ín Jesús la nínkaon ch'án komá ch'án tí jehe sín la ko t'ává ch'án kixin tjinkakonhya sín tsikonóhe sín chojni. Na ntá k'uetuēnhen ch'án tí ch'ín a kixin:

—Tjéntoá tjá —ichro ch'án.

A ntá kjuéntoá ch'án tja ch'án la ó kuítóhe tja ch'án jína.

⁶ Na ntá tí sín fariseo a k'uaxrjexin sín nínko sákjuí sín k'uíto sín tí sín kuēnte ch'ín Herodes ntá kjuenkayáxinko kichó sín kixin nkexrí chrók'óyán sín tí ch'ín Jesús.

Nchónhya chojni sín chrínta ntayaon

⁷ Ntá ch'ín Jesús la ko tí sín k'uájiko ch'án sákjuí sín chrínta ntayaon a. A ntá nchónhya chojni kjuíjchréhe sín tsíkixín sín nó estado Galilea la ko kjaxin tsíkixín sín nó estado Judea

⁸ la ko chjasin Jerusalén la ko estado Idumea la ko ikjé sín kuixín sín nó tóhe ntarío Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsikinhin sín kixin nkexrí tí kjuaxroan jié kjuasin ch'ín Jesús ntá kuichréhe sín ch'án kixin chrók'uikon sín tíha kjaxin.

⁹ Ntá k'uetuēnhen ch'án tí sín k'uájiko ch'án a kixin ntaó chrókjuak'echonhen sín ijnko ntabárcó. A ntá tí imá chrók'uixitja sín ch'án ntá chrók'uixenhen ch'án tí ntabárcó, a ntá ntiha chrókjuak'e ch'án tsochrónka ch'án.

¹⁰ Kixin itsjé chojni tsíkjinchekitóhe ch'án jína, na ntá kaín xín tí sín níhi k'uíxitja sín ch'án kixin tjinkaon sín chrókuákóxín sín ch'án.

¹¹ Kjaxin tí sín chóna nchakuen tí jínahya na mé tió k'uikon sín tí ch'ín Jesús ntá k'uéjoxin sín toh'in sín nkayakon ch'án. Ntá k'óyako tí nchakuen tí jínahya a ntá chro kixin:

—Jaha mé tí Xjeen Dios.

¹² A ntá ch'ín Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

Ch'ín Jesús kjueyá ch'án teyó sín ts'ajiko ch'án

(Mt. 10.1-4; Lc. 6.12-16)

¹³ A ntá chr'éxin chr'in ch'ín Jesús ijnko jna, a ntá ntiha k'uíyehé ch'án tí sín tjinkaon ch'án chrók'uajiko ch'án ntá kóchjinehe sín ch'án.

¹⁴ Ntá kjueyá ch'án teyó tí sín ts'ajiko ch'án kixin ts'etuēnhen ch'án sín sátsji sín tsjako sín tí tan jína.

¹⁵ Kjuanjón ch'án kjuachaxin sinchekitóhe sín chojni níhi jína la ko tsakitsje sín nchakuen tí jínahya chóna chojni.

¹⁶ A ntá tí sín í mé tí teyó sín tsíkjeýá ch'án mé it'in sín xíkíhi: Simón na mé kjuínchek'in ch'án Pedro;

¹⁷ la ko Jacobo la ko tí kicho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín kixin Xjeen Sítjonta.

¹⁸ La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko í jnko Simón tíhi mé kuēnte tí sín cananista,

¹⁹ la ko Judas Iscariote, mé kjuínchekji tí ch'ín Jesús chr'éxin.

Ntá chro sín kixin ch'ín Jesús chóna kjuachaxin kuēnte tí jínahya

(Mt. 12.22-32; Lc. 11.14-23; 12.10)

Na ntá chr'éxin ch'ín Jesús la ko tí sín k'uájiko ch'án k'uixenhen sín ijnko nchia.

²⁰ A ntá inaá kójnko tsé nchónhya chojni, a ntá xitjahya sine sín.

²¹ Ntá kónohe tí sín naxá kjéhya ch'ín Jesús ntá ikuí sín sátsjiko sín ch'án kixin ntá chro sín kixin ó tsík'ixikján ch'án.

²² Kjaxin tí sín tjako tí ley kuixín sín Jerusalén, ntá chro sín kixin:

—Tí ch'ín í chóna ch'án tí ch'ín Beelzebú, mé ch'ín Tsochren, mé tí nkexro t'etuēnhen kaín tí nchakuen tí jínahya ntá xíkaha tjacha ch'án takitsje ch'án nchakuen tí jínahya a —ichro sín.

²³ Ntá ch'ín Jesús k'uíyehé ch'án tí sín ntá kjuíncheyóexin ch'án ntá chro ch'án kixin:

—¿Nkexrí kixin jnkokón ch'ín Tsochren chrókuakitsje asén?

²⁴ A ntá tí sín t'etoan ijnko nación tjanjonko kichó la tsjachahya ts'etoan.

²⁵ La ko kjaxin tí sín jnkokóá ntóe jnkokóáhya tjenkayáxin sín ntá xitjahya ts'ejóko kichó sín.

²⁶ A ntá tí chaxín ch'ín Tsochren jnkokónhya tjenkayáxin tjanjonko kichó la ntá ts'itjáyan kjuachaxin kuēnte.

²⁷ Ninkexró tsjacha ts'ixenhen ntóe ijnko chojni jiēhe kixin ts'axrjehe tí nkehe chóna ch'án. Náhí. T'ichjánxin saxín sinchenteto ch'án tí ch'ín jiēhe kixin jína tseéhe ch'án nkehe chóna tí ch'ín a.

²⁸ Ijnko nkehe chaxín tsotjonkará kixin tió tsoxraxinkaon ijnko chojni tí jiē chóna la ko tsochronóhehe Dios la ntá tsjakjiinhin ch'án kaín tí jiē la ko kaín tí nkehe jínahya tsintá chro sín.

²⁹ A ntá tí nkexro ts'ántaxínhin tí Nchakuen Dios na mé xitjahya tsjin tí jie na mé jnkochrínin tsochónta sín tí jie a —ichro ch'án.

³⁰ Mé xikaha ichro ch'án kixin tí sín a tsintáchro sín kixin ijnko nchakuen tí jínahya mé chóna tí jehe ch'án.

Tí iné la ko kichó ch'in Jesús

(Mt. 12.46-50; Lc. 8.19-21)

³¹ A ntá kui iné ch'in Jesús la ko kichó ch'án tjejó sín ntója ó na ntá k'uetuēnhen sín ijnko chojni tsjik'íyehē ch'án.

³² A ntá tí sín tjejótxajin tí tjen ch'in Jesús ntiha chénka sín ch'án kixin:

—Iná la ko kichuá tjejó sín ntója xritjeyá sín tí jaha. —ichro sín.

³³ Ntá ntáchro ch'án kixin:

—¿Xá nkexro tí nana la ko nkexro tí kichiná? —ichro ch'án.

³⁴ Ntá komá ch'án tí chojni tjejótxajin tí tjen ch'án ntá ntáchro ch'án kixin:

—Jahará mé nana la ko kichiná.

³⁵ Kaín tí sín nchexiteyá tí nkehe tjinkaon Dios na mé tí sín a mé kichiná la ko nana —ichro ch'án.

4

Kjuíncheyóexin ch'án éxi ijnko chojni t'enka nonte

(Mt. 13.1-9; Lc. 8.4-8)

¹ Ch'in Jesús mé kjuankixin ch'án kjuakoxin ch'án chrínta ntayaon inaá. A ntá ntiha mé kójnkotsé nchónhya chojni tí tjen ch'án. Ntá ijnko ntabárco tjenkátoón ntá k'uit'ótjen ch'án, a ntá ntaha kjuák'e ch'án kjuakoxin ch'án. Ntá kaín tí sín tsikójnkotsé mé kuítóhe sín chrínta ntayaon k'uejókinhin sín.

² Nchónhya nkehe kjuako ch'án kjuíncheyóexin ch'án. Ntá ntáchro ch'án kixin:

³ —Tinhínrá tíhi: Ijnko chojni sákjuik'enka nontēe.

⁴ Mé xikaha sákjuik'enka ch'án iso tí noatrigó a. Ntá iso noa la tsik'ánotjen ntja ntá kui koxroxé k'uínka va tí noa.

⁵ A ntá iso noa na mé k'uitji chrík'á xro tí kohya itsjé nche ntá tjoka k'uayan kixin tjínhya chóna nche.

⁶ A ntá tió kjuíton yaon la ntá tí ka la chján; la ko chónahya nuèe a ntá xamá.

⁷ A ntá í so noa kjuítsínkak'á tí siín kach'j la ntá tí kach'j k'uánkí la ntá tí noa í k'ónahya kixin sítja tí kach'j.

⁸ A ntá iso tí noa k'uitji nche jina la ntá k'uayan la ko k'uánkí ntēto la ko k'óna jina. A ntá ijnko noa la mé k'óna treinta neno noa. A ntá í jnko la mé k'óna sesenta neno noa, a ntá í jnko la k'óna ijnko ciento neno noa —ichro ch'án.

⁹ Ntá ntáchro ch'án kixin:

—Tí nkexro tjinkaon chrókuinhin la chrókuinhin —ichro ch'án.

Ch'in Jesús chronkaxín nkexrí t'axrjexín tí nkehe ntáchro ch'án

(Mt. 13.10-17; Lc. 8.9-10)

¹⁰ A ntá chr'éxin, tió kuítóhe ch'in Jesús jehó ch'án, a ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án.

¹¹ Ntá ntáchro ch'án kixin:

—A ntá jahará la Dios mé sintonohará tí nkehe tienxínhya chojni kuēnte tí kjuachaxin kuēnte Dios, a ntá tí sín titekakonhya la ó kjuíntayóaxuán kaín nkehe kuínhin sín.

¹² Kixin kjónté ts'ikon sín la éxi k'uíkonhya sín, la ko kjónté tsinhin sín la tsienxínhya sín kixin ntá chrók'uixitoxínhya tí tjenkayáxin sín a la ko chrókjuínhya tí ijje sín* —ichro ch'án.

Ch'in Jesús chrónkaxín nkexrí t'axrjexín tí nkexro sákjuik'enka

(Mt. 13.18-23; Lc. 8.11-15)

¹³ Ntá ntáche ch'án sín kixin:

—¿Á kiéxinhayará jahará nkexrí t'axrjexín tí nkehe kjuíntayóaxian ní? ¿A ntá nkexrí chrókiéxínrá tí í so nkehe naxá sintayóaxian?

¹⁴ A ntá tí nkexro sákjuik'enka tí tje a mé yóhe ijnko nkexro sákjuikjako itén Dios.

¹⁵ A ntá iso chojni la éxi tí tje kjuítsínka ntja; kixin kuínhin sín itén Dios, ntá chr'éxin ó kui ch'in Tsochren kjuínchek'itjāyan ch'án tí tan jina kuínhin sín.

¹⁶ A ntá í so chojni la éxi yóhe tí tje kjuítsínkak'á xro: mé kuínhin sín itén Dios ntá tjoka kórxjínhin sín kuítekaon sín.

* 4:12 Isaías 6.9-10

¹⁷ Kjánchó nínkahya chóna nuè, a ntá séhya kuítóhe; a ntá itsi tí kjuaxróxinhya tsonhen sín, o tsochónkíhi sín chojni kixin tí itén Dios kuítekaon sín ntá tsítóhe sín tí tinkáchónki sín Dios.

¹⁸ A ntá í so chojni la éxi yóhe tí tje k'uínka chrík'á kach'j na mé kuínhin sín itén Dios

¹⁹ Kjánchó tóxakonhen sín tí nkehe síin chjasintajni la ko tí nkehe tjeje tóxrjínhin sín la ko tjinkaon sín tsochóna sín kaín xín nkehe. Kaín tíha mé t'inkákonhen tí itén Dios kuínhin sín a, la tí chojni xíkaha la xitjahya sich'ehe sín xra Dios.

²⁰ A ntá í so chojni kuínhin tí itén Dios na kuínkáchónki sín la ntá xíkaha jína ch'ehe sín Dios xra. La iso sín la éxi yóhe tí tje k'uínka tí nonte jína k'óna treinta neno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xíkaha ichro ch'ín Jesús.

*Ch'ín Jesús mé kjuíncheyóexin éxi ijnko xrohi tjeche
(Lc. 8.16-18)*

²¹ Kjaxin ntáchro ch'ín Jesús kixin:

—¿Á chrókuikaonni xrohi tjeche chrókjuak'emá chrínki ntacajón o chrínki cama? Kjá náhi. Tí xrohi la noi chrókjuak'e ts'inkaséyanxín.

²² Mé xíkaha kaín tí nkehe tjejóma jie tsonoxín chr'éxin la ko kaín tí nkehe ninkexo noehya jie la tsonoxín chr'éxin.

²³ A ntá tí nkexro tjinkaon chrókuinhin la chrókuinhin tíhi —ichro ch'án.

²⁴ Kjaxin ntáchro ch'ín Jesús kixin:

—Chrókuenkayáxinrá jína tí nkehe tjejótinhinrá. Tí nkehe tjáchoayará jahará la Dios la kjaxin tíha tsjáchoayá ch'án tí nkehe ts'ayéhérá jahará, a ntá antsí má ts'ayéhérá tí jahará tjejontinhinrá.

²⁵ A ntá tí nkexro chóna nkehe la antsí má ts'áyéhe sín. A ntá tí nkexro chónahya la kjónté tí ntsí chóna la ts'axrjehe —ichro ch'án.

Ch'ín Jesús mé kjuíncheyóexin ch'án éxi ijnko tje ts'ayan ts'ánkí

²⁶ Kjaxin ntáchro ch'ín Jesús kixin:

—Tí kjuachaxin t'etoan Dios tóyóhe ijnko chojni sátsjik'enka nonte.

²⁷ Ntá sákjuík'ajua ch'án tí tie la ko k'uaya ch'án tí nchítjen. A ntá xíkaho k'uátsínka iso yaon la ko iso tie, a ntá tí tje la k'uayan la k'uánkí. A ntá tí nkexro k'uénká la noehya ch'án nkexrí kónhen tíha.

²⁸ A ntá tí nche mé kjuích'e xra jehó. Senó k'uayan tí chaon tí ka, a ntá kjuínta, a ntá chr'éxin icha tí noa tsjinjin;

²⁹ a ntá tió tsícha tí noa, a ntá tsakjinjin sín tí noa kixin ó kjuixraká tí yaon tsojtá sín.

*Ch'ín Jesús kjuíncheyóexin ch'án éxi ijnko tje it'in mostaza
(Mt. 13.31-32; Lc. 13.18-19)*

³⁰ Kjaxin ntáchro ch'ín Jesús kixin:

—¿Nkehe chrókóyóhe tí kjuachaxin t'etoan Dios, nkehe chrókóyóexin tíha?

³¹ Mé éxi yóhe tí tje it'in mostaza tsík'ínka nonte. Tíha mé ijnko tje imá ntsí, a ntá tí í so tje síin chjasintajni la kénhyó.

³² A ntá jnkonaá tsík'ínka tí tje la tsík'ayan tsík'ánkí imá ihyé, a ntá tí í so nta la kánhyó. A ntá kjaxin tí chaon tí nta tsík'ánkí imá ihyé, a ntá kjónté koxroxé xritjaka la jína ts'ók'éhe va chrínki tí ts'van chaon tí nta.

*Nkehe tí xra kjuích'e tí nkehe kjuíncheyóexin ch'ín Jesús
(Mt. 13.34-35)*

³³ Mé xíkaha ch'ín Jesús kjuakóhe ch'án tí jehe sín, kjuíncheyóexin ch'án nchónhya nkehe éxi tí nkehe a kixin chrókjuacha chrókienxín sín tíha.

³⁴ Kaínxín nkehe kjuakóhe ch'án tí jehe sín la kjuíncheyóexin ch'án. A ntá jehó tí sín k'uájiko ch'án la chrónka ch'án nkexrí t'axrjéxin kaín tí nkehe kjuíncheyóexin ch'án.

*Ch'ín Jesús k'uetuenhen ch'án tí xrínto la ko tí ntá síchrica kixin ts'ixita
(Mt. 8.23-27; Lc. 8.22-25)*

³⁵ A ntá tí yaon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntayaon —ichro ch'án.

³⁶ Ntá kuítóhe sín kaín tí chojni a ntá sákjuíko sín tí ch'ín Jesús naxa tjenkáya ch'án tí ntabárcó la ko kjaxin í so ntabárcó sákjuí koí.

³⁷ Ntá xrinahya tjian chjéhe xrínto la ntá síchrica ntá t'ixenhen tí ntabárcó, ó mero tsókaón ntá tí ntabárcó.

³⁸ A ntá ch'ín Jesús na mé tjejua ch'án tí tjar'í nóton tí tjejó sín nkaxenhen tí ntabárcó a tjejkón ch'án ijnko ka. Na ntá kjuínchekjaya sín ch'án ntáchro sín kixin:

—¡Maestro! ¿Á ntqsán kixin ts'itjáyanni, ts'aniánkíni ntą ní? —ichro sín.

³⁹ A ntą ch'ín Jesús k'uàya ch'án, k'uetuēnhen ch'án tí xrįnto la ko tí ntą kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntą tí xrįnto la ko tí ntą k'uixratá.

⁴⁰ Ntą kjuanchankíhi ch'án tí sín k'uájiko ch'án ntáchro ch'án kixin:

—¿Nkeuēnté kixin imá chrakonrá? ¿Á naxą tinkachónkihyará Dios? —ichro ch'án.

⁴¹ Ntą imá chrakon sín ntą kjo sín kichó sín kixin:

—¿Xá nkexro tíhi? Kjóté xrįnto la ko ntayaon la mé kjuínchexiteyéhe ch'án —ichro sín.

5

Ijnko chojni chóna nchónhya nchakuen tí jínahya nonte Gadara

(Mt. 8.28-34; Lc. 8.26-39)

¹ Ntą tió k'uátöyē sín tí ntayaon, a ntą kjuíji sín tí nonte Gadara.

² Ntą k'uinkajįnxin ch'ín Jesús tí ntabáro a. Ntą xrinahya xeta ch'án ijnko ch'ín kuixin nó tsikjįxravá chojni mé chóna ch'án ijnko nchakuen tí jínahya.

³ Tí ch'ín a mé kjuák'e ch'án tí tsikjįxravá chojni. Ninkexró tjachahya sinchenteto ch'án kjóté cadena tjachahya.

⁴ Nchónhya veces kjuínchentetoxin sín ch'án cadena toté ch'án la ko itja ch'án, la kjóté kóchrįton ch'án kjuínchekuen ch'án tí cadena. Kohya ninkexro tjacha ts'etuenhen tí jehe ch'án.

⁵ K'uék'aji ch'án nchakotjin la ko tie t'iyato ch'án nó jną la ko tí tsikjįxravá chojni la ko chjéhe asén ch'án xro.

⁶ Na ntą k'uikon ch'án kixin kui ch'ín Jesús kjóté ikjín la kuinká ch'án kjuíji ch'án kjuák'exin toch'ín ch'án nkayakon ch'ín Jesús a

⁷ k'óyako ch'án ntáchro ch'án kixin:

—¿Nkeuēnté tjiaté jaha tí jeheni, jaha Jesús Xjeen Dios tjen nkaya nkajni? Dios ncheno-heni kixin xrjanóaha nchekjasótehyani —ichro ch'án.

⁸ Mé xikaha ichro ch'án kixin tsintáchro ch'ín Jesús kixin:

—Jaha nchakuen tí jínahya, tįtohé tí ch'ín i —ichro ch'án.

⁹ Ntą ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntą kjuátéhe ch'án ntáchro ch'án kixin:

—Legión mé it'inni kixin nchónhyani —ichro ch'án.

¹⁰ Ntą imá chrónóēhe ch'án tí ch'ín Jesús kixin tsochr'ánhya ch'án ókjé tí nchakuen tí jínahya.

¹¹ Na ntą siín nchónhya cochíno xrine va chjinaxón tí jną ntiha.

¹² A ntą chrónoą tí nchakuen tí jínahya ntáchro kixin:

—Tétuēnhenni sátsjini tí siín tí cochíno, tįtohé ts'ixenhenni tí jehe va —ichro tí nchakuen tí jínahya a.

¹³ Ntą ch'ín Jesús mé kjuanjon ch'án kjuachaxin. Ntą kaín xín tí nchakuen tí jínahya a mé k'uaxrjexín tí ch'ín a sákjuj kjuik'ixenhen tí cochíno a. Na ntą kaín xín tí ko a mé chjina iyó mİL va siín va xrine va. Na mé kaín xín va k'uinkajįnxin va ntiha kjuitsínkayá va tsąka ntą kjuitsínkankí va ntayaon ntą kjuínhin va ntą.

¹⁴ Na ntą tí chojni t'ayakonhen tí cochíno a na mé kuinká sín kixin chrakon sín na ntą sákjuj chrónka sín chjasén sín la ko nontēe chojni. Na ntą itsjé chojni mé kuitsjehe sín nkehe tí tsíkónhen ntiha.

¹⁵ Ntą kjuíji sín tí tjen ch'ín Jesús a na k'uikon sín kixin itjen tí ch'ín k'uéchénta tí nchónhya nchakuen tí jínahya senó la ó jína tjen ch'án tjetjįxin ch'án tjenkaya ch'án iké ch'án, na ntą chrakon sín.

¹⁶ A ntą tí sín tsík'ikon mé chrónka sín nkexrí k'uék'aji tí ch'ín k'uéchénta tí nchakuen tí jínahya la ko nkexrí kónhen tí cochíno a.

¹⁷ Ntą kjuankixin sín chrónóēhe sín tí ch'ín Jesús a kixin sáchrókjuixin ch'án ntiha.

¹⁸ A ntą ó ts'it'ótjen ch'ín Jesús tí ntabáro na ntą tí ch'ín k'uéchénta nchakuen tí jínahya na mé chrónoą ch'án kixin kjaxin ch'án sáchrókjuiko sín ch'án, ichro ch'án.

¹⁹ Ntą ch'ín Jesús kjuanjonhya ch'án kjuachaxin sátsjiko sín ch'án. Náhí. K'uetoan ch'án kixin:

—Sátjia ntąa tįchenka tí sín naxą kjéhya tí jaha kixin nkexrí kaín tí kjuaxroan jié kjuasin Dios kjuínchekitoha jína kuikonóaha ch'án tí jaha —ichro ch'án.

²⁰ Na ntá tí ch'ín a sákjuí ch'án kjuankíxin chrónka ch'án kaín tí chjasin kuènte Decápolis kíxin nkexrí kaín tí nkehe kjuích'e ch'ín Jesús kjuínchekitohe ch'án jína. A ntá kaín tí sín kuínhin na chrakon sín.

Tí xjeen ch'ín Jairo la ko tí tjan kuákóxin íké ch'ín Jesús
(Mt. 9.18-26; Lc. 8.40-56)

²¹ Ntá tió xíkjankao ch'ín Jesús tí ntábárcɔ tóhe tí ntayaon inaá ntá kóchjina nchónhya chojni ntá ntahó chrínta ntá kuitohe ch'án inaá.

²² Na ntá ikui ijnko ch'ín t'etɔan kuènte njnko mé it'in ch'án Jairo. A ntá tió k'uikon ch'án kíxin itjen ch'ín Jesús ntá kjuák'exín toch'in ch'án chrínkí toté ch'ín Jesús a

²³ imá chrónóhehe ch'án kíxin:

—Tí ijnko xjanna chjin ó tjet'en xjan. Xrjanóaha chrókjuini chrókjuak'étja itjá chrítaón kja xjan ntá chrókuitohe xjan jína —ichro ch'án.

²⁴ Ntá ch'ín Jesús sákjuíko tí ch'ín a. Na nchónhya chojni chréhe sín tinkák'ixitja sín ch'án inaá.

²⁵ A ntá kjaxin tjenkákjan sín ijnko chojni chjin níhi tjan, ó chóntha teyó nánó sítji tjan njñ.

²⁶ Imá tjote tjan kíxin nchónhya chojni kjuanjon xroan kónhen tjan na ó kjuixin kjuèhe tjan kaín sín nkehe k'uéchóntha tjan. Ó jehí titoheya tjan jína la íchá ntsí tinkákótao tjan.

²⁷ A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxin tjan tí ké ch'án,

²⁸ ntáchro tjan kíxin kjónté íké ch'án ó chrókuakóxin tjan na ó tíhó mé chrókuitohe tjan jína, ichro tjan.

²⁹ Ntá tuénxín tí njñ na mé ó kjuixié tjan la ko kónohe tjan kíxin ó kjuixin kuitohe tjan jína tí chín k'uéchóntha tjan.

³⁰ Ntá ch'ín Jesús na ó kónohe ch'án kíxin kjuachaxién ch'án mé kuitoexín ijnko chojni jína ntá kuinkátjía ch'án kjuanchankíhi ch'án tí chojni síin a kíxin:

—¿Nkexro kuákóxin tí kaná? —ichro ch'án.

³¹ Ntá kjuátēhe tí sín k'ujajiko ch'án a ntáchro sín kíxin:

—Ó noha kíxin nchónhya chojni sítja, ¿ntá nkekuènté kíxin naxa tjanchankiá kíxin nkexro tí kuákóxian? —ichro sín.

³² Ntá kuinkátjía ch'án tsjehe ch'án nkuixín kíxin tsonohe ch'án nkexro tí kuákóxin tí ké ch'án.

³³ Ntá tí tjan a na mé chrakon tjan síxránkɔ tjan ó nohe tjan kíxin ó kuitohe tjan jína ntá xrakoa tjan kjuák'exín toch'in tjan nkayakon ch'ín Jesús ntá ntoá chrónka tjan kaín nkehe kónhen tjan.

³⁴ Ntá ntáchro ch'ín Jesús kíxin:

—Xjeenni, kaín asán kuinkachónkia tí janhan ntá kuitoaha jína. Ijie la kjuaxróxin sátsjia ntɔa la ó kuitoaha jína a —ichro ch'án.

³⁵ Na ntá naxa tjenixja ch'án ntá ó kui chojni kujxin sín ntɔe tí ch'ín t'etɔan tí njnko. Ntá chénka sín ch'án kíxin:

—Xjaan na ó kjuixin k'uén. ¿Nkekuènté naxa chjehé xɔa tí Maestro a? —ichro sín.

³⁶ Ntá ch'ín Jesús na ántosén ch'án tí chrónka sín ntá nixjehe ch'án tí ch'in t'etɔan tí njnko ntáchro ch'án kíxin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjonhya ch'án kjuachaxin kíxin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kichó ch'ín Jacobo, sátsji sín.

³⁸ Na ntá tió kjuíji sín tí ntɔe tí ch'ín t'etɔan tí njnko na k'uikon sín kíxin imá sítjité sín tsjankámɔ sín tí xjan a.

³⁹ Ntá k'uixenhen ch'ín Jesús nchia kjuanchankí ch'án kíxin:

—¿Nkekuènté ánta tjasitérá tsjankámárá tí xjan a? Tí xjan na tsík'enhya xjan na tjejuja xjan —ichro ch'án.

⁴⁰ A ntá kjuanoá sín ch'án. Ntá k'uetɔan ch'án kíxin kaín sín sátsji sín ntója. Ntá kjuíko ch'án tí it'é la ko tí iné xjan la ko tí iy'á sín xriko ch'án ntá k'uixenko sín ch'án tí tjen tí xjan a.

⁴¹ Itsé ch'án tja xjan ntá nkívee xjan mé nixjeexín ch'án ntáchro ch'án kíxin:

—Talita, cumi —mé t'axrxjén kíxin: Lonchí, tétuanhan kíxin t'áya.

⁴² A ntá tí xjan a ó chóntha tjan teyó nánó na mé tuénxín k'uínkatjen tjan ó jína tji tjan. Ntá kaín tí chojni síin ntiha la chrakon sín k'uikon sín xíkaha.

⁴³ Ntá fuerte k'uetɔan ch'ín Jesús kíxin chróchenkahya sín ninkexró. La kjaxin k'uetɔan ch'án kíxin tsjanjon sín nkehe sine tjan.

6

Ch'in Jesús kjuák'e ch'án chjasin Nazaret
(Mt. 13.53-58; Lc. 4.16-30)

¹ A ntá chr'éxin k'uaxrjéxin ch'án chjasin ntiha. Ntá jehe ch'án la ko tí sín k'uájiko ch'án na mé sákjuí sín Nazaret tí chjasin tsík'ánkíxin ch'án.

² Na ntá tío kui tí yagon t'ok'éhe sín ntá kjuankíxin ch'án kjuakoxin ch'án tí nínko ntiha. Na ntá nchónhya chojni kuínhin sín ntá chrakon sín ntáchro sín kíxin:

—¿Nketí tsíxrakqhe tí ch'ín í kain tíhí? ¿Nketí kuixín tí kjuaxrexinkaon chóna ch'án la ko tí kjuaxroan tjasin ch'án?

³ ¿Á jehya ch'án tí ch'ín ch'éna nta na mé xjeen tí tjan María, la tí kíchó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿A kjaxinhya ntihi tjejókoni tí kíchó ch'án chjin? —ichro sín.

Méxra tahya sín kuentá nkerí ch'e ch'án.

⁴ Na ntá ntáchro ch'ín Jesús kíxin:

—Kain chojni tjikosáyehe sín ijnko nkexro chrónka iten Dios. Ntá tí chjasén ch'án la ko kain tí sín kjéhya ch'án la ko tí sín ntqe ch'án na mé tjikosáyeheya sín ch'án —ichro ch'án.

⁵ Méxra ninkehó kjuaxroan xitjahya kjuasin ch'án ntiha, la jehó kjuak'etja tja ch'án chritaón ikja iso chojni níhi kjuínchekitohe ch'án sín jína.

⁶ Ntá chrakon ch'án kíxin xikaha kuítekakuenhya sín ch'án. Na ntá k'uáji ch'án tí chjasin ntsíntí chjinaxón ntiha kjuako ch'án.

Ch'in Jesús mé ichr'án tí teyó sín kíxin sátsji sín tsjikjako sín itén Dios
(Mt. 10.5-15; Lc. 9.1-6)

⁷ Na ntá k'uíyehé ch'ín Jesús tí teyó sín k'uajiko ch'án a. Ntá kjuankíxin k'uetuñhen ch'án kíxin yóyó yóyó sín sátsji sín la ko kjaxin kjuanjon ch'án kjuachaxin kíxin tsakitsje sín nchakuen tí jínahya chóna chojni.

⁸ La ko k'uetqan ch'án kíxin ninkehó tsjikohya sín kuente ntja. Jehó tí nta tjixín sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon.

⁹ Na ko tokaté ó tsjanka sín la ko tsjiko sín jehó tí ka tjejóya sín ó.

¹⁰ Kjaxin ntáchro ch'án kíxin:

—A ntá tí ts'ixenhénra ijnko nchia a ntá ntaha tsjanjon sín kjuachaxin na ntahó chókuitqhará. A ntá tsjixinjian tí xra ntá sátsjixinrá ntiha.

¹¹ Na ntá tí tsjasánra ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinhin sín tí nkehe chrókjuákehérá sín na ntá t'axrjéxinrá tí chjasin a ntá ts'oxénjinrá tí nche chóna totárá kíxin xikaha tsjákoxinrá kíxin ntoáhya kjuíche tí jehe sín. A ntá chaxín ntáxrjan kíxin tí yagon tsitqexín ijje chojni ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuinkákjakqhe sín tí chojni a kíxin mé chrókjuítóxinhin sín ntje sín.

¹³ La ko kjaxin kuakitsje sín itsjé tí nchakuen tí jínahya chóna chojni. Na ko aceite mé kuíkite sín itsjé chojni níhi a la ntá kuítqhe sín jína.

Ik'uen ch'ín Juan Bautista
(Mt. 14.1-12; Lc. 9.7-9)

¹⁴ Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kíxin:

—Kjá tí ch'ín Juan Bautista mé ó tsíxechón ch'án inaá kíxin xikaha tí kjuachaxin chóna tí ch'ín a —ichro ch'ín Herodes a.

¹⁵ A ntá iso sín ntáchro sín kíxin:

—Kjá ch'ín Elías k'uéchrónka itén Dios —ichro sín.

A ntá í so sín mé ntáchro sín kíxin:

—Kjá ijnko nkexro yóhe tí sín k'uékjako itén Dios ósé —ichro sín.

¹⁶ Ntá kuínhin ch'ín Herodes tíha ntá ntáchro ch'án kíxin:

—Kjá ó jehe tí ch'ín Juan tí kuétoan chrínjin kja ch'án, mé ó tsíxechón ch'án jie —ichro ch'án.

¹⁷ Méxra tí ch'ín Herodes mé tsík'etoan ch'án kíxin tsontetoxín tí ch'ín Juan cadena tsjak'echjina ch'án kíxin xikaha tsíkanchia tí tjan Herodías. A ntá tí tjan Herodías k'uéchjién tí ch'ín Felipe. A ntá tí savé ch'án Herodes mé kuákja tí tjan a kíxin ts'óna ichjién ch'án.

¹⁸ A ntá tí ch'ín Juan tsíntáche ch'án tí ch'ín Herodes kíxin:

—Kohya kjuachaxin tsochonta tí ichjién tí kichuá —ichro ch'án.

¹⁹ Mé xikaha tí tjan Herodías mé imá kónínkakonhen tjan tí ch'ín Juan ntá chrók'óyán tjan ch'án, kjánchó xitjahya

²⁰ Kíxin tí ch'ín Herodes mé chrakonhen ch'án tí ch'ín Juan kíxin ó nohe ch'án kíxin tí ch'ín a mé ijnko nkexro jina la ko tjóá asén la méxra kuitoehya ch'án kíxin jehe tjan chrók'óyán tjan ch'án. A ntá kénhyó kienxín ch'án la kjónté kóxrjínhin ch'án tí nkehe kuínhin ch'án kjuako ch'ín Juan.

²¹ A ntá tí tjan Herodías mé kjuacha tjan tí yaon kia tsíkjitoxinhin nánó tí ch'ín Herodes a kíxin tsík'iyehé ch'án tí síxreé la ko tí sín k'uętuęnhen tí sín soldado la ko tí sín t'ętoan estado Galilea kíxin itsi sín ntęe ch'án kíxin síin kia.

²² A ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjínhin ch'ín Herodes la ko kaín tí sín tjejóneko ch'án ntiha. Na ntá tí ch'ín rey ntáche ch'án tí tjan tjarisoá a kíxin:

—Tjanchana tí nkehe tjinkávan na tsotjahá —ichro ch'án.

²³ Ntá kjuínchenohe ch'án Dios ntáchro ch'án kíxin tsjanjon ch'án tí nkehe tsjanchia tjan kjónté jnkosiné tí chjasin t'ętoan ch'án.

²⁴ Ntá jehe tjan na mé kuínhin kaín tí sín sákjuí tjan chénka tjan iné tjan kíxin tsintáchro ch'ín Herodes kíxin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kíxin:

—¿Nkehe tí chrókjuanchiani? —ichro tjan.

Ntá tí iné tjan mé ntáchro kíxin:

—Ijie la itjia tjanchia tí kja tí ch'ín Juan Bautista, ichrua —ichro tjan.

²⁵ A ntá tí tjarisoá ikjan tjan tjoka k'uixenhen tjan tí tjen tí ch'ín rey, ntá ntáchro tjan kíxin: —A ntá ijie tjinkaonni ijnko plato tsjak'enkáyá ikja ch'ín Juan Bautista tsochjehéni —ichro tjan.

²⁶ Na ntá tí ch'ín rey la mé imá k'uává ch'án kíxin xikaha kjuanchia tjan kjánchó tsíkjinchenohe ch'án Dios la ko tsíkinhin kaín tí sín tsík'iyehé ch'án, la ntá xitjahya tsontáchro ch'án “Náhi” tí nkehe kjuanchia tjan.

²⁷ Na ntá tuénxín k'uętuęnhen ch'án ijnko ch'ín soldado kíxin tsjikao ch'án tí kja ch'ín Juan a.

²⁸ Ntá tí ch'ín soldado mé sákjuí ntęechiso, ntá kóchrínjin ch'án ikja tí ch'ín Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuikénhen tjan iné tjan.

²⁹ Na ntá kuínhin kaín tí sín k'uék'ajiko ch'ín Juan kíxin xikaha tsíkónhen. Na ntá sákjuikakja sín tí cuęrpoę ch'án ntá kjuikao sín ntá sákjuikjává sín.

*Ch'ín Jesús mé kjuanjon nkehe kjóne in'ó mil chojni
(Mt. 14.13-21; Lc. 9.10-17; Jn. 6.1-14)*

³⁰ A ntá chr'éxin tí sín k'uájiko ch'ín Jesús a na mé ó kjan sín tí tjen ch'án inaá, chrónka sín nkexrí tí xra kjuich'e sín na ko nkexrí kjuako sín.

³¹ A ntá ntáchro ch'ín Jesús kíxin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntáchro ch'án kíxin sásitji la ko síti nchónhya chojni na ntá xrankahya ts'ejó sín sine sín.

³² Na ntá ch'ín Jesús la ko tí sín k'uájiko ch'án jehó sín k'uit'ótjen sín ijnko ntabárco sákjuí sín ijnko nonte jehó tjen.

³³ Na ntá itsjé chojni k'uikon sín kíxin sákjuí sín la ko kjuátsoan sín kíxin ch'ín Jesús. Ntá xrákuaxín sín chjasén sín kuinká sín na ntá senó kjuíji sín tí chrínta ntayaon tí tsjiji ch'ín Jesús.

³⁴ Ntá k'uínkajinxín ch'án tí ntabárco, a ntá k'uikon ch'án kíxin nchónhya chojni síin ntiha ntá kuikonóehé ch'án tí jehe sín na mé éxi yóhe kololó tjejó sín chóntahya va nkexro ts'ayakonhen va. Ntá kjuankíxin ch'án kjuakohé ch'án sín nchónhya nkehe a.

³⁵ Na ntá ó kóntó na ntá tí sín k'uájiko ch'ín Jesús a mé kóchjina sín tí tjen ch'án ntáchro sín kíxin:

—Ntá ó kóntó la kohya ninkexró tjejó ntihi

³⁶ na ntá jaha chrókuitohé sín kíxin sátsji sín tí chjasin chjinaxón a tsjik'ęna sín nkehe kíxin chóntahya sín nkehe sine sín —ichro sín.

³⁷ A ntá ch'ín Jesús kjuátehe ch'án ntáchro ch'án kíxin:

—Chjehé sín nkehe sine sín —ichro ch'án.

Ntá kjuátehe sín ntáchro sín kíxin:

—¿Á tsjik'enani iyó ciento denario niotja tsochjeheni sín sine sín ní? —ichro sín.

³⁸ Ntá ch'ín Jesús mé kjuanchankíhi ch'án sín kíxin:

—¿Nkekjaín niotja chontará? Sătjitsjehérá —ichro ch'án.

Ntá sákjuítsjehe sín na ntá chrónka sín kíxin:

—In'ó niotja la ko yaá koche mé síin —ichro sín.

³⁹ Na ntá k'ueṭṭaon ch'án kixin kaín xín sín chrók'uixitjaxin sín tí chrítaón tí ka yoa a.

⁴⁰ Na ntá xikaha kójnkojé sín ciento sín la ko cincuenta sín k'uixitjaxin sín.

⁴¹ Na ntá ch'ín Jesús kuákja ch'án tí in'ó nioṭja na ko tí yaá koche ntá konta ch'án nkajni ntá kjuanchia ch'án kjuasáyé Dios. Na ntá kóchrít'ó ch'án tot'ó tí nioṭja a ntá chjéhe ch'án tí sín k'uájiko ch'án kixin ts'óxikayehe sín sine tí sín siín a la ko kjaxin kóchrít'ó ch'án tí yaá koche ntá k'óxikayehe sín kixin sine sín kaín sín.

⁴² Ntá kaín xín sín kjóne sín kókjehe sín.

⁴³ A ntá kjuixin kjóne sín ntá tí sín k'uájiko ch'ín Jesús na mé kjuínchekaón sín teyó ntaxra tot'ó tí nioṭja la ko tí koche tsíxehe.

⁴⁴ A ntá tí sín kjóne na mé in'ó mil chojni ntoa.

Ch'ín Jesús mé tjítaón ntayaon

(Mt. 14.22-27; Jn. 6.16-21)

⁴⁵ A ntá tuénxin k'ueṭuēnhen ch'ín Jesús tí sín k'uájiko ch'án kixin ts'jít'óṭjen sín tí ntabárcō a ts'atòye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxa kuitōhe ch'án nixjehe ch'án kaín tí sín siín a.

⁴⁶ Kjuixin nixjehe ch'án sín na ntá jehe ch'án chriin ch'án ijnko jnā tsonixjeexin ch'án Dios.

⁴⁷ A ntá tió k'uixin tie ntá tí ntabárcō na mé ó kjujji jnkōsiné ntayaon, a ntá jehe ch'án jehó ch'án kjujji ch'án chrínta ntayaon.

⁴⁸ Ntá kotohe ch'án k'uikon ch'án kixin imá xra tjiko sín tí ntabárcō a kixin tí xrintō imá chjéhe. Nantóye a mé sákjuichréhe ch'án sín. Totó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uatáinké ch'án sáchrókjui ch'án.

⁴⁹ A ntá tí k'uikon sín kjuítaón ch'án ntā, ntá kjuenkayáxin sín kixin kjuacha sín, ichro sín, ntá k'oyako sín

⁵⁰ kixin kaín sín k'uikon sín ch'án la chrakon sín. Na ntá jehe ch'án mé tuénxin nixja ch'án ntáchro ch'án kixin:

—Chrakonhyará. Janhan tíhi —ichro ch'án.

⁵¹ Ntá k'ujit'óṭjen ch'án tí ntabárcō tí tjejó sín, a ntá tí xrintō la ó k'uixratá. Ntá imá chrakon sín kixin xikaha kónhen

⁵² kixin kienxínhya sín tí kjuaxroan kjuich'e ch'án kuente tí nioṭja kixin naxa kénhya asén sín kuinkáchónki sín ch'án.

Ch'ín Jesús mé kjuínchekitōhe jína tí chojni níhi tí nonte Genesaret

(Mt. 14.34-36)

⁵³ Ntá tió k'uatòye sín tí ntayaon ntá kjujji sín tí nonte Genesaret ntá kjuak'echroē sín tí ntabárcō a tí chrínta ntā.

⁵⁴ Na ntá tió k'uínkajinxin sín tí ntabárcō, a ntá tí sín siín ntiha tjoka kjuátsōan sín tí ch'ín Jesús.

⁵⁵ Ntá sákjuí sín nkuixín chjinaxón ntiha kjuankixin sín kuikao sín tí sijníhi tinkátsénki sín kuikao sín tí tjen ch'ín Jesús.

⁵⁶ La ko kaín nketi kjujji ch'án, á chjasin ntsí, á chjasin hyé, á nontēe sín ó kjujiko sín tí sijníhi a chrínta ntā. Na ntá chrónōgehe sín tí ch'ín Jesús kixin kjóntēe chrínta iké ch'án ó chrókúakóxin sín, ichro sín. Na kaín xín tí sín kuákóxin iké ch'án mé kuitōhe sín jína.

7

Tí nkehe nchekjita asén chojni

(Mt. 15.1-20)

¹ A ntá iso sín fariseo la ko iso tí sín tjako tí ley kuixin sín chjasin Jerusalén ntá kóchjinehe sín tí ch'ín Jesús.

² Tí sín a, tió k'uikon sín kixin iso tí sín k'uájiko ch'ín Jesús mé k'óntihya sín tja sín na kjóntē ine sín mé t'axrjexin kixin kjuínchexiteyáhya sín tí ley, ntá kjonta tí sín a.

³ (Mé xikaha kjuich'e sín kixin tí sín fariseo la ko kaín tí sín judío mé kuinkáchónki sín éxi k'uékjich'e tí sín táda ósé kixin ná t'óntó itja sín ntá sine sín.)

⁴ Na ko tí tsokjanxin sín ntsin ná t'ónti sín ntá sine sín. Na ko kjaxin itsjé í so nkehe tinkáchónki sín, éxi tjōnemá sín tí vaso t'iyá sín nkehe la ko tí nchēsen la ko tí chj chjányan nkehe ne sín la ko tí kámé sín nchetjóá sín.)

⁵ Méxra tí sín fariseo la ko tí sín maestro tjako tí ley a na mé kjuanchankíhi sín tí ch'ín Jesús kixin:

—¿Nkeuēntē kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjó ósé? Na mé tí sín xrikoa t'óntihya sín tja sín ntá kjóntē ine sín —ichro sín.

⁶ Kjuátēhe ch'ín Jesús ntáchro ch'án kixin:

—Ntoá tsíchrónka ch'ín Isaías ósé k'uéchrónka iten Dios tsintáchro ch'án kixin ntoáhya tsjenkayáxinrá tí jahará kixin xikíhi tsíkjin ch'án ntáchro ch'án kixin:

Tí chojni tí chjasin i ir'va ó xraxinkakonxín sín tí janhan, a ntá tí asén sín ikjín kuitqhe sín tí janhan

⁷ Méxra ó chónkó tóchjina sín xraxinkaon sín tí janhan,

kíxin tí nkehe tjako sín la tí nkehe tsík'etqan chojni ó.*

Mé xikaha ichro itén Dios.

⁸ Ntá jahará kuitqhérá tí nkehe tsík'etqan Dios ntá chréhérá tí nkehe ch'e chojni, a la mé tjongemará nchésen, la ko tí vaso t'íará nkehe, la ko kjaxin í so nkehe yóhē tinkachónkirá —ichro ch'án.

⁹ Kjaxin ntáchro ch'án kíxin:

—Jahará chréhérá tí nkehe k'uékjich'e chojni ntá xikaha tjtqhérá ntáha tí nkehe tsík'etqan Dios.

¹⁰ Tsintáchro ch'in Moisés kíxin: “Tsochonteherá kjuasáyé it'árá la ko inárá”, la ko “A ntá tí nkexro t'ántaxinhjín it'é o iné la chrók'óyán sín.”[†]

¹¹ A ntá jahará ntáchrórá kíxin ó nchqon kíxin ijnko nkexro tsochéna it'é la ko iné kíxin: “It'énéi, Inéni, chrokjuaaha tsjinkítsani tí jaha kíxin kaín tí nkehe chónntani mé k'óna Corbán” (mé t'axrjéxín kíxin kaín tí chichaon k'uáyéhē Dios).

¹² A ntá xikaha jnkójin nkexro tsontáchro ch'án tíhi ntá jahará tsontáchrórá kíxin í t'ichjánxinhya tsjinkítsa ch'án tí it'é ch'án la ko tí iné ch'án.

¹³ A ntá tí xikaha la tjtqhérá tí nkehe tsík'etqan Dios éxí sínkíhya, a ntá ókjé nkehe ich'erá, ntá tánkíhará chojni. Mé xikaha ich'erá nchónhya nkehe tóyóhē tíha —ichro ch'in Jesús.

¹⁴ Na ntá k'uíyehē ch'in Jesús tí chojni inaá ntáchro ch'án kíxin:

—Tinhínrá kaín rá tí nkehe ntáxrjan la ko tiénxinrá.

¹⁵ Tí nkehe ine chojni la jehya jje tíha. Tí nkehe t'axrjeníxin asén chojni mé jje tíha.

¹⁶ Tí tjinkáonrá chrókuinhínrá la chrókuinhínrá —ichro ch'án.

¹⁷ A ntá tío kuitqhe ch'án kaín tí sín tsikóchjina a na ntá jehe ch'án la ko tí sín k'uájiko ch'án mé k'uixenhen sín nchia. Na ntá kjuanchankíhi sín ch'án kíxin nkexrí t'axrjéxín tí nkehe kjuako ch'án a.

¹⁸ Na ntá ntáchro ch'in Jesús kíxin:

—¿A kjaxinrá tiénxinhyará? ¿A noahyará kíxin tí nkehe ineni na jehya jje

¹⁹ kíxin jehya asénni sátsji? Tí nkehe ineni na sátsji nkaya tseeni na ko xik'axrje inaá —ichro ch'án.

Mé t'axrjéxín kíxin tí nkehe sineni la jehya jje.

²⁰ Ntá ntáchro ch'in Jesús kíxin:

—A ntá tí nkehe t'axrjeníxin chojni na mé jje táha.

²¹ Nkaya asánrá mé t'axrjeníxin tí jínahya tjenkayáxinrá, la ko tí tjachehē kichuárá, la ko tí tjinkáonrá tsochontará chojni chjin ókjé, la ko tí t'oyán kichuárá

²² la ko tí chrókúgerá, la ko tí tjaké asánrá tí nkehe chónnta ókjé sín, la ko tí jínahya ch'ehérá kichuárá, la ko tí kjuach'ia xrikoará la ko tí jínahya tjenkayáxinrá, la ko tí chjinoxínhanrá, la ko tí ch'énará kjuach'ia, la ko tí kjuahnke chontará, na kó ti chontahyará kjuaxrexinkaon jína.

²³ Kaín tí nkehe jínahya a mé t'axrjeníxin chojni, la mé tjasixín sín jje.

*Jjnko tjan tsíkjixín kjín mé kuitekaon tjan tí ch'in Jesús
(Mt. 15.21-28)*

²⁴ Ntá ch'in Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uixenhen ch'án ijnko nchia kíxin tjinkakonhya ch'án kíxin chrókónohe chojni kíxin ntaha tjen ch'án. Kjánchó xitjahya kjuák'emá ch'án ntiha.

²⁵ Na ntá ijnko iné ijnko tjan tjarisoá chónnta ijnko nchakuen tí jínahya mé kuínhin nkehe tí xra ch'e ch'in Jesús kíxin tjasin ch'án kjuaxroan, ntá tuénxín kui tjan kjuák'exín toch'in tjan chrínkí toté ch'in Jesús.

²⁶ Na mé jehe tjan tsíkjixín kjín, na mé tsíkjixín tjan nó nación Sirofenicia. Na ntá jehe tjan a mé kui tjan chrónóhē tjan tí ch'in Jesús kíxin chrókúakitsje ch'án tí nchakuen tí jínahya chónnta xjeen tjan.

²⁷ Ntá ntáchro ch'in Jesús kjuátehe ch'án kíxin:

—Tjtqhé senó chrókjóné tí xjan. Jehya tí jína chrókúakítsjahā xjan tí niotja ntá chrótjaha konjā chrókjóné va —ichro ch'án.

²⁸ Ntá jehe tjan kjuátehe tjan ntáchro tjan kíxin:

—Chaxin xikaha, Inchéni. Kjánchó kjónté tí konjā tjejoyánkí mesa ine tí tot'o niotja tóxènjín tí chánjan —ichro tjan.

²⁹ Na ntá ntáchro ch'in Jesús kíxin:

* 7:7 Isaías 29.13 † 7:10 Éxodo 20.12; 21.17

—Táha la chaxín ntoá ntáchrua. Sátjia kíxín tí nchakuen tí jínahya ó k'uaxrjexín tí xjaan —ichro ch'án.

³⁰ A ntá tió kjuíji tjan ntøe tjan, na ntá k'uíkon tjan kíxín tí xjeen tjan na mé ó ntoá tjetsínkaták'á xjan tí cama kíxín ó tsík'axrje tí nchakuen tí jínahya a.

Ch'ín Jesús mé kjuínchekitøhe jína ijnko ch'ín tienhya la ko nixjahya

³¹ Ntá ch'ín Jesús mé ó k'uaxrjexín ch'án inaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntayaon Galilea.

³² Ntá kujkao sín ijnko ch'ín tienhya na ko ntoáhya nixja ch'án. Ntá chrónøehøe sín tí ch'ín Jesús a kíxín tsjak'etja tja ch'án chrítaón kja tí ch'ín a kíxín tsitøhe ch'án jína.

³³ Na ntá ch'ín Jesús k'uaxrjentako ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxenhén ch'ín Jesús tatsjon tí ch'ín tienhya. La ko kjaxín tí dedo tja ch'án mé kujkíte ch'án ntatè ch'án ntá kjuínchekákóxín ch'án nejen tí ch'ín nixjahya a.

³⁴ Ntá konta ch'án nkajní k'uáváxin ch'án na ntá nixjehøe ch'án tí ch'ín tienhya a, ntáchro ch'án kíxín:

—Efata —mé t'axrjexín nkívee sín kíxín: ¡Tsoxitjehøe!

³⁵ Na ntá tuénxín xitjehøe tatsjon tí ch'ín tienhya ntá kuínhin ch'án la ko kuítøhe jína tí nejen ch'án, ntá jína nixja ch'án.

³⁶ Ntá ch'ín Jesús k'uøtøan ch'án kíxín ninkexró tsochenkahya sín. Ntá kjónté imá k'uøtøan ch'án ntá ántøsen sín kjónté íchá xrichronka sín.

³⁷ Na mé imá chrakon sín ntá ntáchro sín kíxín:

—Kaín nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —ichro sín.

8

*Ch'ín Jesús mé kjuanjøn nkehe kjóne noó mil chojni
(Mt. 15.32-39)*

¹ A ntá ijnko yaon nchónhya chojni k'uúxikóchjina inaá. A ntá chóntahya sín nkehe sine sín. Na ntá ch'ín Jesús mé k'uúyehøe ch'án tí sín k'uájiko ch'án, a ntá ntáchro ch'án kíxín:

² —Imá tikonøahøe kaín tí sín i kíxín ó ní yaon tjékjan sín ntíhi ntá chóntahya sín nkehe sine sín.

³ Ntá chrókuétuønhyha sín sáchrókjui sín ntøe sín tí naøa nehya sín kíxín ntja ó chrókótiønxin sín kíxín iso sín la imá kjín tsíkjixín sín —ichro ch'ín Jesús.

⁴ Na ntá kjuátøhe tí sín k'uájiko ch'án ntáchro sín kíxín:

—¿Nkexrí chrókónoxín nchónhya niøtja chrókjóne kaín tí sín a kíxín kohya nchia tí tjejóni? —ichro sín.

⁵ Na ntá ntáchro ch'ín Jesús kíxín:

—¿Nkekjaín niøtja chontará jahará? —ichro ch'án.

Ntá jehe sín kjuátøhe sín ntáchro sín kíxín:

—Yato niøtja chóntani —ichro sín.

⁶ Na ntá ch'ín Jesús k'uøtuønhen ch'án kaín xín sín kíxín ts'ixitjaxín sín nonte. Ntá kuákja ch'án tí yato niøtja ntá kjuanchehe ch'án kjuasáyé Dios ntá kóchrít'ø ch'án tí niøtja a. Ntá chjéhe ch'án tí sín k'uájiko ch'án kíxín jehe sín ts'óxikayehøe sín tsakja kaín xín tí sín síin a.

⁷ Na ko iso koche ntsínsí chóna sín. Ntá ch'ín Jesús kjuanchia ch'án kjuasáya ntá k'uøtøan ch'án ts'óxikayehøe sín kjaxín.

⁸ Na mé kaín xín sín kjóne sín na kókjehøe sín. Ntá chr'éxín naøa kjuínchekaon sín yato ntaxra tí tot'ø tí nkehe tsíxehøe.

⁹ Na mé chjina noó mil chojni kjóne sín. Ntá ch'ín Jesús mé nixjehøe ch'án sín sákjuí sín

¹⁰ ntá tuénxín jehe ch'án la ko tí sín k'uájiko ch'án na mé k'uít'ótjen sín tí ntabárcø a sákjuí sín nó tí nonte Dalmanuta.

*Tí sín fariseo tjanchia sín ijnko kjuaxroan jíe
(Mt. 16.1-4; Lc. 12.54-56)*

¹¹ Na ntá kui iso sín fariseo kjuankíxín sín tjo sín tí ch'ín Jesús kjuanchehe sín ch'án kíxín chrókjuakøxín ch'án ijnko kjuaxroan jíe kuènte nkaya nkajní kíxín tjinkaon sín chrókjuachaxín sín ch'án.

¹² A ntá ch'ín Jesús na mé k'uáváxin ch'án ikjín kjanxin asén ch'án ntá ntáchro ch'án kíxín: —¿Nkekuènté kíxín tí chojni i na mé tjanchia sín ijnko kjuaxroan jíe? Ijie la ninkehø kjuaxroan tsjákoxínhya —ichro ch'án.

¹³ Na ntá kuítøhe ch'án tí sín a, ntá xik'ít'ótjen ch'án tí ntabárcø ntá sákjuí ch'án í jnko tóhe ntayaon inaá.

*Tí xroqan nchek'ánki tí niqtjé tí sín fariseo
(Mt. 16.5-12)*

¹⁴ Ntá k'uitjáyenhen sín tsíkikohya sín nkehe sine sín. Jehó jnkokóá niqtja chóna sín nkaxenhen tí ntabárço a.

¹⁵ Ntá ch'ín Jesús k'uetuenhen ch'án tí jehe sín kixin:

—Chrókóxakonhanrá kixin tí xroqan nchek'ánki niqtjé tí sín fariseo la ko niqtjé tí ch'ín Herodes a —ichro ch'án.

¹⁶ Ntá tí sín xriko ch'án mé kjo sín kichó sín kixin:

—Mé xikaha ichro ch'án kixin tsíkikohyani niqtja.

¹⁷ Ntá kónohe ch'ín Jesús kixin nkehe tí kjo sín kichó sín ntá ntáchro ch'án kixin:

—¿Nkeuènté tjórá kixin chontahyará niqtja? ¿Á naxa tiénxinhyará la ko naxa noahyará? ¿Á kénhya asánrá tinkachónkirá Dios?

¹⁸ ¿Á t'ikonxinhyará ikonrá la ko á tiénxinhyará tátsjinrá? ¿Á xráxinkákonhyará?

¹⁹ Tió kóchrít'va tí n'ó niqtja kjóne in'ó mil chojni na ¿nkekjaín ntaxra tí tot'ó niqtja naxa kjuenájinrá? —ichro ch'án.

Ntá jehe sín kjuátehe sín ntáchro sín kixin:

—Teyó ntaxra tí nkehe kjuenájinri —ichro sín.

²⁰ Xintáchro ch'ín Jesús inaá kixin:

—Na ko tí kóchrít'va tí yato niqtja kjóne noó mil chojni na ¿nkekjaín ntaxra tí tot'ó niqtja kjuenájinrá? —ichro ch'ín Jesús.

Ntá ntáchro sín kixin:

—Yato ntaxra —ichro sín.

²¹ Ntá ch'ín Jesús ntáchro ch'án kixin:

—Kjonté xikaha la, ¿á naxa tiénxinhyará? —ichro ch'án.

Ch'ín Jesús mé kjuínchekitqhe jina ijnko ch'ín t'ikonhya tí chjasin Betsaida

²² A ntá chr'éxin kjuíji sín chjasin Betsaida, a ntá ikui iso sín kuikao ijnko ch'ín t'ikonhya. Ntá chrónóheh sín tí ch'ín Jesús kixin chrókjuínchekitqhe ch'án jina tí ch'ín a.

²³ Ntá ch'ín Jesús mé itsé ch'án tja tí ch'ín t'ikonhya a ntá k'uaxrjentako ch'án ikon tí chjasin a. Na ntá kuikitehe ch'án ntaté ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

²⁴ Ntá ntáchro tí ch'ín t'ikonhya kixin:

—T'ikonni chojni, kjánchó éxi nta tsjehe itji —ichro ch'án.

²⁵ Ntá ch'ín Jesús mé xikjak'etja tja ch'án inaá tí kon tí ch'ín t'ikonhya a. A ntá tí ch'ín k'uikonhya kuítqhe ch'án jina la jina t'ikon ch'án kaín nkehe.

²⁶ Na ntá ch'ín Jesús mé k'uetuenhen ch'án tí ch'ín k'uék'ikonhya kixin sátsji ch'án ntqç ch'án ntáchro ch'án kixin:

—Chrók'uixénhya chjasin la ko ninkexró chróchenkahya niha —ichro ch'án.

*Ch'ín Pedro chrónka ch'án kixin ch'ín Jesús mé tí nkexro Cristo
(Mt. 16.13-20; Lc. 9.18-21)*

²⁷ A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipo. A ntá tí ntja mé kjuanchankíhi ch'ín Jesús tí sín k'uájiko ch'án kixin:

—¿Nkehe ntáchro chojni kixin nkexro tí janhan? —ichro ch'án.

²⁸ Ntá ntáchro sín kixin:

—Iso sín mé ntáchro sín kixin jaha mé ch'ín Juan Bautista, ichro sín. A ntá í so sín na mé ntáchro sín kixin jaha mé ch'ín Elías, ichro sín. A ntá í so sín mé ntáchro sín kixin jaha mé ijnko tí sín tsíchrónka itén Dios ósé —ichro sín.

²⁹ Ntá kjuanchankíhi ch'án sín inaá kixin:

—¿A ntá jahará nkechorá kixin nkexro tí janhan? —ichro ch'án.

Ntá kjuátehe ch'ín Pedro ntáchro ch'án kixin:

—Jaha mé tí Cristo, ichroni —mé chro ch'án.

³⁰ Ntá k'uetqan ch'ín Jesús kixin tsochenkahya sín ninkexró.

*Ch'ín Jesús chrónka ch'án kixin ts'en ch'án
(Mt. 16.21-28; Lc. 9.22-27)*

³¹ Na ntá kjuankixin kjuako ch'ín Jesús kixin tí Xjeen Dios K'óna Chojni mé t'ichjánxin kixin imá tsjasóte ch'án la ko tsotjinkakonhya kaín tí sín táda kuènte njnko la ko tí sín t'etqan kuènte tí sín nchat'á la ko tí sín maestro tjako tí ley. A ntá tí sín a mé ts'óyan sín ch'án. Kjánchó tí nixin yaon na ó tsoxechón ch'án inaá.

³² Kaín tíha mé ntoá chrónka ch'án. A ntá ch'ín Pedro mé kuakitsjenta ch'án tí ch'ín Jesús chrókjuentuéhe ch'án.

³³ Na ntá kuinkátjía ch'in Jesús komá ch'án kaín tí sín k'uájiko ch'án a. Ntá kjuentuéhe ch'án tí ch'in Pedro a ntáχρο ch'án kixin:

—¡Sátjia ntáha, Satanás! Jaha la tjenkayáxinhya éxi tjenkayáxin Dios. Náhí. Jaha tjenkayáxin éxi tjenkayáxin chojni ó —ichro ch'án.

³⁴ Ntá ch'in Jesús mé k'uáyehe ch'án tí sín k'uájiko ch'án la ko tí sín tsíkóchjina a. Ntá ntáχρο ch'án kixin:

—Tí jnkojínrá tjinkáonrá tsochréhérá tí janhan na t'ichjánxin tsjtohérá kaín tí nkehe tjaké asanrá na ntá tsamárá tí ntacruz kuéntará, a ntá tsochréhérá tí janhan.

³⁵ A ntá tí nkexro tjinkaon jehó sinchekaá asén mé ts'itjýan. A ntá tí nkexro sinchek'itjýanxin asén kixin tinkáchónki tí janhan la ko chrónkaxin tí tan tsjanjon kjuachón mé tsaá.

³⁶ ¿A ntá nkehe tsonhen tí chrókjuacha ijnko chojni chróchónka kaín nkehe síin chjasintajni, a ntá kjuachón chrókjuinchek'itjýan?

³⁷ ¿Nkehe chrókjuenka chojni kixin chróchónka tí kjuachón?

³⁸ A ntá jnkojín nkexro tsosuehé kixin tinkáchónki tí janhan la ko tí tan kuéntana nkayakon tí chojni jínahya chónka jie la kjaxin tí Xjeen Dios K'óna Chojni tsosuehé ch'án tsonáchro ch'án kixin chóxin ch'án tí jehe sín tió tsokjan ch'án tsjkaó ch'án tí kjuachaxin jié kuénte It'é la ko tsjkaó tí sín ángel.

9

¹ Na ko kjaxin chrónka ch'in Jesús kixin:

—Chaxín ntáxrjan kixin isorá tjejórá ntihi la naḡa ts'énhyará ts'ikonjiará itsi tí kjuachaxin ts'etoan Dios —ichro ch'án.

Ch'in Jesús mé k'uixitoxin nkexri tsjehe ch'án
(Mt. 17.1-13; Lc. 9.28-36)

² Ntá k'uátsínka injon yaon ntá ch'in Jesús mé sákjuiko ch'án ch'in Pedro la ko ch'in Jacobo la ko ch'in Juan sákjuí sín jehó sín ijnko jna noi. Ntá ntiha mé xrínahya k'uixitoxin ókjé nkexri tsjehe ch'án k'uikon tí jehe sín.

³ A ntá iké ch'án tsík'óna imá tjákni la ko imá tjóá éxi chrinta tsjehe, a ntá ntihi chjasintajni kohya ninkexró chrókjuen tí ka chrókuitóhe imá tjóá xikaha.

⁴ Na ntá titáya k'uúkuén sín ntiha itjen tí ch'in Elías la ko tí ch'in Moisés tjejóto sín tí ch'in Jesús.

⁵ A ntá ch'in Pedro mé ntáche ch'án tí ch'in Jesús kixin:

—Maestro, jina kixin tjejóni ntihi. Chrókjuich'énani iní nchia la mé ijnko kuéntá la ko ijnko kuénte ch'in Moisés la ko ijnko kuénte ch'in Elías.

⁶ Mé xikaha ichro ch'án kixin kaín sín la imá chrakon sín la tí ch'in Pedro la mé í noehya ch'án nkehe tsixro ch'án.

⁷ Na ntá xrínahya ikui ijnko tjuí kjuák'etja chrítaón kaín xín tí tjejó sín. Na ntá chríkjan tí tjuí kuínhin sín itén ijnko nkexro nixja na mé ntáχρο kixin:

—Tí nkexro í mé xjanna. Imá tjuahá ch'án. Chrókuinhínrá tí nkehe tjako ch'án.

⁸ Na ntá tió tsjehe sín nkuíxín tí tjejó sín la í kohya tí iyó sín a. Jehó tí ch'in Jesús tjejóko sín.

⁹ A ntá tí ó k'uínkajinxin sín tí jna ntá k'uetqan ch'in Jesús kixin tsochenkahya sín ninkexró tí nkehe k'uikon sín hasta tsoxechónjian tí Xjeen Dios K'óna Chojni.

¹⁰ Ntá ninkexró chenkahya sín tí nkehe k'uikon sín. Na ntá jehó sín mé tjejóto sín kixin nkehe t'axrxéjin tí nkehe chrónka ch'án kixin tsoxechón ch'án inaá.

¹¹ Na ntá kjuanchankíhi sín tí ch'in Jesús ntáχρο sín kixin:

—¿Nkeuente kixin ntáχρο tí sín tjako tí ley kixin saoxín itsi tí ch'in Elías la ntá chr'éxin itsi tí nkexro tsaáxinni? —ichro sín.

¹² Ntá ntáχρο ch'in Jesús kixin:

—Chaxín saoxín itsi ch'in Elías la ntá tsjasiyóxin ch'án kaín xín nkehe. ¿A ntá nkehe ntáχρο xroon itén Dios kixin nkehe tsonhen tí Xjeen Dios K'óna Chojni? Na mé ntáχρο kixin t'ichjánxin tsjasóte la ko tsojtjinkakonhya sín.

¹³ Kjánchó ó xrjánka kixin chaxín ó tsíki ch'in Elías, ntá kjuínchekjásote sín ch'án éxi kóxrjínhin sín éxi nixja tí xroon itén Dios kixin xikaha tsonhen —mé xikaha chrónka ch'in Jesús.

Ch'in Jesús mé kjuínchekitóhe jina ijnko xjan chónka ijnko nchaquen tí jínahya
(Mt. 17.14-21; Lc. 9.37-43)

¹⁴ A ntá tió ikjan sín tí kuítóhe tí í so sín k'uájiko ch'án ntá k'uikon sín kixin nchónhya chojni tsík'antatjen tí jehe sín. Kjaxin ntaha síin tí sín tjako tí ley ikjo tí jehe sín.

¹⁵ A ntá tuénxín tió k'uikon sín tí ch'in Jesús na ntá kaín sín kóchéhe sín tinká sín sákjuichréhe sín ch'án, tsonixjehe sín ch'án.

¹⁶ Ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tjórá tí sín í? —ichro ch'án.

¹⁷ Ntá tjen ijnko ch'án tjenkákjan sín ntiha kjuátēhe ch'án kixin:

—Maestro, ntihi kjuíkian ijnko xjanna chóna nchakuen tí jínahya na mé nchenixjahya xjan.

¹⁸ Kjónté nkerí tjen xjan la tí nchakuen tí jínahya mé tjáka xjan nonte, ntá ntáloxrjo sítjxin ir'va xjan na netaón xjan neno xjan na méxra tjeheya xjan. Ntá xrjanógha tí sín xrikoa kixin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátēhe ch'án ntáchro ch'án kixin:

—Jahará chojni kénhya asánrá tinkachónkirá Dios. ¿Xá hasta nkesá tjinkáonrá naxa ts'ejóni? ¿Xá hasta nkesá tsjácha tsjak'é tsjákohará? Xráqorá ntihi tí xjan méhe —ichro ch'án.

²⁰ Na ntá kóchjinako sín tí xjan a. Na ntá tí nchakuen tí jínahya mé k'uikon tí ch'ín Jesús ntá kjuínchek'aniáte tí xjan a kjuítsínka xjan nonte la kjaminkítaón xjan nonte la sítji ntáloxrjo ir'va xjan.

²¹ Ntá ch'ín Jesús mé kjuanchankíhi tí it'é tí xjan a ntáchro ch'án kixin:

—¿Á ósé xikaha tónhen xjan? —ichro ch'án.

Ntá ntáchro tí it'é tí xjan kixin:

—Desde naxa xjanntsi xjan.

²² A ntá jnkoyaxón tí nchakuen tí jínahya a mé tjákate xjan xrohi la ko tjákankí xjan intá kixin tjinkaon chrók'óyán tí xjan a. A ntá jaha ¿á tsjácha tsjínkítsani? La tikonóghéni tsjínkítsani —ichro ch'án.

²³ Ntá ntáchro ch'ín Jesús kixin:

—¿Nkekuénté tjanchankína kixin á tsjácha? Tí tsitekávan la kaín nkehe la jína tsonhen, kixin tí nkexro tsitekaon Dios la jína tsonhen kaín nkehe —ichro ch'án.

²⁴ Ntá tuénxín itsen kjuátēhe tí it'é xjan, ntáchro ch'án kixin:

—Ó titekaonni. Tsjínkítsani kixin antsí má tsitekaonni tí jaha —ichro ch'án.

²⁵ Ntá k'uikon ch'ín Jesús kixin itsjé chojni kóchjina. Ntá nixjehē ch'án tí nchakuen tí jínahya chóna tí xjan a ntáchro ch'án kixin:

—Jaha la ijnko nchakuen tí jínahya nchenixjahya chojni la ko nchekíenhyahya chojni. Ijie la tétuanhan kixin t'axrxéxian tí xjan na ko tsitohé xjan la í tsokjanhyahya inaá —ichro ch'án.

²⁶ Ntá tí nchakuen tí jínahya a na mé k'óyato la ko kjuínchek'aniáte tí xjan a inaá, ntá k'uaxrxéxín ntiha. Na éxi tsik'en xjan xikaha tsjehe xjan. Ntá itsjé sín ntáchro sín kixin ó tsikjixin tsik'en xjan, ichro sín.

²⁷ Na ntá ch'ín Jesús mé tséhe tja tí xjan kjuínchek'inkatjen ch'án xjan.

²⁸ Ntá ch'ín Jesús la ko tí sín k'uájiko ch'án k'uixenhen sín ijnko nchia. Ntá jehe sín kjuanchankíhi sín ch'án kixin:

—¿Nkekuénté kixin kjuachahyani kuakitsjeni tí nchakuen tí jínahya a? —ichro sín.

²⁹ Ntá ntáchro ch'án kixin:

—Tíhi la t'ichjánxin kixin nchónhyahya tsochronóghérá T'aná la ko sintehyará —ichro ch'án.

Yóxin chrónka ch'ín Jesús kixin its'en ch'án

(Mt. 17.22-23; Lc. 9.43-45)

³⁰ A ntá tió sákjuixin sín ntiha ntá k'uátsínka sín estado Galilea. A ntá ch'ín Jesús tjinkakonhyahya ch'án kixin ninkexró ntiha tsonhe sín

³¹ kixin tinkákjakohē ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yaon nixin na ó tsoxechón ch'án inaá —ichro ch'án.

³² Ntá jehe sín mé kíenxínhyahya sín nkehe tí ntáchro ch'án la chrakon sín chrókjuanchankíhi sín ch'án nkexrí t'axrxéxín tíha.

¿Nkexro tí imá tjetóan?

(Mt. 18.1-5; Lc. 9.46-48)

³³ Ntá kjuíji sín chjasin Capernaum; a ntá tí tjejó sín tí nchia ntiha ntá ch'ín Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kíchuará tí kuíni ntja? —ichro ch'án.

³⁴ Ntá jehe sín la tánikoá sín kixin tí ntja kui sín tinkákjo kíchó sín kixin nkexro tí imá ts'etóan.

³⁵ Ntá ch'ín Jesús mé kjuák'etjaxín ch'án ntá k'uíyehē ch'án tí teyó sín k'uájiko ch'án, a ntá ntáche ch'án sín kixin:

—Tí jnkójjínrá tjinkáonrá chrókuétóanrá má ntá t'ichjánxin kixin tsjixixín tsochréghérá kaín sín, ts'ítuanhanrá la ko tsjínkítsará kaín xín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

³⁷ —Tí jnkojín nkexro chrók'uáyéhe ijnko chánjan kixin tinkáchónki sín tí janhan la mé xikaha chrók'uáyéhe sín tí janhan la ko kjaxin éxi chrók'uáyéhe sín tí nkexro ichr'anna —ichro ch'án.

Tí nkexro ninkakuenhyani tí jeheni la tjinkĩta tí jeheni
(Lc. 9.49-50; Mt. 10.42)

³⁸ A ntá ch'ín Juan mé ntáchro ch'án kixin:
—Maestro, k'uíkoni ijnko chojni na mé kjuachaxin ihniá mé takitsjexin ch'án nchakuen tí jinaha chóna chojni. Ntá k'uetuenhenni ch'án kixin xikaha chrókuich'e ch'án kixin xrikoxyani ch'án —ichro ch'án.

³⁹ Ntá ntáchro ch'ín Jesús kixin:
—Nté t̄tohé ch'án kixin ninkexró tjasixín kjuaxroan kjuachaxin njina la tuénxín chrókuacha chrók'uántaxina sín.

⁴⁰ Tí nkexro ninkakuenhyani la mé tjinkĩta tí jeheni.

⁴¹ A ntá jnkojín nkexro tsotjáhará kjónté ijnko vaso int̄a tsjanjonxín sín njina kixin jahará la tinkachónkirá Cristo, ntáxrjan kixin chaxín ts'áyéhe sín nkehe.

Tí chojni tjasin j̄e mé tsjasóte sín
(Mt. 18.6-9; Lc. 17.1-2)

⁴² A ntá jnkojín nkexro chrókuachroe ijnko xjan kixin chrókuasin xjan j̄e tió tinkáchónki xjan tí janhan la íchá jina chrókuincheteyá sín ch'án ijnko xro j̄e tsík'óna xrochre la chrókuikákánki sín ch'án ntayaoan.

⁴³ A ntá tí itj̄á t̄jasixián j̄e na mé íchá chrókójina chrókochrínjian kixin kjónté jnkokoá tjá mé tsochontaxián kjuachón. A ntá tí yóí tjá la tíha mé sáchrókuixian tí síin xrohi xitjahya ts'anka,

⁴⁴ tí síin kos̄into t'enhya la ko síche xrohi ts'ankahya.

⁴⁵ A ntá kjaxin tí totá t̄jasixián j̄e na íchá jina chrókochrínjian kixin kjónté jnkokoá totá mé tsochontaxián kjuachón. A ntá tí yóí totá la tíha sáchrókuixian tí síin xrohi xitjahya ts'anka,

⁴⁶ tí síin kos̄into t'enhya la ko síche xrohi ts'ankahya.

⁴⁷ A ntá tí ikuan t̄jasixián j̄e na íchá jina chrókuakitsjenkiá tí kuan a kixin kjónté jnkokoá kuan mé sáchrókuia tí t̄jen Dios t'et̄oan. A ntá tí yóí kuan la tíha mé sáchrókuixian tí síche xrohi

⁴⁸ tí síin kos̄into t'enhya la ko síin xrohi ts'ankahya.

⁴⁹ A ntá kaín nkexro t'ichj̄anxin tsjasóte. A ntá kaín nkehe ts'áyéhe Dios chóna xijnta.

⁵⁰ Tí xijnta la jina. A ntá tí chrók'uankehe tí jni la ntá xitjahya chrókójni inaá. Jahará mé chrók'óyohará éxi xijnta kixin kjuaxroxin chrók'uejokoará kichuárá —ichro ch'án.

10

Tjako ch'ín Jesús kixin chrókuákehya kichó sín
(Mt. 19.1-12; Lc. 16.18)

¹ Na ntá ch'ín Jesús mé k'uaxrjexin ch'án chjasin Capernaum sákjuí ch'án nó estado Judea la ko nó tóhe ntario Jordán. Ntá nchónhya chojni kójnksóte sín tí t̄jen ch'án ntíha. Ntá kjuakoh̄e ch'án tí jehe sín kixin xikaha kuènen ch'án.

² Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókuachaxin sín ch'án. Ntáchro sín kixin:

—¿Á síin kjuachaxin tsj̄akehe chojni ntoa ichjién? —ichro sín.

³ Ntá kjuátehe ch'án ntáchro ch'án kixin:

—¿Nkehe tí k'uetuanhanrá tí ch'ín Moisés? —ichro ch'án.

⁴ Ntá ntáchro sín kixin:

—Ch'ín Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'it̄j̄exin kichó sín —ichro sín.

⁵ Ntá ch'ín Jesús ntáchro ch'án kixin:

—Ntá jahará icha asánra t̄itekákonhyará ntá k'uetoan ch'án ts'óna tí xroon a.

⁶ Kjánchó tí xrankixixín tió kjuich'èna Dios kaín xín nkehe la kjuich'èna ch'án ijnko chojni ntoa la ko ijnko chojni chjin.*

⁷ Méxra tí chojni ntoa ts̄tohe ch'án tí it'è ch'án la ko iné ch'án kixin tsakja ch'án ichjién ch'án

⁸ ntá yóí sín ts'óna sín éxi jnkokoá chojni. Méxra jehya yaá chojni. Náhí, jnkokoá.†

⁹ Na mé xikaha tí kjuachaxin kuènte Dios kójnkoj̄éxín sín ntá jehe sín chrók'uit̄j̄ehya kichó sín —ichro ch'án.

* 10:6 Génesis 1.27; 5.2 † 10:8 Génesis 2.24

¹⁰ **A** ntá tjejó sín nchia ntá tí sín k'uájiko ch'án a mé kjuanchankíhi sín ch'án inaá kixin á xitjaha ts'itjihi kichó sín.

¹¹ Na ntá ntáchro ch'ín Jesús kixin:
—Tí jnkójin nkebro tsjákehe ichjién ntá tsakja ch'án í jnko chjin na mé xikaha tsjachehe ch'án tí tjan tsikótehe ch'án saoxín.

¹² La ko kjaxin tí chojni chjin tsíkjákehe xii tsakja tjan í jnko chojni ntoa na mé xikaha kjaxin tjan tjasin tjan jie —ichro ch'án.

*Ch'ín Jesús kjuíncheyaon ch'án xjan
(Mt. 19.13-15; Lc. 18.15-17)*

¹³ Ntá kjuikao sín xjan kixin tjinkaon sín tsjak'etja tja ch'ín Jesús tí xjan a. Ntá tí sín k'uájiko ch'án mé kóninkakonhen sín tí sín kjuikao xjan.

¹⁴ Ntá k'uikon ch'ín Jesús ntá kónínkaon ch'án ntáchro ch'án kixin:
—Nté títqherá tí xjan tsoxrakoa tí tjén janhan la t'inkakuènyhará xjan kixin tí sín kuènte kjuachaxin kuènte Dios la mé tóyóhe éxi tí xjan a.

¹⁵ Ntá chaxín ntáxrjan kixin tí nkebro ts'ónahya éxi ijnko chánjan xitjaha ts'ejó sín tí ts'etqan Dios tí kjuachaxin kuènte ch'án —ichro ch'án.

¹⁶ Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

*Ijnko ch'ín ntasoá rico nixjehe ch'án tí ch'ín Jesús
(Mt. 19.16-30; Lc. 18.18-30)*

¹⁷ **A** ntá tió sákjuí ch'ín Jesús inaá ntá xrakoa ijnko ch'ín tinká ch'án kjuak'exin toch'in ch'án nkayakon tí ch'ín Jesús kjuanchankí ch'án kixin:

—Jaha, maestro jina. ¿Nkexrí chrókjuich'eni kixin chrók'uitjani kjuachón jnkochrixin? —ichro ch'án.

¹⁸ Ntá ntáche ch'ín Jesús tí jehe ch'án kixin:

—¿Nkekuènté ntáchrúa kixin jina tí janhan? Jehó jnkokoá nkebro mé jina la tíha mé Dios.

¹⁹ Ntá jaha ó noha kixin nkexrí k'uetqan Dios kixin: “Chrókjuacheéhya kichuá la chrók'oyánhya chojni la chrókueehya la chrókjontahya kichuá la chrókjuich'iahya la ko chróchontehé kjuasáya it'á la ko inaá”[‡] —ichro ch'án.

²⁰ **A** ntá jehe ch'án kjuátehe ch'án ntáchro ch'án kixin:

—Maestro, kaín tíha kjuínchexiteyáni desde ntasoáni —ichro ch'án.

²¹ Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

—Naxá t'itjayan jnkokoá nkehe chrókjuich'e. Sátjia nchekjia kaín tí nkehe chonta. **A** ntá tí chichaon sinchekjixián tí nkehe chonta la mé nchekjtonhén tí chojni nóa, **a** ntá tí nkehe tjehe tsochonta nkaya nkajíní. **A** ntá tió tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

²² Ntá tió kuínhin ch'án xikaha ntá k'uává ch'án sákjuí ch'án, kixin imá tsjé nkehe chónnta ch'án.

²³ Ntá ch'ín Jesús komá ch'án tí sín siín ntíha ntáche ch'án tí sín siín k'uájiko ch'án kixin:

—Imá xra ijnko chojni chónnta imá tsjé nkehe ts'ixenhen sín tí tjen Dios t'etqan —ichro ch'án.

²⁴ Ntá tóxakonhen tí sín k'uájiko ch'án kixin xikaha ntáchro ch'án. Ntá chrónka ch'án inaá kixin:

—Tí sín tjeakonhen tí nkehe chónnta sín na imá xra ts'ixenhen sín tí tjen Dios t'etqan.

²⁵ **A**ntsí xrahya chrók'uátsínka ijnko kocamello ijnko tjar'in ntachica tjejrja. **A** ntá antsí má xra ijnko ch'ín chónnta itsjé nkehe chrók'uixenhen ch'án tí tjen Dios t'etqan —ichro ch'án.

²⁶ Ntá jehe sín kuínhin sín xikaha ntá imá chrakon sín. Ntá tjanchankíhi kichó sín kixin:

—Tí xikaha la, ¿xá nkebro chrókjuacha chrókuaá? —ichro sín.

²⁷ Ntá komá ch'ín Jesús tí jehe sín ntáchro ch'án kixin:

—**A** ntá chojni ó tsjachahya sich'e tíha, **a** ntá Dios jina sich'e kaín nkehe, kixin Dios la kohya nkehe tsjachahya sich'e —ichro ch'án.

²⁸ Ntá ch'ín Pedro ntáchro ch'án kixin:

—Inchéni, kaín ni mé kuitoheni kaín nkehe chónntani ntá chréheni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Chaxín ntáxrjan kixin jnkójin nkebro tsítqhe ntqé sín la **o** tí kichó ntoa **o** tí kichó chjin la **o** it'é **o** iné sín **o** ichjién sín **o** xjeen sín **o** nntqee kixin tinkáchónki sín tí janhan la ko tjinkaon sín chrókjuako sín tí tan tsjanjon kjuachón

³⁰ na mé ntíhi chjasintajni tsochónnta sín ciento veces nchónhya ntqé sín la ko éxi kichó sín la ko éxi iné sín la ko éxi xjeen sín ts'ikon sín itsjé chojni kjé la ko éxi nntqee sín xikaha ts'ikon

[‡] 10:19 Éxodo 20.12-16; Deuteronomío 5.16-20

sín itsjé nonte. Kjonté tsjasóte sín ntihi chjasintajni ntá chr'éxin tsochónta sín tí kjuachón jnkochrixín.

³¹ A ntá itsjé tí sín t'etqan ijie mé tsjixixín tsochréhe sín. A ntá itsjé tí sín t'ítuenhen ijie, na mé tí sín a mé ts'etqan sín tí ntiha.

Nixin chronka ch'in Jesús kixin its'en ch'an
(Mt. 20.17-19; Lc. 18.31-34)

³² Ntá tjejóti sín chriin sín tí ntia sátsji chjasin Jerusalén. Ntá ch'in Jesús mé tjetaón ch'an ntia ntá tí sín k'uájiko ch'an mé tóxakonhen sín chrakon sín chréhe sín. Ntá k'uíyehé ch'an jehó tí teyó sín inaá ntá kjuankíxin ch'an chénka ch'an sín nkexrí tí nkehe tsonhen ch'an.

³³ Ntá ntáchro ch'an kixin:

—Ijie sátsjiin Jerusalén. Na ntá tí Xjeen Dios K'óna Chojni mé tsotsé sín ch'an tsjikénhen sín tí sín nchat'á t'etqan la ko tí sín tjako tí ley. Ntá ts'etqan sín kixin its'en ch'an. Ntá sinchek'áyehé sín ch'an tí sín jehya judío.

³⁴ Ntá jehé sín la tsjanoá sín tí jehé ch'an la ko ntaté sín tsikite sín ch'an la ko tsjate sín ch'an ntá ts'óyan sín ch'an. Kjánchó tí yaon nixin mé tsoxechón ch'an inaá —mé xikaha ichro ch'in Jesús.

Ch'in Jacobo la ko ch'in Juan tjanchia sín nkehe
(Mt. 20.20-28)

³⁵ A ntá tí ch'in Jacobo la ko ch'in Juan mé xjeen ch'in Zebedeo mé kóchjinehe sín tí ch'in Jesús ntá ntáchro sín kixin:

—Maestro, tjanchahani ijnko xra —ichro sín.

³⁶ Ntá kjuanchankí ch'in Jesús ntáchro ch'an kixin:

—¿Nkehe tí xra tjinkáonrá chrókjuít'ahará? —ichro ch'an.

³⁷ Ntá ntáchro sín kixin:

—Tió tsétoanxián tí kjuachaxián jié na tjinkaonni kixin ijnkoni chrókjuak'eni itjá chjina a í jnkoni chrókjuak'eni itjá kjon —ichro sín.

³⁸ Ntá ntáche ch'in Jesús tí jehé sín kixin:

—Jahará la noahyará nkehe tí tjanchanará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxi tsikite janhan? —ichro ch'an.

³⁹ Ntá jehé sín kjuátgehe sín ntáchro sín kixin:

—Kja tsjachani —ichro sín.

Ntá ntáche ch'in Jesús tí jehé sín kixin:

—Chaxín its'irá éxi tí nkehe tsjá its'ia la ko tsikiterá éxi tsikite janhan.

⁴⁰ Kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xraxín ó tsikónoxín —ichro ch'an.

⁴¹ A ntá tió kuínhin tí ite sín xikaha tsintáchro tí sín a ntá kjuankíxin kónínkakonhen sín tí ch'in Jacobo la ko tí ch'in Juan.

⁴² Ntá k'uíyehé ch'in Jesús kaín tí jehé sín ntá ntáche ch'an sín kixin:

—Ó nohará kixin tí sín t'etqan chjasintajni la imá t'etuenhen sín kaín chojni la ko tí sín imá tjeoan mé imá nchehnkehe asén sín kixin ihyé sín ts'etqan sín.

⁴³ Kjánchó jahará la xikahya chrókjuich'erá. Náhi. Tí jnkójnra tjinkáonrá chrókuétoanrá la chrókuínkjsará tí í so sín.

⁴⁴ A ntá tió jnkójnra antsí chrókuétoanrá mé t'ichjánxin senó chrókjuákoxinrá chrókjuich'eherá kichuárá xra.

⁴⁵ Kixin tí Xjeen Dios K'óna Chojni mé kuihya ch'an kixin chojni chrókjuich'ehe ch'an xra. Náhi. Ikui ch'an kixin sich'ehe ch'an sín xra la ko ts'enyákonhen nchónhya chojni kixin tsaáxin sín ch'an —ichro ch'an.

Ch'in Bartimeo k'uék'ikonhya ch'an ntá ch'in Jesús kjuínchekitqhe ch'an jina
(Mt. 20.29-34; Lc. 18.35-43)

⁴⁶ Ntá kjuíi sín chjasin Jericó. Ntá ch'in Jesús la ko tí sín k'uájiko ch'an la ko nchónhya chojni k'uaxrjexín sín tí chjasin ntiha. Ntá ntiha tjeen ijnko ch'in t'ikonhya mé it'in ch'an Bartimeo ntá it'é ch'an mé it'in Timeo. Tjetjaxín ch'an chrínta ntia tjanchak'á ch'an.

⁴⁷ Ntá kuínhin tí ch'in t'ikonhya kixin ó kuichjina ch'in Jesús, mé tí nkexro kjuixín chjasin Nazaret, ntá tí ch'in t'ikonhya kjuankíxin t'èya ch'an ntáchro ch'an kixin:

—Jaha Jesús, tsik'axrjenixian ch'in David tikonóghéni —ichro ch'an.

⁴⁸ Ntá nchónhya sín k'uétoenhen sín ch'an kixin tsotání ch'an. Ntá íchá antsí má tsen t'èya ch'an ntáchro ch'an kixin:

—Jaha, tsik'axrjenixian ch'in David tikonóghéni —ichro ch'an.

⁴⁹ Ntá ntahá kjuák'e ch'in Jesús. Ntá k'uétoan ch'an kixin:

- T'ijehérá tí ch'ín a —ichro ch'án.
 Ntá k'uíyehé sín tí ch'ín t'íkonhya ntá chénka sín ch'án kixin:
 —Tócháha la t'ínkatjen kixin tjet'iyaha ch'án. —ichro sín.
⁵⁰ Ntá k'juak'è ch'án tí ka titsáte ch'án ntá chríka k'uínkatjen ch'án kóchjinehe ch'án tí tjen ch'ín Jesús.
⁵¹ Ntá ch'ín Jesús k'juanchankíhi ch'án tí ch'ín a kixin:
 —¿Xá nkehe t'jínkáván chrók'juít'ahá? —ichro ch'án.
 Ntá k'juátehe tí ch'ín t'íkonhya ntáchro ch'án kixin:
 —Maestro, t'jínkaonni kixin chrók'uikonni —ichro ch'án.
⁵² Ntá ntáche ch'ín Jesús tí ch'ín a kixin:
 —Ije la jína sátsjia. Ó kuítóha jína kixin kuítekáván tí janhan —ichro ch'án.
 Ntá tuénxín tí ch'ín t'íkonhya la ó k'uíkon ch'án ntá chréhe ch'án tí ch'ín Jesús.

11

Ntá ch'ín Jesús k'uixenhen ch'án chjasin Jerusalén
 (Mt. 21.1-11; Lc. 19.28-40; Jn. 12.12-19)

- ¹ Ntá tió k'juíji chjina sín chjasin Jerusalén chjinaxón tí chjasin Betfagé la ko chjasin Betania chok'èxin tí jna Olivo ntá k'uetuēnhen ch'ín Jesús iyó tí sín k'uájiko ch'án,
² ntáchro ch'án kixin:
 —Sátjirá tí chjasin ntsí chok'èxin ntiha. Ntá ikon chjasin ts'íkonrá kixin ntaha tjechroé ijnko kolócho naxa ninkexró t'jiták'áhya va. Ntá tjasintankehérá va ntá tsjikoaná va ntihi.
³ A ntá tí jnkojín chojni tsjanchankíhará sín kixin nkekuènté xíkaha ch'erá ntá tsontáchorá kixin: “Tí Maestro mé t'ichjánxínhin va ntá tió tsoxéhe va la tsijkaáni va”, ichrorá —ichro ch'án.
⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá k'juasintankehe sín va.
⁵ Ntá iso tí chojni t'jéj ntiha k'juanchankí sín kixin:
 —¿Nkekuènté xíkaha ch'erá tjasintankehérá tí kolócho a? —mé chro sín.
⁶ Ntá k'juáteexín sín éxí k'uetōan ch'ín Jesús. Ntá k'juanjon sín k'juachaxin sátsjiko sín va.
⁷ Ntá tí kolócho mé k'juikohe sín ch'ín Jesús. Na ntá iké sín k'juínchekamá sín va, ntá k'juák'ekjen ch'ín Jesús.
⁸ Ntá itsjé chojni kuakitsje sín iké sín la k'juentoá sín tinkák'íkjinxín sín ka tí ntja ts'atsínaxín ch'án. Ntá iso sín la mé tóchrínjin sín chaon nta itsá kayoa ntá xráqo sín tinkát'itjí sín ntja.
⁹ A ntá tí sín tsítaon ntja la ko tí sín chréhe iton k'juankixin sín itsje sín chéhe sín ntáchro sín kixin:
 —Tsjancheheni k'juasáyé Dios. Jína tí nkexro kuixín k'juachaxin ihnjé Ìnchéni.
¹⁰ Jína tí k'juachaxiēn Dios itsi mé ts'etueñhen tí nkexro k'uaxrjenxín it'éni David. Ntá tsjancheheni k'juasáyé Dios tjen nkaya nkajni —ichro sín.
¹¹ Ntá k'uixenhen ch'ín Jesús chjasin Jerusalén la ko k'jāxín k'uixenhen ch'án tí njnko jíé tsjehe ch'án nkuixín tí nkaxenhen. Ntá ó kóntó ntá ch'ín Jesús sákjuíko ch'án tí teyó sín k'uájiko ch'án sákjuí sín chjasin Betania.

Ch'ín Jesús kónínkakonhen ch'án ijnko nta t'óna to higo tsík'ónahya to
 (Mt. 21.18-19)

- ¹² A ntá tí kóyaon ntá k'janxín sín chjasin Betania ntá ch'ín Jesús mé k'uén ch'án kjinta.
¹³ Ntá k'uíkon ch'án k'jín kixin itjen ijnko nta t'óna to higo itsá kayoa. Ntá sákjuítsjehe ch'án tí nta kixin ákué tsahya to. Ntá k'uíkon ch'án kixin jehó ka itsa tí nta a kixin jehya tí yaon ts'óna to.
¹⁴ Ntá nijxéhe ch'ín Jesús tí nta t'óna to higo k'uetuēnhen ch'án tí nta kixin:
 —Í ninkexró sinehya tí to ts'óna tí jaha ínaá —ichro ch'án.
 A ntá tí sín k'uájiko ch'án mé kuínhin sín xíkaha.

Ch'ín Jesús k'juínchetjóá ch'án njnko
 (Mt. 21.12-17; Lc. 19.45-48; Jn. 2.13-22)

- ¹⁵ Ntá k'juíji sín chjasin Jerusalén. Ntá k'uixenhen ch'ín Jesús nkaxenhen njnko a. Ntá k'juankixin ch'án k'uínkíté ch'án tí sín nchekjixín nkehe ntiha la ko tí sín t'ena nkehe ntiha. A ntá kótéka ch'án tí mesa t'jínkítóxixín sín chichaon la ko tí silla t'jéjōken tí sín nchekji kontóá
¹⁶ la ko k'juanjonhya ch'án k'juachaxin kixin tsamá sín nkehe ts'ajixenhen sín njnko.
¹⁷ Ntá k'juak'ōhe ch'án sín ntáchro ch'án kixin:

—Ntáchro xroon itén Dios kixin: “Tí ntóna i mé it'in nchia tsonixjanaxín chojni nkuixín nacióñ”, a ntá jahará tsíkijich'énará itjuéé xíchee* —ichro ch'án.

¹⁸ Ntá tí sín nchat'á t'etóan la ko tí sín maestro tjako tí ley na mé kuínhin sín tíha, ntá kjueyá sín nkexrí chrók'óyán sín ch'án, kjánchó chrakon sín kixin kóxrjínhin tí chojni tí nkehe kjuako ch'án.

¹⁹ Kjánchó ntá ó kóntó ntá k'uaxrxjén ch'án tí chjasin a sákjuí ch'án.

Ó tsixámá tí nta t'óna to higo

(Mt. 21.20-22)

²⁰ A ntá tí nchítjen k'uaútsínka sín tí tjen tí nta t'óna to higo ntá k'uúkon sín kixin ó tsixámáxin nuèe tí nta.

²¹ A ntá ch'in Pedro xráxinkaon ch'án ntáche ch'án tí ch'in Jesús kixin:

—Maestro, tsjehé tí nta t'óna to higo kónínkakhén jna na ó tsixámá nta —ichro ch'án.

²² Ntá kjuátgehe ch'in Jesús ntáchro ch'án kixin:

—Tinkachónkirá Dios.

²³ Chaxín ntáxrjan kixin jnkójínrá chróntácherá tí jnã i kixin: “Sátjixián ntili tjíkjiankiá ntayaon”, a ntá tí kaín asánrá chrókuinkachónkirá Dios kixin chróxiteyá tí nkehe tsontáchrora, ntá xíkaha chaxín tsonhen.

²⁴ Mé xíkaha ntáxrjan kixin kaín tí nkehe tsjancheherá Dios tí tsitékáonrá kixin chaxín ts'ayéherá ntá xíkaha tsonhen tsoxiteyá.

²⁵ A ntá tío tjejonixjehérá Dios ntá jnkójín nkexro naxã ninkákonhénrá, la chrók'uitjáyahanrá tíha kixin It'ará tjen nkaya nkajní kjáxin chrókjuinck'itjáyán ch'án tí jie chontará.

²⁶ A ntá tí sijnck'itjáyanyhárá tí ijíe chojni ntá It'ará tjen nkaya nkajní la kjáxin sinck'itjáyanyhá ch'án tí jie chontará.

Tjanckankíhi sín tí ch'in Jesús nkehe tí kjuachaxin chóna ch'án

(Mt. 21.23-27; Lc. 20.1-8)

²⁷ Ntá xíkjan sín chjasin Jerusalén inaá. Ntá xritjak'e ch'án nkaxenhen njnko ntá kóchjina tí sín nchat'á t'etóan la ko tí sín tjako tí ley la ko tí sín táda t'etóan njnko

²⁸ kjuanchankíhi sín ch'án kixin:

—¿Nkehe tí kjuachaxin chonta jaha kixin xíkaha ch'e? ¿Nkexro tjáha tí kjuachaxin kixin xíkaha kjuich'e? —ichro sín.

²⁹ Ntá kjuátgehe ch'in Jesús ntáchro ch'án kixin:

—Ntá kjáxin janhan tsjánchánkíhárá ijnko nkehe, síná á chrókjuátgeherá, ntá tsotjonkará nkehe tí kjuachaxin chonta janhan kixin xíkaha it'á.

³⁰ ¿A ntá nkexro k'uetuñhen ch'in Juan kixin tsíkite ch'án chojni? ¿Á Dios ní o á chojni ó? A ntá jie la tjáteherá —ichro ch'án.

³¹ Ntá kjuankixin jehó sín tjo sín kichó sín kixin:

—Tí tsontáchroni kixin Dios tsík'etuñhen tí ch'in Juan ntá tsjanckankí tí ch'in a kixin nkekuénté kuítékakuenhyani ch'án.

³² ¿Á chróntáchroni kixin chojni ó tsík'etuñhen ch'án? —ichro sín.

Kjánchó chrakonhen sín tí chojni chjasin kixin kaín sín kuítekaon sín kixin ch'in Juan mé k'uénixja ch'án itén Dios.

³³ Ntá ntáche sín tí ch'in Jesús kixin:

—Noehyani —ichro sín.

Ntá ntáchro ch'in Jesús kixin:

—La ko kjáxin janhan tsóxrjankehya nkexro kjuanjon kjuachaxin kixin xíkaha t'á —ichro ch'án.

12

Ch'in Jesús mé kjuíncheyóexin ch'án éxl chojni ch'ehya xraq jina

(Mt. 21.33-46; Lc. 20.9-19)

¹ Ntá ch'in Jesús kjuíncheyóexin ch'án inaá ntáchro ch'án kixin:

—Itjen ijnko ch'in k'uénkaxin ch'án itsjé ntanòa t'óna to uva nontee ch'án la ko kjuich'éna ch'án corral la ko kjuich'éna ch'án ijnko tòye ts'énya sín to uva. A ntá kjuich'éna ch'án ijnko tját'o noi kixin ts'it'ótjen ch'án tsokotohe ch'án.

*A ntá kjuínckekjen ch'án tí nonte iso chojni ch'e xraq. Ntá sákjuí ch'án kjín.

² Ntá tí kjuixraká tí yaon ts'óna to ntá k'uetuñhen ch'án ijnko tí nkexro ch'ehe ch'án xraq kixin sátsjikjanchehe ch'án tí sín ch'e xraq jnkósiné tí to tsakja ch'án.

* 11:17 Isaias 56.7; Jeremías 7.11

³ Ntá tí sín ch'e xra mé tsé sín tí ch'in a, kjuate sín ch'an ntá ninkehó chjéhya sín ch'an ntá sákjuí ch'an.

⁴ A ntá tí inché tí nonte mé xíchr'an ch'an tí í jnko nkexro ch'ehe ch'an xra. Ntá kjuíji ch'an ntiha ntá chjéhe sín ch'an xro kjuíncheníhi sín kja ch'an la ko k'uántaxínhjin sín ch'an.

⁵ Ntá tí inché tí nonte a xíchr'an ch'an í jnko chojni sákjuitsjehe ntiha. Ntá kjuíji ch'an ntiha ntá k'óyán sín ch'an. Ntá chr'éxin tí inché mé xíchr'an ch'an í so nkexro ch'ehe ch'an xra sákjuitsjehe sín, kjánchó iso sín k'uékon sín la í so sín la k'óyán sín.

⁶ Ntá jehe ch'an chóna ch'an jnkokoáxon xjeen ch'an na imá tjuéhe ch'an tí xjan a. Ntá kjuixixín chr'an ch'an tí xjan sákjuí xjan kixin kjuenkayáxin ch'an kixin: "Tsochóntehe sín kjuasáyé tí xjanna", ichro ch'an.

⁷ A ntá tí sín ch'e xra a tjo sín kichó sín kixin: "Tí ch'in í mé ts'áyéhe kaín nkehe siín ntihi. A ntá jie ts'óyáni ch'an, a ntá jeheni ts'áyéheni kaín tí nkehe a", ichro sín.

⁸ Ntá xikaha itsé sín ch'an k'óyán sín ch'an ntá kuakitsjexín sín ntöe ch'an tí nontee ch'an.

⁹ A ntá kjuanchankí ch'in Jesús ntáchro ch'an kixin:

—¿A ntá nkehe chrókjuich'e tí inché tí nonte a? Chrókui ch'an chrók'óyán ch'an tí sín ch'e xra, a ntá chróchjéhe ch'an ókjé chojni.*

¹⁰ ¿Á kjuinchekuáxinhyará jahará tí xroon itén Dios? Ntáchro xikihí:

Tí xro náxrjónhya kuítöenta tí sín ch'éna tjat'o,

mé jie k'óna tí xro tjetöan.

¹¹ Mé xikaha kjuích'le Ínchéni Dios,

na ntá tiha mé ijnko nkehe kjuachrakon k'uíkonní† —ichro ch'in Jesús.

¹² Ntá chrótsé sín tí ch'in Jesús chrókjuak'echjina sín ch'an kixin kíenxín sín kixin kaín tí ntáchro ch'an la jehe ch'an k'uántaxínhjin tí jehe sín. Kjánchó chrakon sín kixin nchónhya chojni kóchjina ntá kuítöe sín ch'an ntá sákjuí sín.

¿A jina chrókjuenkehe sín gobierno?

(Mt. 22.15-22; Lc. 20.20-26)

¹³ A ntá ichr'an sín iso tí sín fariseo la ko iso tí sín kuente ch'in Herodes kixin tsjanchankíhi sín ch'an iso nkehe kixin tí ntoáhya chrókjuatehe ch'an ntá jina chrók'ueka sín ch'an jie.

¹⁴ Ntá kjuíji sín tí tjen ch'in Jesús ntáchro sín kixin:

—Maestro, ó noheni kixin tí nkehe chronka la chaxín tiha la ko jehya nkexrí tsjehe chojni tjenkayáxixián kixin á jina sín, la ko ntoá tjákua ntje Dios. ¿Á jina chrókjuenkeheni tí gobierno tí chichaon tjanchia? ¿Á chrókjuenkeheni sín ní o náhi? —ichro sín.

¹⁵ Ntá ch'in Jesús kjuátögan ch'an kixin jehya jina tjenkayáxin sín ntáchro ch'an kixin:

—Jehya jina kixin tjácha_xin_ráni. Xrákoará ijnko tí chichaon tjanchia sín tsotsjáha —ichro ch'an.

¹⁶ Ntá xráko sín ijnko tí chichaon tsotsjehe ch'an. A ntá kjuanchankí ch'an kixin:

—¿Nkexro tí tsik'axrxjén tjenkáni tí chichaon i la ko nkexro ihnié chóna? —ichro ch'an.

Ntá jehe sín kjuátehe sín kixin:

—Tí ch'in t'etögan mé tjenkáni ch'an —ichro sín.

¹⁷ Ntá kjuátehe ch'in Jesús ntáchro ch'an kixin:

—Chróchjehérá tí ch'in gobierno t'etögan tí nkehe kuente ch'an; a ntá tí nkehe kuente Dios la chróchjehérá Dios —ichro ch'an.

Ntá chrakon sín kixin xikaha kjuátehe ch'an.

Kjuanchankí sín kixin á chaxín tsoxechón chojni

(Mt. 22.23-33; Lc. 20.27-40)

¹⁸ A ntá iso sín saduceo kuitsjehe sín tí ch'in Jesús. A ntá tí sín saduceo mé ntáchro sín kixin chaxínhya tsoxechón chojni tsik'en mé xikaha chrókjuachaxín sín tí ch'in Jesús ntáchro sín kixin:

¹⁹ —Maestro, ch'in Moisés mé tsikjin ch'an xroon ntáchro kixin tí ts'en ijnko savé chojni la ko naxa tjan tí ichjién ch'an na ko tsíkjich'énahya sín xjeen sín ntá tí kichó tí nkexro tsik'en mé chrókuaqá tí tjan k'an a ntá tí xjeen sín mé ts'óna éxi xjeen tí nkexro tsik'en.‡

²⁰ Kjánchó k'uéjé yato sín jnkokoá kichó sín. Ntá tí ch'in sao mé kuákja ch'an ichjién ch'an. Ntá ik'uén ch'an, kjánchó ninkehó xjan tsíkjich'énahya sín.

²¹ Ntá tí ch'in tsoyo yóxin kuákja ch'an tí tjan k'an ntá k'uén ch'an koí ch'an. Ntá kjaxin tsíkjich'énahya sín xjan. A ntá tí ch'in níxin kuákja ch'an tí jjehe tjan ntá xikaha kónhen inaá.

²² Ntá kayatoé sín k'uéchóna sín tjan la ko kaín sín ik'uén sín la ko ninkehó xjan kjuích'énahya sín kaín sín. Ntá kjuixixín ntá k'uén tjan kjaxin tjan.

* 12:9 Isaías 5.1-7 † 12:11 Salmó 118.22-23 ‡ 12:19 Deuteronomio 25.5

²³ Ntá tió tsorexhón kaín xín chojni la, ¿Ntá nkexro ts'óna xii tjan kixin kayatoé sín tsíkótehe tjan? —ichro sín.

²⁴ Ntá kjuátehe ch'in Jesús ntáchro ch'án kixin:

—Ntoáhya tjenkayáxinrá kixin tiénxinhyará nkehe ntáchro tí xroon itén Dios la ko chonhyará tí kjuachaxién Dios.

²⁵ A ntá tió tsorexhón tí chojni tsík'en la tsotēheya sín la ko tsjanjonhya sín xjeen sín kixin tsotēhe sín kixin tí sín tsík'en la éxi sín ángel ts'ejó sín nkaya nkajni.

²⁶ A ntá tí tsorexhón tí sín tsík'en, ¿á kjuinchekuáxinhyará tí xroon tsíkjin ch'in Moisés chrónka nkexrí k'uénixjeexín Dios ijnko nta yoa tjeche ntáchro ch'án xíkiki: “Janhan mé tí Dios tinkáchónki ch'in Abraham la ko ch'in Isaac la ko ch'in Jacob”?[§]

²⁷ Méxra tí Dios i la jehya tinkáchónki tí sín tsík'en. Náhi. Jehé ch'án mé Dios tinkáchónki tí sín tjejóhón. Ntá jahará la imá tiénxinhyará kixin xíkaha ichrorá tjanchankirá —ichro ch'án.

Tí nkehe antsí imá tjeoan tsík'etōan Dios

(Mt. 22.34-40)

²⁸ Ntá kui ijnko ch'in tjako tí ley kjuák'ekinhin ch'án nkexrí kjuachaxin sín ch'in Jesús. Ntá kuinhin ch'án kixin imá jina kjuátehe ch'in Jesús. Ntá kjuanchankí ch'án ntáchro ch'án kixin: —¿Nkehe tí antsí tjeoan tsík'etōan Dios? —ichro ch'án.

²⁹ Ntá kjuátehe ch'in Jesús ntáchro ch'án kixin:

—Tí nkehe antsí tjeoan tsík'etōan Dios mé tíhi: “Tinhínrá kaín rá chojni Israel kixin Ínchéni Dios la mé jnkokoá la kohya í jnko nkexro.

³⁰ Ntá kaín asánrá la ko kaín kjuaxrexinkaon kuéntará la ko kaín fuerza kuéntará chrótuèxinrá.”* Mé xíkaha tí nkehe antsí tjeoan tsík'etōan Dios.

³¹ A ntá tí nkehe yóxin tsík'etōan Dios la mé tóyóhe na mé ntáchro xíkiki: “Chrótuèhérá kichuára éxi tjuèxinrá asánrá,”† la kohya í jnko nkehe antsí má tjeoan tsík'etōan ch'án —ichro ch'in Jesús.

³² A ntá kjuátehe tí ch'in tjako njnko a ntáchro ch'án kixin:

—Ntoá ntáchrúa tíha, Maestro kixin chaxín itjen jnkokoáxon Dios la ko kohya í jnko Dios.‡

³³ Noheni kixin kaín asénni la ko kaín kjuaxrexinkaon kuénténi la ko kaín fuerza kuénténi chrótuèxinni Dios la ko chrótuèheni kichó ni éxi tjuèxinni asénni.§ Tíha mé antsí má sínkí. A ntá kaín tí ko chrók'óyánni chrókjuanjoni chróhjánxin chrítaon altar la kánhyó tjeoan tíha —ichro ch'án.

³⁴ A ntá tió k'uíkon ch'in Jesús kixin jina kjuenkayáxin ch'án kjuátehe ch'án ntá ntáchro ch'án kixin:

—Jaha la kjinhya tjen tí kjuachaxin kuénte Dios —ichro ch'án.

Ntá kóxakonhen sín ntá ninkexró kjuanchankíehya sín ch'án í so nkehe.

¿Xá nkexro It'é tí Cristo?

(Mt. 22.41-46; Lc. 20.41-44)

³⁵ Ntá ch'in Jesús kjuák'ekjako ch'án tí njnko jíé. Ntá kjuanchankí ch'án ntáchro ch'án kixin:

—¿Nkexrí kixin tí sín tjako tí ley mé ntáchro sín kixin tí Cristo mé ts'axrjénixín tí ch'in David?

³⁶ A ntá tí Nchakuen Dios mé kjuínkítsa tí ch'in David ntáchro ch'án kixin:

Ínchéni Dios ntáche tí Ínchéni kixin:

“Tjak'e tjaná chjina ntihó tsétōan,

tsjixinjian kaín xín tí sín nínkakonhan la tsjachahya sín ts'etōan sín kixin jahvá mé tsétōan”*

³⁷ ¿Xá nkexrí kixin Cristo chrók'óna xjeen ch'in David kixin jehé ch'in David ntáchro ch'án kixin Ínché ch'án tí Cristo a? —ichro ch'án.

Ntá itsjé chojni k'uéjókinhin sín kóxrjínhin sín tí nkehe kjuako ch'án.

Ch'in Jesús chrónka nkexrí ch'e tí sín tjako tí ley

(Mt. 23.1-36; Lc. 11.37-54; 20.45-47)

³⁸ Ntá ch'in Jesús kjuako ch'án ntáchro ch'án kixin:

—Tankíehyará tí sín tjako tí ley. Jehé sín mé tóxrjínhin sín chrók'uinkáya sín ka kjinjin la ko tjinkaon sín kixin kaín tí chojni tsoxeta sín ntja mé tsjikosáyehe sín.

³⁹ Jehé sín xritjeyá sín tí nta antsí náxrjón ts'ejóyá sín tí nkaxenhen njnko. La ko kjaxin tió sátsji sín tí sine sín xritjeyá sín tí nta antsí náxrjón ts'ejóksen sín sine sín.

⁴⁰ La ko takitsje sín ntōe chojni k'án. La ko ch'iyexin sín chojni kixin isé nixjehé sín Dios kixin chrókuinhin chojni chróntáchro sín kixin imá jina tí jehé sín. Tí sín a mé antsí má tsjasóte sín —ichro ch'án.

§ 12:26 Éxodo 3.6 * 12:30 Deuteronomio 6.4-5 † 12:31 Levítico 19.18 ‡ 12:32 Deuteronomio 4.35 § 12:33

Oseas 6.6 * 12:36 Salmo 110.1

Tí ofrenda kjuanjon ijnko tjan k'án
(Lc. 21.1-4)

⁴¹ A ntá jnkonaá mé ch'ín Jesús tjetjaxin ch'án nkaxenhen nijnko chók'èxin tjen tí ntacajón tjetóxroyéya ofrenda. Ntá tjetsjehe ch'án kixin nchónhya chojni tinkáki sín chr'áxenhen sín chichaon tí ntacajón. La ko kjaxin nchónhya tí sín rico chr'áxenhen sín nchónhya chichaon tí ntacajón a.

⁴² Ntá kjaxin ntiha mé kjui ijnko tjan k'án nòta tjan ntá chr'áxenhen tjan tí ntacajón yaá chichaon kánhyó tjeje sínkí.

⁴³ Ntá ch'ín Jesús k'uíyehé ch'án tí sín k'uájiko ch'án ntáchro ch'án kixin:

—Chaxín ntáxrjan kixin tí tjan k'án nòta tjan antsí tjeje k'uikon Dios tí chichaon chr'áxenhen tjan tí ntacajón, a ntá tí sín í so la kánhyó

⁴⁴ kixin kaín sín la ó chichaon xéhe sín kjuanjon sín. Ntá jehe tjan la kjónté nòta tjan la kjuanjon tjan kaín tí chichaon k'uéchénta tjan chrók'uíte nkehe chrókjóné tjan —ichro ch'án.

13

Ch'ín Jesús chrónka kixin tsoxika nijnko
(Mt. 24.1-2; Lc. 21.5-6)

¹ A ntá tió k'uaxrjexín ch'ín Jesús tí nijnko jié ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátehe ch'ín Jesús ntáchro ch'án kixin:

—¿Á tsjehé jaha tí nchia jié tsík'óna ní? Tsjixraká tí yaon la í ninkehó xro ts'ejókjehya kichó, la kaín tíha la tsoxika —ichro ch'án.

Tí nkehe tsonhen chjina tí tsjixixín
(Mt. 24.3-28; Lc. 21.7-24; 17.22-24)

³ A ntá sákjuí sín chritaón tí jna Olivo chók'èxin tjen tí nijnko a. Ntiha kjuák'etjaxin ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín Andrés kjuanchankíhi sín ch'án nkehe, ntáchro sín kixin:

⁴ —Tjinkaonni tsochronka nkesá tsonhen tíha la ko nkexrí tsoñoexinni nkesá tsoxiteyá kaín tíha —ichro sín.

⁵ Ntá ch'ín Jesús kjuátehe ch'án ntáchro ch'án kixin:

—Tóxakonhanrá tjetóehyará kixin ninkexró chrókjuít'ayahyará.

⁶ Nchónhya chojni tsi tsontáchro sín kixin jehe sín mé Cristo. Ntá xikaha sich'iyehé sín nchónhya chojni.

⁷ A ntá tió tsinhínrá kixin tjanjonko kichó sín la t'óyán kichó sín la chrakonhyará tóxakuanhyará ó jehí tsonhen tíha. Kjónté xikaha naxa tsjejehya chjasintajni.

⁸ Ijnko nación tsjanjonko í jnko nación. La ntiha la ntaha la tsinkí nonte la ko itsjé chjasin na tsokjinta la ko ts'ixité sín tsonínkaon sín. Tíha na ntá xrankixixón tí kjuatjoté.

⁹ Tóxakonhanrá jahará kixin mé tsjikaánrá sín nkayakon tí sín t'etóan ntá tí nkaxenhen nijnko ntiha mé tsjatiaxínrá sín. Jahará t'ichjánxin tsochjinará tí tjejó tí sín gobernador la ko tí sín rey kixin tinkachónkirá tí janhan; ntá tsjachará tsochronkará nkexrí tinkachónkirá tí janhan nkayakon tí jehe sín.

¹⁰ Tí naxa ts'itjáyanyha chjasintajni la mé t'ichjánxin tsinhin chojni kaín xín nación tí tan jina tsaáxin sín.

¹¹ Tió sátsjikoará sín tsjikaánrá sín tí tjejó tí sín t'etóan, la tóxakuanhyará nkehe tsjateherá la ko nkehe tsjenkayáxinrá. Náhi. Chronkará tí nkehe kjuanjon Dios tsontáchrórá tí hora a, kixin jahyará tsonixjará. Náhi. Nchakuen Dios mé tsonixja.

¹² Iso chojni kjónté naxa kjéhya sín tsjikaán tí kichó sín kixin its'en. La ko kjaxin xikaha iso chojni tsjikaán tí xjeen sín la ko kjaxin iso sín tsonínkakonhen sín tí it'é la ko ìné la tsjikaán sín kixin its'en.

¹³ Kaínxin chojni chjasintajni tsonínkakonhanrá sín kixin tinkachónkirá tí janhan. A ntá tí sín tsítóehya tinkáchónki sín tí janhan hasta tsjixixín ná mé tsaá sín.

¹⁴ Tsjixraká ijnko yaon ts'ikonrá tsjak'e tí nkehe jínahya tí chrókjuak'ehya éxí tsintáchro profeta Daniel* —ntá tí chojni sinchekuáxin tí xroon í mé chrókuienxin sín tíha—, a ntá tí chojni tjejó estado Judea ts'ikon sín xikaha la sátsji sín tsochriin sín jna tsjik'ejómá sín.

¹⁵ A ntá tí sín tjejó chritaón nchia la í chrók'uínkajinnya sín, chrók'uixenhya sín nkaxenhen nchia chrókuakitsje sín ichrén nkehe chóna sín.

¹⁶ Ntá tí sín tjejó nontee sín la í chrókjanhya sín naxa chrókjuikakja sín iké sín.

¹⁷ Ntá nòta tí chojni chjin ts'ejóyá tí yaon a la ko tí sín tjejónchekakí xjeen.

* 13:14 Daniel 9.27; 11.31; 12.11

¹⁸ Chrókjuanchehérá Dios kixin jehya nchakuen kin chrókónhen tíha.

¹⁹ A ntá tí yaon a mé imá kjuaxróxinhya ts'ejó chojni kixin ninkehó yaon kuènhya xikaha desde tí kjuankixixín Dios kjuich'èna ch'án chjasintajni la ko kjá xikaha tsonhen chr'èxin inaá.

²⁰ A ntá tí chrókjuanjon Ìnchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. A ntá náhi la kuikonóheh ch'án tí sín tsíkjevá ch'án ntá k'uetóan ch'án kixin tjoka ts'atsínka tí kjuachrakon a.

²¹ A ntá jnkojin nkexro tsontáchro kixin: “Tsjehe, ntíhi itjen tí Cristo”, o tsontáchro sín kixin: “Tsjehe, ntíha tjen ch'án”, la titekakuènyará sín.

²² Na mé itsi iso sín tsontáchro sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jíe tjinkaon sín chrókjuich'iyexín sín chojni, kjónté tí sín tsíkjevá Dios.

²³ A ntá jahará chrokóxakonhanrá kaín tíha. Tjéjtjenkará senó kixin tsonohará kixin xikaha tsonhen.

*Itsi tí Xjeen Dios K'óna Chojni
(Mt. 24.29-35, 42-44; Lc. 21.25-36)*

²⁴ Ntá ts'atsínka tí kjuachrakon la ntá tí yaon la ts'inkaséyanhya, a ntá tí nitjó la tsjanjonhya xrohi.

²⁵ A ntá tí konotsé la ts'anótjenxin nkajni la ko tí kjuachaxin siín nkaya nkajni la kjaxin tsinki.

²⁶ Ntá ts'ikon sín tí Xjeen Dios K'óna Chojni itsi chríkjan tjuj tsíkao tí kjuachaxin jíe.

²⁷ Ntá tsochr'án ch'án tí sín ángel sátsji sín kuenté chjasintajni tsjikjenájín sín kaín chojni tsíkjevá ch'án.

²⁸ Chrókiéxinrá tí nkehe sjintayóaxian. Éxí yóhe tí nta t'óna to higo tió sit'ayan kahnte ntá nohará kixin ts'ixenhen nchakuen sóa

²⁹ mé xikaha tió ts'ikonrá xikaha tsonhen kaín tíha ntá tsonoaxínrá kixin ó kuichjina tí tsjeje chjasintajni.

³⁰ Chaxin ntáxrjan kixin kaín tíha tsonhen tí naxá t'enhya tí chojni siín chjasintajni.

³¹ A ntá tí nkajni la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

³² A ntá tí yaon la tí hora tsoxiteyá tíha la ninkexro noehya. Kjaxin noehya tí sín ángel tjejó nkaya nkajni la ko kjaxin tí Xjeen Dios K'óna Chojni la noehya. Ó jehó It'èni mé nohe.

³³ Méxra chrók'uejotsjehérá, chrók'uejochonhénrá chrónixjehérá Dios kixin noahyará nkesá la ko nkehora tsonhen tíha.

³⁴ Éxí yóhe ijnko chojni sátsji kjín, a ntá tí naxá sátxixínhya ch'án ntóe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntóe ch'án, la jnkojnko sín ts'áyéhe sín jnkojnko xra kuènte sín. La ko ts'etuenhen ch'án ijnko ch'ín tsjak'e ts'ayakonhen ch'án tí ntója nchia.

³⁵ Méxra jahará chrók'uejotsjehérá kixin noahyará nkesá tsokjan tí ìnehé tí nchia a, á ijnko tsontanonte o á ijnko k'áxrótjen o á ijnko tjetje tsje cochiká o á ijnko ts'inkaséyan.

³⁶ Ntá xrináhya tsi ch'án ts'itjaxín ch'án kixin tjejochrinrá.

³⁷ Mé xikaha tjonkará la ko xikaha ntátjan kaín chojni kixin chrók'uejótjsjehe sín —ichro ch'án.

14

*Tjoyá sín kixin nkexrí tsotsé sín tí ch'ín Jesús
(Mt. 26.1-5; Lc. 22.1-2; Jn. 11.45-53)*

¹ Naxá t'itjáyan iyó yaon ntá tsjasin sín tí kia pascua, la ko sine sín tí niotja tsikjikohya tí xroan nchek'ánki niotja.

Ntá tí sín nchat'á t'etóan la ko tí sín maestro tjako tí ley mé kjuéyá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyán sín ch'án.

² Ntá ntáchro sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókónínkaon sín —ichro sín.

*Ijnko tjan kuikítexín aceite náxrjón xraxé ikja ch'ín Jesús
(Mt. 26.6-13; Jn. 12.1-8)*

³ A ntá ch'ín Jesús kjuák'e ch'án chjasin Betania ntóe ch'ín Simón, tí ch'ín k'uéchonta chinlepra. A ntá tí tjene ch'ín Jesús ntá xrináhya ikui ijnko tjan kuikáo tjan ijnko xro mé tjá tí aceite xraxé itsjo nardo, imá tjeje tsik'ite. Ntá tí tjan a mé kuakítjehe tjan tí xro a ntá kuikíte tjan kja ch'ín Jesús tí aceite a.

⁴ A ntá iso tí sín tjejó ntíha kónínkakonhen sín tjan ntáchro sín kixin:

—¿Nkeuènte kjuínchexénhen tjan tí aceite náxrjón xraxé?

⁵ Íchá jína chrókóxixín iní ciento chichaon denario tí aceite a ntá tí chichaon a mé chrókúitónhen tí chojni nòa —mé xíkaha ichro sín k'uántaxínhín sín tjan.

⁶ Ntá ntáchro ch'ín Jesús kixin:

—Nté tjtóherá tjan; ¿nkeuènte t'antaxínhínrá tjan? Ó nchoxon tí nkehe kjuích'ena tjan.

⁷ A ntá tí chojni nòa la ó xráxín ts'ejókoará sín la jína tsjínkítasará sín jnkojín yaon. Ntá janhan la jnkochríxínhya ts'ejóni.

⁸ Ntá jehe tjan kjuích'e tjan kaín nkehe tjinkaon tjan tsjanjon tjan. Ó senó kjuíncheka tjan xroan cuerpo kuéntana kixin tsoxravána.

⁹ Chaxín ntáxrjan kixin tí tsjako sín tí tan jína tsaáxin chojni nkuíxín chjasintajni ntá tsochronka sín kixin xíkaha kjuích'e tí jehe tjan, a ntá xíkaha tsoxraxinkakonxín sín tjan kixin xíkaha kjuích'e tjan —ichro ch'án.

Ch'ín Judas kjuínchekji ch'án tí ch'ín Jesús

(Mt. 26.14-16; Lc. 22.3-6)

¹⁰ A ntá ch'ín Judas Iscariote mé ijnko teyóxin sín k'uájiko ch'ín Jesús a mé sákjuítsjehe ch'án tí sín nchát'á t'etóan kixin tsochrónka ch'án nkexrí tsotsé sín tí ch'ín Jesús.

¹¹ A ntá jehe sín la chéhe sín kuínhin sín ntá ntáchro sín kixin chaxín tsjanjon sín chichaon ts'áyéhe tí ch'ín Judas. Ntá kjuankixin ch'án kjueyá ch'án nkexrí tsochrónka ch'án kixin tsotsé sín tí ch'ín Jesús.

Kjóneko sín tí ch'ín Jesús

(Mt. 26.17-29; Lc. 22.7-23; Jn. 13.2-30; 1 Co. 11.23-26)

¹² A ntá kui tí yaon xrankíxixín kia sine sín niótja tsíkikohya tí xroan nchek'ánki nio tíó ts'óyán sín tí kolélo kuènte kia pascua. A ntá tí sín k'uájiko ch'ín Jesús mé kjuanchankíhi sín ch'án kixin:

—¿Nketí tjínkávan sátsjini sincheyaxíxini kixin sineni kuènte tí kia pascua? —ichro sín.

¹³ Ntá k'uétuènen ch'án iyó tí sín k'uájiko ch'án ntáchro ch'án kixin:

—Sátjirá chjasin Jerusalén ntá ntiha tsoxetará ijnko ch'ín yámá tóa tjía ntá. Tí ch'ín a tsochréhérá.

¹⁴ A ntá tí nchia ts'ixenhen ch'án la tsjanchankíhírá tí ìnehé nchia, tsontáchrórá kixin: “K'uétóan tí Maestro kixin: ¿Nketí tjan tí cuarto sinexínko ch'án tí sín xriko ch'án tí kia pascua a?” xíkaha mé tsixrorá.

¹⁵ Ntá tsjakohará ch'án ijnko cuarto jíé, yóxin piso mé chónka kaín nkehe t'ichjánxín. Mé ntaha mé sincheyaxíxínrá tí nkehe sineni —ichro ch'án.

¹⁶ Ntá jehe sín la sákjuí sín chjasin Jerusalén na ntá éxí chrónka ch'ín Jesús mé xíkaha k'uitja sín. Ntá tí cuarto a mé kjuíncheyaxíxín sín tí nkehe sine sín kuènte tí kia pascua.

¹⁷ A ntá ó kóntó ntá ó kjuíji ch'ín Jesús la ko tí teyó sín k'uájiko ch'án tí nchia ntiha.

¹⁸ Ntá k'uéjío sín, a ntá tíó tjejóne sín ntá ntáchro ch'ín Jesús kixin:

—Chaxín ntáxrjan kixin ijnko tí jahará tjejóne jnkokoá ntihi mé sinchekjiráni —ichro ch'án.

¹⁹ Ntá jehe sín mé kjuankixin k'uává sín. Ntá kjuankixin sín jnkojnko kjuanchankíhi sín tí jehe ch'án kixin:

—¿Á janhan ní? —ichro sín.

²⁰ Ntá kjuátéhe ch'ín Jesús ntáchro ch'án kixin:

—Jehe ch'án mé ijnko tí teyóxinrá, mé tí nkexro tjeñekian jnkokoá plato ntihi.

²¹ Chaxín tí Xjeen Dios K'óna Chojni mé tsonhen éxí níxja xroon itén Dios. Kjánchó nòa tí ch'ín sinchekji ch'án. Íchá jína tí ch'ín a la chrókokjéhya ch'án —mé xíkaha ichro ch'án.

²² A ntá nachrohe tjejóne sín na ch'ín Jesús kuákja ch'án ijnko niótja, ntá kjuanchia ch'án kjuasáyé Dios. Ntá kjuixín ntá kóchrít'ó ch'án tí niótja ntá kjuanjón ch'án k'uáyéhe sín. Ntá ntáchro ch'án kixin:

—Interá, tíhi mé cuerpo kuéntana —ichro ch'án.

²³ Na ntá kjaxín kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjía.

²⁴ Ntá ntáchro ch'án kixin:

—Tíhi mé jnna mé chrónkaxín kixin chaxín tsoxiteyá tí nkehe níxin tsonhen na mé ts'itjí kixin tsaáxin nchónhya chojni.

²⁵ Chaxín ntáxrjan kixin ts'íhya janhan tí inté to uva inaá tí naxá tsjixrakáhya tí yaon itsi kjuachaxín kuènte Dios, a ntá tí yaon a xik'ia inté to uva níxin —mé xíkaha ichro ch'ín Jesús.

Ntá ch'ín Jesús chrónka ch'án kixin ch'ín Pedro sinchemá ch'án kixin chónhya tí jehe ch'án

(Mt. 26.30-35; Lc. 22.31-34; Jn. 13.36-38)

²⁶ Ntá kjuixín itsje sín ijnko himno kuènte Dios ntá sákjuí sín tí jnā Olivo.

27 Ntá ch'ín Jesús ntáchro ch'án kixin:

—Ijie tie kaín rá tsochrakonrá ntá tsjtonará. Ntá tsoxiteyá éxí ntáchro xroon iten Dios kixin: “Ts'óyán sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va.”*

28 A ntá tió tsoxechónna ntá sátsjia estado Galilea ntá ntiha tsoxetani —ichro ch'án.

29 Ntá ntáchro ch'ín Pedro kixin:

—Kjónté kaín sín tsítóha sín ntá janhan la náhí —ichro ch'án.

30 Ntá ntáchro ch'ín Jesús kixin:

—Chaxín ntáxrjan kixin ijie tie tí naxa tsjehya kochintoa yáya, la jaha mé sijnchemána níya kixin chonhyana, tsixrua —ichro ch'án.

31 Ntá itsen kjuátehe ch'ín Pedro ntáchro ch'án kixin:

—Kjónté koína its'én la sijnámáhya tí jaha —ichro ch'án.

La ko xikaha ntáchro sín kaín sín.

Ch'ín Jesús nixjexín ch'án Dios tí Huerto Getsemaní

(Mt. 26.36-46; Lc. 22.39-46)

32 Ntá kjuíji sín ijnko nonte mé it'ín Getsemaní. Ntá k'uetuēnhen ch'ín Jesús tí sín k'uájiko ch'án kixin:

—Tjejorá ntihyó nachrohe janhan tsonixjaha Dios —ichro ch'án.

33 Ntá sákjuiko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankixin imá k'uává asén ch'án kóxakonhen ch'án.

34 Ntá ntáche ch'án sín kixin:

—Imá t'ává asenná éxí chrók'uén xikaha. Ijie la ntihyó titohará tjejtsjehérá —ichro ch'án.

35 Ntá sákjuí ch'án ijnko kjínhya ntá kjuák'exín toch'in ch'án. Ntá kjuankixin chrónóheh ch'án Dios kixin chrókjuanjon ch'án kjuachaxin kixin chrókjuasótehya ch'án tí nkehe chrókónhen ch'án tí yaon a.

36 A ntá ntáchro ch'án kixin:

—It'éni jaha. Jaha mé chonta kaín xín kjuachaxin na ntá chrónóghani tsjakjínhinni kaín tí jínahya tsonhenni tsjasóteni jie. Jehya kixin chrókónhen éxí tjinkaonni jeheni. Náhí. Éxí tjinkávan jaha —ichro ch'án.

37 Ntá kjan ch'án ntá k'uitjaxín ch'án tí sín kuítqhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora?

38 Ijie la tjejtsjehérá la ko chronóghérá Dios kixin títqehya ch'án tí jínahya chrókjuichroerá. Tí asánrá ntáchro kixin chrókjuinchesteyará tí jína kjánchó tí cuérporá la tsjachahya —ichro ch'án.

39 Ntá sákjuí ch'án inaá chrónóheh ch'án Dios. Ntá ó jehe xikahó xínixja ch'án.

40 Ntá ikjan ch'án la ó tjejójua sín inaá kixin kuíhí sin kotáchrin. Ntá í noehya sín nkexrí chrókjuatehe sín.

41 Ntá níxin sáxlkji ch'án ntá kjan ch'án ntá ntáchro ch'án kixin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojní ts'áyéhe tí sín chóna jie sinchekjasóte sín ch'án.

42 Ntá t'áyará sátsjini kixin ó kjui tí nkexro sinchekjina.

Sákjuiko sín tí ch'ín Jesús tsjak'echjina ch'án

(Mt. 26.47-56; Lc. 22.47-53; Jn. 18.2-11)

43 Naxa tjenixja ch'ín Jesús ntá xrináhya kjuíji ch'ín Judas, mé ijnko tí teyóxin sín k'uájiko ch'ín Jesús. Nchónhya chojni kjuíkao ch'án kjuíjiko sín ch'ína espada la ko inta. Na mé kjuachaxién tí sín nchát'á t'etqan la ko tí sín maestro tjako tí ley la ko tí sín táda t'etqan njnko mé kjuixín sín.

44 A ntá tí ch'ín Judas mé tí ch'ín sinchekji tsintáchro ch'án kixin:

—Tí ch'ín sinékian kochíto mé jehe tiha la itsérá ch'án sátsjioará ch'án —ichro ch'án.

45 Ntá kjui sín ntá tuénxín kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto.

46 A ntá tí sín kjuíji mé tsé sín tí ch'ín Jesús, sákjuiko sín ch'án.

47 A ntá ijnko ch'ín tjentaxín ntiha mé kuakitsje ch'án ch'ína espada kóchrinjin ch'án tajsjon tí ch'ín ch'ehe tí nchát'á t'etqan xra.

48 Ntá ch'ín Jesús mé ntáche ch'án tí sín a kixin:

* 14:27 Zacarías 13.7

—¿Nkeuènté kixin éxí chròtserá xíchee mé xíkaha k'uinkakoará chica espada la ko inta kixin tsotseráni?

⁴⁹ Kaín yaon kjuak'é nkaxenhen núnko kjuákoará, ¿ntá nkeuènté tsehyaráni? Kjánchó t'ichjánxin xíkaha tsonhen kixin tsoxiteyá tí nkehe nixja xroon itén Dios —ichro ch'án.

⁵⁰ Ntá kaín tí sín k'uájiko ch'án na mé kuitche sín ch'án jehó ch'án ntá sákjuí sín.

Ijnko ch'in ntasoá sákjuixin ch'án ntiha

⁵¹ A ntá ijnko ch'in ntasoá mé kjaxin tinkáchréhe ch'án ntiha, a ntá jehó ijnko kamantá tjetsáte ch'án, ntá kjaxin itsé sín ch'án.

⁵² Kjánchó tí ké ch'án ó tsítsé sín ntá kjónté tjóchin ch'án sákjuí ch'án.

Ch'in Jesús kóchjina ch'án tí tjejó tí sín t'etoan

(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Ntá sákjuíko sín tí ch'in Jesús tí ntóe tí nchat'á imá t'etoan. Ntaha mé tsikójnkotsé kaín tí sín nchat'á t'etoan la ko tí sín táda t'etoan núnko la ko tí sín maestro tjako tí ley.

⁵⁴ Ntá ch'in Pedro la ikjín tjechréhe ch'án ntá kjuíji ch'án tí ntásin ntóe tí nchat'á imá t'etoan a. Ntaha síche xrohi. A ntá ntiha tjejótxajin tí sín policía tjejótxjxrohe sín, ntá kjaxin ch'án ntahó kuitche ch'án tjechjxrohe ch'án.

⁵⁵ Ntá tí sín t'etuennen tí sín nchat'á la ko kaín tí sín t'etoan kjuéyá sín chojni kixin tsochrónka sín nkehe tí jie chónka ch'in Jesús kixin jína chrók'óyán sín ch'án. Kjánchó ninkexró k'uitjaha sín tsjinkjtsa tsochrónka.

⁵⁶ Kjánchó itsjé sín ntáchro sín kjuach'ia ó t'eka sín ch'án jie kixin jnkokónhya tí nkehe ntáchro sín.

⁵⁷ Ntá k'uínkatjen iso sín ntá chaxínhya tí jie kjuanchia sín. Ntá ntáchro sín kixin:

⁵⁸ —Jeheni ó kuínhinni kixin ntáchro ch'án kixin ts'óxika ch'án tí núnko tsíkjich'énaxín chojni tja ntá ini yaon koá la ó tsjak'e ch'án i jnko núnko jehya chojni sich'éna[†] —ichro sín.

⁵⁹ Kjónté xíkaha la jnkokónhya tí nkehe chrónka sín.

⁶⁰ Ntá tí ch'in t'etuennen tí sín nchat'á k'uínkatjen ch'án tí tjejó kaín sín ntá kjuanchankíhi ch'án tí ch'in Jesús kixin:

—¿Á ninkehó tjeatehya jaha? ¿Á chaxín tí jie t'eka sín tí jaha? —ichro ch'án.

⁶¹ Ntá ch'in Jesús táni ch'án la ninkehó tjeatehya ch'án. Ntá xíkjanhankí tí nchat'á t'etoan ntáchro ch'án kixin:

—¿Á jaha tí Cristo Xjeen Dios imá tjóá? —ichro ch'án.

⁶² Ntá ntáchro ch'in Jesús kixin:

—Chaxin janhan tíha. Ntá chr'éxin ts'ikonrá kixin tí Xjeen Dios K'óna Chojni mé tsjak'etjajin ch'án tí tja chjina kjuachaxin kuènte Dios la ko itjuí mé ts'inkajinxin ch'án nkaya nkajni —ichro ch'án.

⁶³ A ntá tí nchat'á t'etoan kótséchje ch'án tí iké ch'án kjuákoxin ch'án kixin imá nínkaon ch'án ntáchro ch'án kixin:

—T'ichjánxinhya í so chojni tsochrónka nkehe.

⁶⁴ Jahará ó kuínhínra kixin k'uántaxínjin ch'án Dios. ¿Ntá nkehe tsixrorá? —ichro ch'án.

Ntá kaín sín kjuátehe sín kixin chrók'uen ch'án.

⁶⁵ Ntá ikjé sín la kjuankixin sín kuíkíte sín ch'án ntáte sín. Na iso sín na k'uíkjehe sín ikon ch'án na ntá kjuate sín ch'án na ko kjuanchankíhi sín ch'án kixin:

—Tónoha kixin nkexro kjuatia —ichro sín.

A ntá tí sín policía kuènte núnko chjéhe sín nkayakon ch'án.

Ch'in Pedro kjuínchemá ch'án kixin chónhya ch'án tí ch'in Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ntá tí ntásin nonte itjen ch'in Pedro. Ntá ikui ijnko tjan ch'ehe tjan xra tí nchat'á t'etoan.

⁶⁷ Ntá k'uikon tjan kixin tjechjxrohe ch'in Pedro. Ntá komá tjan ch'án ntá ntáchro tjan kixin:

—Jaha la kjaxin xrikoa tí ch'in Jesús kjuíxin chjasin Nazaret —ichro tjan.

⁶⁸ Ntá ch'in Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrúa —ichro ch'án.

Ntá k'uaxrxjxin ch'án ntiha sákjuí ch'án ntója. Ntá xrinahya itsje ijnko kochíntoa.

⁶⁹ Ntá tí tjan a mé k'uikon tjan tí jehe ch'án ntá chénka tí sín síntaxín ntaha kixin:

—A ntá tí ch'in i mé njkojin tí sín a —ichro tjan.

⁷⁰ Kjánchó kjuínchemá ch'án inaá. Ntá antsí chr'éxin tí sín k'uéjontaxín ntáche sín tí ch'in Pedro kixin:

—Chaxin kjaxian jaha tsíkjaxian estado Galilea kixin tjatsqanxinni kixin nixja jaha éxí nixja tí jehe sín —ichro sín.

⁷¹ Ntá ch'in Pedro kjuankixin ch'án kjuínchenohe ch'án Dios ntáchro ch'án kixin:

[†] 14:58 Juan 2.19

—Chonhya tí ch'ín ntáchrórá jahará —ichro ch'án.

⁷² Ntá yóxin itsje kochíntoá. Ntá ch'ín Pedro mé xraxinkaon ch'án kíxin nkexrí ó chrónka ch'ín Jesús kíxin: “Naxá tsotsjehya kochíntoá yáya mé ó tsjixin sinchemána níya kíxin chonhyana.”* Ntá xraxinkaon ch'án tíha la ntá kjuankíxin ch'án tsjánka ch'án kíxin ntoáhya kjuích'e ch'án kjuínchemá ch'án tí ch'ín Jesús.

15

Ch'ín Jesús nkayakon tí ch'ín Pilato

(Mt. 27.1-2, 11-14; Lc. 23.1-5; Jn. 18.28-38)

¹ A ntá ó k'uínkaséyan ntá tí sín nchat'á t'etóan kójnkotséko sín tí sín táda la ko tí sín tjako tí ley la ko kain tí sín t'etóan kuénte nínko mé kójnkotsé sín ikjo kichó sín. Ntá kjuixin ntá kjuínchenteto sín tí ch'ín Jesús ntá kjuíkaán sín ch'án tí tjen tí ch'ín Pilato.

² Ntá tí ch'ín Pilato mé kjuanchankí ch'án ntáchro ch'án kíxin:

—¿Á jaha tí Rey kuénte tí sín judío? —ichro ch'án.

Ntá kjuátehe ch'ín Jesús ntáchro ch'án kíxin:

—Kjāxian jaha ntáchrúa —ichro ch'án.

³ A ntá tí sín nchat'á t'etóan mé k'ueka sín ch'án nchónhya jie.

⁴ Ntá ch'ín Pilato xikjanchankí ch'án inaá ntáchro ch'án kíxin:

—¿Jaha, nkekuénté tjetéehya ninkehó? Tsjehé kíxin nchónhya jie t'eka sín tí jaha —ichro ch'án.

⁵ A ntá ch'ín Jesús la ninkehó kjuáteehya ch'án. Ntá ch'ín Pilato la í noehya ch'án nkehe tsjenkayáxin ch'án.

K'uáyéhe ch'ín Jesús kíxin sinchekjasóte sín ch'án ntá its'en ch'án

(Mt. 27.15-31; Lc. 23.13-25; Jn. 18.38—19.16)

⁶ A ntá ch'ín Pilato mé kuénhen ch'án kíxin tí kia a tsjanjon ch'án kjuachaxin kíxin sátsji ijnko chojni tjechjina, éxi tjinkaon tsjanchia tí sín tsikójnkotsé tí kia a.

⁷ A ntá tíha tjechjina ijnko ch'ín mé it'in Barrabás, la ko í so sín kuítekakuenhya sín tí síxréé ntá k'óyán sín chojni.

⁸ Ntá kui nchónhya chojni kjuankíxin sín kjuanchehe sín tí ch'ín Pilato kíxin chrókjuích'e ch'án éxi kaín nánó xíkaha.

⁹ Ntá kjuátehe ch'ín Pilato kíxin:

—¿Á tjínkáonrá tsjtohá sátsji tí ch'ín Rey t'etúenhen tí sín judío? —ichro ch'án.

¹⁰ Mé xíkaha ichro ch'án kíxin jehe ch'án la ó nohe ch'án kíxin kjuachjínqxínhin xriko tí sín nchat'á t'etóan, a ntá tsé sín tí ch'ín Jesús kjuíkénhen sín ch'án.

¹¹ A ntá tí sín nchat'á t'etóan a mé kjuínchekóninkaon sín kaín tí chojni síin, ntáche sín kíxin íchá jina chrókjuanchia sín kíxin chrók'uatjánta ch'án tí ch'ín Barrabás.

¹² Ntá ch'ín Pilato kjuanchankí ch'án ntáchro ch'án kíxin:

—A ntá tí ch'ín tíkítexínrá kíxin ch'ín Rey t'etúenhen tí sín judío la ¿nkehe tjínkáonrá sjt'ahá ch'án? —ichro ch'án.

¹³ Ntá jehe sín kjuátehe sín k'óyako sín kjuanchia sín kíxin:

—¡Tjakénkǎnia ch'án ntacruz!

¹⁴ Ntá ch'ín Pilato mé kjuanchankíhi ch'án tí jehe sín kíxin:

—¿Xá nkehe tí jínahya kjuích'e ch'án? —ichro ch'án.

Kjānchó antsí má itsen k'óyako sín kjuanchia sín kíxin:

—¡Tjakénkǎnia ch'án ntacruz! —ichro sín.

¹⁵ Ntá ch'ín Pilato mé tjínkaon ch'án sinchexiteyá ch'án tí nkehe kjuanchia tí sín k'uixité ntá kuítóhe ch'án kíxin sátsji tí ch'ín Barrabás. Ntá k'ueŋtoan ch'án kíxin tsjate sín tí ch'ín Jesús. Ntá kjuixin ntá kjuanjon ch'án kjuachaxin kíxin tí sín soldado sátsjiko sín ch'án tsjak'enkǎni sín ch'án ntacruz.

¹⁶ Ntá tí sín soldado a mé sákjuíko sín ch'án tí ntāsin tí palacio. Ntaha kójnkotséxin kaín tí sín soldado.

¹⁷ Ntá tíha kuakitsje sín iké ch'án ntá kjuínchek'inkáya sín ch'án ijnko ka kjátse tié la ko kjuak'enkaya sín kja ch'án ijnko corona tsík'óna ntach'í.

¹⁸ Ntá kjuankíxin k'uixité sín ntáchro sín kíxin:

—Jnkochrixín tsjak'e tsétúenhnén tí sín judío —ichro sín.

¹⁹ Na ntá ntavara chjéhe sín ikja ch'án na ko ntáté sín kuíkíte sín ch'án. K'uéjóxín toch'ín sín nkayakon ch'án kjuích'eyáxixin sín éxi imá chrókjuikosáyehe sín ch'án.

²⁰ Ntá tió kjuixin xikaha kjuich'ehe sín ch'án kjuanoá sín ch'án ntá kuakitsjehe sín ch'án tí ka kjátse tié tsikjinček'inkáya sín ch'án ntá kjuinček'inkáya sín ch'án iké ch'án xráxin ínaá. Ntá kuakitsjexín sín ch'án ntiha sákjuiko sín ch'án kixin ntá tsjak'enkanı sín ch'án ntacruz.

*Ntá kjuak'enkanı sín ch'in Jesús ntacruz
(Mt. 27.32-44; Lc. 23.26-43; Jn. 19.17-27)*

²¹ A ntá ijnko ch'in tsikjixin chjasin Cirene, mé it'in ch'án Simón, mé xjeen ch'án mé tí ch'in Alejandro la ko tí ch'in Rufo, mé tsikjixin ch'án nontge ch'án, ntá k'uátsínka ch'án ntiha. Ntá tí sín soldado a mé k'uətuənenh sín ch'án kixin tsochréhe ch'án tсамá ch'án tí ntacruz tsjak'enkanı ch'in Jesús.

²² A ntá sákjuiko sín tí ch'in Jesús ijnko tjo it'in Gólgota, na mé nkívee sín t'axrjexín kixin Tjo Calavera.

²³ Ntá ntiha chjéhe sín ch'án xranvino tsík'ixinkikjíanxín xroan mirra chrók'ui ch'án, kjánchó k'uíhya ch'án.

²⁴ Ntá tí sín soldado kjuak'enkanı sín ch'án tí ntacruz a. Kjuixin ntá kjuich'exín sín suerte tí ké ch'án kixin tsoñohe sín nkexéhe tí ka sátsjiko sín jnkojnko sín.

²⁵ A ntá ó las nueve nchítjen tí kjuak'enkanı sín ch'án tí ntacruz a.

²⁶ Ntá ikja tí ntacruz kjuak'enkanı sín ijnko ntachiso ntsí tsíkjin sín nixja nkekuènte kjuínčekjasóte sín ch'án na mé ntáchro kixin: "Jehe ch'án mé Rey kuènte tí sín judío".

²⁷ Na ko kjaxin k'uéjójáyáni sín ntacruz yaá tí síchee la ijnko la nánko chjina la í jnko la nó kjon tí tjen ch'in Jesús.

²⁸ Na mé xikaha xiteyá éxí nixja xroon itén Dios ntáchro kixin: "Éxí yóhe ijnko chojni kjuasin jje mé k'uikon sín ch'án".*

²⁹ Ntá tí sín k'uátsínka ntiha mé kjuanoá sín ch'án la ko k'uántaxínhin sín ch'án tinkátjía kja sín ntáchro sín kixin:

—Kjá na ntáchrúa kixin chrók'oxíka tí njnko, a ntá iní yəon koá la ó chrókjuixin chrókjuich'éna ínaá,† ichrúa.

³⁰ Nchekaá asán jahvá tjasinkajinxíán tí ntacruz méhe —ichro sín.

³¹ Ntá tí sín nchát'á t'ətoan la ko tí sín tjako tí ley mé kjuanoá sín ch'án ikjo sín kichó sín kixin:

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án.

³² A ntá chaxín jehe ch'án tí Cristo tí Rey kuènte tí nación Israel ntá chrók'uikonni kixin jehó ch'án chrókjuinkajinxín ch'án asén ch'án tí ntacruz ntá kjaxin chrókuitekaonni ch'án —ichro sín.

Kjonté tí yaá sín kjaxin tjejójáyáni ntacruz mé k'uántaxínhin sín ch'án.

Ntá k'uén ch'in Jesús

(Mt. 27.45-56; Lc. 23.44-49; Jn. 19.28-30)

³³ A ntá tió kui chonkixin mé k'uixin tie kuenté chjasintajni, kóxrjenhen tí sítie hasta las tres kónjin

³⁴ ntá tí hora a mé itsen k'uèya ch'in Jesús ntáchro ch'án kixin:

—Eloi, Eloi, ¿lama sabactani? —tí nkívee sín mé t'axrjexín kixin: It'eni, It'eni, ¿nkekuènté kjuítohéni?,‡ mé xikaha ichro ch'án.

³⁵ Ntá iso sín síin ntiha kuínhin sín, ntá ntáchro sín kixin:

—Tinhínrá kixin t'íyehé ch'án tí ch'in Elías tí ch'in k'uéchrónka itén Dios ósé —ichro sín.

³⁶ Ntá ijnko tí jehe sín síin ntiha kuinká ch'án kuákja ch'án ijnko ka ntá kjuínčekjataxin ch'án vino náxrjónhya ntá kjuak'ekjen ch'án ijnko nta kjínjin ntá kjuínčekjina ch'án tí tjen ir'va ch'in Jesús chrók'ui ch'án tí vino náxrjónhya. Ntáchro tí ch'in a kixin:

—Tsítóheni tsotsjeheni á chaxin tsi tí ch'in Elías tsjinkajin tí jehe ch'án —ichro ch'án.

³⁷ Ntá ch'in Jesús itsen k'uíyato ch'án ntá kjuixin k'uén ch'án.

³⁸ A ntá tí ka tjenkuènxín nkaxenhen njnko mé yaá k'óna k'uichje kjuankíxixín noi la hasta nonte k'uichje.

³⁹ Ntá tí ch'in capitán romano mé tjen ch'án chok'èxin tí tjen ch'in Jesús ntá k'uikon ch'án kixin xikaha ó kjuixin k'uén ch'án ntá ntáchro ch'án kixin:

—Chaxín tí nkexro i la Xjeen Dios —ichro ch'án.

⁴⁰ Kjaxin ntiha k'uéjój iso chojni chjin, ikjín k'uéjój sín tsjehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'in tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé.

⁴¹ A ntá tí chojni chjin i mé kuínkáchréhe sín tí ch'in Jesús ntá kjuíkəo sín ch'án kixin k'uékjinkítsa sín ch'án tí k'uékjak'e ch'án estado Galilea la ko kjaxin í so chojni chjin ínaá chréhe sín ch'án sákjuiko sín ch'án chjasin Jerusalén.

* 15:28 Isaías 58.12 † 15:29 Marcos 14.58; Juan 2.19 ‡ 15:34 Salmo 22.1

Ntá xrává ch'in Jesús

(Mt. 27.57-61; Lc. 23.50-56; Jn. 19.38-42)

⁴² A ntá ó kóntó tí yaon a mé tí yaon t'óyaxínhin sín kixin tí xrankixín tí yaon t'ok'éhe sín,
⁴³ mé kui ijnko ch'in it'in José chjasén ch'án mé Arimatea. Jehe ch'án mé kóí ch'án t'etqan ch'án tí xra kuènte tí síxreé. Kjaxin jehe ch'án tjechónhen ch'án itsi tí kjuachaxin kuènte Dios. Chrakonhya ch'án sákjuí ch'án ntqe ch'in Pilato kjuíkjanchia ch'án tí cuerpo kuènte ch'in Jesús.

⁴⁴ Ntá ch'in Pilato chrakon ch'án kixin ó tsíkjin tsík'en ch'in Jesús, ntá k'uíyehé ch'án tí ch'in capitán a kjuanchankíhi ch'án kixin á chaxín xikaha kónhen.

⁴⁵ Ntá chrónka tí ch'in capitán kixin chaxín ó kjuixin k'uén ch'án. Ntá kuínhin ch'in Pilato xikaha ntá kjuanjon ch'án kjuachaxin kixin tsjikakja ch'in José tí cuerpo kuènte ch'in Jesús.

⁴⁶ Ntá ch'in José mé k'uena ch'án ijnko ka sávana náxrjón. Ntá kjuinkajin ch'án tí cuerpo kuènte ch'in Jesús, a ntá jehe tí ka a mé kjuínchek'isímá ch'án tí cuerpo kuènte ch'án. Ntá kjuak'enkaya ch'án ijnko tóye tsíxrayá itj. Ntá ijnko xro jíé mé k'uíkjèxin ch'án tí ntója tí tóye.

⁴⁷ A ntá tí tjan María Magdalena la ko tí tjan María iné ch'in José mé k'uíkon sín nketí xrává ch'án.

16

Ó xechón ch'in Jesús

(Mt. 28.1-10; Lc. 24.1-12; Jn. 20.1-10)

¹ A ntá tió k'uátsínka tí yaon t'ok'éhe sín ntá tí tjan María Magdalena la ko tí tjan María iné ch'in Jacobo la ko tí tjan Salomé mé k'uena sín xroqan xraxé sátsjiko sín sincheka sín tí cuerpo kuènte ch'in Jesús.

² Ntá imá nchítjen tí yaon xrankixín tí semana mé kjuíji sín tí tóye tsíxravá ch'án, na mé ó kjuítjon yaon.

³ A ntá jehe sín mé tinkákjo kichó sín kixin:

—¿Xá nkexro tí chrókuakjiinhinni tí xro tjejkèxin tí tóye? —ichro sín.

⁴ A ntá xrinahya k'uikon sín kixin ó tsíkjin tsíkjin tí xro jíé tjejkèxin tí tóye kixin í tjenhya éxi k'uékjak'e senó.

⁵ Ntá kjuíji sín ikon tí tóye ntá k'uikon sín kixin tjetjaxin ijnko ch'in ntasoá tí tja sín chjina tjenkaya ch'án ka kjínjin tjóá ntá imá chrakon sín k'uikon sín.

⁶ Ntá ntáchro ch'án kixin:

—Chrakonhyará. Ó nóna kixin xritjéyará jahará tí ch'in Jesús tsíkjin chjasin Nazaret kjuak'enkáni ch'án ntacruz. Ntá ó tsíxechón ch'án í kohya ch'án ntihi. Tsjehérá tí tsíkjak'e sín ch'án.

⁷ Ntá sáttjirá tjíchenkará tí sín k'uék'ajiko ch'án la ko tí ch'in Pedro kixin tí ch'in Jesús senó sátsji ch'án estado Galilea ntá ntaha tsoxetará ch'án éxi tsíchronka ch'án —mé xikaha chrónka tí ntasoá a.

⁸ Ntá tí chojni chjin a mé sákjuixin sín tí tsíxravá tí ch'in Jesús imá síxranka sín chrakon sín. Ntá naxa chenkahya sín ninkexró kixin chrakon sín.

Ch'in Jesús titàya xeta tí tjan María Magdalena

(Jn. 20.11-18)

⁹ Tió tsíkjin tsíxechón ch'in Jesús nchítjen tí yaon xrankixín semana ntá titàya xeta ch'án saoxín tí tjan María Magdalena na mé jehe tjan tsíkakitsjèxin ch'án yato nchakuen tí jinahya.

¹⁰ Ntá sákjuichenka tjan tí sín k'uék'ajiko tí jehe ch'án t'ává sín tsjánka sín.

¹¹ A ntá tió kuínhin sín kixin tjechón tí ch'in Jesús kixin xikaha tsík'ikon tjan la kjónté kuítekakonhya sín.

Iyó sín k'uék'ajiko ch'in Jesús titàya k'uíkuen sín tí jehe ch'án

(Lc. 24.13-35)

¹² A ntá chr'éxin ntá iyó tí sín a titàya k'uíkuen sín tí ch'in Jesús, ókjé nkexrí tsjehe ch'án. Tí sín a mé tjejtji sín ntja sátsji sín ijnko nonte.

¹³ A ntá jehe sín sákjuichenka sín tí sín í so a; la kjónté xikaha la kuítekakonhya sín.*

Ch'in Jesús k'uetuenhen ch'án tí sín k'uék'ajiko ch'án tí xra sich'e sín

(Mt. 28.16-20; Lc. 24.36-49; Jn. 20.19-23)

¹⁴ A ntá tió kjuixixin la titàya k'uikon tí tejnko sín tí jehe ch'án tí tjejóne sín. Ntá nixjehé ch'án sín kixin nkekuénté icha asén sín tsíkitekakuenhya sín tí sín tsík'ikon kixin tsíxechón ch'án.

¹⁵ Ntá ntáche ch'án sín kixin:

* 16:13 Lucas 24.13-35

—Sátjirá kuenté chjasintajni tjákohérá kaín xín chojni tí tan jína tsaáxin sín.

¹⁶ Tí nkexro tsitekaon la tsíkite la mé tsaá. A ntá tí nkexro tsitekakonhya na mé tsjasóte.

¹⁷ Ntá tí sín tsinkáchónki tí janhan mé tsjasin sín kjuaxroan kíxin kjuachaxin nina tsakitsjexín sín tí nchakuen tí jínahya chóna chojni la ko tsonixja sín ókjé nkíva.

¹⁸ Kjónté konche chrótsé sín la kohya nkehe tsonhen sín la ko kjónté chrók'ui sín ijnko ntá chóna veneno la kohya nkehe tsonhen sín. Kjaxin ts'ejotja tja sín chojni níhi la tsitqhe sín jína.

Ch'in Jesús chr'in ch'an nkaya nkajni

(Lc. 24.50-53)

¹⁹ Ntá ó kjuixin nixjehe Ìnchéni Jesús tí jehe sín ntá sákjuí ch'an nkaya nkajni. A ntá ntiha kjuák'etjaxin ch'an tí tja chjina Dios.

²⁰ A ntá jehe sín sákjuí sín nkuíxín sákjuikjako sín tí tan jína tsaáxin chojni. A ntá jehe Ìnchéni mé kjuínkítsa ch'an tí sín a la ko kjuachaxién ch'an mé kjuasixín sín kjuaxroan kíxin tíha mé tsonoxín tí sín tjejótinin kíxin chaxín nkehe kuente Dios kjuako sín. Amén.

Tí tan jína chrónka ch'ín Lucas

Tíhi mé xránkixín tí xroon i

¹ Nchónhya chojni tjinkaon chrókjin sín ntoá kaín xín nkehe nkexrí kónhen k'uátsínka Ìnchéni tí k'uéjóni.

² Éxi kjuakoheni tí sín tsík'ikonxín kon sín tí xránkixín nkehe k'uátsínka ch'án la ntá k'uáyéhe sín tí xra sákjuichronka sín tí tan jína

³ a ntá janhan kjaxian kjuánchánkiá jína kaín nkehe k'uátsínka tí xránkixín. Ntá nóna jína ikjian kaín tíha éxi tsíkónhen ntá tsochr'anhan jaha Teófilo kixin imá tjuaha

⁴ kixin ntá jaha tsonoha jína tí nkehe chaxín tsíkjakoha sín.

Ijnko ángel mé chrónka kixin tsokjíhi Juan Bautista

⁵ A ntá tí ch'ín rey Herodes k'uegoan ch'án tí estado Judea la ko ntiha kjuák'e ijnko nchat'á mé it'in Zacarías. Jehe ch'án mé kuènte tí sín tsík'axrjenixin tí ch'ín Abías. * A ntá ichjién ch'án mé it'in Elisabet. Jehe tjan mé tsík'axrjenixin tjan tí nchat'á Aarón.

⁶ Yói sín na mé jína sín kixin éxi tjinkaon Dios la mé kjuínchexiteyéhe sín kaín nkehe k'uegoan ch'án. Méxra ninkexró chrók'uekahya jie tí jehe sín.

⁷ A ntá jehe sín chóntahya sín xjeen sín kixin ó jehí tsíkitoenhya tjan Elisabet kixin sich'éna tjan xjan la ko ntá jie la ó táda ch'án la ko ó nána tjan.

⁸ A ntá ijnko yagon tónhen tocar ch'ín Zacarías la ko tí í so sín tjejóko ch'án sich'e sín xra nchat'á kuènte Dios.

⁹ A ntá xikaha kuènnen tí sín nchat'á a ntá jie ch'ín Zacarías mé kónhen tocar ts'ixenhen ch'án tí cuarto tjóá kuènte njnko tsjak'e ch'án chjincq ch'ítaón tí altar kuènte Dios.

¹⁰ Ntá kjuák'e ch'án ntiha kjuák'e ch'án tí chjincq la nachrohe kaín tí chojni k'uejó sín ntója nixjehe sín Dios.

¹¹ Ntá xrinahya k'uikon ch'ín Zacarías ijnko ángel kuènte Dios tjexín toté ch'án nánko chjina tí altar tjak'exin sín chjincq.

¹² A ntá tíó k'uikon ch'ín Zacarías tí ángel la imá kóxakonhen ch'án la ko imá chrakon ch'án.

¹³ A ntá ntáchro tí ch'ín ángel kixin:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan ijnko xjan ntoa na mé sijnchek'ian xjan Juan.

¹⁴ Jaha la tsochaha má la ko itsjé chojni tsochéhe sín kixin tsokjíhi xjan

¹⁵ kixin imá tjeotan tsjak'e tí xjaan éxi tóxrjinhin Dios. Ninkehó xran vino la ko ninkehó í jnko xran ts'ihya ch'án. Tsochóna ch'án kjuachaxin kuènte Nchakuen Dios kjónté naxa tokjehya ch'án.

¹⁶ Jehe ch'án mé tsjakohé ch'án tí chojni nación Israel a ntá itsjé sín tsokjan sín tsinkáchónki sín Ìnché sín Dios.

¹⁷ Jehe ch'ín Juan tsítaón ch'án ntja tsixin Ìnchéni. Éxi k'uekjako ch'ín Elías ósé mé tsjako ch'án la ko tsochóna ch'án kjuachaxin éxi k'uechóna ch'ín Elías kixin tí sín it'é xjan la mé jína ts'ejóko xjeen sín la ko kjaxin tí sín titekakonhya mé tsitekaon sín. Mé xikaha tsonixjehe ch'án chojni kixin ó itsi Ìnchéni la chrókuinkáchónki sín tí jehe ch'án.

¹⁸ A ntá tí ch'ín Zacarías kjuanchankíhi ch'án tí ch'ín ángel ntáchro ch'án kixin:

—Nkexrí chrókónona kixin chaxín chrókónhen tíhi? Janhan la ó tádana la ko tí chjin chonta la kjaxin ó nána tjan —ichro ch'án.

¹⁹ Ntá kjuátehe tí ch'ín ángel ntáchro ch'án kixin:

—Janhan mé Gabriel la mé t'aha xra Dios. A ntá jehe ch'án mé k'ueguanna k'uinka tsonixjaha tsoxrjanka tí nkehe jina tsonhen.

²⁰ A ntá jie kuitekákonhya tí nkehe xrxanka a ntá tsonósian jaha xitjahya tsonixja jaha tsoxitjajia tí yagon tsokjíhi tí xjaan. Mé xikaha tsoxiteyá kaín tíha —ichro ch'án.

²¹ A ntá tí í so sín ntiha k'uejóchónhen sín ntója njnko kixin ts'axrje ch'ín Zacarías, ntá kóxakonhen sín kixin imá sé kóxrjenhen ch'án nkaxenhen njnko.

²² Ntá tíó k'uaxrjexin ch'ín Zacarías tí nkaxenhen njnko la í xitjahya nixja ch'án. Ntá kónohe sín kixin ichrén kjuaxroan kuènte Dios tsík'ikon ch'án tí nkaxenhen njnko. Ntá itja ch'án ó tjakoxin ch'án tí nkehe chróntáchro ch'án kixin í xitjahya nixja ch'án.

²³ A ntá tíó kjuixin tí yagon kjuich'e ch'ín Zacarías xra njnko ntá sákjuí ch'án ntqoe ch'án.

²⁴ A ntá chr'éxin ntá kjuák'eyá tí ichjién ch'án Elisabet. Ntá ntqoe tjan ó kuítqhe tjan in'ó nitjó kjuenkayáxin tjan kixin:

* 1:51 Crónicas 24.10

²⁵ “Mé xikaha ijnko kjuaxroan kjuanjon Ìnchéni kixin chrók'uañtaxiñhyani chojni kixin ó tsochóntani xjeenni jie chrókjuikosáyehehi sín”, ichro tjan.

Ijnko ángel chrónka kixin tsokjíhi Jesús

²⁶ A ntá k'uañtsinka injon nitjó ntá Dios k'uetuñhen tí ch'ín ángel Gabriel kixin sátsji ch'án ijnko chjasin estado Galilea mé it'in Nazaret,

²⁷ sátsji nixjehe ch'án ijnko tjan tjarisoá naḡa kuákjahya tjan chojni ntoa mé it'in tjan María. Jehe tjan mé tsíkjaṭehe tjan kixin tsoṭehe tjan ijnko ch'ín mé it'in José, mé tsík'axrjenixin ch'án tí ch'ín rey David.

²⁸ A ntá tí ch'ín ángel k'uixenhen tí tjan tjan ntá ntáchro ch'án kixin:

—K'uinka nixjaha jaha kixin Dios kjuínkítsa tí jaha. Ìnchéni Dios tjekoa tí jaha. A ntá jaha imá kjuíntayavan ch'án ntá tí í so chojni chjin la kénhyó —ichro ch'án.

²⁹ Kjánchó tió k'uikon tjan tí ch'ín ángel na mé kóxakonhen tjan kjuenkayáxin tjan kixin nkekuènte xikaha nixjehehi ch'án, ichro tjan.

³⁰ A ntá ntáchro tí ch'ín ángel kixin:

—Chrakonhya, María. Dios la imá tjetjinkítsa tí jaha.

³¹ A ntá jie la tsjak'èyá jaha, tsochonta ijnko xjan ntoa la ko sñnchek'ian xjan Jesús.

³² Imá ts'etóan ch'án la ko its'in ch'án Xjeen Dios nkaya nkajní. Ìnchéni Dios mé tsjanjon ch'án kjuachaxin ts'etóan ch'án éxi ijnko rey éxi k'uetóan ch'ín David, tí nkexro ts'axrjenixin ch'án.

³³ Jnkochrín tsjak'e ch'án ts'etuñhen ch'án tí sín nació Israel, la mé tsjejehya tí kjuachaxin ts'etóan ch'án —ichro tí ch'ín ángel.

³⁴ Ntá kjuanchankíhi tjan María tí ch'ín ángel kixin:

—¿Nkekuènte kixin xikaha chrókónhen kixin janhan la naḡa chontahya chojni ntoa? —ichro tjan.

³⁵ Ntá kjuatehe tí ch'ín ángel, ntáchro ch'án kixin:

—Tí Nchakuen Dios mé ts'inkajin éxi ijnko tjuí la ko tí kjuachaxin kuènte Dios mé tsjak'etja tí jaha, a ntá ts'óna tí xjan. Mé xikaha tí xjan tsokjíhi la mé tjóá xjan la mé its'in xjan Xjeen Dios.

³⁶ La ko kjaxin tjan Elisabet kjéhya jaha kjónté ó nána tjan la mé tjejá tjan. Senó la k'uéchóntahya tjan xjan, a ntá jie la ó injon nitjó tjejá tjan.

³⁷ Kixin tí kjuachaxiñ Dios la tsjacha tsonhen kaín xin nkehe —ichro tí ch'ín ángel.

³⁸ Ntá ntáchro tjan María kixin:

—Janhan mé t'ahá Ìnchéni Dios xra. Ó nchoxon tí nkehe k'uetóan ch'án sñntaxiteyáha ch'án éxi chrónka jaha —ichro tjan.

A ntá kjuixin chrónka tí ch'ín ángel ntá sákjuí ch'án.

Tjan María sákjuitsjehe tí tjan Elisabet

³⁹ A ntá ijnko yaon tí tjan María tjan sákjuí tjan ijnko chjasin tjan tí jna estado Judea.

⁴⁰ Ntá kjuí tjan tí chjasin ntiha ntá k'uixenhen tjan ntóe ch'ín Zacarías la ntá nixjehe tjan tí tjan Elisabet.

⁴¹ A ntá tió kuñhin tjan Elisabet nixja tjan María ntá chrika tí xjan nkaya tsee tí tjan Elisabet. Ntá antsi k'uáyéhe tjan kjuachaxiñ Nchakuen Dios

⁴² ntá itsen nixja tjan ntáchro tjan kixin:

—Dios imá kjuíntayavan la ntá tí í so chojni chjin la kénhyó la ko kjaxin kjuíncheyan ch'án tí xjaan.

⁴³ ¿Xá nkexro tí janhan kixin kjuínixjana iné Ìnchéni?

⁴⁴ Tió kuñhan nixjana ntá tí xjan la chrika xjan nkaya tsena kixin chéhe xjan kjuíha.

⁴⁵ Ntá jaha la cháha kixin kuítekavan kixin Ìnchéni Dios sinchexiteyá tí nkehe ntáchro ch'án —ichro tjan.

⁴⁶ Ntá ntáchro tjan María kixin:

Asenná imá tjikosáyehe Ìnchéni Dios

⁴⁷ la ko chéhe asenná kixin Dios sinchekaáni ch'án.

⁴⁸ Kixin Dios ikuá kuentá ijnko tí chojni chjin nóe ch'exón xra kuènte ch'án.

A ntá ijie la ko jnkochrín tsontáchro chojni kixin náxrjón tjèn janhan, tsixro sín.

⁴⁹ Kixin Dios chóna kaín kjuachaxin ntá janhan mé kjuasixinna ch'án ijnko kjuaxroan jíé; imá tjóá tí ihñié ch'án.

⁵⁰ Jnkochrín tsikonóhehe ch'án kaín tí sín tjikosáyehe sín ch'án.

⁵¹ Tsíkjasin ch'án itsje kjuaxroan jíé;

kuakitsjehe ch'án tí kjuachaxin chóna tí sín nchehnke.

⁵² Kuakitsjehe ch'án tí kjuachaxin chóna tí sín t'etóan,

A ntá tí sín nóa k'uék'etuñhya senó la mé jie chjehe ch'án kjuachaxin ts'etóan sín.

53 A ntá tí sín t'énxín kjinta la kjuanjon ch'án kaín nkehe tsicháxínhin sín, a ntá tí sín rico xráxín jehó tja sín sákjuí sín.

54 Kjuinkítsa ch'án tí sín nacióon Israel kixin tjejóch'ehe sín ch'án xrá;

k'uitjáyenhya ch'án tí jehe sín kuikonóehé ch'án sín,

55 éxí k'uéchenka ch'án tí sín k'uaxrjeníxinni k'uéjó sín ósé,

na mé tí ch'ín Abraham la ko kaín tí sín naḡa ts'axrjeníxín ch'án —mé xíkaha ichro tjan María.

56 A ntá tjan María kuitóeko tjan tí tjan Elisabet iní nitjó la ntá chr'éxín xíkjan tjan ntóe tjan.

Kokjíhi ch'ín Juan Bautista

57 Ntá xétja tí yaon sinchekokjíhi tjan Elisabet tí xjeen tjan, a ntá kjuínchekokjíhi tjan ijnko xjan ntoa.

58 A ntá tí sín chjinaxón ntóe la ko tí sín kjéhya tjan mé kjuíjitsjehe sín kixin tsochéheko sín tjan kixin kuínhin sín kixin Dios imá tsíkikonóehé tí jehe tjan.

59 Ntá tí yaon jnixin ikui sín sincheka sín xjan tí xroye kuente tí sín judío. Ntá chrókjuinchek'ín sín xjan Zacarías éxí it'ín it'é.

60 Kjánchó ntáchro iné xjan kixin:

—Náhi. T'ichjánxín its'in xjan Juan —ichro tjan.

61 Ntá ntáchro sín kixin:

—¿Nkeuente kixin xíkaha chrók'uín xjan? Kohya nkexro naḡa kjéhya xíkaha it'ín —ichro sín.

62 A ntá kaín tí sín kjéhya kjuakoxín sín tja sín kjuanchankíhi sín tí it'é xjan kixin nkexrí tjinkaon ch'án chrók'uín tí xjan.

63 A ntá tí it'é xjan mé kjuanchia ch'án ijnko ntachiso ntsí tsokjin ch'án ntá kjin ch'án kixin: “Ihnjé xjan mé Juan.” A ntá kaín tí sín tjejó sín ntiha la chrakon sín kuínhin sín xíkaha kónhen.

64 A ntá xrínahya ch'ín Zacarías kjuankixin ch'án nixja ch'án inaá kjuanchehe ch'án Dios kjuasáya.

65 A ntá kaín tí sín chjinaxón ntóe sín mé chrakon sín. La ntá nkuíxín tí jna kuente estado Judea mé kjo sín kichó sín chrónka sín kixin xíkaha tsíkónhen.

66 A ntá kaín tí sín kuínhin mé kjuenkayáxín sín kjuanchankíhi sín kichó sín kixin:

—¿Xá nkehe tí xrá tsíkjtónhen tí xjan í? —ichro sín.

Kixin chaxín Ìnchéni Dios tsíkjincheyaon ch'án tí xjan.

Tí ch'ín Zacarías itsje ch'án

67 A ntá it'é tí xjan mé ch'ín Zacarías, mé antsí k'uáyéhe ch'án kjuachaxín kuente Nchakuen Dios ntá xíkaha nixja ch'án itén Dios ntáchro ch'án kixin:

68 Imá jína Ìnchéni, na mé tí Dios kuente tí nacióon Israel,

kixin ikui ch'án tí tjejóni kjuínchekaá ch'án nacióon kuéteni.

69 La ko kjuanjon ch'án ijnko nkexro t'etóan sinchekaáni ch'án

na mé ijnko nkexro k'uaxrjeníxín tí ch'ín David, tí nkexro k'uékjich'ehe Dios xrá.

70 Éxí k'uéchronkaxín tí sín kjueyá Dios k'uéchronka itén Dios ósé,

71 k'uéchronka Dios kixin sinchekaáni ch'án kixin ntá tsjachahya kaín tí sín nínkakhenni,

72 tsíkionóehé ch'án tí sín k'uaxrjeníxinni ósé,

ts'itjáyenhya ch'án tí nkehe tsíchronka ch'án tsoxiteyá.

73 Tíhi mé tsíkjo Dios tí ch'ín Abraham ósé kixin nkehe chaxín tsoxiteyá chr'éxín

74 kixin sinchekaáni ch'án kixin kohya nkehe sich'ehe ní sín nínkakhenni kixin jína sich'ehe ní ch'án xrá tsochrakonhyani,

75 la ntá jína ts'ejóni sinchetjóáni ch'án kaín yaon tí naḡa tjejóchónni.

76 A ntá jaha xjeenni mé tsontáchro Dios kixin jaha ijnko nkexro tsochrónka itén Dios tjen nkaya nkájni.

Jaha tsítónxian ntja tsíxín Ìnchéni la ko jaha tsásiyóxian ntja tsíxín ch'án.

77 Jaha tsjákohé tí chojni chjasintajni nkexrí tsjiin tí jje chóna sín, ntá tsaá sín.

78 A ntá Dios mé tjeùeheni ch'án la ko kuikonóeheni ch'án, kixin nkájni kuixín ijnko xrohi nixin ts'inkaséyanxín tí yaon nixin.

79 Tíha mé tsíkjo tí xrohi ts'inkaséyanxín tí sín tjejó sítie la ko tí sín chrók'uitjáyán, la ko ts'ikoxínni tí ntja tsjanjon kjuaxróxin.

Na mé kaín tíhi chrónka tí ch'ín Zacarías.

80 A ntá tinkák'ánkí tí xjan a la ko Dios kjuínchek'ánkí tí kjuaxrexinkaon kuente xjan kixin antsí tsohohe xjan nkexrí tjen Dios. A ntá kjuák'e xjan nteje k'uánkí xjan kjuixrakájia tí yaon kjuankixin kjuakohé ch'án tí chojni nacióon Israel.

2

*Kokjihi ch'in Jesús
(Mt.1.18-25)*

¹ A ntá tí yaon a na mé tí ch'in imá t'etqan mé it'in Augusto César na mé k'uetqan ch'an kixin ts'inixin ihnjé kaín xín chojni síin tí chjasin t'etqan ch'an kixin tsoqnohe ch'an nkekjain chojni síin.

² Tí xrankixixin k'uínixin ihnjé sín tió Cirenio mé k'uegobnador k'uetqan estado Siria.

³ Kaínxin chojni t'ichjánxin sátsji sín chjasén sín kixin ntaha ts'inixin ihnjé sín.

⁴ Mé xikaha ch'in José kjaxin k'uaxrxéxin ch'an tí chjasin Nazaret estado Galilea ntá sákjuí ch'an tí estado Judea na mé sákjuí ch'an chjasin Belén tí tsikokjéxin tí ch'in rey David kixin jehe ch'in José mé tsík'axrxénixin ch'an tí ch'in David.

⁵ Sákjuí ch'an chjasin Belén sákjuíko ch'an tí tjan María kixin ntiha ts'inixínko ihnjé ch'an tjan kixin jehe tjan tsíkatehe kixin tsoqtehe ch'an. A ntá jehe tjan na mé ó tjejá tjan.

⁶ A ntá xikaha kónhen nachrohe k'uejó sín chjasin Belén, ntá kjuixraká tí yaon tsokjihi xjeen tjan María.

⁷ A ntá ntiha kokjéxin tí xjeen tjan saó. Ntá kjuínchek'ísimá tjan xjan ka, a ntá kjuak'enkaya tjan ijnko nta neyá iko kixin jehe sín la k'uitjahya sín nchia xranka ts'ok'èxin sín mé kjónté ntiha k'uejó sín.

Tí sín ángel la ko tí sín k'uáyakonhen kolélo

⁸ Kjaxin chjinaxón tí chjasin Belén tjejó iso chojni nteje ó la ntá ntahó titoqhe sín tí tie a kixin t'ayakonhen sín kolélo.

⁹ A ntá titàya k'uíkuèn sín ijnko ángel kuènte Dios la ko nkuíxin tí tjejó sín la k'uínkaséyan kixin tí kjuachaxin jié kuènte Dios kuíkao ch'an. Ntá jehe sín la imá chrakon sín.

¹⁰ A ntá tí ch'in ángel ntáchro kixin:

—Chrakonhyará jahará. Ijie k'uinka tsotjonkará nkehe jína nixin kixin tsoqhéhe kaín xín chojni

¹¹ kixin ijie tí chjasén ch'in David kokjéxin tí nkexro tsaáxinrá jahará na mé Ìnchéni Cristo tíha.

¹² Ntá tsoqnoxínrá jahará kixin tí xjan a kixin ika tjechr'ísimá xjan la ko ijnko nta neyá iko mé tjetsínkayá xjan —mé xikaha chrónka tí ch'in ángel.

¹³ A ntá titàya k'uíkuèn sín kixin nchónhya sín ángel kuíxin nkaya nkajni tjejóko tí ch'in ángel tjejótse sín tjanchehe sín Dios kjuasáya, ntáchro sín kixin:

¹⁴ Kjuasáyé Dios tjen nkaya nkajni kixin imá chónka

ch'an kjuachaxin. Ntá chjasintajni ts'ixin kjuaxróxin tí tjejó tí sín sinchexiteyéhe ch'an.

Mé xikaha ichro sín.

¹⁵ A ntá tí sín ángel xikjan sín nkaya nkajni, a ntá tí sín t'ayakonhen kolélo ikjo sín kichó sín ntáchro sín kixin:

—Íntá sátsjini tí chjasin Belén tsjitsjeheni tí nkehe tsikónhen kixin Ìnchéni k'uetqan kui tí nkexro kjuínchenoheni —ichro sín.

¹⁶ Ntá tjian sákjuí sín ntiha la k'uitja sín tí tjan María la ko tí ch'in José la ko tí xjan a tjetsínkayá nta neyá iko.

¹⁷ A ntá tió k'uíkon sín xikaha ntá chrónka sín tí nkehe tsíchronka tí ángel kixin nkexri tjen tí xjan a.

¹⁸ Ntá chrakon kaín tí sín kuínhin kixin xikaha chrónka tí sín k'uáyakonhen kolélo.

¹⁹ Kjánchó tí tjan María la asén tjan ó xraxinkakonxin tjan kaín tíha.

²⁰ A ntá tí sín k'uáyakonhen kolélo la sákjuí sín ntia kuínkákjanchehe sín Dios kjuasáya kixin kaín tí nkehe tsikinhin sín la ko k'uíkon sín kixin ó xiteyá kaín nkehe éxi tsíchronka tí ángel.

Sákjuíko sín tí xjan Jesús tí nínko Jerusalén

²¹ A ntá tió xétja tí ijni yaon ntá kjuíncheka sín xjan xroye kuènte tí sín israelita ntá kjuínchek'in sín xjan Jesús éxi tsintáchro tí ch'in ángel chénka tí tjan María tí naxá kjuák'eyáhya tjan.

²² A ntá tió kuitqhe tjan María jína éxi chrónka ley kuènte Moisés* ntá sákjuíko sín tí xjan tí chjasin Jerusalén kixin tsoqhéhe sín Dios kjuasáya.

²³ Éxi ntáchro tí xroon ley kuènté Ìnchéni Dios kixin: "A ntá kaín xjan ntoa tsokjihi saoxín la mé tsoqhéhe sín Dios tí xjan a sich'ehe xjan xra Dios."[†]

²⁴ Ntá xikaha sákjuí sín kixin ntaha tsjanjon sín iko ts'enxin ntiha tsoqhéxin sín Dios kjuasáyé éxi t'etqan tí ley kuènte ch'an na mé yaá kontóá najni o yaá kontóá nteje chrókuanjon sín.

* 2:22 Levítico 12.1-8 † 2:23 Éxodo 13.2,12

²⁵ A ntá tí yaon a kjuák'e chjasin Jerusalén ijnko ch'án ó táda ch'án mé it'in ch'án Simeón. Jehe ch'án ijnko chojni jína la ko jnkochrixín xraxinkaon ch'án Dios la ko kjuák'echónhen ch'án kixin itsi tí nkexro tsaáxin tí nacióon Israel. Tí Nchakuen Dios tjeko tí ch'ín Simeón

²⁶ tsíkjinchenohe ch'án kixin naxá ts'enhya ch'án ts'ikonjia ch'án tí nkexro Cristo, na mé tí nkexro tsochr'án Ìnchéni Dios.

²⁷ A ntá tí Nchakuen Dios kjuínchexraxinkaon tí ch'ín a kixin sátsji ch'án nínko. A ntá tió kui tí iné la ko it'é xjan Jesús k'uixenko sín xjan nkaxenhen nínko kixin sinchexiteyéhe sín tí nkehe t'etöan tí ley

²⁸ ntá ch'ín Simeón kuakja ch'án tí xjan a kjóa ch'án ntá kjuanchehe ch'án Dios kjuasáya ntáchro ch'án kixin:

²⁹ Ijje jaha Ìnchéni Dios, tsjánjuan kjuachaxin kixin kjuaxróxin its'én janhan kixin jaha ó kjuínchexiteyá tí nkehe tsintáchrúa

³⁰ kixin ó k'uikónxin kuán tí nkexro tsaáxinni,

³¹ mé xikaha kjuich'e kixin ts'ikon kaín xín chojni.

³² Jehe ch'án mé tí xrohi ts'inkaséyanxín ntje tí sín jehya kuènte Israel, la ko jehe ch'án tsjikosáyehe ch'án tí chjasín kuèntá Israel, mé ichro ch'ín Simeón.

³³ Ntá ch'ín José la ko tí iné ch'ín Jesús la chrakon sín kixin xikaha kuínhin sín ntáchro ch'ín Simeón kixin nkexrí tjen tí xjan.

³⁴ Ntá ch'ín Simeón kjuíncheyaon ch'án sín ntá chénka ch'án tí tjan María mé tí iné xjan Jesús kixin:

—Tí xjan i tsíkikao itsjé xra la itsjé tí sín Israel tsitekakuenhya sín xjan la tsítóhe sín la ko itsjé sín tsitekaon sín antsí tsonohe sín la ko nchónhya chojni tsotjinkakonhya tsinhin sín tí nkehe tsjako ch'án.

³⁵ Mé xikaha tsonoxín nkexrí tjenkayáxin jnkoinko asén chojni. Kjánchó kaín tíha tsoyóhe éxi ijnko chica espada chróchr'áte asán na mé tsoxakonhan la ko ts'avá má —ichro ch'án nixjehe ch'án tí tjan María.

³⁶ Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsík'axrjenixin ch'án tí ch'ín Aser. Jehe tjan la ó nána tjan. Tí naxá k'uétjarisoá tjan la kótehe tjan. Ntá yatokoá nánó kjuák'eko tí xii tjan

³⁷ ntá jie ochenta y cuatro nánó tsikók'án tjan. Kuítöehya tjan tí xra kuènte nínko la mé ntahó tjen tjan ch'ehe tjan Ìnchéni Dios xra nchakotjin la ko tie la jnkoyaxón nehya tjan kixin jína tsonixjehe tjan Dios.

³⁸ Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankixin chrónka tjan nkexrí tjen tí xjan Jesús nixjehe tjan kaín tí sín tjejóchónhen kixin itsi nkexro sinchekaá tí chjasin Jerusalén.

Ntá kjan sín chjasin Nazaret

³⁹ Na ntá tió kjuixin kjuínchexiteyá sín kaín nkehe t'etöan tí ley kuènte Dios ntá kjan sín estado Galilea na mé chjasén sín chaxín Nazaret.

⁴⁰ A ntá tí xjan a mé k'uánkí xjan la ko tsánká xjan la ko imá kónohe xjan kixin Dios imá tjinkítsa tjencheyaon xjan.

Tí xjan Jesús kjuák'e xjan tí nínko Jerusalén

⁴¹ Tí it'é la ko iné tí xjan Jesús xráxin k'uékji sín kaín nánó tí chjasin Jerusalén kixin tí kia pascua.

⁴² A ntá tió xetjehe ch'ín Jesús tí teyó nánó, ntá sákjuí sín kaín sín tí chjasin Jerusalén kixin xikaha kuènnen sín kixin tí kia a.

⁴³ A ntá kjanxin sín ntiha sáchrókjui sín chjasén sín tió k'uátsínka kia la tí xjan Jesús ó tsíkítohe xjan Jerusalén ntahó, kjánchó iné xjan la ko ch'ín José xraxinkakonhya sín kixin kohya tí xjan.

⁴⁴ Jehe sín mé kjuenkayáxin sín kixin ách'e tí sín kuichréhe mé kuikao sín xjan la ntá xikaha chjina ijnko yaon ó tjejóyá sín ntja tsíkji sín. A ntá kjueyá sín xjan tí tjejó tí sín kjéhya la ko tí sín chóxin sín

⁴⁵ kjánchó k'uitjahya sín xjan. Ntá kjan sín tí chjasin Jerusalén kixin tsjeyá sín xjan ntiha.

⁴⁶ Ntá k'uátsínka iní yaon ntá k'uitja sín xjan la mé nkaxenhen nínko ntiha tjetjaxin xjan jnkosiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjanchankíhi xjan tí jehe sín.

⁴⁷ Ntá kaín tí sín tjejóntaxin tjejótinhin sín mé chrakon sín kixin xikaha imá nohe xjan la ko xikaha tjatehe xjan kaín nkehe tjanchankíhi sín xjan.

⁴⁸ Ntá tió k'uikón iné la ko it'é la chrakon sín. Ntá ntáchro iné kixin:

—Xjeenni, ¿nkekuènte xikaha kjuich'e? It'á la ko janhan imá kóxakonhenni kjueyáni tí jaha —ichro tjan.

⁴⁹ Ntá ntáchro ch'in Jesús kixin:

—¿Nkeuente tjéya tí jeheni? ¿Á noahya jaha kixin tóxakönhenni kixin tí xrá kuénte It'éni? —ichro ch'án.

⁵⁰ Kjánchó kienxínhya sín nkexrí t'axrjexín tí nkehe ntáchro ch'án.

⁵¹ Ntá kjan sín chjasin Nazaret. A ntá ntíha naḡa kuítekakonhen xjan tí jehe sín. A ntá tí iné la ntá asén tjan xráxín ó nohe kixin xíkaha kónhen.

⁵² La ko naḡa k'uánkí xjan kónteto xjan la ko k'uánkí tí kjuaxrexinkaon kuénte xjan la ko Dios kóxrjínhín nkexrí kjuínchexiteyá xjan la ko kḡaxin kaín chojni kóxrjínhín sín kixin jina tjen xjan.

3

Ch'in Juan Bautista kjuák'e nteje kjuako itén Dios

(Mt. 3.1-12; Mr. 1.1-8; Jn. 1.19-28)

¹ A ntá quince nánó k'uék'etəan ch'in Tiberio tí xrá gobierno, la ko tí ch'in Poncio Pilato k'uégobrador tí estado Judea, la ko tí ch'in Herodes k'uégobrador tí estado Galilea, la ko tí kichó ch'án Felipe mé k'uégobrador estado Iturea la ko estado Traconite, la ko ch'in Lisaniás k'uégobrador tí estado Abilinia.

² A ntá ch'in Anás la ko ch'in Caifás k'uéchénta sín xrá nchat'á t'etəan. A ntá Dios mé kjuanjon kjuachaxin k'uáyéhe ch'in Juan itjen ch'án nteje tsochrónka ch'án itén Dios. Ntá jehe ch'án it'é ch'án Zacarías.

³ Ch'in Juan k'uátsínka ch'án kaín tí chjasin chjino tí ntarío Jordán kjuakohe ch'án chojni ntíha kixin chrókjuinkí sín tí nkehe tjenkayáxin sín chrókuítəhe sín tí ijíé sín ntá chrókuikite sín kixin xíkaha mé chrókjuin ijíé sín.

⁴ Mé xíkaha kónhen éxi k'uéchronka la ko tsikjin ch'in Isaías, mé tí nkexro k'uéchronka itén Dios ósé kixin:

Tsinhín sín itén ijnko nkexro tsjak'e nteje ts'əya tsontáchro kixin:

“Tóxakonhanrá ncheyóxinrá ntja tsjxin Inchéni

Takítjehérá ijnko ntja ntoí.

⁵ Kaínxín tsaka mé tsyóxin,

la ko kaín xín jnə la ko kaín xín itjo tsitəhe yóxin,

la ko tí ntja tsixrəya mé tsoxrentoá,

la ko kaín tí ntja yóxinhya la mé tsyóxin;

⁶ Xíkaha mé kaín xín chojni chjasintajni mé ts'ikon sín kixin Dios mé chrókuaáxin sín.*”

Mé xíkaha ichro itén Dios.

⁷ A ntá tíó kjuíji chojni ntíha kixin ch'in Juan chrókuíkite ch'án sín ntá ntáche ch'án tí jehe sín kixin:

—Jahará tsík'axrjenixínrá konche. ¿Xá nkexro kjuíntanohará kixin chrókuinkeherá tí kjuanínkaon kuénte Dios ó tsi?

⁸ T'ichjánxín kixin chrók'uejorá jnkójina chrókjuákoḡxínrá kixin chaxín kjuitoḡxínhínrá tí nkehe tjenkayáxinrá. Jahará nchehnkerá ntáchrórá kixin k'uaxrjenixínrá ch'in Abraham. Janhan ntáxrjan kixin kjónté tí xrə i la Dios tsjacha chrókjuich'əna ch'án chojni k'uaxrjenixín ch'in Abraham.

⁹ Kixin tí chica hacha ó tjechónhen tsochrínjinxín tí nta. A ntá kaín xín nta t'ónahya to jina mé tsochrínjin kixin tsoche —ichro ch'án.

¹⁰ A ntá tí chojni mé kjuanchankíhi sín ch'án kixin:

—A ntá tí xíkaha, ¿a ntá jeheni nkehe tí chrókjuich'eni? —ichro sín.

¹¹ Ntá kjuátəhe ch'in Juan kixin:

—Tí nkexro chóna yaá camisa la chrókjuinčekitonhen tí nkexro chóntahya. La ko tí nkexro chóna nkehe sine chróchjəhe sín tí nkexro chóntahya nkehe sine —ichro ch'án.

¹² Kḡaxin ikui iso tí sín nchekjènkí kixin chrókuikite sín. Ntá kjuanchankíhi sín tí ch'in Juan kixin:

—Maestro, ¿nkehe chrókjuich'eni jeheni? —ichro sín.

¹³ Ntá ntáchro ch'in Juan kixin:

—Jehó éxi tí tsík'ítuanhanrá chrókjuinčekjènkírá —ichro ch'án.

¹⁴ Kḡaxin iso sín soldado kjuanchankíhi sín ch'án kixin:

—¿Kḡaxin jeheni nkehe chrókjuich'eni? —ichro sín.

Ntá kjuátəhe ch'án kixin:

—Təéhyaró ninkexró tí chjəchəkoen sín la ko ninkexró sikh'énəhyaró kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

* 3:6 3.4-6 Isaías 40.3-5

¹⁵ Kaín tí chojni chjasin k'uéjóchónhen sín tóxakonhen ásén sín tjinkaon sín tsoñohe sín kixin á tí ch'ín Juan mé tí Cristo.

¹⁶ Kjánchó chénka ch'ín Juan kaín tí sín tjejó a kixin:

—Janhan mé intá tikítexián chojni. A ntá tí nkexro itsi chr'éxin mé tsikítexínrá tí Nchakuen Dios la ko xrohi. Antsí t'etóan ch'án a ntá janhan la kánhyó. Méxra chrókósuàna chrókjuasintankaha ch'án tí correa tí tokaté ch'án.

¹⁷ Jehe ch'án la ó tjexraá ch'án pala sinchetjuáxin ch'án noatrigó kixin tí ntachjji trigo la ókjé tsjejo ch'án a ntá tí noatrigó la tsjenájín ch'án la ts'enkachjina ch'án. A ntá tí ntachjji trigo la tsjakaxín ch'án ijnko xrohi ts'ankahya jnkochrixin —mé xikaha ichro ch'ín Juan.

¹⁸ Mé xikaha chronkaxín ch'án la ko itsjé í so nkehe kjuínchexraxinkaon ch'án chojni mé xikaha kjuákoexín ch'án sín tí tan jina.

¹⁹ Kjaxin kjuentuéhe ch'án tí ch'ín Herodes kixin chóna ch'án tí tjan Herodías, mé tí ichjién kichó ch'án Felipe, la ko kjuentuéhe ch'án tí ch'ín Herodes kixin tí í so nkehe jínahya tsikjich'e ch'án.

²⁰ Kjánchó ch'ín Herodes ántosén ch'án kjónté kuínhin ch'án la kjuínchek'ánki ch'án tí ijje ch'án inaá kixin kjuákechjina ch'án tí ch'ín Juan tí ntóechiso.

Kuikite ch'ín Jesús

(Mt. 3.13-17; Mr. 1.9-11)

²¹ A ntá naxa kuénhya tíha naxa kjuák'e ch'ín Juan kuikite ch'án chojni ntá kjaxin ch'ín Jesús mé kuikite ch'án. A ntá tjenixjehe ch'án Dios ntá xitjehe nkajni

²² ntá k'uínkajin Nchakuen Dios éxi ijnko kontóá tsjehe la kjuák'e chrítaón kja ch'án. Ntá xringhya kuínhin sín itén nkexro nkaya nkajni ntáchro kixin:

—Jaha mé xjanna la tjuaha tí jaha. Imá chàna kixin nchexiteyána tí jaha.

Tí sín tsík'axrjenáxin ch'ín Jesucristo

(Mt. 1.1-17)

²³ Ch'ín Jesús k'uéchóna ch'án chjino treinta nánó tió kjuankixin kjuako ch'án. Ntá kjuenkayáxin sín kixin it'é la mé ch'ín José. Ntá it'é tí ch'ín José la mé ch'ín Elí.

²⁴ A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José.

²⁵ A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai,

²⁶ a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatías, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín José, a ntá it'é tí ch'ín José na mé ch'ín Judá,

²⁷ a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri,

²⁸ a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er,

²⁹ a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer, a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat,

³⁰ a ntá it'é tí ch'ín Matat la mé ch'ín Leví, a ntá it'é tí ch'ín Leví na mé ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín José na mé ch'ín Jonán, a ntá it'é tí ch'ín Jonán na mé ch'ín Eliaquim,

³¹ a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán,

³² a ntá it'é tí ch'ín Natán na mé ch'ín David, a ntá it'é tí ch'ín David na mé ch'ín Isai, a ntá it'é tí ch'ín Isai na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón,

³³ a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá,

³⁴ a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá it'é tí ch'ín Abraham na mé ch'ín Taré, a ntá it'é tí ch'ín Taré na mé ch'ín Nacor,

³⁵ a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí ch'ín Heber na mé ch'ín Sala,

³⁶ a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'e tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec,

³⁷ a ntá it'é tí ch'ín Lemec na mé ch'ín Matusalén, a ntá it'é tí ch'ín Matusalén na mé ch'ín Enoc, a ntá it'é tí ch'ín Enoc na mé ch'ín Jared, a ntá it'é tí ch'ín Jared na mé ch'ín Mahalaleel, a ntá it'é tí ch'ín Mahalaleel na mé ch'ín Cainán,

³⁸ a ntá it'é tí ch'ín Cainán na mé ch'ín Enós, a ntá it'é tí ch'ín Enós na mé ch'ín Set, a ntá it'é tí ch'ín Set na mé ch'ín Adán, a ntá Dios mé xjeen ch'ín Adán.

4

Ch'ín Tsochren chrókjuachroe tí ch'ín Jesús
(Mt. 4.1-11; Mr. 1.12-13)

¹ A ntá ch'ín Jesús imá chóna ch'án kjuachaxiën Nchakuen Dios ntá kjanxin ch'án tí ntarío Jordán. Ntá tí Nchakuen Dios sákjuiko ch'án nteje.

² Ntaha kjuák'e ch'án cuarenta yaon na ntá tí ch'ín Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá chr'éxin ntá xrinahya ik'uén ch'án kjinta.

³ Ntá ntáchro tí ch'ín Tsochren kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ A ntá kjuátehe ch'ín Jesús ntáchro ch'án kixin:

—Náhi. Ntáchro xroon itén Dios kixin: “Jehya niotja ó chrók'uejóchónxin chojni. Náhi. Kain tí tan nixja Dios tjejóchónxin chojni”^{*} —ichro ch'án.

⁵ Ntá sákjuiko ch'ín Tsochren tí ch'ín Jesús ijnko jnā imá noi ntá kjuako tí Jínahya kain tí nación sún chjasintajni.

⁶ Ntá ntáchro tí ch'ín Tsochren kixin:

—Janhan tsotjaha kain tí kjuachaxin la ko kain tí nkehe tjete chóna kain tí nación a. Janhan na k'uayáha kain tíha la ntá jie tsotjaha tí nkexro tjinkavan tsotjaha.

⁷ Tí tsjak'éxian tóch'ian tsjikosáyana tí janhan ntá kain tí nkehe la ts'óna kuéntá —ichro ch'án.

⁸ Ntá kjuátehe ch'ín Jesús ntáchro ch'án kixin:

—Sátjia Satanás, kixin xroon itén Dios ntáchro kixin “Chrókjuikosáyehé Inchéni Dios la jehó ch'án chrókjuich'ehé xra”[†] —ichro ch'án.

⁹ A ntá ch'ín Tsochren mé sákjuiko ch'ín Jesús tí chjasin Jerusalén la sákjuiko ch'án tí chritaón tí kja nínko, a ntá ntáchro ch'án kixin:

—Tí chaxín Xjeen Dios jaha la títóhe t'anótjenxian tí noi ntihi

¹⁰ kixin ntáchro xroon itén Dios kixin:

Dios mé ts'etuenhen tí sún ángel kuènte ch'án kixin ts'ayakonhan sún.[‡]

¹¹ Tsotsé sún itjá

kixin tsotéhya totá ts'itja xro tí ts'anótjen§

—mé xikaha ichro ch'ín Tsochren.

¹² Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin: “Chjíníhya chrókjuásixián kjuaxroon kjuachaxin kuènte Inchéni Dios”^{*} —ichro ch'ín Jesús.

¹³ Mé xikaha tió kjuachahya tí ch'ín Tsochren kain nkehe chrók'uetuenhen tí ch'ín Jesús ntá k'uaxrjenta ch'án iso yaon.

Ch'ín Jesús kjuankixin ch'án tí xra kuènte ch'án estado Galilea
(Mt. 4.12-17; Mr. 1.14-15)

¹⁴ Ntá ch'ín Jesús xikjan ch'án estado Galilea inaá na imá chóna ch'án kjuachaxin kuènte Nchakuen Dios. Ntá tjejóto sún nkuixín ntiha kixin nkexro tí jehe ch'án.

¹⁵ Kjuakoxin ch'án tí nínkøe sún kain chjasin la ko kain xín chojni kjuanchia sún kjuasáya kixin kóxrjínjin sún tí kjuako ch'án.

Ch'ín Jesús kjuák'e ch'án chjasin Nazaret
(Mt. 13.53-58; Mr. 6.1-6)

¹⁶ Ntá ch'ín Jesús sákjuí ch'án chjasin Nazaret na mé tí chjasin tsik'ánkixin ch'án. Ntá tí yaon t'ok'éhe sún mé k'uixenhen ch'án ijnko nínko Israel kixin xikaha kuènen ch'án. Ntá kjuák'exín toté ch'án kixin sinchekuáxin ch'án tí xroon itén Dios.

¹⁷ Chjéhe sún ch'án tí xroon kuènte tí profeta Isaias. Ntá kuakitjehe ch'án tí xroon ntá k'uitja ch'án nketí nixja xikihí:

* 4:4 Deuteronomio 8.8 † 4:8 Deuteronomio 6.13 ‡ 4:10 Salmo 91.11 § 4:11 Salmo 91.12 * 4:12 Deuteronomio 6.16

18 Tí Nchakuen It'eni Dios tjetjinkitsana má,
kixin kjueyána ch'án kixin tsòxrjanka tí tan jína kuènte Dios tsjakohà tí sín nòà.
K'uetuanna ch'án kixin sintakìtohà jína tí sín t'ávà asén kixin chòntahya sín nkeri tsaáxin sín,
la ko tsjakohà tí sín tjejóchjina kixin nkexrí tsaá sín,
la ko sintak'ikuàn tí sín t'ikonhya,

la ko sintakáa káin tí sín tjejótsasóte kohya nkehe tsaáxin sín,

19 la ko tsòxrjanka kixin ó kjuixraká tí yaon kixin tí nkexro tsitekaon la tsaá sín.[†]

20 A ntá ch'in Jesús kjuixin kjuínchekuáxin ch'án tí xroon, a ntá chjéhe ch'án tí ch'in tjinkitsa
tí xrà ninko ntá kjuák'etjaxin ch'án. Ntá káin tí sín tsíkòjnkotsé ntíha ninko naxà tjejókomá
sín tí jehe ch'án.

21 Ntá kjuankixin chronkaxín ch'án ntáchro ch'án kixin:

—Ntá ijie la ó xiteyá tí nkehe kjuíntakuáxin tí xroon itén Dios kuínhínrà —ichro ch'án.

22 Ntá káin sín kóxrjinhín sín tí kjuako ch'in Jesús la ko chrakon sín kixin náxrjón tí nkehe
nixja ch'án. Ntá kjuanchankíhi sín kichó sín ntáchro sín kixin:

—¿A jehya xjeen ch'in José tíhi? —ichro sín.

23 Ntá kjuátghe ch'in Jesús ntáchro ch'án kixin:

—Kjá tsontáchrórà kixin janhan ijnko chojni ch'e xroan chrókjuíntakìtohà jína asenná
senó, la ko tsontáchrórà kixin tí nkehe kuínhínrà kjuí'ta tí chjasin Capernaum xikaha
chrókjuí'ta ntíhi chjasenná, tsixrorà —ichro ch'án.

24 Naxà tjenixja ch'in ntáchro ch'án kixin:

—Ijnko nkehe chaxín tsotjnkará kixin tí sín chjasén ijnko nkexro chrónka itén Dios la mé
xráxin chòntehya sín kjuasáyé tí nkexro a.

25 Chaxín ntáxrjan kixin k'uejó itsjé chojni chjin tsíkók'án tí naciòn Israel tíó kjuák'e ch'in
Elías tí nkexro k'uechrónka itén Dios la ntá í k'uániáhya chrin iní nánó ko t'ò la ko imá kókjinta
nkúixin chjasin ntíha.

26 Kjánchó Dios la k'uetuenhya ch'in Elías sáchrókjuitsjehe ch'án nijnko chojni chjin
tsíkók'án tí naciòn Israel. Náhi. Dios k'uetuenhén ch'án kixin sátsjitsjehe ch'án ijnko chojni
chjin tsíkók'án itjen chjasin Sarepta chjino chjasin Sidón.[‡]

27 Kjaxin naciòn Israel k'uejó nchónhya chojni chónka chinlepra tíó kjuák'e ch'in Eliseo
chrónka ch'án itén Dios, kjánchó nijnko sín kuítóehya sín jína la mé jehó ch'in Naamán kjuíxin
ch'án naciòn Siria mé kuítóehya ch'án jína[§] —mé xikaha ichro ch'án.

28 A ntá tíó kuínhin sín xikaha ntáchro ch'in Jesús la ntá káin tí chojni k'uejóxehén ninko
la mé imá kónínkaon sín.

29 K'uínkatjen sín itsé sín ch'án sákjuiko sín ch'án tí ikon chjasin la sákjuiko sín ch'án chrítaón
tí tjo tí tjen tí chjasin a chrókjuínchek'anótjexin sín ch'án tí tjo a.

30 A ntá ch'in Jesús k'uaúsínka jnkosiné tí síin tí jehe sín la sákjuí ch'án.

Ijnko chojni chónka ijnko nchakuen tí jínahya

(Mr. 1.21-28)

31 A ntá ch'in Jesús sákjuí ch'án tí chjasin Capernaum na mé ijnko chjasin estado Galilea,
na ntá ntaha kjuankixin ch'án kjuakohè ch'án chojni tí yaon t'ok'éhe sín.

32 Chrakon sín kixin nkexrí kjuako ch'án kixin kjuakoxin ch'án kixin chónka ch'án
kjuachaxin.

33 A ntá nkaxenhen ninko kjuák'e ijnko ch'in chónka ijnko nchakuen tí jínahya k'óyakoxín
itén tí ch'in a, ntáchro kixin:

34 —Títoghéni; ¿nkekuènte tjtáté tí jeheni káin ni, jaha Jesús kjuíxian chjasin Nazaret? ¿Á
k'uinka kixin sinchek'itjáyanni? Ó tjátsoan tí jaha la ko nòna kixin jaha mé tí nkexro tjóá
kuènte Dios —ichro tí nchakuen tí jínahya.

35 Ntá ch'in Jesús jiehe k'uetuenhén tí nchakuen tí jínahya ntáchro ch'án kixin:

—Táníá. T'axrjéxian tí ch'in a —ichro ch'án.

A ntá tí nchakuen tí jínahya kjuáka tí ch'in a kjuítsínka ch'án nonte jnkosiné tí síin sín la
k'uaxrje tí nchakuen tí jínahya la kohya ninkehó kónhen tí ch'in kjuítsínka.

36 A ntá káin sín chrakon sín itjo sín kichó sín kixin:

—¿Xá nkexrí kixin xikaha nixja tí ch'in í? Jehe ch'án chónka kjuachaxin kixin k'uetuenhén
ch'án tí nchakuen tí jínahya k'uaxrjéxín tí nkexro í —ichro sín.

37 A ntá nkúixin ntíha ikjo sín kichó sín kixin nkeri kjuaxroan kjuíche ch'in Jesús.

Ch'in Jesús kjuínchekitohè jína tí tjan ich'ee ch'in Simón Pedro

(Mt. 8.14-15; Mr. 1.29-31)

³⁸ Ntá ch'ín Jesús k'uaxrjexín ch'án tí n̄jnko la ntá k'uúixenhen ch'án ntøe ch'ín Simón. A ntá tí tjan ich'ee ch'ín Simón mé níhi tjan chón̄ta tjan ijnko sóa jié ntá chronóøhe s̄in ch'án k̄ixin chrókjuinçekitøhe ch'án tjan j̄ina.

³⁹ Ntá k'uísén ch'ín Jesús tí tjen tjan ntá k'uøtuøenhen ch'án tí sóa a ntá kjuuin. Ntá tuénxín k'uàya tjan la ntá kjuanjon tjan nkehe sine s̄in.

Ch'ín Jesús kjuinçekitøhe ch'án j̄ina itsjé chojni níhi
(Mt. 8.16-17; Mr. 1.32-34)

⁴⁰ A ntá kuétaón yaon ntá kaín tí s̄in chón̄ta s̄in s̄inníhi chón̄ta s̄in nchón̄hya clase chin mé kuikao s̄in tí tjen ch'ín Jesús. Ntá kjuak'etja tja ch'án jnkojnko tí jehe s̄in a ntá x̄ikaha kuitøhe s̄in j̄ina.

⁴¹ La ko nchón̄hya chojni níhi chón̄ta nchakuen tí j̄inahya la mé k'uaxrje tí nchakuen tí j̄inahya la k'óyako la ko ntáchro k̄ixin:

—Jaha mé Xjèen Dios —mé ichro tí nchakuen tí j̄inahya.

Kjánhó ch'ín Jesús k'uøtuøenhen ch'án tí nchakuen tí j̄inahya la kjuanjonhya ch'án kjuachaxin k̄ixin tsonixja k̄ixin ó nohe tí nchakuen tí j̄inahya k̄ixin jehe ch'án na mé tí nkexro Cristo.

Ch'ín Jesús kjuako ch'án tí estado Galilea
(Mr. 1.35-39)

⁴² A ntá tí kóyaoon k'uínkaséyan ntá ch'ín Jesús k'uaxrjenta ch'án chjasin sákjui ch'án nteje. A ntá kaín tí chojni kjuikjeyá s̄in ch'án la k'uitja s̄in tí tjen ch'án. Tjinkaon s̄in chrókjuinçekxrenhen s̄in ch'án k̄ixin sáchrókjuihya ch'án ókjé.

⁴³ Kjánhó kjuátøhe ch'ín Jesús ntáchro ch'án k̄ixin:

—T'ichj̄ánx̄in k̄ixin sátsjia kaín chjasin ókjé tsoxrjanka tí tan j̄ina kuènte Dios k̄ixin nkexrí tí kjuachaxin t'øtøan Dios, k̄ixin x̄r̄á ó mé k'uinka —ichro ch'án.

⁴⁴ A ntá x̄ikaha k'uájikjako ch'ín Jesús kaín tí n̄jnko Israel tí estado Galilea.

5

Kjuaxroan itsé s̄in koche
(Mt. 4.18-22; Mr. 1.16-20)

¹ Ntá ijnko yaon kjuák'e ch'ín Jesús chr̄inta ntayaon Genesaret ntá kóchjina nchón̄hya chojni na mé k'uúixitja k̄ichó s̄in k̄ixin tjinkaon s̄in chrókuihin s̄in itén Dios.

² Ntá k'uikon ch'ín Jesús k̄ixin tjejó iyó ntabárco jehó chjino chr̄inta ntayaon. A ntá tí s̄in itsé koche mé tsik'axrjexín s̄in ntiha la k'uéjó s̄in tjentoá s̄in la ko tjejótjonemá s̄in tí nchísén tséya s̄in koche.

³ Ntá ch'ín Jesús k'uit'ótjen ch'án ijnko tí ntabárco ntiha na mé ntabárco kuènte ch'ín Simón na ntá chronóøhe ch'án tí ch'ín Simón k̄ixin sátsjiko ch'án ntabárco ijnko chr̄inta ntá kj̄inhya. Ntá ntahó kjuák'enkáya ch'ín Jesús tí nta kjuák'etj̄ax̄in ch'án kjuakøhe ch'án nchón̄hya chojni s̄in chr̄inta ntá.

⁴ A ntá tió kjuixin nixja ch'án ntá ntáche ch'án tí ch'ín Simón k̄ixin:

—Tjiko ntabárco tí tjáá ntá n̄jnka ntá iterá tí nchísén tseyará koche —ichro ch'án.

⁵ Ntá kjuátøhe ch'ín Simón ntáchro ch'án k̄ixin:

—Maestro, kjuich'eni x̄r̄á kuénté tie la tséhyani ninkehó koche. Kjánhó tí jaha x̄ikaha kuøtuøenhéni la mé tsochr'anni tí nchísén inaá —ichro ch'án.

⁶ Na ntá x̄ikaha kjuich'e s̄in la ntá nchón̄hya koche tsitsé tí nchísén la ntá tí nchísén kjuank̄ixin tinkák'ichje.

⁷ Ntá k'uèyax̄in s̄in tja s̄in k̄ixin chróxrakoa tí s̄in ch'eko s̄in x̄r̄á tjejóxenhen tí ijnko ntabárco k̄ixin tsjink̄itsa s̄in. Ntá x̄r̄akao s̄in ntabárco kuènte s̄in ntá kjuinçekaoón s̄in yóí tí ntabárco ntá chrókjuachahya tí ntabárco na tjinkaon chrók'uániánk̄i ntá.

⁸ Ntá x̄ikaha k'uikon ch'ín Simón Pedro ntá kjuák'exín toh'ín ch'án nkayakon ch'ín Jesús ntá ntáchro ch'án k̄ixin:

—Tjtohéni ñnehéni k̄ixin jeheni ijnko chojni chón̄ta j̄ie —ichro ch'án.

⁹ Mé x̄ikaha ichro ch'ín Simón k̄ixin chrakon ch'án la ko k̄j̄ax̄in chrakon tí í so s̄in tjejóko ch'án k̄ixin x̄ikaha kónhen xrenáj̄in nchón̄hya koche.

¹⁰ La ko ch'ín Jacobo la ko ch'ín Juan, xjèen ch'ín Zebedeo, na mé jnkojóá ch'eko s̄in x̄r̄á ch'ín Simón, la k̄j̄ax̄in chrakon s̄in. Kjánhó ntáche ch'ín Jesús tí ch'ín Simón k̄ixin:

—Chrakonhya. Senó la koche k'uétse la nta j̄ie la náhi la mé chojni tsjeyá —ichro ch'án.

¹¹ Ntá tió kjuijiko s̄in tí ntabárco tí chr̄inta ntá la kuitøhe s̄in kaín nkehe kuènte s̄in ntá chr̄he s̄in sákjuiko s̄in tí ch'ín Jesús.

Ch'ín Jesús kjuinçekitøhe ch'án j̄ina ijnko chojni chón̄ta chinlepra
(Mt. 8.1-4; Mr. 1.40-45)

¹² Kjuák'e ch'ín Jesús ijnko tí chjasin, ntá kui ijnko chojni níhi chóna chinlepra. A ntá tío k'uikon ch'án tí ch'ín Jesús ntá kjuák'exín toch'in ch'án chronóehē ch'án jnkójina ntáchro ch'án kixin:

—Inchéni, tí tjinkávan jaha la jína chrókujnchekitohéni jína —ichro ch'án.

¹³ Ntá ch'ín Jesús kjuéntoá tjá ch'án ntá kjuak'etja tjá ch'án chrítaón tí sinníhi ntáchro ch'án kixin:

—Méxra xikaha tjínkavan. Ntá jie sintakitoá jína —ichro ch'án.

Ntá xikaha ichro ch'án ntá tí chinlepra tuénxín kjuinlinhín tí sinníhi.

¹⁴ A ntá k'uetuenhen ch'ín Jesús tí ch'ín a kixin chróchenkahya ch'án ninkexró. Ntáchro ch'án kixin:

—Sátjia tjítsjehé tí nchat'á la tsánjuan tí nkehe tsík'etqan ch'ín Moisés ts'áyéhe Dios* kixin ntá tsonoexín kaín xín chojni kixin ó kuitóá jína —ichro ch'án.

¹⁵ Kjánchó antsí k'uixikónohe sín nkexrí tí kjuaxroan kjuasin ch'ín Jesús, ntá nchónhya chojni k'uixikóhjnehe sín ch'án kixin tsinhín sín nkehe tsjako ch'án, la ko tsitqexín sín jína tí chín chóna sín.

¹⁶ Kjánchó ch'ín Jesús la k'uaxrjenta ch'án tí kohya chojni la ntaha nixjexín ch'án Dios.

Ch'ín Jesús kjuínchekitohe ch'án jína ijnko ch'ín tsík'en toté

(Mt. 9.1-8; Mr. 2.1-12)

¹⁷ A ntá ijnko yaon kjuák'ekjako ch'ín Jesús na ntá ntiha k'uejótjaxín iso sín fariseo la ko iso tí sín tjako tí ley, tsík'jixín sín kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuénte Dios kjuakoxín ch'án kixin sinchekitohe ch'án chojni jína.

¹⁸ Ntá kui iso chojni tinkátsénki sín ijnko ch'ín tsík'en toté tjenkáya ijnko kania. Ntá tjinkaon sín chrók'uixenko sín ch'án tí nchia kixin chrókjuak'e ch'án tí tjen ch'ín Jesús tjetjako ch'án.

¹⁹ Kjánchó xitjahya ts'ixenhen sín kixin nchónhya chojni síxenhen nchia. Ntá k'ujt'ótjen sín tí chrítaón nchia, ntá kjuakjín sín iso teja la ko tí nta sit'ó ntá ntiha kjuinkajinxín sín tí ch'ín níhi tjenkáya kania ntoí tí tjen ch'ín Jesús.

²⁰ Na ntá tío k'uikon ch'ín Jesús kixin imá tinkáchónki sín ch'án ntá nixjehē ch'án tí ch'ín níhi, ntáchro ch'án kixin:

—Jaha, ó kjuixín kjuinlinhín tí jie chonta —ichro ch'án.

²¹ A ntá tí sín maestro tjako tí ley la ko tí sín fariseo kjuankixin sín kjo sín asén sín kixin: “Xá nkexro tíhi ch'ía ch'án ncheyóhe ch'án asén ch'án Dios? Ninkexró xitjahya tsjakjín ijie kixin jehó Dios mé chóna kjuachaxin tsjatsen ijie chojni”, mé xikaha kjuenkayáxin sín.

²² Ntá ch'ín Jesús la ó nohe ch'án tí nkehe tjenkayáxin sín ntá ntáchro ch'án kixin:

—¿Nkeuente kixin xikaha tjenkayáxinrá?

²³ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixín kjuinlinhín ch'án tí ijie yámá ch'án, ó á antsí xrahya chróntátjan ch'án kixin chrók'uínkatjen ch'án sáchrókjui ch'án?

²⁴ Méxra ijie tsjákoxián kixin tí Xjeen Dios K'óna Chojni mé chóna kjuachaxin ntihi chjasintajni tsjakjínlinhín ijie chojni —ichro ch'án.

Ntá k'uetuenhen ch'án tí ch'ín tsík'en toté ntáchro ch'án kixin:

—Jaha tétuanhan t'inkatjen tjatsíyan kaniáa la sátjia ntóá —ichro ch'án.

²⁵ Ntá tuénxín k'uínkatjen tí ch'ín tsík'en toté nkayakon kaín tí sín síin a la kuákja ch'án kaniē ch'án k'uékjak'eták'á ch'án ntá sákjuí ch'án ntqē ch'án la kjuanchehe ch'án Dios kjuasáya.

²⁶ Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kixin:

—Ijie mé k'uikonni antsí má kjuaxroan jie —ichro sín.

Ch'ín Jesús k'uíyehē ch'án tí ch'ín Leví

(Mt. 9.9-13; Mr. 2.13-17)

²⁷ Ntá chr'éxin ntá ch'ín Jesús k'uaxrjexín ch'án nchia ntá k'uikon ch'án ijnko ch'ín nchekjènkí mé it'in ch'án Leví tjetjaxín ch'án tjech'e ch'án xra nkaxenhen tí nchia ntsí tí xenkaxín chichaon a. Ntá ntáchro ch'án kixin:

—Chr'éhé tí janhan —ichro ch'án.

²⁸ Ntá ch'ín Leví mé tuénxín k'uínkatjen ch'án la ntá kuitóhe ch'án kaín xín nkehe ntá chr'éhe ch'án tí ch'ín Jesús.

²⁹ Ntá chr'éxin ch'ín Leví chóna ch'án ijnko kia jie ntqē ch'án kjuikosáyehe ch'án tí ch'ín Jesús. Kjaxin k'uejótjéjé tí sín nchekjènkí la ko itsjé í so chojni chóna jie k'uejótjéjéjé sín tí ch'ín Jesús chjino tí mesa a.

* 5:14 Levítico 14.4-8

³⁰ A ntá tí sín fariseo la ko tí sín maestro tjako tí ley la mé kjuankíxin sín tjonta sín tí sín k'uájiko ch'in Jesús ntáχρο sín k'ixin:

—¿Nkekuènte ntekoará la ko t'ikoará tí sín nchekjènkì la ko tí sín chóna jìe? —ichro sín.

³¹ A ntá kjuátèhe ch'in Jesús ntáχρο ch'án k'ixin:

—Tí chojni níehya t'ichjánxienhya sín nkexro sich'e xroan. Náhi. Jehó tí sín níhi mé t'ichjánxinhin sín nkexro sich'ehe sín xroan.

³² Janhan la k'uinkahya ntíhi k'ixin chrók'uíyaha tí sín jína tjejó. Náhi. Janhan k'uinka k'ixin ts'iyaha tí sín chóna jìe k'ixin chrókuítòhe sín tí ijìe sín ntá chrókuíunki sín tí tjenkayáxin sín —ichro ch'án.

Tjanchankíhi sín tí ch'in Jesús k'ixin á chrókjónehya sín tió tsonixjèhe sín Dios
(Mt. 9.14-17; Mr. 2.18-22)

³³ A ntá kjuanchankíhi sín tí ch'in Jesús k'ixin:

—¿Nkekuènte k'ixin tí sín k'uék'ajiko ch'in Juan jnkoyaxón nehya sín na nixjèhe sín Dios, la ko kjaxin xikaha ch'e tí sín xriko tí sín fariseo, a ntá tí sín xrikoa la ine sín la ko it'i sín? —ichro sín.

³⁴ Ntá kjuátèhe ch'in Jesús k'ixin:

—¿Xá chrókuachará chrókuétuènhenrá kain tí sín tsík'iyèhe sín tsíkóchjina tí tjejó tí sín tsíkótehe k'ixin chrókjónehya sín tí naça tjejóko sín tí ch'in tsíkótehe?

³⁵ Kjánchó tsjixraká tí yaon itsi chojni tsotsé sín tí ch'in tsíkótehe sátsjiko sín ch'án. Ntá tí sín tsíkóchjina la ts'avá sín la í sinehya sín —ichro ch'án.

³⁶ Kjaxin kjuíncheyóexin ch'án ntáχρο ch'án k'ixin:

—Ninkexró chrókuaté ijnko camisa níxin ntá chrókuak'enièhe ijnko camisa ntaxin k'ixin xikaha chrókuich'e sín ntá chrók'uitjayan tí camisa níxin la ko kjaxin tí t'ò ka k'uaxrxénin tí camisa níxin tsyóèhya tí camisa ntaxin.

³⁷ Kjaxin chrókuíkjahyará xranvino níxin ijnko tjuaxran ntaxin k'ixin tí xikaha chrókjuich'erá la chrók'uihje tí tjuaxran ntaxin ntá chrók'uitjayan tí xran la ko chrók'uitjayan tí tjuaxran.

³⁸ A ntá tí xranvino níxin chrókuikia ijnko tjuaxran níxin k'ixin yóí la chrók'uitjanyha.

³⁹ La ko kjaxin ninkexró tió tsík'i tí xran ntaxin naça chrókóxrjínhin chrók'ui xran níxin. Náhi. Tsontáχρο ch'án k'ixin íchá jína tí xran ntaxin, tsixro ch'án —mé xikaha ichro ch'in Jesús.

6

Tí sín k'uájiko ch'in Jesús mé k'uín sín iso noatrigo ijnko yaon t'ok'éhe tí sín israelita
(Mt. 12.1-8; Mr. 2.23-28)

¹ Ijnko yaon t'ok'éhe sín la ch'in Jesús k'uátsínka ch'án iso nonte t'óna noatrigo. Na ntá tí sín k'uájiko ch'án mé ik'uín sín iso noatrigo la kjuankíxin sín nkaya tja sín ó k'óntajinyá sín tí noa ntá kjóné sín.

² Ntá iso tí sín fariseo kjuanchankí sín k'ixin:

—¿Nkekuènte k'ixin tjejoch'erá xra jìe? La mé kohya kjuachaxin tsonhen xra tí yaon t'ok'éheni —ichro sín.

³ Ntá kjuátèhe ch'in Jesús k'ixin:

—¿Jahará á kjuínchekuaáxinhyará tí xroon chrónka nkehe kjuich'e ch'in David la ko tí sín k'uájiko ch'án tió k'uén sín kjinta?

⁴ Na mé jehe ch'án mé k'uixenhen ch'án ntòe Dios la kjóné ch'án tí niotja tsíkóyaon, la ko kjaxin chjéhe ch'án tí niotja tí sín k'uájiko ch'án kjónté jehó sín kjuachaxin sine tí sín nchat'a* —ichro ch'in Jesús.

⁵ Kjaxin ntáχρο ch'án k'ixin:

—A ntá tí Xjeen Dios K'óna Chojni mé chóna kjuachaxin ts'etòan nkexrí tsonhen tí yaon t'ok'éheni —ichro ch'án.

Ch'in Jesús kjuínchekitòhe jína ijnko ch'in tsíxamá tja
(Mt. 12.9-14; Mr. 3.1-6)

⁶ A ntá í jnko yaon t'ok'éhe chojni ntá k'uixenhen ch'in Jesús ijnko nínko Israel la ntá kjuankíxin kjuako ch'án. A ntá ntaha kjuák'e ijnko ch'in tsíxamá tja ch'án chjina.

⁷ Na ntá tí sín tjako tí ley la ko tí sín fariseo tjejó sín tsáyehé sín tí ch'in Jesús chrók'uikon sín á sinchekitòhe ch'án chojni jína tí yaon t'ok'éhe sín k'ixin ntá chrók'ueka sín ch'án jìe.

⁸ Kjánchó jehe ch'án ó nohe ch'án nkehe tjenkayáxin asén sín ntá nixjèhe ch'án tí ch'in tsíxamá tja ntáχρο ch'án k'ixin:

—T'ínkatjen, tjak'e jnkosiné ntíhi —ichro ch'án.

* 6:4 6.3-4 1 Samuel 21.6; Levítico 24.5-9

Ntá k'uínkatjen tí ch'ín a kjuák'exín tǒte ch'án.

⁹ Ntá nixjehe ch'ín Jesús tí í so sín ntáchro ch'án kixin:

—Tsjánchánkíhárá ijnko xra. Tí yaon t'ók'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿Á chrókjuinchekitǒheni chojni jína ní o á chrók'óyánni chojni? —ichro ch'án.

¹⁰ Ntá ch'ín Jesús komá ch'án kaín tí chojni síin ntiha ntá nixjehe ch'án tí ch'ín níhi ntáchro ch'án kixin:

—Tjéntoá tjá —ichro ch'án.

Á ntá tí ch'ín a xíkaha kjuích'e ch'án ntá kuítǒhe tja ch'án jína.

¹¹ Kjánchó tí sín fariseo tjejó mé kónínkaon sín mé ntá kjo sín kíchó sín kixin tjínkaon sín chrók'óyán sín tí ch'ín Jesús.

Ch'ín Jesús kjueyá ch'án tí teyó sín ts'ajiko ch'án

(Mt. 10.1-4; Mr. 3.13-19)

¹² Á ntá ijnko yaon ch'ín Jesús sákjui ch'án ijnko jnǎ kixin ntaha tsonixjeexín ch'án Dios la ntá ntahó kjuák'e ch'án kuénté tie tjenixjehe ch'án Dios.

¹³ Á ntá tí k'uínkaséyan a na mé k'uíyehé ch'án tí sín chréhe sín ch'án ntá kjueyá ch'án teyó sín kixin ts'óna sín apóstol ts'ajiko sín ch'án.

¹⁴ Á ntá tí sín í mé xíkíhi it'ín sín. Na mé ch'ín Simón la ntá ch'ín Jesús kjuínchek'in ihnjé ch'án Pedro kjaxin; la ko kíchó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé,

¹⁵ la ko ch'ín Mateo, la ko ch'ín Tomás, la ko ch'ín Jacobo la mé it'é mé it'ín Alfeo; la ko í jnko ch'ín Simón na mé tí ch'ín a mé k'uék'aji tí partido cananista;

¹⁶ la ko ch'ín Judas la kíchó ch'án mé it'ín Jacobo; la ko ch'ín Judas Iscariote tí ch'ín kjuíncheki tí ch'ín Jesús.

Ch'ín Jesús kjuakǒhe ch'án nchónhya chojni

(Mt. 4.23-25)

¹⁷ Ntá ch'ín Jesús la ko tí jehe sín k'uínkajinxín sín tí jnǎ ntá k'uéjó sín nonte yóxin jehe ch'án la ko tí sín kjueyá ch'án. Kjaxin k'uixikóchjina nchónhya chojni kjuixín nkuixín estado Judea la ko chjasín Jerusalén la ko tí chrínta ntayaon tí síin tí chjasín Tiro la ko tí chjasín Sidón. Ó kjui sín kixin tsinhín sín tí nkehe tsjako ch'ín Jesús la ko tsitǒhe sín jína.

¹⁸ Á ntá tí sín kjuaxróxinhya k'uéjó k'uéchóna sín nchǎkuen jínahya na mé kuítǒhe sín jína kjaxin.

¹⁹ Kaín chojni tjínkaon chrókúákóxin sín tí ch'ín Jesús kixin kjuínchekitǒhe ch'án jína kaín xín chojni kixin jehe ch'án chóna ch'án kjuachaxin jíé.

Tí kjuachéhe la ko tí kjuaxróxinhya

(Mt. 5.1-12)

²⁰ Ntá komá ch'ín Jesús tí sín k'uájiko ch'án ntá ntáchro ch'án kixin:

—Náxrjón tjejórá jahará nòará kixin chontará kjuachaxiénd Dios.

²¹ Náxrjón tjejórá jahará t'énxinrá kjinta ijie kixin chr'éxin sinterá jína.

'Náxrjón tjejórá jahará tsjanará ijie kixin chr'éxin tsjanorá.

²² 'Náxrjón tjejórá jahará nínkakonhanrá chojni la ko ts'ínkítíará sín sátsjirá ókjé, la ko t'ántaxínhanrá sín la ko t'ákjenxin sín ihnjárá éxi ijnko nkehe jínahya kixin tinkachónkirá tí Xjeen Dios K'óna Chojni.

²³ Tsocháhará má la ko imá tsochontará kjuachéhe tí yaon a kixin ts'ayéhérá nkehe kuénte nkaya nkajní. Á ntá xíkaha tí t'áchrijí tí sín jínahya ch'e la mé ósé kjuate sín tí sín k'uéchónka itén Dios.

²⁴ 'Á ntá jahará rícorá kjuaxróxinhya ts'ejorá chr'éxin kixin ó kjuixin k'uayéhérá kaín nkehe.

²⁵ 'Á ntá jahará kjónterá jína, kjuaxróxinhya ts'ejorá chr'éxin kixin ts'énxinrá kjinta.

'Á ntá jahará tjanorá jie, kjuaxróxinhya ts'ejorá chr'éxin kixin ts'avará la ko tsotsjanará.

²⁶ 'Kjuaxróxinhya ts'ejorá tió kaín chojni tsjikosáyahará sín kixin xíkaha tí t'áchrijí sín kjuikosáyehé tí sín ntoáhya k'uéchónka itén Dios ósé.

Tsojtuèheni tí sín nínkakonhenni

(Mt. 5.38-48; 7.12)

²⁷ 'Á ntá jahará tjejotinhínra mé tjéxrjanka kixin chrótjuéhérá tí sín nínkakonhanrá la ko jína chrókjuínkítsará tí sín tjínkakonhya tí jahará.

²⁸ Jína nixjehérá tí sín t'ántaxínhanrá la ko tjanchehérá Dios kixin tsjínkítsa ch'án tí sín chónkíhará sín.

²⁹ Tí chjéhe ijnko nkexro ijnko tuañnará chrókjóká tí í jnko nánko kixin chróchjéhe sín tíha kjaxin. La ko tí sín ijnko nkexro tjinkaon sín tsakitsjaha sín tí chamara tjín t'inkayate na mé títoghé kixin kjaxin sátsjiko sín camisá kjaxin.

³⁰ Tí jnkojin nkexro tjanchaha nkehe chonta la chjehé sín. A ntá tí tsakja sín nkehe kuèntá la tjanchehya sín kixin naxá ts'ókjanhan sín.

³¹ Méxra chrókjuikosáyehérá kichuárá éxí yóhé nkexrí tjinkáonrá chrókjuikosáyahará tí jehe sín kjaxin.

³² Tí jehó tjuèhérá tí nkexro tjuàhará la tí xikaha la kohya ninkehó tsjachahyará. Kjonté tí sín jínahya tjasin jie la xikaha ch'e sín.

³³ A ntá tí tjikosáyehérá jehó tí sín tjikosáyahará la kohya ninkehó tsjachahyará xikaha. Kjonté tí sín jínahya tjasin jie mé kjaxin xikaha ch'e sín.

³⁴ La ko tí nchekjenrá chichaon jehó tí sín tjenkayáxinrá kixin ts'ókjanhanrá sín tí chichaon, la tí xikaha kohya ninkehó tsjachahyará. Kjonté tí sín jínahya tjasin jie xikaha ch'e sín nchekjen kichó sín chichaon la ko chónhen sín kixin tsokjan tí chjchakoen sín inaá.

³⁵ Kjánchó jahará chrótjuèhérá tí sín nínkakonhanrá la ko jína chrókjuich'eherá sín xra la ko chrókjuinckekjenrá sín chichaon la chróchoénhyará kixin chrókjan tí chjchakoenrá inaá. Mé xikaha chrókjuich'erá la imá tsjachará la ko ts'ónará jjeen Dios nkaya nkajní kixin jehe ch'án ch'ehe ch'án jína tí sín chóntehya ch'án kjuasáya la ko tí sín jínahya.

³⁶ Chrókjuikonóehérá kichuárá éxí yóhé It'árá nkaya nkajní tikonóehé ch'án chojni.

Chrók'uan taxienhyani kichó ni

(Mt. 7.1-5)

³⁷ Chrókuékahyará jie ókjé chojni kixin ntá Dios chrókjuanchahya ch'án jie tí jahará. Chrókuétuñnyará kixin chrókjuasóte í jnko chojni kixin Dios kjaxin chrókjuinckekjasótiahyará ch'án tí jahará. Chrók'uitjáyánhanrá ichrén jie kjuasinhanrá í jnko chojni kixin ntá Dios chrókjuinckek'itjáyánhanrá ch'án tí jie kjuásinrá.

³⁸ Chjehérá í so sín tí nkehe ts'áyéhe sín kixin ntá Dios tsotjáhará ch'án nkehe jína kjaxin, tjetóxin ijnko medida jína chrókjuanjon ch'án, icha tsik'enka ch'án kixin tsik'ótsjéyehe ch'án tí nkehe tsikjachroayá ch'án tjetóxin tsjanjon ch'án. Dios tsotjáhará xikaha yóhé éxí tsichjehérá í so chojni.

³⁹ Ntá kjuíncheyóexin ch'ín Jesús ntáchro ch'án kixin:

—Xá á chrókójína ijnko chojni t'ikonhya chrókjuiko í jnko chojni t'ikonhya? Tí xikaha la yóí sín chrók'uanójtjenya sín ichrén tòye.

⁴⁰ Ijnko nkexro xrakohé la noehya éxí tí nkexro tjako. Kjánchó tíó tsjixin tsoxrakohé ch'án ntá tsonohé ch'án éxí nohe tí nkexro kjuakohé ch'án.

⁴¹ '¿A ntá nkekuènté tsjehé tí chjínínó ntsí tjenkánkí ikon tí kichuá, tí naxá ántosán tí nta jie tjenkánkí ikuan?

⁴² ¿Mé xikaha nkexrí kixin chróntáche kichuá kixin chrókuítóhe ch'án kixin chrókuakitsjenkíhí ch'án tí chjínínó ntsí tjenkánkí ikon ch'án tí naxá ántosán tí nta jie tjenkánkí ikuan? Jaha la ntoáhya tjenkayáxin ch'ia jaha. Senó chrókuakitsjenkiá tí nta jie tjenkánkí ikuan kixin ntá chrók'uikuan chrókuakitsjenkiá chjínínó ntsí tjenkánkí ikon tí kichuá.

Tí nta mé tjatsqanxínni tí to tsik'óna

(Mt. 7.17-20; 12.34-35)

⁴³ Kohya nta jína chrók'óna to jínahya, la ko kjaxin kohya nta jínahya chrók'óna to jína.

⁴⁴ Jnkojnko tí nta mé tjatsqanxínni tí to t'óna. Tí ntach'ixí xitjahya tsjakjinjinni to higo la ko xitjahya ts'inni to uva.

⁴⁵ Ijnko chojni jína la jína nixja ch'án kixin jína asén ch'án. A ntá ijnko chojni jínahya la mé nixja tí nkehe jínahya kixin jínahya asén ch'án. Kixin éxí tjenkayáxin asén mé xikaha nixja ir'va.

Ch'ín Jesús kjuíncheyóexin éxí yaá nkexro kjuich'ena nchia

(Mt. 7.24-27)

⁴⁶ ¿Nkekuènte ntáchrórá kixin janhan Inchárá, la ntá tahyará kuenté tí nkehe tétuñhanrá?

⁴⁷ Méxra kaín tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhé sín.

⁴⁸ Na mé jehe sín tóyóhé ijnko nkexro kjuich'ena nchia la senó k'óxraya ch'án tòye ninka kixin ntá sich'ena ch'án nchia chrítaón tí tjo a. A ntá tíó k'uánkí tí ntarío la ikui tí nta k'uúntate tí nchia, kjonté xikaha la k'uátjóákohya la ní kuínkíhya tí nchia a kixin jína tsik'óna chrítaón tjo tjekjen.

⁴⁹ A ntá tí nkexro tinhin tí nkehe ntáxrjan la ntá tahya sín kuenté la mé tóyóhé ijnko nkexro kjuich'ena nchia chrítaón nche la kohya tjo chrínkí. A ntá tíó k'uánkí tí ntarío la ikui tí nta

k'uíntate tí nchia la ntá k'uátjoáko ntá tí nchia la ntá kuenté tí nchia la k'uítjáyan —mé ichro ch'ín Jesús.

7

Ch'ín Jesús kjuínchekitohe jína ijnko ch'ín ch'ehe ijnko soldado romano xra
(Mt. 8.5-13)

¹ Ntá ch'ín Jesús kjuixin nixjehe ch'án tí chojni a ntá sákjuí ch'án chjasin Capernaum.

² Ntaha kjuák'e ijnko capitán romano la mé chóntha ch'án ijnko nkexro ch'ehe ch'án xra imá tjuèhe ch'án la ntá jie níhi tí ch'ín a tjet'en ch'án.

³ A ntá tió kuínhin tí ch'ín capitán itjo sín nkexrí tjen ch'ín Jesús ntá ichr'án ch'án iso sín táda judío tsjijtsjehe sín tí ch'ín Jesús tsochronóehe sín ch'án kixin chrókjuíi ch'án chrókjuínchekitohe ch'án jína tí ch'ín ch'ehe ch'án xra.

⁴ Ntá kjuíi sín kóchjinehe sín tí ch'ín Jesús kjuankíxin chrónóehe sín ch'án ntáchro sín kixin: —Imá jína tí ch'ín capitán la mé tjinkaon ch'án chrókjuínkítsa ch'án

⁵ kixin tjuèhe ch'án tí nació kuénteni la ko jehe ch'án kjuínkítsa ch'án la ko k'uetóan kixin ts'óna ijnko nínko kuénteni —ichro sín.

⁶ Ntá ch'ín Jesús sákjuiko sín ch'án. Ntá ó kjuíjichjina sín chjino tí nchia la mé tí ch'ín capitán k'uetuénhen ch'án iso chojni chóxin ch'án tsontáche sín tí ch'ín Jesús kixin:

—Tadá. Tjinkakonhya ch'án chrótjáha ch'án xra kixin jehe ch'án la jehya chojni jína la ko chrókósuèhe kixin chrók'uíxenhén ntóe ch'án.

⁷ Mé xíkaha chrókósuèhe ch'án chrókjuíi ch'án chrókjuéyá ch'án tí jaha. Méxra tí kjuachaxín chrónixjá ó chrókuitóexín jína tí ch'ín ch'ehe ch'án xra.

⁸ Kixin jehe ch'án kjaxín t'ituenhen ch'án la ko kjaxín chóntha ch'án soldado t'etuenhen ch'án inaá. Tió t'etuenhen ch'án ijnko sín kixin sátsji la mé sátsji la ko tió t'etuenhen ch'án í jnko sín kixin xrákoa la mé xrákoa la ko tió t'etuenhen ch'án í jnko sín kixin sich'e ijnko xra la mé nchexitéyá ch'án —mé xíkaha ichro tí sín kuí.

⁹ Ntá ó kuínhin ch'ín Jesús xíkaha ntá chrakon ch'án kixin xíkaha tjenkayáxin tí ch'ín a, a ntá nkátjá ch'án komá ch'án tí chojni chréhe ntáchro ch'án kixin:

—Ntáxrjan kixin naxá k'uítjáha nijnko nkexro israelita xíkaha tinkáchónki éxi tí ch'ín í —ichro ch'án.

¹⁰ A ntá ó kjan nchia tí sín tsík'ítuénhen la ó k'uíkon sín kixin ó tsíkitohe jína tí ch'ín níhi.

Ch'ín Jesús kjuínchexechón tí xjeen ijnko tjan k'án chjasin Naín

¹¹ Ntá chr'éxin ntá sákjuí ch'ín Jesús ijnko chjasin it'in Naín la ko sákjuíko ch'án tí sín k'uájiko ch'án la ko nchónhya í so chojni.

¹² Tió kjuíjichjina sín tí chjasin a la k'uíkon sín nchónhya chojni sákjuíkjava sín ijnko chojni tsík'en na mé tí jnkokóá xjeen ijnko tjan k'án. Itsje chojni chjasin ntiha sákjuíkotoxin sín tjan.

¹³ Ntá tió k'uíkon Inchéni tí tjan a ntá kuíkonóehe ch'án tjan ntáchro ch'án kixin:

—Tsjankahya —ichro ch'án.

¹⁴ Ntá ch'ín Jesús kóchjinehe ch'án tí sín tinkátsénki tí nkexro tsík'en la kjuak'etja tja ch'án tí nkehe tinkátsénkia sín tí ch'ín tsík'en. A ntá tí sín kuámá nta k'uejóchónhen sín. Ntá ch'ín Jesús nixjehe ch'án tí ch'ín tsík'en ntáchro ch'án kixin:

—Ntásoá. Tétuanhan t'áya —ichro ch'án.

¹⁵ Ntá tí ch'ín tsík'en tuénxín kjuak'etjaxín ch'án la ko kjuankíxin nixja ch'án. Ntá ch'ín Jesús kjuínchek'áyéhe ch'án iné tí ch'ín ntasoá la sákjuíko.

¹⁶ A ntá tió k'uíkon sín xíkaha kónhen la kaín sín imá chrakon sín la ko kjuankíxin kjuanchehe sín Dios kjuasáya ntáchro sín kixin:

—Dios mé ichr'án ijnko chojni imá t'etóan chrónka itén Dios ts'ejókoni —ichro sín.

Kjaxín ntáchro sín kixin:

—Ó kui Dios tsjinkítsa ch'án chjasén ch'án —ichro sín.

¹⁷ A ntá nkuíxín estado Judea la ko kaín tí chjasin chjinaxón mé kuínhin sín kixin nkehe tí kjuaxroan kjuíche ch'ín Jesús.

Tí sín ichr'án ch'ín Juan Bautista
(Mt. 11.2-19)

¹⁸ A ntá tí sín k'uájiko ch'ín Juan mé chénka sín ch'án kaín tí nkehe tsíkónhen. Ntá k'uíyèhe ch'án iyó tí sín k'uájiko ch'án

¹⁹ k'uetuénhen ch'án sín sátsjtsjehe sín tí ch'ín Jesús tsjikjanchankíhi sín ch'án kixin á jehe ch'án tí nkexro tsi ó a tsochónhen sín í jnko nkexro, tsixro sín.

²⁰ A ntá tí sín ichr'án ch'ín Juan mé kóchjina sín tí tjen ch'ín Jesús ntáchro sín kixin:

—Ch'ín Juan Bautista k'uetóan ch'án kuini tsikjanchankíhani kixin á jaha tí nkexro tsi ní ó a tsochónhenni í jnko nkexro —ichro sín.

²¹ A ntá tí yaon kjuíji sín na mé ch'ín Jesús kjuínchekitóhe ch'án itsjé chojni jína la mé kjuatsen ch'án kaín tí chin chóna sín la ko kuakitsje ch'án tí nchakuen jínahya chóna sín la ko kjuínchek'ikon ch'án itsjé chojni t'íkonhya.

²² A ntá kjuátehe ch'ín Jesús ntáchro ch'án kixin:

—Sátjirá tjíchenkará tí ch'ín Juan kaín nkehe k'uíkonrá la ko kaín nkehe kuínhínrá kixin tí sín k'uíkonhya la ó t'íkon sín jie, la ko tí sín k'uékjihya la ó tji sín jie, la ko tí sín k'uéchóna chinlepra la ó kuitóhe sín jína, la ko tí sín kíenhya la ntá jie la ó tinhin sín, la ko tí chojni tsík'en la ó síxechón sín jie, la ko tí sín nòa síxraokóhe sín tí tan jína tsaáxin sín.

²³ Ntá náxrjón tjen tí nkexro kohya nkehe t'ínkákonhen tí tinkáchónki sín tí janhan —mé ichro ch'án.

²⁴ Tió sátsíki tí sín ichr'án ch'ín Juan ntá kjuankixin níxjehe ch'ín Jesús tí sín k'uéjío ntiha kixin nkexrí tjen ch'ín Juan ntáchro ch'án kixin:

—Tió sákjuitsjehérá ch'ín Juan nteje, ¿nkexrí k'uíkonrá tí jehe ch'án? ¿Á k'uíkonrá ch'án éxi ijnko tji nchexrayehe xrjntó?

²⁵ Tí náhi, ¿la ntá nkehe k'uíkonrá? ¿Á k'uíkonrá ch'án éxi ijnko nkexro tsík'itsa jína? Jahará ó nohará kixin chojni tsík'itsa jína la ko chóna kaín nkehe náxrjón la mé ntóje rey tjejó sín.

²⁶ ¿A ntá nkexrí k'uíkonrá ch'án? ¿Á k'uíkonrá ch'án éxi ijnko nkexro chrónka itén Dios? Na mé xrjanka kixin chaxín xíkaha jehe ch'án na mé ántsi t'etóan ch'án la ntá tí sín k'uéchónka itén Dios ósé la kánhyó.

²⁷ Ch'ín Juan mé tí nkexro kui éxi chrónka tí xroon itén Dios ósé ntáchro kixin:

Janhan mé tsochr'an ijnko nkexro tsochrónka itan kuèntana tsitónxin ntja,

kixin tsjasíyóxin ch'án ntja kuèntá.*

Mé xíkaha chrónka tí xroon itén Dios.

²⁸ Ntá ijnko nkehe chaxín tsotjónkará kixin kaín tí nkexro k'uéjío senó k'uéchónka itén Dios la kánhyó tjeotan sín la ántsi tjeotan tí ch'ín Juan Bautista. Kjánchó ijnko nkexro kjónté tjetuanhya la tí ts'áyéhe sín tí kjuachaxién Dios nkaya nkajní la ántsi tjeotan sín a ntá jehe ch'ín Juan la kánhyó —ichro ch'ín Jesús.

²⁹ A ntá tió kuínhin sín tíhi la ntá kaín tí chojni la ko tí sín nchekjènkí tsíkíkíte ch'ín Juan la ó kjuátsoan sín kixin Dios la jína ch'án.

³⁰ Kjánchó tí sín fariseo la ko tí maestro tjako tí ley tsíkíkítehya ch'ín Juan la mé tjinkakonhya sín tí nkehe tjinkaon Dios chrókuinjtsa tí jehe sín.

³¹ Ntá ntáchro Ínchéni kixin:

—¿Nkexrí chrókuíntayóaxian tí chojni tjejó jie? ¿Nkehe chrókóyóhe sín?

³² Tóyóhe sín tí chánjan tjejótjaxín sín tí ntasin tsítan sín la t'íyehé kíchó sín ntáchro sín kixin: “Kjuínchentáchroni flauta la tēhyará la ko tsjeni isón kuènte chojni tsík'en la tsjankahyará.”

³³ Kixin ó kui ch'ín Juan Bautista la kjónehya ch'án niótjja la ko k'uíhya ch'án vino la ntá jahará ntáchorá kixin ijnko nchakuen tí jínahya chóna ch'án.

³⁴ A ntá kjaxín ikuí tí Xjeen Dios K'óna Chojni la kjóne ch'án la ko ik'ui ch'án la ntáchorá kixin imá kjóne ch'án la ko imá ik'ui ch'án vino la ko t'ito ch'án tí sín tjasin jie la ko tí sín nchekjènkí.

³⁵ A ntá tí xjeen Dios mé tjakoxín sín kaín tí nkehe tjinkaon Dios.

Ch'ín Jesús mé kjuák'e ch'án ntóje ijnko ch'ín fariseo it'in Simón

³⁶ Ijnko ch'ín fariseo mé chronóheh ch'án tí ch'ín Jesús kixin tsjiji ch'án ntóje ch'án sineko sín ch'án. Ntá sákjui ch'án ntóje tí ch'ín a, a ntá ntiha kjuák'etjaxín ch'án tí tjen mesa.

³⁷ A ntá itjen ijnko tjan nchónhya jie chóna tjan. Itjen tjan tí chjasin ntiha la ntá kónohe tjan kixin tsíkijji ch'ín Jesús ntóje tí ch'ín fariseo la ko ntaha sineko sín ch'án. Ntá kui tjan ntiha kúikao tjan ijnko xro tje te tsikaón aceite xraxé náxrjón.

³⁸ Ntá tsjanka tjan kóchjina tjan toté ch'ín Jesús ntá ntákon tjan kjuátanxín toté ch'án la ko kaxihí tjan kjuínchexámáxin tjan toté ch'án la ko kjóneko kochito toté ch'án la ko kjuíncheka tjan toté ch'án tí aceite xraxé náxrjón.

³⁹ A ntá tió k'uíkon tí ch'ín fariseo tsík'íyehé tí ch'ín Jesús ntá kjo ch'án asén ch'án kixin: “Tí chrókóchaxín tí nkexro í ijnko ch'ín chrónka itén Dios ntá chrókónohe ch'án kixin nkexrí xéhe tí tjan tjetákóxin ch'án kixin ijnko tjan jínahya tíha”, ichro ch'án.

⁴⁰ Ntá ch'ín Jesús ntáche ch'án tí ch'ín fariseo kixin:

—Simón, janhan chonta ijnko nkehe tsonixjaha —ichro ch'án.

Ntá kjuátehe tí ch'ín fariseo ntáchro ch'án kixin:

—Chronka, Maestro —ichro ch'án.

⁴¹ Ntá ntáchro ch'ín Jesús kixin:

* 7:27 Malaquíás 3.1

—K'uejó yaá chojni ntoa síkéhe sín chichaon ijnko ch'ín nchekjen chojni chichaon. Ijnko la síká ch'án quinientos denario. A ntá tí í jnko a la síká ch'án cincuenta denario.

⁴² A ntá kjuachahya sín k'ókjenhen sín tí chichaon tí ch'ín síkéhe sín ntá kuikonóehe ch'án sín ntá k'óxika ch'án tí cuenta síká yóí sín. A ntá jie chrónka jaha kixin nkexro tí yóí sín antsí chrótjuéhe tí nkexro kuikonóehe ch'án —ichro ch'ín Jesús.

⁴³ Ntá kjuátehe tí ch'ín Simón ntáchro ch'án kixin:

—Janhan ntáxrjan tí nkexro kuikonóehe má —ichro ch'án.

Ntá ntáchro ch'ín Jesús kixin:

—Ntoá tjenkayáxian —ichro ch'án.

⁴⁴ Ntá ch'ín Jesús komá ch'án tí tjan a ntá ntáche ch'án tí ch'ín Simón kixin:

—¿Á t'ikuan tí tjan a ní? Janhan na mé k'uixanhan ntqa la ntá jaha la kjuánjonhya ntá chrók'ontia totená. Kjánchó jehe tjan ti ntakon tjan kjuínchek'óntixín tjan totená la ko kaxíhi tjan kjuínchexámáxin tjan.

⁴⁵ A ntá jaha la kjóntekoahyana kochíto. Kjánchó jehe tjan naxá kuítqehya tjan neko kochíto totená.

⁴⁶ Jaha la kuikítexinhya aceite kja. A ntá jehe tjan kuikíte tjan aceite xraxé náxrjón totená.

⁴⁷ Mé xíkaha ntáxrjan kixin imá tjuana tjan kixin kaín tí nchónhya jie kjuasin tjan la mé kjuínhin tjan. A ntá ijnko nkexro kjuínhin íntsikoa jie la mé xíkaha íntsikoa tjakoxín kixin tjuana sín —ichro ch'án.

⁴⁸ Ntá nixjehe ch'án tí tjan a ntáchro ch'án kixin:

—Ó kjuínhan tí jie chonta —ichro ch'án.

⁴⁹ A ntá kaín tí sín tsikóchjina sín k'uejótjaxín sín tí tjan ch'án mé kjuankixin kjo sín kichó sín ntáchro sín kixin:

—¿Xá nkexro tíhi kixin tjakjuínhin ch'án íjie chojni?

⁵⁰ A ntá ch'ín Jesús ntáche ch'án tí tjan a kixin:

—Ó kuaá jaha kixin kuítekáván tí janhan. A ntá jie kjuaxróxin sátsjia ntqa —ichro ch'án.

8

Iso chojni chjin kjuínkítsa tí xrq kjuich'e ch'ín Jesús

¹ A ntá chr'éxin ntá ch'ín Jesús k'uáji ch'án itsjé chjasin hyé la ko chjasin ntsíntsi kjuako ch'án la ko chrónka ch'án tí tan jina kixin nkexrí tí kjuachaxin t'etqan Dios. A ntá tí teyó sín mé k'uájiko ch'án.

² Kjaxín chréhe iso chojni chjin tsikjinchekitqhe ch'án jina tsikakitsje ch'án tí nchakuen tí jínahya k'uéchonta sín la ko tsikjatsen ch'án tí chin k'uéchonta sín. Ijnko tjan mé it'ín María la ko kjaxín tikítexín tjan Magdalena na mé tsik'axrje yato nchakuen tí jínahya k'uéchonta tjan,

³ la ko í jnko tjan it'ín tjan Juana ne mé xi mé it'ín ch'án Chuza. Jehe ch'án mé ch'ehe ch'án xrq tí ch'ín Herodes t'etqan ch'án, la ko í jnko tjan mé it'ín tjan Susana, la ko itsjé í so sín k'uejó sín. A ntá kaín sín kjuanjón sín tí nkehe k'uéchonta sín kjuínkítsa sín tí ch'ín Jesús la ko tí sín k'uájiko ch'án.

Ch'ín Jesús kjuíncheyóexín ch'án éxi ijnko ch'ín k'uénkq nonte

(Mt. 13.1-9; Mr. 4.1-9)

⁴ Ntá nchónhya chojni kójnkotsé sín kjuítsjehe sín tí ch'ín Jesús, k'uaxrjexín sín kaín tí chjasin ntiha. A ntá ch'ín Jesús kjuíncheyóexín ch'án ntáchro ch'án kixin:

⁵ —Éxi ijnko ch'ín sákjuik'enká noatrigo nontqhe ch'án. Mé xíkaha sákjuí ch'án ik'ue ch'án tí noatrigo a. Ntá iso noa la k'uanótjen chrínta ntja ntá nkaxénjin chojni tí noa a la ko kjaxín tí koxroxé k'uínka va.

⁶ A ntá í so la k'uitji chrik'á xrq ntá k'uayan la xámá kixin kánhyó síin tjo.

⁷ A ntá í so la kjuítsínkák'á kach'í ntá k'uánkí kach'í la ntá í xitjahya k'uánkí tí no a kixin tsíkate tí kach'í.

⁸ A ntá í so la mé tsik'itjí nche jina. A ntá tíó k'uánkí la k'óna jina la mé jnkojnko noatje k'óna ciento neno noa —mé xíkaha ichro ch'án.

Na ntá kjuixin kjuako ch'ín Jesús kaín tíha ntá itsen ntáchro ch'án kixin:

—Tí tjínkáonrá chrókuinhínrá la tinhínrá —ichro ch'án.

Ch'ín Jesús chronkaxín nkekuènte kjuíncheyóexín ch'án

(Mt. 13.10-17; Mr. 4.10-12)

⁹ Ntá tí sín k'uájiko ch'án kjuanchankíhi sín ch'án kixin nkexrí t'axrjexín tí nkehe kjuíncheyóexín ch'án.

¹⁰ Ntá ntáchro ch'án kixin:

—Dios mé tsjinkĩtsa kixin tsonohará tí nkehe noehya í so chojni nkexrí t'etgoan Dios. Kjánchó tí í so sín tjákoħa sín kjuĩntayóaxoán kixin ntá k'uikon sín la kjónté tsjatsgoanhya sín la ko kuĩnhin sín na kjónté naħa tienxínhya sín.

Ch'ín Jesús chronkaxín nkexrí t'axrxjén tí ch'ín k'uenkq nonte
(Mt. 13.18-23; Mr. 4.13-20)

¹¹ Ntá tsoxrjanka nkexrí t'axrxjén tí nkehe kjuĩntayóaxoán. Tí noatje mé tí itén Dios.

¹² A ntá tí noa k'uanójtjen chrĩnta ntja la mé tóyóħe tí sín kuĩnhin tí tan a. A ntá ó kuĩ ch'ín Tsochren ntá kjuĩnchek'itjáyán ch'án kaĩn tí itén Dios kuĩnhin sín chrókuaáxin sín kixin ntá chrókuitekakonhya sín tí nkehe chrókuaáxin sín.

¹³ A ntá tí noa kjuĩtsĩnkak'á xro la éxí yóħe tí chojni kuĩnhin itén Dios la tjoka kóxrjĩnhin sín kuĩnkáchonki sín. Na ntá itsi tí kjuaxróxinhya, a ntá tsitóħe sín tí itén Dios kuĩnhin sín kixin naħa nĩnkahya chóna nuėe.

¹⁴ A ntá tí noa kjuĩtsĩnkak'á kach'ĩ na mé éxí yóħe ijnko chojni kuĩnhin tí tan jına kjánchó tjitoxĩenhya ntje sín kixin tóxakonhen sín tí xra chóna sín la ko tjĩnkaon sín tsochóna sín itsjé nkehe la ko kaĩn tí nkehe tóxrjĩnhin sín mé t'ĩnkákonħen kixin xĩkaha la xitjahya sich'ehe sín xra Dios.

¹⁵ A ntá tí noa k'uinka nonte jına na mé éxí yóħe tí chojni kuĩnhin tí itén Dios a ntá kaĩn asén sín kuĩtekaon sín la ntá kuĩtoħehya sín tí tan, a ntá xĩkaha la jına ch'ehe sín Dios xra.

Ch'ín Jesús mé kjuĩncheyóexin éxí ijnko xrohi tjeche
(Mr. 4.21-25)

¹⁶ Nijnko nkexro chrókjuĩnchek'ákjen xrohi chrókjuak'emə nkaxenhen chĩ o chrókjuak'emə chrĩnki cama. Náhí. Noi chrókjuak'e xrohi kixin ntá tí sín ts'ixenhen nchia ts'ikonxin sín tí t'ĩnkaséyan.

¹⁷ Kohya nkehe chrók'uejómá a ntá chr'éxin chrókónoxĩnhya; la ko kohya nkehe mó chrókónoehyani chr'éxin kixin kaĩn nkehe la tsonoxĩn tí xrohi a.

¹⁸ A ntá chrókuĩnhĩná jına kixin tí tjen ijnko nkexro chóna nkehe la mé ts'áyéħe ch'án má. A ntá tí nkexro chónahya nkehe la mé ts'axrjehe ch'án kjónté tí nkehe ntsi tónhen ch'án kixin chóna ch'án.

Tí iné la ko tí kichó ch'ín Jesús
(Mt. 12.46-50; Mr. 3.31-35)

¹⁹ A ntá kjuĩji iné la ko kichó ch'ín Jesús tí tjen ch'án. Ntá xitjahya tsochjinehe sín ch'án kixin nõchónhya chojni siĩn.

²⁰ A ntá ijnko sín ntĩha tsĩkjichenka ch'ín Jesús kixin:

—Iná la ko kichuá tjejó sín ntója la tjĩnkaon sín chrók'uikon sín tí jaha —ichro sín.

²¹ Kjánchó kjuátəħe ch'án ntáchro ch'án kixin:

—Tí sín tinhin itén Dios la ko titekaon sín na mé t'ĩkuən tí jehe sín éxí naná la ko kichíná —ichro ch'án.

Ch'ín Jesús k'uetuenhen tí xrxĩto la ko tí ntq kixin ts'ixita
(Mt. 8.23-27; Mr. 4.35-41)

²² Ntá ijnko yaon k'uixenhen ch'ín Jesús ijnko ntabárcq la koĩ tí sín k'uájiko ch'án. Ntá ntáchro ch'án kixin:

—Sátsjini tóħe ntayaon —ichro ch'án.

Ntá sákjuĩ sín.

²³ Ntá nachrohe tjejó'tatóye sín a ntá ch'ín Jesús mé kjuak'ejua ch'án. A ntá xrinahya tjian chjéhe xrxĩnto chrĩtaón ntq ntá xrankixin sítikia ntq tí ntabárcq ntá chrakon sín kixin ts'aniankĩ ntq tí ntabárcq.

²⁴ Ntá kjuĩnchekjayeħe sín tí ch'ín Jesús, ntáchro sín kixin:

—Maestro, Maestro. Tjejó'taniankĩn ntq —ichro sín.

Ntá ch'ín Jesús k'uaya ch'án ntá k'uetuenhen ch'án tí xrxĩto la ko tí ntq kixin ts'ixita, a ntá náxrxjón k'uixita tí ntq la ko tí xrxĩto.

²⁵ Ntá ntáche ch'án tí sín k'uájiko ch'án kixin:

—¿Á naħa tinkachónkihyará Dios? —ichro ch'án.

Kjánchó jehe sín mé chrakon sín itjo sín kichó sín kixin:

—¿Xá nkexro tĩhi kixin t'etuenhen ch'án xrxĩto la ko tí ntq la titekakonhen ch'án?

Ijnko ch'ín nonte Gadara chóna nchakuen tí jĩnahya
(Mt. 8.28-34; Mr. 5.1-20)

²⁶ Ntá kjuĩji sín tí nonte Gadara, na mé tóħe ntayaon ntoĩ chók'ėxin estado Galilea.

²⁷ Ntá k'uínkajinxin ch'ín Jesús tí ntabáro ntá kóchjina ijnko ch'ín chjasin ntiha. Ntá ó má sé chóna ch'án nchakuen tí jínahya. Na ntá ní ké ch'án t'ínkáyahya ch'án, la ko jehya ntóe ch'án k'uékjak'e ch'án na mé tjen ch'án tí panteón.

²⁸ Tió k'uíkon ch'án tí ch'ín Jesús ntá kjuák'exín toch'in ch'án nkayakon tí ch'ín Jesús, ntá k'óyako ch'án ntáchro ch'án kixin:

—¿Nkekuènte tjiaté tí jeheni, jaha Jesús Xjeen Dios itjen nkaya nkajní? Chronóahani nchekjasótehyani —ichro ch'án.

²⁹ Xikaha ntáchro ch'án kixin ch'ín Jesús tsík'etuènnen tí nchakuen tí jínahya kixin ts'axrjéxín tí jehe ch'án. Nchónhya veces tí nchakuen tí jínahya k'uék'etuènnen tí jehe ch'án; a ntá tí chojni k'uétsé sín ch'án k'uékjinchenteto sín tja ch'án la ko toté ch'án la mé cadena tsikóntetoxín ch'án kixin tjinkaon sín chrókjuak'e ch'án. Kjánchó k'uékóchrínjin ch'án tí nkehe tsikóntetoxín ch'án kixin nchakuen tí jínahya tjinkaon sáchrókjuiko ch'án nteje.

³⁰ Ntá ch'ín Jesús kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátéhe ch'án ntáchro ch'án kixin:

—Legión mé it'inni —ichro ch'án.

Ntáchro ch'án xikaha kixin nchónhya nchakuen tí jínahya chóna ch'án.

³¹ A ntá kaín tí nchakuen tí jínahya chronóhe tí ch'ín Jesús kixin chrók'uetóanhya ch'án kixin chrókjuitsínkayá tí tóye nínka.

³² A ntá ntiha tí jná síin nchónhya cochíno xrine va. A ntá tí nchakuen tí jínahya chronóhe tí ch'ín Jesús kixin chrókjuanjón ch'án kjuachaxin chrók'uixenhen tí cochíno a. A ntá kjuanjón ch'án kjuachaxin.

³³ A ntá tí nchakuen tí jínahya k'uaxrjéxín tí ch'ín a, a ntá k'uixenhen tí cochíno a. A ntá kaín tí cochíno kuinká va sákjuí va nó nkaya tsáka k'uánótjenki va ntá kjuínhin va ntá.

³⁴ A ntá tí sín sit'ayakonhen tí cochíno k'uíkon sín kixin xikaha kónhen ntá chrakon sín kuinká sín sákjuíchronka sín tí chjasén sín la ko tí rancho.

³⁵ A ntá tí chojni k'uaxrjéxín sín chjasin sákjuitsjehe sín nkehe tí tsikónhen. A ntá kjuíji sín ntiha tí tjen ch'ín Jesús ntá k'uíkon sín kixin ntaha tjen tí ch'ín tsík'axrjéxín tí nchakuen tí jínahya. Ntaha tjetjaxín ch'án chrínki toté tí ch'ín Jesús, ó tsík'ínkáya ch'án iké ch'án kixin ó jina tjen ch'án, a ntá chrakon sín tí k'uíkon sín xikaha.

³⁶ A ntá tí jehe sín tsík'íkon sín kixin xikaha kónhen la chrónka sín kixin nkexrí kuítóhe jina tí ch'ín k'uéchóna tí nchakuen tí jínahya.

³⁷ A ntá kaín tí chojni chjasin Gadara kjuankíxín chronóhe sín tí ch'ín Jesús kixin sáchrókjuixin ch'án ntiha kixin imá chrakon sín. A ntá tí ch'ín Jesús k'uít'ótjen ch'án tí ntabáro sákjuixin ch'án ntiha.

³⁸ A ntá tí ch'ín tsík'axrjéxín tí nchakuen tí jínahya chronóhe ch'án tí ch'ín Jesús kixin á chrókjuanjónhya ch'án kjuachaxin sáchrókjuí ch'án koí ch'án. Kjánchó ch'ín Jesús k'uetuènnen ch'án kixin tsitóhe ch'án ntáchro ch'án kixin:

³⁹ —Titoha satjia ntóa la ko chrónka nkexrí tí kjuachaxin jié kuènte Dios kuítóaxián jina jaha —ichro ch'án.

A ntá sákjuí tí ch'ín a chrónka ch'án nkuíxín tí chjasén ch'án kixin ijnko kjuaxroan jié kjuích'e ch'ín Jesús kjuínchekitóhe ch'án jina.

Tí xjeen ch'ín Jairo la ko tí tjan kuákóxin iké ch'ín Jesús

(Mt. 9.18-26; Mr. 5.21-43)

⁴⁰ Tió ch'ín Jesús kjan ch'án tí ijnko chrínta ntá ntá nchónhya chojni síin ntiha la chéhe sín kjuíji ch'án ntiha, kixin kaín sín tjejóchónhen sín ch'án.

⁴¹ Ntá kuí ijnko ch'ín it'ín Jairo na mé ijnko ch'ín t'etóan kuènte nínko. A ntá kjuák'exín toch'in ch'án toté tí ch'ín Jesús chronóhe ch'án kixin sáchrókjuí ch'ín Jesús ntóe ch'án

⁴² Kixin chóna ch'án jnkokóaxón xjeen ch'án chjin chóna teyó nánó la ó mero tjet'en tjan. A ntá sákjuí ch'ín Jesús la ntá nchónhya chojni chréhe k'uixitja kichó sín.

⁴³ Ntá síin sín ntiha. Na mé ntiha tjenákjan ijnko chojni chjin níhi tjan sítji tjan jní na mé chóna tjan teyó nánó titóehya tjan jina. A ntá kaín nkehe k'uéchóna tjan kjuenkehe tjan tí sín ch'e xroan la ko níjnko sín kjuachahya sín kjuínchekitóhe sín tjan jina.

⁴⁴ A ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxín tí jní la í kjuíhya tjan.

⁴⁵ Ntá kjuanchankí ch'ín Jesús kixin:

—¿Nkexro tí kuákóxinna? —ichro ch'án.

A ntá kaín sín ntáchro sín kixin nínkexró, ichro sín. A ntá ch'ín Pedro la ko tí sín k'uéjóko ch'án ntáchro sín kixin:

—Maestro, nchónhya chojni síin la ko tótéka sín la ntáhi ntáha, ¿ntá nkekuènte kixin náxa tjanchankiá kixin nkexro tí kuákóxin? —ichro sín.

⁴⁶ Kjánchó ntáchro ch'ín Jesús kíxin:

—Jnkójín nkexro kuákóxinna kíxin kónona kíxin kjuachaxin kuèntaná kuitqexín ijnko chojni jína —ichro ch'án.

⁴⁷ A ntá tió k'uikon tjan kíxin ó kónoxín ntá kóchjina tjan chrakon tjan kjuák'exín tjan toch'ín tjan chrínki toté ti ch'ín Jesús. Ntá chrónka tjan nkayakon kaín xín chojni kíxin nkekuènte kuákóxin tjan iké ch'án la ko nkexrí kuitqexín tjan jína xíkaha.

⁴⁸ Ntá ntáchro ch'án kíxin:

—Jaha, xjeenni, ó kuitqoha jína kíxin kuitékávan tí janhan. Kjuaxróxin sáttja —ichro ch'án.

⁴⁹ Naxa tjejtójo sín ntiha ntá xrinahya ikui ijnko nkexro kjuixín ntqé tí ch'ín t'etqoan kuènte njnko, a ntá chénka ch'án tí ch'ín t'etqoan kíxin:

—Xjaan na mé ó kjuixín k'uén. Axri í chjeéhya xra tí maestro —ichro ch'án.

⁵⁰ A ntá tió kuínhin ch'ín Jesús la kjuátqhe ch'án ntáchro ch'án kíxin:

—Chrakonhya. Titekávan tí janhan la tsitqhe xjaan jína —ichro ch'án. A ntá sákjuí sín.

⁵¹ A ntá tí kjuj'ik'ixenhen sín nchia ntá kuitqehya ch'ín Jesús kíxin ókjé nkexro chrók'uixenko ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí iné tí xjachjín chrók'uixenhen sín tí tjen tí xjan a.

⁵² Kaín tí sín tjejó ntaha tsjánkamá sín tí xjan a. Kjánchó jehe ch'án ntáchro ch'án kíxin:

—Tsjankahyará. Tí xjan la tsik'enhya la tjejuá xjan —ichro ch'án.

⁵³ Ntá tjanoá sín ch'án kíxin jehe sín la ó nohe sín kíxin tsik'en xjan.

⁵⁴ A ntá jehe ch'án itsé ch'án tja xjan ntá itsen k'uíyqhe ch'án tí xjan ntáchro ch'án kíxin:

—Tjarisoá, t'áya —ichro ch'án.

⁵⁵ Ntá kjan asén tjan ntá tuénxín k'uínkatjen tjan. Ntá k'uètqoan ch'ín Jesús kíxin tsjanjon sín nkehe sine tjan.

⁵⁶ Ntá it'é la ko iné xjan la chrakon sín. A ntá ch'ín Jesús k'uètuqenhen ch'án sín kíxin ninkexró chróchenkahya sín kíxin xíkaha kónhen.

9

Ch'ín Jesús ichr'án ch'án tí teyó sín

(Mt. 10.5-15; Mr. 6.7-13)

¹ Ntá ch'ín Jesús k'uètoan kíxin tsqchjina tí teyó sín k'uájiko ch'án. Ntá chjehe ch'án sín kjuachaxin tsakitsje sín kaín tí nchakuen tí jínahya chónka chojni la ko sinchekitqhe sín chojni jína.

² Ntá k'uètoan ch'án kíxin sátsjikjako sín nkexrí tí kjuachaxin t'etqoan Dios la ko sinchekitqhe sín chojni jína.

³ La ko k'uètoan ch'án kíxin:

—Ninkehó nkehe sátsjikohyará ntja sátsjirá, ni tí nta tjíxinrá la náhí, ni bolsa la náhí, ni niqtja, ni chichaon, la ko tsjikoará jehó tí ka tjejóyará ó.

⁴ A ntá tí tsjasánrá ijnko nchia tsjanjon sín kjuachaxin la ntahó tsitqhará la tsjixixín tí xra ntá sátsjixínrá ntiha.

⁵ A ntá tí tsjasánrá ijnko chjasin la ntá tsjanjonhya sín kjuachaxin tsjakorá ntá t'axrxéxinrá tí chjasén sín ntiha tsotsénkará tí nche chónka totará tsjáqoxínrá xíkaha kíxin Dios sinchekjasóte tí jehe sín —ichro ch'án.

⁶ Ntá sákjuí sín kaín tí chjasin ntsínsí sákjuíchronka sín tí tan jína tsaáxin chojni la ko kjuínchekitqhe sín chojni jína kaín chjasin.

Ik'uén ch'ín Juan Bautista

(Mt. 14.1-12; Mr. 6.14-29)

⁷ A ntá tí ch'ín Herodes t'etqoan kuínhin ch'án kaín tí xra tjech'e ch'ín Jesús la tóxakonhen ch'án kíxin iso sín ntáchro sín kíxin ch'ín Juan Bautista la ó tsíxechón ch'án, ichro sín.

⁸ A ntá iso sín ntáchro sín kíxin ch'ín Elias tsíxechón ch'án mé tí nkexro k'uéchronka itén Dios ósé. A ntá í so sín la ntáchro sín kíxin jnkójín tí sín k'uéchronka itén Dios ósé la mé ó tsíxechón, ichro sín.

⁹ Kjánchó ntáchro ch'ín Herodes kíxin:

—Janhan mé kuètoan kóchrínjin sín kja ch'ín Juan. ¿Á chrókóchaxín jehe ch'án kíxin nchónhya kjuaxroan kuínhan tí tjech'e ch'án? —ichro ch'án. A ntá kjaxin jehe ch'án tóxakonhen ch'án sáchrókjuitsjehe ch'án tí ch'ín Jesús.

Ch'ín Jesús kjuanjon nkehe kjóne in'ó mil chojni

(Mt. 14.13-21; Mr. 6.30-44; Jn. 6.1-14)

¹⁰ A ntá tió kjan tí sín k'uájiko ch'ín Jesús ntá chénka sín tí jehe ch'án kaín tí xra kjuich'e sín. Ntá k'uaxrjéntako sín ch'án tí kohya ninkexró chjinaxón chjasin Betsaida.

¹¹ Ntá tió k'uúxikónohe chojni kixin ntaha tjen ch'in Jesús ntá sákjuíchréhe sín ch'án. A ntá kjuanjon ch'án kjuachaxin ts'ejó sín. Ntá kjuankixin chrónka ch'án nkexri tjen tí kjuachaxin t'etöan Dios la ko kjuínchekitöhe ch'án chojni jína.

¹² A ntá ó ntá kóntó ntá tí teyó sín k'uájiko ch'in Jesús kóchjinehe sín ch'án ntáchro sín kixin: —Nixjehé tí chojni kixin sátsji sín tí chjasin ntsí la ko tí ichrén nchia chjinaxón sátsjik'ok'éhe sín la ko sátsjikjeyá sín nkehe sine sín kixin jaha la ó noha kixin nteje tjejóni la kohya nkehe tsochjéheni sín —ichro sín.

¹³ Kjánchó ch'in Jesús ntáche ch'án sín kixin:
—Chjehérá sín nkehe sine sín —ichro ch'án.

Ntá kjuátehe sín ntáchro sín kixin:
—Chóntahyani itsjé nkehe; jehó in'ó niotja la ko yaá koche chóntani. ¿Á tjinkávan sátsjik'enani nkehe sine kaín tí chojni siín? —ichro sín.

¹⁴ Kixin siín chjina in'ó mil chojni ntoa. A ntá ch'in Jesús ntáche ch'án tí sín xriko ch'án kixin:

—Ntácherá sín tsojnkójié sín ts'ixitjaxin sín jnkojnko cincuenta sín —ichro ch'án.

¹⁵ A ntá xikaha kjuíche sín k'uetoan sín, a ntá k'uúxitjaxin sín kaín sín.

¹⁶ A ntá ch'in Jesús kuákja ch'án tí n'ó niotja la ko tí yaá koche. Ntá konta ch'án nkajni kjuanchehe ch'án kjuasáyé Dios kixin kjuanjon tí nkehe sine sín. Ntá kóchrít'ö ch'án tí niotja la ko tí koche la chjéhe ch'án tí sín xriko ch'án. A ntá jehe sín k'óxiqayéhe sín chjéhe sín kaín tí chojni siín.

¹⁷ A ntá kaín sín kjóne sín la kókjehe sín. A ntá chr'éxin kjuenájín sín kaín tí nkehe síxehé mé teyó ntaxra kjuínchekaón sín.

Ch'in Pedro mé chrónka kixin ch'in Jesús mé tí Cristo
(Mt. 16.13-19; Mr. 8.27-29)

¹⁸ Ntá ijnko yaon ch'in Jesús k'uaxrjenta ch'án tjenixjehé ch'án Dios. Ntá tjejóko ch'án tí sín xriko ch'án ntá kjuanchankíhi ch'án tí jehe sín kixin:

—¿Nkehe ichro tí chojni kixin nkexro tí janhan? —ichro ch'án.

¹⁹ A ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. A ntá í so sín ntáchro sín kixin jaha la tí ch'in Elías. A ntá í so sín ntáchro sín kixin jaha ijnko nkexro k'uéchrónka itén Dios ósé mé ó tsíxechón —ichro sín.

²⁰ A ntá kjuanchankíhi ch'in Jesús tí jehe sín kixin:

—A ntá jahará, ¿nkechorá, nkexro tí janhan? —ichro ch'án.

Ntá ntáchro ch'in Pedro kixin:

—Jaha tí Cristo ichr'án Dios —ichro ch'án.

Ch'in Jesús chrónka kixin its'en ch'án
(Mt. 16.20-28; Mr. 8.30-9.1)

²¹ Ntá ch'in Jesús k'uétuñhen ch'án sín kixin ninkexró tsochenkahya sín kixin nkexro tí jehe ch'án.

²² Ntá chénka ch'án sín kixin:

—Tí Xjeen Dios K'óna Chojni t'ichjánxin tsjasóte nchónhya nkehe tsoñhen la ko tsitekakuenhya tí sín t'etöan kuente njnko la ko tí sín t'etöan kuente tí sín ncha'tá la ko tí sín maestro tjako tí ley. Ts'óyan sín tí jehe ch'án, kjánchó tí níxin yaon na ó tsoxechón ch'án inaá —ichro ch'án.

²³ Ntá chr'éxin chénka ch'án kaín sín kixin:

—Tí chaxín tsochréhérá tí janhan na t'ichjánxin tsjöhéhrá kaín tí nkehe tjaké asánrá, ntá tsamará tí ntacruz kuéntará jnkojnko yaon, a ntá tsochréhérá tí janhan.

²⁴ Tí nkexro tjinkaon jehó sinchekaá asén mé ts'itjáyan. A ntá tí nkexro sinchek'itjáyánxín asén kixin tinkáchónki tí janhan la tsaá.

²⁵ ¿A ntá nkehe tsoñhen tí chrókjuacha ijnko chojni chróchónka kaín nkehe siín chjasintajni a ntá kjuachón chrókjuinchek'itjáyan ch'án?

²⁶ A ntá jnkojín chojni chrókósuehé kixin tinkáchónki tí janhan la ko tí nkehe tjákua, a ntá kjaxin tí Xjeen Dios K'óna Chojni mé tsoxuehé chróntáchro ch'án kixin chóxin ch'án tí jehe sín tió tsi ch'án éxí ijnko rey tsjáko ch'án tí kjuachaxin kuente It'é ch'án la ko tí sín ángel jína.

²⁷ Tíhi mé ntoá xrjanka kixin iso chojni tjejó tíhi tjejótinhin sín naxá ts'enhya sín ts'íkon sín kixin Dios ts'etöan tí kjuachaxin kuente ch'án.

K'uúxitóxin nkexri tsjehe ch'in Jesús
(Mt. 17.1-8; Mr. 9.2-8)

²⁸ A ntá k'uátsínka ijní yaon tí tsichronka ch'án tíhi ntá sákjuíko ch'án ch'in Pedro la ko ch'in Juan la ko ch'in Jacobo la chriin sín ijnko jná kixin tsonixjehé ch'án Dios.

²⁹ Ntá ch'ín Jesús tjenixjehē ch'án Dios ntá k'uixitóxin nkexrí tsjehe ch'án la ko tí iké ch'án la tjóá la ko tjákini tsjehe.

³⁰ Ntá xrínahya k'uikon sín yaá chojni tjejtójo sín tí jehe ch'án na mé jehe sín la tí ch'ín Moisés la ko tí ch'ín Elías.

³¹ Imá t'inkáséyan jnkontatjen tí tjejó sín tjejtójo sín tí ch'ín Jesús kixin nkexrí its'en ch'án la ko nkexrí tsjasótéxin ch'án tí chjasin Jerusalén.

³² Ntá ch'ín Pedro la ko tí sín tjejóko ch'án la imá kuihi sín kotáchrin; kjónté la k'uéjótsejehe sín k'uikon sín tí kjuachaxin kuénte ch'ín Jesús la ko k'uikon sín tí yóí chojni ntoá tjejóko sín ch'án.

³³ Ntá tió sátsji tí yóí sín tjejóko ch'ín Jesús ntá ch'ín Pedro ntáche ch'án tí ch'ín Jesús kixin: —Maestro, jína kixin tjejóni ntihi. Chrókuich'énani iní nchia la mé ijnko kuéntá la ijnko kuénte ch'ín Moisés la ko ijnko kuénte ch'ín Elías —ichro ch'án.

Kjánchó ch'ín Pedro í noehya ch'án nkehe chróntáchró ch'án kixin chrakon ch'án.

³⁴ Ntá naxá tjenixja ch'án ikui ijnko tjuí kjuák'etja tí jnā tjejó sín. Ntá chrakon sín tjejó sín chrínki tí tjuí.

³⁵ Ntá xrínahya kuínhin sín chríkjan tí tjuí itén nkexro ntáchró kixin:

—Tíhi mé Xjanna, imá tjuahā ch'án. Tinhínrá tí nkehe tsochronka ch'án la ko tí nkehe tjako ch'án.

³⁶ Ntá tió kjuixin kuínhin sín tí tan nixja ntá k'uikon sín kixin jehó ch'ín Jesús tjen. Ntá tí jehe sín la tání sín kixin xikaha k'uikon sín tí yaon a la ninkexró chenkahya sín tí nkehe k'uikon sín.

Ch'ín Jesús kjuínchekitohe jína ijnko chánjan chóna nchakuen tí jínahya

(Mt. 17.14-21; Mr. 9.14-29)

³⁷ Ntá tí yaon chr'éxin k'uinkajinxin sín jnā la ntá nchónhya chojni sákjuixinhin sín ntja ch'ín Jesús.

³⁸ Ntá ijnko chojni tjenkákjan ch'án tí chojni kjuíji ntá itsen nixja ch'án ntáchró ch'án kixin:

—Maestro, chronóghani kixin chrótsjehé tí xjeenni kixin jnkokoaxón ó chóntani ā ntá níhi xjan.

³⁹ Chóna xjan nchakuen tí jínahya la ntá nchek'iyato xjan la ko nchek'aniáte xjan nchexránka xjan kixin tjeótehe xjan la ko ntáloxrjo sítjixin ir'va xjan la ko ncheníhi xjan, na mé chrohya tsjinhin xjan.

⁴⁰ Ntá chronógheni tí sín xrikoa chrókuakitsjehe sín tí nchakuen tí jínahya, kjánchó kjuachahya sín —ichro ch'án.

⁴¹ Ntá kjuátehe ch'ín Jesús ntáchró ch'án kixin:

—Jahará chaxínhya chojni tinkáchónki tí janhan. Jehya jína tjenkayáxinrá. ¿Xá hasta nkesá tjinkáonrá ts'ejóni tsjákohará kixin nunca t'itjáhyará? Xrákoa tí xjan ntihi —ichro ch'án.

⁴² Ntá kóchjina tí chánjan. Ntá tí nchakuen tí jínahya kjuáka xjan nonte la ko kjuínchek'aniáte xjan inaá. Kjánchó ch'ín Jesús jiehe k'uētuenhen tí nchakuen tí jínahya kixin ts'axrjéxin xjan. Ntá k'uaxrjehe tí nchakuen tí jínahya ntá kuitóhe xjan jína. Ntá ch'ín Jesús kjuínchek'áyéhe tí it'é xjan.

⁴³ Ntá kaín sín chrakon sín kixin k'uikon sín tí kjuachaxin jie kuénte Dios.

Ch'ín Jesús chrónka ch'án inaá kixin its'en ch'án

(Mt. 17.22-23; Mr. 9.30-32)

Naxá chrakon sín kaín sín kixin tí kjuaxroan kjuíche ch'ín Jesús la ntá ntáche ch'án tí sín xriko ch'án kixin:

⁴⁴ —Tinhínrá jína tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etoan —ichro ch'án.

⁴⁵ Kjánchó jehe sín kiensínhya sín tí nkehe ntáchró ch'án kixin naxá kjuanjonhya Dios kjuachaxin kixin chrókuixín sín, ntá chrakon sín na kjuanchankíehya sín ch'án kixin nkexrí t'axrjéxin tí nkehe ntáchró ch'án.

Nkexro tí imá tjeotan ts'etoan

(Mt. 18.1-5; Mr. 9.33-37)

⁴⁶ Ntá tí sín k'uájiko ch'ín Jesús kjuankixin sín itjo sín kichó sín kixin nkexro tí jehe sín antsí má tjeotan ts'etoan.

⁴⁷ Kjánchó ch'ín Jesús kónohe ch'án nkehe tjenkayáxin asén sín. Ntá kuákja ch'án ijnko chánjan ntá kjuak'e ch'án tí tjen ch'án

⁴⁸ ntá ntáche ch'án sín kixin:

—Tí jnkójn nkexro chrók'uáyéhe tí xjan i kixin tinkáchónki sín tí janhan mé xikaha chrók'uáyéhe sín tí janhan. Ntá jnkójn nkexro chrók'uáyéhe tí janhan mé xikaha

chrók'uáyéhe tí nkeexo chr'ánna k'uinka. A ntá tí jnkójín nkeexo ántsí chrókjuinchehnehyá la mé ántsí chrók'uáyéhe kjuachaxin chrók'uetōan.

Tí nkeexo nínkakuenhya tí jeheni la mé tóxrjínhín ch'án tí xraq ch'eni
(Mr. 9.38-40)

⁴⁹ Ntá ntáchro ch'ín Juan kíxin:

—Maestro, k'uikonní ijnko nkeexo kjuachaxin ihnjá kuakitsjexín ch'án nchakuen tí jínahya chóna chojni. A ntá chénkani ch'án kíxin xikahya chrókjuich'e ch'án kíxin xrikoohyani ch'án.

⁵⁰ Kjánchó ch'ín Jesús ntáchro ch'án kíxin:

—Xikahya chróntáche ch'án kíxin tí nkeexo nínkakuenhya tí jeheni la kjá tóxrjínhín tí xraq ch'eni —ichro ch'án.

Ch'ín Jesús kjuentuéhe ch'án tí ch'ín Jacobo la ko tí ch'ín Juan

⁵¹ A ntá ó kóchjina tí yaon sátsji ch'ín Jesús nkaya nkajní, na ntá táhó kjuenkayáxin ch'án sátsji ch'án chjasin Jerusalén.

⁵² Ich'án ch'án chojni kuitónxin ntjá a ntá jehe sín sákjuí sín ijnko chjasin ntsí estado Samaria sákjuikjeyá sín nchia ts'ok'èxin sín.

⁵³ Kjánchó tí sín samaritano kjuanjonhya sín kjuachaxin chrók'uejó sín kíxin k'uíkon sín kíxin ó xraq ó sátsji ch'án chjasin Jerusalén.

⁵⁴ A ntá tió k'uíkon tí sín k'uájiko ch'án la mé ch'ín Jacobo la ko ch'ín Juan la ntáchro sín kíxin:

—Ínehéni, zá tjínkávan kíxin chrókjuanchiani xrohi chrók'uinkajínxin nkaya nkajní chrókjuinchek'itjáyán tí jehe sín éxí kjuanchia tí ch'ín Elías?* —ichro sín.

⁵⁵ Ntá ch'ín Jesús kuinkátjía ch'án komá ch'án tí jehe sín ntá kjuentuéhe ch'án sín ntáchro ch'án kíxin:

—Jahará la kjá noahyará nkeexo nchakuen chontará.

⁵⁶ Kíxin tí Xjeen Dios K'óna Chojni kuihya ch'án kíxin chrókjuinchek'itjáyán ch'án chojni. Náhi. Xraq ó ikuí ch'án sinchekaá ch'án chojni —ichro ch'án.

Ntá sákjuí sín í jnko chjasin ntsí.

Tí sín tjínkaon chróchréhe sín tí ch'ín Jesús
(Mt. 8.19-22)

⁵⁷ A ntá jehe sín sákjuí sín ntjá inaá. Ntá xeta sín ijnko nkeexo ntáche ch'án tí ch'ín Jesús kíxin:

—Ínehéni, tjínkaonni chróchréhe ní tí jaha nketí tjínkávan sátsjia —ichro ch'án.

⁵⁸ Ntá ch'ín Jesús kjuátehe ch'án ntáchro ch'án kíxin:

—Tí koxróntá chóna va itjueé va la ko tí koxroxé chóna va káké va. A ntá tí Xjeen Dios K'óna Chojni chóntahya nketí ts'ok'èxin ch'án —ichro ch'án.

⁵⁹ A ntá ntáche ch'án í jnko nkeexo:

—Chréhe tí janhan —ichro ch'án.

Kjánchó kjuátehe ch'án kíxin:

—Ínehéni, tjtóhéni senó sátsjikjaváni it'éni —ichro ch'án.

⁶⁰ Ntá kjuátehe ch'ín Jesús ntáchro ch'án kíxin:

—Tjtóhé kíxin tí chojni tsík'en la jnkokón sín tsík'en tsjavá kíchó sín. A ntá jaha la sátsjikjákua nkeexí tjen tí kjuachaxin t'etōan Dios —ichro ch'án.

⁶¹ Ntá ntáchro í jnko nkeexo kíxin:

—Ínehéni, tjínkaonni tsochréhe ní tí jaha. Jehí tjtóhé tsjinixjeheni tí sín siín ntōeni —ichro ch'án.

⁶² Kjánchó ntáchro ch'ín Jesús kíxin:

—Tí nkeexo kjuankíxin tsotsé ch'án arado ntá chrókjan chrókotónhen nóton mé xikaha xitjahya sich'ehe ch'án Dios xraq.

10

Ch'ín Jesús k'uetuēnhen setenta chojni sátsjikjako sín

¹ Ntá chr'èxin Ínehéni kjueyá ch'án í jnko setenta chojni ntá k'uetuēnhen ch'án sín sátsji sín yóyó sín sátsji sín tsitónxin sín ntjá tí kain chjasin na ko nkúixín tjínkaon ch'án sáchrókjuí ch'án.

² Ntá ntáchro ch'án kíxin:

—Chaxín ntáxrjan kíxin imá tsík'óna, a ntá tí chojni ch'e xraq mé tsjéhya. Chrókjuancheherá tí Ínehé nonte kíxin chróchr'án ch'án itsjé chojni chrókjuich'e xraq.

* 9:54 1 Reyes 18.30-40

³ Sátjirá jahará. Xrâxinkâonrá kîxin tétuñhanrá sâtsjirâ éxi kolélo ts'ejóyâkjanrá chrîkjan tí kolobo.

⁴ Tsjîkoahyarâ kabólâ la ko tjoa t'inka chichaon la ko tokate tjîkoahyarâ la ko tí nixjehérâ chojni tí ntja tîtoéhyarâ kîxin chrókjuintaxrjanhanrá sín.

⁵ A ntâ tió ts'ixenhenrá jnkojín nchia la senó nixjehérâ sín ntâchrorâ kîxin ts'áyêhe sín kjuaxróxin, tsixrorâ.

⁶ A ntâ tí tjejó sín kjuaxróxin ntiha la nixjehérâ sín la ts'áyêhe sín kjuaxróxin. A ntâ tí la náhi, a ntâ tí kjuaxróxin chrók'uáyêhe sín na sâtsjîkoará inaâ.

⁷ A ntâ tí nchia ntiha chrókjuanjon sín kjuachaxin chrókuitohará, ntaha mé tsjanjon sín nkehe chóna sín sinterâ la ko its'irâ, kîxin tí nkexro ch'e xra la síin kjuachaxin tsoxenkehe. Tsjîhyarâ í jnko nchia la ko í jnko nchia.

⁸ A ntâ tsjasánrá ijnko chjasin tsjanjon sín kjuachaxin ts'ejorâ ntiha ntâ interâ tí nkehe tsjanjon sín.

⁹ Nchekitohérâ chojni níhi jîna. Ntâ chenkarâ sín kîxin tí kjuachaxin t'etqan Dios la kînhya tjen tí tjejó sín, ichrorâ.

¹⁰ A ntâ tió tsjasánrá ijnko chjasin a ntâ tsjanjonhya sín kjuachaxin la ntâ t'axrjéxinrá ntq̄e sín sâtsjirâ tí ntja chjasin ntiha ntâ ntâchrorâ kîxin

¹¹ Kjonté tí nche tsik'ixitja totará tsotsénkarâ kîxin tsjâkoxinrá kîxin tí kjuaxróxinhya ts'áyêhe sín chr'éxin. Kjánchó chrókónohe sín kîxin tí kjuachaxin t'etqan Dios la kînhya tjen tí tjejó sín, ichrorâ.

¹² Ntâxrjan kîxin tí yaon tsjejexín chjasintajni la kjuaxróxinhya ts'atsínka tí chjasin a. Antsí náxrjónhya tí nkehe ts'atsínka sín, a ntâ tí nkehe ts'atsínka chjasin Sodoma* la kénhyó —ichro ch'ân.

Iso chjasin titekakonhya
(Mt. 11.20-24)

¹³ Nòará jahará chjasin Corazín. Nòará jahará chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxi k'uikonrá jahará, ntâ chrókójehe sín la tjoka chrókjuitóxinhnin ntje sín, tjoka chrók'uinkáya sín ka tié la ko chrókjuikjanjin sín ikja sín nteso, kîxin chrókjuakoxin sín kîxin t'ávâ sín.

¹⁴ A ntâ tí yaon tsitqexín ijje chojni a ntâ jahará antsí tsjasótiarâ, a ntâ tí sín kuente chjasin Tiro la ko chjasin Sidón la kénhyó tsjasóte sín.

¹⁵ A ntâ jahará chjasin Capernaum, tjenkayáxinrá kîxin imâ noharâ a ntâ sâtsjirâ nkaya nkajni, ichrorâ. Chaxínhya. Jahará la tsjasinkajinrá sâtsjirâ tí tsjasótexín tí sín tsik'en.

¹⁶ Tí nkexro tinhin tí nkehe ntâchrorâ la mé xikaha tinhin tí nkehe ntâxrjan la ko tí sín titekakonhya sín tí jahará na mé xikaha titekakonnhya sín tí janhan. A ntâ tí nkexro titekakonnhya sín tí janhan xikaha titekakonhya sín tí nkexro chr'anna k'uinka.

Ó kjan tí sín setenta sâtsikji

¹⁷ A ntâ ó kjan tí sín setenta sâtsikji la imâ chéhe sín ntâchro sín kîxin:

—Închéni, kjonté tí nchakuen tí jínahya titekakhenni tió t'âkjenxinni ihnjâ —ichro sín.

¹⁸ Ntâ ntâchro ch'in Jesús kîxin:

—Kjâ chaxin k'uikuân kîxin ch'in Tsochren k'uánótjenxin nkajni éxi ijnko kjónkîxin xikaha kónhen.†

¹⁹ Ó tjahará kjuachaxin kîxin kjonté konche la ko konchjâ tsinkátjarâ la ko tsjachahya ninkehó tí kjuachaxin kuente tí ch'in Tsochren kîxin ninkehó tsoanhyarâ.

²⁰ Kjánchó jehya tíha chrókóchâxinrá kîxin tí nchakuen tí jínahya kuítetekakonhanrá. Náhi. Chrókóchâxinrá kîxin ihnjârá ó ts'ínixin nkaya nkajni —ichro ch'ân.

Tí Xjeen Dios nixjehe It'é ch'ân
(Mt. 11.25-27; 13.16-17)

²¹ A ntâ tuénxin tí Nchakuen Dios kjuínchechéhe tí ch'in Jesús ntâ ntâchro ch'ân kîxin:

—Tjâncháha kjuasáya It'éni Îché nkaya nkajni la ko chjasintajni kîxin kjuánjonhya kjuachaxin chrók'uitja tí sín imâ nohe, a ntâ kjuánjuan kjuachaxin kîxin ts'titja tí sín noehya. Mé xikaha It'éni, jaha kóxrjínhan kîxin xikaha tsoñhe.

²² T'anâ mé chjîna káin xín nkehe. Ninkexró noehya nkexro tí Xjeen ch'ân. Na mé jehó It'é ch'ân mé nohe. La ko ninkexró noehya nkexro tí It'é ch'ân. Na mé jehó tí Xjeen ch'ân mé nohe ch'ân la ko tí sín tsíkjeýâ ch'ân kîxin tjínkaon ch'ân tsoñhe sín nkexro It'é ch'ân —ichro ch'ân.

²³ Ntâ komâ ch'ân tí sín k'uájiko ch'ân ntâ ntâche ch'ân tí jehó sín kîxin:

—Chéhe tí sín k'uikonxín kon sín éxi k'uikonrá.

* 10:12 Génesis 19.24–28 † 10:18 Isaiás 14.12

²⁴ Ntáxrjan kixin nchónhya tí sín k'uechronka itén Dios ósé la ko nchónhya tí sín rey k'ueújinkaon sín chrók'uikon sín éxi t'ikonrá, kjánchó k'uíkonhya sín, la ko k'ueújinkaon sín chrókuinhin sín tí nkehe tjetotinhínra jie, kjánchó í kienhya sín —ichro ch'án.

Ch'in Jesús kjuíncheyóexin éxi ijnko samaritano jina

²⁵ Ntá ijnko maestro tjako tí ley k'uínkatjen ch'án nixjehe ch'án tí ch'in Jesús tjinkaon ch'án tsonoxin ch'án á chaxin nohe ch'án tsjatehe ch'án ntá kjuanchankí ch'án kixin:

—Maestro, ¿nkexrí chrókjuich'eni chrók'uitjani tí kjuachón jnkochríxín? —ichro ch'án.

²⁶ Ntá kjuátehe ch'in Jesús ntáchro ch'án kixin:

—¿Nkexrí nixja tí ley? ¿Nkexrí tiénxian? —ichro ch'án.

²⁷ A ntá tí maestro tjako tí ley mé kjuátehe ch'án ntáchro ch'án kixin:

—Chrótjuèheni Ìnchéni Dios kaín asenni la ko kaín fuerza chóniani la ko kaín kjuaxrexinkaon kuénteni la ko chrótjuèheni kichó ni éxi tjuèxinni asenni[‡] —ichro ch'án.

²⁸ Ntá ntáchro ch'in Jesús kixin:

—Jina kjuátehe. A ntá tí jaha xikaha sich'e la tsochonta kjuachón —ichro ch'án.

²⁹ Ntá tí maestro tjako tí ley mé tjinkaon chrókjuachaxin ch'án tí ch'in Jesús ntá kjuanchankí ch'án inaá kixin:

—¿Xá nkexro tí kichó ni chrótjuèheni, ichrúa? —ichro ch'án.

³⁰ Ntá ch'in Jesús kjuátehe ch'án ntáchro ch'án kixin:

—Jjnko chojni k'uínkajinxin nó ntja kjuixin chjasin Jerusalén sátsji ch'án chjasin Jericó, ntá kuátóhe ntja iso síchee kueéhe sín ch'án kaín nkehe sáchrókjuiko ch'án, la ko iké ch'án tsíkakitsjehe sín ch'án, la tsíkate sín ch'án, la ntá sátsíkji sín tsíkitohe sín ch'án la ó mero tjet'en ch'án.

³¹ Ntá xrínghya k'uaúsinka ijnko nchat'á tí ntja ntiha ntá k'uíkon ch'án xikaha ntá ántosén ch'án k'uaúsinké ch'án.

³² A ntá kjaxin ijnko ch'in levita k'uaúsinka chjinaxón ntiha. Ntá k'uíkon ch'án xikaha ntá ántosén ch'án k'uaúsinké ch'án kjaxin.

³³ A ntá ijnko ch'in kjuixin estado Samaria k'uaúsinka tí ntja ntiha ntá k'uíkon ch'án xikaha tjetsinka tí nkexro ntá kuíkonóhe ch'án.

³⁴ Ntá kóchjinehe ch'án tí nkexro tsíkónihi ntá kjuich'ehe ch'án xroan tí síchrit'o chjéhe ch'án aceite la ko vino la ko kjuínchentetoxin ch'án ka. Ntá kjuixin ntá kjuínchekiták'á ch'án tí kolóchoe ch'án. Ntá sákjuiko ch'án ijnko nchia t'ok'éxin chojni ntiha la k'uaýakonhen ch'án.

³⁵ Ntá tí kóygon ntá sátsji tí ch'in samaritano kuakitsje ch'án iyó tí chíchaon la chjéhe ch'án tí inché tí nchia ntáchro ch'án kixin: “T'ayakonhén tí nkexro i, a ntá antsí má ts'ichjánxinhin ch'án la tió tsokjan ntá tsjénkaha ts'ókjanhan kaín tíha,” ichro ch'án.

³⁶ A ntá tí iní nkexro k'uaúsinka ntja la, ¿nkexro tjuèhe tí nkexro kjuínchenihi tí síchee? —mé kjuanchankí ch'in Jesús.

³⁷ A ntá kjuátehe tí maestro tjako tí ley kixin:

—Tí nkexro kuíkonóhe tí jehe ch'án —ichro ch'án.

Ntá ntáchro ch'in Jesús kixin:

—Sátjia jaha la xikaha chrókjuich'e —ichro ch'án.

Ch'in Jesús sákjuí ch'án ntqe tjan Marta la ko tjan María

³⁸ Naxa tjetji ch'in Jesús kjuíji ch'án ijnko chjasin ntsí. A ntá ntiha itjen ijnko tjan it'in Marta, a ntá kjuanjon tjan kjuachaxin kuitóhe ch'án ntqe tjan ntiha.

³⁹ A ntá tjan Marta chóna tjan ijnko kichó tjan it'in María. A ntá jehe tjan kjuák'etjaxin tjan chrínki toté tí ch'in Jesús tjetinhin tjan nkehe tí tjechro ch'án.

⁴⁰ A ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'in Jesús ntáchro tjan kixin:

—Ìnchéni, ¿á tóxakuanhya kixin tí tjan kichó ni kuitóheni tjan, a ntá jehóni tjech'eni kaín xra? Ntáche tjan kixin tsjinkitsani tjan —ichro tjan.

⁴¹ Kjánchó ch'in Jesús kjuátehe ch'án ntáchro ch'án kixin:

—Marta, Marta, jaha imá tóxakonhan kixin t'inkákonhen nchónhya xra chonta.

⁴² Kjánchó jnkokóá nkehe t'ichjánxin. A ntá tjan María kjueyá tjan tí nkehe antsí jina la ko ninkexró tsakitsjehya tjan tíha —ichro ch'án.

11

Ch'in Jesús tjako ch'án nkexrí tsonixjeheni Dios

(Mt. 6.9-15; 7.7-11)

¹ A ntá jnkonaá ch'in Jesús tjenixjehe ch'án Dios ijnko lugar tjen. Ntá kjuixin la ijnko tí sín xriko ch'án ntáchro kixin:

[‡] 10:27 Deuteronomio 6.5; Levítico 19.18

— Ìnchéni, tjàkohéni nkexrí tsonixjehéni Dios kixin xíkaha ch'ín Juan kjuachokhe ch'án tí sín k'uájiko ch'án.

² Ntá ch'ín Jesús ntáchro ch'án kixin:

— Tió nixjehérá Dios ntáchrórá kixin:
It'éni tjen nkaya nkajní, jaha imá tjóá.
Chrókui tí kjuachaxin kuéntá.

Chrókjuich'e tí nkehe tòxrijínhan jaha ntihi chjasintajni éxí tjech'e nkaya nkajní.

³ Ijie tsjánjuan tí niotja t'ichjánxínhinni jnkoinko yaon.

⁴ T'óxíka tí nkehe jínahya kjuich'eni kixin kjaxin jeheni ts'itjáyenhenni tí nkehe kjuich'ehe ni chojni.

Tjtoéhyani jeheni xrahya chrókjuasinni jie. Nchekaáni kaín tí nkehe jínahya chrókóhenni —mé xíkaha ichro ch'ín Jesús.

⁵ Kjaxin ntáchro ch'án kixin:

— A ntá jnkójínrá chróchontará ijnko chojni choxian, a ntá sáchrókjuia ntqe ch'án k'áxrótjen chróntáche ch'án kixin: “Amigo, nchekjenni iy'á niotja

⁶ kixin nantá ó kui ijnko chojni chóxinni kuixín ch'án kjin kjuíji ch'án ntqeni ntá chóntahyani ninkehó tsochjéheni ch'án.”

⁷ A ntá tí chrókjuatehe tí nkexro choxian tjen nkaxenhen chróntáchro kixin: “Chjééhyani xra. Tí ntója ntqeni méhe t'ikjéhe. A ntá xjéenni tjejót'ok'èkoni xjan. Ntá xitjahya ts'áyani tsotjáhani nkehe”, ichro ch'án.

⁸ Ntáxrjan kixin kjónté chrók'uàyahya ch'án chrótjáhya ch'án nkehe kjónté chóxian ch'án, kjá ts'áya ch'án tsotjáhya ch'án kaín nkehe t'ichjánxínhan kixin tjinkakonhya ch'án kixin naxa chrókjuak'é chrók'uèya jaha.

⁹ Mé xíkaha ntáxrjan kixin: Tjanchiará nkehe la Dios tsotjáhará; tjéyará nkehe la ts'itjará; t'inkará puerta la tsoxitjéhe.

¹⁰ A ntá tí nkexro tjanchia nkehe la ts'áyéhe tí nkehe; la ko tí nkexro tjejá nkehe la ts'itja; la ko tí nkexro t'ínka puerta la tsoxitjéhe.

¹¹ ¿Xá jnkójínrá chontará xjaanrá chrókjuanchahará xjan niotja la ¿á chrókjuánjonrá ijnko xro? Q chrókjuanchahará xjan koche la ¿a chróchjehérá ijnko konche?

¹² Q chrókjuanchahará xjan koja la ¿á chrókjuánjonrá ijnko konchía?

¹³ A ntá jahará kjónté jínahyará la ó nohará nkehe jina tsochjehérá xjaanrá, la mé antsí chrókónohará kixin It'éni tjen nkaya nkajní tsotjáhará Nchakuen ch'án tí jnkójínrá chrókjuanchehérá ch'án —ichro ch'ín Jesús.

Tjanchia sín jie kixin ch'ín Jesús chóna kjuachaxin tí jínahya
(Mt. 12.22-30; Mr. 3.19-27)

¹⁴ Ntá ch'ín Jesús kuakitsje ch'án ijnko nchakuen tí jínahya tsikjinchenósín ijnko chojni. A ntá tió tsik'axrje tí nchakuen tí jínahya a ntá tí ch'ín xitjahya nixja la jina nixja ch'án. Ntá kaín chojni chrakon sín kixin xíkaha tsikjich'e ch'án.

¹⁵ A ntá jnkójín tí jehe sín ntáchro sín kixin:

— Tí ch'ín a mé takitsje ch'án nchakuen tí jínahya kixin chóna ch'án kjuachaxién tí ch'ín Beelzebú mé tí ch'ín Tsochren, na mé jehe ch'án mé t'etuèhen kaín tí nchakuen tí jínahya —ichro sín.

¹⁶ A ntá iso sín tjinkaon sín chrókjuachaxín sín tí ch'ín Jesús ntá kjuanchehe sín ch'án ijnko kjuaxroan náxrjón kuènté nkaya nkajní.

¹⁷ Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

— Jnkójín gobiernó jnkokónhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etoanxín sín, la ko tí sín jnkokoá nchia jnkokónhya tjenkayáxin sín xitjahya ts'ejóko kichó sín jnkokoá.

¹⁸ A ntá kjaxin tí ch'ín Tsochren chrókjuánjonko kichó ch'án, ¿la nkexrí chrókónta ch'án kjuachaxin naxa chrók'uètoan ch'án tí chrók'uaxrje tí jínahya? A ntá jahará ntáchrórá kixin janhan takítsjé nchakuen tí jínahya kixin tí kjuachaxién ch'ín Tsochren chonta janhan, ichrorá.

¹⁹ A ntá tí xíkaha la, ¿ntá nkexro chjéhe kjuachaxin tí sín chréhe tí jahará kixin tsjacha sín tsakitsje sín nchakuen tí jínahya? Jehe sín mé tjakoxín sín kixin jahará ntoáhya tjenkayáxinrá.

²⁰ A ntá tí kjuachaxién Dios mé takítsjéxian tí nchakuen tí jínahya na mé chrókónoaxínrá kixin tí kjuachaxién Dios t'etoan ch'án mé ó kui tí tjejorá.

²¹ A ntá ijnko chojni jiehe yamá chica t'ayakonhen ch'án ntqe ch'án kixin tí nkehe chóna ch'án ts'itjáyannya.

²² A ntá itsi ijnko nkexro antsí má tsehe, a ntá tsjanjonko ch'án tí ìnché nchia, a ntá tsjacha tsakitsjehe tí ìnché nchia kaín tí chica yamá ch'án kixin imá jieéxín ch'án. A ntá tí ch'ín antsí tsehe mé tsakja ch'án kaín nkehe siín ntiha.

²³ Tí nkexro titekakonhya tí janhan mé nínkakonna ch'án. A ntá tí nkexro tjinkĩtsahya tí janhan mé t'ínkákõnhen tí xra t'a —ichro ch'án.

Ijnko tí nchakuen tí jínahya mé tsokjan ínaá
(Mt. 12.43-45)

²⁴ 'A ntá ijnko nchakuen tí jínahya tsík'axrjexín ijnko chojni na mé ixri tí nonte xamá xritjeyá nketí náxrxjõn ts'ok'éhe. A ntá tí k'uitjahya ntá tjenkayáxin kixin: “Áxri tsokjan ntõna k'uaxrjéxian.”

²⁵ A ntá tió kjan la éxi ijnko chojni tsík'ánjõn ntõe la náxrxjõn tsjehe tí nkaxenhen nchia. A ntá k'uikõn tí jínahya xikaha tjen nchia

²⁶ a ntá sákjuikakjín yato nchakuen tí jínahya antsí má jínahya. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen ijnko chojni kénhya asén tinkáchõnki Dios —ichro ch'án.

Tí kjuachéhe chaxín

²⁷ Ntá ch'ín Jesús tjenixja ch'án chrónka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntáchro tjan kixin:

—Chéhe tí nkexro k'uaxrjénixín tí jaha kjuíntak'ánkiá —ichro tjan.

²⁸ Ntá jehe ch'án kjuátehe ch'án ntáchro ch'án kixin:

—Antsí chéhe tí nkexro tinhin tí itén Dios la ko titekaon sín —ichro ch'án.

Tí sín jínahya mé tjanchia sín ijnko kjuaxroan náxrxjõn
(Mt. 12.38-42; Mr. 8.12)

²⁹ Ntá nõhõnha chojni sítõjnkotsé sín tí tjen ch'ín Jesús ntá jehe ch'án kjuankíxin nixja ch'án ntáchro ch'án kixin:

—A ntá tí chojni siín jie la jínahya sín, a ntá tjanchia sín kixin chrókjuásian ijnko kjuaxroan náxrxjõn. Kjánchó tsjáqõxinhya í jnko kjuaxroan la jehó tí nkehe tsíkõnhen ch'ín Jonás.

³⁰ Ntá éxi yõhe kónhen ch'ín Jonás kónõexín tí sín chjasin Nínive mé xikaha tsonhen tí Xjeen Dios K'óna Chojni la ts'ikõn tí chojni siín jie.

³¹ A ntá tí yaon tsitõexín ijíe chojni tjejó jie la mé tí tjan reina k'uetõan kjuixín nó Sur mé ts'inkatjen tjan tsjanchia tjan jie kixin tí sín tjejó jie. Kixin jehe tjan imá kjín kjuixín tjan tsinhin tjan nkexrí imá k'ueñohe ch'ín Salomón.* A ntá jie itjèn janhan antsí chonta kjuachaxin, a ntá ch'ín Salomón la kénhyó.

³² La ko tí sín chjasin Nínive kjáxin ts'inkatjen sín tió tsitõexín ijíe chojni la tsjanchia sín jie kixin tí sín tjejó jie la ko tsontáchro sín kixin chrókjuasóte tí chojni tjejó jie kixin tió kuínhin tí sín Nínive chrónka ch'ín Jonás itén Dios la kjuitõxinhin sín ntje sín. A ntá jie itjèn janhan antsí má chonta kjuachaxin, a ntá ch'ín Jonás la kénhyó.

Xrohi t'inkaséyanxín cuerpo kuènte chojni
(Mt. 5.15; 6.22-23)

³³ 'Nijnko chojni chrokujuinçek'ákjen ijnko xrohi chrókjuak'emá ch'án la ko chrókjuak'ehya ch'án chrínki ijnko ntacajõn. Náhi. Noi chrókjuak'e xrohi chrókjuak'enkáya candelero kixin ts'ikõnxín chojni tí t'inkaséyan.†

³⁴ Tí ikonrá mé éxi yõhe ijnko xrohi t'inkaséyanxín tí cuerpo kuèntará. A ntá tí chontará ikonrá jina la ntá kuènté cuerpo kuèntará chõnta xrohi. A ntá tí chontará ikonrá jínahya la ntá kuènté cuerpo kuèntará la sítie tjen.

³⁵ Chrókõxakonhanrá kixin chrók'uayakonhénrá tí xrohi chontará kixin chrók'uankahya kixin chrók'uixitiéhya tí tjejorá.

³⁶ A ntá tí kuènté tí cuerpo kuèntará chróchõnta xrohi la ko nit'õ chrók'uixitiéhya la ntá kuènté la chrók'uikonrá jina la éxi ijnko lámpara kuènté ch'e xra jina.

Ch'ín Jesús chrónka kixin ntoáhya tjako tí sín fariseo la ko tí sín tjako ley
(Mt. 23.1-36; Mr. 12.38-40; Lc. 20.45-47)

³⁷ A ntá tió kjuixín nixja ch'ín Jesús ntá ijnko ch'ín fariseo chrónõghe ch'án tí ch'ín Jesús kixin sátsjiko ch'án ntõe ch'án sineko ch'án. Ntá tió kjuíji sín ntiha la k'uixenhen sín nchia ntá kjuak'etjaxín ch'ín Jesús chjino tjen tí mesa a.

³⁸ A ntá tí ch'ín fariseo chrakon ch'án k'uikõn ch'án kixin ch'ín Jesús k'õntihya ch'án tja ch'án senó tí sine ch'án éxi tinkáchõnki tí jehe sín.

³⁹ Kjánchó Ìnchéni ntáchro ch'án kixin:

—Jahará fariseorá nchetjõará tí ntõja tí vaso la ko tí plato. A ntá nkaxenhen la tsíkaon kjuachéhe la ko kjuachjínõxinhin.

⁴⁰ Jahará lõtjírá. ¿A noahyará kixin tí nkexro kjuích'éna tí ntõja la koí tí nkaxenhen kjuích'éna ch'án?

* 11:31 1 Reyes 10.1–10 † 11:33 Lucas 8.16

41 Tí chrókjuincheqitonhénrá chojni nòa kaín asánrá tí nkehe chontará la ntá chrókóxakuanhyará tí chrók'ónti chojni o náhi.

42 'Nòará jahará fariseorá. Jahará chjehérá Dios ijnko ite parte kaín kaxroan tsjiko tí nkehe sineni. A ntá tahyará kuentá tí nkehe ntoá la ko nkexrí chrótjuèhérá Dios la ko nkexrí chrótjuèhérá kichuárá. Jína chróchjehérá Dios nkehe la ko chrók'uitjányanhyará tí chrókjuinkitsará kichuárá.

43 'Nòará jahará fariseorá. Tjinkáonrá ts'ejokjenrá tí silla náxrjón nkaxenhen njnko la ko tjinkáonrá kixin jnkójina tsonixjahará sín tió tsoxétará sín ntasin.

44 'Nòará jahará maestro tjàkorá tí ley la ko jahará fariseorá. Ntoáhya tjenkayáxinrá ch'iará. Jahará éxi yóhe tòye tsíxravá chojni tsík'en t'ikonhya chojni la t'atsínka sín nátaón la noehya sín kixin tsíxravá chojni ntiha.

45 A ntá kjuátehe ijnko tí maestro tjako tí ley ntáchro ch'án kixin:

—Maestro, xikaha ntáchrua la, ¿á kjaxinhya jeheni kaín ni t'ántaxínhíni ní? —ichro sín.

46 A ntá ntáchro ch'ín Jesús kixin:

—Kjaxin nòará tí jahará tjàkorá tí ley. Tétuènhénrá chojni tsamá sín ijnko nkehe imá ye chrókjuachahya chojni chrókuamá. A ntá jahará njnko dedo tjára chrókjuinkitsará tí nkehe imá ye yámá sín.

47 'Nòará tí jahará. Ch'énará tjàt'oe tí sín k'uéchrónka itén Dios óse tsík'óyán tí sín k'uaxrjenixínrá.

48 Xikaha jahará tjákoxinrá kixin ó nchoxon tí nkehe kjuích'e tí sín k'uaxrjenixínrá óse kixin jehe sín k'óyán sín tí nkexro k'uéchrónka itén Dios óse. A ntá jahará ch'énará tjàt'oe tí tsíxravá sín.

49 'Mé xikaha Dios chóna kjuaxrexinkaon imá jína ntá ntáchro ch'án kixin tsochr'án ch'án chojni tsochrónka itén ch'án la ko tsochr'án ch'án chojni tsjikjako itén ch'án. A ntá chojni ts'óyán jnkójin tí jehe sín la ko tsochónkíhi tí í so sín, ichro ch'án.

50 A ntá Dios mé tsjanchia jie tí chojni síin jie kixin k'uitji ijnjé kaín tí sín k'uéchrónka itén ch'án óse desde tí xrankixin k'óna chjasintajni

51 la mé xrankixín k'uitji ijnjé ch'ín Abel la mé kjuixixín k'óyán sín ch'ín Zacarías k'óyánxin sín ch'án jnkosiné tí tjen tí altar la ko tí njnko. Ntá Dios sinchekjasóte ch'án tí sín síin jie kixin xikaha ik'uén kaín tí sín a.

52 'Nòará jahará maestro tjàkorá tí ley. Jahará tjinkákonhyará kixin í so chojni tsoñohe sín tí nkehe chaxín la ni jahará tjinkákonhyará sinchexiteyará la ko tjtóéhyará kixin í so chojni chrókjuinchexiteyá sín —ichro ch'án.

53 A ntá kjuixín nixja ch'ín Jesús kaín tíha ntá tí sín maestro tjako tí ley la ko tí sín fariseo imá kónínkakonhen sín ch'án ntá kjuankixin sín kjuanchankíhi sín ch'án nchónhya nkehe

54 chrókjuachaxín sín ch'án kixin ách'e ntoáhya chrókjuátehe ch'án ntá chrókjuanchia sín jie tí jehe ch'án.

12

Ch'ín Jesús chrónka kixin ntoáhya ch'e tí sín fariseo

1 A ntá nchónhya mil chojni kójnkotsé sín ntá tinkák'íntate kichó sín. Ntá ch'ín Jesús saoxín kjuankixin chénka ch'án tí sín k'uájiko ch'án ntáchro ch'án kixin:

—Chrókuitekákonhyará tí nkehe ntoáhya tjenkayáxin tí sín fariseo ch'ia sín, na mé éxi yóhe tí xroan nchek'ánki niqtja tí nkehe tjako sín.

2 Kohya nkehe mó jie chrókónoxinhya chr'éxin la ko kohya nkehe tjemá jie chrókónoahya chojni chr'éxin.

3 A ntá kaín nkehe ntáchrórá tí sítié la chr'éxin tsinhin chojni tí nchakotjin; la ko kaín nkehe mó ntáchrórá k'uíkjéhérá nchia la chr'éxin ts'eya sín chrítaón nchia tsinhin kaín xin chojni.

Nkexro tí chróchrakonhenni

(Mt. 10.26-31)

4 'Jahará chojni chóxin kichó ni mé tjonkará kixin chróchrakuenhyará tí chojni t'óyán tí cuerpo, a ntá chr'éxin la kohya nkehe tsjacha sín chrókjuích'e sín.

5 Kjánchó tjonkará kixin nkexro chróchrakonhénrá. Chróchrakonhénrá Dios mé tí nkexro tsakitsje kjuachón ntá chóna kjuachaxin tsochr'án chojni tí síin xrohí tsjasótexín sín. Tí nkexro a mé chróchrakonhénrá ch'án má.

6 '¿Á chrókóxixinhya in'ó koxroxé yaá chichaon ntsíntí? Kjánchó Dios la ts'itjányenya ch'án njnko tí jehe va.

7 Kjonté tí kaxihí chóna ikjára la nohe ch'án nkekjaín ka chontará. Méxra chrakonhyará tí jahará kixin antsi má tjete sínkí tí jahará. A ntá kjonté nchónhya koxroxé la kánhyó sínkí tíha.

Chróchrónkani kixin tinkáchónkini Ìnchéni Jesucristo nkayakon chojni
(Mt. 10.32-33; 12.32; 10.19-20)

⁸ Ntáxrjan kaín tíhi kixin tí nkeexo tsochrónka kixin tinkáchónkina sín nkayakon chojni la kjaxin tí Xjeen Dios K'óna Chojni tsochrónka kixin chóxin ch'án tí jehe sín nkayakon tí sín ángel kuènte Dios.

⁹ A ntá tí sín sinchemá sín kixin chónhyana sín nkayakon chojni la ntá kjaxian janhan sjntamá kixin chonhya tí jehe sín nkayakon tí sín ángel kuènte Dios.

¹⁰ A ntá jnkojín nkeexo ts'ántaxínhín sín tí Xjeen Dios K'óna Chojni naxa jina ts'itjáyán tí jje k'uántaxínhín sín. A ntá tí nkeexo ts'ántaxínhín tí Nchakuen Dios la xitjahya tsjin tí jje tí xikaha tsixro sín.

¹¹ Tió tsjikoará sín nkaxenhen njnko Israel la ko tí tjejó tí sín t'etóan la ko tí tjejó tí síxreé la tóxakuanhyará nkehe tsjateherá la ko tóxakuanhyará nkehe tsixrorá

¹² kixin tió tsonixjará la tí Nchakuen Dios sinchexraxinkaonrá nkehe tsixrorá —ichro ch'án.

Tí kjuaxikaon tsochóna chojni itsjé nkehe

¹³ Jnko nkeexo tjenkákjan tí sín tsikójnkotsé ntáche ch'án tí ch'ín Jesús kixin:

—Maestro, ntáche tí kichó ní a kixin tsjanjon ch'án tí nkehe tónhenni tocar tsíkítóhe it'eni tsakjani —ichro ch'án.

¹⁴ Ntá kjuátehe ch'ín Jesús ntáchro ch'án kixin:

—Lontia jaha. ¿Nkekuènte chrókjuich'énará juez tí janhan chrók'oxikayaha tí nkehe chrókuakjará jahará? —ichro ch'án.

¹⁵ Kjaxin ntáchro ch'án kixin:

—Tóxakonhanrá tí chróchontará itsjé nkehe. Jehya tí nchónhya nkehe chróchontará ntá náxrjón chrók'uejorá —ichro ch'án.

¹⁶ Ntá kjuíncheyóexin ch'án ntáchro ch'án kixin:

—Kjuák'e ijnko chojni rico, a ntá tí nontee ch'án na mé imá k'óna.

¹⁷ A ntá tí ch'ín rico kjuenkayáxin ch'án ntáchro ch'án kixin: “¿Nkexrí chrókjuít'a jie kixin chontahya nketí ts'ínkachjina tí noa k'ónana?” ichro ch'án.

¹⁸ Ntá kjuenkayáxin ch'án ntáchro ch'án kixin: “Ó ñona nkehe sit'a jie. Ts'oxíka tí t'ínkachjinayá noa chonta ntá sit'ana ijnko antsí jie ts'ínkachjinayá kaín nkehe k'ónana jie chonta.

¹⁹ Ntá tsonátjan asenná kixin: Asénni, nchónhya nkehe chonta jaha tsíchjina tsjacha nchónhya nánó. Ntá jie t'ok'áha la inte la its'ia la tócháha,” ichro ch'án.

²⁰ Kjánchó ntáche Dios tí jehe ch'án kixin: “Lontia xikaha ichrua la, kixin ijie tie itsi nkeexo tsjanchia asán. A ntá tí nkehe kjuásichjina la, ¿xá nkeexo kuènte tíha?” ichro ch'án.

²¹ Mé xikaha tsonhen tí nkeexo chóna nchónhya nkehe chjasintajni ntíhi, a ntá naxa kjueyáhya ch'án nkehe kuènte nkaya nkajní —mé ichro ch'ín Jesús.

Dios mé t'ayakonhen tí xjeen ch'án

(Mt. 6.25-34)

²² Ntá chr'éxin ntáche ch'ín Jesús tí sín k'uájiko ch'án kixin:

—Tjonkará kixin chrókóxakuanhyará tí nkehe chrókjónterá la ko tí ka chrók'uítsará.

²³ Antsí sínkí tí kjuachón, a ntá tí nkehe chrókjónterá la kánhyó sínkí. La ko antsí sínkí tí cuerpo kuèntará, a ntá kánhyó sínkí tí ka chrók'uítsará.

²⁴ Xráxinkáonrá nkexrí síin tí kontálo. T'enkahya va la ko tjáhya va la ko chónthaha va nketí ts'ínkachjinayá va tí noa. Kjánchó Dios la tjanjon nkehe sine va. A ntá jahará la antsí tjetóan, a ntá tí ko xritjaka la kénhyó.

²⁵ ¿Á tjejó jnkojínrá tjenkayáxinrá kixin tí chrókóxakonhanrá má ntá naxa chrók'uankírá it'ó metro ntetoxinrá inaá?

²⁶ A ntá xitjahya chrókjuich'erá tíha kjónté ijnko nkehe ntsí, ¿a ntá nkehe tsonhen tóxakonhanrá í so nkehe síin?

²⁷ Xráxinkáonrá nkexrí sí'ánkí tí catsjo lirio ch'ehya xra la ko tjonhya. Ntá kjónté ntáxrjan kixin tí ch'ín rey Salomón kaín ka náxrjón k'uék'ínkaya ch'án naxa kjuíncheyóehya ch'án kixin antsí náxrjón tí tsjo a.

²⁸ A ntá xikaha Dios mé nchek'itsa ch'án kaín kayoa kjónté ijie síchón la ntóye tsoche, la mé xikaha tsjanjon ch'án tí nkehe chrok'uítsará jahará. ¿Ntá nkekuènte kixin naxa titekákonhyará ch'án?

²⁹ Ntá nkekuènte ixrírá tóxakonhanrá xritjeyará nkehe sinterá la ko nkehe its'irá?

³⁰ A ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kixin t'ichjánxinhanrá kaín tí nkehe a.

³¹ Senó chrókjuéyará tí kjuachaxin kuènte Dios, a ntá jehe ch'án mé tsjanjon ch'án kaín nkehe t'ichjánxinhanrá.

Tí nkehe tjete siín nkaya nkajní

(Mt. 6.19-21)

³² 'Chrakonhyará jahará kolélo kuèntana. Kjónté tsjéhyará la It'ará tóxrjnhjín ch'án tsotjáhará ch'án tí kjuachaxin kuènte ch'án.

³³ Nchekjirá kaín nkehe chontará la ntá chjéherá tí chichaon tí sín chóntahya. A ntá xikaha sich'erá la tí tjoá t'inka ch'chakqanrá tsontaxinhya kixin tí nkehe tjete siín nkaya nkajní tsjéjehya la ko ntaha kohya xíchee la ko ts'ínhya kué la ko ts'itjáyanhya.

³⁴ A ntá tí nkaya nkajní tsochontará nkehe tjete la ntá tí nkehe tjenkayáxinrá la kjaxin ntaha tjen.

T'ichjánxín listo chrók'uejóchónhenni

³⁵ T'ichjánxín listo ts'ejochohénrā la ko tsjak'ekoará xrohi tjeche.

³⁶ Listo chrók'uejorá éxi chojni ch'e xra tjejóchónhen sín tsokjanxín tí lámqe sín tí tsíkótehe chojni kixin tíó tsi ch'án la ts'eya ch'án, la ntá tsakitjehe sín tí puerta tjoka.

³⁷ Náxrjón tí nkexro ch'e xra tíó chrókjan tí lámqe sín chrók'uikon ch'án kixin naxa tjejótsjehe sín. Ntá chaxin ntáxrjan kixin tí ch'ín lamo ts'etqan ch'án kixin ts'ejótxajín sín tí tjen mesa ntiha ntá tsjanjon ch'án nkehe sine sín.

³⁸ Kjónté chrókui ch'án k'áxrótjen q chrókui ch'án nantóye mé xikaha chrók'uikon ch'án kixin tjejótsjehe sín la náxrjón tí sín ch'ehe ch'án xra.

³⁹ Chrókónohará tíhi kixin tí chrókónohe tí inché nchia nke hora chrókui tí xíchee ntá chrókjuak'etsjehe ch'án chrókuitoehya ch'án chrók'uixenhen xíchee tí ntqe ch'án chrókueé.

⁴⁰ Ntá jahará kjaxinrá xikaha chrók'uejotsjehérá kixin titáya tsi tí Xjeen Dios K'óna Chojni.

Tí nkexro jína ch'e xra la ko tí ch'ín ch'ehya xra jína

(Mt. 24.45-51)

⁴¹ A ntá ch'ín Pedro kjuanchankí ch'án kixin:

—Ínchéni, ¿á jehóni kaín ni kjujñcheyóéxian nkehe ntáchrua q kaín chojni? —ichro ch'án.

⁴² Ntá ntáchro Ínchéni kixin:

—¿Nkexro tí t'etqan tí xra jína, a ntá tí lámqe ts'etuèhen kixin ts'ayakonhen ch'án tí chojni sín tí nchia ntiha kixin tsjanjon ch'án nkehe sine sín xintii tí hora a?

⁴³ Náxrjón tjen tí nkexro a tíó tsi tí lámqe ts'ikon ch'án kixin naxa tjech'e tí xra.

⁴⁴ Tíhi mé chaxín tsontáxrjan kixin tí ch'ín lamo tsochjéhe ch'án kaín xra chóna ch'án ts'etqan tí ch'ín a.

⁴⁵ A ntá tí ch'ín t'etqan sítonhen xra tsjenkayáxin kixin tjokahya tsokjan tí lámqe ch'án, a ntá tsjankixin ch'án tsónínkakohen ch'án tsjanjonko ch'án tí í so chojni ch'e xra, tí chojni ntoa la ko tí chojni chjin, a ntá jehe ch'án sine ch'án la its'i ch'án la tsokoa ch'án.

⁴⁶ A ntá tí lamo tsokjan tí yaon tjenkayáxinhya tí ch'ín ch'e xra, na mé ijnko hora noehya ch'án. A ntá imá sinchekjasóte ch'án tí ch'ín kuitohehe xra la ntá tsjasóteko ch'án tí sín titekakonhya.

⁴⁷ A ntá tí nkexro nohe ch'án nkehe tí xra tjinkaon tí lámqe ch'án la tókauenhya ch'án la titekakonhya ch'án la mé tí ch'ín a imá tsjasóte ch'án ts'ekon ch'án.

⁴⁸ A ntá tí nkexro noehya nkehe tí xra tjinkaon tí lámqe ch'án ntá ch'e ch'án nkehe chrókjuasótexín ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhe nchónhya nkehe la antsí tsjé xra ts'áyéhe ch'án sich'e ch'án; la ko antsí tsjé xra tsoxranchehe tí nkexro k'uáyéhe itsjé nkehe.

Jnkokoáhya tsjenkayáxin chojni kixin ó kui Ínchéni Jesús

(Mt. 10.34-36)

⁴⁹ Janhan k'uinka kixin sjintak'ákjen xrohi chjasintajni. Ách'e ntáxrjan kixin ó tjechr'ákjen tí xrohi a ntá naxa náhi.

⁵⁰ T'ichjánxín nchónhya tsona tsjasótena. Tóxakonna tsoxiteyájia kaín tíha.

⁵¹ ¿Á tjenkayáxinrá kixin k'uinkakian kjuaxróxin tí chjasintajni ní? Méxra ntáxrjan náhi. Jnkokoáhya tsjenkayáxin chojni xikaha.

⁵² Kixin ijie xrankixín in'ó chojni naxa kjéhya jnkokoáhya tsjenkayáxin sín. Tí iní tsónínkakohen tí yaá. Tí yaá tsónínkakohen tí iní.

⁵³ A ntá tí it'é tsónínkakohen tí xjeen ntoa, la ko tí xjeen ntoa tsónínkakohen tí it'é. A ntá tí iné tsónínkakohen tí xjeen chjin, la ko tí xjeen chjin tsónínkakohen tí iné. Tí ich'ee tsónínkakohen tí tikíntee la ko tí tikíntee tsónínkakohen tí ich'ee tjan.

Tí nkehe chronkaxín nkehe tsonhen

(Mt. 16.1-4; Mr. 8.11-13)

⁵⁴ Ch'ín Jesús kjaxin ntáche ch'án tí chojni síin kixin:

—A ntá ts'ikonrá ts'aya tjuí tí tjiatóxin yaon, a ntá ntáchrórá kixin ts'aniá chrin, a ntá xikaha chaxin tsonhen ts'aniá chrin.

⁵⁵ A ntá tí chjéhe xrinto nó sur ntá ntáchrórá kixin tsosóa, a ntá xikaha chaxin tsosóa.

⁵⁶ Jahará ntoáhya tjenkayáxinrá. Ó nohará tjenkayáxinrá nkexrí tsonhen nkajní la ko chjasintajní. ¿Ntá nkexrí naxa tiénxinhyará nkehe sitónhen tí tjejorá jie?

Chrókóxakonhenni kjuaxróxin chrók'uejókoni tí sín nínkakonhenni (Mt. 5.25-26)

⁵⁷ ¿Nkekuènte tjéyáhyará jahará nkehe tí jína?

⁵⁸ Tí jnkojin nkebro tsjanchia jie sátjikoará ch'án nkayakon tí sín t'etoan na tí ntja ó chrónkakjórá ch'án kixin tsyóxin ts'ixinhya kjuanínkaon kixin sátsjikoahyará nkayakon tí ch'in juez, kixin tí ch'in juez chrók'uetóan ch'án kixin sátsjikoará tí sín comandante. A ntá tí ch'in comandante chróchr'áxanhanrá ch'án ntóechiso.

⁵⁹ Ntáxrjan kjá ní chrók'uaxrjéxinhyará kaín xín chichaon chonta.

13

T'ichjánxin chrókjuinkí chojni tí nkehe tjenkayáxin sín

¹ A ntá tí yaon k'uejó iso sín chénka sín tí ch'in Jesús kixin nkexrí kjuich'e ch'in Pilato k'uetóan its'en iso chojni tsíkjiixin estado Galilea k'uitji ijiné sín kójnkojieko tí ijiné tí ko k'óyan sín kjuanchexin sín kjuasáyé Dios.

² A ntá kjuátehe ch'in Jesús ntáchro ch'án kixin:

—¿A tjenkayáxinrá kixin xikaha kónhen tí sín tsíkjiixin estado Galilea kixin antsi jie jie chónata sín, a ntá tí í so sín chjasén sín la á náhi ní?

³ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha its'enrá kjaxin.

⁴ ¿A tjenkayáxinrá kixin antsi má k'uechónata jie tí dieciocho chojni ik'uén xrátja sín tí torre Siloé, a ntá tí í so sín chjasin Jerusalén la á náhi ní?

⁵ Ntáxrjan tíhi kjá náhi. A ntá jahará tí tjínkíhyará tí tjenkayáxinrá la kaín rá xikaha ts'itjáyanrá kjaxin.

Ch'in Jesús kjuíncheyóexin ch'án éxi ijnko nta to higo t'ónahya to

⁶ A ntá ch'in Jesús kjuíncheyóexin ch'án ntáchro ch'án kixin:

—Ijnko chojni chónata ijnko nta to higo nóntje ch'án. Ntá sákjuitsjehe ch'án á k'óna to. A ntá náhi k'uitjahya ch'án ninkehó to.

⁷ Ntá ntáche ch'án tí nkebro t'ayakonhen tí nonte a kixin: “Ó ní nánó t'inkatsjahá tí nta la k'uitjáhya ninkehó to higo. T'ochrínjian tí nta kixin tsoxéhe tí nonte a.”

⁸ A ntá tí ch'in t'ayakonhen nonte kjuátehe ch'án ntáchro ch'án kixin: “Áxri, títóhé ijie nánó kixin sintantá nche la ko tsjiko nchekátjehe.

⁹ A ntá tí xikaha áche ts'óna to. A ntá tí náhi na ntá ts'ochrínjian chr'éxin.”

Ch'in Jesús kjuínchekitóhe jína ijnko tjan níhi tí yaon t'ok'éhe chojni

¹⁰ Ch'in Jesús kjuák'e ch'án ijnko njnko kjuákoxin ch'án ijnko yaon t'ok'éhe chojni.

¹¹ Ntíha tjen ijnko chojni chjin chónata dieciocho nánó chonta tjan ijnko nchakuen tí jínahya kjuíncheníhi tjan tjesékoá tjan xitjahya xrentoá tjan.

¹² A ntá ch'in Jesús k'uikon ch'án kixin xikaha tjen tjan ntá k'uíyehé ch'án tjan ntáchro ch'án kixin:

—Naná, ó kjuíinhan tí chin chonta —ichro ch'án.

¹³ A ntá jehe ch'án kjuak'etja tja ch'an chrítaón tí jehe tjan a ntá tuénxin xrentoá tjan ntá chjéhe tjan kjuasáyé Dios.

¹⁴ A ntá tí ch'in t'etóan kuènte njnko kónínkaon ch'án kixin ch'in Jesús kjuínchekitóhe jína ijnko chojni ijnko yaon t'ok'éhe sín, ntá ntáche ch'án tí chojni a kixin:

—Sín injon yaon mé chrók'axrjenixin xra chrók'uinkará chrókuitóhará jína na jehya tí yaon t'ok'éheni chrókónhen tíha —ichro ch'án.

¹⁵ A ntá Inchéni kjuátehe ch'án ntáchro ch'án kixin:

—Ntoáhya tjenkayáxinrá jahará. ¿A chrókjuasintankeehyará tí koxintaará la o tí kolóchoará chrókjuikoará va nta tí yaon t'ok'éheni ní?

¹⁶ A ntá tí tjan mé tsík'axrjenixin tí ch'in Abraham na mé ó chónata dieciocho nánó tsíkjinchenteto ch'in Tsochren tí jehe tjan, ¿a jehya jína kjaxin chrókjuasintanká tí nkehe tsíkóntetoxin tjan tí yaon t'ok'éheni? —ichro ch'án.

¹⁷ Ntá xikaha ichro ch'in Jesús la ntá kaín tí sín kónínkakonhen ch'án la kósuèhe sín. A ntá kaín tí chojni síin ntaha chéhe sín k'uikon sín kaín tí kjuaxroan jie kjuákoxin tí jehe ch'án.

Kjuíncheyóëxin ch'ín Jesús éxí ijnko tje ntsí kuènte nta mostaza
(Mt. 13.31-32; Mr. 4.30-32)

¹⁸ Ntá ntáchro ch'ín Jesús kixin:

—¿Nkehe tóyóëxin tí t'etqan Dios tí kjuachaxin kuènte ch'án la ko nkehe jína chrókjuíntayóaxian?

¹⁹ Éxí yóhe ijnko tje kuènte nta mostaza k'ueñkã ijnko chojni nqntee ch'án. A ntá tió k'uánki kóyóhe éxí ijnko nta jié. A ntá tí koxroxé xritjaká mé kui va kjuich'éna va kãké va chrík'á tí chaon tí nta.

Ch'ín Jesús kjuíncheyóëxin éxí tí xroqan t'ánkixin niqtja
(Mt. 13.33)

²⁰ Ntá ntáchro ch'ín Jesús inaá kixin:

—¿Nkehe chrókjuíntayóaxian tí t'etqan Dios tí kjuachaxin kuènte ch'án?

²¹ Éxí yóhe tí xroqan nchek'ánki niqtja kjuinkíkjanxin ijnko chojni chjin iní medida harina. A ntá tí ch'o la k'uánki.

Tí puerta tekahya
(Mt. 7.13-14, 21-23)

²² K'uátsínka ch'ín Jesús kaín chjasin hyé la ko kaín chjasin ntsíntsi nkákjako ch'án tí tan jína kixin jehe ch'án ó sátsji ch'án chjasin Jerusalén.

²³ A ntá ijnko nkexro kjuanchankí ch'án kixin:

—Ínchéni, ¿á tsjéhya tí sín tsaá? —ichro ch'án.

A ntá jehe ch'án kjuátehe ch'án ntáchro ch'án kixin:

²⁴ —Tóxakonhanrá t'ixënxínrá tí puerta tekahya kixin nchónhya sín tjinkaon sín chrók'uíxenhén sín, kjánchó tjachahya sín.

²⁵ A ntá tí ínché nchia ts'ikjéhe ch'án tí puerta. A ntá chr'ëxin jahará ts'ejorá ntója ts'ëyará ts'ínkará tí puerta tsontáchrórá kixin: “Tadá, takítjehé nchia”, tsixrorá. Kjánchó jehe ch'án tsjatehe ch'án tsontáchró ch'án kixin: “Nonahya nketí k'uinkaxínrá jahará”, tsixro ch'án.

²⁶ A ntá tsjankixínrá tsontáchrórá kixin: “Kjóneni la ko k'uíni jnkokoá la ko jaha kjuákoxian tí ntajjinni”, tsixrorá.

²⁷ A ntá jehe ch'án tsjatehe ch'án tsontáchró ch'án kixin: “Ó ntáxrjan janhan kixin chonhya tí jahará. Tjtohérá tí janhan sájtirá ókjé kaín tí jahará jínahya kjuich'erá.”

²⁸ Ntaha tsotsjankará la ko sintetaónrá nénorá tió ts'ikonrá kixin ch'ín Abraham la ko ch'ín Isaac la ko ch'ín Jacob la ko kaín tí sín k'uéchronkaxín itén Dios mé tjejó sín tí tjen Dios t'etqan ch'án, a ntá jahará la ts'axrjéxinrá ntója ntiha.

²⁹ Tsjixín chojni nó tjtoxin yaon la ko nó tjiátóxin yaon la ko nó norte la ko nó sur ntá ts'ejótjaxín sín tí tjen Dios t'etqan ch'án la sine sín.

³⁰ A ntá iso tí sín k'uítuenhen senó la mé ts'etqan sín, la ko iso tí sín k'uék'etqan senó la mé ts'ítuenhen sín.

T'ává ch'ín Jesús
(Mt. 23.37-39)

³¹ A ntá tí yaon a ikui iso sín fariseo ntáche sín tí ch'ín Jesús kixin:

—Sátjixian ntihi kixin ch'ín Herodes tjinkaon chrók'oyán ch'án tí jaha —ichro sín.

³² A ntá jehe ch'án kjuátehe ch'án ntáchro ch'án kixin:

—Sátjirá chenkará tí ch'ín jínahya ch'ía kixin: “Ijie la ko ntóye tsakítsje nchakuen tí jínahya la ko sintakítóhã chojni níhi jína la ntá tí níxin yaon a ntá tsjixínna tí xrã kuèntana,” tsixrorá.

³³ Kjánchó t'ichjánxin kixin naça sájtija tí jie yaon la ko ntóye la ko tí yaon chr'ëxin kixin t'ichjánxin kixin ijnko nkexro chrónka itén Dios chrók'uenxín ch'án chjasin Jerusalén.

³⁴ Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínktsará. Imá itsje veces tjínkãvan chrókójnkotsérá la chrók'uáyakonhanrá éxí ijnko cochiká mé t'ayakonhen xjeen va chrínki kanenge va mé xíkaha tjínkãvan chrók'uáyakonhanrá tí jahará. Kjánchó jahará la tjínkãkonhyará xíkaha.

³⁵ Chrókónohará kixin Dios la tsítóhe ch'án tí jahará la ts'ikonhyará tí janhan tsjixrakájia tí yaon tsontáchrórá kixin: “Jína tí nkexro kjuixín kjuachaxin ihnjé Ínchéni Dios.”

14

Ch'ín Jesús kjuínchekitohe jína ijnko nkexro tsik'atjoyé kuénté

¹ A ntá tí yaon t'ok'éhe sín sákjuí ch'ín Jesús ntqee ijnko ch'ín fariseo t'etqan kixin ntaha sineko sín ch'án. A ntá tí í so sín fariseo tinkáchréhe sín tsotsjehe sín nkehe sich'e ch'án.

² A ntá ntiha ntoí chók'ëxin tí tjen ch'án itjen ijnko chojni tsik'atjoyé kuénté.

³ A ntá ch'ín Jesús kjuanchankíhi ch'án tí sín maestro tjako tí ley la ko tí sín fariseo kixin:

—¿A síin kjuachaxin sinchekitoheni jína ijnko chojni níhi tí yaon t'ok'éhenei q náhi? —ichro ch'án.

⁴ A ntá jehe sín la táni sín. A ntá ch'ín Jesús sákjuiko ch'án tí ch'ín níhi la kjuínchekitohé ch'án jína la k'uetuénhen ch'án kixin sátsji ch'án.

⁵ A ntá ntáche ch'án tí sín fariseo kixin:

—Jnkojín tí jahará chontará kolóchoará q koxíntaará chrókjuítsinkáya va tòye ¿á senóhya chrókuaikítsjetaónrá va tòye kjónté yaon t'ok'éhenei ní? —ichro ch'án.

⁶ A ntá jehe sín ninkehó kjuáteehya sín kixin xikaha ichro ch'án.

Tí sín tsík'iyehé sín sátsji sín kia tsíkótehe chojni

⁷ Ntá k'uikon ch'ín Jesús kixin tí sín tsíkóchjina tí kia a kjueyá sín silla náxrjón ts'ejóya sín tí tjen mesa ntá kjuíncheyóexin ch'án ntáchro ch'án kixin:

⁸ —Tió jnkojín nkexro ts'iyaha sín kixin tsjasán ijnko kia tsotehe chojni la tjéyáhya tí nta silla kuènte tí sín t'etóan kixin ách'e tsi jnkojín nkexro antsí t'etóan

⁹ a ntá tí nkexro k'uíyahará yóirá itsi ch'án tsjanchará ch'án kixin t'ínkátjénxian tí tjen jaha méhe kixin ntaha tsjak'e í jnko nkexro, tsixro ch'án. Ntá tsosuaáha sátsjia tsjak'etjaxian tí silla kjuixixín.

¹⁰ Íchá jína tíó t'iyaha sín chrókjuak'etjaxian tí silla tjetuanhya, kixin ntá chrókui tí ch'ín tsík'iyaha tsontáchro ch'án kixin: “Jína tjoni la t'atsinka tjak'etjaxian tí silla antsí náxrjón”, kixin ntaha tsjikosáyaha sín nkayakon kaín tí sín ts'ejótjaxínkoa sín ntiha.

¹¹ Kixin tí nkexro sinchehnkehe asén kixin imá chrók'uetóan ch'án la mé chr'éxin Dios tsjanjonhya kjuachaxin kixin ts'etóan ch'án. A ntá tí nkexro k'uék'etóanhya la mé chr'éxin Dios tsjanjon kjuachaxin kixin antsí ts'etóan ch'án.

¹² Kjaxin ntáche ch'án tí nkexro tsík'iyehé ch'án kixin:

¹² —Tió tsjásian kia it'o yaon la q tsonjin la t'iyééhya tí sín choxian la ko tí sín kichuá la ko tí sín náxa kjéhya la ko tí sín rico chjino ntóa, kixin jehe sín la chr'éxin ts'iyaha sín inaá la xikahó la ó kjuixín kjan tí k'uiyehé sín.

¹³ Íchá jína chrók'uiyehé tí sín nóa la ko tí sín tsixénká toté sín la ko tí sín xitjahya tji la ko tí sín t'ikonhya.

¹⁴ Ntá chrókócháha jaha kixin jehe sín xitjahya ts'iyaha sín tsjasin sín kia. A ntá tíó tsoxechónjian tí sín jína la mé Dios mé tsjenkaha kixin kjuínkítsa tí jehe sín.

Ch'ín Jesús kjuíncheyóexin ch'án éxi ijnko kia jíe

¹⁵ A ntá kuínhin ijnko tí sín tjejótjaxín sín chjino tí mesa, a ntá ntáche ch'án tí ch'ín Jesús kixin:

—Náxrjón tí sín sine niqtja tí tjen Dios t'etóan ch'án —ichro ch'án.

¹⁶ Ntá ntáchro ch'ín Jesús kixin:

—Jnko chojni kjuasin ijnko kia jíe ijnko kónjín la k'uiyehé ch'án nchónhya chojni tsi sín tí kia a.

¹⁷ A ntá ó kuichjina tí hora sine sín ntá k'uetuénhen ch'án ijnko chojni ch'ehe ch'án xra tsjichenka ch'án kaín tí sín ó tsík'iyehé ch'án kixin chrókóchjina sín kixin ó tjejóchónhen kaín nkehe sine sín.

¹⁸ Ntá kaín sín kjuankixin sín chrónóa sín kixin xitjahya tsjiji sín sine sín. A ntá tí ch'ín saoxín kjuítsjehe ch'án ntáchro ch'án kixin: “Na ntá k'uenani ijnko nonteeni la t'ichjánxin tsjitsjeheni la xitjahya tsjijini tí t'iyeheni ch'án, ntá chénka ch'án kixin chrókónínkakuenhyani ch'án”, ichro ch'án.

¹⁹ A ntá í jnko ch'ín ntáchro ch'án kixin: “Na ntá k'uenani in'ó yunta koxinta, a ntá t'ichjánxin tsotsjeheni á jína ch'e va xra, ntá chénka ch'án kixin chrókónínkakuenhyani ch'án”, ichro ch'án.

²⁰ A ntá í jnko ch'ín ntáchro kixin: “Na ntá kóteheni, méxra xitjahya tsjijini”, ichro ch'án.

²¹ Ntá ó kjan tí ch'ín ch'e xra chénka ch'án tí ch'ín lámo kaín tí nkehe tsintáchro sín. A ntá tí ch'ín lámo kuínhin ch'án xikaha la ntá kónínkaon ch'án ntá ntáche ch'án tí ch'ín ch'ehe ch'án xra kixin: “Tjoka sátsjia kaín ntja chjasin í la tsjikoa ntihi tí sín nóa la ko tí sín tsixénká toté sín la ko tí sín xitjahya tji la ko tí sín t'ikonhya”, ichro ch'án.

²² A ntá chr'éxin ntá kjan tí ch'ín ch'e xra chénka ch'án tí lámo kixin: “Ó kjuínchexiteyáni xikaha kuétuénhéni la kjónté náxa xranka chrókui chojni”, ichro ch'án.

²³ A ntá tí ch'ín lámo ntáche ch'án tí ch'ín ch'ehe ch'án xra kixin: “Sátsjia kaín ntja jíe la ko kaín ntja ntsí la tétuénhén chojni síin chrókui sín chrók'uíxixenhen nchia ntóna náxa xranka.

²⁴ Kixin ntáxrjan kixin nijnko tí sín k'uíyahá senó chrókui sín chrókjone sín tí nkehe chrótjahá sín”, ichro ch'án.

Ixra tsochréheni Cristo

²⁵ Nchónhya chojni nkáchrehe sín tí ch'ín Jesús, ntá jehe ch'án kuinkátjía ch'án kotónhen ch'án ton ch'án ntáchro ch'án kixin:

²⁶ —A ntá jnkójín chojni tsotjinkaon tsochréhe tí janhan la antsí má tjetóan chrótjuana sín la kjónté kénhyó chrótjuéhe it'é sín la ko iné sín la ko ichjién sín la ko xjeen sín la ko kichó sín ntoa la ko kichó sín chjin la ko kjónté kénhyó chrótjuéhe asén sín. A ntá náhi la xitjahya ts'óna discípulo kuéntana jehe sín.

²⁷ Tí nkexro tsamáhya tí ntacruz kuènte sín tsochréhya sín tí janhan la xitjahya ts'óna discípulo kuéntana.

²⁸ A ntá jnkójín tí jahará chrókjuich'énará ijnko tjat'ó nteto, zá senóhya chrókjuenkayáxinrá kixin nkekjaín chichaon ts'ichjánxin ts'ixenhen chrótsjehérá á nchoxon chrókjuixixin chrók'ónaxin tí tjat'ó a?

²⁹ A ntá tió tsjankixínrá s'ich'énará tí tjat'ó ntá chr'éxin xitjahya tsjixin s'ich'énará, ntá kaín chojni ts'ikon sín tsjanoará sín

³⁰ tsontáchro sín kixin jaha kjuankíxian kjuich'éna, a ntá jie xitjahya s'inchekjixian ts'óna, tsixro sín.

³¹ A ntá jnkójín tí ch'ín rey t'etóan tsjanjonko í jnko rey t'etóan kjáxin násenó chrókjuenkayáxin ch'án kixin ite mil soldado chóna ch'án, á chrókjuacha ch'án chrókjuacháxin ch'án tí kán mil soldado chóna tí í jnko ch'ín t'etóan.

³² A ntá tí chrókjuachahya ch'án chrókjuanjonko ch'án tí í jnko ch'ín rey, ntá naxa ikjín tjeen ch'án la íchá jina chróchr'án ch'án ijnko nkexro tsochronógehe ch'án kixin chrók'uíxinhya kjuanínkaon.

³³ Mé xikaha jnkójín tí jahará tí tsitóehyará kaín nkehe ntoáhya tjenkayáxinrá xitjahya ts'óna discípulo kuéntana.

*Tí xjnta tsik'ánkéhé tí jní
(Mt. 5.13; Mr. 9.50)*

³⁴ A ntá jina tí xjnta, kjánchó tí chrók'uánkéhé tí jní la ntá xitjahya chrókójní inaá.

³⁵ Ntá tí xikaha la ní tí nche xitjahya tsjiko la chrók'ónahya nkehe la chrok'uitjini ntója. Tí nkexro tjinkaon chrókuinhin la chrókuinhin kaín tíhi —ichro ch'ín Jesús.

15

*Kjuíncheyóexin ch'ín Jesús éxi ijnko kolélo tsik'itjáyán
(Mt. 18.10-14)*

¹ Kaín tí sín nchekjènkí la ko tí sín chóna nchónhya jie kóchjinehe sín tí ch'ín Jesús kixin tjinkaon sín chrókuinhin sín tí nkehe tjechronka ch'án.

² A ntá tí sín fariseo la ko tí sín maestro tjako tí ley kjuankíxin sín tjonta sín ch'án ntáchro sín kixin:

—Tí ch'ín i la kjónté tí sín chóna nchónhya jie la t'ito ch'án la ko neko ch'án —ichro sín.

³ Ntá ch'ín Jesús kjuíncheyóexin ch'án ntáchro ch'án kixin:

⁴ —A ntá jnkójín tí jahará, tí chontará ijnko ciento kolélo ntá chrók'uitjáyán ijnko va, zá chrók'uitóehyará tí noventa y nueve va tí nteje ó, a ntá á chrók'juikjéyáhyará tí ko tsik'itjáyán hasta chrók'uitjájjará va ní?

⁵ A ntá tí ts'itjára va ntá tsamará va tsocháhará.

⁶ Ntá tió tsokjanrá ntóará ntá ts'jyehérá kaín tí sín choxínrá tjórá jina la ko tí sín chjinaxón ntóará ntá tsontácherá sín kixin: “Tsochéhèni ts'ejóni jie kixin ó k'uitjá tí kolélo tsik'itjáyán.”

⁷ Na mé kjáxin xikaha tsotjonkará kixin antsí tsochéhe kaín tí sín siín nkaya nkajní tió ijnko chojni tsítóhe kaín tí jie tsikjenkayáxin ch'án. Ntá kánhyó tsochéxin tí sín nkaya nkajní kixin tí noventa y nueve chojni jina t'ichjánxienhya chrókjuinkí sín tí nkehe tjenkayáxin sín.

Kjuíncheyóexin ch'án éxi chichaon k'uitjáyán

⁸ A ntá ijnko chojni chjin chóna ite chichaon, a ntá tí chrókjuinçek'itjáyán tjan ijnko tí chichaon a la, zá chrókjuinçek'ákjenhya tjan xrohi kixin chrókjuéyáxin tjan la ko chrok'uánjón tjan tí nchia kixin chrótsjehe tjan jina hasta chrók'uitjajia tjan?

⁹ A ntá tió chrók'uitja tjan la ts'iyehé tjan kaín tí chojni chjin jina tjo tjan la ko tí sín chjinaxón nteje tjan la ntá tsontáche tjan sín kixin: “Tsochéhèni ts'ejóni kixin ó k'uitjani tí chichaon kjuínçek'itjáyanni.”

¹⁰ Ntá kjáxin xikaha tsotjonkará kixin imá tsochéhe kaín tí sín ángel kuènte Dios tió ijnko chojni tsítóhe kaín tí jie tsikjenkayáxin ch'án.

Ch'ín Jesús kjuíncheyóexin ch'án éxi ijnko ch'ín kuicháxinhin chichaon

¹¹ Kjáxin ntáchro ch'ín Jesús kixin:

—Ijnko nkexro chóna yaá xjeen ch'án.

¹² A ntá tí ch'ín tsoyo ntáche ch'án tí it'é ch'án kixin: "It'eni, chjehéni kaín nkehe chróchjehéni." A ntá tí it'é sín k'óchrít'óhe ch'án tí nkehe chóna ch'án. A ntá tí ch'ín tsoyo k'uáyéhe tí nkehe kuènte ch'án.

¹³ A ntá kánhyó tsjé yaon chr'éxin tí xjeen ch'án tsoyo kjuíncheki ch'án kaín nkehe tsik'áyéhe ch'án, ntá sákjuiko ch'án tí chichaon sákjuí ch'án ókjé chjasin kjín. A ntá ntiha kjuínchénhen ch'án kaín chichaon chóna ch'án kixin jehya tí jina kjuích'e ch'án.

¹⁴ A ntá tió kjuixin kjuèhe ch'án tí chichaon kuicháxinhin ch'án ntá xringhya kókjinta tí chjasin ntiha ntá kohya nkehe sine kaín sín. A ntá jehe ch'án kjuankixin ch'án t'enxín ch'án kjinta.

¹⁵ Ntá jehe ch'án sákjuíkjejá ch'án xra sich'e ch'án. Ntá chjasin ntaha tjen ijnko ch'ín kjuanchehe ch'án xra. Ntá tí ch'ín a kjuanjon ch'án xra ntá k'uetóan ch'án kixin sátsji ch'án nontee ch'án kixin ntiha ts'ayakonhen ch'án cochíno.

¹⁶ A ntá jehe ch'án t'enxín ch'án kjinta ntá tjinkaon ch'án chrókjóne ch'án tí nkehe ine tí cochíno kixin ninxeró tí ntiha chrohya tsjanjon nkehe sine ch'án.

¹⁷ Ntá jehe ch'án kjuák'e ch'án kjuenkayáxin ch'án kixin: "Nchónhya chojni siín ntóe t'aná ch'e sín xra la chóna sín nkehe sine sín. Ntá janhan tjet'énxian kjinta ntihi.

¹⁸ Ntá jie tsokjan tí tjen t'aná la ntá tsontáxjan kixin: It'eni, kjuasinni jie kuítekakuenhya It'eni nkaya nkajni la ko kjuasinhanni jie kuítekakuanhyani tí jaha.

¹⁹ Tósuèheni tsontáchrúa kixin xjaan tí jeheni. Ch'énani éxi ijnko chojni t'aha xra", mé xikaha kjuenkayáxin ch'án tsontáchró ch'án.

²⁰ Ntá kuákja ch'án ntja xrakoa ch'án tí ntóe it'é ch'án.

A ntá kjónté naxa kjín kui ch'án a ntá tí it'é ch'án la ó tsik'ikon ntá kuíkonóhe ch'án tí xjeen ch'án. Ntá kuínká ch'án la kjuíxinhin ch'án ntja la kjóa ch'án la ko kjóneko ch'án kochíto.

²¹ Na ntá ntáchró tí xjeen kixin: "It'eni kjuasinni jie kuítekakuanhyani Dios la ko kjuasinhanni jie kuítekakuanhyani tí jaha. Tósuèheni tsontáchrúa kixin xjaan tí jeheni", ichro ch'án.

²² A ntá tí it'é ch'án k'uíyehé ch'án tí sín ch'ehe ch'án xra ntáchró ch'án kixin: "Xrákoará tí ka ántsi jina nchek'ínkayará ch'án la ko chr'axenhenrá dedo tja ch'án ijnko koch'áninko la ko nchekjankará ch'án totjoa.

²³ La ko tjicakjínrá koxintáxjan tsanka la t'oyánrá va kixin sinekoni ch'án tsjasinhinni ch'án kia.

²⁴ Kixin tí xjanna i la éxi ó tsík'en ch'án xikaha ntá jie la éxi ó xechón ch'án la tsik'itjáyan ch'án la ntá jie la ó kónoxín ch'án inaá", ichro ch'án. Ntá kjuankixin sín kjuasin sín kia.

²⁵ A ntá tí xjeen ch'án sao la nonte tjech'e ch'án xra. A ntá tió kjan ch'án kui ch'án chjinxaxon nchia ntá kuínhin ch'án siín són la ko ité sín.

²⁶ Ntá k'uíyehé ch'án ijnko ch'ín ch'e xra ntá kjuanchankíhi ch'án kixin nkekuènte xikaha sitónhen.

²⁷ A ntá tí ch'ín a ntáchró ch'án kixin: "Kíchuá la ó tsikjan. A ntá it'á la k'uetóan k'uén koxintáxjan tsanka kixin jina xikjan ch'án", ichro ch'án.

²⁸ A ntá tí ch'ín sao la kónínkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrjexin nchia chronóhe ch'án kixin chrók'uixenhen nchia.

²⁹ Kjánchó jehe ch'án kjuátehe ch'án ntáche ch'án it'é ch'án kixin: "Nchónhya nánó t'ahani xra, la xráxín kuítekakonhanni kaín nkehe kuétoan la kjuánjonhya nijnko kotèntso chrókjóneki tí sín chóxinni.

³⁰ A ntá jie ikui tí xjaan i kjuínchek'itjáyan ch'án kaín nkehe chjehé ch'án kjuínchek'itjáyanxín ch'án chojni chjin. A ntá jie ikjan ch'án la naxa t'oyán koxintáxjan tsanka", ichro ch'án.

³¹ A ntá ntáchró tí it'é ch'án kixin: "Xjeenni jaha, xráxín tjejóko kíchó ni ntihi. Kaínxín nkehe kuéntana la kuénta jaha kjaxin. ¿Nkekuènte ninkávan?

³² A ntá jie la t'ichjánxin tsjasinhinni kíchuá kia tsóchéheni kixin éxi tsík'en ch'án la ntá jie la ó tsixechón, la tsík'itjáyan ch'án xikaha la ntá jie la kónoxín ch'án inaá."

16

Ch'ín Jesús kjuíncheyóexin ch'án éxi tí ch'ín k'uáyéhe xra la ntá kjuích'ehya xra jina

¹ Kjaxin ntáche ch'ín Jesús tí sín k'uájiko ch'án kixin:

—Kjuák'e ijnko ch'ín lamó ricó chóna ch'án ijnko nkexro chjéhe ch'án kjuachaxin kixin ts'etóan tsonhen xra. Ntá kui ijnko nkexro chénka tí lamó kixin: "Tí nkexro t'etóan nchexénhen ch'án tí nkehe chonta", ichro ch'án.

² A ntá tí ch'ín lamó k'uíyehé ch'án tí ch'ín ch'ehe ch'án xra ntáche ch'án kixin: "¿Á chaxín xikaha ch'e kixin xikaha ichro sín? A ntá jie tsjánjuan jaha kuénta tí xra kjuích'e kixin ijie í sích'ehya xra tsétoan ntihi", ichro ch'án.

³ A ntá tí ch'ín t'etgoan tónhen xra kjuenkayáxin ch'án kixin: “¿Nkehe chrókjuít'a jie kixin tí lamó la í tsjanjonhya ch'án xra sít'a? La ko janhan la chontahya fuérza sít'a xra nontee chojni la ko tósuaña kixin chrók'uaíja chrókjuánchák'á nkehe.

⁴ Ó nòna nkehe sít'a kixin ntá tsochonta nkexro tsjanjon kjuachaxin tsjak'é ntq̄e sín tí í tsochontahya xra sít'a”, ichro tí ch'ín t'etgoan.

⁵ Ntá k'uíyeh̄e ch'án nkjojnko nkjojnko tí sín síkhe tí lámq̄e ch'án. A ntá tí ch'ín saó kui ntá tí ch'ín t'etgoan mé kjuanchankíhi ch'án kixin: “¿Nkekjaín tjasikéhé lámq̄éni?” ichro ch'án.

⁶ A ntá jehe ch'án kjuátēhe ch'án ntáchro ch'án kixin: “Síkani ijnko ciento ntabarril aceite”, ichro ch'án. A ntá tí ch'ín t'etgoan ntáchro ch'án kixin: “Ntíhi tjen xroon tsjénkaxian a. Tjak'e nonte tjoka la ch'ena í jnko xroon la í cincuenta ó ténixián”, ichro ch'án.

⁷ Ntá chr'éxin la kjuanchankíhi ch'án í jnko nkexro kixin: “A ntá jaha, ¿nkekjaín tjasiká?” ichro ch'án. Ntá ntáchro ch'án kixin: “Ijnko ciento medida noatrigó síkani”, ichro ch'án. A ntá ntáchro tí ch'ín t'etgoan kixin: “Tí xikaha la ntíhi tjen tí xroon tsjénkaxian. A ntá jie la ch'ena ochenta ó”, ichro ch'án.

⁸ A ntá tí ch'ín lamó kjuátsoan ch'án kixin kjónté jehya xra jína kjuich'e tí ch'ín t'etgoan kjuich'ehe ch'án xra la kjánchó tí kjuich'ia ch'án la antsi nohe ch'án kjuich'ia ch'án. Méxra tí sín chjasintajni antsi nohe sín ch'íyeh̄e kichó sín, a ntá tí sín ixri tí t'inkaséyan la xikahya chrókjuenkayáxin sín chrókjuich'ia sín, chrókjuenkayáxin sín tí jína.

⁹ Janhan la tétuanhanrá kixin chrókucháxinhanrá tí chichaon siin chjasintajni kjónté tjuáhya kixin tsjinkitsará chojni kixin ntá itsjórá sín jína. A ntá tió tsjeje kaín chichaon ntá jehe sín ts'ejóchónhen sín nkaya nkajni ts'áyáhará sín jnkochríxin.

¹⁰ Tí nkexro k'uáyakonhen tí nkehe chóna kjónté tsjéhya la kjaxin chrókjuacha chrók'uáyakonhen itsjé nkehe chróchóna. A ntá tí nkexro kjuachahya k'uáyakonhen tí nkehe tsjéhya chóna la kjaxin chrókjuachahya chrók'uáyakonhen tí tsjé nkehe chróchóna ch'án.

¹¹ Mé xikaha tí xitjahya t'ayakonhénra tí chichaon kuènte chjasintajni ntíhó la, ¿ntá nkexri chrók'uayéhérá nkehe tjete chaxin kuènte nkaya nkajni?

¹² Mé xikaha tí kjuachahyará k'uáyakonhénra tí chichaon kuènte ókjé nkexro, ¿ntá nkexro chrójtáhará jahará tí nkehe chaxin tjete chrók'uáyakonhénra?

¹³ Nijnko nkexro xitjahya sich'ehe yaá lamó xra kixin ijnko la tsonínkakonhen ch'án la ko tí í jnko tsotjuèhe ch'án, o ijnko la tsitekakonhen ch'án, la tí í jnko la tsitekakuenhya ch'án. Xitjahya chrókjuich'ehe chojni xra Dios tí tjinkaon sín tsochóna sín itsjé chichaon —ichro ch'án.

¹⁴ A ntá tí sín fariseo imá kóxrjínhin sín chichaon, ntá kuínhin sín kaín tíha nkeri ichro ch'ín Jesús, ntá kjuanoá sín ch'án.

¹⁵ Na ntá ch'ín Jesús ntáche ch'án sín kixin:

—A ntá jahará tjinkáonra chrók'uejóxinrá jína nkayakon chojni. A ntá Dios la chóxin ch'án asánra. A ntá tí nkehe imá tóxrjínhin ch'e chojni la Dios la tóxrjénhya ch'án.

Tí ley la ko tí t'etgoan Dios tí kjuachaxin kuènte ch'án

¹⁶ Naxá kjuakohya ch'ín Juan la k'uékjako sín tí ley kuènte ch'ín Moisés la ko tí nkehe k'uékjin tí sín k'uéchronka itén Dios ósé. A ntá kui ch'ín Juan la chrónka ch'án tí tan jína nkexri ts'etgoan Dios tí kjuachaxin kuènte ch'án ntá kaín chojni imá tjinkaon sín chrókjuacha sín chrók'uejó sín tí tjen Dios t'etgoan ch'án.

¹⁷ Antsi xrahya chrók'uitjáyán tí nkehe siin nkajni la ko chjasintajni. A ntá xitjahya kixin chróxitayáhya kjónté ijnko nkehe ntsí t'etgoan tí ley.

Ch'ín Jesús tjako ch'án kixin chrókjuákēhya kichó chojni

(Mt. 19.1-12; Mr. 10.1-12)

¹⁸ A ntá ijnko chojni tsjakehé ichjién la ntá tsakja ch'án í jnko chojni chjin la ijje tíha. A ntá tí ch'ín tsakja ijnko tjan tsíkitsinkehe la kjaxin ijje tíha.

Tí ch'ín rico la ko tí ch'ín Lázaro

¹⁹ Ntá kjuák'e ijnko ch'án imá rico ch'án la ko k'uitsá ch'án ka imá tjete náxrjón kjátse tíe la ko kaín yaon kjuasin ch'án kia.

²⁰ A ntá ntója ntq̄e ch'án kjuák'etjaxin ijnko ch'ín nòna mé it'in ch'án Lázaro tjanchak'á ch'án la ko níhi ch'án tsichr'enka kuènte ntq̄e ch'án.

²¹ A ntá tí ch'ín nòna la imá kjuák'e asén ch'án chrókjónē ch'án la ko chrókókjexin ch'án tí nkehe tot'q̄ tsjixènjinkixin mesa kuènte tí ch'ín rico. A ntá tí konjá la kjuamá va tí tosóa chóna ch'án.

²² A ntá ijnko yaon mé ik'uén tí ch'ín nòna. A ntá tí sín ángel mé sákjuiko ch'án tí náxrjón tjen ch'ín Abraham. La ko kjaxin ik'uén tí ch'ín k'uérko la sákjuikjavá sín ch'án.

²³ Ntá tjen ch'án tí sátsji tí sín tsík'en tjetjasóte ch'án. Ntá konta ch'án k'uikon ch'án kixin ikjín náxřjón tjen ch'ín Abraham tjeke ch'án tí ch'ín Lázaro.

²⁴ Ntá k'uèya tí ch'ín k'uéchonta tsjé nkehe ntáchro ch'án kixin: "It'eni Abraham, tikonóana tétuēnhén tí ch'ín Lázaro kixin sinchekjataxín ch'án kóhe dedo tja ch'án inta ntá tsi ch'án tsjak'etak'á ch'án nejen kixin tsouxrehe kixin tjinahya sóa tí xrohi síin ntihi", ichro ch'án.

²⁵ Kjánchó ntáchro ch'ín Abraham kixin: "Xjeenni, xráxinkávan kixin tió kjuák'e chjasintajni na ó k'uayéhe itsjé nkehe náxřjón. A ntá ch'ín Lázaro mé k'uáyéhe ch'án nkehe náxřjónhya. A ntá jie ntihi kjuaxróxin tjen ch'án, a ntá jaha tjetjasótia méhe.

²⁶ A ntá kjaxin jnkosiné tjen tsaka imá jie xitjahya ts'átöye tí sín síin ntihi tsjihya sín tí tjen jaha la ko kjaxin tí sín síin méhe xitjahya ts'átöye sín itsji sín ntihi", mé ichro ch'ín Abraham.

²⁷ A ntá tí ch'ín k'uériko mé ntáchro ch'án kixin: "Ntá xrjanóaha jaha It'eni Abraham kixin tétuēnhén tí ch'ín Lázaro sátsji ch'án ntöe t'aná

²⁸ kixin ntaha kuitöhe in'ó tí sín kichiná, ntá chróchenka ch'án sín kixin chrókuihya sín ntihi chrókjuasótehya sín kixin imá náxřjónhya ntihi", mé ichro ch'án.

²⁹ Kjánchó kjuátöhe ch'ín Abraham ntáchro ch'án kixin: "Ó chóna sín tí nkehe tsíkjin ch'ín Moisés la ko tí sín k'uéchronka itén Dios ósé a. Chrókuinhin sín tí nkehe tsintáchro tí sín a", ichro ch'án.

³⁰ Ntá ntáchro tí ch'ín a inaá kixin: "Náhi, It'eni Abraham. Chrókójina sáchrókjuitsjehe ijnko chojni tsík'en ntá chrókuitekaon sín chrókuítóhe sín ijé sín", ichro ch'án.

³¹ Ntá ntáchro ch'ín Abraham kixin: "Tí tsitekakonhya sín tí nkehe tsintáchro ch'ín Moisés la ko tí nkehe tsintáchro tí í so sín tsichronka itén Dios ósé, ntá kjaxin tsitekakonhya sín kjónté chróxechón ijnko chojni tsík'en chrókjuichronka inaá", ichro ch'án.

17

Tí kjuaxikaon naxa tjasin chojni jie

(Mt. 18.6-7, 21-22; Mr. 9.42)

¹ Ch'ín Jesús ntáche ch'án tí sín k'uájiko ch'án kixin:

—Xráxin síin nkehe tsjasixín chojni jie. Kjánchó nòa tí nkexro tjasin tí nkehe tsjasixín chojni jie.

² Íchá jina chrókjuincheteyá sín ch'án ijnko xřo tsík'óna xřochře chrókjuikákánkí sín ntayaon kixin tjasin ch'án tí nkehe tjasixín jie ijnko chánjan naxa noehya.

³ Tóxakonhanrá kixin xikahya chrókjuásinrá nkehe.

A ntá tí kichuárá chrókjuasinhanrá ch'án ichrén jie chrónixjehérá ch'án chróchenkará ch'án kixin jehya jina tí xikaha kjuít'ahará ch'án. A ntá tí chrókuitekaon ch'án chrókjuitoxinhin ch'án tí tjenkayáxin ch'án, ntá chrók'uitjáyanhanrá tí nkehe kjuít'ahará ch'án.

⁴ Kjónté chrókjuasinhanrá ch'án jie yato veces jnkokoá yaon la ko yato veces chróntáchro ch'án kixin í xikahya tsjasin ch'án jie inaá, la t'ichjánxin tsitjáyanhanrá tí nkehe kjuít'ahará ch'án tí xikaha ntáchro ch'án.

Tí kjuachaxin chóntani kixin tinkáchónkini Cristo

⁵ Ijnko yaon tí sín k'uájiko Ìnchéni ntáche sín ch'án kixin:

—Tjinkitsani kixin antsi chrókuinkáchónkini tí jaha —ichro sín.

⁶ A ntá Ìnchéni ntáchro ch'án kixin:

—Kjónté intsi chrókuinkáchónkirá tí janhan éxi jíéxin ijnko tje ntsi kuente nta mostaza la jina chrókuétuēnhénrá tí nta sicómoro kixin chrók'uaxřjenkixin tí tjen ntihi sáchrókjui chróxenxaxín jnkosiné ntayaon ntiha, a ntá tí nta la chrókjuinchexiteyá tí xikaha chróntáchrorá.

Nkexři chrókjuinchexiteyá tí nkexro ch'e xřa

⁷ Jnkójín tí jahará tí chróchontará ijnko nkexro t'ahará xřa, a ntá tí chrókjanxin ch'án nontaará kjuinchentá ch'án nche o k'uáyakonhen ch'án tí ko kuéntará, zá chróntácherá ch'án kixin senó chrókjuak'e ch'án chrókjóne ch'án?

⁸ Kjá náhi. Kjá chrókuétuēnhénrá ch'án kixin senó chrókjuinchechján ch'án tí nkehe sinte la ko chrókóyaxínhin ch'án kixin tsjanjon ch'án nkehe nachrohe chrókjonte la ko chrók'uia. A ntá tsjixin sinte la ntá tsjak'e ch'án sine ch'án la ko its'i ch'án.

⁹ Zá chrókjuanchehérá ch'án kjuasáya kixin kjuínchexiteyá ch'án tí nkehe kuétuēnhénrá ch'án? Kjá náhi.

¹⁰ Mé kjaxin xikaha tí jahará tió chrókjuixin kain tí xřa k'uetuanhanrá Dios chróntáchrohyará kixin jina kjuich'erá xřa kixin ó jehó tí nkehe k'úituanhanrá kjuínchexiteyará, tsixrorá.

Ch'ín Jesús kjuínchekitöhe ch'án jina ite chojni chóna chinlepra

11 Ntá sátsji ch'ín Jesús chjasin Jerusalén ntá k'uátsinka ch'án nó estado Samaria la ko estado Galilea.

12 Ntá kjuúji ch'án ijnko chjasin ntsi ntá xeta ch'án ite chojni ntoa níhi chóna sín chinlepra. Kjánchó ikjín tjejóchónhen sín

13 ntá itsen k'uúyehé sín ch'án ntáchro sín kixin:

—Jesús, Maestro, tikonóhéni kaín ni —ichro sín.

14 Ntá k'uikon ch'ín Jesús tí jehe sín ikjín tjejó sín ntáche ch'án sín kixin:

—Sátsjirá tjákehérá tí sín ncha'tá kixin ó kuitóhará jina, ichrorá.

Nachrohe sákjuí sín tinkákitohe sín jina.

15 Ntá ijnko tí jehe sín tió kónohe ch'án kixin kuitóhe ch'án jina ntá kjan ch'án chjéhe ch'án kjuasáya Dios la itsen nixja ch'án.

16 Kjuák'exín toch'in ch'án chrínki toté ch'ín Jesús k'uísén ch'án xrákjanyani ch'án nonte kixin kjuanchia ch'án kjuasáya. A ntá tí ch'in a mé tsíkjiixin ch'án estado Samaria.

17 A ntá ch'ín Jesús ntáchro ch'án kixin:

—¿Xá jehya ite chojni kuitóhe jina? ¿Xá kjá tí sín ina?

18 ¿Á jehó tí ch'in i kjónté ikjín tsíkjiixin ch'án ikjan ch'án kjuanchehe ch'án kjuasáyé Dios ní? —ichro ch'án.

19 A ntá ntáche ch'án tí ch'in a kixin:

—T'ínkatjen sáttja. Kixin tí kuitékávan Dios la kuitógha jina —ichro ch'án.

Itsi tí kjuachaxién Dios

(Mt. 24.23-28, 36-41)

20 A ntá tí sín fariseo kjuanchankíhi sín tí ch'ín Jesús kixin nkesá tsi tí kjuachaxin kuénte Dios. A ntá jehe ch'án kjuátehe ch'án ntáchro ch'án kixin:

—A ntá tí tsi kjuachaxin kuénte Dios la me tíha ijnko nkehe xitjahya ts'ikon chojni.

21 Xitjahya tsontáchrórá kixin: “Níhi tjen,” o “Níha tjen”; kixin tí kjuachaxin kuénte Dios itjen jnkosiné tí tjejórá —ichro ch'án.

22 Ntá ntáche ch'án tí sín k'uájiko ch'án kixin:

—A ntá itsi tí yaon tsotjinkáonrá jnkójín yaon chrók'uikonrá tí Xjeen Dios K'óna Chojni, ntá í ts'ikonhyará ch'án.

23 Tsontáchro sín kixin ntíhi tjen ch'án, o ntíha tjen ch'án. Kjánchó sáchrókjuihyará la ko chróchréhyará sín.

24 Kixin éxi ts'ikonrá tsjonkixín ts'inkaséyanxín kuénte nkajni mé xikaha tsónhen tió itsi tí Xjeen Dios K'óna Chojni.

25 T'ichjánxin senó tsjasóte ch'án nchónhya la ko tí sín síin jie tsitekakuenhya sín ch'án.

26 Éxi kónhen tí yaon kjuák'e ch'ín Noé mé xikaha tsónhen tió tsokjan tí Xjeen Dios K'óna Chojni.

27 K'uékjine sín la ko k'uék'i sín la ko kótehe tí xjeen sín. A ntá xrínahya kui tí yaon k'uixenhen ch'ín Noé tí tabárcó ntá k'uániá chrin, a ntá tí sín kuitóhe ntója la kaín sín k'uitjáyán sín.*

28 Mé kjaxin xikaha kónhen tí kjuák'e ch'ín Lot k'uékjine sín la ko k'uék'i sín la ko k'uék'ena sín nkehe la ko k'uékjinchekji sín nkehe la ko k'uék'enká sín nntee sín la ko k'uékjich'ena sín nchia.

29 A ntá tí yaon k'uaxrxéjin ch'ín Lot tí chjasin Sodoma, na mé nkajni kuixín xrohi la ko azufre, na mé tíha k'uénxín kaín xín tí sín ntíha.†

30 Mé xikaha tsónhen tí yaon itsi tí Xjeen Dios K'óna Chojni.

31 A ntá tí yaon i tí tjejó jnkójín nkexro chrítaón nchia tjejó't'ok'éhe sín, a ntá ichrén nkehe chóna sín kuitóhe sín nkaxenhen nchia la í chrók'uinkajinhya sín chrókuakitsje sín tí nkehe chóna sín, tjoka sáchrókjuí sín ókjé. Kjaxin xikaha jnkójín chojni tjejó sín nntee sín la í chrókjanhya sín ntqé sín.

32 Xráxinkáonrá nkehe kónhen ichjién ch'ín Lot.‡

33 Tí nkexro tjínkaon kixin kohya nkehe chrókónhen na mé ts'itjáyán. A ntá tí nkexro chrókjuinche'tjáyánxín asén kixin chróchronka itén Dios la mé tsaá.

34 A ntá tsontáxrjan kixin tí tie a jnkokoá ts'ejóua yaá chojni la ijnko la sátsji la ko tí í jnko la tsitóhe.

35 Yaá chojni chjin its'o sín jnkokoá, la ijnko la sátsji la ko ijnko la tsitóhe.

36 Yaá chojni ts'ejóh'e sín xra nonte, la ijnko la sátsji a ntá ijnko la tsitóhe —ichro ch'án.

37 Ntá kuínhin sín tíha ntá kjuanchankíhi sín ch'án kixin:

—¿Xá nketí tsónhen tíha, Inchéni? —ichro sín.

A ntá jehe ch'án kjuátehe ch'án ntáchro ch'án kixin:

* 17:27 17.26–27 Génesis 6.5–7.24 † 17:29 17.28–29 Génesis 18.20–19.25 ‡ 17:32 Génesis 19.26

—Tí tjen tí cuerpo kuènte chojni tsík'en la mé ntiha tsojnkotsé tí kontexjuen —ichro ch'án.

18

Ch'ín Jesús kjuíncheyóexin ch'án éxi ijnko tjan k'án la ko ijnko ch'ín juez

¹ A ntá ch'ín Jesús kjuíncheyóexin ch'án kjuakoxin ch'án kixin jnkochrixin chrónixjehe chojni Dios la ko chrókoxrjéha sín.

² Ntá ntáche ch'án sín kixin:

—Ijnko chjasin kjuák'e ijnko ch'ín juez kjuikosáyehya ch'án Dios la ko k'uéchóntehya ch'án kjuasáyé ninkexró.

³ Kjaxin chjasin ntiha kjuák'e ijnko tjan k'án, jnkoyaxón sákjuítsjehe tjan tí ch'ín juez kjuanchia tjan jie ntácho tjan kixin chrókuítgexin kixin ijnko chojni nínkakohen tjan ntiha.

⁴ Nchónhya veces tjítsjehe tjan tí ch'ín juez la chrohya ch'án chrókuinchekitgexin ch'án. Ntá chr'éxin kjuenkayáxin ch'án ntácho ch'án kixin: “Kjóté í tsjikosáyàhya Dios la ko ninkexró tsjikosáyàhya

⁵ a ntá tí tjan k'án jnkoyaxón tjanhia tjan jie, la tsjínkítsa tjan tsitgexin tí jie tjanhia tjan kixin í jnkoyaxónhya itsi tjan tsochronòa tjan kixin ó kjuixin kónínkavan jie”, ichro ch'án.

⁶ Ntá ntácho Ìnchéni kixin:

—Mé xíkaha ichro tí ch'ín juez jínahya.

⁷ ¿Xá chrókuínkítsahya Dios tí sín kjueyá ch'án tí chróchronóehé sín ch'án nchakotjin la ko tie? ¿Á tjokahya chrókuatehe chrókuínkítsa sín ch'án?

⁸ Ntáxrjan kixin kjá tjoka chrókuínkítsa sín ch'án. A ntá tió itsi tí Xjeen Dios K'óna Chojni, ¿á naxá chrók'uitja ch'án chojni tinkáchónki tí jehe ch'án ntihi chjasintajni? —mé chro ch'án.

Ch'ín Jesús kjuíncheyóexin ch'án éxi ijnko ch'ín fariseo la ko ijnko ch'ín nchekjènkí

⁹ Ntá ch'ín Jesús kjuíncheyóexin ch'án nixjehe ch'án iso chojni tjenkayáxin sín kixin imá jina sín a ntá tí í so sín la náhi, ichro sín. Ntá ntácho ch'án kixin:

¹⁰ —Iyó sín ntoa sákjuí nkaxenhen njnko kixin tsonixjehe sín Dios. Ijnko la fariseo la ko ijnko la ch'ín nchekjènkí.

¹¹ A ntá tí ch'ín fariseo tjexin ch'án toté ch'án nixjehe ch'án Dios ntácho ch'án kixin: “It'eni Dios, kjuasáya tjàhá kixin jeheni la chóntahyani jie éxi tí sín í so kixin teé sín la ko ch'iyehé kichó sín la ko ch'iyehé sín chojni chjin. Kjaxin jeheni la jehya éxi tí ch'ín nchekjènkí tjinhin.

¹² Jeheni la nehyaní iyó yaon jnkojnko semana la ko kjaxin tjanjonni tí chichaon tjachani tí diezmo kuéntá”, ichro ch'án.

¹³ A ntá tí ch'ín nchekjènkí la imá kjín kuítghe ch'án kóxakohen ch'án chrókonta ch'án nkajní la mé chjéhe ch'án ntakuin ch'án ntácho ch'án kixin: “It'eni Dios tjikonóehéni tí jeheni kixin nchónhya jie chóntani”, ichro ch'án.

¹⁴ Tjonkará kixin tí ch'ín nchekjènkí tió kjan ch'án ntóe ch'án la Dios kuikonóehé tí jehe ch'án la kjuinhin ch'án tí jie chóna ch'án, a ntá tí ch'ín fariseo la náhi. Kixin kaín chojni nchehnkehe asén kixin imá jina tí jehe sín la mé imá tsontsí. A ntá tí chojni nchehnkehya asén la imá ts'ánkí tí kjuaxrexinkaon kuènte sín.

Ch'ín Jesús kjuíncheyaoon ch'án chánjan

(Mt. 19.13-15; Mr. 10.13-16)

¹⁵ Kjaxin kjuíkao sín chánjan ntsínsi tí tjan ch'ín Jesús kixin chrókuincheyaon ch'án xjan. Kjánchó tió k'uifon tí sín k'uájiko ch'án la í kjuanjonhya sín kjuachaxin kixin tsochjinako sín xjan.

¹⁶ A ntá ch'ín Jesús k'uíyehé ch'án sín ntácho ch'án kixin:

—Tjtohérá chánjan méhe xrakoa tí tjèn janhan la t'ínkakuénhyará xjan kixin tí sín kuènte kjuachaxin kuènte Dios la mé tóyóhe tí jehe xjan.

¹⁷ Ntá chaxin ntáxrjan kixin tí nkexro ts'ónahya éxi ijnko chánjan xitjahya ts'ejó sín tí ts'etgoan Dios tí kjuachaxin kuènte ch'án.

Ijnko ch'ín ntasoá ríco kjuínixjehe ch'án tí ch'ín Jesús

(Mt. 19.16-30; Mr. 10.17-31)

¹⁸ Ijnko ch'ín t'etgoan kuènte njnko kjuanchankíhi ch'án tí ch'ín Jesús kixin:

—Jaha la ijnko maestro jina la, ¿nkehe naxá t'itjayan chrókuich'eni kixin chróchóntani kjuachón jnkochrixin? —ichro ch'án.

¹⁹ Ntá kjuátghe ch'ín Jesús ntácho ch'án kixin:

—¿Nkekuènte ntáchrúa kixin jina tí janhan? Jnkokoá nkexro la mé jina la tíha mé Dios.

²⁰ Jaha la ó noha nkehe tí k'uetgoan Dios kixin chrókuacheéhya kichuárá, la ko chrók'oyánhya chojni, la ko chrókugehya, la ko chróntáchróhya ninkehó nkehe chaxínhya kuènte ókjé chojni, la ko chrókuikosáyehé it'á la ko iná —ichro ch'án.

²¹ A ntá jehe ch'án kjuátghe ch'án ntácho ch'án kixin:

—Kaín tíha kjuínchexiteyáni desde xjanntsíni —ichro ch'án.

²² A ntá kuínhin ch'ín Jesús kaín tíha ntá jehe ch'án ntáchro ch'án kixin:

—A ntá jnkokoá nkehe naxa t'itj'ayan chrókjuich'e, chrókjuínchekjia kaín nkehe chonta la chróchjehé tí chichaon tí sín nóa. A ntá tí nkehe tjele la tsochonta nkaya nkajní. A ntá tíó tsjixin sjnchekjtonhén sín nkehe, a ntá tsjihá ntá chréhé tí janhan —ichro ch'án.

²³ A ntá tí ch'ín a kuínhin ch'án xjkaha la kóxakonhen ch'án kixin imá itsjé nkehe chóna ch'án.

²⁴ Tíó k'uíkon ch'ín Jesús kixin kóxakonhen tí ch'ín a la ntá ntáchro ch'án kixin:

—Imá xra kixin tí chojni chóna itsjé nkehe chrók'uixenhen sín tí tjen Dios t'etqan.

²⁵ Antsí xrahya chrók'uatsínka ijnko kocamello ijnko tjar'i ntachica tjexrja, a ntá antsí má xra kixin ijnko chojni chóna itsjé nkehe chrókjuak'e tí t'etqan Dios —ichro ch'án.

²⁶ A ntá kuínhin sín kixin xjkaha ntáchro ch'án ntá ntáchro sín kixin:

—¿Xá nkexro chrókjuacha chrókuaá? —ichro sín.

²⁷ Ntá ntáchro ch'ín Jesús kixin:

—Tí nkehe tsjachaha chojni chrókjuínchexiteyá, la Dios la tsjacha ch'án sich'e ch'án kaín tíha —ichro ch'án.

²⁸ A ntá ch'ín Pedro ntáchro ch'án kixin:

—Inchéni, jeheni la ó kuítqeheni kaín nkehe chónani kixin tsochréhéni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Ntá chaxín tsojtonkará kixin jnkojnará chrókuitqohérá ntqá, la o chrókuitqohérá it'á la ko iná, la o chrókuitqohérá kichuárá, la o chrókuitqohérá ichjiánrá, la o chrókuitqohérá xjanrá kixin chrókjuich'erá xra kuénte Dios

³⁰ la antsí nkehe ts'ayéhérá ntihi chjasintajni la ko tí chr'éxin la ts'ayéhérá kjuachón jnkochrixin —ichro ch'án.

*Ch'ín Jesús chrónka ch'án inaá kixin its'en ch'án
(Mt. 20.17-19; Mr. 10.32-34)*

³¹ Ntá ch'ín Jesús k'uíyehé ch'án jehó tí teyó sín k'uájiko ch'án ntá chrónka ch'án kixin:

—Ije sátsjini Jerusalén. A ntá ntaha tsoxiteyá kaín tí nkehe tsíkjin tí sín tsíchronka itén Dios óse nkexrí tsonhen tí Xjeen Dios K'óna Chojni.

³² Tsjikaán sín ch'án tí tjejó tí sín jehya judío la ko ts'antaxnhin sín ch'án la ko ntqte sín tsíkite sín ch'án.

³³ Tsjate sín ch'án, a ntá chr'éxin la ts'óyan sín ch'án. A ntá nixin yaon tsoxechón ch'án —ichro ch'án.

³⁴ A ntá jehe sín la ninkehó kienxínha sín tí nkehe nixja ch'án kixin tíha ijnko nkehe naxa tsjachaha sín chrókienxín sín.

*Ch'ín Jesús kjuínchekitohe ch'án jina ijnko chojni t'ikonhya chjasin Jericó
(Mt. 20.29-34; Mr. 10.46-52)*

³⁵ A ntá ch'ín Jesús tíó chjina chrók'uixenhen ch'án chjasin Jericó ntá ntiha chrínta ntja tjetjaxin ijnko ch'ín t'ikonhya tjanchak'á ch'án.

³⁶ Ntá xrináha kuínhin tí ch'ín t'ikonhya kixin sít'atsínka nchónha chojni, ntá kjuanchankí ch'án kixin:

—¿Xa nkerí sítónhen? —ichro ch'án.

³⁷ Ntá chénka sín ch'án kixin ch'ín Jesús tsíkixin chjasin Nazaret ts'atsínka ch'án ntiha.

³⁸ Ntá k'uèya ch'án ntáchro ch'án kixin:

—Jaha Jesús tsík'axrjenixian ch'ín David, tikonóehéni —ichro ch'án.

³⁹ A ntá tí sín tsítaón ntja la k'uètuénhen sín ch'án kixin tsotáni ch'án. Kjánchó jehe ch'án antsí tsen k'uèya ch'án ntáchro ch'án kixin:

—Jaha tsík'axrjenixian ch'ín David, tikonóehéni —ichro ch'án.

⁴⁰ A ntá ch'ín Jesús ntá ntahó kjuák'echónhen ch'án ntá k'uètoqan ch'án kixin tsjikakjin sín tí ch'ín a. Ntá tíó kuikao sín ch'án tí chjinaxón tjen ch'ín Jesús ntá kjuanchankí ch'ín Jesús kixin:

⁴¹ —¿Nkehe tjinkávan sít'aha? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Jaha Inchéni, tjinkaonni chrókjuínchek'ikuanni —ichro ch'án.

⁴² Ntá ntáchro ch'ín Jesús kixin:

—Ó ts'ikuan. Ó kuítqha jina kixin kuítekávan tí janhan —ichro ch'án.

⁴³ Ntá tuénxin k'uíkon tí ch'ín k'uék'ikonhya, a ntá jehe ch'án chréhé ch'án tí ch'ín Jesús la ko kjuanchehe ch'án kjuasáyé Dios. La ko kaín tí sín k'uíkon kixin xjkaha kónhen kjuanchehe sín kjuasáyé Dios.

19

Ch'in Jesús la ko ch'in Zaqueo

- 1 **A** ntá ch'in Jesús k'uixehen ch'án chjasin Jericó la ntá k'uátsínka ch'án tí chjasin a.
 2 **A** ntá ntiha tjen ijnko chojni rico it'in ch'án Zaqueo, t'etuehen ch'án tí sín nchekjènkí.
 3 Tjinkaon ch'án chrókjuatsòan ch'án nkexro tí ch'in Jesús, kjánchó nchónhya chojni síin la xitjahya t'íkon ch'án kixin intsi ch'án.
 4 Ntá kuinká ch'án kuítaon ch'án ntja kixin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'atsínka ch'in Jesús.
 5 **A** ntá tió k'uatsínka ch'in Jesús ntiha konta ch'án tí nta ntáchro ch'án kixin:
 —Zaqueo, tjoka tjasinkajján kixin ntòa ntahó tsitòna jie —ichro ch'án.
 6 Ntá ch'in Zaqueo la tjoka k'uínkajin ch'án kóchéhe ch'án.
 7 Ntá kaín sín k'uikon sín xíkaha ntá kjuankíxin sín tjonta sín tí ch'in Jesús, ntáchro sín kixin ntòe ijnko chojni chóna nchónhya jie tsitòhe ch'án.
 8 Ntá ch'in Zaqueo kjuák'exín toté ch'án ntáche ch'án Ìnchéni kixin:
 —Jaha Ìnchéni, chrókónoha kixin tsjánjuan jnkosiné tí nkehe chonta sintakítònhan tí sín nòa. **A** ntá tí jnkójín nkexro kjuít'áyaha kuaáha la noó veces ts'okjanhan sín tí chichaon jie —ichro ch'án.
 9 **A** ntá ntáchro ch'in Jesús kixin:
 —**A** ntá jie la tsaá chojni tí nchia i kixin tí ch'in a mé k'uaxrjeníxin ch'in Abraham.
 10 **A** ntá tí Xjeen Dios K'óna Chojni mé kuikjeyá la ko sinchekáá tí chojni chóna jie.

Ch'in Jesús kjuíncheyóexin ch'án éxi ite chichaon imá tjete sínkí

- 11 **A** ntá tí chojni síin ntiha nachrohe tjejótinhin sín nkeri tjechro ch'in Jesús, a ntá jehe ch'án kjuíncheyóexin ch'án nkehe kixin ó tjen ch'án chjinaxón chjasin Jerusalén, a ntá jehe sín kjuenkayáxin sín kixin tí kjuachaxin kuènte Dios la áche ó tuénxín tsi, ichro sín.
 12 **A** ntá ntáchro ch'án kixin:
 —Itjen ijnko nkexro tsík'axrjeníxin ijnko nkexro imá k'uék'etòan. Ntá sákjuí ch'án ókjé naciòn kixin ts'áyéhe ch'án kjuachaxin ts'óna ch'án rey, a ntá chr'èxin la xíkjan ch'án inaá.
 13 **A** ntá tió chjina sátsji ch'án ntá k'uíyehé ch'án ite tí sín ch'ehe ch'án xra ntá chjéhe ch'án jnkójnko tí jehe sín jnkójnko chichaon imá tjete sínkí. Ntá k'uetòan ch'án kixin: “Tsjankíxinrá ch'ekoará xra tí chichaon hasta tí tsokjanjian”, ichro ch'án.
 14 **A** ntá tí sín chjasén ch'án ntiha imá kónínkakohen sín ch'án, ntá ich'án sín iso chojni chréhe sín tí sákjuí ch'án tsochenka sín tí sín síin ntiha kixin tjinkakonhya sín tí nkexro a ts'óna rey ts'etuehen sín.
 15 Kjónté xíkaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uetòan ch'án xrakoa tí sín ch'ehe ch'án xra, na mé tí sín tsík'áyéhe tí chichaon, kixin tsoñohe ch'án nkehe tí xra kjuích'eko sín tí chichaon k'uáyéhe sín.
 16 **A** ntá tí ch'in xrankíxixín kóchjina la ntáchro ch'án kixin: “Tí chjichakòan la kjuachani ite chichaon inaá”, ichro ch'án.
 17 **A** ntá kjuátèhe tí ch'in rey kixin: “Ó nchòxon tí xíkaha jaha la ijnko chojni jína ch'e xra. Jína kjuích'e xra kjónté jehya xra jíé ntá tsjánjuan kjuachaxin tsétòan ite chjasin”, ichro ch'án.
 18 **A** ntá kóchjina tí ch'in í jnko a inaá ntáchro ch'án kixin: “Tí chjichakòan la kjuachani in'ó chichaon inaá”, ichro ch'án.
 19 **A** ntá xíkaha inaá kjuátèhe tí ch'in rey kixin: “Tsjánjuan kjuachaxin tsétòan in'ó chjasin”, ichro ch'án.
 20 **A** ntá kóchjina tí ch'in níxin ntáchro ch'án kixin: “Tí chjichakòan la tjinhin. K'uánkintani panítóeni
 21 kixin chrakonhanni kixin jaha la jíaha la tjínkávan tsákjá tí nkehe jehya jaha kjuaké la ko tsotja tí nkehe jehya jaha kuènkaxian”, ichro ch'án.
 22 **A** ntá tí rey ntáchro ch'án kixin: “Jehya chojni jína ch'e xra jaha. Tí nkehe ntáchrúa tsjáncháxian jie. Jaha la ó noha kixin jíena janhan tsákjaá tí nkehe kjuakéhya, ichrúa, la ko tsotja tí nkehe kuènkahya.
 23 Ntá nkekuènte kixin chr'anhya tí chichaon ijnko banco chrókjuich'exín xra? **A** ntá tió kjan ntòna la antsí tsjé chichaon chrók'uayáha tí chrókjuacha kichó chica”, ichro ch'án.
 24 **A** ntá ntáche ch'án tí sín síin ntiha kixin: “Takítsjehérá ch'án tí chichaon tsík'áyéhe ch'án la ntá chjehérá tí ch'in chóna ite chichaon”, ichro ch'án.
 25 **A** ntá jehe sín ntáchro sín kixin: “¿Nkekuènte chrók'uáyéhe ch'án kixin ó chóna ch'án ite chichaon?” ichro sín.
 26 **A** ntá tí ch'in rey kjuátèhe ch'án ntáchro ch'án kixin: “Kjónté jnkójín nkexro itsjé chóna la ts'áyéhe má. **A** ntá tí nkexro chónahya la kjónté tí ntá chóna ch'án la ts'axrjehe ch'án.”

²⁷ A ntá tí sín nínkakonna sín tjinkakonhya sín káxin ts'ónana rey la xrákoará sín ntihi ts'íkonxín kuən ts'ochrínjinrá kja sín."

*Ch'ín Jesús k'uixenhen ch'án chjasin Jerusalén
(Mt. 21.1-11; Mr. 11.1-11; Jn. 12.12-19)*

²⁸ Tió kjuixin ntáchro ch'ín Jesús tíhi ntá chrín ch'án sátsji ch'án chjasin Jerusalén.

²⁹ A ntá ó kjuíji chjinaxón tí chjasin Betfagé la ko chjasin Betania chjinaxón tí jnə nchek'in sín Olivo, ntá k'uətuənen ch'án iyó tí sín k'uájiko ch'án

³⁰ ntáche ch'án sín káxin:

—Sátjirá tí chjasin ntsí chok'èxin ntihi, a ntá tió tsjasánrá ntiha ts'itjará ijnko kolocho tjechroé va naxə ninkexró tjiták'áhya va. Tjasintənkəhérá va la tsjikuanará va ntihi.

³¹ A ntá tí jnkojin nkexro tsjančankíhará nkekuənte tjasintənkəhérá va la ntácherá sín káxin: "Ínchéni ts'ichjánxínhin va", tsixrorá.

³² A ntá tí sín k'uítuənen sákjuí sín k'uitja sín éxi ntáchro ch'án.

³³ A ntá tió tjejóttjasintənkəhe sín va la ntá tí sín ínché va kjuanchankíhi sín káxin:

—¿Nkekuənte tjasintənkəhérá tí kolócho? —ichro sín.

³⁴ A ntá jehe sín kjuátəhe sín káxin:

—Ínchéni ts'ichjánxínhin va —ichro sín.

³⁵ Ntá sákjuíkəhe sín va tí ch'ín Jesús, la ntá tí iké sín kjuínčekamá sín va, ntá kjuíták'á ch'ín Jesús tí kolócho a.

³⁶ A ntá tinkákji tí kolócho tjejkjen ch'án la tinkák'ikjínxin sín tí iké sín ntja káxin nátaón tí ka ts'atsínka tí kolocho tjejkjen ch'án.

³⁷ Ntá tió kjuíjichjina sín tí chjinaxón tí t'inkajínxin chojni tí jnə Olivo, a ntá kaín tí sín kuítekaon tí jehe ch'án chréhe sín kjuankáxin sín itsen nixja sín chéhe sín kjuanchehe sín kjuasáyé Dios káxin kaín tí kjuaxroan k'uikónxín kon sín.

³⁸ Ntá ntáchro sín káxin:

—Jína tí nkexro Rey kjuíxín kjuachaxin ihníé Dios. Tsjak'e kjuaxróxin nkaya nkajní la ko kjuasáyé Dios tjen nkaya nkajní —ichro sín.

³⁹ A ntá iso tí sín fariseo tjejóyákjan sín í so chojni tjejónxexroan sín ntiha ntáchro sín káxin:

—Maestro, tétuənhén tí sín chréhe tí jaha káxin tsotání sín —ichro sín.

⁴⁰ A ntá ch'ín Jesús kjuátəhe ch'án ntáche ch'án sín káxin:

—A ntá tí sín í tsotání sín la ixró tsotsje —ichro ch'án.

⁴¹ A ntá tió kjuíjichjina ch'án chjasin Jerusalén ntá k'uíkon ch'án tí chjasin la ntá tsjánka ch'án káxin kuítekakonhya sín

⁴² ntáchro ch'án káxin:

—Chrókuiənxínrá la ko chrókónohará nkexrí chrók'uayəxinrá tí kjuaxróxin, kjánchó jahará kuítekákənhýará. A ntá ó kjuíxín k'uátsínka tí kjuaxróxin chrók'uikonrá la xitjahya ts'ikonrá jie.

⁴³ A ntá tsi iso yaon jínahya itsi tí sín nínkakəhanrá la sich'éna sín ijnko tjtə'q ts'ántatjen tí chjasin tjejórá ntihi ts'inkákənhən káxin xitjahya ts'axrjəxinrá chjasin ntihi káxin nkuíxín ts'ejó sín ts'inkákəhanrá sín

⁴⁴ ntá ts'óxíka sín kaín tí tjtə'q síin ntihi la ko ts'oyán sín kaín tí chojni síin la ko tsítəghya sín káxin ninkəhó xrə naxə ts'ejókjen kichó, káxin jahará kjuátsəqanhýará káxin kuitsjehe Dios tí chjasin tjejórá ntihi.

*Ch'ín Jesús kjuínchetjóá ch'án nkaxenhen njnko
(Mt. 21.12-17; Mr. 11.15-19; Jn. 2.13-22)*

⁴⁵ A ntá ch'ín Jesús k'uixenhen ch'án tí njnko jíé, a ntá kjuankáxin ch'án kuakitsje ch'án tí sín nchekji nkehe la ko tí sín t'əna nkehe ntiha.

⁴⁶ Ntá ntáchro ch'án káxin:

—A ntá ntáchro xroon itén Dios chrónka káxin: "Tí ntəna i mé it'in nchia tsonixjanaxián chojni",* ichro. A ntá jahará tí nchia i tsikjich'énará itjuéé xíchee —ichro ch'án.

⁴⁷ A ntá tí njnko ntiha kjuák'e ch'ín Jesús kjuako ch'án kaín yaon. A ntá tí sín nchətt'á t'ətoan la ko tí maestro tjako tí ley la ko kjaxín tí sín t'ətoan tí chjasin ntiha kjuéyá sín nkexrí chrók'oyán sín ch'án.

⁴⁸ Kjánchó k'uitjahya sín nkexrí chrók'oyán sín ch'án káxin kaín chojni tjejótinhin tí nkehe tjechronka ch'án.

20

*Tí kjuachaxin chóna ch'ín Jesús
(Mt. 21.23-27; Mr. 11.27-33)*

* 19:46 Isaías 56.7

¹ A ntá ijnko yaon kjuák'e ch'in Jesús tí njnko ntiha kjuákohe ch'án chojni tí tan jína tsaáxin sín. A ntá kjui tí sín nchát'a t'etöan la ko tí sín maestro tjako tí ley la ko kjaxin tí sín t'etöan kuènte njnko.

² Ntá kjuanchankíhi sín ch'án kixin:

—Chronka nkehe tí kjuachaxin chonta kixin xikaha ch'e. ¿Nkexro kjuanjón tí kjuachaxin a? —ichro sín.

³ Ntá kjuátehe ch'in Jesús ntáchro ch'án kixin:

—Kjaxin janhan tsjáanchánkíhará ijnko nkehe síná nkexrí tsjatéherá.

⁴ ¿A ntá nkexro k'ueŕtueñhen tí ch'in Juan kixin tsíkíte ch'án chojni? ¿Á Dios ní o chojni ó? —ichro ch'án.

⁵ Ntá kjuankíxin sín tjo sín kichó sín ntáchro sín kixin:

—¿Nkehe chrókuateheni? A ntá tí tsontáchroni kixin Dios tsíchr'án tí ch'in Juan la ntá tsjanhankí ch'án kixin nkekuènte kuitekakuenhyani ch'án.

⁶ A ntá tí tsontáchroni kixin chojni ó k'ueŕtueñhen sín ch'án la ntá kaín chojni tsonínkaon sín la ixró ts'óyáxinni sín kixin tjenkayáxin sín kixin ch'in Juan chaxin k'ueékjako ch'án itén Dios —mé xikaha ikjo sín.

⁷ Ntá kjuátehe sín kixin noehya sín nkexro tsíchr'án tí ch'in Juan.

⁸ Ntá ntáchro ch'in Jesús kixin:

—Kjaxin janhan tsöxrxjankahya nkexro kjuanjón kjuachaxin tjét'a tíhi —ichro ch'án.

Ch'in Jesús kjuíncheyóexin ch'án éxi tí sín ch'ehya xra jína

(Mt. 21.33-44; Mr. 12.1-11)

⁹ Ntá tuénxin kjuankíxin ch'in Jesús nixjehé ch'án chojni kjuíncheyóexin ch'án ntáchro ch'án kixin:

—Kjuák'e ijnko chojni k'uengkaxin ch'án nta to uva tí nonté ch'án, a ntá chr'éxin kjuínchekjen ch'án tí iso tí sín ch'e xra. A ntá kjuixin ntá sákjuí ch'án imá sé.

¹⁰ A ntá kui tí yoon tsakjinjin sín to uva. Ntá k'ueŕtueñhen ch'án ijnko nkexro ch'ehe ch'án xra kixin tsjikjanchehe ch'án tí sín ch'e xra nonté ch'án kixin tsjanjón sín tí to tónhen ch'án tocar. A ntá jehe sín kjuate sín tí ch'in a la ntá k'uinkité sín ch'án la ninkehó tsíchjéhya sín ch'án.

¹¹ A ntá tí ch'in nonté ichr'án ch'án í jnko nkexro ch'ehe ch'án xra. A ntá kjaxin k'uántaxinhin sín ch'án la ko kjuate sín ch'án la ko kjaxin ninkehó tsíchjéhya sín ch'án inaá.

¹² A ntá tí ch'in nonté ichr'án ch'án í jnko nkexro. A ntá tí sín ch'e xra kjaxin xikahó tsíkijich'ehe sín inaá, tsík'inkité sín ch'án.

¹³ Ntá tí ch'in nonté ntáchro ch'án kixin: “¿Nkexrí chrókuít'a jie? Tsochr'an tí xjanna imá tjuahá. Ách'e chrókuitekakonhen sín ch'án chróchóntehe sín ch'án kjuasáya”, ichro ch'án.

¹⁴ A ntá kjónté kui ch'án la k'uikon tí sín ch'e xra ntá chénka sín kichó sín kixin: “Tí ch'in í mé ts'áyéhe ch'án kaín nkehe kuènte it'é ch'án. Ts'óyánni ch'án kixin jeheni tsitgekoni kaín tí nkehe a,” ichro sín.

¹⁵ A ntá kuakitsjexín sín ch'án tí nonte ntiha la k'óyán sín ch'án.

A ntá kjuanchankí ch'in Jesús kixin:

—A ntá tí inché nonte la, ¿nkehe chrókuich'e ch'án kixin xikaha kónhen tí xjeen ch'án?

¹⁶ Chrókui ch'án chrókuinçek'itjáyan ch'án tí sín ch'e xra kixin xikaha kjuich'e sín k'óyán sín tí xjeen ch'án, a ntá chróchjéhe ch'án í so nkexro chrókuich'e xra tí nonte a —ichro ch'án.

A ntá tió kuínhin sín xikaha ntáchro sín kixin:

—Kjá Dios la xikahya tjinkaon ch'án —ichro sín.

¹⁷ A ntá ch'in Jesús komá ch'án tí jehe sín ntáchro ch'án kixin:

—¿A ntá nkehe t'axrxjén tí nkehe ntáchro xroon itén Dios ntáchro xikihi?:

Tí xro náxrxjónhya kuitöenta tí sín ch'éna tját'o, a ntá mé jie k'óna tí xro tjetaon.*

¹⁸ A ntá jnkójín chojni tsjitsínka chritaón tí xro í tsökuen ch'án. A ntá ts'ánótjen tí xro í tsöxratja ijnko chojni la tsökuen, ts'óna nche.

Tí xra tsjenkehe sín gobierno

(Mt.21.45-46; 22.15-22; Mr.12.13-17)

¹⁹ A ntá tí nchát'a t'etöan la ko tí maestro tjako tí ley tjinkaon sín chrótsé sín tí ch'in Jesús tuénxin tí hora a kixin ó kónohe sín kixin jehe sín kuakitsjexín tí nkehe nixja ch'án. Kjánchó xitjahya tsotsé sín ch'án kixin chrakonhen sín tí chojni siín.

²⁰ Ntá k'ueŕtueñhen sín chojni tsotsáyehe sín ch'án, éxi chojni chóna kjuasáyé ch'án chrókjo sín ch'án jnkójína kixin ách'e ichrén nkehe ntoáhya tsonixja ch'án. A ntá jína tsjanhaxín sín jie tsjikaán sín ch'án tí tjen tí ch'in gobernador.

²¹ Mé xikaha kjuanchankíhi sín ch'án nkehe, a ntá ntáchro sín kixin:

* 20:17 Salmo 118.22

—Maestro, ó noheni kixin kaín nkehe ntáchrúa la ko kaín nkehe tjákua la chaxín ntoá la ko jehya nkexrí tsjehe chojni tjenkayáxián kixin á jína sín, la ntá ntoá tjákua ntje Dios.

²² A ntá jie la chrónka, ¿á jína chrókjuenkeheni tí gobierno romano o náhí? —ichro sín.

²³ A ntá ch'ín Jesús la ó kónohe ch'án kixin ntoáhya tjenkayáxin sín ntá ntáchró ch'án kixin:

—¿Nkeuènte chrókjuachaxínrání?

²⁴ Tjákonará ijnko tí chichaon méhe. ¿Nkexro tí tsík'axrjéxin tjenkání tí chichaon i la ko nkexro ihnjé chóna méhe? —ichro ch'án.

Ntá kjuátehe sín kixin:

—Tí ch'ín t'etóan mé tjenkání ch'án —ichro sín.

²⁵ Ntá ntáchró ch'án kixin:

—Chróchjehérá tí ch'ín gobierno t'etóan tí nkehe kuènte ch'án; a ntá tí nkehe kuènte Dios chróchjehérá Dios —ichro ch'án.

²⁶ A ntá ninkehó kjuachahya sín kjuachaxín sín ch'án tí nkehe ntáchró ch'án nkayakon chojni chjasin ntíha. A ntá chrakon sín kuínhin sín kaín nkehe kjuátehe ch'án la ntá tí sín kjuanchankí la tání sín kohya nkehe ichro sín.

Kjuanchankí sín kixin á tsoxechón chojni

(Mt.22.23-33; Mr.12.18-27)

²⁷ A ntá chr'éxin iso tí sín saduceo sákjuítsjehe sín tí ch'ín Jesús. Kjánchó tí sín saduceo titekakonhya sín kixin tsoxechón chojni tsík'en. Xíkaha ntáche sín tí ch'ín Jesús kixin:

²⁸ —Maestro, ch'ín Moisés tsikjin ch'án tí xroon ley ntáchró kixin tíó ts'en ijnko chojni la ntá tsítóhe ichjién, tí chónahya sín xjeen, la t'ichjánxin kixin kichó tí ch'ín tsík'en tsotéhe tí tjan k'án kixin tsochóna sín xjeen sín éxi xjeen tí ch'ín saó tsík'en ts'íkon sín.[†]

²⁹ A ntá k'uéjó sín yato sín jnkoqá kichó sín. A ntá tí ch'ín saó la kótehe ch'án. Ntá k'uén ch'án la chónahya ch'án ninkehó xjeen ch'án.

³⁰ A ntá tí ch'ín yóxin kichó ch'án la kótehe tí tjan k'án. Kjaxin k'uén ch'án chónahya sín xjeen sín.

³¹ A ntá tí ch'ín nixin xikótehe jehé tjan inaá. Kjaxin xíkaha kayatoé sín. Kaín sín k'uén sín ninkehó xjeen sín chónahya sín.

³² A ntá kjuixixin kjaxin jehé tjan ik'uén tjan.

³³ A ntá tíó tsoxechón chojni tsík'en, ¿ntá nkexro tí jehé sín ts'óna ichjién tí jehé tjan kixin yato tí jehé sín kótehe tjan? —ichro sín.

³⁴ Ntá ch'ín Jesús kjuátehe ch'án ntáchró ch'án kixin:

—Ntíhi chjasintajni tí chojni ntoá la ko tí chojni chjin tótehe sín takja kichó sín.

³⁵ A ntá tí sín kuitekaon sín tí janhan ntá tsjacha sín tsoxechón sín inaá la í tsotéheya sín la koí tsotéheya tí xjeen sín.

³⁶ Kixin tí sín a la xitjahya ts'en kixin éxi tí sín ángel ts'ejó sín kixin xjeen Dios tí jehé sín kixin Dios kjuínchexechón ch'án sín.

³⁷ Kjaxin ch'ín Moisés tíó chrónka ch'án kuènte tí nta tjeche kjuínchenoheni ch'án kixin tí sín tsík'en tsoxechón sín. Ntáchró ch'án kixin Ìnchéni Dios na mé tí Dios tinkáchónki ch'ín Abraham la ko ch'ín Isaac la ko ch'ín Jacob.[‡]

³⁸ Tí Dios i la jehya tinkáchónki tí sín tsík'en. Náhi. Tí Dios i la tinkáchónki tí sín tjejóchón, la Dios la t'íkon ch'án kixin kaín chojni la síchón —ichro ch'án.

³⁹ A ntá iso tí sín tjako tí ley la ntáchró sín kixin:

—Jína kjuákua la ko jína ntáchrúa, Maestro— ichro sín.

⁴⁰ A ntá chrakon sín la í ninkehó kjuanchankíehya sín ch'án.

¿Xá nkexro tí it'é tí Cristo?

(Mt. 22.41-46; Mr. 12.35-37)

⁴¹ Ntá ntáchró ch'ín Jesús kixin:

—¿Nkexrí kixin ntáchró sín kixin tí Cristo mé ts'axrjenixin tí ch'ín David?

⁴² A ntá ch'ín David ikjin ch'án tí libro Salmos la ntáchró ch'án kixin:

Ìnchéni Dios ntáche tí Ìnchéni kixin:

“Tjak'e tjaná chjina ntíhó tsétóan

⁴³ tsjixinjian kaín xin tí sín nínkakonhan la tsjachahya sín ts'etóan sín kixin jahvá mé tsétóan.”[§]

⁴⁴ ¿Xá nkexrí kixin Cristo chrók'óna it'é David, kixin jehé David kuíkítexin ch'án Ìnché ch'án tí Cristo? —ichro ch'ín Jesús.

Ch'ín Jesús kjuanchia ch'án jie tí sín tjako tí ley

(Mt. 23.1-36; Mr. 12.38-40; Lc.11.37-54)

⁴⁵ Kaín chojni tjejótinhin sín nixjehe ch'ín Jesús tí sín k'uájiko ch'án ntáchro ch'án kixin:

⁴⁶ —Chrókóxakonhanrá chrókuankíehyará tí sín maestro tjako tí ley. Tóxrjínhin sín chrók'uinkáya sín ka kjínjin la ko tjínkaon sín kixin kaín chojni chrók'juikosáyehe sín tsoxeta sín ntasin la ko tjeýá sín silla antsi náxrxón chrók'uejóýá sín nkaxenhen nínko la ko tjeýá sín kixin jína chrók'uejó sín tí sátsji sín kía,

⁴⁷ la ko kjaxin takitsjehe sín ntöje tí chojni chjin k'án. A ntá kjuixin kjuich'iehe sín chojni ntá náxrxón nixjehe sín Dios. A ntá jehe sín antsi má sinchekjasóte sín Dios kixin xikaha kjuich'ia sín.

21

Tí chichaon kjuanjon ijnko tjan k'án nòa

(Mr. 12.41-44)

¹ A ntá tí nkaxenhen nínko ch'ín Jesús k'uíkon ch'án kixin tí sín ricó kjuikao sín chichaon chr'áxenhen sín tí ntacajón tjetóxroyéya chichaon.

² A ntá kjaxin k'uíkon ch'án ikjuí ijnko tjan k'án nòa la ntá jehe tjan chr'áxenhen tjan yaá chichaon ntsíntsi.

³ Ntá ntáchro ch'ín Jesús kixin:

—La chaxín ntáxrxan kixin tí tjan k'án i nòa tjan kjánchó antsi tjeje sínkí tí chichaon kjuanjon tjan kixin kaín asén tjan kjuanjon tjan, a ntá tí sín kjuanjon nchónhya la náhi.

⁴ Kixin kaín tí chichaon kjuanjon sín la chichaon síxèhe sín. A ntá jehe tjan kjónté nòa tjan na kjuanjon tjan kaín tí chichaon chrókuicháxinhin tjan —ichro ch'án.

Ch'ín Jesús ntáchro ch'án kixin tí nínko ts'itjayan

(Mt. 24.1-2; Mr. 13.1-2)

⁵ Iso sín tjejóto sín kixin nkexrí tsjehe nínko tsik'óna xro náxrxón la ko í so nkehe tsíkjanjon chojni éxi ijnko nkehe chjéhe sín Dios. A ntá ch'ín Jesús ntáchro ch'án kixin:

⁶ —A ntá tsi ijnko yaon tí nínko tjejokomará ntihi la tsoxíka. A ntá tsokehya ninkehó xro ts'ejóksen kichó inaá —ichro ch'án.

Tí nkehe tsoñhen tí naxa ts'itjayanhya chjasintajni

(Mt. 24.3-28; Mr. 13.3-23)

⁷ Ntá kjuanchankíhi sín ch'án kixin:

—Maestro, ¿nkesá tsoñhen tíha? ¿Nkexrí tsoñhen tí tsoñoexinni tí nkehe tsoñhen? —ichro sín.

⁸ Ntá ntáchro ch'ín Jesús kixin:

—Chrókóxakonhanrá tjetóehyará sit'áyahará chojni. Nchónhya chojni tsi tsoñtáchro sín kixin jehe sín tí Cristo, tsixro sín, la ko tsoñtáchro sín kixin: "Tje mé tsoxiteýa tsoñhen." Kjónté xikaha tsoñtáchro sín la chrókuítekákuenhyará tí jehe sín.

⁹ A ntá tíó tsinhínrá tsoñtáchro chojni kixin ó sín kjuanínkaon tjanjonko kichó sín, kjónté xikaha naxa chróchrakonhyará kixin kaín tíha t'ichjánxin ts'atsínka senó tí naxa tsjixixínhya ts'itjayan chjasintajni —ichro ch'án.

¹⁰ Naxa tjechrónka ch'án ntáchro ch'án kixin:

—Ijnko nación la tsjanjonko í jnko nación la ko ijnko chjasin tsjanjonko í jnko chjasin.

¹¹ Kjaxin imá tjan tsínki nonte la ko tsokjinta la ko tsoñhi chojni nchónhya chjasin, a ntá nkajni nchónhya kjuachrakon jie ts'ixin ts'ikon chojni.

¹² 'Naxa ts'atsínkahya tíha la tsoñínkakonhanrá sín tsoñsérá sín sátsjiokará sín tí nínko tsjanchia sín jie la ko sátsjiokará sín ts'ikjahará la ko sátsjiokará nkayakon tí sín rey la ko tí sín gobernador kixin tinkachónkirá nina.

¹³ A ntá tí yaon xikaha tsoñhen la ts'ixin kjuachaxin kixin tsochxonkará nkexro tinkachónkirá.

¹⁴ Tóxakuanhyará senó nkexrí tsjateherá tí nkehe tsjanchankíhará sín

¹⁵ kixin janhan la tsjanjuan kjuaxrexinkaon jína tsonixjará kixin nijnko tí sín nínkakonhanrá xitjahya tsoñtáchro sín kixin ntoáhya tí nkehe tsjateherá.

¹⁶ Kixin kjónté it'ará la ko kichuára la ko tí sín kjéhyará la ko tí sín tjórá jína mé sintakjirá sín. Jehe sín ts'óyán sín jnkojinrá.

¹⁷ Kaín chojni chjasintajni tsoñínkakonhanrá sín kixin tinkachónkirá nina.

¹⁸ Kjánchó xikaha la nijnko kaxihí chóna kjará ts'itjayanhya.

¹⁹ Tí tsjotóehyará tinkachónkirá tí janhan la tsochontará kjuachón jnkochríxin.

²⁰ 'A ntá tíó ts'ikonrá kixin kuenté chjasin Jerusalén tsik'ántatjen sín soldado ntá tsoñoaxínrá kixin í séhya ts'itjayan tí chjasin a.

²¹ A ntá tí sín tjejó sín Judea la t'ichjánxin sátsixin sín ntiha sátsji sín jna. A ntá tí sín sín chjasin Jerusalén kjaxin t'ichjánxin sátsixin sín ntiha la ko tí sín tjejó sín nontee sín la í xitjahya tsokjan sín chjasin.

²² Kíxin tí yaon ts'ixin tsjasóte chojni tsoxiteyá tsonhen kaín nkehe nixja xroon itén Dios.
²³ Nòa tí chojni chjin tjejóyá tí yaon a la ko tí sín chóna xjanhte naxá nchekákí sín. Kíxin tí yaon a la ts'ixin kjuatjoté tí chjasin la Dios tsjanjon kjuachaxin kíxin imá tsjasóte chojni ntiha.

²⁴ Jnkójínrá ts'énxínrá tí síin kjuanínkaon ntiha la ko jnkójínrá tsotsérá sín sátsjikoaará sín sinchekjasótíará kaín tí í so nación. A ntá tí sín jehya judío tsjixín ókje nación tsinkátja sín chjasin Jerusalén kíxin Dios mé tsjanjon kjuachaxin iso yaon xíkaha tsonhen. A ntá chr'éxin tsontáchro ch'án kíxin: “La í kohya nkehe tsonhen.”

A ntá tió itsi tí Xjeen Dios K'óna Chojni
 (Mt. 24.29-35, 42-44; Mr. 13.24-37)

²⁵ A ntá tsonoxínrá nkexrí tsonhen tí yaon la ko nkexrí tsonhen nitjó la ko nkexrí tsonhen konotsé. A ntá chjasintajni tsókohya kjuaxróxin kaín nación la ko tsochrakon chojni kíxin imá tsojñá ntayaon.

²⁶ A ntá chojni la tsotínhin sín kíxin tsochrakon sín tsjenkayáxin sín nkehe tsonhen chjasintajni kíxin kaín tí nkehe sínkáni nkajni la tsínki.

²⁷ Ntá xíkaha ts'ikon chojni kíxin itsi tí Xjeen Dios K'óna Chojni itsi ch'án chríkjan ijnko tjuj tsikao ch'án tí kjuachaxin jíe kuénte nkaya nkajni.

²⁸ A ntá tió tsoxrankíxin tsonhen kaín tíha chrókócháhará chrókuaya kjará ntá chrónátchroa kíxin kjínhya tjen tí nkexro tsaáxínrá —ichro ch'án.

²⁹ Kjaxin kjuíncheyóexin ch'án í jnko nkehe ntáchro ch'án kíxin:
 —Tjenkayáxínrá nkexrí síin tí nta t'óna to hígo la ko kaín tí í so nta.

³⁰ Tió ts'ikonrá kíxin tinkák'ayan kahnte tí nta, ntá tsonoxínrá kíxin í séhya ts'ixenhen nchakuen chrin.

³¹ Mé kjaxin xíkaha tió ts'ikonrá kíxin kaín tí nkehe sitónhen, ntá tsonoxínrá kíxin tí kjuachaxin kuénte Dios la ó chjino tjen.

³² Mé chaxín ntáxrxjan kíxin kaín tíhi tsonhen senó naxá t'enhya chojni tjejó jie.

³³ A ntá tí nkajni la ko tí chjasintajni mé ts'itjáyan. A ntá tí nkehe ntáxrxjan la ts'itjáyanha, tsoxiteyá tíha.

³⁴ Chrókóxakohanrá chrókúitóehyará kíxin chrókuichróerá kíxin tí imá chrókjónterá la ko tí chrókókoaná. Kíxin tí xíkaha la ntá titáya tsi tí yaon la chrók'uejochoénhyará.

³⁵ Na mé éxi ijnko trampa xrinahya ts'ikjehe mé xíkaha itsi tí yaon a, la ko xíkaha tsonhen kaín chojni síin chjasintajni tí ts'ejóchoénhya sín.

³⁶ Méxra listo chrók'uejorá la ko chrónixjehérá Dios kaín yaon chronóehérá ch'án kíxin tió tsi kaín tí kjuaxikaoon xíkaha la ntá tsjinkítsará ch'án tsaará kíxin ntá tsjachará tsochjineherá tí tjen tí Xjeen Dios K'óna Chojni —ichro ch'án.

³⁷ Ch'in Jesús kjuák'ekjakoexin ch'án tí nínko ntiha jnkojnko yaon, a ntá tie la sákjuí ch'án tí jña nchek'in sín Olivo, la ntaha kuítóhe ch'án.

³⁸ A ntá kaín chojni kóchjina sín tí nínko jnkojnko nchítjen kíxin tsinhin sín tí nkehe tsochronka ch'án.

22

Imó kjuenkayáxin sín nkexrí tsotsé sín tí ch'in Jesús
 (Mt. 26.1-5, 14-16; Mr. 14.1-2, 10-11; Jn. 11.45-53)

¹ Ntá kuichjina tí yaon kia sine sín tí niotja tjikohya tí xroan t'ánkíxin niotja na mé tí kia nchek'in sín pascua.

² Ntá tí nchat'á t'etjoan la ko tí sín maestro tjako tí ley kjuenkayáxin sín nkexrí chrók'óyán sín tí ch'in Jesús kíxin chrakonhen sín tí chojni chjasin ntiha.

³ A ntá ch'in Tsochren k'uixenhen asén ch'in Judas, mé kjaxin it'in ch'án Iscariote, mé jehé ch'án ijnko tí teyó tí sín k'uájiko ch'in Jesús.

⁴ Tí ch'in a mé sákjuitsjehe tí sín nchat'á t'etjoan la ko tí sín t'etjoan kuénte nínko, ikjo kichó sín kíxin nkexrí tsjikaán sín tí ch'in Jesús.

⁵ Ntá jehé sín kóchéhe sín la ko ntáchro sín kíxin tsjenkehe sín tí ch'in Judas.

⁶ Ntá kjuátehe ch'án sinchexiteyá ch'án ntá kjueyá ch'án nkexrí tsotsé sín tí ch'in Jesús tí kohya chojni.

Kjuixixín kjoneko sín tí ch'in Jesús

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ntá ó kui yaon kia sine sín niotja tjikohya tí xroan t'ánkíxin niotja, a ntá t'ichjánxin ts'óyán sín tí kolélo sine sín kuénte tí kia pascua.

⁸ A ntá ch'in Jesús k'uētuenhen ch'án tí ch'in Pedro la ko tí ch'in Juan kíxin sátsji sín sincheyaxín sín tí nkehe sine sín kuénte tí kia pascua.

⁹ Ntá jehé sín kjuanchankíhi sín ch'án kíxin:

—¿Nketí tjinkávan sincheyaxíxinni? —ichro sín.

¹⁰ Ntá kjuátēhe ch'án kixin:

—Tió ts'ixenhenrá chjasin Jerusalén tsoxetará ijnko chojni ntoa yámá ijnko tóa tjiá ntá. Chréhérá ch'án sátsjirá tí nchia ts'ixenhen ch'án.

¹¹ Tsontácherá tí lñché tí nchia kixin: “Ntáchro Maestro kixin: ¿Nketí tjen tí cuarto tsjánjuan kjuachaxin tsyaxixín sineko ch'án tí sín teyó xriko ch'án tí yaon pascua?” tsixrorá.

¹² A ntá jehe ch'án tsjakohará ch'án ijnko cuarto jié tí yóxin piso la ntiha síin nkehe t'ichjánxin, la nataha sijncheyaxixínrá tí sineni tsonjin —ichro ch'án.

¹³ A ntá jehe sín sákjuí sín k'uitja sín kaín nkehe éxi tsíchronka ch'ín Jesús. Ntá ntiha kjuíncheyaxíxin sín sine sín kuènte pascua.

¹⁴ A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uejótjaxin sín tí tjen tí mesa.

¹⁵ Ntá ntáchro ch'ín Jesús kixin:

—Imá tjínkavan kixin tsjasinni kia sinekianrá tí yaon pascua naḡa ts'énhya janhan.

¹⁶ Ntáxrjan kixin singhya janhan xikaha inaá tí naḡa tsoxiteyáhya tíha tió tsi kjuachaxin kuènte Dios —ichro ch'án.

¹⁷ Ntá kuákja ch'án tí nkehe tjiá inté to uva ntá chjéhe ch'án kjuasáya Dios ntá ntáchro ch'án kixin:

—Tákjará tíhi la its'irá kaín rá

¹⁸ Kixin ntáxrjan kixin xík'ikianhyará tí inté to uva tí naḡa tíhya tí kjuachaxin kuènte Dios —ichro ch'án.

¹⁹ A ntá kjuixin ntá kuákja ch'án tí niotja ntá kjuanchehe ch'án kjuasáyé Dios, ntá kóchrít'o ch'án chjéhe ch'án tí jehe sín ntáchro ch'án kixin:

—Tíhi mé cuerpo kuèntana kixin ts'ényákonhanrá. Mé xikaha tsoxráxinkákonxínrá tí janhan —ichro ch'án.

²⁰ Kjaxin xikaha kjuanjon ch'án tí nkehe tjiá inté to uva tió kjuixin kjóne sín la ntáchro ch'án kixin:

—Tí nkehe tjiá tí vaso chronkaxín tí nkehe nixin tsonhen tsoxiteyá kixin tí jnina ts'itji tsotjuáxin tí ijjará.

²¹ Tí nkexro sinchekjina mé tjejian tí tjen mesa ntíhi.

²² Méxra tí Xjeen Dios K'óna Chojni its'en éxi k'uítuenhen; kjánchó nòa tí ch'ín sinchekji ch'án kixin tsjasóte ch'án —ichro ch'án.

²³ A ntá jehe sín kjuankíxin sín tjanchankíhi kichó sín:

—¿Xá nkexro sinchekji ch'án? —ichro sín.

Ikjo sín kixin nkexro tí imá ts'etqan

²⁴ A ntá jehe sín mé tjo sín kixin nkexro antsí ts'etqan.

²⁵ A ntá ntáchro ch'ín Jesús kixin:

—Tí sín reyes kuènte tí naciones imá t'etqan sín. A ntá tí chojni mé ntáchro sín kixin tí sín t'etqan la mé chojni ch'e xra jina.

²⁶ A ntá jahará xikahya chrókjuich'erá. Íchá jina tí nkexro imá t'etqan chrók'óna éxi tí nkexro antsí ntasoá chróchóxin chrók'uítuenhen, na mé tí nkexro t'etqan chrók'óna éxi ijnko nkexro ch'exón xra.

²⁷ ¿A ntá nkexro tí antsí t'etqan, á tí nkexro lámq tjetjaxin tí tjen mesa ntá sine ch'án, o á antsí t'etqan tí nkexro kuikao tí nkehe sine ch'án? Náhi. Tí nkexro tjetjaxin tí tjen mesa mé antsí t'etqan ch'án. Mé xikaha janhan tjénakjárná éxi ijnko nkexro ch'exón xra tí janhan.

²⁸ Jahará xráxin k'uejótaxínrá k'uikonrá kaín nkehe náxrjónhya kónna.

²⁹ Méxra janhan tsjánjuan kjuachaxin tsétoanrá éxi chjina T'aná tí t'etqan janhan

³⁰ kixin sinterá la ko its'irá tí tsjak'e mesa kuèntana tí tsétoan janhan nkaya nkajni la ko tsétoanrá sijnchekitoexínrá tí ijjé kaín tí sín k'uaxrjeníxin tí teyó xjeen ch'ín Israel.

Ch'ín Jesús chrónka ch'án kixin ch'ín Pedro sinchemá kixin chónhya tí jehe ch'án, tsixro ch'án (Mt. 26.31-35; Mr. 14.27-31; Jn. 13.36-38)

³¹ Ntá ntáchro lñchéni kixin:

—Simón, Simón, chrókónoha jaha kixin ch'ín Tsochren kjuanchia ch'án tí jahará chrók'ótsjéyehe ch'án tí jahará éxi noatrigo.

³² Kjánchó janhan xrjanóaha T'aná kixin jaha chrókjuítóehya tí tinkachónkia tí janhan. A ntá jaha kjónté tsjásian jie, a ntá tsokjan inaá ts'itjáyannya tinkachónkia tí janhan ntá sijnchéhé kichuára —ichro ch'án.

³³ A ntá ntáchro ch'ín Simón kixin:

—lñchéni, listo tjenni sátsjini ts'ikjéhēkoani la jehya ts'ikjéhēni ó la kjaxin ts'enkoani —ichro ch'án.

³⁴ A ntá kjuátēhe ch'ín Jesús ntáchro ch'án kixin:

—Pedro, ntáxrjan kixin ijje jaí naxa tsjehya kochíntoa sijnchemána iniya kixin chonhya tí janhan, tsixrua —ichro ch'án.

Ntá ó kuichjina tí hora xikaha tsonhen ch'án

³⁵ Ntá ch'in Jesús kjuanchankíhi ch'án tí jehe sín kixin:
—Tió kuétuanhanrá sákjuirá kjuikoahyará kabolsa la ko kjuikoahyará tí nkehe t'inka chichaon la ko kjuikoahyará tokate na, zá naxa t'itjáyán ichrén nkehe ní? —ichro ch'án.

Ntá kjuátehe tí jehe sín ntáχρο sín kixin:

—Náhi. Ninkehó nkehe t'itjáyánhya —ichro sín.

³⁶ Ntá ntáχρο ch'án kixin:

—A ntá jie tí nkeхро chóntha kabolsa la tsakja sátsjiko la ko kjaxin tí nkehe t'inka chichaon. A ntá tí nkeхро chónthaha chica espada chrókjuinçekji ch'án tí ka t'inkáya ch'án kixin chrók'uenaxín ch'án ijnko chica.

³⁷ Ntáxrjan kixin t'ichjánxin tsoxiteyá tsona éxí nixja xroon itén Dios ntáχρο kixin: “Éxí yóhe ijnko chojni kjuasin jie mé xikaha ts'ikon sín ch'án.”* Mé xikaha kaín nkehe chrónka xroon itén Dios kixin tsona mé t'ichjánxin tsoxiteyá —ichro ch'án.

³⁸ A ntá jehe sín ntáχρο sín kixin:

—Inchéni, ntihi tjejó yaá chica espada —ichro sín.

Ntá kjuátehe ch'án kixin:

—Kjonté ó táhó la ó nchoxon —ichro ch'án.

Ch'in Jesús nixjeexín ch'án Dios tí Huerto Getsemaní

(Mt. 26.36-46; Mr. 14.32-42)

³⁹ Ntá ch'in Jesús sákjuixin ch'án chjasin Jerusalén sákjuí ch'án ijna Olivo kixin xikaha kuénhen ch'án k'uékjich'e ch'án la koí tí sín k'uájiko ch'án tinkáchréhe sín.

⁴⁰ Ntá kjuíji sín ntiha ntá ntáχρο ch'án kixin:

—Nixjehérá Dios kixin tsjinkítsa ch'án tí jahará kixin tsjásinhyará jie —ichro ch'án.

⁴¹ Ntá ch'in Jesús k'uaxrjenta ch'án tí jehe sín sákjuí ch'án ijnko kjínxin éxí chrók'ue chojni xro. Ntá kjuák'exín toch'in ch'án kixin tsonixjehe ch'án Dios.

⁴² Ntá ntáχρο ch'án kixin:

—It'éni, tí tjinkávan chrókjuinçekakaáni kaín nkehe náxrjónhya chrók'uat sínkani. Kjánchó jehya éxí tjinkaonni jeheni chrókónhenni. Náhi. Éxí tjinkávan jaha —ichro ch'án.

⁴³ Ntá xringhya k'uikon ch'án itjen ijnko ángel tsíkixin nkaya nkajni kixin tsjinkítsa ch'án.

⁴⁴ A ntá imá tóxakonhen ch'án, a ntá antsí fuerte nixjehe ch'án Dios, ntá k'uixin ch'án ntachjin éxí yóhe jni xikaha k'uitji k'uánótjen nonte.

⁴⁵ Ntá tió kjuixin nixjehe ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxin ch'án kixin tjejójua tí jehe sín kixin kjuachahya sín imá t'avá sín.

⁴⁶ A ntá ntáχρο ch'án kixin:

—¿Nkekuénte tjejochrinrá? T'ayará. Nixjehérá Dios kixin tsjinkítsará ch'án kixin tsjachroehyará ch'in Tsochren —ichro ch'án.

Itsé sín tí ch'in Jesús

(Mt. 26.47-56; Mr. 14.43-50; Jn. 18.2-11)

⁴⁷ A ntá ch'in Jesús naxa tjenixja ch'án ntá xringhya kui nchónhya chojni yamá chica. Tí ch'in it'in Judas, ijnko tí teyo sín k'uájiko ch'in Jesús, kuítaón ch'án ntja, ntá kóchjinehe ch'án tí ch'in Jesús kixin sineko ch'án kochíto.

⁴⁸ A ntá ntáχρο ch'in Jesús kixin:

—Judas, zá ijnko kochíto ó sijnçekjixian tí Xjeen Dios K'óna Chojni? —ichro ch'án.

⁴⁹ A ntá tí sín tjejóko ch'in Jesús tió k'uikon sín kixin xikaha kónhen ntá kjuanchankíhi sín ch'án kixin:

—Inchéni, zá chrókuatéxinni sín chica espada? —ichro sín.

⁵⁰ A ntá ijnko tí jehe sín kjuincheníhi ch'án ijnko ch'in ch'ehe xra nchat'á t'etqan, kóchrínjin ch'án ntatsjon ch'án chjina.

⁵¹ A ntá ntáχρο ch'in Jesús kixin:

—Táhó, t'iqohé, ó tjen —ichro ch'án.

Ntá ch'in Jesús itsé ch'án tí ntatsjon tí ch'in ch'e xra a, ntá kjuinçekitohé ch'án jina.

⁵² Ntá tuénxin ch'in Jesús ntáche ch'án tí sín nchat'á t'etqan la ko tí sín t'etqan kuénte njnko la ko tí sín táda t'etqan mé tí sín tsíki sátsjiko sín ch'án ntáχρο ch'án kixin:

—¿Nkekuénte k'uínkakoará chica espada la ko inta éxí chrótsérá ijnko xíchee?

⁵³ A ntá kaín yaon kjuak'é janhan k'uejóni kjuákoáxinrá tí njnko ntiha la ninkehó tsehyará tí janhan. A ntá jie mé tí hora kuéntará ntá kjuacha tí kjuachaxin kuénte sítie —ichro ch'án.

* 22:37 Isaías 53.12

Ch'ín Pedro kjuínchemá ch'án kixin chónhya ch'án tí ch'ín Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Ntá itsé sín tí ch'ín Jesús kjuínchenteto sín ch'án sákjuíko sín ch'án ntøe nçat'á t'etøan. A ntá ch'ín Pedro ikjín tinkáchrøhe ch'án.

⁵⁵ A ntá tí ntásin ntiha kjuaka sín xrohi síxrohe sín. A ntá ch'ín Pedro kjaxin kjuák'entaxín ch'án tí tjejó sín ntiha.

⁵⁶ A ntá ijnko tjachjin ch'e xřá tió k'uikon tjan kixin koí ch'ín Pedro tjechjírøhe ch'án ntiha ntá komá tjan tí jehe ch'án ntá ntáçro tjan kixin:

—Kjaxin tí ch'ín i xriko tí ch'ín Jesús —ichro tjan.

⁵⁷ Ntá ch'ín Pedro kjuínchemá ch'án ntáçro ch'án kixin:

—¿Nkekuènte xikaha ichrua jaha? Ni chonhya tí nkexro a —ichro ch'án.

⁵⁸ A ntá antsíkoá chr'èxin ikui í jnko chojni k'uikon tí jehe ch'án ntá ntáçro kixin:

—Kjaxin jaha xrikoa tí nkexro a —ichro.

Ntá ch'ín Pedro ntáçro ch'án kixin:

—Náhi, janhya —ichro ch'án.

⁵⁹ Ntá éxi ijnko hora chr'èxin ntá nixja í jnko ch'ín chénka tí í so sín kixin:

—Tí ch'ín i chaxin xriko tí ch'ín Jesús kixin kjaxin tsíkijxin ch'án estado Galilea —ichro ch'án.

⁶⁰ Ntá ntáçro ch'ín Pedro kixin:

—Nonahya janhan nkehe tí ntáçrua —ichro ch'án.

Ntá tuénxin naxá tjenixja ch'án ntá xrínahya ó tsje kochíntøa.

⁶¹ Ntá Ìnchéni kuinkátjía ch'án komá ch'án tí ch'ín Pedro. Ntá ch'ín Pedro xraxinkaon ch'án kixin xikaha tsíchronka Ìnchéni kixin: “Naxá tsotsjehya kochíntøa sijnchemána iniya.”†

⁶² Ntá ch'ín Pedro sákjuí ch'án ntója, tsjánka ch'án xraxinkaon ch'án tí jie kjuasin ch'án.

Kjuanoá sín tí ch'ín Jesús

(Mt. 26.67-68; Mr. 14.65)

⁶³ Tí sín sákjuíko ch'ín Jesús kjuanoá sín ch'án la ko kjuate sín ch'án.

⁶⁴ K'uikjéhe sín ka kon ch'án ntá kjuate sín ch'án ntá kjuanchankíhi sín ch'án kixin:

—Ijie la tónoha nkexro kjuatia —ichro sín.

⁶⁵ La ko í so nkehe ntáçro sín k'uántaxínhin sín ch'án.

Ntá sákjuíko sín tí ch'ín Jesús nkayakon tí sín t'etøan

(Mt. 26.59-66; Mr. 14.55-64; Jn. 18.19-24)

⁶⁶ A ntá kóyaon nçakotjin la kójnkotsé kaín tí sín táda t'etueñhen tí sín judíø, la ko tí nçat'á t'etøan, la ko tí sín maestro tjako tí ley la sákjuíko sín tí ch'ín Jesús nkayakon tí sín imá t'etøan. Ntá ntiha kjuanchankíexin sín ch'án kixin:

⁶⁷ —Ijie la çronka, zá jaha tí Cristo? —ichro sín.

Ntá jehe ch'án kjuátehe ch'án kixin:

—Tí tsontáxrjan kixin chaxín janhan na tsitekákonhyará.

⁶⁸ A ntá tí chrókjuánchánkíhará ichrén nkehe la chrókjuáteehyará la ko chrók'uatjántahyarána.

⁶⁹ A ntá jie tí Xjeen Dios K'óna Chojni mé tsjak'etjaxin tí tja çhjina kuènte Dios chóna kaín xín kjuachaxin —ichro ch'án.

⁷⁰ A ntá tuénxin kaín sín kjuanchankíhi sín ch'án kixin:

—¿Á chaxín jaha tí Xjeen Dios? —ichro sín.

A ntá kjuátehe ch'ín Jesús ntáçro ch'án kixin:

—Chaxín janhan xikaha ntáçrorá tí jahará —ichro ch'án.

⁷¹ Ntá kjo sín kichó sín kixin:

—¿Nkehe tsønhen naxá chróçronka í so chojni? Jeheni kaín ni kuínhinni nkehe k'uaxrjexin ir'va ch'án —ichro sín.

23

Sákjuíko sín tí ch'ín Jesús nkayakon tí ch'ín Pilato

(Mt. 27.1-2, 11-14; Mr. 15.1-5; Jn. 18.28-38)

¹ Ntá kaín sín k'uínkatjin sín ntá sákjuíko sín tí ch'ín Jesús nkayakon tí ch'ín Pilato.

² A ntá ntiha kjuankixin sín t'eka sín jie tí jehe ch'án ntáçro sín kixin:

—K'uitjani tí nkexro í tjachroe ch'án chojni nación kuènténi ntáçro ch'án kixin chrókjuenkeehyani tí gobierno romano, la ko kjaxin ntáçro ch'án kixin jehe ch'án mé Cristo ch'án, na mé ijnko rey tíha —ichro sín.

³ A ntá ch'ín Pilato kjuanchankíhi ch'án tí ch'ín Jesús ntáçro ch'án kixin:

—¿Á jaha tí Rey t'etuenhen tí sín judío a ní? —ichro ch'án.

Ntá ch'ín Jesús kjuátehe ch'án ntáchro ch'án kixin:

—Chaxín xikaha ntáchrúa jaha —ichro ch'án.

⁴ A ntá ch'ín Pilato ntáche ch'an tí sín nchát'á t'etóan la ko tí chojni tsíkikao sín kixin:

—T'itjáhya nijnko jie ch'ónta tí nkexro i —ichro ch'án.

⁵ A ntá jehe sín antsí itsen nixja sín ntáchro sín kixin:

—Tjachroe ch'án kain xín chojni estado Judea kixin tí nkehe tjako ch'án. Kjuankixin ch'án kjuako ch'án estado Galilea, a ntá jie ó kui ch'án ntíhi la xikaha tjako ch'án —ichro sín.

Sákjuuko sín tí ch'ín Jesús nkayakon tí ch'ín Herodes

⁶ A ntá kuínhin ch'ín Pilato xikaha ntáchro sín ntá kjuanchankí ch'án á tí ch'ín i la á Galilea tsíkixín ch'án.

⁷ A ntá kjuátehe sín kixin ntaha tsíkixín ch'án, ntá k'uetóan ch'ín Pilato kixin sátsjiko sín ch'án tí tjen ch'ín Herodes kixin jehe ch'án mé gobernador tí estado Galilea kixin kjaxin ch'án tjen ch'án chjasin Jerusalén tí yaon a.

⁸ A ntá ch'ín Herodes k'uikon ch'án kjuíji tí ch'ín Jesús ntá imá kóchéhe ch'án kixin isé tjinkaon ch'án chrók'uikon ch'án tí ch'ín Jesús kixin tsíkinhin ch'án chrónka chojni nkexrí tjako ch'án, ntá tjinkaon ch'án chrók'uikon ch'án ijnko kjuaxroan chrókjuakoxin ch'ín Jesús.

⁹ Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteheya ch'án.

¹⁰ Kjaxin ntíha k'uejó tí sín nchát'á t'etóan la ko tí sín maestro tjako tí ley la ntá nchónhya jie k'ueka sín ch'án kixin nínkakohen sín ch'án.

¹¹ A ntá ch'ín Herodes la ko tí sín soldado kuente ch'án kjuankixin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjete náxrxón éxi t'inkáya tí sín rey. A ntá tuénxín ch'ín Herodes k'uetóan ch'án kixin sátsji ch'án inaá tí tjen ch'ín Pilato.

¹² A ntá tí yaon a ch'ín Pilato la ko ch'ín Herodes kjuankixin sín tjuéhe kichó sín kixin tí senó la k'uénínkakohen kichó sín.

K'uetóan sín kixin its'en ch'ín Jesús

(Mt. 27.15-26; Mr. 15.6-15; Jn. 18.39—19.16)

¹³ A ntá ch'ín Pilato k'uíyehé ch'án tí nchát'á t'etóan la ko tí sín gobernador la ko kain chojni chjasin ntíha kixin tsojnkotsé sín

¹⁴ ntá ntáche ch'án sín kixin:

—Jahará kjuikuánará tí nkexro i ntáchrórá kixin ntoáhya tjakohe ch'án chojni kixin chrókónínkakohen sín tí gobierno. Kjánchó janhan kjuánchánkíha ch'án itsé nkehe kuínhínrá ntá k'uikonrá kixin k'uítjahya ninkehó tí jie tékará ch'án.

¹⁵ La ko kjaxin ch'ín Herodes k'uítjahya ch'án tí jie tékará tí ch'ín Jesús ntá chr'án ch'án inaá ntíhi. Ó k'uikonrá kixin ninkehó jie ch'óntahya ch'án chrók'uenxín ch'án.

¹⁶ S'intakjasóte ch'án ntá chr'éxin tsjánjuan kjuachaxin sátsji ch'án —ichro ch'án.

¹⁷ A ntá tí yaon kía a la t'ichjánxin kixin ch'ín Pilato tsjanjon kjuachaxin sátsji ijnko chojni tjechjina kixin xikaha kuénhen sín ósé.

¹⁸ Ntá kain sín kjuankixin sín k'óyako sín ntáchro sín kixin:

—¡Tí nkexro la náhí! ¡Ch'ín Barrabás mé t'atjánta! —ichro sín.

¹⁹ A ntá ch'ín Barrabás tsík'ikjéhe sín ch'án kixin jehe ch'án la ko í so chojni kónínkakohen sín tí chjasin ntíha la ko tsík'óyán ch'án chojni.

²⁰ A ntá ch'ín Pilato tjinkaon ch'án chrókjuanjón ch'án kjuachaxin sáchrókjuí ch'ín Jesús. A ntá xíkjanchankíhi ch'án tí chojni sín ntíha inaá.

²¹ Kjánchó jehe sín antsí má tsen k'óyako sín ntáchro sín kixin:

—¡Tjakékanirá ch'án ntacruz! ¡Tjakékanirá ch'án ntacruz! —ichro sín.

²² Níxin xíkjanchankí ch'ín Pilato ntáchro ch'án kixin:

—¿Xá nkehe ntoáhya kjuích'e ch'án? Janhan la k'uítjahya ninkehó jie ch'ónta ch'án chrók'uenxín ch'án. S'intakjasóte ch'án la ntá chr'éxin tsjánjuan kjuachaxin sátsji ch'án —ichro ch'án.

²³ Kjánchó jehe sín antsí tsen kjuanchia sín ntáchro sín kixin chrókjuak'enkání ch'án ntacruz. A ntá k'óyako sín la ko k'óyako tí sín nchát'á t'etóan ntá kjuacha sín kjuanchia sín tí nkehe tsonhen.

²⁴ A ntá ch'ín Pilato kjuanjón ch'án kjuachaxin xikaha tsonhen tí nkehe kjuanchia sín.

²⁵ A ntá kjuanjón ch'ín Pilato kjuachaxin sátsji tí ch'ín Barrabás éxi kjuanchia sín, na mé tí ch'ín k'uikjéhe sín kixin k'uékje ch'án kjuánínkaon la ko k'uék'óyán ch'án chojni. A ntá ch'ín Pilato kjuanjón ch'án kjuachaxin kixin sátsjiko sín tí ch'ín Jesús sinchekjasóte sín ch'án éxi tjinkaon sín.

Kjuak'enkanı sín ch'án ijnko ntacruz its'en ch'án

(Mt. 27.32-44; Mr. 15.21-32; Jn. 19.17-27)

²⁶ A ntá tió sákjuiko sín ch'ín Jesús tsjak'enkanı sín ch'án ntacruz, ntá itsé sín ijnko ch'ín tsíkjiixin chjasin Cirene it'in ch'án Simón, mé kjuixín ch'án nqntee ch'án, ntá kjuínchekamá sín ch'án tí ntacruz tsjak'enkáni ch'ín Jesús la tinkáchréhe ch'án.

²⁷ Kjaxin chréhe nchónhya chojni ntoa la ko nchónhya chojni chjin chréhe sín tsjankama sín ch'án.

²⁸ Kjánchó ch'ín Jesús nkátjá ch'án komá ch'án tí jehe sín kixin tsjanka sín ntáchro ch'án kixin:

—Jahará chojni chjin chjasin Jerusalén, chrótsjankamahyará tí janhan. Chrótsjankará kixin tí nkehe tsonhanrá jahará la ko xjaanrá.

²⁹ Kixin itsi yaon tsontáchrórá kixin náxrjón tí sín chóntahya xjan la ko tí sín kjuínchekokjehya xjan la ko tí sín kjuínchekakíhya ninkehó xjan.

³⁰ Ntá tsjankixin chojni tsontáche sín tí jnā kixin tsoxrátja sín la ko tsontáche sín tjo kixin tsjavá sín.

³¹ Kjonté tí nta yoa la ó sítónhen kaín tíhi la íchá tió chróxamá tí nta la ñkehe tí kaá chrókónhen tí nta tsixámá? —ichro ch'án.

³² Kjaxin sákjuiko sín iyó sín tsíkjasin jiē kixin ts'óyánko sín ch'ín Jesús.

³³ Ntá tió kjuíji sín tí jnā tñkítexín sín tí jnā Nta Hueso Kja Chojni, na mé ntiha kjuak'enkanı sín ch'ín Jesús tí ntacruz la ko kjaxin tí iyó sín chóna jiē, la ijnko la tja ch'án chjina la íjnko la tja ch'án kjon tjejóyáni sín ntacruz kjaxin.

³⁴ Ntá tió kjuixín kjuak'enkanı sín tí ch'ín Jesús tí ntacruz ntá nixjehē ch'án tí It'é ch'án Dios ntáchro ch'án kixin:

—It'eni, tónínkákuenhya sín kixin tí nkehe kjuích'eheñi sín kixin noehya sín nkehe tí kjuích'e sín —ichro ch'án.

A ntá tí sín soldado k'óxikayēhe sín iké ch'án ch'exín sín suerte kixin tsoñoexín sín nkexro tsakja tí ka a.

³⁵ Kaín chojni chjasin ntiha tjejótsjehe sín kixin xikaha sítónhen la ko kjaxin tí sín t'etqan tjanoá sín tí jehe ch'án ntáchro sín kixin:

—Kjuínchekaá ch'án ókjé chojni, a ntá jie jehe ch'án chrókjuínchekaá ch'án asén ch'án tí chaxín jehe ch'án tí Cristo tí nkexro tsíkjeýá Dios —ichro sín.

³⁶ La ko kjaxin tí sín soldado kjuanoá sín ch'án kóchjinehe sín ch'án kjuikao sín xranvino náxrjónhya chjéhe sín ch'án chrók'ui ch'án,

³⁷ ntáche sín ch'án kixin:

—Tí jaha chaxín rey kuente tí sín judío ntá jahvá chrókjuínchekaá asán —ichro sín.

³⁸ Kjaxin ntiha ikja tí ntacruz kjuak'enkanı sín ijnko ntachiso ntsi tsíkjin sín nkiva griego la ko nkiva latín la ko nkiva hebreo ntáchro kixin: “Tíha mé Rey kuente tí sín judío”, ichro.

³⁹ Ijnko tí sín chóna jiē tjenkáni ntacruz k'uántaxínñin ch'án tí ch'ín Jesús ntáchro ch'án kixin:

—Tí jaha chaxín Cristo, jahvá chrókjuínkajian asán, ntá tsjixin ntá chrókjuínkajian tí jeheni —ichro ch'án.

⁴⁰ A ntá tí ch'ín jnko a k'uētuēnhen tí íjnko ch'ín a kixin tsotání ch'án, ntáchro ch'án kixin:

—Ntáchrohya xikaha. ¿Á chrakuenhya Dios kixin xikaha ichrua kixin kjaxin jeheni na ó tjejóttjasóteni?

⁴¹ Yóini na nchoxon tjejóttjasóteni tjejóttjenkáni tí jiē kjuasinni. A ntá tí nkexro i ninkehó nkehe jínahya kjuích'e ch'án, la ntá koí ch'án tjetjasóte ch'án —ichro tí ch'ín a.

⁴² Ntá ntáchro ch'án kixin:

—Jesús, xráxínkavan tí janhan tió ts'ayéhé kjuachaxin tsétoan jaha —ichro ch'án.

⁴³ Ntá kjuátēhe ch'ín Jesús ntáchro ch'án kixin:

—Chaxín ntáxrjan kixin ijie jaí ts'ejóko kíchó ni nkaya nkajni —ichro ch'án.

Ntá ó k'uén ch'ín Jesús

(Mt. 27.45-56; Mr. 15.33-41; Jn. 19.28-30)

⁴⁴ Ntá ó chjina chonkixin. A ntá k'uixin tie kuenté chjasintajni hasta las tres kónjin.

⁴⁵ Ik'uén yaon, la ko tí ka t'ínkákuènxín nkaxenhen njnko k'uichje jnkosiné.

⁴⁶ Ntá ch'ín Jesús k'uèya ch'án itsen ntáchro ch'án kixin:

—It'eni tjen nkaya nkajni, jaha ts'ayéhé asenni —ichro ch'án.

Xikaha ichro ch'án ntá k'uén ch'án.

⁴⁷ A ntá k'uikon tí ch'ín capitán romano kaín xikaha kónhen ntá kjuanchehe ch'án kjuasáyé Dios ntáchro ch'án kixin:

—Chaxín tí nkexro la jína la ninkehó jiē chóntahya —ichro ch'án.

⁴⁸ A ntá kaín tí chojni tsíkójnkotsé ntiha k'uíkon sín xíkaha kónhen ntá sákjuixin sín ntiha chrakon sín tjate sín ntakuín sín kixin xíkaha kónhen.

⁴⁹ A ntá kaín tí sín chóxin ch'ín Jesús la ko kjaxin tí chojni chjin k'uékinkáchonki sín ch'án tsíkjiixin sín estado Galilea ikjín tjejó sín tjejótsjehe sín nkeri sítónhen.

Sákjuíjává sín tí ch'ín Jesús

(Mt. 27.57-61; Mr. 15.42-47; Jn. 19.38-42)

⁵⁰ A ntá ntiha tjen ijnko ch'ín it'in José, chjasén ch'án mé Arimatea estado Judea. Kjaxin jehe ch'án ijnko tí sín imá t'etóan kuènte tí sín judío, jehe ch'án mé ijnko nkexro jína.

⁵¹ Jehe ch'án kjuák'echónhen ch'án itsi tí kjuachaxin kuènte Dios. Méxra kórxrjénhya ch'án nkexri kjuích'e tí sín í so t'etóan.

⁵² Méxra sákjuítsjehe ch'án tí ch'ín Pilato kjuíjanchia ch'án tí cuerpo kuènte ch'ín Jesús. A ntá ch'ín Pilato kjuanjon ch'án kjuachaxin.

⁵³ Ntá sákjuí sín tsjnkajjinxín sín ch'án ntacruz. Ntá kjuixin kjuinkajin sín ch'án ntá kjuínchek'ísimá sín ch'án ijnko ka jíé, ntá sákjuíko sín tsoxravá ch'án ijnko tòye xráxin tsík'ich'èna ch'ín José jehó tjo la ko naxá ninxeró tsixraváhya ntiha.

⁵⁴ Kaín tíha kónhen tí yaon viernes kónjín. Tí yaon mé tjejóyaxínhin sín kixin í séhya tsoxránkixin tí yaon t'ok'éhe sín sábado kixin kohya kjuachaxin sich'e sín ninkehó xra.

⁵⁵ A ntá tí chojni chjin nkáchréhe kjuíkoxín ch'ín Jesús estado Galilea kjaxin sákjuíko sín sákjuítsjehe sín tí tòye tsoxravá ch'án la ko k'uíkon sín jína nkexri kjuak'e sín tí cuerpo kuènte ch'án.

⁵⁶ A ntá tío kjan sín tí nchia tjejó sín k'óyaxínhin sín kjuéyá sín xroan xraxé náxrxón itsa ntóé ch'án kixin xíkaha k'uékinkáchonki tí sín judío. A ntá k'ok'éhe sín tí yaon sábado éxi t'etóan tí ley.

24

Ó xechón ch'ín Jesús

(Mt. 28.1-10; Mr. 16.1-8; Jn. 20.1-10)

¹ Tí yaon domingo, mé tí yaon xrankíxixín semana tí chojni chjin na xíkjan sín inaá tí tsixravá ch'ín Jesús sákjuíko sín xroan xraxé tsík'èna sín. La ko í so chojni chjin sákjuíkotoxín sín.

² Ntá ó kjuíji sín ntiha k'uíkon sín tí xro tsík'jèxín tí tòye la í xíkahya tjen tí sákjuí sín.

³ Ntá k'uíxenhén sín tòye ntá k'uitjahya sín cuerpo kuènte Ìnchéni Jesús.

⁴ Ntá chrakon sín ntá noehya sín nkehe sich'e sín. Ntá xringhya k'uíkon sín iyó chojni ntoa tjejóxin tóté chjinaxón tí tjejó sín, la iké sín la tjákini tsjehe.

⁵ A ntá tí chojni chjin kjuínchek'ísén kja sín tjejótsjehe sín nonte kixin imá chrakon sín, a ntá tí chojni ntoa ntáχρο sín kixin:

—¿Nkekuènte xritjéyará tí nkexro tjechón tí siín tí sín tsík'en?

⁶ Tjenhya ch'án ntihi la ó xechón ch'án. Xráxinkáonrá nkehe ntáχρο ch'án tí kjuák'e ch'án estado Galilea

⁷ ntáχρο ch'án kixin jehe ch'án tí Xjen Dios K'óna Chojni t'ichjánxin tsotsé tí sín chónta jie tsjak'enkani sín ch'án ntacruz la ko tí níxin yaon tsoxechón ch'án inaá —ichro sín.

⁸ A ntá tí síchjin xráxinkaon sín kixin nkexri tsichronka ch'ín Jesús,

⁹ a ntá tío kjanxin sín tí tsixravá ch'án ntá chénka sín tí tejnko tí sín k'uék'ajiko ch'án la ko kaín tí í so sín.

¹⁰ A ntá tí sín sákjuíchenka tí sín apóstol la mé tjan María Magdalena la ko tjan Juana la ko tjan María iné ch'ín Jacobo la ko tí í so chojni chjin.

¹¹ A ntá tí sín apóstol kuínhin sín éxi ijnko nkehe chaxínhya tí nkehe chrónka tí jehe sín ntá kuítekakonhya sín.

¹² Kjánchó ch'ín Pedro k'uaxrxéjín ch'án nchia tinká ch'án sákjuítsjehe ch'án tí tsíkjiixravá ch'ín Jesús. Ntá kjuíji ch'án k'uíkon ch'án tí nkaxenhén tòye k'uíkon ch'án kixin jehó tí ka tsík'ísimá ch'án ntaha tjen. Ntá kjan ch'án tí nchia tjen ch'án chrakon ch'án kixin xíkaha tsíkónhen.

Tí ntia Emaús sákjuí sín la kjuíjichréhe Ìnchéni

(Mr. 16.12-13)

¹³ A ntá tí yaon a iyó sín sákjuí sín ijnko chjasin ntsí it'in Emaús, mé kjinxín tejnko kilómetro tí chjasin Jerusalén.

¹⁴ Tinkákjo sín kichó sín kixin kaín tí nkehe tsíkónhen tí chjasin Jerusalén.

¹⁵ A ntá nachrohe nixja sín tinkákjo sín, a ntá ch'ín Jesús kóchjinehe ch'án tí jehe sín sákjuíko sín ch'án.

¹⁶ K'jónaté k'uikón sín ch'án la kjuanjónhya Dios kjuachaxin kixin chrókjuatsóan sín tí jehe ch'án.

¹⁷ A ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tinkakjórá tí k'uinkará ntja? ¿Nkekuènte kixin t'avará? —ichro ch'án.

¹⁸ A ntá ijnko tí jehe sín mé it'ín Cleofas, mé kjuátehe ch'án kixin:

—Kaín chojni ó nohe sín nkehe tí tsíkónhen chjasin Jerusalén. A ntá jaha kjaxin kjuák'e ntiha la ¿á jahvá noahya nkehe tí tsíkónhen tí yaon a ní? —ichro ch'án.

¹⁹ A ntá jehe ch'án kjuanchankíhi ch'án tí jehe sín kixin:

—¿Xá nkehe tsíkónhen? —ichro ch'án.

Ntá chénka sín ch'án kixin:

—Tí nkehe tsíkónhen ch'ín Jesús tsíkjin ch'án chjasin Nazaret. Jehe ch'án na ijnko nkexro k'uéchronka itén Dios, na mé kjuakoxin ch'án kjuachaxin kuènte nkaya nkajní kaín tí nkehe k'uékjich'e ch'án la ko kaín nkehe k'uéntáchro ch'án mé xikaha k'uikón Dios la ko k'uikón tí chojni.

²⁰ A ntá tí nchát'á t'etóan la ko tí sín gobierno kjuínchek'áyéhe sín ch'án kixin its'en ch'án la tsjak'enkani sín ch'án ntacruz.

²¹ A ntá jeheni k'uejóchónhenni kixin jehe ch'án chrókjuinchekaá ch'án tí sín Israel. A ntá jie ó chóna ini yaon xikaha kónhen.

²² A ntá iso chojni chjin kjaxin k'uékinkáchónki sín ch'án kjuínchechrakon sín tí jeheni kixin jehe sín tsíkjisjehe sín tí tsixravá ch'án imá nchítjén

²³ la mé tsík'itjahya sín tí cuerpo kuènte ch'án, ntá kjan sín chrónka sín kixin tsík'ikon sín iyó sín ángel chrónka sín kixin ch'ín Jesús la tjechón ch'án, ichro sín.

²⁴ Ntá tuénxín iyó tí sín k'uájikoni kjaxin sákjuitsjehe sín tí tsixravá ch'án la kuik'itja sín éxi chrónka tí chojni chjin, kjánchó ch'ín Jesús la k'uikonhya sín —ichro tí yaá sín a.

²⁵ Ntá kjuátehe ch'ín Jesús ntáchro ch'án kixin:

—Lontirá jahará la tjokahya kuitekóonrá tí nkehe k'uéchronka tí sín profeta k'uéjío ósé.

²⁶ ¿Xá t'ichjánxinhya chrókjuasóte Cristo senó ntá chrók'uáyéhe ch'án tí kjuachaxin chrók'uetóan ch'án? —ichro ch'án.

²⁷ Ntá kjuankixin ch'án chronkaxín ch'án nkexrí t'axrxjén kaín tí nkehe nixja xroon itén Dios kixin nkehe tsonhen tí jehe ch'án la mé kjuankixín ch'án chronkaxín ch'án tí nkehe tsíkjin ch'ín Moisés la ko kjuintaxín chronkaxín ch'án tí nkehe tsíkjin tí í so sín profeta.

²⁸ Ntá kjuúji sín tí chjasin ntsí a, a ntá ch'ín Jesús tsjehe ch'án éxi naxá sáchrókjui ch'án kjin.

²⁹ A ntá jehe sín mé chronógehe sín ch'án kixin ntahó chrókuitgehe ch'án, ntáchro sín kixin:

—Titóha ts'ejóni ntihi kixin ntá ó kóntó la ó ts'ixitje —ichro sín.

Ntá ch'ín Jesús la k'uixenhen ch'án nchia kixin tsitgeko sín ch'án.

³⁰ A ntá tjejótjaxínko sín ch'án tí tjen tí ntamesa, ntá ntiha xranjon nkehe sine sín, ntá kuákja ch'án tí niqtja la kjuanchehe ch'án kjuasáyé Dios la kóchrít'o ch'án kuákja tí jehe sín.

³¹ Ntá tuénxín xraxinkaon sín ntá kjuatsóan sín tí jehe ch'án. Ntá tuénxín k'uitjáyankoá ch'án.

³² Ntá jehe sín itjo sín kichó sín ntáchro sín kixin:

—¿Á chaxínhya chéhe asénni tí kuikaoni ch'án ntja kixin chronkaxín ch'án nkexrí t'axrxjén tí itén Dios tsíkjin sín ósé? —ichro sín.

³³ Ntá tuénxín k'uinkatjen sín kjan sín chjasin Jerusalén. A ntá ntaha k'uitja sín tí tejnko sín jnkokoá tjejó sín la ko tí í so sín.

³⁴ A ntá tí sín ntiha chrónka sín kixin:

—Chaxín tjechón Ínchéni la mé ch'ín Simón tsík'ikon ch'án tí jehe ch'án —ichro sín.

³⁵ Ntá jehe sín kjaxin chrónka sín nkehe tsíkónhen tí ntja sákjuí sín kixin nkexrí kjuatsóanxín sín tí ch'ín Jesús tí kóchrít'o ch'án niqtja kjuanjón ch'án.

Títàya k'uikuèn sín ikui ch'ín Jesús

(Mt. 28.16-20; Mr. 16.14-18; Jn. 20.19-23)

³⁶ A ntá jehe sín naxá tjejótjo sín kaín tí nkehe tsíkónhen, a ntá xringhya ch'ín Jesús kjuák'e jnkosiné tí tjejó sín, nixjehe ch'án tí jehe sín ntáchro ch'án kixin:

—¿Á kjuaxróxin tjejorá? —ichro ch'án.

³⁷ A ntá jehe sín la imá chrakon sín kjuenkayáxin sín kixin k'uikón sín ijnko xrintóe chojni.

—Ách'e kjuachani —ichro sín.

³⁸ A ntá ntáche ch'ín Jesús tí jehe sín kixin:

—¿Nkekuènte chrakonrá? ¿Nkekuènte xikaha tjenkayáxin asánrá?

³⁹ Tsjehérá tjaná la ko totená kixin chaxín janhan. Itserána la ko komárána, kixin ijnko xrintóe chojni chóntahya nto la ko chóntahya hueso éxi t'ikonrá kixin chonta janhan —ichro ch'án.

⁴⁰ A ntá xikaha ichro ch'án ntá kjuako ch'án itja ch'án la ko toté ch'án.

⁴¹ Ntá kjónté xíkaha k'uikon sín la naxá kuítekakonhya sín kixin chéhe sín la ko chrakon sín. A ntá ch'in Jesús ntáchro ch'án kixin:

—¿Á chontará ichrén nkehe sineni ntíhi ní? —ichro ch'án.

⁴² Ntá chjéhe sín ch'án it'ó koche tsíchjántaón xrohi la ko ijnko t'ó katjé kotsjenta tjíá tsjen.

⁴³ A ntá jehe ch'án kuákja ch'án kjóne ch'án k'uikonxín kon sín.

⁴⁴ Na ntá ntáchro ch'án kixin:

—Kaín tí nkehe k'uaátsínka tí janhan mé k'uéntáxrjan tí naxá k'uék'ejóni senó; kixin t'ichjánxin tsoxiteyá kaín tí nkehe chrónka tí ley tsíkjin ch'in Moisés la ko tí nkehe tsíkjin tí sín profeta la ko tí nkehe ntáchro tí salmo kixin nkexrí tsgna janhan —ichro ch'án.

⁴⁵ Ntá kjuanjon ch'án kjuachaxin kixin tsienxín sín tí xroon itén Dios tsíkjin sín ósé.

⁴⁶ Ntá chénka ch'án sín kixin:

—Mé xíkaha nixja tí xroon itén Dios kixin tí Cristo la t'ichjánxin ts'en, la nixin yaon t'ichjánxin tsoxechón ch'án.

⁴⁷ A ntá t'ichjánxin tsjakoxín sín ihnjé ch'án tsjankíxixín sín chjasin Jerusalén la ko chrókuinhin chojni kuenté chjasintajni kixin chrókuítghe sín ijje sín chrókuitekaon sín tí jehe ch'án kixin jehe ch'án mé chrókjuincheyaon tí ijje sín.

⁴⁸ A ntá jahará mé tsochronkaxínrá kixin xíkaha k'uikonrá kaín tíha.

⁴⁹ Ntá tsochr'an janhan tí Nchakuen T'aná éxí tsintáchro ch'án. Kjánchó chjasin Jerusalén ntahó titghará tsoxiteyája ts'ayéhérá kjuachaxin tsixín nkaya nkajní.

Ch'in Jesús sákjuí ch'án nkaya nkajní

(Mr. 16.19-20)

⁵⁰ A ntá ch'in Jesús sákjuíko sín ch'án k'uaxrjexín sín chjasin Jerusalén sákjuí sín chjasin Betania. Ntá kjuàya ch'án tja ch'án kjuincheyaon ch'án tí jehe sín.

⁵¹ A ntá kjuixín kjuincheyaon ch'án sín ntá k'uaxrjenta ch'án tí jehe sín ntá sákjuí ch'án nkaya nkajní.

⁵² A ntá jehe sín k'uikon sín xíkaha, a ntá xraxínkaon sín ch'án, ntá kjan sín chjasin Jerusalén chéhe sín.

⁵³ A ntá kaín yaon tjejó sín nkaxenhen njnko tjanchehe sín Dios kjuasáya. Amén.

Tí tan jína chrónka ch'ín Juan

Tí nkexro chrónkaxín nkexrí tjen Dios mé k'óna ijnko chojni chjasintajni

¹ 12A ntá tí xrankíxixín naḡa k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kjaxin Dios tíha.

² Tí xrankíxixín na mé tí nkexro xráxín kjuák'eko Dios

³ la ko kjuachaxin kuènte ch'án na mé k'ónaxín kaín xín nkehe siín jie. A ntá kohya ninkeho nkehe k'ónakoá, na mé kaín xín nkehe siín na mé k'ónaxín tí kjuachaxin kuènte ch'án.

⁴ Jehé ch'án na mé kjuanjon kjuachaxin kaín nkehe síchón siín chjasintajni la ko jehe ch'án mé xrohi t'inkaséyanxínhin jnkojnko ntje chojni chjasintajni.

⁵ Tí xrohi a mé t'inkaséyanxín tí sítíe a. A ntá tí sítíe a mé tjinkaon chrók'ók'anka tí xrohi a, kjánchó kjuachahya k'ók'anka.

⁶ Ntá kjuák'e ijnko chojni k'uətuənhen Dios kui mé it'in ch'án Juan.

⁷ Ikui ch'án kjuák'e chrónka ch'án nkexrinchi tjen tí xrohi t'inkaséyanxín chjasintajni kíxín kaín xín chojni chrókuitekaon sín tí tjechrónka ch'án a.

⁸ A ntá tí ch'ín Juan la jehya tí xrohi a. Ó k'uítuənhón ch'án kui ch'án kíxín tsochrónka ch'án nkerí kuènte tí xrohi a.

⁹ A ntá tí xrohi chaxín t'inkaséyanxínhin kaín xín chojni na ó tsíki ch'án chjasintajni jie.

¹⁰ Kjuák'e ch'án chjasintajni na mé Dios tsíkijh'énaxín ch'án chjasintajni tí kjuachaxin kuènte tí nkexro a na kjónté kjuák'e ch'án chjasintajni na naḡa kjuátsəanhya sín ch'án.

¹¹ Ikui ch'án tí tjejó tí sín judío k'uaxrjeníxín ch'án, kjánchó kuítekakuehnyha sín ch'án.

¹² A ntá tí sín kuítekaon sín ch'án mé k'uáyéhe sín kjuachaxin kíxín ts'óna sín xjeen Dios.

¹³ Ntá yóghya ts'axrjeníxín sín it'é sín chjasintajni ntihó la ko yóghya ijnko it'é chrókjuenkayáxín ch'án chrókjuich'éna ch'án ijnko xjan. Náhí. Dios mé kjuéyá ch'án nkexro ts'óna xjeen ch'án.

¹⁴ A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkájkjanni ch'án na mé imá k'uétjuéhé ch'án chojni chjasintajni la ko imá ntoá chrónka ch'án. Kuayeni k'uíkonní kíxín imá t'ətoan ch'án kíxín jehe ch'án mé tí jnkokəóxón Xjeen It'əni tjen nkaya nkajní na mé xíkaha imá t'ətoan ch'án.

¹⁵ Ch'ín Juan mé chrónka ch'án nkexrí tjen tí nkexro a. Ntáchro ch'án kíxín:

—Senó k'uékjákohará kíxín chr'éxín tsi tí nkexro a, na mé əntsi má t'ətoan ch'án, a ntá janhan la náhí kíxín tí janhan naḡa kohyana la tí jehe ch'án la ó xráxín tjen ch'án —mé xíkaha chrónka ch'ín Juan.

¹⁶ Kaínni ó k'uáyéhení tí kjuachaxin jíe tjetjanjon ch'án la ko əntsi má tjencheyaonni ch'án la ko tjencheyaonni ch'án.

¹⁷ Dios mé tsík'ətuənhen ch'ín Moisés kíxín tsokjin ch'án tí ley. A ntá Ìnchéni Jesucristo mé kjuəkoxín ch'án kíxín nkexrí imá tjuéhé Dios tí chojni chjasintajni. A ntá kaín nkehe chrónka ch'án mé əntsi ntoá.

¹⁸ Kohya ninkexró chjasintajni k'uíkón sín Dios a. A ntá tí jnkokəóxón Xjeen ch'án na mé xráxín jnkokəó tjenkayáxinko It'é ch'án la mé jehe ch'án mé ó kjuínchekónoheni ch'án nkexrí tjen It'é ch'án nkaya nkajní.

*Ch'ín Juan mé chrónka ch'án nkexrinchi tjen ch'ín Jesús
(Mt. 3.11-12; Mr. 1.7-8; Lc. 3.15-17)*

¹⁹ Iso tí sín judío k'uéjó sín chjasin Jerusalén na ntá ichr'án sín iso chojni ncha'tá la ko iso tí sín levita, ikui sín kuinixjehé sín tí ch'ín Juan kjuanchankíhi sín ch'án kíxín:

—¿Nkexro tí jaha? —ichro sín.

²⁰ Ntá kjuínchemáhya ch'án, ntáchro ch'án kíxín:

—Náhí. Jehya janhan tí Cristo —ichro ch'án.

²¹ Ntá xíkjanchankíhi sín ch'án inaá, ntáchro sín kíxín:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'ín Juan la xíkjaṭehe ch'án ntáchro ch'án kíxín:

—Náhí. Jehya janhan Elías —ichro ch'án.

Ntá xíkjanchankíhi sín ch'án inaá kíxín:

—¿Á jaha tí nkexro tjejóchónhenni itsi tsochrónka itén Dios? —ichro sín.

Na ntá ntáchro ch'ín Juan inaá kíxín:

—Náhí. Janhya —ichro ch'án.

²² Ntá kjuanchankíhi sín ch'án inaá kíxín:

—¿Ntá nkexro jaha? T'ichjánxin tsgnoheni tsochénkani tí sín ichr'ánni ikuini. ¿Nkehe tsochronka kixin nkexro tí jaha? —ichro sín.

²³ Ntá kjuátehe ch'ín Juan ntáchro ch'án kixin:

—Janhan mé tí nkexro tsjak'e nteje ts'èya tsoxrjanka kixin: “Takitjehérá ijnko ntja ntoí tsixin Ìnchéni” —mé xikaha ichro ch'án kjuáteexin ch'án itén ch'ín Isaías k'uéchronka xroon itén Dios ósé.*

²⁴ A ntá tí sín fariseo mé tsichr'án tí jehe sín kuikjanchankíhi sín tí ch'ín Juan.

²⁵ A ntá kjuanchankíhi sín ch'án kixin:

—Ó ntáchrúa kixin jahya tí Cristo tí nkexro tsaáxin chojni la ko jahya tí Elías, la ko jahya nijnko tí nkexro k'uéchronka itén Dios ósé. ¿A ntá nkekuénté tikíte chojni tí xikaha? —mé ichro sín.

²⁶ Ntá ntáchro ch'ín Juan kixin:

—Janhan na mé ìntà ó tikítexián chojni. Ó ntihi tjenkákjan ijnko nkexro naxa tjátsqanhyará.

²⁷ Jehe ch'án mé tsi ch'án nóton tí janhan. A ntá antsí má t'etqan ch'án, a ntá janhan na kénhyó. A ntá tósuàna chrókjuasintanka tí correa tqkaté ch'án —ichro ch'án.

²⁸ Kaín tíha mé tsikónhen tí chjasin it'in Betábara tí nó tjtqoxin yaon tóhe tí ntario Jordán tí kjuák'e ch'ín Juan kuikíte chojni.

Ch'ín Jesús na mé éxí yóhe ijnko kolélo kuènte Dios

²⁹ A ntá tí yaon chr'éxin mé k'uikon ch'ín Juan kixin ó tjekui ch'ín Jesús. Ntá nixjehe ch'án tí sín tsikóhjina ntáchro ch'án kixin:

—Tsjehérá tí nkexro tjekui mé tí Kolélo kuènte Dios jehe ch'án. Tíha mé tsjinxín ijjé chojni chjasintajni.

³⁰ Janhan mé k'uéxrjanka kixin tí iton tí janhan mé tsichréhe ijnko nkexro antsí t'etqan, a ntá janhan la kénhyó tétqan kixin naxa kohyana na jehe ch'án la ó xráxin tjen ch'án.

³¹ Kjaxin janhan naxa chonhya nkexro tíha. A ntá xra ó k'uinka kjuák'e kuikítexián chojni ìntà kixin tí chojni naciòn Israel mé chrókjuátsqanxin sín ch'án —ichro ch'ín Juan

³² Kjuintaxín ntáchro ch'ín Juan kixin:

—Ó k'uikuan kixin tí Nchakuen Dios mé k'uinkajinxin nkaya nkajni na éxí yóhe ijnko kontóá k'uinkajin la ko kjuák'e va ntoí tí tjen ch'án.

³³ A ntá janhan kjaxin naxa chonhya nkexro tíha. A ntá tí nkexro k'uetuanna kixin tsjak'é tsikítexián chojni ìntà mé tsichronka ch'án kixin tí Nchakuen Dios mé ts'inkajin tsjak'e ntoí tí tjen ijnko chojni na mé tsjatsqanxián janhan kixin tí nkexro a mé tsjikítexin ch'án Nchakuen Dios chojni.

³⁴ A ntá janhan jie mé ó k'uikonxin kuan kixin xikaha kónhen tí jehe ch'án, a ntá xrjankaxián kixin táha mé Xjeen Dios tíha —mé xikaha chronka ch'án.

Tí sín saoxín kjuéyá ch'ín Jesús

³⁵ Tí yaon chr'éxin kjuák'e ch'ín Juan la ko iyó tí sín k'uájiko ch'án,

³⁶ a ntá xringhya k'uikon ch'án k'uátsinka ch'ín Jesús. Ntá ntáchro ch'ín Juan kixin:

—Tsjehérá tí nkexro i mé tí Kolélo kuènte Dios —ichro ch'án.

³⁷ Ntá kuínhin tí yóí sín k'uájiko ch'ín Juan na ntá sákjuichréhe sín tí ch'ín Jesús.

³⁸ Ntá kuinkátjía ch'ín Jesús k'uikon ch'án kixin tinkáchréhe sín ntá kjuanchankíhi ch'án sín kixin:

—¿Xá nkehe xritjéyará? —ichro ch'án.

Ntá ntáchro sín kixin:

—Maestro, ¿xá nketí nchia itjen? —ichro sín.

³⁹ Ntá kjuátehe ch'án ntáchro ch'án kixin:

—Ìntá sátsjini ts'ikonrá nketí —ichro ch'án.

Ntá kuinkáchréhe sín ch'án k'uikon sín nketí nchia kjuák'e ch'án ntá k'uéjóko sín ch'án kuènté tí kónjín kixin kjuíji sín ntiha como las cuatro kónjín.

⁴⁰ A ntá yóí sín tsikinhin sín tí chronka ch'ín Juan ntá sákjuichréhe sín tí ch'ín Jesús na mé ijnko mé it'in Andrés. Jehe ch'án chóntha ch'án ijnko savé mé it'in Simón Pedro.

⁴¹ Na ntá tuénxin tí ch'ín Andrés sákjuíkjeýá ch'án tí savé ch'án Simón. Ntá chénka ch'án tí savé ch'án kixin:

—Ó k'uitjani tí nkexro Mesías —ichro ch'án. Tíha mé t'axrxjin kixin Cristo.

⁴² A ntá ch'ín Andrés mé kuikao ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchro ch'án kixin:

—Jaha mé Simón, it'á mé it'in Jonás. Ntá jie sjintak'ian Cefas —ichro ch'án. A ntá tí palabra Cefas la ko tí palabra Pedro na mé yóí mé t'axrxjin kixin ixro tíha.

* 1:23 Isaías 40.3

Ch'in Jesús mé kjueyá ch'án tí ch'in Felipe la ko tí ch'in Natanael

⁴³ A ntá tí yaon chr'éxin mé sáchrókjui ch'in Jesús tí estado Galilea. Ntá k'uitja ch'án tí ch'in Felipe, na ntá ntáche ch'án kixin:

—Chr'éhé tí janhan —ichro ch'án.

⁴⁴ A ntá tí ch'in Felipe mé chjasén ch'án mé it'in Betsaida tí chjasén ch'in Andrés la ko ch'in Pedro.

⁴⁵ Ntá tí ch'in Felipe mé sákjuikjeyá ch'án tí ch'in Natanael na ntá chénka ch'án kixin:

—Ó k'uitjani tú nkexro tsi éxi k'u'échrónka tí ch'in Moisés tí tsíkjin ch'án tí xroon chrónka tí nkehe k'uetqan Dios. Kjaxin tí sín k'u'échrónka tí itén Dios chr'éxin mé k'u'échrónka sín kixin itsi tí nkexro a. Na ntá ó k'uitjani ch'án na mé jehe ch'án mé it'in Jesús, la it'é mé it'in José, la mé chjasén ch'án mé Nazaret —ichro ch'in Felipe.

⁴⁶ A ntá ntáchro ch'in Natanael kixin:

—¿Xá kjuánchí má chrókójina tí nkehe chrók'uaxrxéjin tí chjasin Nazaret a? —ichro ch'án. Ntá kjuátéhe ch'in Felipe ntáchro ch'án kixin:

—Xrákiá ts'ikuan —ichro ch'án.

⁴⁷ Na ntá k'uikon ch'in Jesús kixin ó kui tinkákóchjina ch'in Natanael, na ntáchro ch'án kixin:

—Ó kui ijnko ch'in chaxín israelita la kohya nijnko kjuach'ia xriko ch'án —ichro ch'án.

⁴⁸ Na ntá ntáchro ch'in Natanael kjuanchankíhi ch'án tí ch'in Jesús kixin:

—¿Nkexrí kixin tjátsoanna? —ichro ch'án.

Ntá kjuátéhe ch'in Jesús ntáchro ch'án kixin:

—Naxá nixjaahya tí ch'in Felipe mé k'uikuán tí jaha tjenkankiá tí nta t'óna to higo —ichro ch'án.

⁴⁹ Na ntá ntáchro ch'in Natanael kixin:

—Maestro, jaha la chaxín tí Xjeen Dios tjen nkaya nkajní tsétuñhén tí nación Israel —ichro ch'án.

⁵⁰ Ntá kjuátéhe ch'in Jesús ntáchro ch'án kixin:

—Jehya tí nkehe ntáxrjan k'uikuán tjenkankiá nta t'óna to higo, jehya táhó tsitékákoxian. Náhi. Chr'éxin xiki í jnko kjuaxroan antsí má jié ts'ikuan, a ntá tíhi la kénhyó —ichro ch'án.

⁵¹ Kjaxin ntáchro ch'in Jesús kixin:

—Ijnko nkehe ntoá tsoxrjanka kixin tsoxitjehe tí nkajní ts'ikonrá itsi itsjé tí sín ángel kuènte Dios mé ts'it'ótjen la ko ts'inkajin tí tjén janhan mé tí Xjeen Dios K'óna Chojni —ichro ch'án.

2

Chjasin Caná estado Galilea kótehe ijnko chojni

¹ A ntá iní yaon chr'éxin ntá kótehe ijnko ch'in chjasin Caná estado Galilea. Mé koí tí iné ch'in Jesús tsík'iyéhe sín tjan la ntiha tjen tjan koí.

² Kjaxin tsík'iyéhe sín tí ch'in Jesús la ko tí sín k'uájiko ch'án kixin sátsji sín tí tsíkótehe sín ntiha.

³ Ntá ó tsík'ankehe sín tí xranvino ik'uí sín na ntá tí iné ch'in Jesús mé ntáche tjan tí jehe ch'án kixin:

—Ó tsík'ánká xranvino its'i sín —ichro tjan.

⁴ Ntá ntáchro ch'in Jesús kixin:

—Naná, ¿nkehe tsoñhen chrónka? Naxá kjuixrakáhya tí yaon tsjásian kjuaxroan —ichro ch'án.

⁵ A ntá tí iné ch'án na mé ntáche tjan tí sín ch'e xra kixin:

—Tí chrén nkehe chrók'uetqanhanrá ch'án chrókjuinchexiteyará —ichro tjan.

⁶ A ntá sín ntiha injon chí tsík'óna xro na mé tíha tjáá ntá t'ònti sín kixin xikaha mé ts'axrjehe tí jié chóna sín koí, mé xikaha kuinkáchónki tí sín judío. Na mé jnkojnko chí mé tjacha tikia ochenta litro la o ciento litro ntá.

⁷ Ntá k'uetqenhen ch'in Jesús tí sín ch'e xra kixin:

—Tikjará ntá kaín tí chí a tsókaón —ichro ch'án.

Ntá kjuínchexiteyá sín kjuínchekaón sín ntá jnkojnko tí chí a.

⁸ A ntá ntáche ch'in Jesús tí jehe sín inaá kixin:

—Tájká intsí ntá tjáá chí tjikuehé tí ch'in t'etqan tí kia a —ichro ch'án.

Ntá xikaha kjuich'e sín kjuínchexiteyá sín.

⁹ A ntá tí ch'in t'etqan tí kia a mé tsjéxin ch'án tí ntá tsík'óna xranvino kjónté noehya ch'án nketi kuixin tí xran a. Jehó tí sín ch'e xra kuikao sín mé nohe sín kixin jehe sín mé tsíkakitsje sín ntá. Ntá tí ch'in t'etqan mé k'uíyehé ch'án tí ch'in tsíkótehe.

¹⁰ Ntáche ch'án kixin:

—Xrácín tí sín tjasin kia la senó tí xranvino náxrjón tjanjon sín na tió chrók'uihya tí sín tsikóchjina na ntá tjanjon sín tí xranvino náxrjónhya. A ntá jaha la náhi. Senó kjuakéchjina tí xranvino antsí má náxrjón, a ntá tí jie tjetjánjuan jaha —ichro ch'án.

¹¹ Tí kjuaxroan a kjuích'e ch'ín Jesús chjasin Caná estado Galilea mé tí kjuaxroan saxín kjuasin ch'án mé kjuakoxin ch'án nkexrí imá jié tí kjuachaxin kuènte ch'án, a ntá tí sín k'uájiko ch'án mé kuítekaon sín tí jehe ch'án.

¹² Ntá ó k'uátsínka kia, a ntá sákjuí ch'án chjasin Capernaum, sákjuíko ch'án ñné ch'án la ko kichó ch'án la ko tí sín k'uájiko ch'án, kóxrjenhen sín ntiha iso yaon.

Ch'ín Jesús mé kjuínchetjóá ch'án tí ñnko jié
(Mt. 21.12-13; Mr. 11.15-18; Lc. 19.45-46)

¹³ A ntá ó kuichjina tí yaon kia kuènte pascua kuènte tí sín judío. Ntá ch'ín Jesús sákjuí ch'án chjasin Jerusalén.

¹⁴ Ntá nkaxenhen tí ñnko jié ntiha k'uíkón ch'án tí sín nchekjixin koxinta la ko kolélo la ko kontóá. La ko ntiha kjaxin tjetjótjaxin tí sín tjinkíxixín chichaon.

¹⁵ Ntá ch'ín Jesús mé kuákja ch'án ihno tsíxehe sín ntiha, kjuích'éna ch'án ijnko chikoté, ntá kuakitsjexín ch'án sín nkaxenhen ñnko kaín xín sín la ko tí kolélo la ko tí koxinta. Na ntá tí ntamesa tjinkítóxixín sín tí chichaon mé kótéka ch'án tsíkjaminkí xènjín tí chichaon a.

¹⁶ Ntá k'uetuènen ch'án tí sín nchekji tí kontóá a kixin:

—Taksíjerá kaín tí nkehe a. Ch'énahyará ijnko ntasin tí ntqe T'aná ntihi —ichro ch'án.

¹⁷ Ntá xrácínkaon tí sín k'uájiko ch'án tí nkehe tsíkjin sín ósé kixin: “Éxi xrohi k'uákjen asenná ñnkavan kixin tí ntqá tjikosáyehya sín.”*

¹⁸ Ntá tí sín judío mé kjuanchankíhi sín ch'án kixin:

—¿Xá nkerí kjuaxroan tsjásixián tsjákoxian nketí kjuachaxin chonta kixin xíkaha kjuích'e tíhi? —ichro sín.

¹⁹ Ntá kjuátehe ch'ín Jesús kixin:

—Tí ts'oxíkará tí ñnko i ntá inkoá yaon la ó sít'ána ñixin tsjak'e inaá —ichro ch'án.

²⁰ Na ntá ntáchro tí sín judío a kixin:

—Cuarenta y seis nánó k'uéjó sín kjuích'éna sín tí ñnko i, a ntá jaha ntáchrúa kixin iní yaon koá sích'éna inaá, ichrúa —ichro sín.

²¹ Kjánchó kienxínhya sín kixin tí ñnko ntáchro ch'ín Jesús la tí cuerpo kuènte ch'án.

²² Ntá tió kjuixin xechón ch'án ntá xrácínkaon tí sín k'uájiko ch'án kixin xíkaha tsíchrónka ch'án, ntá kuítekaon sín tí xroon itén Dios tsíkjin sín ósé la ko tí nkehe tsíchrónka ch'án.

Ch'ín Jesús mé nohe nkehe tónhen asén kaín xín chojni

²³ Tió kjuák'e ch'ín Jesús chjasin Jerusalén tí kia pascua, a ntá itsjé chojni kuinkáchónki sín tí jehe ch'án kixin ó k'uíkón sín tí kjuaxroan kjuasin ch'án.

²⁴ Kjánchó ch'ín Jesús la kuítekakuenhya ch'án tí jehe sín kixin jehe ch'án la ó nohe ch'án jína nkexrí tónhen asén jnkojnko chojni

²⁵ a ntá t'ichjánxienhya ch'án kixin ninkexró chróchenka ch'án nkexrí tjenkayáxin chojni kixin ó kónohe ch'án kaín nkehe tónhen asén kaín xín chojni.

3

Ch'ín Nicodemo kuinixjehé ch'án tí ch'ín Jesús

¹ Kjuák'e ijnko ch'án kuènte tí sín fariseo a mé it'in ch'án Nicodemo. Jehe ch'án mé ijnko nkexro imá tjetjoan kuènte tí sín Israel.

² A ntá ijnko tie kjuíchréhe ch'án tí ch'ín Jesús a nixjehé ch'án ntáchro ch'án kixin:

—Maestro, kónoheni kixin It'éni tjen nkaya nkajni mé tsichr'án k'uinka tsjákohéni kixin tí jehya Dios chrókjuak'ekoa la xitjahya chrókjuásian kjuaxroan jié —ichro ch'án.

³ Ntá kjuátehe ch'ín Jesús ntáchro ch'án kixin:

—A ntá tsotjonka ijnko nkehe imá tjetjoan. Tí nkexro tsokjehya ñixien mé xitjahya ts'ikon tí kjuachaxin ts'etqan Dios —ichro ch'án.

⁴ A ntá ch'ín Nicodemo kjuanchankí ch'án ntáchro ch'án kixin:

—Ó tádana, ¿nkexrí chrókokjína ñixien? ¿Á chrók'uíxanhan tsee naná inaá ntá chrókokjína ñixien ní? —ichro ch'án.

⁵ Ntá kjuátehe ch'ín Jesús ntáchro kixin:

—Ntá tsotjonka ijnko nkehe imá tjetjoan. Jehó tí sín tsíkokjixén ntá la ko kjaxin tsíkokjixén Nchakuen Dios mé ts'áyehé sín tí kjuachaxin kuènte Dios.

⁶ Tió ijnko xjan ts'axrjenixin chojni na mé tí xjan mé chojni ó. A ntá tí Nchakuen Dios tsokjixén ñixien ijnko chojni na ntá ts'áyehé sín tí Nchakuen Dios a.

⁷ Chrakonhya tí nkehe xrjanka kixin “Kaín chojni t'ichjánxin tsokjíhi ñixien.”

* 2:17 Salmo 69.9

⁸ Éxí yóhe tí tinhín tí chjéhe xr̄int̄o ntá noahya nketí kuj̄xin tí xr̄int̄o la ko noahya nketí sátsji na mé k̄j̄xin x̄ikaha kónhen kaín tí nkexro tsíkokj̄ix̄ín Nchaḡkuen Dios —ichro ch'án.

⁹ Ntá x̄ikjanchankí ch'ín Nicodemo inaá k̄ixin:

—¿Nkekuènté k̄ixin x̄ikaha chrókónhen? —ichro ch'án.

¹⁰ Ntá k̄juát̄ehe ch'ín Jesús ntáchro ch'án k̄ixin:

—¿Jaha ijnko maestro imá t'et̄oan tí naciòn Israel ntá naḡa tiénxinhya tí nkehe ní?

¹¹ Chaxín t̄j̄t̄jonka tí nkehe nõna la ko tí nkehe k'uúkuan ntá t̄itekákonnahya jaha.

¹² Tí nkehe t̄j̄t̄jonka la kuènte chjasintajni ó ntá k̄j̄onté la t̄itekákonnahya jaha. ¿Ntá nkexrí chrókúitekávan tí chrót̄jonka nkehe kuènte nkaya nkajni?

¹³ Kohya í jnko nkexro k'uít'ót̄jen chjasin nkaya nkajni. Jehó tí Xjeen Dios K'óna Chojni mé k̄juák'e chjasin nkaya nkajni la ko ntiha kuj̄xin ch'án.

¹⁴ Éxí yóhe ch'ín Moisés tió k'uúxin sín tí nteje, a ntá Dios mé k'uet̄oan k̄ixin sinchekjanoya ch'án ijnko konche tsjak'enkaní ch'án ijnko nta, ntá x̄ikaha k̄juúch'e ch'án k̄juák'enkaní ch'án tí konche tí nta a komá sín tí konche ntá kuaá sín k'uénhya sín, * mé x̄ikaha t̄sonhen tí Xjeen Dios K'óna Chojni mé t'ichj̄ánx̄in k̄ixin tsjak'enkaní ch'án ijnko ntacruz

¹⁵ K̄ixin mé x̄ikaha kaín nkexro tsinkáchónki tí jehe ch'án mé tsaá sín tsochóna sín k̄juachón jnkochr̄ix̄ín.

Dios imá t̄juèhe ch'án tí chojni chjasintajni

¹⁶ K̄ixin Dios mé imá t̄juèhe ch'án chojni chjasintajni ntá k̄juanjon ch'án jnkok̄oáx̄on Xjeen ch'án, k̄ixin ntá jnkojnko chojni tsinkáchónki tí Xjeen ch'án mé ts'it̄j̄anyhya sín tsochóna sín k̄juachón jnkochr̄ix̄ín.

¹⁷ Chr'ánhya Dios tí Xjeen ch'án chjasintajni k̄ixin sinchekjasóte chojni k̄ixin tí j̄je k̄juasin sín. Náhi. Ó jehí ichr'án ch'án tí Xjeen ch'án chjasintajni k̄ixin sinchekaá chojni.

¹⁸ Na mé tí sín tsitekaon tí Xjeen Dios la tsjasótehya sín. A ntá tí sín t̄itekakuenhya sín na mé ó k̄juúxin k̄juúinchekit̄oex̄in Dios tí j̄j̄e sín tsjasóte sín k̄ixin t̄itekakuenhya sín tí jnkok̄oáx̄on Xjeen Dios.

¹⁹ Na mé x̄ikaha Dios sinchekjasóte sín jnkochr̄ix̄ín k̄ixin ó kui tí nkexro t'inkaséyanx̄in chjasintajni na k̄j̄onté ntá ant̄sí má tóxr̄j̄nh̄in sín tí sítié a. A ntá tí t'inkaséyan la náhi k̄ixin naḡa tóxr̄j̄nh̄in sín tí nkehe j̄inahya t̄j̄j̄och'e sín.

²⁰ Kaín tí sín t̄j̄j̄och'e nkehe j̄inahya na mé tóxr̄j̄enhya sín t'inkaséyan chrókóchj̄inehya sín k̄ixin t̄sonox̄inhya tí nkehe j̄inahya t̄j̄j̄och'e sín.

²¹ A ntá tí sín t̄j̄j̄och'e sín tí j̄ina a na mé chéhe sín tóchj̄inehe sín tí t'inkaséyan kuènte Dios k̄ixin t̄sonox̄in tí nkehe ch'e sín k̄ixin ntá kaín x̄in chojni mé tsjats̄oan sín k̄ixin t̄j̄j̄och'e sín tí nkehe tóxr̄j̄nh̄in Dios.

Ch'ín Juan Bautista chrónka inaá kuènte ch'ín Jesús

²² Na ntá chr'éx̄in ch'ín Jesús la ko tí sín k'uájiko ch'án na sákjuí sín estado Judea. Ntaha k'uéjoko sín ch'án kuík̄ite ch'án chojni.

²³ K̄j̄ax̄in ch'ín Juan k̄juák'e ch'án chjasin Enón chjino tí chjasin Salim na mé ntiha k̄juák'e kuík̄ite ch'án chojni k̄ixin ntiha mé yeé ntá siín. Na ntá nkáki sín kuík̄ite sín.

²⁴ Mé x̄ikaha kónhen naḡa k̄juák'echj̄inahya ch'ín Juan.

²⁵ Ntá tí sín k'uájiko ch'ín Juan la ko tí sín judío mé k̄juachax̄in k̄íchó sín k̄ixin nkexrí íchá j̄ina chrókót̄juáxin chojni, ichro sín.

²⁶ A ntá tí sín k'uájiko ch'ín Juan sákjuít̄sjehe sín ch'án chénka sín ch'án k̄ixin:

—Maestro, tí ch'ín k̄juák'ekoa tóhe nt̄arío Jordán, na mé tí nkexro tsíchronka kuènte ch'án, la mé itjen ch'án t̄j̄k̄ite ch'án chojni la ko kaín x̄in chojni mé t̄j̄ichr̄éhe sín ch'án —ichro sín.

²⁷ Na ntá ntáchro ch'ín Juan k̄ixin:

—Tí chrók̄juanjonhya Dios k̄juachax̄in ntá chrok̄juahya chrók'uáyéhe chojni.

²⁸ Ó kuínhr̄ná ntoá k'uéxr̄j̄anka senó k̄ixin janhya tí Cristo. Náhi. Janhan ó kuítuannúa kuít̄onxián nt̄ja t̄soxr̄j̄anka k̄ixin ó tsí ch'án.

²⁹ Éxí yóhe ijnko ch'ín t̄soḡehe na mé jehe ch'án mé ts'áyéhe ch'án tí ichj̄ién ch'án. A ntá tí ch'ín chóxin ch'án mé chéhe asén ch'án t̄jet̄inh̄in ch'án t̄jenixa tí ch'ín ts'áyéhe ichj̄ién a. Mé x̄ikaha janhan imá chána k̄ixin x̄ikaha sitónhen k̄ixin itsjé chojni sitóchj̄inehe sín tí ch'ín Jesús tsinh̄in sín nkehe tí t̄jenix̄a ch'án.

³⁰ A ntá jehe ch'án t'ichj̄ánx̄in ant̄sí ts'et̄oan ch'án. A ntá janhan la kénhyó —mé chro ch'ín Juan.

Tí nkexro kuj̄xin nkaya nkajni

* 3:14 Números 21.9

³¹ Tí nkexro kujixín nkaya nkajíní mé kaín nkehe t'etuɛnhen ch'án. A ntá ijnko chojni kuènte chjasintajni ó mé chrónka kuènte chjasintajni ó. A ntá tí nkexro kujixín nkaya nkajíní mé kaín nkehe t'etuɛnhen ch'án.

³² Jehé ch'án mé chrónka ch'án tí nkehe tsík'ikon ch'án la ko tí nkehe tsíkinhin ch'án. Kjánchó kohya chojni titekaon sín tí nkehe chrónka ch'án.

³³ A ntá jnkójín nkexro titekaon sín tí nkehe chrónka ch'án na mé xíkaha tjàkoxín ch'án jie kíxín chaxín ntoá chrónka Dios

³⁴ kíxín tí nkexro ichr'án Dios mé nixja itén Dios kíxín jehya intsíkoá tí Nchakuen Dios k'uáyéhe ch'án. Náhi.

³⁵ It'éni Dios mé tjuéhe ch'án tí Xjeen ch'án na mé xíkaha ó tsíchjéhe ch'án kjuachaxín kíxín kaín xín nkehe ts'etuɛnhen ch'án.

³⁶ A ntá tí nkexro tsitekaon tí Xjeen Dios mé xíkaha tsochónta sín tí kjuachón jnkochríxín. A ntá tí sín titekakuenhya sín tí Xjeen Dios mé tsochóntahya sín tí kjuachón jnkochríxín xíkaha. Tí sín a mé Dios sinchekjasóte sín jnkochríxín.

4

Ch'in Jesús ikjo ch'án ijnko tjan samaritana

¹ A ntá tí sín fariseo mé kónohe sín kíxín antsí tsjé chojni chréhe sín tí ch'in Jesús kujikite ch'án sín na ntá tí chojni chréhe sín tí ch'in Juan la kánhyó tsjé sín.

² Kjánchó jehya ch'in Jesús kujikite ch'án chojni. Méxra tí sín k'uájiko ch'án mé kujikite sín chojni.

³ A ntá tíó kónohe ch'in Jesús kíxín xíkaha tsíkinhin tí sín fariseo ntá k'uaxrjexín ch'án tí estado Judea xíkjan ch'án estado Galilea inaá.

⁴ Ntá t'ichjánxín ts'átsínka ch'án estado Samaria.

⁵ A ntá kjují ch'án ijnko chjasín mé it'in Sicar kuènte estado Samaria, mé chjino tí nonte tsíkjinchekjtonhen ch'in Jacob tí xjeen ch'án José.

⁶ La ó chjino tjen tí tóye takitsje chojni intá mé it'in Inté Jacob. Na ntá ó chonkíxín kjuí sín ntiha. Méxra tí ch'in Jesús la imá kóxrjé ch'án kíxín imá kjín tí ntja kjuixín ch'án ntá kjuák'etjaxín ch'án chrínta tí tóye takitsje sín intá.

⁷⁻⁸ Ntahó kuitóhe ch'án. A ntá tí sín k'uájiko ch'án sákjuí sín tí chjasín chjinaxón sákjuik'ena sín nkehe sineko sín ch'án. Ntá séhyó ikui ijnko tjan kuènte estado Samaria ikui tjan tsakitsje tjan intá. Ntá ntáchro tí ch'in Jesús kíxín:

—Chjina intsí ntá its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'in Jesús kíxín:

—¿Nkekuènté kíxín jaha ijnko chojni judío mé chrókjuanchana ntá kíxín janhan ijnko chojni samaritana? —mé chro tí tjan a.

(Mé xíkaha kjuanchankí tjan kíxín tí sín judío mé ninkehó t'ikonhya tí sín samaritano.)

¹⁰ Na ntá ntáchro ch'in Jesús kíxín:

—Chrókónoha tí nkehe tjanjon Dios la ko chrókjuatsóan jaha nkexro tí tjetjanchaha ntá ntá chrókjuanchana ntá, ntá chrótjaha tí ntá tjechón chaxín —ichro ch'in Jesús.

¹¹ Na ntá ntáchro tí tjan a kíxín:

—¿Ntá nkexrí kíxín xraahya jaha ninkehó nkehe tsakítsjeyá ntá kíxín tí tóye i la imá njnka? ¿Ntá nkexrí tsochjina tí ntá tjechón tjimé?

¹² Tí nkexro k'uaxrjenixinni mé Jacob mé kuitóeheni tí tóye tjia ntá ntihi la ko kjaxín ik'uí ch'án tí ntá la ko kjaxín ik'uí tí xjeen ch'án la ko tí iko kuènte ch'án. ¿A ntá xá jaha la xá antsí má tjeoan jaha, a ntá jehé ch'án la kénhyó ní? —mé kjuanchankíhi tjan tí ch'in Jesús.

¹³ Na ntá kjuátéhe ch'in Jesús ntáchro ch'án kíxín:

—Tí sín it'i sín tí ntá ntihi tí tóye i nántaxón its'en sín ntá inaá.

¹⁴ A ntá tí sín its'i sín tí ntá sintakjtonhan sín mé i ts'enhya sín ntá inaá. Tí ntá sintakjtonhan sín mé ts'óna éxi yóhe ijnko ntá ts'axrje nkaya asén sín mé tsínkákjanjon tí kjuachón tsochónta sín jnkochríxín —ichro ch'án.

¹⁵ Ntá ntáchro tí tjan a inaá kíxín:

—Chjina tí ntá, a ntá ts'ényana ntá inaá la ko ts'inkahya ntihi tsakítsje ntá —ichro tjan.

¹⁶ Ntá k'uetóan ch'in Jesús kíxín:

—Sátjia tjik'iyehé xiá ntá ts'inkará ntihi inaá —ichro ch'án.

¹⁷ Ntá ntáchro tjan kíxín:

—Chontahya xiná —ichro tjan.

Ntá ntáchro ch'in Jesús kíxín:

—Chaxín ntáchrúa kíxín chontahya jaha xiá.

¹⁸ K'uéchonta jaha in'ó xiá, a ntá tí ch'in chonta jie jehya xiá. Na mé chaxín tí nkehe ntáchrúa kíxín chontahya xiá chaxín —ichro ch'án.

¹⁹ Na ntá kuínhin tjan tíha ntá ntáchro tjan kixin:

—T'íkuən kixin jaha ijnko nkexro chrónka itén Dios.

²⁰ A ntá tí sín k'uaxrjeníxinni k'uíxin ósé mé k'uéxaxinkakonxín sín Dios tí jnə ntihi. Kjánchó jahará chojni judío mé ntáchrórá kixin tí njnko jié chjasin Jerusalén kaín ni chróxraxinkakonxinni Dios —ichro tjan.

²¹ Ntá ch'ín Jesús ntáche ch'án tjan kixin:

—Títekáván kixin tjetsi tí hora a tsoxráxinkákonxínhyará It'éni Dios tí jnə ntihi la ko tsoxráxinkákonxínhyará ch'án chjasin Jerusalén kjaxin.

²² Jahará chojni samaritano chonhyará tí nkexro xráxinkáonrá. Ntá kaín ni chojnini judío mé chóxinni tí nkexro xráxinkaonni. Méxra tí nkexro tsjakjinhin chojni tí jié yámá sín mé ts'axrjeníxin tí sín judío.

²³ Ntá tjetsi tí hora a na mé tí jie ó kui tí hora a na tí sín chaxín tjínkaon sín chróxaxinkaon sín It'éni la mé asén sín ó tsoxraxinkakonxín sín It'éni Dios. Dios mé tóxrxínhin ch'án kixin chojni xíkaha chrókjuich'e sín chróxaxinkakonxín sín ch'án.

²⁴ Jehé Dios na mé nchakuen ó, a ntá tí sín chróxaxinkaon sín ch'án na mé t'ichjánxin kixin asén sín ó tsoxraxinkakonxín sín ch'án —mé xíkaha chrónka ch'ín Jesús.

²⁵ A ntá ntáchro tí tjan a kixin:

—Ó nòna kixin itsi tí nkexro Mesías, tí nkexro a mé Cristo. Tió tsi ch'án ntá tsjakoheni ch'án kaín xín nkehe —ichro tjan.

²⁶ Ntá ntáchro ch'ín Jesús kixin:

—Tí nkexro a la mé janhan tjetjuá jie —ichro ch'án.

²⁷ Na ntá tí sín k'uájiko ch'án mé kjanxin sín tí chjasin a, ntá chrakon sín k'uúkon sín kixin tjenixjehé ch'án ijnko chojni chjin. Kjánchó nijnko sín kjuanchankíehya sín ch'án kixin nkehe tjínkaon ch'án na nkekuénté nixjehé ch'án tí tjan a.

²⁸ A ntá tí tjan mé kjuak'e tjan tí tóa nonte ntá sákjuí tjan tí chjasin ntaha ntáche tjan tí sín ntaha kixin:

²⁹ —Intará sátsjitsjeheni ijnko ch'ín chrónka ch'án kaín xín nkehe kjuít'a tí senó a. ¿Xá chrókójehya tí nkexro i Cristo? —ichro tjan.

³⁰ Na ntá tí chojni a mé xrákuaxín sín tí chjasin a ntá kuitsjehe sín tí ch'ín Jesús.

³¹ Naxa tihya sín nachrohe tí sín k'uájiko ch'án mé chrónóehé sín ch'án ntáchro sín kixin:

—Maestro, kjaxian chrókjonte nkehe —ichro sín.

³² Kjánchó ntáchro ch'án kixin:

—Ó chontá janhan nkehe siné. Jahará la kjá naxa noahyará —ichro ch'án.

³³ A ntá tí sín k'uájiko ch'án mé kjuanchankíhi sín kíchó sín kixin:

—¿Xá jnkójín sín tsíkikao sín nkehe kjóne ch'án? —ichro sín.

³⁴ Kjánchó ntáchro ch'ín Jesús kixin:

—Éxí yohé chrókjoné nkehe mé tí sít'a tí xra la ko tsjixinna tí xra kuènte tí nkexro chr'ánna k'uinka.

³⁵ Ntáchrórá kixin: “Noó nitjó naxa t'itjáyán tsochónhenni ntá tsotjáni noatrigó”, ichrorá. Kjánchó ntáxrjan kixin chrótsjehérá tí no a kixin ó tsícha la ko ó tñnkáxámá kixin ó jína chrótjáni.

³⁶ Tí sín ch'e xra tjá sín mé tsoxenkehe sín. A ntá tí nkehe tjá sín mé ts'áyéhé kjuachón jnkochríxín. Ntá tí sín k'uenká sín nonte la ko tí sín tjá sín jnkokón tsochéhé sín.

³⁷ Mé xíkaha tsoxitéyá tí nkehe ntáchro sín kixin: “Ijnko nkexro mé t'enká noa, a ntá ókjé sín tsotjá sín tí noa a”, ichro sín.

³⁸ A ntá janhan ichr'an tí jahará tsotjará ijnko nonte tsík'énkahyará. Na mé ókjé sín kjuích'e sín xra ntá jahará tsjachará tí xra kjuích'e tí sín a —ichro ch'án.

³⁹ A ntá itsjé tí sín samaritano kuènte tí chjasin ntiha mé kjuankixin kuinkáchónki sín tí jehe ch'án kixin xíkaha chrónka tjan kixin jehe ch'án ó chrónka ch'án kaín xín nkehe kjuích'e tjan tí senó a.

⁴⁰ A ntá tió kuínhin sín tí nkehe chrónka tjan ntá kui sín tí tjen ch'ín Jesús ntá chrónóehé sín ch'án kixin tsitohé ch'án ntiha. Ntá kuítohé ch'án ntiha iyó yaon.

⁴¹ Ntá itsjé sín kjaxin kuinkáchónki sín ch'án kixin tí nkehe kuínhin sín nixja ch'án.

⁴² Ntá ntáche sín tí tjan a kixin:

—Ntá jie jehya jehó tí nkehe chrónka kuítekaonni. Náhí. Tí jie ó kuínhini nixja ch'án ntá kónoheni kixin jehe ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesús kjuínchekitohé jína ijnko xjeen ijnko ch'ín ch'ehe xra gobierno

⁴³ A ntá k'uátsínka iyó yaon ntá ch'ín Jesús k'uaxrjexín ch'án estado Samaria ntá sákjuí ch'án nó estado Galilea.

⁴⁴ A ntá jehe ch'án tsintáchro ch'án kixin tí nkexro chrónka itén Dios la tí chjasén sín mé tjikosáyehya sín ch'án.

⁴⁵ Kjánchó tió kjuíji ch'án tí estado Galilea na mé k'uáyéhe sín ch'án la ko kjuikosáyehe sín ch'án jína kixin kjaxin sín sátsíkji sín tí kia pascua chjasin Jerusalén tsík'ikon sín kaín tí kjuaxroan kjuasixín ch'án tí kia ntiha.

⁴⁶ Ntá xíkjan ch'ín Jesús inaá chjasin Caná, estado Galilea, na mé ntiha tsíkjinchekjaminca ch'án tí ntá tí xranvino a. Ntaha mé kjuák'e ijnko ch'ín ch'ehe xra gobierno. A ntá níhi tí xjeen ch'án ntoa itjen chjasin Capernaum.

⁴⁷ Ntá kuínhin tí ch'ín ch'ehe xra gobierno kixin itjen ch'ín Jesús tí estado Galilea tsíkixín ch'án estado Judea ntá sákjuichréhe ch'án chrónóhe ch'án tí ch'ín Jesús kixin sáchrókjui ch'ín Jesús ntøe ch'án sinchekitohe jína tí xjeen ch'án ó tjet'en xjan.

⁴⁸ Ntá ntáchro ch'ín Jesús kixin:

—Kja tí jahará tí chrók'uikonhyará kjuaxroan chrókjuásian la chrókuinkachónkihýará tí janhan —ichro ch'án.

⁴⁹ Ntá chrónóa tí ch'ín ch'ehe xra gobierno ntáchro ch'án kixin:

—¿Á chrókójínahya sáchrókjuini ntona jaí kixin xjanna ó tjet'en? —ichro tí ch'ín a.

⁵⁰ Ntá kjuátéhe ch'ín Jesús ntáchro ch'án kixin:

—Ikjan sátjia ntøa kixin tí xjaan na ó jína tjen jie —ichro ch'án.

Ntá kuítekaon ch'án nkerí ichro ch'ín Jesús ntá sákjuí ch'án.

⁵¹ A ntá kjuíji ch'án chjino ntøe ch'án ntá xrinahya tí sín ch'ehe sín ch'án xra kjuixinhin sín ntia chrónka sín kixin:

—Xjaan la ó jína tjen —ichro sín.

⁵² Ntá kjuanchankíhi ch'án sín kixin nkehora kjuankíxin kuítóhe xjan jína, na ntá chrónka sín kixin:

—Ijna la una kónjín mé kjuin tí sóa —ichro sín.

⁵³ Ntá kónohe tí it'é xjan kixaha tí hora tsintáchro ch'ín Jesús kixin tí xjeen ch'án na ó jína tjen. A ntá jehe ch'án la ko kaín tí sín siín ntøe ch'án mé kuinkáchónki sín tí ch'ín Jesús.

⁵⁴ Tíha mé tí yóxin kjuaxroan kjuasin ch'ín Jesús tió kuixín ch'án estado Judea ikjan ch'án estado Galilea.

5

Ch'ín Jesús kjuínchekitohe jína ijnko ch'ín tsík'en tøte chjasin Betesda

¹ Ntá chr'éxin tí sín judío mé kjuasin sín ijnko kia na ntá ch'ín Jesús xíkjan ch'án chjasin Jerusalén inaá.

² A ntá ntaha chjino tí ntója t'ixenxín kolélo chjasin mé tjen ijnko pila tóxroyéya ntá mé nkíva hebreo tí ntá mé it'in Betesda. A ntá chrínta tí pila siín in'ó cuarto ntsíntsi.

³ Ntaha tjejótsínka nchónhya chojni níhi, iso sín t'ikonhya la ko iso sín xitjahya tji la ko iso sín tsík'en tøté. Tjejóchónhen sín kixin nkehora tsínki ntá

⁴ kixin nántaxón k'uínkajin ijnko ángel kjuiánkí ntá kjuínchekínki ntá. A ntá tí nkexro senó tsjiánkí ntá mé tsitøhe jína kjónté cualquiera chín chóna.

⁵ A ntá ntaha kjuák'e ijnko ch'ín na mé chóna ch'án treinta y ocho nánó níhi ch'án.

⁶ A ntá tió k'uíkon ch'ín Jesús kixin tjetsínka tí ch'ín a la ko kónohe ch'án kixin ósé níhi ch'án, ntá kjuanchankí ch'án kixin:

—¿Á tjinkávan tsitøha jína? —ichro ch'án.

⁷ Ntá ntáchro tí sjinníhi kixin:

—Chóntahyani ninkexró tsjinkítsani tsjiánkíni ntá. A ntá tí tjinkaonni chrókjuiánkíni ntá la ntá ókjé nkexro tjítaón ntia tjíankí ntá senó —mé chro tí sjinníhi.

⁸ A ntá k'uetøan ch'ín Jesús kixin:

—Ijie la t'inkatjen, tjatsíyan kaniáa, itjia —ichro ch'án.

⁹ Ntá tuénxín kuítóhe ch'án jína, ntá kjuatsen ch'án kaniéhe ch'án kjuankíxin itji ch'án. Kjánchó yaon sábado tíha mé tí yaon t'ok'éhe sín.

¹⁰ Mé xíkaha tí sín judío ntáche sín tí ch'ín kuítóhe jína kixin:

—Ijie tí yaon t'ok'éheni ntá kohya kjuachaxin tsamá kaniáa —ichro sín.

¹¹ A ntá ntáchro tí ch'ín a kixin:

—Tí nkexro kjuínchekitøna jína mé k'uetøanna kixin tsjatsíyan kaniána la ko sátsjia —ichro ch'án.

¹² Ntá kjuanchankíhi sín ch'án kixin:

—¿Nkexéhe tí nkexro k'uetøanhan kixin tsjatsíyan kaniáa la ko sátsjia? —ichro sín.

¹³ A ntá tí ch'ín tsíkitohe jína na í kjuátsoanhya ch'án tí nkexro kjuínchekitohe ch'án jína kixin ntaha la siín nchónhya chojni, a ntá ntahó k'uítjáyaxín ch'ín Jesús.

¹⁴ A ntá chr'éxin ch'ín Jesús xeta ch'án tí ch'ín a nkaxenhen tí núnko jie ntá ntáchro ch'án kixin:

—Tsjehé kixin ijie la ó jina tjen jaha la í tjásinnya jie inaá. A ntá tí tsjásian jie inaá a ntá antsí má jínahya tsonhan —ichro ch'án.

¹⁵ A ntá sákjuí t'í ch'ín a ntá chénka ch'án t'í sín judío kixin jehe ch'ín Jesús mé kjuínchekitohe ch'án jina.

¹⁶ Mé xikaha t'í sín judío kjuankíxin sín chónkíhi sín t'í ch'ín Jesús la ko chrók'óyán sín ch'án kixin kjuínchekitohe ch'án chojni jina t'í yaon t'ok'éhe sín.

¹⁷ Kjánchó ch'ín Jesús ntáche ch'án t'í jehe sín kixin:

—Méxra T'aná naxa tjech'e ch'án xra. A ntá janhan kjaxin tjét'a xra —ichro ch'án.

¹⁸ Méxra xikaha t'í sín judío antsí tjínkaon sín chrók'óyán sín ch'án kixin kuítekakuenhya ch'án t'í ley kuente t'í yaon t'ok'éhe sín la ko kjaxin ntáchro ch'án kixin t'í It'é ch'án la mé Dios, mé xikaha ncheyóhe ch'án asén ch'án Dios.

Tí kjuachaxin chóna t'í Xjeen Dios

¹⁹ Ntá ntáche ch'ín Jesús t'í jehe sín kixin:

—Jnko nkehe tjeoan tsotjonkará kixin t'í Xjeen Dios nkaya nkajní t'í jehó kjuachaxin kuente ó la mé xitjahya sich'e xra. Jehó t'í xra t'íkon ch'án tjech'e It'é ch'án mé kjaxin ch'án xikaha ch'e ch'án.

²⁰ A ntá t'í It'é mé tjuèhe t'í Xjeen ch'án, la ko tjakohe ch'án kaín xín xra ch'e ch'án, la ko antsí tjeoan t'í xra naxa tsjakohé ch'án kixin ntá tsochrakonrá kixin ts'íkonrá t'í xra sich'e ch'án.

²¹ T'í It'é mé chóna kjuachaxin nchexechón t'í sín tsík'en la ko chjéhe ch'án sín kjuachón. A ntá t'í Xjeen kjaxin chóna kjuachaxin tsochjéhe kjuachón t'í nkexro tjínkaon tsochjéhe ch'án.

²² A ntá It'é la í sinchekitoexínnya ch'án ijíé ninkexró. Kaín t'í kjuachaxin kuente ch'án chjéhe ch'án t'í Xjeen kixin sinchekitoexín ch'án ijíé chojni chjasintajni

²³ kixin ntá kaín chojni tsjikosáyehe sín t'í Xjeen éxi yóhe tjikosáyehe sín t'í It'é ch'án. Tí sín tjikosáyeheya t'í Xjeen xikaha kjaxin tjikosáyeheya sín t'í It'é kixin jehe ch'án mé tsichr'án t'í Xjeen.

²⁴ Jnko nkehe tjeoan tsotjonkará kixin t'í jnkojínra tjeotinhínra t'í nkehe tjákua la ko tinkachónkirá t'í T'aná, mé t'í nkexro ichr'ánna, na mé xikaha ó chontará t'í kjuachón la ko tsjasótiahayará, na mé kuítóhéra t'í tjia chrók'uénxinrá, la ntá jie kjuankíxinrá tsochontará t'í kjuachón jnkochríxin.

²⁵ Jnko nkehe tjeoan tsotjonkará kixin ó tsi t'í yaon, na mé jie tíha, mé xikaha tsonhen kixin t'í sín tsík'en tsinhin sín tsonixja t'í Xjeen Dios. A ntá t'í sín tsitekaon sín na mé ts'ejóchón sín.

²⁶ T'í It'é mé chóna ch'án kjuachaxin tsjanjon ch'án t'í kjuachón la ko jehe ch'án mé chjéhe ch'án kjuachaxin t'í Xjeen kixin kjaxin t'í Xjeen tsjanjon t'í kjuachón

²⁷ la ko kjaxin chjéhe ch'án kjuachaxin t'í Xjeen ch'án sinchekitoexín t'í ijíé chojni chjasintajni kixin jehe mé t'í Xjeen Dios K'óna Chojni.

²⁸ Chrakonhyará tjetjonkará xikaha. Na mé ó tsi t'í yaon kixin kaín t'í sín tsík'en mé tsinhin sín tsonixja ch'án.

²⁹ A ntá ts'axrjexín sín t'í tòye la t'í sín kjuích'e sín xra jina mé tsoxechón sín ntá tsochóna sín t'í kjuachón. A ntá t'í sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóna ch'ín Jesús

³⁰ T'í jehó kjuachaxin kuéntana xitjahya sít'a ninkehó xra. A ntá jie ntákitóaxián t'í ijie éxi k'uétuanna T'aná. A ntá t'í nkehe ntákitóaxián la jina ntoá kixin tjínakonhya sít'a éxi tjínkavan. Náhi. Éxi tjínkaon T'aná, t'í nkexro ichr'ánna, mé xikaha tjét'a.

³¹ A ntá t'í chrórxjanka kixin nkexrí imá jina janhan la tíha la ninkehó kjuachaxin chróchóntahya.

³² Tjen í jnko nkexro tjechrónka nkexrí tjén janhan a ntá ó nóna kixin t'í nkehe chrónka ch'án la sínkí.

³³ Jahará tsíkétuénhénra chojni kjuíkanchankíhi sín t'í ch'ín Juan kixin nkexríinchi tjén janhan. A ntá t'í nkehe tsíkatehe ch'án la chaxín ntoá tíha.

³⁴ Kjánchó chontaxínnya t'í nkehe tjeochrónka nijnko chojni chjasintajni nkexríinchi tjén janhan. Jehí ntáxrjan tíha kixin jahará jina chrókuaárá.

³⁵ T'í ch'ín Juan kjuák'e éxi yóhe ijnko xrohi kjuák'eche k'uínkaséyanxín la ko jahará kócháhará xikaha, kjánchó séhya kóxrjínhanrá t'í xrohi a.

³⁶ Kjánchó síin nkehe antsí tjeoan tjakoexín nkexrí tjén janhan, a ntá kánhyó tjeoan t'í nkehe tsíchrónka t'í ch'ín Juan. Tí xra tjét'a, mé t'í xra kjuanjon T'aná sít'a tsjixinna t'í xra, na mé tíha mé tjakoexín kixin chaxín T'aná tsíchr'án k'uinka.

³⁷ Kjaxin jehe T'aná, t'í nkexro ichr'ánna, mé chrónkaxín ch'án nkexrí tjén janhan. A ntá jahará naxa kíénhyará t'í nkehe nixja ch'án la ko k'uikonhyará ch'án

³⁸ la ko kjaxin itén ch'án kuítqehya nkaya kjará kixin tjinkákonhyará tsítékáonrá tí Xjeen Dios tsíchr'án tsíki.

³⁹ Jahará nchekuáxinrá jína tí xroon tsíkjin tí sín tsíchrónka itén Dios ósé kixin ntáchrórá kixin ntaha ts'itjaxínrá tí kjuachón tsochontará jnkochrín. A ntá tí nkehe tsíkjin sín ósé mé chrónka kuénte janhan.

⁴⁰ Kjánchó jahará tjinkákonhyará tsochjinará tí tjén janhan kixin chrók'uayéhérá tí kjuachón a.

⁴¹ Janhan na tjéyáhya kixin chojni chrókuikosáyana sín.

⁴² A ntá janhan ó nóna kixin jahará la tjuèhyará Dios.

⁴³ Mé k'uinkaxian janhan tí kjuachaxin kuénte T'aná. Kjánchó jahará la títékákonahyará. A ntá tí chrókui i jnko nkexro kjuachaxin chrókuakitsjeníxin asén ó, a ntá tíha mé tjinkáonrá chrókuítékákonhérrá.

⁴⁴ ¿Nkexrí chrókuítékáonrá jahará kixin tjéyará kixin tí chojni chjasintajni chrókuikosáyahará sín, a ntá tjéyáhyará tí kjuachaxin chrókujuanjon jnkokoá Dios?

⁴⁵ Tsontáchróhyará kixin janhan tsjánchá jje tí jahará nkayakon T'aná. Náhi. Ch'ín Moisés mé tsjanchia ch'án jje tí jahará kixin tsontáchrórá kixin jehe ch'án kuinkachónkirá.

⁴⁶ Kja tí jahará chrókuítékáonrá nkehe tsintáχρο ch'ín Moisés ntá chrókuítékáonrá tí janhan kixin tí xroon tsíkjin ch'án mé chrónka kuénte tí janhan.

⁴⁷ A ntá tí títékákonhyará tí nkehe tsíkjin ch'án, ¿ntá nkexrí chrókuítékákonará nkehe ntáxrjan janhan? —ichro ch'án.

6

*Ch'ín Jesús kjuanjon ch'án nkehe kjóne in'ó mil chojni
(Mt. 14.13-21; Mr. 6.30-44; Lc. 9.10-17)*

¹ A ntá chr'éxin ntá sákjui ch'ín Jesús k'uátóye ch'án tí ntayaon Galilea na mé tí ntayaon Tiberias tíha.

² A ntá nchónhya chojni tinkáchréhe sín kixin k'uíkon sín tí kjuaxroan jje kjuasin ch'án kjuínchekitqhe ch'án jína tí sinníhi.

³ A ntá jehe tí ch'ín Jesús chríin ch'án ijnko jna na ntá ntaha kjuák'etjaxin ch'án la koí tí sín k'uájiko ch'án a.

⁴ A ntá í séhya ts'ixin tí kia pascua a mé kié tí sín judío a.

⁵ A ntá tí ch'ín Jesús k'uíkon ch'án kixin nchónhya chojni chríin sín kjuichréhe sín ch'án ntá kjuanchankíhi ch'án tí ch'ín Felipe kixin:

—¿Nketi chrók'uengani nkehe sine kain tí chojni a? —ichro ch'án.

⁶ Mé xíkaha ntáχρο ch'án kixin siná nkehe tsixro ch'ín Felipe. A ntá tí ch'ín Jesús la ó nohe ch'án nkehe tí kjuaxroan tsjasin ch'án.

⁷ Ntá kjuátehe ch'ín Felipe ntáχρο ch'án kixin:

—Kjóté doscientos chichaon denario chróchóntani chrók'uínáxin tí niotja la naxa chrókuachahya chrók'uáyéhe jnkojnko sín tot'qo tí niotja a —ichro ch'án.

⁸ A ntá ch'ín Andrés, ijnko tí sín k'uájiko ch'ín Jesús la sagvé mé ch'ín Simón Pedro mé ntáχρο ch'án kixin:

⁹ —Ntíhi tjen ijnko xjan ntoa chóna in'ó niotja tsík'óna noa cebada la ko chóna ch'án yaá koche. ¿Xá chrókjuacha tíhó kixin nchónhya chojni siín? —ichro ch'án.

¹⁰ A ntá ntáχρο ch'ín Jesús kixin:

—Tétuénhén tí sín siín a kixin ts'ixitjaxin sín —ichro ch'án.

A ntá nchónhya ika yoa siín na ntá ntaha k'uíxitjaxin sín na mé éxi in'ó mil chojni k'uíxin sín.

¹¹ A ntá ch'ín Jesús kuákja ch'án tí niotja ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. A ntá jehe sín k'óxikayéhe sín chjéhe sín kain tí sín sitjaxin a. Xíkaha kjaxin k'óxikayéhe sín tí koche. A ntá kain sín kjóne sín éxi tjinkaon sín.

¹² Kjuixin kjóne sín ntá k'uetuénhen ch'ín Jesús tí sín k'uájiko ch'án ntáχρο ch'án kixin:

—Tjénájírrá tí nkehe tot'qo síxéhe sín kixin ts'itjáyanhya ninkehó —ichro ch'án.

¹³ Ntá xíkaha jehe sín kjuenájín sín kjuínchekaón sín teyo ntaxra tí tot'qo tí in'ó niotja tsík'óna noa cebada síxéhe sín tí kjuixin tsíkjine sín.

¹⁴ A ntá tí sín kjóne tí niotja k'uíkon sín tí kjuaxroan jje kjuasin ch'ín Jesús ntáχρο sín kixin:

—Jehe ch'án mé chaxin tí nkexro tsíchr'án Dios kixin itsi tí chjasintajni tsjakqeheni ch'án —ichro sín.

¹⁵ Kjánchó ch'ín Jesús mé kónohe ch'án kixin tjinkaon sín sáchrókjuiko sín ch'án chróchr'áxenhén sín ch'án tí xra rey kixin chrók'uetqan ch'án. A ntá jehe ch'án tjinkakonhya ch'án tíha ntá jehó ch'án sáxíkji ch'án nteje inaá kjuák'e ch'án ntíha.

Éxi ijnko ntia xikaha kjuítaon ch'ín Jesús tí ntayaon
(Mt. 14.22-27; Mr. 6.45-52)

¹⁶ A ntá ó kóntó ntá tí sín k'uájiko ch'ín Jesús k'uínkajinxin sín jna sákjuí sín chrínta ntayaon
¹⁷ k'uit'ótjen sín ijnko ntabárcɔ kjuankíxin sín ts'atòye sín ntayaon sátsji sín chjasin Capernaum. Na ó k'uúxin tie na naxa kjanhya ch'ín Jesús.

¹⁸ Ntá kjuankíxin chjéhe xrinto tsanká ntá kjuankíxin tinkákjaminkí ntá.

¹⁹ A ntá tió kjuacha sín á in'ó o injon kilómetro ntá xríñahya k'uikon sín tí ch'ín Jesús tinkákóchjinehe ch'án tí ntabárcɔ, éxi ijnko ntia tjetjitaón ch'án tí ntá, ntá k'uikon sín ntá imá chrakon sín.

²⁰ Kjánchó ntáchro ch'án kíxin:

—Janhan tíha. Chrakonhyará —ichro ch'án.

²¹ Ntá imá chéhe sín k'uit'ótjen ch'án tí ntabárcɔ. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'ín Jesús

²² A ntá tí yaon chr'éxin na mé tí sín kuitóhe tóhe ntayaon na mé ó nohe sín kíxin tinkoáxón ntabárcɔ k'uékjak'e ntiha la ko ó nohe sín kíxin ch'ín Jesús kjá ni sátsjikohoya sín ch'án na mé k'uikon sín kíxin jehó tí sín k'uájiko ch'án sátsíkji sín.

²³ Kjánchó siín ntabárcɔ tíxin chjasin Tiberias tinkákóchjinehe tí nó kjonéxin sín tí niotja kjuanchaxín ch'ín Jesús kjuasáyé Dios.

²⁴ A ntá tió k'uikon sín kíxin kohya ch'ín Jesús la ko kjaxin kohya tí sín k'uájiko ch'án, ntá jehe sín mé k'uit'ótjen sín iso ntabárcɔ ntá sákjuí sín chjasin Capernaum sákjuíkjetá sín tí ch'ín Jesús.

Ínchéni Jesús mé éxi niotja tjanjon kjuachón

²⁵ A ntá tóhe ntayaon xéta sín tí ch'ín Jesús ntá kjuanchankíhi sín ch'án kíxin:

—Maestro, ¿nkesá k'uinka ntihi? —ichro sín.

²⁶ Ntá kjuátgehe ch'ín Jesús ntáchro ch'án kíxin:

—Ó nõna kíxin jahará tjéyará tí janhan kíxin kjonterá niotja kókjahará, la jehya kíxin kiéxinrá tí kjuaxroan kjuásian.

²⁷ Chrókjuich'ehyará tí xra chrók'uite tí nkehe chrókjonterá tjoka tsjeje ó. Náhi. Chrókjuéyará tí nkehe chrókjuéjehya chrókjonterá chrók'uayéxinrá tí kjuachón jnkochrín. Tí nkehe tjanjon tí Xjeen Dios K'óna Chojni mé chrókjonterá kíxin It'é ch'án mé tjákoqxín ch'án kíxin tí Xjeen ch'án mé chóna kjuachaxién tí jehe ch'án —ichro ch'ín Jesús.

²⁸ A ntá kjuanchankíhi sín ch'án kíxin:

—¿Nkexrí chrókjuich'eni chrokjuinhexiteyáni nkexrí tjinkaon Dios? —ichro sín.

²⁹ A ntá kjuátgehe ch'ín Jesús ntáchro ch'án kíxin:

—Dios mé tjinkaon ch'án kíxin chrókuinkachónkirá tí nkexro tsichr'án ch'án —ichro ch'án.

³⁰ Ntá kjuanchankíhi sín ch'án kíxin:

—¿Nkehe tí kjuaxroan chrókjuákoéxianni chrók'uikonni kíxin ntá chrókuitekaonni tí jaha? ¿Nkehe tí xra ch'e jaha?

³¹ Tí sín tsik'axrjenixinni k'uéjó sín ósé mé kjóne sín maná k'óna niotja tió k'uúxin sín nteje mé xikaha tí xroon kuente Dios tsikjin ijnko nkexro ósé ntáchro kíxin: “Kjuanjon ch'án tí nkehe kjóne sín mé niotja tsíkixín nkaya nkajní”* —ichro sín.

³² A ntá kjuátgehe ch'ín Jesús ntáchro ch'án kíxin:

—Ijnko nkehe tjetoan tjonkará kíxin jehya ch'ín Moisés kjuanjon tí maná k'óna niotja k'uínkajinxin nkaya nkajní. Náhi. T'aná mé tjetjanjon tí niotja chaxín jina k'uínkajinxin nkaya nkajní.

³³ Tí niotja tjanjon Dios mé tí nkexro k'uínkajinxin nkaya nkajní tjejóchónxin chojni chjasintajni —ichro ch'án.

³⁴ Na ntá kjuanchia sín kíxin:

—Jaha ínchéni, jnkochrín chjehéni tí niotja a —ichro sín.

³⁵ A ntá ntáchro ch'ín Jesús kíxin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín ntá.

³⁶ Kjánchó éxi k'uétjonkará senó na ó k'uikonrá tí janhan na kjónté naxa titekákonhyará.

³⁷ A ntá kaín tí sín chjina T'aná la tsochjina sín tí janhan. A ntá kaín tí sín tjejótóchjinehe sín tí janhan la tsétuñahya sín kíxin sátsji sín.

³⁸ Janhan k'uinkaxian nkaya nkajní jehya tí xra tóxrjina chrókjuít'a. Náhi. K'uinka kíxin chrókjuít'a tí xra tóxrjínhin tí nkexro tsichr'ánna.

³⁹ A ntá kaín mé tí nkexro tsichr'ánna mé tjinkaon ch'án kíxin sjintak'itjáyanyha ninkexró tí sín chjina ch'án na mé tjinkaon ch'án kíxin janhan mé sjintaxechón kaín sín tí yaon tsjixixín.

* 6:31 Salmo 78.24

⁴⁰ Mé xíkaha tjinkaon tí nkeexo tsíchr'ánna kixin kaín tí sín ts'ikon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrixin. A ntá janhan sintaxechnón sín tí yaon tsjixixín —ichro ch'án.

⁴¹ A ntá tí sín judío kjuankixin sín kjonta sín tí ch'ín Jesús kixin tsintácho ch'án kixin jehe ch'án mé tí niotja k'uínkajinxin nkaya nkajní.

⁴² Mé ntácho sín kixin:

—¿Á Jehya tí Jesús, it'é mé it'ín José, na mé chóxinni tí it'é la ko tí lné ch'án? ¿Ntá nkeuènté ntácho ch'án kixin nkajní k'uínkajinxin ch'án? —ichro sín.

⁴³ Ntá kjuátehe ch'ín Jesús ntácho ch'án kixin:

—Títoherá tjóntahyará tí janhan.

⁴⁴ Kohya nkeexo chrókóchjina tí tjeñ janhan tí chrókuínkĩsahya T'aná. A ntá tí sín tóchjina na mé sintaxechnón sín tí yaon tsjixixín.

⁴⁵ Na mé tí sín k'uéchronka itén Dios ósé mé tsíkjin sín xroon ntácho kixin: “Dios mé tsjakohe ch'án kaín chojni.”† A ntá kaín tí sín tsíkinhin tí nixja T'aná la ko kjuakohe ch'án sín mé sitóchjina sín tí tjeñ janhan.

⁴⁶ Jehya kixin itjen ijnko chojni tsík'ikon T'aná. Náhi. Jehó tí nkeexo kujxin tí tjeñ Dios mé tsík'ikon ch'án Dios.

⁴⁷ Chaxín tí nkehe tjéxranjka kixin tí sín titekaon sín tí janhan mé ó tsochóna sín kjuachón jnkochrixin.

⁴⁸ Janhan na mé tí niotja tjanjon kjuachón.

⁴⁹ Tí sín k'uaxrjenixinrá k'uéjé ósé kjóne sín tí maná k'óna niotja tió k'uéjé sín nteje, a ntá kjónté ik'uén sín k'uítjayan sín.

⁵⁰ Tí nkehe xrjanjka mé tí niotja k'uínkajinxin nkaya nkajní, a ntá tí sín sine tí niotja a mé ts'enhya sín.

⁵¹ Janhan mé tí niotja tjechnón k'uínkajinxin nkaya nkajní. A ntá tí sín sine tí niotja a mé ts'ejóchnón sín jnkochrixin. Tí niotja tsánjuan ts'ejóchnónxin chojni chjasintajni mé ntóna tíha —ichro ch'ín Jesús.

⁵² A ntá tí sín judío mé sitjité sín itjo sín kichó sín ntácho sín kixin:

—¿Nkexrí chrókjuanjon ch'án ntøe ch'án chrókjóneni? —ichro sín.

⁵³ A ntá kjuátehe ch'ín Jesús ntácho ch'án kixin:

—Ntá tsotjonkará kixin tí sintehyará ntøe tí Xjeen Dios K'óna Chojni, la ko tí ts'ihyará ijníe ch'án, ntá tsochontahyará kjuachón jahará.

⁵⁴ Tí sinterá ntóna la ko it'irá jñina ntá tsochontará kjuachón jnkochrixin la ko janhan mé sintaxechnóna tí yaon tsjixixín.

⁵⁵ Kixin ntóna na mé chaxín nkehe ine chojni la ko jñina na mé chaxín nkehe it'i chojni.

⁵⁶ Tí sín ine ntóna la ko it'i sín jñina mé jnkokóá tjenkayáxinkian sín la ko janhan mé xríkjan sín.

⁵⁷ T'aná tsíchr'án ch'án tí janhan mé chóna kjuachaxin, a ntá janhan mé tjéchnonxin tí jehe ch'án. Ntá tí sín sine tí ntóna mé ts'ejóchnónxin sín tí janhan.

⁵⁸ A ntá tjénixja kuènte tí niotja k'uínkajinxin nkaya nkajní na mé yóghya tí maná tsík'óna niotja kjóne tí sín tsík'axrjenixinrá ósé kixin jehe sín na kjóne sín na kjónté k'uén sín. A ntá tí sinterá tí niotja k'uínkajinxin nkaya nkajní ntá ts'ejóchnóna jnkochrixin —mé chro ch'ín Jesús.

⁵⁹ Kaín tíha mé kjuakohe ch'án tí sín tsíkójnkotséxin tí njnko Israel chjasin Capernaum.

Tí nkehe chrónka ch'ín Jesús mé tjanjon kjuachón jnkochrixin

⁶⁰ A ntá tió kuínhin sín tí nkehe kjuako ch'ín Jesús ntá itsjé tí sín k'uájiko ch'án ntácho sín kixin:

—Imá xrá tí nkehe chrónka ch'án. ¿Xá nkeexo chrókuínhin tíha? —ichro sín.

⁶¹ A ntá kónohe ch'ín Jesús kixin xíkaha tóxakonhen sín kíenxinhya sín tí nkehe tsintácho ch'án ntá kjuanchankíhi ch'án sín kixin:

—¿Á kjaxínrá tjinkákonhyará tsinhínra tíhi?

⁶² ¿Ntá nkexrí tsonhen chrók'uikonrá kixin tí Xjeen Dios K'óna Chojni mé sátsji ch'án ínaa tí nó tsíkixin ch'án tí tsíkjak'e ch'án ósé?

⁶³ Tí Nchakuen Dios mé tjanjon tí kjuachón, a ntá tí nto la ninkehó sínkíhya. Na ntá tí nkehe tjétjonkará na mé kuènte tí Nchakuen Dios na mé tjejóchnónxin chojni.

⁶⁴ Kjánchó isorá naxá titekákonnahyará —ichro ch'án.

Mé xíkaha ichro ch'án kixin tí xránkixín ó kónohe ch'án kixin nkeexo tí sín tsitekakuenhya sín ch'án la ko kónohe ch'án kixin nkeexo sinchekji ch'án.

⁶⁵ A ntá ntácho ch'án kixin:

—Méxra xíkaha k'uétjonkara kixin ninkexró tsqchjina tí tjén janhan tí tsjinkĩtsahya T'aná —ichro ch'án.

⁶⁶ A ntá kjuixin tíha ntá nchónhya tí sín k'uék'ajiko ch'in Jesús ntá xrinahya kuitqhe sín, í chrèhya sín ch'án.

⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kixin:

—¿Á kjaxinrá tjinkáonrá xíkaha sáchrókjuirá? —ichro ch'án.

⁶⁸ Ntá kjuátqhe ch'in Simón Pedro kixin:

—Jaha Inchéni, ¿nkekuènté tjanchankíhíni á sáchrókjuini ókjé? Jaha tí tan chronka a mé tsochóntaxínni kjuachón jnkochríxín

⁶⁹ ntá kuítekaonni ntá ó noheni chaxín kixin jaha tí Cristo mé Xjeen Dios tjechón —ichro ch'án.

⁷⁰ Ntá kjuátqhe ch'in Jesús ntáchro ch'án kixin:

—Janhan kjuéyá tí kaín rá teyórá la ko jnkojínrá ntihi mé ts'ónará ijnko jínahya —ichro ch'án.

⁷¹ Tíha mé t'axrxjén tí ntáchro ch'in Jesús chrónka ch'án kixin ch'in Judas Iscariote, tíha it'é mé it'in Simón, mé ijnko tí teyó sín tsíkjeýá ch'án ntá kjónté sinchejki ch'án tí ch'in Jesús.

7

Tí sín jnkokoqá kichó ch'in Jesús mé kuítekakuenhya sín ch'án

¹ Ntá kjuixin tíha ntá k'uáji ch'in Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'oyán sín ch'án.

² Kjánchó ó kuichjina tí yaon kia ntá tí sín judío sich'éna sín itsjé its'van tsjasixín sín kia.*

³ A ntá tí sín kichó ch'in Jesús ntáche sín ch'án kixin:

—Chrókuitqahya ntihi. Sáchrókjuia estado Judea kixin ntá kjaxin tí sín chréhe tí jaha tjejó ntiha chrók'uikon sín tí kjuaxroan tsjásian.

⁴ Kixin tió tjinkaon ijnko nkeexo kixin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhi. Chrók'uikon kain xin chojni siin chjasintajni —mé chro sín.

⁵ Xíkaha ntáchro tí sín kichó ch'án kixin kjaxin jehe sín titekakuenhya sín tí jehe ch'án.

⁶ A ntá kjuátqhe ch'in Jesús ntáchro ch'án kixin:

—Naxa kjuixrakáhya tí hora kuèntana tsjásian kjuaxroan. Ntá jahará la cualquier hora tjinkáonrá jína chrók'uikonrá kjuaxroan.

⁷ Tí sín chjasintajni xitjahya tsonínkakonhanrá sín tí jahará. Ntá janhan na imá nínkakonna sín kixin ntátjan sín kixin jehya jína tí nkehe tjejóch'e sín.

⁸ Jahará la sájtjírá tí kia a. A ntá janhan la tjíhya kixin naxa kjuixrakáhya tí hora kuèntana —ichro ch'án.

⁹ Mé xíkaha ntáchro ch'án ntá kuitqhe ch'án estado Galilea.

Itjen ch'in Jesús tí kia a

¹⁰ A ntá ó kjuixin sátsíkji tí sín jnkokoqá kichó ch'in Jesús ntá jehe ch'án la kjaxin sákjuí ch'án tí kia a kjánchó noxínhya xritjak'e ch'án.

¹¹ A ntá tí sín judío mé xriteyá sín ch'án tí kia a la ntáchro sín kixin:

—¿Xá nketí tjen tí ch'in a? —ichro sín.

¹² A ntá itsjé sín ntiha mé kjo sín kichó sín kixin nkexrí tjen ch'án. Iso sín ntáchro sín kixin: “Jína ch'án”; kjánchó í so sín ntáchro sín kixin: “Jehya chojni jína ch'án, méxra imá ch'iyehé ch'án chojni”, ichro sín.

¹³ Kjánchó noxínhya kjo sín xíkaha kixin chraqonhen sín tí sín judío a.

¹⁴ A ntá ó kjuíji jnkosiné tí kia a ntá k'uixenhen ch'in Jesús tí nínko jié ntá kjuankixin ch'án kjuako ch'án.

¹⁵ A ntá tí sín judío chakon sín komá sín ch'án ntáchro sín kixin:

—¿Xá nkexrí nohe tí ch'in í nchónhya tí nkehe kixin tsíxraqoqehya ch'án? —ichro sín.

¹⁶ Ntá kjuátqhe ch'in Jesús ntáchro ch'án kixin:

—Tí nkehe tjákua la jehya kuèntana na mé tí xra kuènte tí nkexo tsíchr'anna k'uinka.

¹⁷ Tí jnkojínrá tjinkáonrá chrókjuinchexiteyéhérá éxí tóxrjnhin Dios la tsonohará á chaxín kuènte Dios tí nkehe tjákua o á kuèntana tíha.

¹⁸ A ntá tí nkexo tjako tí nkehe t'axrxjénin kja sín ó mé xíkaha ch'e kixin tjinkaon sín kixin tí chojni ó mé chróchóntehe sín ch'án kjuasáya. A ntá tí nkexo tjinkaon kixin tí chojni a mé chrókjuikosáyehe sín tí nkexo tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

* 7:2 Levítico 23.34

¹⁹ ¿Á jehya ch'ín Moisés tjáhará tí itén Dios chrókuítekáonrá? Kjánchó nijnkorá kuítekáuenhyará tí nkehe tsikjin ch'án. ¿Méxra nkekuénté tjinkáonrá chrók'oyánrá tí janhan? —ichro ch'án.

²⁰ Ntá kjuátehe tí sín a ntáchro sín kixin:

—Jaha chonta ijnko nchakuen tí jínahya. ¿Xá nkexro chrók'óyán tí jaha? —ichro sín.

²¹ Ntá kjuátehe ch'ín Jesús ntáchro ch'án kixin:

—Jnkokoá kjuaxroan kjuásian tí yaon t'ok'éheni ntá chrakonrá.†

²² A ntá ch'ín Moisés tsík'etóan kixin xjaanrá ntoa itsa xjan xroye, (kjánchó jehya ch'ín Moisés kjuankixin ch'án kjuako ch'án tíha, na mé tí sín tsík'axrjeníxinrá kjuankixin sín kjuako sín tíha). Mé xikaha nchekará xjan tí xroye a kjónté yaon t'ok'éheni.

²³ A ntá xikaha nchekará xjan xroye tí yaon t'ok'éheni kixin xikaha chrókjuinchekt'itjáyaníkyará ninkehó tí nkehe k'uetóan ch'ín Moisés, ¿ntá nkekuénté kixin ninkáonnará tí janhan kixin kjuintakítóha jína ijnko chojni tí yaon t'ok'éheni?

²⁴ Chrókjuanchahyará jie kixin tí nkehe t'ikonxínrá ikonrá ó. Chrókjuenkayáxinrá tí nkehe jína tóxrjínjin Dios —mé chro ch'ín Jesús.

Ch'ín Jesús chrónka kixin nketí k'uaxrjeníxin ch'án

²⁵ A ntá iso sín chjasin Jerusalén kjuankixin sín kjo sín kichó sín kjuanchankí sín kixin:

—¿Á jehya tí ch'ín a xritjeyá sín chrók'óyán sín?

²⁶ Ntá jie noxín tjen ch'án nixja ch'án kohya ninkexo nínnakonhen ch'án. Kjá tí síxreé titekaon sín kixin tí nkexro a chaxín Cristo tíha.

²⁷ Kjánchó ó noheni nketí tsíkjin ch'án. A ntá tió tsi tí nkexro Cristo ntá ninkexo tsoñoehya nketí tsixin ch'án —ichro sín.

²⁸ A ntá ch'ín Jesús kjuák'ekjako ch'án tí njnko jie ntá kuínhin ch'án kixin xikaha kjo sín, ntá itsen nixja ch'án ntáchro ch'án kixin:

—Chaxín choxinrá tí janhan la ko nohará nketí chjasin tsíkjin. Kjánchó jehya kixin k'uinka sjntaxiteyá tí nkehe ntáchro asenná ó. Ó k'uinka kixin ichr'ánna tí nkexro chaxín tjechón tjen nkaya nkajní. Jahará naxá chonhyará tí nkexro a.

²⁹ Janhan la choxian ch'án kixin ntaha tsík'inkaxian na mé jehe ch'án mé tsíchr'ánna ch'án —ichro ch'ín Jesús.

³⁰ Ntá chrótsé sín ch'án chrókjuak'echjina sín ch'án ntá kjónté ninkexo tséhya sín ch'án kixin naxá kjuanjonhya Dios kjuachaxin chrótsé sín ch'án.

³¹ Kjánchó itsje chojni kuítekaon sín tí jehe ch'án. A ntá ntáchro sín kixin:

—A ntá tió chrókui tí Cristo la, ¿á má jie kjuaxroan chrókjuasin ch'án, a ntá tí ch'ín la kénhyó ní? —ichro sín.

Tí sín fariseo ichr'án sín chojni policia tsotsé sín tí ch'ín Jesús tsjak'echjina sín ch'án

³² A ntá tí sín fariseo kuínhin sín nkehe tí ntáchro chojni kixin nkexrí tjen ch'ín Jesús, ntá jehe sín la ko tí sín nchát'á t'etóan k'uetuēnhen sín iso sín policia kuēnte njnko tsotsé sín ch'án tsjak'echjina sín ch'án.

³³ A ntá ntáchro ch'ín Jesús kixin:

—Kjaxin í séhya tsjak'é ntihi ts'ejóni ntá sáxikjiya tí tjen tí nkexro ichr'ánna.

³⁴ A ntá jahará tsjeyará tí janhan na ts'itjahyará kixin xitjahya tsjasánrá tí tsjak'é janhan —ichro ch'án.

³⁵ A ntá tí sín judío kjuankixin sín kjuanchankíhi sín kichó sín kixin:

—¿Ntá nketí nó sátsji ch'án kixin tsjachahyani ts'itjani ch'án? ¿Xá sátsjichréhe ch'án tí sín judío tjejóyákan tí sín nixja nkiva griego kixin ntá tsjakohe ch'án tí sín griego?

³⁶ ¿Nkexrí t'axrjexín tí nkehe ntáchro ch'án kixin tsjeyáni ch'án na kjónté ts'itjahyani ch'án la tsjachahyani tsjichréheni ch'án tí tsjak'e ch'án? —ichro sín.

Ntario tjechón

³⁷ A ntá tí yaon tsjixixín tí kia a mé tí yaon jie mé k'uínkatjen ch'ín Jesús, a ntá itsen nixja ch'án ntáchro ch'án kixin:

—Kjá tí jnkojínrá ik'uénrá ntá xrákirá its'irá ntá.

³⁸ A ntá éxi ntáchro xroon Itén Dios kixin tí sín titekaon sín tí janhan na mé nkaya asén sín ts'óna ijnko río ts'axrje intá tjechón —ichro ch'án.

³⁹ Mé xikaha chrónkaxin ch'ín Jesús nkexrí tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naxá tíhya tí Nchakuen Dios kixin ch'ín Jesús naxá sájtjinya ch'án nkaya nkajní.

Jnkokoáhya kjuenkayáxin tí chojni

⁴⁰ A ntá iso sín tió kuínhin sín tí nkehe ntáchro ch'ín Jesús ntá ntáchro sín kixin:

—Kjá chaxín tí ch'ín i mé tí profeta ó tsíkji —ichro sín.

41 Ikjé sín ntáchro sín kixin:

—Jehe ch'an mé tí nkexro Cristo —ichro sín.

A ntá í so sín ntáchro sín kixin:

—¿Xá nkekuènté chrókjuixín Galilea tí nkexro Cristo?

42 Tí xroon tsíkjin sín ósé mé chrónka kixin tí nkexro Cristo mé ts'axrjenixin tí sín k'uaxrjenixin tí ch'in rey David la ko tsjixín ch'an chjasin Belén mé tí chjasin k'ué'jak'e ch'in David —ichro sín.

43 Mé xikaha jnkokoáhya kjuenkayáxin sín kaín sín kixin nkexro tí ch'in Jesús.

44 Iso sín tjinkaon sín sáchrókjuiko sín ch'an chrókjuikjehe sín ch'an kjánchó ninkexró kjuích'ehya xikaha.

Tí síxreé kuítekakonhya sín tí ch'in Jesús

45 A ntá tí sín policia kuènte nínko mé kjan sín tí tjejó tí sín fariseo la ko tí sín nchát'á t'etqan. Ntá tí sín a mé kjuanchankíhi sín tí sín policia kixin:

—¿Nkekuènté kjuikoahyará ch'an? —ichro sín.

46 Ntá kjuátehe tí sín policia kixin:

—Kohya ninkexró nixja éxí xikaha nixja tí ch'in a —ichro sín.

47 Ntá ntáche tí sín fariseo tí sín policia kixin:

—¿Á kjaxinrá kujtoherá kjuit'ayahará ch'an?

48 ¿Á kuítekaon tí jehe ch'an jnkójin tí sín t'etqan kuènténi o tí sín fariseo?

49 A ntá tí sín a mé chónhya sín tí ley na mé tsjasóte sín —ichro sín.

50 A ntá tí ch'in Nicodemo, tí ch'in kjuitsjehe tí ch'in Jesús ijnko tie senó na mé jehe ch'an fariseo ch'an na ntá ntáche ch'an sín kixin:

51 —Tí ley kuènténi la kohya kjuachaxin sinchekjasóteni ijnko chojni tí naxá kíenhyani nkehe nixja ch'an la ko kíenhyani tí jie kjuasin ch'an —ichro ch'an.

52 Ntá kjuátehe sín ntáchro sín kixin:

—¿Á kjaxian jaha kjuixian estado Galilea ní? Nchekuáxin tí xroon itén Dios ntá tsoñoaha kixin nijnko tí sín k'uéchrónka itén Dios tsíkixínhya sín tí estado Galilea —ichro sín.

Ijnko tjan kjuasin jie chóna ókjé chojni ntoa

53 Ntá jnkójnko tí sín xíka sín sákjuí sín ntqé sín.

8

1 Ntá ch'in Jesús mé sákjuj ch'an tí jnq Olivo.

2 Ntá tí kóyaon nchítjen ikjan ch'an k'uixenhen ch'an tí nínko jie a la ko kaín xín tí chojni mé kóchjinehe sín ch'an. Ntá kjuák'etjaxín ch'an kjuankixin ch'an kjuako ch'an.

3 Ntá tí sín tjako tí ley la ko tí sín fariseo mé kjuikqo sín ijnko tjachjin kónoxixin kixin chóna tjan ókjé chojni ntoa. Ntá kjuak'è sín tjan jnkosiné tí sín tjejó ntiha.

4 Ntá ntáche sín tí ch'in Jesús kixin:

—Maestro, tí tjan i kónoxixin kixin kjuasin tjan jie chóna tjan ókjé chojni ntoa.

5 A ntá tí ley tsíkjin ch'in Moisés mé t'etqan kixin ixro chrók'óyánxinni tí chojni chjin xikaha ch'e. ¿A ntá jaha, nkechrua? —ichro sín.

6 Mé xikaha ichro sín kixin tjinkaon sín kixin ách'e ntoáhya chrókjuatehe ch'in Jesús ntá chrókjuanchia sín jie. Ntá ch'in Jesús mé k'uísén ch'an kjinxin ch'an dedo tja ch'an nonte a.

7 Ntá naxá tinkákjanchankíhi sín ch'an. Ntá k'uínkatjen ch'an k'uetqan ch'an kixin:

—Xá nkexro tí tjejórá ntihi chónahya ninkehó jie mé saoxín chróchjéhe sín tjan xro —ichro ch'an.

8 Ntá xik'isén ch'an inaá ikjin ch'an tí nche inaá.

9 Ntá tí sín a mé kuínhin sín tí nkehe k'uetqan ch'in Jesús ntá kósuèhe sín kixin koí sín chóna sín jie, ntá jnkójnko jnkójnko sín, sásitji sín na mé saoxín tí ch'in qntsi má táda ch'an sákjuí ch'an, ntá kaín tí sín i so a sákjuí sín kjaxin sín.

Ntá jehó tí ch'in Jesús la ko tí tjan a kuitqhe sín ntiha.

10 Ntá xrentoá ch'an la kjuanchankíhi ch'an tjan kixin:

—¿Nkekjá tí sín kjuanchia jie? ¿Á kohya ninkexró kjuínchekjasótiahya ní? —ichro ch'an.

11 Ntá ntáchro tjan kixin:

—Náhi, Ínchéni, ninkexró —ichro tjan.

Ntá ntáchro ch'in Jesús kixin:

—Kjaxin janhan sintakjasótiahya. Sátjia la í tjásinhya jie inaá —ichro ch'an.

Ch'in Jesús mé xrohi t'inkaséyanxín chjasintajni

12 Ntá ch'in Jesús xinxjehe ch'an tí sín tsikóchjina inaá ntáchro ch'an kixin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítie a —ichro ch'an.

¹³ Ntá tí sín fariseo ntáchro sín kixin:

—Jahvá tjechronka nkexrí tjen jaha na mé chaxínhya tíha kixin jahvá tjechronka —ichro sín.

¹⁴ Ntá kjuátehe ch'in Jesús ntáchro ch'an kixin:

—Janhván tjetjonkará nkexrí tjen na kjónté chaxín xrjanka kixin ó nõna nketí nó k'uinkaxian la ko nõna nketí sátsjiyá. A ntá jahará noahyará nketí k'uinkaxian la ko noahyará nketí sátsjiyá.

¹⁵ Jahará la éxí chojni chjasintajni ó tékará jie. A ntá janhan la tékahya jie ninkexró.

¹⁶ Kjánchó ntoá chrókjuintakitoaxián ijié chojni kixin jehya janhván t'a tíha, T'aná tjejian, na mé tí nkexro k'uetuanna k'uinka ntihi na mé jehe ch'an mé tjejian ch'an ntihi ntakitoaxínkian ijié chojni.

¹⁷ A ntá tí ley tsikjin ch'in Moisés mé ntáchro kixin tí tsonoxín iyó sín tsochónka á chaxín xikaha tsikónhen ntá chrókuitekaon chojni.

¹⁸ Ntá janhan na mé tjejrjanka nkexrí tjen janhan la ko kjaxin T'aná mé tí nkexro k'uetuanna k'uinka mé jehe ch'an kjaxin chrónka ch'an nkexrí tjen janhan —ichro ch'an.

¹⁹ Ntá kjuanchankíhi sín ch'an kixin:

—¿Nketí tjen It'á? —ichro sín.

Ntá kjuátehe ch'in Jesús ntáchro ch'an kixin:

—Jahará la chonhyará tí janhan la ko kjaxin chonhyará T'aná. Tí chrókóchoxinrá tí janhan ntá kjaxin chrókóchoxinrá tí T'aná —ichro ch'an.

²⁰ Mé xikaha chro ch'in Jesús tí kjuák'ekjakoxin ch'an tí ninko jie chjino ntacajón tjetóxyéya chichaon tjanjon sín. Kjánchó ninkexró tséhya sín ch'an kixin naxa kjuixrakáhya tí hora tsotsé sín ch'an.

“Xitjahya tsjasánrú tí nó sátsjiyá janhan”

²¹ Ntá ch'in Jesús ntáche ch'an sín inaá kixin:

—Ntá sátsjiyá janhan. Ntá jahará tsjéyará tí janhan, ntá tió ts'énrú naxa yamará ijjará. Xitjahya tsjasánrú tí nó sátsjiyá janhan —ichro ch'an.

²² Ntá ntáchro tí sín judío ikjo sín kichó sín kixin:

—¿Á ts'óyan ch'an asén ch'an kixin xikaha ntáchro ch'an kixin xitjahya tsjjini tí nó sátsji ch'an? —ichro sín.

²³ Ntá ntáche ch'in Jesús tí jehe sín kixin:

—Jahará la nonte ntihi k'uaxrjénixinrá. A ntá janhan la nkaya nkajni k'uaxrjénixian. Jahará la kuente chjasintajni ntihi. A ntá janhan la janhya kuente chjasintajni.

²⁴ Mé xikaha tjonkará kixin tió ts'énrú naxa tsochontará ijjará kixin tí tsitékákonyhará tí janhan, mé tí nkexro xráxin tjen,* ntá kjónté ts'énrú naxa tsochontará tí ijjará —ichro ch'an.

²⁵ Ntá kjuanchankí sín ntáchro sín kixin:

—¿Nkexro tí jaha? —ichro sín.

Ntá kjuátehe ch'in Jesús ntáchro ch'an kixin:

—Tí xránkixín kjuankixian tjonkará kixin nkexro tí janhan.

²⁶ Tsjéjian tí nkexro chróntáxrjan kixin chrókjuintakitoaxián tí jie chontará. Kjánchó tí nkexro k'uetuanna k'uinka na mé tí nkehe chrónka ch'an la chaxín. A ntá jehó tí nkehe kujnhan chrónka ch'an mé tjákoha tí sín chjasintajni —ichro ch'an.

²⁷ Kjánchó jehe sín mé kíenxínhya sín kixin nixja ch'an kuente It'é ch'an tjen nkaya nkajni.

²⁸ A ntá ntáchro ch'an kixin:

—Tió sinchek'it'ótjenrá noi tí Xjeen Dios K'óna Chojni, ntá tsonohará kixin janhan mé tí nkexro xráxin tjen.† Ntá tsonohará kixin jehya janhan tétqan tí xra tjet'á. Náhi. Jehó tí nkehe kjuakona T'aná mé tjetjaka.

²⁹ Tjejian tí nkexro k'uetuanna k'uinka kixin jehí xráxin T'aná la kuítqahya janhván kixin xráxin ntaxiteyáha tí nkehe tóxrjínjin ch'an —ichro ch'an.

³⁰ Mé xikaha ntáchro ch'an ntá nchónhya chojni kuítekaon sín tí jehe ch'an.

Nkexrí tjejó tí sín xjeen Dios la ko nkexrí tjejó tí sín chrokjuahya tsítqhe sín ijié sín

³¹ Ntá nixjehé ch'in Jesús tí sín judío kuinkáchónki sín ch'an ntáchro ch'an kixin:

—Tí tsjtóehyará tí tan kjuákohará ntá jahará chaxín discípulo kuéntana

³² la ko tsjátsqanrá tí nkehe chaxín, la ko tí nkehe chaxín mé tsotjáhará kjuachaxin tsaáxinrá, a ntá tsokohya nkehe ts'inkákonhen —ichro ch'an.

³³ Ntá kjuátehe sín ntáchro sín kixin:

—Jeheni mé tsík'axrjénixinni ch'in Abraham na í xráxin kohya nkexro k'uena tí jeheni. ¿Nkekuènté ntáchrua jaha kixin ts'áyeheni kjuachaxin tsaáxinni? —ichro sín.

³⁴ Ntá ntáchro ch'in Jesús kixin:

* 8:24 Éxodo 3.14 † 8:28 Éxodo 3.14

—Tjetoan tí nkehe tjétjonkará kixin tí sín tjasin jie mé éxi chojni k'uíná chrokuahya tsiotohe sín ijé sín.

³⁵ A ntá ijnko chojni k'uíná la jnkochrixinhya tsjak'e ch'an tí ntöe tí nkexro a. A ntá tí xjeen tí nkexro na mé jnkochrixin tsiotohe ntiha.

³⁶ Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsokehya nkehe ts'inkákonhen.

³⁷ Ó nòna kixin jahará tsik'axrjenixinrá ch'in Abraham. Kjánchó tjinkáonrá chrók'oyánrá tí janhan kixin títekákonhyará tí nkehe tjéxrjanka.

³⁸ Janhan xrjanka tí nkehe k'uikuán kixin nkexrí tjen T'aná. A ntá jahará tjejonchex-iteyéhérá tí nkehe kuínhínrá chrónka it'ará —ichro ch'an.

³⁹ A ntá jehe sín kjuátehe sín ntáchro sín kixin:

—It'eni mé ch'in Abraham —ichro sín.

Kjánchó ntáchro ch'in Jesús kixin:

—A ntá tí jahará chrókóchaxín xjeen ch'in Abraham ntá chrókjuich'erá éxi kjuich'e ch'an.

⁴⁰ A ntá tjétjonkará tí tan chaxín kuínhan chrónka Dios na kjónté chrók'oyánrá tí janhan. A ntá ch'in Abraham xikahya kjuich'e ch'an.

⁴¹ Jahará tjejoch'erá éxi kjuich'e it'ará —ichro ch'an.

Ntá ntáchro sín kixin:

—Jehya k'ónamá tí jeheni. Náhi. Chóntani jnkokoá It'eni mé Dios —ichro sín.

⁴² Ntá ntáche ch'in Jesús tí jehe sín kixin:

—Tí chrókóchaxín kixin Dios mé It'ará la ntá chrótuánará kixin janhan kjaxin k'uaxrjenixinna Dios k'uinkaxian tí tjen ch'an. Jehya kixin janhván k'uinka. Náhi. Dios mé ichr'anna k'uinka.

⁴³ ¿Nkekuénté kixin tiénxinhyará tí nkehe tjónkará? Jehí tjinkákonhyará chrókuinhínrá tí nkehe xrjanka.

⁴⁴ Jahará mé xjeen Tsochren la ko jahará tsik'axrjenixinrá ch'an la ko tjinkáonrá sínchexiteyará tí nkehe tjinkaon ch'an. Tsochren mé xrankixixin kjuaya ch'an. Nunca k'uénixja ch'an ntoá. Xrácín ch'ia ch'an kixin xikahó tjenkayáxin ch'an. Jehe ch'an mé it'é kain tí kjuach'ia.

⁴⁵ A ntá janhan tjétjonkará nkehe ntoá ntá títekákonnyará.

⁴⁶ ¿Á tjejorá jnkójnra nohará nkerí jie kjuásian janhan? A ntá tí ntáxrjan tí nkehe ntoá, ¿ntá nkekuénté títekákonnyará?

⁴⁷ Tí sín tinkáchónki Dios mé tjinkaon sín chrókuinhin sín itén Dios. A ntá jahará la tinkáchónkihyará Dios ntá tjinkákonnyará chrókuinhínrá itén ch'an —ichro ch'in Jesús.

Cristo la ó xrácín tjen ntá chr'éxin kjuák'e ch'in Abraham

⁴⁸ A ntá tí sín judío ntáche sín tí ch'in Jesús kixin:

—Chaxín ntoá ntáchroni kixin jaha mé ijnko chojni samaritano la ko chonta ijnko nchakuen tí jínahya —ichro sín.

⁴⁹ Ntá kjuátehe ch'in Jesús ntáchro ch'an kixin:

—Janhan chontahya ninkehó nchakuen tí jínahya. Tí xrá t'a mé tjikosáyaha T'aná. Ntá jahará mé chontahyará kjuasáyé tí janhan.

⁵⁰ Janhan na tjeýáhya nkexro tsjikosáyana. Kjánchó itjen ijnko nkexro tjinkaon ch'an chrókjuikosáyana chojni, a ntá jehe ch'an mé tsjanhia jie tí sín kuitekakonhya.

⁵¹ Imá tjetoan tí nkehe tjétjonkará kixin tí tsítekáonrá tí nkehe tjákua la í ts'énhyará —ichro ch'an.

⁵² Ntá kjuátehe tí sín judío ntáchro sín kixin:

—Ntá ó noheni kixin chaxín chonta ijnko nchakuen tí jínahya. Ch'in Abraham la ko kain tí sín k'uéchronka itén Dios ósé la mé ik'uén sín. Ntá jaha ntáchrúa kixin tí tsitekaonni tí nkehe tjákua jaha ntá í ts'énhyani, ichrua.

⁵³ ¿Xá imá tétöan jaha la ntá kánhyó t'etöan it'eni Abraham? Jehe ch'an la ik'uén ch'an la ko kjaxin ik'uén tí sín k'uéchronka itén Dios ósé. ¿Xá nkexro tí jaha, ichrua? —mé chro sín.

⁵⁴ Ntá kjuátehe ch'in Jesús ntáchro ch'an kixin:

—Tí chrókjuikosáyaha asenná na mé sínkíhya tíha. A ntá T'aná mé tjikosáyana ch'an na ntá jahará ntáchrórá kixin jehe ch'an mé Dios kuéntará.

⁵⁵ Kjánchó chonhyará ch'an. A ntá janhan choxian ch'an. Tí chróntáxrjan kixin janhan chonhya ch'an ntá chrókóyona tí jahará chrókjuit'ayahará. Kjánchó janhan na choxian ch'an la ko ntaxiteyáha tí nkehe t'etöan ch'an.

⁵⁶ Ch'in Abraham tí nkexro tsik'axrjenixinrá la imá kóchéhe ch'an kixin ts'ikon ch'an tí yaon ts'inka janhan. Ntá ó kjuixin k'uikon ch'an ntá kóchéhe ch'an —ichro ch'an.

⁵⁷ A ntá tí sín judío ntáche sín tí ch'in Jesús kixin:

—Jaha *naḡa* chontahya cincuenta nánó, ¿na ntá nkekuènté ntáchrua kixin ó k'uúkuan tí ch'in Abraham? —ichro sín.

⁵⁸ Ntá kjuátehe ch'in Jesús ntáchro ch'án kixin:

—Imá tjetóan tí neke tjetjonkará kixin *naḡa* kohya ch'in Abraham mé xráxín itjén janhan —ichro ch'án.

⁵⁹ Ntá kuákja sín xro chróchjéhe sín tí ch'in Jesús. Kjánchó kjuák'emá ch'án n̄nko ntá chr'éxín k'uaxrxéjín ch'án ntiha. K'uátsínka ch'án jnkqsiné tí tjejó sín sákjuí ch'án.

9

Ch'in Jesús kjuínchekitoḡhe jína ijnko ch'in tsíkókjéxín t'ikonhya ch'án

¹ K'uátsínka sín ijnko ntá ntá k'uikon ch'in Jesús ntiha tjen ijnko ch'in tsíkókjéxín t'ikonhya ch'án.

² Ntá tí sín k'uájiko ch'in Jesús kjuanchankíhi sín ch'án kixin:

—Maestro, ¿Nkekuènté tsíkókjéxín ch'án t'ikonhya ch'án? ¿Á ijíé it'é o iné ch'án o á ijíé ch'án? —ichro sín.

³ Ntá kjuátehe ch'in Jesús ntáchro ch'án kixin:

—Jehya ijíé ch'án la ko jehya ijíé it'é la ko iné ch'án. Náhí. Jehí xíkaha tsíkónhen ch'án kixin tí kjuachaxién Dios tsjakoxín kixin tsitqexín ch'án jína.

⁴ *Naḡa* nchakotjín t'ichjánxín s̄t'a tí x̄rā tjinkaon tí nkexro tsíchr'ánna. Ntá ts'ixin tie ntá kohya ninkexró tsjacha sich'e x̄rā.

⁵ *Naḡa* itjén janhan mé ntíhi chjasintajni na mé janhan xrohí t'inkaséyanxín tí chjasintajni —ichro ch'án.

⁶ Ntá ó kjuixin ntáchro ch'án tíha ntá kuíkite ch'án ntáten ch'án intsi nche k'óna nchet'o ntá kuátematóxín ch'án ikon tí ch'in t'ikonhya.

⁷ Ntá k'uətuənhen ch'án tí ch'in t'ikonhya kixin:

—Sátjia tí pila tjiá ntā it'in Siloé t'ontia kuan —ichro ch'án. (A ntá tí ihñié Siloé mé t'axrxéjín nkívee sín kixin K'uítuənhen.)

Ntá sákjuí tí ch'in t'ikonhya k'ónti ch'án ikon ch'án ntá kjan ch'án k'uúkon ch'án.

⁸ Ntá tí sín ntqə chjinaxón ntqə ch'án la ko tí sín k'uék'ikon sín kixin t'ikonhya ch'án mé ntáchro sín kixin:

—¿Á jehya tí ch'in i k'uékjak'etjāxín ch'án k'uékjančak'á ch'án? —ichro sín.

⁹ Iso sín ntáchro sín kixin:

—Kjá chaxín jehe ch'án —ichro sín.

Ikjé sín ntáchro sín kixin:

—Náhí, jehya jehe ch'án. Tóyóhó ch'án tí ch'in a —ichro sín.

Kjánchó jehe ch'án kjuátehe ch'án kixin:

—Chaxín janhan —ichro ch'án.

¹⁰ Ntá kjuanchankíhi sín ch'án kixin:

—¿Nkexrí kixin jaí t'ikuan jaha? —ichro sín.

¹¹ Ntá kjuátehe ch'án ntáchro ch'án kixin:

—Ijnko ch'in mé it'in Jesús mé kjuíchéna ch'án nchet'o kuátematóxín ch'án kuan la ntá k'uetuanna ch'án kixin satsjia tí pila tjiá ntā nchek'in sín Siloé ts'ontia kuan, ichro ch'án. Ntá sákjuia k'ontia, ntá xrinahya ó k'uúkuan —ichro ch'án.

¹² Ntá kjuanchankíhi sín ch'án ntáchro sín kixin:

—¿Nketí tjen tí ch'in a? —ichro sín.

Ntá kjuátehe ch'án ntáchro ch'án kixin:

—Nonahya janhan —ichro ch'án.

Tí sín fariseo tjančankíhi sín tí ch'in k'uék'ikonhya kuítóḡhe jína

¹³ Ntá tí sín a sákjuíko sín tí ch'in k'uék'ikonhya sákjuíchréḡhe sín tí sín fariseo a.

¹⁴ A ntá tí yaon t'ok'éhe sín mé tsíkjich'éna ch'in Jesús tí nchet'o kjuínchekitqexín jína tí ch'in k'uék'ikonhya.

¹⁵ A ntá tí sín fariseo xíkjančankíhi sín ch'án inaá kixin nkexrí kuítóḡhe ch'án jína t'ikon ch'án jie. Ntá kjuátehe ch'án ntáchro ch'án kixin:

—Kuátematóxín ch'án nchet'o kuan, ntá k'ontia kuan ntá jie t'ikuan —ichro ch'án.

¹⁶ Ntá iso tí sín fariseo ntáchro sín kixin:

—Tí chojni a jehya kuénte Dios kixin chóntahya ch'án kjuasáyé tí yaon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókjuasin ch'án kjuaxroan jie tí ch'óna ch'án jie? —ichro sín.

Mé xíkaha jnkókhya kjuenkayáxín tí jehe sín.

¹⁷ Ntá xíkjančankíhi sín tí ch'in k'uék'ikonhya inaá kixin:

—¿Ntá jaha nkechrua nkexro tíha tí nkexro kjuíntak'ikuan? —ichro sín.

Ntá kjuátèhe ch'án ntáchro ch'án kixin:

—Janhan ntáxrjan kixin jehe ch'án mé ijnko nkexro chrónka itén Dios —ichro ch'án.

¹⁸ Kjánchó tí sín judío kuítekakohya sín kixin chaxín k'uék'ikonhya ch'án ntá jie t'ikon ch'án. Ntá k'uíyèhè sín tí it'é la ko tí iné tí ch'ín tsíkitohe jina.

¹⁹ Kjuanchankíhi sín ntáchro sín kixin:

—¿Á xjaan tíhi tí ntáchrorá kixin tí tsíkójíexín ch'án t'ikonhya ch'án? ¿Ntá nkexrí jie t'ikon ch'án? —ichro sín.

²⁰ Ntá kjuátèhe tí it'é la ko tí iné ch'án ntáchro sín kixin:

—Ó noheni kixin xjeenni ch'án la ko noheni kixin tí kokjéxín ch'án t'ikonhya ch'án.

²¹ Kjánchó noehyani nkexrí kixin t'ikon ch'án jie la ko noehyani nkexro kjuínchekitohe ch'án jina. Tjanchankíhírá ch'án, ó nteto ch'án, ntá jehe ch'án tsochrónka ch'án kixin nkexrí kuitohe ch'án jina —ichro sín.

²² Mé xíkaha kjuátèhe tí it'é la ko tí iné ch'án kixin chrakohñen sín tí sín judío kixin ó kjuixin chrónka tí sín judío kixin tsjanjohya sín kjuachaxin ts'ixenhen nñnko tí sín titekaon kixin ch'ín Jesús mé tí nkexro Cristo.

²³ Mé xíkaha ntáchro tí it'é la ko tí iné ch'án kixin chrókjuanchankíhi sín ch'án, ó nteto ch'án, ichro sín.

²⁴ Ntá yóxin xík'íyèhè tí sín judío tí ch'ín k'uék'ikonhya ntá k'uetuñhen sín ch'án kixin:

—Tjetsjehe Dios ntá ntoá chrónka kixin ó noheni kixin tí ch'ín a na chóna ch'án jie —ichro sín.

²⁵ Ntá tí ch'ín k'uék'ikonhya kjuátèhe ch'án kixin:

—Nonahya á chóna ch'án jie ó á chónahya ch'án jie. Jnkokoá nkehe nóna kixin senó k'uék'ikonhya ntá jie t'ikuan —ichro ch'án.

²⁶ Ntá xíkjanchankíhi sín ch'án inaá kixin:

—¿Nkexrí kjuích'e ch'án kixin kjuíntak'ikuan ch'án? —ichro sín.

²⁷ Ntá kjuátèhe ch'án ntáchro ch'án kixin:

—Ó kjuixin tjonkará kjánchó títékákonhyará. ¿Nkeuènté tjinkáonrá kixin tsotjónkará inaá? ¿Á kjaxinrá tjinkáonrá tsochréhérá ch'án? —ichro ch'án.

²⁸ Ntá kóninkakohñen sín ch'án la k'uántaxínhñin sín ch'án la ko kjuátèhe sín kixin:

—Jaha la chréhé tí chojni a. A ntá jeheni na chréhèni tí nkehe k'uetoan ch'ín Moisés.

²⁹ Ó noheni kixin Dios k'uénixjèhè ch'ín Moisés. A ntá tí ch'ín a la noehyani nketí tsíkjixín ch'án —ichro sín.

³⁰ Ntá kjuátèhe tí ch'ín ntáchro kixin:

—Imá ókjé tíha. Tí ch'ín a mé kjuínchek'ikonña. A ntá jahará ntáchrorá kixin noahyará nketí tsíkjixín ch'án.

³¹ Ó noheni kixin tienhya Dios tí nkehe tjanchia tí chojni chóna jie. Jehó tinhin ch'án tí nkehe tjanchia tí sín titekaon Dios la ko nchexiteyéhe sín tí nkehe tjinkaon ch'án.

³² Nunca kienhyéni kixin ijnko nkexro chrókjuínchek'ikon ijnko chojni tsíkójíexín t'ikonhya.

³³ A ntá tí nkexro a tí chrókujixínhya ch'án tí tjen Dios la kjá ninkehó nkehe xitjahya chrókjuich'e ch'án —ichro ch'án.

³⁴ Ntá kjuátèhe tí sín fariseo ntáchro sín kixin:

—Jaha la nchónhya jie chonta tió kokjíha. A ntá jie zá tjinkávan kixin jaha chrókjuákohéni ní? —ichro sín.

Ntá kótéka sín tí ch'ín a kixin ts'axrjexín ch'án tí nñnko a sátsji ch'án.

Ntakótán nchakuen sín

³⁵ Ntá kuínhin ch'ín Jesús kixin xíkaha k'uetuñhen tí sín judío kixin ts'axrjexín nñnko tí ch'ín k'uék'ikonhya. Ntá xeta ch'ín Jesús tí ch'ín a ntá kjuanchankí ch'án kixin:

—¿Á tinkachónkia tí Xjeen Dios K'óna Chojni? —ichro ch'án.

³⁶ Ntá kjuátèhe tí ch'ín a ntáchro ch'án kixin:

—Tjákohéni nkexro tíha kixin ntá tsinkáchónkini ch'án.

³⁷ Ntá kjuátèhe ch'ín Jesús ntáchro ch'án kixin:

—Ó k'uikuan jaha. Janhan mé tí nkexro tjetjuá jaha —ichro ch'án.

³⁸ Ntá kjuák'exín toch'in ch'án toté ch'ín Jesús ntáchro ch'án kixin:

—Ijie kuítekavan tí jaha Ìnchéni —ichro ch'án.

³⁹ Ntá ntáchro ch'ín Jesús kixin:

—K'uinka ntihi chjasintajni kixin sintakitoxián ijje chojni kixin ntá tí sín t'ikonhya la mé ts'ikon sín, a ntá tí sín t'ikon jie la í ts'ikonhya sín —ichro ch'án.

⁴⁰ **A** ntá iso tí sín fariseo k'uejótaxín kuínhin sín kíxín xíkaha ntáchro ch'ín Jesús, ntá kjuanchankíhi sín ch'án kíxín:

—¿Xá kjaxin jeheni ntakótáni? —ichro sín.

⁴¹ Ntá kjuátēhe ch'ín Jesús ntáchro ch'án kíxín:

—**A** ntá tí jahará tí chaxín chrók'uikonhyará ntá chróchontahyará jie. Kjánchó ntáchrorá kíxín t'ikonrá. Méxra chontará jie —ichro ch'án.

10

Ch'ín Jesús ncheyóexín tí t'inkachjina kolélo

¹ Ntá ntáchro ch'ín Jesús kíxín:

—Imá tjetoan tí nkehe tjetjónkará kíxín tí ts'ixenhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xíchee tíha la tjinkaon chrókueé.

² **A** ntá tí nkexro t'ixenxín tí puerta na mé nkexro t'ayakonhen tí kolélo a.

³ La ko tí ch'ín tjet'ayakonhen tí puerta a mé tsakitjēhe ch'án tí puerta a kíxín ts'ixenhen tí nkexro chaxín t'ayakonhen tí kolélo a. **A** ntá tí kolélo a mé tsjatsqan va itén ch'án. Ntá t'iyexín ch'án jnkojnko ihnjé jnkojnko tí kolélo kuēnte ch'án ntá ts'axrxjén va ntqē va.

⁴ Ntá t'ikon ch'án kíxín k'uaxrje kaín va ntá kuítōnhen ch'án va ntja ntá tinkáchrēhe va kíxín tjatsqan va itén ch'án.

⁵ Chrohya va tjichrēhe va ijnko chojni ókjé na mé tsinkéhe va tí chojni a kíxín tjatsqanhya va itén ókjé chojni —ichro ch'án.

⁶ Mé xíkaha ntáchro ch'ín Jesús kjuíncheyóexín ch'án. Kjánchó tienxínhya sín nkexrí t'axrxjén tíha.

Ch'ín Jesús mé tí pastor jína

⁷ Ntá chrónka ch'ín Jesús inaá ntáchro ch'án kíxín:

—Ijnko nkehe tjetoan tsotjónkará kíxín janhan la éxi tí puerta t'ixenxín tí kolélo tí t'inkachjina va.

⁸ Kaín tí sín kuitónxin ntja kui senó mé xíchee la ko chrókueé. La ntá tí kolélo la ántōsén va tí nkehe ntáchro tí jehe sín.

⁹ Janhan mé tí puerta a mé t'ixenxínrá tí janhan mé tsaará la mé tsoyóhará tí kolélo siín kjuachaxin ts'axrxjén va tí kōrré va sátsjikjine va la ko siín kjuachaxin ts'ixenhen va tí ts'inkachjina va inaá.

¹⁰ **A** ntá xíchee mé jehó chrókueé la ko tjinkaon chrók'óyán la ko chrókjuinchek'itjáyān kaín nkehe. **A** ntá janhan k'uinka kíxín tsochontaxínrá kjuachón na mé kjuachón jnkochríxín.

¹¹ Janhan mé ijnko pastor jína **a** ntá tí pastor jína mé ts'enyákōnhen tí kolélo a.

¹² **A** ntá tí nkexro ch'e xra tjinkaon chrókjuacha ó na mé ts'ikon ch'án itsi ijnko kolobo tsítóhe ch'án tí kolélo sátsji ch'án kíxín jehe ch'án la jehya tí nkexro t'ayakonhen tí kolélo la ko jehya kolélo kuēnte ch'án. Ntá tí kolobo mé tsotsé va tí kolélo ntá tsínká va la sátsjichroe va.

¹³ Mé xíkaha tí chojni tjinkaon chrókjuacha tí xra chrókjuich'e ó la mé sátsji. **A** ntá tí kolélo la ántōsén ch'án kuáhya ch'án kuēnté tí jehe va.

¹⁴⁻¹⁵ **A** ntá janhan mé ijnko pastor jína. Mé xíkaha T'aná chóxin ch'án tí janhan la ko kjaxin janhan choxian tí jehe ch'án mé xíkaha choxian janhan tí sín éxi kolélo kuētāna la ko jehe sín mé chóxin sín tí janhan. Ntá ts'enyákōnhan tí sín éxi kolélo kuētāna.

¹⁶ Kjaxin chonta kolélo naxa jehya kōrré va ntihi mé kjaxin t'ichjānxín sátsjicákjián va. **A** ntá tí tsitekakonna va ntá ts'óna jnkokoá kōrré va la ko jnkokoá nkexro ts'ayakonhen va.

¹⁷ Tjuāna T'aná kíxín kjónté its'én la tsoxechónna inaá.

¹⁸ Kohya nkexro tsakitsjena tí kjuachón chonta janhan tí chrókjuánjonhya kjuachaxin. Chonta janhan kjuachaxin its'én la ko chonta janhan kjuachaxin tsoxechónna inaá. Tíhi mé k'uētūāna T'aná —ichro ch'ín Jesús.

¹⁹ Tió kuínhin tí sín judío tí nkehe ntáchro ch'ín Jesús ntá kjuankíxín jnkokoáhya kjuenkayáxin sín.

²⁰ Nchónhya tí jehe sín ntáchro sín kíxín:

—¿Nkeuēnté tindhírá tí nkehe ntáchro ch'án? Jehe ch'án mé chóna ch'án nchakuen tí jínaha la ko lóco ch'án —ichro sín.

²¹ Ntá ikjé sín ntáchro sín kíxín:

—Xíkaha chrónixja ijnko chojni chóna nchakuen tí jínaha. ¿Á ijnko nchakuen tí jínaha la á jína chrókjuinchek'ikon ijnko chojni t'ikonhya? —ichro sín.

Tí sín judío kútekakuenhya sín tí ch'ín Jesús

²² A ntá tí nchakuen kin tí chjasin Jerusalén k'uúxin kia xraxinkakonxín sín tí yaon tsíkjin tsík'óna nínko.

²³ Ntá ch'ín Jesús itjen ch'án tí nínko tí ntásin kuènte Salomón.

²⁴ Ntá tí sín judío k'uántatjen sín tí ch'ín Jesús kjuanchankíhi sín ch'án kixin:

—¿Hasta nkesá ts'ejóchónhenni tsinhinni jína? A ntá jie chrónka ntoá kixin á chaxín jaha tí Cristo —ichro sín.

²⁵ Ntá kjuátgehe ch'ín Jesús kixin:

—Ó tjonkará ntá naxa titekákonhyará. Káin tí xra tjet'a janhan tí kjuachaxin kuènte T'aná mé tjakoxin nkexro tí janhan.

²⁶ Kjánchó jahará titekákonhyará kixin jahará la jehya kolélo kuèntana éxi tjonkará senó.

²⁷ Tí kolélo kuèntana mé tjatsqan va tí tanná la ko kjaxin janhan tjátsqan tí jehe va la ko jehe va mé chréhe va tí janhan.

²⁸ Janhan mé tjaha va tí kjuachón jnkochrín la í ts'itjáyannya va la ko ninkexró tsjachaha tsakitsjexín va tjaná.

²⁹ Ó kjuanjon T'aná, mé tí nkexro tjetóxin t'etqan, na ninkexró tsjacha tsakitsjexín va tí tja ch'án.

³⁰ Janhan la ko T'aná na mé jnkokoá nkexro tíha —ichro ch'án.

³¹ Ntá tí sín judío kuákja sín xro chróchjéhe sín ch'án inaá.

³² Ntá kjuátgehe ch'ín Jesús ntáchro ch'án kixin:

—Nchónhya nkehe jína k'uíkonrá kjuákoxian kjuachaxin kuènte T'aná. ¿Ntá nkekuènté chróchjinará xro? —mé chro ch'án.

³³ Ntá kjuátgehe tí sín judío kixin:

—Jehya tí kjuaxroan jína tjásian chrótjixiánni xro. Náhi. Jaha ijnko chojni ó ntá kjuincheyohé asán Dios na mé tsotjixiánni xro —ichro sín.

³⁴ Ntá ntáchro ch'ín Jesús kixin:

—Ntá ntáchro xroon itén Dios tsíkjin sín ósé kixin ntáchro Dios kixin: “Kjaxinrá éxi Dios tí jahará.”*

³⁵ Ntá ó noheni nkehe ntáchro xroon itén Dios na ntá xitjahya tsitekakonhyani tíha. Mé xikaha ntáchro Dios kixin éxi Dios jnkojnko nkexro k'uáyéhe itén ch'án.

³⁶ A ntá kjuéyána Dios ichr'anna ch'án chjasintajni, ¿ntá nkekuènté ntáchrorá kixin k'uántaxinhan Dios kixin janhan ntáxrjan kixin Xjeen Dios tí janhan?

³⁷ Kja tí chrókjuít'ahya tí xra ich'e T'aná la chrókuítekákonhyará.

³⁸ A ntá kjónté tjet'a tí xra á kjónté titekákonhyará tí janhan na mé chrókuítekáonrá tí xra tjet'a chrókónoaxinrá chrókiénxinrá kixin T'aná la ko janhan mé jnkokoá tjékian ch'án —ichro ch'án.

³⁹ Mé xikaha chrótsé sín tí ch'ín Jesús inaá chrók'uikjéhe ch'án ntá kjuachahya sín ntá sákjuí ch'án.

⁴⁰ Ntá ch'ín Jesús xikjan ch'án tí í jnko lado ntario Jordán inaá tí k'uéjak'e ch'ín Juan k'uékikítexín ch'án chojni senó.

⁴¹ Ntá nchónhya chojni sákjuíchréhe sín ch'án ts'ikon sín ch'án ntáchro sín kixin:

—Chaxín ch'ín Juan kjuasinhya ch'án kjuaxroan jie la kjónté ntoá tí nkehe chrónka ch'án kuènte tí ch'ín i —ichro sín.

⁴² Ntá nchónhya sín kuítekaon sín tí ch'ín Jesús tí kjuíji sín ntiha.

11

Ik'úén ch'ín Lázaro

¹ Itjen ijnko ch'ín níhi mé it'in ch'án Lázaro, chjasén ch'án na mé Betania, mé tí chjasén tí tjan María la ko tí kjavé tjan Marta.

² Tí tjan María mé jnkokoá kichó tí ch'ín Lázaro mé tí ch'ín níhi na mé jehe tjan mé tí tjan kuíkítexín aceite xraxé toté Ìnchéni la ko kjuínchexamáxin tjan kaxihi tjan toté ch'án.*

³ A ntá yóí tí kichó ch'án chjin ichr'án sín ijnko nkexro tsochénta tí ch'ín Jesús kixin:

—Ìnchéni jaha, tí nkexro choxian tjuéhé la níhi ch'án —ichro ch'án.

⁴ Ntá kuínhin ch'ín Jesús ntá ntáchro ch'án kixin:

—Tí chin chóna ch'án jehya kixin ónaá chrók'uitjáyaxón ch'án tí ts'en ch'án. Náhi. Tíha mé tsjakoxin tí kjuachaxin jie kuènte tí Xjeen Dios —ichro ch'án.

⁵ A ntá tí ch'ín Jesús la imá tjuéhé ch'án tí tjan Marta la ko tí tjan kichó tjan la ko tí ch'ín Lázaro.

⁶ Na ntá tió kuínhin ch'án kixin níhi ch'ín Lázaro na kjónté kuítgehe ch'án iyó yaon inaá tí nó kjuák'e ch'án.

* 10:34 Salmo 82.6 * 11:2 Juan 12.3

⁷ A ntá chr'éxin ntáche ch'án tí sín k'uájiko ch'án kixin:

—Sátsjini estado Judea inaá —ichro ch'án.

⁸ Ntá kjuátehe tí sín k'uájiko ch'án kixin:

—Maestro, naḡa séhya tí sín judío ntiha chrótjáha sín xro tjinkaon sín chrók'óyánxian sín xro. ¿Á tjinkávan sátsjia ntiha inaá? —ichro sín.

⁹ Ntá ntáchro ch'ín Jesús kixin:

—Jnkojnko yaon mé chóna teyo hora. Tió ixri chojni nchaḡotjin tsóténkixinhya sín ninkehó kixin t'inkaséyanxín xrohi chjasintajni a.

¹⁰ Tí sín ixri tie mé tsóténkixín sín nkehe kixin chónthaha sín xrohi —ichro ch'án.

¹¹ Ntá chr'éxin ntáche ch'ín Jesús tí sín k'uájiko ch'án kixin:

—Ó k'uájua tí nkexro chóxinni mé ch'ín Lázaro. Ntá sátsjia sintakjayaḡa ch'án —ichro ch'án.

¹² Ntá ntáchro tí sín k'uájiko ch'án kixin:

—Inchéni, tí k'uájua ch'án la mé chrókuitohe ch'án jina —ichro sín.

¹³ Kjánchó tí nkehe ntáchro ch'ín Jesús mé t'axrjexín kixin ó tsikjixin tsik'en tí ch'ín Lázaro. Ntá tí sín k'uájiko ch'án kjuenkayáxin sín kixin ó jehí tjejua ch'ín Lázaro.

¹⁴ Ntá ntoá chrónka ch'ín Jesús kixin:

—Ó tsik'en ch'ín Lázaro.

¹⁵ Ntá chàna kixin kohyana ntiha kixin mé xikaha tsitékákoxnínra. A ntá jie ìntará sátsjitsjeheni ch'án —ichro ch'án.

¹⁶ Ntá ch'ín Tomás, kjaxín tikjitéxin sín ch'án ch'ín Nóhé, mé ntáche ch'án tí í so sín kixin:

—Sátsjini koíni kaín ni ts'enkaoni Inchéni —ichro ch'án.

Ch'ín Jesús ntáchro ch'án kixin sinchexechón ch'án chojni inaá

¹⁷ Ntá kjuuji ch'ín Jesús kuínhin ch'án kixin ch'ín Lázaro la ó chóna noó yaon tsikjixravá ch'án.

¹⁸ A ntá tí chjasin Betania mé chjinxaxon tí chjasin Jerusalén, chóna iyó kilómetro ko t'ó kjínxin.

¹⁹ A ntá itsjé tí sín judío sátsikjitsjehe sín tí tjan Marta la ko tí tjan María tjejonixjehe sín kixin kánhyó ts'ává sín kixin tsik'én tí kichó sín a.

²⁰ Ntá kuínhin tjan Marta kixin ó kui ch'ín Jesús ntá k'uaxrjexín tjan nchia tsjínxin ntiha. A ntá tí tjan María kuitohe tjan nchia.

²¹ Ntá tí tjan Marta ntáche tí ch'ín Jesús kixin:

—Inchéni jaha. Chrókjuak'e ntihi ntá chrók'uenhya kichó ni.

²² Kjánchó ó ñona kixin Dios tsotjáha kaín nkehe tsjanchehé ch'án —ichro tjan.

²³ Ntá ntáchro ch'ín Jesús kixin:

—Tsoxechón kichuá inaá —ichro ch'án.

²⁴ Ntá ntáchro tjan Marta kixin:

—Ó ñona kixin tsoxechón ch'án tió tsoxechón kaín tí sín tsik'en, tí yaon tsjixixín —ichro tjan.

²⁵ Ntá ntáchro ch'ín Jesús kixin:

—Janhan mé ntáxechón chojni la ko tsochóna sín kjuachón. Tí nkexro tsitekaon sín tí janhan na kjónté ó tsik'en sín la naḡa sintaxechón sín inaá.

²⁶ La ko kaín xín tí sín naḡa tjejóchón sín la tsitekaon sín tí janhan na ts'enhya sín. ¿Á títekávan xikaha ní? —ichro ch'án.

²⁷ Ntá ntáchro tjan kixin:

—Chaxín Inchéni títekávan kixin jaha mé Cristo, mé Xjeen Dios, mé tí nkexro kui chjasintajni —ichro tjan.

Tsjánka ch'ín Jesús tí tsikjixravá nkexro Lázaro

²⁸ Ó kjuixin ntáchro tjan Marta xikaha ntá sákjuik'íyehé tjan kichó tjan María ntá imó chénka tjan kixin:

—Ntiha tjan Maestro t'iyghá ch'án —ichro tjan.

²⁹ Ntá kuínhin tjan María ntá tuénxín k'uínkatjen tjan sákjuitsjehe tjan tí ch'ín Jesús.

³⁰ Naḡa tsik'ixenhya ch'án chjasin naḡa tjan ch'án tí xéta ch'án tjan Marta.

³¹ Ntá tí sín judío tjejonixjehe tjan María kixin kánhyó ts'ává tjan, mé k'uikon sín kixin tjoka k'uaxrjexín tjan nchia, ntá kjuichréhe sín tjan kjuenkayáxin sín kixin sátsji tjan tí tsikjixravá kichó tjan, ntaha tsjitsjánkama tjan ch'án, ichro sín.

³² Ntá tí tjan María mé kjuuji tjan tí tjan ch'ín Jesús ntá kjuak'exín toch'in tjan toté ch'án ntáchro tjan kixin:

—Inchéni jaha, chrókjuak'e jaha ntihi ntá chrók'uenhya kichiná —ichro tjan.

³³ Ntá k'uúikon ch'ín Jesús kixin tsjáńka tí tjan María la ko tí sín judío kjuikotoxin tjan ntá imá k'uává ch'án kóxakonhen asén ch'án.

³⁴ Ntá kjuanchankí ch'án kixin:

—¿Nketí kjuavará ch'án? —ichro ch'án.

Ntá ntáchro sín kixin:

—Ínchéni, ¿á sátsjtsjehé? —ichro sín.

³⁵ Ntá tsjáńka ch'ín Jesús.

³⁶ Ntá ntáchro tí sín judío kixin:

—Tsjuhérá kixin imá tjuèhe ch'án tí ch'ín tsík'en —ichro sín.

³⁷ Kjánchó í so sín ntáchro sín kixin:

—Jehe ch'án mé kjuínchek'íkon tí ch'ín t'íkonhya. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? —ichro sín.

Ó xechón ch'ín Lázaro

³⁸ Ntá imá t'avá asén ch'ín Jesús kóchjinehe ch'án tí tòye. Tí tòye mé ijnko tjo, a ntá tí ntója tí tjo mé tsík'ikjèxin ijnko xro.

³⁹ Ntá k'ueŕoan ch'ín Jesús kixin:

—Tjakjían tí xro a —ichro ch'án.

A ntá tí tjan Marta mé kíchó tí nkexro k'uén mé ntáchro tjan kixin:

—Ínchéni, kjá noha kixin kjá imá xra kixin ó chóna noó yaon tsík'en ch'án —ichro tjan.

⁴⁰ Ntá kjuátehe ch'ín Jesús ntáchro ch'án kixin:

—Ó tjonka kixin tsitekávan ntá ts'íkuan tí kjuachaxin jié kuènte Dios —ichro ch'án.

⁴¹ Ntá kjuakjlin sín tí xro a. Ntá ch'ín Jesús konta ch'án nkajní ntáchro ch'án kixin:

—Ít'eni, tjáncháha kjuasáya kixin ó kuínhín tí nkehe ntáxrjan.

⁴² Janhan na ó nóna kixin xráxin tjetinhín tí nkehe ntáxrjan ntá xikaha ntáxrjan jie kixin tsinhín tí sín tjejóntaxín ntíhi ntá tsitekaon sín kixin jaha mé kuétoan k'uinka —mé ichro ch'ín Jesús.

⁴³ Ntá kjuixin nixja ch'án tíha ntá itsen k'uèya ch'án kixin:

—¿Lázaro, t'axrjéxian méhe! —ichro ch'án.

⁴⁴ Ntá tí ch'ín tsík'en k'uaxrjéxin ch'án tòye, na tí tja ch'án la ko tí toté ch'án naxa tjejóchróntetoxín ka la ko tí nkayakon ch'án tjejkèxin ijnko ka. Ntá k'ueŕoan ch'ín Jesús kixin:

—Tjasintankará tí ka chróntetoxín ch'án kixin jína tsji ch'án —ichro ch'án.

Imó kjuenkayáxin sín kixin nkexrí ts'óyán sín tí ch'ín Jesús

(Mt. 26.1-5; Mr. 14.1-2; Lc. 22.1-2)

⁴⁵ Ntá itsjé tí sín judío sákjuikotoxin sín tí tjan María mé k'uúikon sín tí kjuaxroan kjuasin ch'ín Jesús ntá kuítekaon sín tí jehe ch'án.

⁴⁶ Kjánchó iso tí jehe sín sákjuitsjehe sín tí sín fariseo kjuíchénka sín tí kjuaxroan tsíkjasin ch'ín Jesús.

⁴⁷ Ntá tí sín fariseo la ko tí sín nchát'á t'etjoan jnkokoá kójnkoťéko sín tí sín antsi t'etjoan, la ntáchro sín kixin:

—¿Xá nkexrí chrókjuich'ehe ní tí ch'ín a kixin jehe ch'án mé tjasin ch'án kjuaxroan jié?

⁴⁸ A ntá tí chrókuítóheni ch'án xikahó ntá kaín xín chojni chrókuítekaon sín tí jehe ch'án, ntá tsi tí sín romano t'etjoan sinchek'itjáyán sín tí njnkoéni la ko tí xra chónatani la ko tí nación kuénténi —ichro sín.

⁴⁹ Ntá ch'ín Caifás mé tí nkexro t'etjuenhen tí sín nchát'á tí nánó a ntáche ch'án tí jehe sín kixin:

—Jahará la noahyará ninkehó tíha

⁵⁰ la ko kjá ní tjenkayáxinhyará kixin íchá jína kixin jnkokoá chojni chrók'uenyákonhen chjaséni kixin ntá chrók'uitjáyánhya kuénté tí nación kuénténi —ichro ch'án.

⁵¹ Kjánchó ch'ín Caifás la jehya jehó ch'án chrókjuenkayáxin ch'án tíha. Náhi. Jehe ch'án mé k'ueŕjuenhen tí sín nchát'á tí nánó, a ntá tí Nchakuen Dios kjuínchekónohe ch'án kixin ch'ín Jesús mé ts'enyákonhen tí nación judía.

⁵² A ntá jehya tí nación kuènte sín ó chrók'uenyákonhen ch'án. Náhi. Kjaxin kixin sinchekaá ch'án kaín tí sín ts'óna xjeen Dios tjejó sín kuénté chjasintajni.

⁵³ A ntá tí yaon a tí sín t'etjuenhen tí sín judío mé kjuankixin sín kjuenkayáxin sín kixin chrók'óyán sín tí ch'ín Jesús.

⁵⁴ A ntá ch'ín Jesús la í noxínhya k'uájí tí k'uéjé tí sín judío, na mé k'uaxrjéxin ch'án tí estado Judea, sákjuí ch'án chjinaxón nteje, tí tjen ijnko chjasin it'ín Efraín. Ntaha kuítjoek ch'án tí sín k'uájiko ch'án.

⁵⁵ Ntá í séhya ntá ts'ixin tí kia pascua mé ijnko kié tí sín judío. Ntá itsjé chojni k'uaxrjexin sín chjasén sín sákjuí sín chjasin Jerusalén kixin ntaha tsoyaxínhin sín kixin tsojtóá sín kjónté naxa xrankíxinhya ts'ixin tí kia pascua.

⁵⁶ Ntaha k'uájikjeyá sín tí ch'in Jesús k'uéjoxenhen sín tí nínko jié ntá kjuanchankíhi sín kichó sín kixin:

—¿Jahará nkechrórá? ¿Á chrókjuí ch'án tí kia ní o náhi? —ichro sín.

⁵⁷ A ntá tí sín fariseo la ko tí sín t'etuenhen tí sín nchat'á na ó k'uetóan sín kixin tí sín ijnko nkexro nohe nketi tjen ch'in Jesús chróchrónka sín kixin ntá jina chrókjuitsé sín ch'án chrókjuinchenteto sín ch'án la ko chrókjuak'echjina sín ch'án.

12

Ijnko tjan kjuíncheká tjan aceite xraxé náxrjón toté tí ch'in Jesús
(Mt. 26.6-13; Mr. 14.3-9)

¹ Naxa t'itjayan injon yaon ntá ts'ixin tí kia pascua. A ntá ch'in Jesús sákjuí ch'án chjasin Betania tí tjen ch'in Lázaro. Tí ch'in Jesús mé tsíkjinhexechón ch'án.

² Ntá ntíha kjóne sín ijnko kónjin kjuikosáyehe sín tí ch'in Jesús. A ntá tí tjan Marta mé kjuíncheyaxin tjan. A ntá tí ch'in Lázaro la ko í so sín k'uéjó sín kjóneko sín tí ch'in Jesús.

³ Ntá tjan María kjuikao tjan it'ó litro aceite tsik'óna xroan nardo imá tjete tsik'enaxin tjan ntá kjuíncheka tjan toté ch'in Jesús ntá kaxíhi tjan kjuínchexámáxin tjan tí toté ch'án. Na mé kuenté nkaxenhen nchia kókaxraxé tí xroan.

⁴ Ntá ch'in Judas Iscariote, it'é ch'án mé it'in Simón, jehe ch'án mé ijnko tí sín k'uájiko ch'in Jesús, na mé tí ch'in sinchekji tí ch'in Jesús chr'éxin, mé ntáchro ch'án kixin:

⁵ —¿Nkekuénté kóxihya tí xroan xraxé, chrókóxiyin iní ciento chichaon denario kixin chrókjuinkítsa tí sín nòá? —ichro ch'án.

⁶ Kjánchó ch'in Judas la jehya ntáchro ch'án xikaha kixin chrókjuikónóhe ch'án tí sín nòa. Náhi. Ntáchro ch'án tíhi kixin xráxin chee ch'án kixin jehe ch'án t'ayakonhen ch'án tí nkehe tjínka chichaon ntá xráxin teé ch'án tí chichaon tsixrenájín ntiha.

⁷ Ntá ntáchro ch'in Jesús kixin:

—Nté títóhérá tjan. Tsjjak'echjina tjan tí xroan a kixin tí yaon tsoxrávána.

⁸ Tí sín nòa jnkochrínin ts'ejokoará sín. A ntá janhan jnkochríninhya ts'ejóni —ichro ch'án.

Tí sín judío itjo sín nkexrí chrók'óyan sín tí ch'in Lázaro

⁹ A ntá itsjé tí sín judío k'uixikónohe sín kixin ch'in Jesús kjuák'e ch'án tí chjasin Betania, a ntá sákjuí sín ntiha. Jehya kixin chrókjuitsjehe sín tí ch'in Jesús ó. Náhi. Kjáxin tjínkaon sín chrókjuitsjehe sín tí ch'in Lázaro mé tí ch'in tsíkjinhexechón ch'in Jesús.

¹⁰ Ntá tí sín nchat'á t'etóan mé kójnkotsé sín kjuenkayáxin sín chrók'óyan sín tí ch'in Lázaro kjáxin

¹¹ kixin itsjé tí sín judío kuítekaon sín tí ch'in Jesús kixin xikaha kjuínchexechón ch'án tí ch'in Lázaro ntá k'uaxrjekjanxín sín tí sín nchat'á.

K'úixenhen ch'in Jesús chjasin Jerusalén
(Mt. 21.1-11; Mr. 11.1-11; Lc. 19.28-40)

¹² Nchónhya chojni sátsíkji sín chjasin Jerusalén kixin tí kia pascua. A ntá tí yaon chr'éxin k'uixikónohe sín kixin tsjiji ch'in Jesús tí chjasin ntiha.

¹³ Ntá kóchrínin sín chaan ntakajni kjuíxinhin sín ntja itsji ch'in Jesús, itsje sín, ntáchro sín kixin:

—Tjancheheni Dios kjuasáya. Imá jina tí nkexro kjuíxin tí kjuachaxíeni It'éni tjen nkaya nkajni. Imá jina tí ch'in Rey ts'etuenhen tí nación Israel —ichro sín itsje sín.

¹⁴ Ntá tsik'itja ch'in Jesús ijnko kolócho la ntá kjuák'ekjen ch'án, éxi nixja itén Dios kixin:

¹⁵ Chrakonhyará jahará tjejorá chjasin Jerusalén,

tsjehérá ó tje kui tí ch'in Rey kuéntará,

tjekjen ch'án ijnko kolócho.*

¹⁶ A ntá tió kónhen tíha kíenxínhya tí sín k'uájiko ch'in Jesús kixin nkekuénté xikaha kónhen. A ntá chr'éxin tió kjuíxin sákjuíjia ch'án nkaya nkajni ntá xraxínkaon sín kixin xikaha tsíkjin tí sín k'uéchrónka itén Dios óse nkexrí tsonhen ch'án, na ntá xikaha chaxín xiteyá tí chrónka sín senó kixin xikaha tsonhen ch'án.

¹⁷ Mé xikaha kaín tí sín tsikójkotsé tí kjuák'e ch'in Jesús tió k'uíyehé ch'án tí ch'in Lázaro kixin ts'axrjexin ch'án tí tóye tsíkixravá ch'án ntá xechón ch'án mé tí sín a mé chrónka sín tí nkehe k'uíkon sín.

¹⁸ Mé xikaha sákjuíxinhin sín tí ntja tsjixín ch'in Jesús, k'uixikónohe sín kixin xikaha tsíkjasin ch'in Jesús tí kjuaxroan jié.

* 12:15 Zacarías 9.9

¹⁹ Mé xíkaha ntáchro tí sín fariseo itjo sín kíchó sín kixin:

—Tsjehérá kaín rá, ninkehó tsjachahyani sich'eni kixin kaín xín chojni sákjuichréhe tí jehe ch'án —ichro sín.

Iso sín nkivee griego tjeýá sín tí ch'ín Jesús

²⁰ Iso sín nixja griego k'uéjójákjan tí sín sákjuí sín tí kia chjasin Jerusalén tsoxraxinakonxín sín Dios.

²¹ Ntá kóchjinehe sín tí ch'ín Felipe, chjasén ch'án mé Betsaida, estado Galilea, chrónógehe sín ch'án kixin:

—Tjinkaonni chrók'uikonní tí ch'ín Jesús —ichro sín.

²² Ntá ch'ín Felipe sákjuichenka ch'án tí ch'ín Andrés. Na ntá yóí sín sákjuichenka sín tí ch'ín Jesús.

²³ Ntá ntáchro ch'ín Jesús kixin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyéhe ch'án tí kjuachaxin kuènte It'é.

²⁴ A ntá tsojtjonkará ijnko nkehe chaxín kixin tí chrókjuítsínkahya ijnko noatrigó tí nche chrók'uenhya tí noa a, ntá jnkokóá noa chrókjuak'e. A ntá tí chrók'uen tí noa a ntá chrók'óna nchónhya noa kixin chrótjá sín.

²⁵ A ntá tí nkexro imá tjuéhe asén kixin kohya nkehe chrók'uaúsínka na mé tsochóntahya ch'án kjuachón jnkochrín. A ntá tí nkexro tjeukuénhya asén kjónté chrók'uenxín ntihi chjasintajni tí chrónka ch'án itén Dios na mé chr'éxín tsochóna ch'án kjuachón jnkochrín.

²⁶ A ntá tí jnkójín nkexro tjinkaon chrókjuich'ena sín xra t'ichjánxin tsochréhe sín tí janhan. A ntá tí tjén janhan na mé kjaxin tjejó tí sín ch'ena sín xra. A ntá jnkójín sín sich'ena sín xra xíkaha na mé T'aná mé tsjikosáyehe tí jehe sín.

Ch'ín Jesús chrónka ch'án kixin its'en ch'án

²⁷ Ntá jie imá tóxakonhen asenná. ¿Nkehe chróntáxrjan? ¿Á chrókjuáncháha T'aná kixin sinchekaána ch'án tí nkehe tsona jie o náhi? Kjánchó xra ó k'uinka xíkaha tsona.

²⁸ Jaha It'éni, tjákoxian tí kjuachaxin kuènte ihnjá —ichro ch'án.

Ntá kuínhin sín nixja ijnko nkexro nkajní ntáchro kixin:

—Ó kjuixín kjuákoxian tí kjuachaxin la ko xíkaha xikjákoxian inaá.

²⁹ A ntá tí sín tjejótaxín tsikinhin sín mé ntáchro sín kixin kjónta, la ko í so sín ntáchro sín kixin:

—Ijnko ch'ín ángel nixjehe ch'án —ichro sín.

³⁰ Kjánchó ntáchro ch'ín Jesús kixin:

—Náhi. Jehya kixin janhan tí jie chrókjuínhan tí nixja ch'án. Náhi. Nixja ch'án kixin tsinhínrá jahará.

³¹ Ntá jie tsitogéxín tí ijje chojni chjasintajni na mé tí nkexro t'etóan chjasintajni mé ts'axrjehe ch'án tí xra t'etóan ch'án.

³² A ntá tío tsjak'énkana ijnko ntacruz ntá nchónhya sín ts'ikon sín ntá tsitekaon sín tí janhan —ichro ch'án.

³³ Mé xíkaha chrónkaxín ch'án kixin nkexrí ts'énxín ch'án.

³⁴ A ntá kjuátehe tí sín ntiha ntáchro sín kixin:

—Kuínhinni nchekuáxin sín tí xroon tsíkjin sín ósé chrónka kixin Cristo la jnkochrín tsjak'e ch'án. ¿Ntá nkekuènté ntáchrúa kixin tí Xjeen Dios K'óna Chojni t'ichjánxin tsjak'enkáni ch'án ijnko ntacruz? ¿Xá nkexéhe tí Xjeen Dios K'óna Chojní? —ichro sín.

³⁵ Ntá ntáchro ch'ín Jesús kixin:

—Naxa tjen tí xrohi tjejókoará, kjánchó í séhya tsjak'e. Chrók'uajirá tí naxa tjen tí xrohi t'inkaséyanxín ntja. A ntá náhi la ó ts'ixín tie. A ntá tí sín ixri tí sítíe a mé noehya sín nketí sátsji sín.

³⁶ Titekáonrá tí xrohi tí naxa tjen t'inkaséyan kixin mé ts'ónará chojni kuènte t'inkaséyan —ichro ch'án.

Ntá kjuixín chrónka ch'ín Jesús tíha ntá sákjuí ch'án kjuák'eméhe ch'án tí jehe sín.

Tí sín judío kuítekakonyha sín tí ch'ín Jesús

³⁷ K'uékjasin ch'ín Jesús nchónhya kjuaxroan jie k'uikonxín kon sín ntá kjónté kuítekakuenhya sín ch'án

³⁸ kixin mé xíkaha tsoxiteyá tí nkehe tsintáchro ch'ín Isaías tsíkjin ch'án ósé kixin:

Ínchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jie kuènte ch'án.†

³⁹ Méxra kuítekakuenhya sín tí ch'ín Jesús éxi tsíkjin ch'ín Isaías kjaxin kixin:

⁴⁰ Dios kjuínchek'ikonhya ch'án sín la ko kjuínchecha ch'án asén sín,

† 12:38 Isaías 53.1

kixin ntá chrók'uikonhya sín,
la ko chrókienxínhya sín,

kixin ntá chrókóchjinehya sín tí janhan kixin chrókujintakitohá sín jína.[‡]

⁴¹ Xíkaha k'uéchrónka ch'ín Isaías imá ósé kixin k'uék'íkon ch'án tí kjuachaxin jié kuènte Jesús ntá k'uéchrónka ch'án nkexrí tsjak'e tí ch'ín Jesús.

⁴² Kjánchó itsjé tí sín judío t'etóan kuítekaon sín tí ch'ín Jesús kjánchó noxínhya chrónka sín. Chrakonhen sín tí sín fariseo kixin chrókóninkaon sín la í chrókjuanjonhya sín kjuachaxin chrók'uixenhen sín tí nínkøe sín judío.

⁴³ Mé xíkaha imá kóxrjínhjn sín kixin chojni chjasintajni chrókuikosáyehe sín ntá kánhyó kjueyá sín kixin chrókuikosáyehe sín Dios.

Tí nkehe ntáchro ch'ín Jesús mé tsitoexixin ijié chojni

⁴⁴ Ntá itsen nixja ch'ín Jesús ntáchro ch'án kixin:

—Tí titekáonrá tí janhan na mé jehya janhván titekáonrá na mé kjaxin titekáonrá T'aná, mé tí nkexro k'uetuanna k'uinka.

⁴⁵ Éxí tí t'íkonrá tí janhan mé xíkaha t'íkonrá tí nkexro k'uetuanna k'uinka.

⁴⁶ A ntá janhan mé xrohi k'uinka chjasintajni kixin tí sín titekaon sín tí janhan ts'ejóhya sín tí sítíe a.

⁴⁷ A ntá tí jnkójínrá tinhínrá tí nkehe xrxjanka ntá titekákonnyará la jehya janhan sjntakjasótiará kixin jehya kixin k'uinka sjntakjasóte chojni chjasintajni. Náhí. K'uinka kixin sjntakáa chojni.

⁴⁸ A ntá tí titekákonnyará tí janhan la ko titekákonnyará tí tan kuèntana la ó síin nkexrí tsitoexixin ijiárá, na mé éxí tí tan xrxjanka mé Dios sinchekitøexin ijiárá tí yaon tsjixixin chjasintajni.

⁴⁹ Jehya tí nkehe kuèntana tjéxrxjanka. Náhí. T'aná na mé tí nkexro k'uetuanna k'uinka mé k'uetuanna nkehe tsøxrxjanka la ko nkehe tsjáku.

⁵⁰ A ntá nõna kixin tí nkehe k'uetoan T'aná mé xranjonxín tí kjuachón jnkochrixin. Mé xíkaha tí nkehe ntáxrxjan mé tjéxrxjanka kixin T'aná mé k'uetuanna.

13

Ch'ín Jesús kjuínchek'ònti ch'án toté tí sín k'uájiko ch'án

¹ A ntá tí yaon xjka tí ntóye tsjasin sín tí kia pascua. A ntá ch'ín Jesús ó nohe ch'án kixin ó kjuixraká tí hora tsítóhe ch'án chjasintajni sátsjichréhe ch'án It'é ch'án. Xráxin tjuèhé ch'án tí sín kuènte ch'án chjasintajni, a ntá jie tsjakøxín ch'án kixin imá tjuèhe ch'án tí jehe sín.

² A ntá tí ch'ín Tsochren tsík'etuennen asén ch'ín Judas Iscariote, it'é mé it'in Simón, kixin sinchekji ch'án tí ch'ín Jesús.

³ Ntá ch'ín Jesús la ó nohe ch'án kixin tsíkixín ch'án tí tjen Dios la ko xikjan ch'án sátsjichréhe ch'án Dios inaá. La ko ó nohe ch'án kixin It'é ch'án tsikjanjon kjuachaxin ts'etuennen ch'án kaín xín nkehe.

⁴ Ntá naxá tjejóne sín ntá k'uínkatjen ch'ín Jesús kuakitsje ch'án tí ka titsáte ch'án la kuákja ch'án ijnko ka xámáxin chojni t'ònti k'uínkat'óxin ch'án.

⁵ Ntá kuíkja ch'án ijnko nkehe ntá, ntá kjuankixin ch'án kjuínchek'ònti ch'án toté jnkoinko tí sín k'uájiko ch'án la ko kjuínchexámáxin ch'án tí ka k'uínkat'óxin ch'án.

⁶ Na ntá tió kjuíjixraká tí tjen ch'ín Pedro, a ntá ntáchro ch'ín Pedro kixin:

—Jaha Ìnchéni la, ¿nkekuènté chrókujínchek'óntia toténi? —ichro ch'án.

⁷ Ntá kjuátehe ch'ín Jesús ntáchro ch'án kixin:

—Jaha la naxá tiénxinha tí nkehe tjét'a janhan. Chr'éxin ntá tsiénxian nkekuènté tjét'a tíha —ichro ch'án.

⁸ Ntá ntáchro ch'ín Pedro kixin:

—Jaha la sjnchek'óntihya toténi —ichro ch'án.

Ntá ntáchro ch'ín Jesús kixin:

—Tí sjntak'óntihya tí jaha la kjá ninkehó tsochontahya tí janhan —ichro ch'án.

⁹ Ntá kjuátehe ch'ín Simón Pedro ntáchro ch'án kixin:

—Náhí, Ìnchéni. Jehya tí toténi ó chrókujínchek'óntia. Kjaxin itjani la ko ikjani chrókujínchek'óntia —ichro ch'án.

¹⁰ Ntá ntáchro ch'ín Jesús inaá kixin:

—Tí sín tsíkixin tsík'ònti la t'ichjánxinha kuenté sín ts'ònti sín inaá. Náhí. Jehó toté sín ó mé t'ichjánxín naxá ts'ònti kixin kuenté la ó tjoá. A ntá jahará la ó tjoárá, kjónté kénnyará —ichro ch'án.

[‡] 12:40 Isaías 6.10

11 Mé xikaha ntáchro ch'in Jesús kixin kénhya sín tjóá sín kixin ó nohe ch'an nkexro sinchekji ch'an.

12 Ntá tió kjuixin kjuínchek'ónti ch'an toté sín kaín sín ntá xik'inkáya ch'an inaá tí ka kuítsáte ch'an ntá kjuák'etjaxin ch'an tí k'uínkatjenxin ch'an. Ntá ntáchro ch'an kixin:

—¿Á kiénxinrá tí nkehe kjuít'a?

13 Jahará la ntáchrórá kixin janhan Maestro kuéntará la ko Ìnchárá. Chaxín ntoá ntáchrórá kixin janhan tíha.

14 Janhan tí Maestro kuéntará la ko ìnchárá kjuíntak'óntia totará. A ntá jahará kjaxin xikaha chrókjuínchek'óntirá toté kichuára.

15 Janhan mé kjuákoxián kixin xikaha chrókjuich'erá éxi kjuít'a janhan.

16 Ijnko nkehe chaxín tsotjonkará kixin tí sín ch'exón xra mé t'etóanhya sín éxi t'etóan tí lámoe sín, la ko tí sín k'uáyéhe sín ijnko xra t'etóanhya sín éxi t'etóan tí sín kjuanjón tí xra a.

17 Tí chrókiénxinrá nkehe tíha la ko chrókjuínchexiteyará la chrókócháhará má.

18 Jehya kaín rá xikaha ntáxrjan. Ó òna kixin nkexro kjuéyá janhan. Kjánchó t'ichjánxin tsoxiteyá tí nkehe tsikjin sín óse ntáchro kixin: "Ijnko nkexro tjénekan mé tsjanjonkian."*

19 Mé xikaha tjétjonkará senó kixin tió ts'atsínka tíha ntá tsitékónrá kixin janhan mé tí nkexro xráxin tjen.

20 Ijnko nkehe tjetóan tjétjonkará kixin tí tsjánjonrá kjuachaxin tsitóhe tí chojni ichr'an janhan, mé éxi yóhe chrókjuánjonrá kjuachaxin chrókuitóhe tí janhan, a ntá tí tsjánjonrá kjuachaxin tsitona janhan mé éxi yóhe chrókjuánjonrá kjuachaxin chrókuitóhe tí nkexro k'ueŧuanna k'uinka —ichro ch'in Jesús.

Ch'in Jesús chrónka kixin ch'in Judas sinchekji ch'an

(Mt. 26.20-25; Mr. 14.17-21; Lc. 22.21-23)

21 Ntá kjuixin chrónka ch'in Jesús tíha, ntá kóxakonhen asén ch'an má ntá ntoá chrónka ch'an kixin:

—Ijnko nkehe tjetóan tsotjonkará kixin jnkojínrá tjejorá ntíhi mé sinchekjiráni —ichro ch'an.

22 Ntá tí sín k'uájiko ch'an kjuanjixin komáxin la ko í komáxin kichó sín kixin noehya sín nkexro tí ntáchro ch'an.

23 A ntá ijnko ch'in k'uájiko ch'in Jesús imá tjuèhe ch'an itjen ch'an chjinaxón tí tjen ch'in Jesús tjejóne sín.

24 Ntá ch'in Simón Pedro kjuákoexín seña k'ueŧuénhen ch'an tí í jnko ch'in a kixin:

—Tjanchankí ch'an nkexro tíha —ichro ch'an.

25 A ntá tí ch'in a na mé antsí kóchjinehe ch'an tí ch'in Jesús, ntá kjuanchankí ch'an ntáchro ch'an kixin:

—Ìnchéni, ¿nkexro tíha? —ichro ch'an.

26 A ntá kjuátehe ch'in Jesús ntáche ch'an tí ch'in a kixin:

—Sintakjata it'ó niotja, a ntá tí nkexro tsotjaha tí t'ó niotja a mé tí nkexro a —ichro ch'an.

A ntá mé xikaha kjuínchekjata ch'in Jesús it'ó niotja ntá chjéhe ch'an tí ch'in Judas Iscariote, it'é ch'an mé it'in Simón.

27 Ntá k'uáyéhe ch'an tí niotja ntá tuénxin k'uixenhen asén ch'an tí ch'in Tsochren. Ntá ntáche ch'in Jesús tí jehe ch'an kixin:

—Tí xra tjínkávan sich'e la jaí tóxakonhan —ichro ch'an.

28 Kjánchó nijnko tí sín tjejóne ntíha kiénxínhya sín nkekuénté xikaha ntáchro ch'an.

29 Ch'in Judas la t'ayakonhen ch'an tí nkehe tjínká chichaon ntá iso sín kjuenkayáxin sín kixin ách'e ch'in Jesús mé k'ueŧuénhen ch'an tí ch'in Judas kixin ichrén nkehe sátsjik'ena ch'an kuénte tí kia a, o ách'e ichrén nkehe sinchekjtonhen ch'an tí sín òna a.

30 Ntá k'uáyéhe ch'in Judas tí niotja, a ntá k'uaxrjéxin ch'an ntíha. A ntá ó k'uúxin tie.

Ijnko nkehe nixin k'ueŧoan ch'in Jesús

31 A ntá ó kjuixin sátsjikji ch'in Judas, ntá ntáchro ch'in Jesús kixin:

—A ntá jie tsoxoxín tí kjuachaxin jíé kuénte tí Xjeen Dios K'óna Chojni la ko tsjakoxin ch'an tí kjuachaxin jíé kuénte Dios.

32 Na mé xikaha tí Xjeen Dios K'óna Chojni mé tsjakoxin tí kjuachaxin jíé kuénte Dios. A ntá Dios mé tsjakoxin ch'an tí kjuachaxin kuénte Xjeen ch'an la tjoka tsoxiteyá.

33 Xjeenni, í séhya naxa tsjak'é janhan ts'ejókoará ntíhi. Ntá jahará mé ts'ajikjéyará tí janhan. Ntá éxi yóhe k'ueŧjanka tí sín judío mé tjonkará kjaxinrá kixin: Ninkexró xitjahya tsjiji sín tí sátsjiyá janhan.†

34 Ijnko nkehe nixin tétuanhanrá ijie kixin chrótjuéhérá kichuára éxi yóhe tjuahará mé xikaha chrótjuéhérá kichuára.

* 13:18 Salmo 41.9 † 13:33 Juan 7.33

³⁵ Tí tsotjuèhéra kichuára ntá tsoñoexín kain xín chojni siín chjasintajni kixin tin-kachónkirá tí janhan —ichro ch'án.

Chrónka ch'ín Jesús kixin ch'ín Pedro sinchemá ch'án kixin chónhya ch'án tí jehe ch'án
(Mt. 26.31-35; Mr. 14.27-31; Lc. 22.31-34)

³⁶ Ntá kjuanchankíhi ch'ín Simón Pedro tí ch'ín Jesús kixin:

—Ínchéni, ¿nketí sátsjia? —ichro ch'án.

Ntá kjuátehe ch'ín Jesús ntáchro ch'án kixin:

—Tí nó sátsjiyá xitjahya tsochréhéa jaí. Ntá chr'éxin tsjasánchréhéa ntiha —ichro ch'án.

³⁷ A ntá ntáchro ch'ín Pedro kixin:

—¿Nkekuénté xitjahya tsochráha tí jaha jaí? Kjonté chrók'uényákonhán —ichro ch'án.

³⁸ Ntá kjuátehe ch'ín Jesús ntáchro ch'án kixin:

—¿Á chaxín ts'enyákonna jaha? Ijnko nkehe chaxín tsotjonka kixin naxá tsotsjehya tí kochíntoqa la ó tsjixin sinchemána níya kixin chonhyana, tsixrua.

14

Jesús mé ntia sátsjixinni tí tjen It'éni tjen nkaya nkajni

¹ Tóxakuanhyará jahará. Titekáonrá Dios la ko kjaxin titekáonrá tí janhan.

² Ntoe T'aná nchónhya nchia siín ts'ejóni. A ntá tí xikahya chrók'uixin la xikahya chrótjonkará. Méxra sátsjiyá sintayóxian tí chrók'uejóni.

³ A ntá tí sátsjiyá sintayóxian, ntá tió tsjixin ntá ts'inka inaá, ntá sátsjini kixin jahará kjaxin chrók'uejorá ntiha tí tsjak'é janhan.

⁴ Jahará la ó nohará nketí sátsjiyá la ko ó nohará tí ntja a —ichro ch'án.

⁵ Ntá kjuátehe ch'ín Tomás ntáchro ch'án kixin:

—Ínchéni, noehyani nketí sátsjia jaha. ¿A ntá nkexrí chrókónoheni tí ntja a? —ichro ch'án.

⁶ Ntá kjuátehe ch'ín Jesús ntáchro ch'án kixin:

—Janhan mé tí ntja la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jina tsjiji tí tjen T'aná.

⁷ Tí chrókuátsoanrá tí janhan ntá xikaha chrókuátsoanrá T'aná kjaxin. Na ntá ó choxínra ch'án jie la ko ó tjejókomará ch'án —ichro ch'án.

⁸ Ntá ntáchro ch'ín Felipe kixin:

—Ínchéni, títoghéni kixin tsochóxinni It'á. Táhó mé tjinkaonni —ichro ch'án.

⁹ Ntá kjuátehe ch'ín Jesús ntáchro ch'án kixin:

—Felipe, ósé tjejóni, ¿a ntá naxá jtátsoanhya tí janhan ní? A ntá xikaha tí t'ikonrá tí janhan na mé xikaha chrók'uikonrá T'aná. ¿Nkekuénté tjanchána kixin chrókuíttoha chrók'uikonrá tí T'aná?

¹⁰ ¿Á titekákonhya jaha kixin janhan jnkokoá tjékian T'aná, la ko T'aná tjen tí tjén janhan? Tí nkehe níxja janhan la jehya kuéntana. Náhí. T'aná tjékian janhan mé tjeche ch'án tí xra kuente ch'án.

¹¹ Titekáonrá kixin jnkokoá tjékian T'aná, a ntá T'aná itjen tí tjén janhan. Kjonté kuitekákonhyará xikaha la chrókuitekáonrá kixin tí kjuaxroan jie kjuákoxian k'uikonrá.

¹² Ijnko nkehe chaxín tjonkará kixin tí chaxín tsitekáonrá tí janhan ntá kjaxinrá tsjachará s'ich'erá xra yóhe tjet'a la ko kjaxin ixra antsí jie tsjachará s'ich'erá kixin janhan la ó sátsjiyá tí tjen T'aná.

¹³ Kain nkehe tsjanchatóxixinrá tí nina na mé tsjánjuan kixin xikaha tsjákoxian tí kjuachaxin kuente T'aná.

¹⁴ Tí chrén nkehe tsjanchatóxixinrá nina la janhan la tsjánjuan.

Ch'ín Jesús chrónka ch'án kixin chaxín tsochr'án ch'án tí Nchakuen Dios

¹⁵ Tí chaxin tjuéhéa tí janhan ntá chrókjuinchexiteyéhéa tí nkehe kuétuanhanrá.

¹⁶ Ntá tsoxrjannóaha T'aná kixin tsochr'án ch'án Nchakuen ch'án kixin tsjinkítsa tí jahará la ko sinchechéhe asánra la mé ts'ejokoará jnkochríxin.

¹⁷ Jehe ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'ikonhya sín ch'án la ko chónhya sín ch'án. Kjánchó jahará ó choxínra ch'án kixin tjejokoará ch'án la ko ts'ejokoará ch'án jnkochríxin.

¹⁸ Janhan na tsjtóahyará nõerá jahórá, na mé tsokjan inaá kixin ts'ejóni.

¹⁹ A ntá séhya ntá tí sín chjasintajni ts'ikonhya sín tí janhan inaá. Kjánchó jahará mé ts'ikonrá tí janhan. Ntá kjaxinrá ts'ejochónra kixin janhan na tjechuán.

²⁰ A ntá tí yaon a chrókónohará kixin T'aná la ko janhan jnkokoá tjékian la ko kjaxin jahará la ko janhan jnkokoá tjejóni.

²¹ Tí nkexro nohe tí nkehe tétogan la ko sinchexiteyéhé sín mé xíkaha tsjakoxin sín kixin chaxín tjuèhe sín tí janhan. A ntá tí tjuèhe sín tí janhan ntá T'aná mé tsotjuèhe tí jehe sín la ko kjaxin janhan tsotjuəhə sín la ko tsjakoxian nkexrí tјén janhan —ichro ch'ín Jesús.

²² A ntá tí ch'ín Judas, jehya tí ch'ín Iscariote tíha, na mé kjuanchankí ch'án kixin:

—Inchéni, ¿nkekuènté jehóni tјákoxian, a ntá tјákoéxinhya tí chojni chjasintajni? —ichro ch'án.

²³ Ntá kjuátghe ch'ín Jesús ntáchro ch'án kixin:

—Tí nkexro tjuèhe tí janhan mé sinchexiteyéhé tí nkehe tétogan. La ko T'aná mé tsotjuèhe tí jehe sín la ntá T'aná la ko janhan ts'ejókoni sín.

²⁴ A ntá tí sín tjuèhya tí janhan la mé nchexiteyéhya sín tí nkehe tјákua. A ntá tí nkehe tјákua tjejotinhínrə la jehya kuèntana. Náhi. Kuènte T'aná tí nkexro k'uetuanna k'uinka.

²⁵ Naxə tjejóni la tјétjonkará kaín tíhi.

²⁶ A ntá Nchakuen T'aná tsochr'án ch'án kjuachaxin nina mé tsjinkitsa tí jahará la ko sinchexéhé asánrə la ko tsjakohará kaín nkehe la ko sinchexraxinkaonrə kaín nkehe xrjanka.

²⁷ 'Kjuaxróxin tsjtohə la ko kjuaxróxin kuèntana tsotjahará. Jehya éxí tí kjuaxróxin chrókuanjon tí sín chjasintajni. Náhi. Chrókóxakuenhya asánrə la ko chróchrakonhyará.

²⁸ Ó kuínhínrə ntáxrjan kixin sátsjiyá la ko tsokjan janhan ts'ejóni inaá. Tí chaxín tjuèhérá tí janhan ntá chrókócháhará tí kuínhínrə kixin sátsjiyá tí tјen T'aná kixin antsí t'etogan ch'án la kánhyó tétogan janhan.

²⁹ Senó tјétjonkará tíhi kixin tió tsonhen tíha la ts'ikonrə ntá tsitékáonrə jahará.

³⁰ 'Ntá jie la í séhya tsonixjahará kixin tí jie itsi tí ch'ín Tsochren, mé tí nkexro t'etuñhen tí sín chjasintajni. A ntá jehe ch'án la ninkehó t'etuannahya tí janhan.

³¹ Kjánchó t'ichjánxin kixin xíkaha tsonhen ntá tí sín chjasintajni mé tsonhe sín kixin tjuəhə T'aná la ko nchexiteyáhə tí nkehe k'uetuanna ch'án. Ntá jie t'inkatjenrə sátsjixinni ntíhi.

15

Tí nta t'óna to uva la ko tí chaan nta

¹ 'Janhan mé éxí yóhé ijnko ntanə tјechón itsa to uva la ko T'aná mé éxí yóhé tí nkexro t'ayakonhen tí nta a.

² Tsochrínjin ch'án tí chaan nta t'ónahya to. A ntá tí chaan nta t'óna to mé nchetjuák'á ch'án kixin ntá ts'óna antsí má tsjé to.

³ A ntá jahará la kótjuáxinrə tí tanná k'uetjonkará senó.

⁴ Tí tsjtoéhyará tí janhan ntá kjaxin janhan tsjtoəhya tí jahará. Mé xíkaha ijnko chaan nta ts'axrjentehe tsjachahya jehó ts'óna to, la ko xíkaha jahórá tsjachahyará s'ich'erá tí xra kuèntana tí tsjtohérá tí janhan.

⁵ 'Janhan na mé yóhé tí ntanə, a ntá jahará la tí chaan tí ntanə tsík'ayanta. Tí nkexro jnkoəá tјenkayáxinkian mé tsjacha ts'óna nchónhya to. A ntá tí tsinkáchónkihya sín tí janhan la ninkehó xra tsjachahya sín sich'e sín.

⁶ A ntá tí nkexro jnkoəáhya tјenkayáxinkian na mé éxí yóhé tí nta ch'ehya xra tsikóchrínjin sín tsík'itjí sín chrínta tí nonte a tsqxámá ntá tsorexre ntá tsoche.

⁷ 'Ntá tí chaxín tsjtoéhyará tsinkachónkirá tí janhan la ko ts'itjáyanyarə tí nkehe kjuáohará ntá tsjanchará ichrén nkehe tјinkáonrə la ts'ayéhérá.

⁸ A ntá T'aná la tsjtoéhé ch'án tí ts'ónarə itsjé to. Mé xíkaha tsjakoxinrə kixin tinkachónkirá tí janhan.

⁹ Janhan tjuəhará tí jahará éxí tjuəna T'aná. Chrókónohará kixin tjuəhará.

¹⁰ Tí tsitékáonrə tí nkehe kuétuəhanrə ntá tsonohará kixin tjuəhará éxí yóhé kjaxin janhan ntaxitéyá tí nkehe k'uetuanna T'aná ntá kónóna janhan kixin tjuəna ch'án.

¹¹ Mé xíkaha tjonkará kaín tíha kixin ntá éxí chána mé xíkaha tsjintaxín tsjtoéhé asánrə.

¹² Tí nkehe kuétuəhanrə la mé tíhi kixin chróttjuèhérá kichuárá éxí tjuəhará xíkaha.

¹³ Ninkexró chrókóyóhé éxí tí nkexro imá tjuèhe tí sín chóxin ch'án ntá ts'enyákonhen ch'án tí jehe sín.

¹⁴ Jahará la chojni choxian tí tsitékáonrə tí nkehe tétuəhanrə.

¹⁵ Ntáxrjanhya janhan kixin jahará chojni ch'exón xra kixin tí chojni xíkaha ch'exón xra mé noehya sín nkehe tí xra ch'e tí lámə sín a. Náhi. A ntá jahará la chojni choxian kixin kaín xín nkehe kjuəqona T'aná mé kjuáohará.

¹⁶ Jehya kixin jahará kjuéyará tí janhan. Náhi. Janhan mé kjuéyá tí jahará kixin tsotjahará xra, a ntá éxí yóhé to xé mé chrók'uaxrje jina tí xra s'ich'énarə kixin chrók'uitjáyanyha. A ntá T'aná mé tsotjahará ch'án kaín xín nkehe tsjanchexinrə nina.

¹⁷ Mé xíkaha tétuəhanrə kixin tsotjuèhérá kichuárá.

Tí sín chjasintajni nínkakonhen sín tí ch'in Jesús la ko tí sín tinkáchónki ch'án

¹⁸ Tí tsonínkakonhanrá tí chojni chjasintajni ntá chrókónohará kixin senó janhan nínkakonna sín.

¹⁹ Tí chrókókuéntará chjasintajni ntá tí sín chjasintajni chrórtjuahará sín kixin naḡa kjéhyará sín. Kjánchó janhan kjuéyá tí jahará kixin chrók'uauxrjékjanxínrá tí sín síin chjasintajni. A ntá tí sín chjasintajni nínkakonhanrá sín kixin jahará jahará kuéntará chjasintajni.

²⁰ Xráxinkáonrá tí nkehe tsítjonkará kixin tí sín ch'ehe lámøe sín xṛa tjetóxinhya ts'etøan sín.* Éxi yóhe chónkina sín mé xíkaha tsochónkihi sín tí jahará. A ntá tí kuítekaon sín tí nkehe kjuáqohá sín ntá kḡaxin tsitekaon sín tí nkehe naḡa tsjákohérá sín.

²¹ Mé xíkaha sit'ahará sín kixin jahará tinkachónkirá tí janhan la ko jehe sín chónhya sín tí nkexro ichr'ánna k'uinka ntihi.

²² Tí chrók'uinkahya janhan ntihi chrónixjahya sín ntá chrókuamáhya sín jje. Ntá jje kohya nkeri tsaáxin sín kixin tí jje tinkákjasin sín.

²³ Tí sín nínkakonna mé xíkaha nínkakonhen sín T'aná.

²⁴ Chróchóntahya sín jje tí chrók'uejókianhya sín ntihi chrókuásinhyá janhan kjuaxroan jje éxi tsíkjasinhyá ninkexró senó. Ntá jje ó k'uikon sín kaín tí kjuaxroan, a ntá kjónté nínkakonna sín tí janhan la ko nínkakonhen sín T'aná kḡaxin.

²⁵ Mé xíkaha tsonhen kaín tíha kixin ntá tsoxiteyá tí nkehe ntáchro tí ley kuénte sín kixin: "Kohya jje kjuásian janhan ntá kjónté kónínkakonna sín."[†]

²⁶ A ntá tsi tí nkexro tsjinkitsa la ko sinchechéhe asánrá. Tíha mé tí Nchakuen Dios chaxín. Janhan mé tsochr'an ch'án kixin tí kjuachaxin kuénte T'aná. A ntá jehe ch'án mé tsochrónka nkexri tjén janhan

²⁷ la ko jahará kḡaxinrá tsochrónkará nkexri tjén janhan kixin tí xrankixixín la k'uejóni jnkokóá.

16

¹ Kaín tíhi tjetjonkará kixin chrókuítóehyará tí nkehe kjuákohará.

² Tí sín judío tsjanjonhya sín kjuachaxin ts'ixenhenrá nínkoé sín la ko tsjixraká tí yaon kixin tí sín ts'óyán sín tí jahará tsonáchro sín kixin xíkaha mé tjejóch'e sín xṛa kuénte Dios, tsixro sín.

³ Mé xíkaha sich'e sín kixin chónhya sín T'aná la ko chónhyana sín.

⁴ A ntá tjonkará kaín tíhi kixin tió tsjixraká tí yaon xíkaha tsonhen ntá tsoxráxinkáonrá kixin ó k'uetjonkará senó a.

Tí xṛa ch'e Nchakuen Dios

Tí xrankixixín k'uetjonkahyará tíhi kixin jnkokóá k'uekéjóni.

⁵ Ntá jje sátsjiyá tí tjen tí nkexro ichr'ánna k'uinka. Kjánchó nijnkorá tjanchankihyará nketi sátsjiyá.

⁶ Ntá kjuixin tjonkará tíha ntá imá t'avará kixin kuínhínrá xíkaha xṛjanka.

⁷ A ntá chaxín tí nkehe tjetjonkará kixin íchá jína sátsjiyá kixin jahará jína chrók'uejorá. A ntá tí sáchrókjuíhyá ntá chrókuihyá tí nkexro tsjinkitsará. A ntá tí sátsjiyá janhan ntá tsétoan kixin itsi ch'án ntihi.

⁸ A ntá tsi ch'án mé sinchexraxinkaon ch'án tí chojni chjasintajni kixin jehe sín mé tjasin sín jje, la ko itjen ijnko ntá ntoá chrókuakja sín la ko Dios mé sinchekitøexín tí jje kjuasin sín.

⁹ Xíkaha chónka sín jje kixin tinkáchónkihyá sín tí janhan.

¹⁰ A ntá tsonhe sín kixin itjen tí ntá ntoá kixin sátsjiyá tí tjen T'aná ntá ts'ikonhyará tí janhan inaá,

¹¹ la ko tsonhe sín kixin Dios sinchekitøexín ijje kixin ó kjuixin kuítóexín ijje tí nkexro t'etøan chjasintajni kixin tsjasóte.

¹² Naḡa chonta janhan itsje nkehe chrótjonkará, kjánchó chrókjuachahyará chrókiénxinrá jje.

¹³ A ntá tió tsi tí Nchakuen Dios chaxín ntoá ntá jehe tí Nchakuen Dios mé tsjáqohará ch'án kaín xín nkehe ntoá. Méxṛa jehya tí nkehe kuénte ch'án tsochrónka ch'án na mé tí nkehe tsinhín ch'án mé tsochrónka ch'án tsjáqohará ch'án tí nkehe tsonhen chr'éxin.

¹⁴ Jehe ch'án mé tsjikosáyana ch'án kixin ts'áyéhe ch'án tí nkehe kuéntana ntá tsjáqohará ch'án nkehe tíha.

¹⁵ Kaínxín nkehe chónka T'aná na mé kuéntana. Mé xíkaha ntáxṛjan kixin tí Nchakuen Dios chaxín ntoá mé ts'áyéhe ch'án tí nkehe kuéntana ntá tsjáqohará ch'án nkehe tíha.

Senó ts'ává sín ntá chr'éxin tsochéhe sín

* 15:20 Juan 13.16 † 15:25 Salmo 35.19; 69.4

¹⁶ Ntá í séhya la í ts'ikonhyará tí janhan. La ko kǵaxin séhya xik'ikonrá tí janhan inaá kixin sátsjiyá tí tjen T'aná —ichro ch'án.

¹⁷ Ntá iso tí sín k'uájiko ch'án mé kjuanchankíhi sín kíchó sín kixin:

—ǵNkexrí t'axrjexín tí nkehe ntáchro ch'án kixin í séhya ts'ikonhyani ch'án la ko kǵaxin séhya ntá xik'ikonni ch'án inaá kixin sátsji ch'án tí tjen It'é ch'án?

¹⁸ ǵNkexrí t'axrjexín tí ntáchro ch'án kixin “í séhya”? Méxra tienxínhya nkehe tí ntáchro ch'án —ichro sín.

¹⁹ Ntá kónohe ch'ín Jesús tí nkehe chrókjuanchankíhi sín ch'án ntá ntáche ch'án sín kixin:

—ǵkaha tjonkará kixin í séhya ts'ikonhyará tí janhan la ko kǵaxin séhya xik'ikonrá tí janhan inaá. ǵÁ tíha mé tjetotjanchankíhír kichuárá ní?

²⁰ Tjéjtjonkará ijnko nkehe chaxín kixin imá tsotsjonkará la ko ts'avará. A ntá tí chojni chjasintajni la tsochéhe sín. A ntá jahará ts'avará la ko sintaníhará kjónté chr'éxin tsocháhará má.

²¹ Éxí yóhe ijnko tjan sinchekokjíhi tjan xjeen tjan mé imá tóxakonhen tjan kixin ó kjuixraká tsjoté tjan. A ntá tsjixin tsokjíhi xjan ntá í xraxinkakonhya tjan nkexrí kjoté tjan kixin chéhe tjan kokjíhi ijnko xjan ntihi chjasintajni.

²² Mé ǵkaha jahará ijie t'avará. Ntá xik'ikuán tí jahará inaá ntá imá tsochéhe ǵsánra la ko tsokohya ninkexró tsakitsajahará tí kjuachéhe tsochontará.

²³ Tíó tsi tí yaon a ntá tsjanchankínahará ninkehó. Chaxín tí nkehe tjetjonkará kixin T'aná tsotjáhará ch'án kaín nkehe tsjanchatóxixínra nina.

²⁴ Naxá kjuánchatóxixínhará ninkehó tí nina. Ntá jie tjanchiará la ts'ayéherá, a ntá tsjintaxín tsocháhará.

ǵnchéni Jesucristo mé kjuacha ch'án k'uetqan ch'án, ntá chjasintajni la náhi

²⁵ Tí nkehe tjetjonkará mé kjuintayóaxián ó. Ntá tsjixraká tí yaon la í ninkehó sintayóaxián na mé ntoá tsotjonkará nkexrí tjen T'aná.

²⁶ A ntá tí yaon a mé tsjanchaxínra nkehe nina. Ntá ntáxrjanhya tíhi kixin tsonixjayákonhanrá tí tjen T'aná

²⁷ kixin jehe T'aná mé tjuahará jahará. Na mé tjuahará ch'án kixin jahará tjuanará tí janhan la ko kixin kuítekáonrá kixin janhan k'uinkaxian tí tjen Dios.

²⁸ K'uaxrjéxian tí tjen T'aná k'uinka chjasintajni. Ntá jie la ó tsitqha chjasintajni ntá sátsjiyá inaá tí tjen T'aná —ichro ch'án.

²⁹ Ntá ntáchro tí sín k'uájiko ch'án a kixin:

—Ntá jie ntoá tjéchronka ninkehó ncheyoéxinhya.

³⁰ Ntá jie tienxíni kixin jaha mé noha kaín xín nkehe la ko t'ichjánxínhya kixin jnkojín nkexro chrókjuanchankíhi sín ichrén nkehe. Méxra ǵkaha titekaonni kixin jaha mé k'uinkaxian tí tjen Dios —ichro sín.

³¹ Ntá kjuátéhe ch'ín Jesús ntáchro ch'án kixin:

—ǵÁ jie kuítekáonrá ní?

³² Ntá tsi tí yaon na mé jie tíha na ntá tsochakonrá jnkojkorá tsoxikará sátsjirá ntá tsjtonará janhván tsjak'é. Kjánchó jehya janhván tjén. T'aná mé tjéjian.

³³ Tjéjtjonkará kaín tíhi kixin ntá kjuaxróxin ts'ejó ǵsánra tinkachónkirá tí janhan. A ntá ntihi chjasintajni kjónté kjuaxróxinhya tjejorá tjetotjasóterá kjánchó chakonhyará kixin janhan mé ó kjuixin kjuacha tsétoan. A ntá tí chjasintajni la kjuachahya ts'etqan —ichro ch'án.

17

Ch'ín Jesús chrónóhe ch'án It'é ch'án kixin chrók'uayakonhen tí sín k'uájiko ch'án

¹ Ntá ó kjuixin chrónka ch'ín Jesús kaín tíha ntá konta ch'án nkajni ntáchro ch'án kixin:

—Jaha It'éni, ó kjuixraká tí yaon a. A ntá jie chróchjehé tí Xjaan ǵntsi má kjuachaxin kixin kǵaxin tí Xjaan chrókjuikosáyehe tí jaha.

² Jaha tsichjehé kjuachaxin tí Xjaan kixin ts'etuenhen ch'án kaín xín chojni na ntá jehe ch'án tsochjéhe kjuachón jnkochrixín kaín tí sín tsichjehé ch'án.

³ Tí kjuachón jnkochrixín mé t'axrjexín kixin tsochóxian sín tí jaha tí jnkoqá Dios chaxín tjechón la ko kǵaxin tsochóxin sín Jesucristo la mé jaha kuétuénhén ch'án kui ch'án ntihi chjasintajni.

⁴ Ó kjuixin kjuikosáyaha tí jaha ntihi chjasintajni kjuixinna tí xra chjina sjt'a.

⁵ A ntá jie It'éni, chjina jaha tí kjuachaxin jie k'uéchonta janhan tí k'uéjóni jnkoqá naxa k'ónahya chjasintajni.

⁶ Ó kjuixin kjuáqoha tí sín chjina chjasintajni kixin nkexro tí jaha. Jaha mé k'uékuéntá sín tí ósé ntá jie chjina tí janhan la ó kjuáqoha sín itán la ntá ijie la ó kuítekaon sín.

- ⁷ Ntá jie ó kjuátsəan sín kixin kaín tí kjuachaxin chonta janhan la jaha tsíkjanjuan.
- ⁸ Kixin ó kjuixin kjuáqəha sín tí tán chjina jaha, ntá kuítekaon sín, ntá kuíenxín sín kixin mé chaxín tsík'inkaxian tí tjen jaha, na mé kuítekaon sín kixin jaha kuétuanna k'uinka.
- ⁹ Janhan mé xrjanóəha kixin chrók'uayakonhén tí jehe sín. Jehya kixin xrjannóəha kixin chrók'uayakonhén kaín tí chojni síin chjasintajni. Náhí. Jehó xrjanóəha kixin chrók'uayakonhén tí sín chjina kixin kuéntá sín.
- ¹⁰ A ntá kaín tí nkehe chonta janhan na mé kuéntá jaha la ko kaín tí nkehe kuéntá la mé kuéntana kjaxin. A ntá tí kjuachaxin jié kuéntana mé ts'inkaséyanxín tí jehe sín.
- ¹¹ A ntá jie tsitənahya janhan ntihi chjasintajni. Kjánchó jehe sín naxə tsitohe sín chjasintajni. A ntá jie tsjasán tí tjen jaha. Jaha It'eni imá jina jaha, t'ayakuenxián sín tí kjuachaxin tí ihníá kixin ntá jnkokoá chrókjuenkayáxin sín éxí tí jaha la ko janhan jnkokoá tjenkayáxinni.
- ¹² A ntá tí naxə k'uejókian tí jehe sín ntihi chjasintajni la k'uəyakuənxián sín tí kjuachaxin tí ihníá chjina. Nijnko tí jehe sín k'uitjáyannya sín. A ntá jnkokoá nkexro mé k'uitjáyannya mé tí ch'hín xráxín ts'itjáyannya kixin xikaha tsoxiteyá éxí nixja tí xroon tsíkjin sín.
- ¹³ Ntá jie ó tsjasán tí tjen jaha. A ntá naxə itjén janhan chjasintajni mé ntáxrjan tíhi kixin ntá tsəchéhe sín éxí yóəhe imá chána.
- ¹⁴ Janhan mé kjuáqəha sín itán jaha, a ntá jie tí sín chjasintajni mé nínkakonhen tí jehe sín kixin jehe sín la jehya kuénte chjasintajni éxí kjaxin janhan na janhya kuéntana chjasintajni.
- ¹⁵ Tjáncháhyá kixin chrókuakítsjehé sín chjasintajni. Náhí. Tjáncháhá kixin chrók'uayakonhén sín kixin chrókjuich'iyehya sín tí Jínahya.
- ¹⁶ Jehe sín la jehya kuénte chjasintajni éxí yóəhe janhan kjaxin janhya kuénte chjasintajni.
- ¹⁷ Nchetjuáxian sín tí kjuachaxin kuéntá kixin itán jaha mé tí tan chaxín ntoá.
- ¹⁸ Éxí yóəhe jaha kuétuanna k'uinka chjasintajni mé xikaha janhan tétuənhəan sín kixin chrók'uejójákan sín tí sín chjasintajni.
- ¹⁹ Jehó tí xra kuéntá chrókjuít'a kixin chrókjuinkítsa tí jehe sín, a ntá jehe sín kjaxin chrókjuich'e sín tí xra kuéntá kixin kuínhin sín itán chaxín ntoá.
- ²⁰ Kjánchó jehya kixin xrjanóəha kixin chrókjuinkítsa tí jehó sín. Náhí. Kjaxin xrjanóəha kixin chrókjuinkítsa kaín tí sín tsitekaon sín chr'éxin tsinhin sín tí nkehe tsochrónka tí sín a.
- ²¹ Mé xikaha xrjanóəha kixin kaín tí jehe sín jnkokoá chrókjuenkayáxin sín éxí jaha It'eni la ko janhan jnkokoá tjenkayáxinni mé xikaha xrjanóəha kixin kaín tí jehe sín la ko jaha la ko janhan jnkokoá chrókjuenkayáxinni. A ntá tí sín chjasintajni chrókuítekaon sín kixin jaha tsikétuanna k'uinka ntihi.
- ²² A ntá tí kjuachaxin jié chjina na mé tjəhə tí jehe sín kixin ntá kaín sín jnkokoá chrókjuenkayáxin sín éxí yóəhe jaha la ko janhan jnkokoá tjenkayáxinni.
- ²³ Janhan la ko jehe sín jnkokoá chrókjuenkayáxinni éxí jaha la ko janhan jnkokoá tjenkayáxinni. Mé xikaha tí sín chjasintajni chrókónohe sín kixin jaha kuétuanna k'uinka la ko kjaxin chrókónohe sín kixin jaha tjuéhé tí jehe sín éxí yóəhe tjuəna tí jaha.
- ²⁴ Jaha It'eni, tí sín kjuánjuan la tjínkavan kixin tí jehe sín chrók'uejókian sín tí tsjak'é janhan kixin chrók'uikon sín tí kjuachaxin jié chjina; kixin xráxín naxə k'ónahya chjasintajni k'uejtjuəna jaha.
- ²⁵ It'eni jaha, imá jina jaha. Kjónté tí sín chjasintajni naxə chónhya sín tí jaha, ntá janhan na ó xráxín choxian tí jaha la ko kaín tí sín i kjaxin ó nohe sín kixin jaha kuétuanna k'uinka.
- ²⁶ Ó kjuáqəha sín kixin nkexro tí jaha la ko xikaha naxə tsjáqəhə sín, kixin éxí tjuəna jaha mé xikaha chrójtjuéhé sín kichó sín la ko janhan chrók'uejókian tí jehe sín —mé xikaha chrónóəhe ch'in Jesús tí It'é ch'án.

18

Ch'in Jesús sákjuiko sín ch'án tsjak'echjina ch'án
(Mt. 26.47-56; Mr. 14.43-50; Lc. 22.47-53)

- ¹ Ó kjuixin ntáchro ch'in Jesús kaín tíha ntá jehe ch'án la ko tí sín k'uájiko ch'án k'uaxrjéxin sín ntiha k'uatoyé sín tí tsaka Cedrón. Ntaha tjen ijnko nonte síin nchónhya nta k'uixenhen ch'in Jesús la ko tí sín k'uájiko ch'án.
- ² Kjaxin ch'in Judas tí ch'in sinčekji tí ch'in Jesús mé nohe ch'án kixin ntaha tjen tí huerto a kixin ntaha jnkoyaxón kójnkotséko ch'in Jesús tí sín k'uájiko ch'án a.
- ³ A ntá ch'in Judas ó kjuíkəo ch'án nchónhya sín soldado la ko iso sín policia kuénte njnko tsik'etuenhen tí sín ncha't'á t'etəan la ko tí sín fariseo. Ntá kjuí sín kaín sín xraá sín ch'ica la ko kjuíkəo sín xrohi t'inkaséyanxín tí kjuixin sín.
- ⁴ A ntá ch'in Jesús ó nohe ch'án kaín xín nkehe ts'atsínka ch'án, ntá sákjuí ch'án kjuan-chankíhi ch'án sín ntáchro ch'án kixin:
—¿Nkexro xritjéyará? —ichro ch'án.

⁵ Ntá kjuátehe sín ntáchro sín kixin:

—Tjeyáni tí ch'in Jesús tsikjixin chjasin Nazaret —ichro sín.

Ntá kjuátehe ch'in Jesús ntáchro ch'án kixin:

—Janhan tíha —ichro ch'án.

⁶ Ntá ch'in Judas tí ch'in tsikjinčekji tí ch'in Jesús mé koí tjenkákjan ch'án tí jehe sín ntiha.

^A Ntá tío kjuátehe ch'in Jesús kixin jehe ch'án tíha, ntá jehe sín xráchonka sín kjuítsinka sín nonte.

⁷ Ntá xikjanchankí ch'in Jesús inaá ntáchro ch'án kixin:

—¿Nkexro xritjéyará? —ichro ch'án.

Ntá xintáchro sín kixin:

—Tjeyáni tí ch'in Jesús tsikjixin chjasin Nazaret —ichro sín.

⁸ Ntá ntáchro ch'in Jesús kixin:

—Ó kjuixin tjonkará kixin janhan tíha. Tí xritjéyará tí janhan ntá t̄t̄ohérá sátsji tí í so sín xrikjan —ichro ch'án.

⁹ Mé xikaha ntáchro ch'in Jesús kixin ntá tsoxiteyá tí nkehe tsintáchro ch'án kixin: “Tí sín kjuanjon T'aná la ninkexro kjujintak'itjáyanya.”*

¹⁰ Ntá ch'in Simón Pedro kuakitsje ch'án tí chica espada chrinkatoxin ch'án kóchrinjin ch'án t̄tsjin chjina ijnko ch'in it'in Malco, mé ijnko ch'in ch'ehe nchat'á t'et̄oan x̄ra.

¹¹ Kjánchó ch'in Jesús ntáche ch'án tí ch'in Pedro kixin:

—Chr'axenhén t̄j̄e chica espada méhe. Kjá ntáchrua kixin tsjasótehyana, kjá ichrua. Kjánchó T'aná kjuanjon kjuachaxin kixin nchónhya tsjasótena —ichro ch'án.

Ch'in Jesús kjuák'e nkayakon tí ch'in t'et̄uhenhén tí sín nchat'á

(Mt. 26.57-58; Mr. 14.53-54; Lc. 22.54)

¹² ^A Ntá tí sín soldado la ko tí ch'in comandante t'et̄uhenhén sín la ko tí sín policía judío kuente n̄jnko mé itsé sín tí ch'in Jesús kjuínchenteto sín ch'án.

¹³ ^A Ntá sákjuíko sín ch'án nt̄e ch'in Anás ich'ee tí ch'in Caifás mé tí nkexro tsik'áyéhe x̄ra nchat'á t'et̄oan tí nánó a.

¹⁴ ^A Ntá tí ch'in Caifás, jehe ch'án na mé tí nkexro tsintáche tí sín judío kixin íchá jina kixin jnkokoá chojni chrók'uenyákonhen kaín tí sín chjasén ch'án.†

Ch'in Pedro kjuínchemá ch'án kixin chóxin ch'án tí ch'in Jesús

(Mt. 26.69-70; Mr. 14.66-68; Lc. 22.55-57)

¹⁵ Ch'in Simón Pedro la ko í jnko ch'in k'uék'ajiko ch'in Jesús mé kuinkáchréhe sín ch'án. Tí ch'in ijnko a mé chóxin ch'án tí nchat'á t'et̄oan. Ntá k'uixenko ch'án tí ch'in Jesús tí nt̄asin nt̄e tí nchat'á t'et̄oan.

¹⁶ Kjánchó ch'in Pedro kuít̄e ch'án ntója nt̄asin ó. Ntá tí ch'in ijnko a chóxin tí nchat'á t'et̄oan mé k'uaxrje ch'án nt̄asin nixjéhe ch'án tí tjan t'ayakonhen tí ntója nt̄asin chrónóhehe ch'án tjan ntá xranjon kjuachaxin ntá k'uixenhen ch'in Pedro kjaxin.

¹⁷ Na ntá tí tjan t'ayakonhen tí ntója nt̄asin kjuanchankíhi tjan tí ch'in Pedro kixin:

—¿Á jahya kjaxin x̄ríkoa tí ch'in a? —ichro tjan.

Ntá kjuátehe ch'in Pedro kixin:

—Náhi, janhya —ichro ch'án.

¹⁸ Ntá imá kin ntá tí sín ch'exón x̄ra la ko tí sín policía kjuaka sín xrohi ntaha tjejóxin toté sín tjejóchjixrohe sín. La ko koí ch'in Pedro tjechjixrohe ch'án ntiha.

Tí nchat'á t'et̄oan mé kjuanchankíhi ch'án tí ch'in Jesús

(Mt. 26.59-66; Mr. 14.55-64; Lc. 22.66-71)

¹⁹ Ntá tí nchat'á t'et̄oan kjuankixin kjuanchankíhi ch'án tí ch'in Jesús kixin nkexro tí sín k'uájiko ch'án la ko nkehe tí kjuak̄ohe ch'án sín.

²⁰ Ntá kjuátehe ch'in Jesús ntáchro ch'án kixin:

—Noxin kjuak'é kjuákua, la ntá kaín xín chojni kuínhin sín. Xráxin k'uék'ákoxián kaín xín tí n̄jnko ntsí la ko tí n̄jnko jíé t̄ojnkotséxin kaín xín sín judío. Ninkehó nkehe kjuákohya imó.

²¹ ¿Nkekuénté tjanchankína tí janhan xikaha? Chrókjanchankíhi tí sín kuínhin kixin nkexrí kjuákoha sín. Jehe sín mé nohe sín nkehe kjuákoha sín —ichro ch'án.

²² Kjuixin ntáchro ch'in Jesús tíhi ntá ijnko ch'in policía kuente n̄jnko mé tjentaxin ch'án ntiha chjéhe ch'án nkayakon tí ch'in Jesús ntáchro ch'án kixin:

—¿Á xikaha jiehe tsjatehé tí nchat'á t'et̄oan ní? —ichro ch'án.

²³ Ntá kjuátehe ch'in Jesús ntáchro ch'án kixin:

—Tí ntoáhya tí nkehe xrxanka ntá chronka nkehe tí ntoáhya. ^A Ntá tí ntoá tí nkehe xrxanka, ¿ntá nkekuénté kixin t̄jatena? —ichro ch'án.

* 18:9 Juan 17.12 † 18:14 Juan 11.49-50

²⁴ Ntá k'uetōan ch'ín Anás kixin tjechróntetoxinhín ch'ín Jesús sátsji ch'án tí tjen ch'ín Caifás tí nchat'á t'etōan.

Ch'ín Pedro xikjinchemá ch'án inaá kixin chóxin ch'án tí ch'ín Jesús
(Mt. 26.71-75; Mr. 14.69-72; Lc. 22.58-62)

²⁵ Ntá ch'ín Simón Pedro mé naxá tjexin tōtē ch'án tjechjixrohe ch'án. Ntá kjuanchankíhi sín ch'án kixin:

—¿Á kjaxinhya jaha xríkoa tí nkexro i ní? —ichro sín.

Ntá ch'ín Pedro kjuínchemá ch'án inaá ntáchro ch'án kixin:

—Náhi, janhya —ichro ch'án.

²⁶ A ntá ijnko ch'ín ch'ehe tí nchat'á t'etōan xra, na mé tí ch'ín a mé naxá kjéhya ch'án tí ch'ín tsikóchrínjin ch'ín Pedro ntatsjon, na mé kjuanchankí ch'án kixin:

—¿Á jehya jaha tí k'uikuān tjekoa ch'án tí huerto ní? —ichro ch'án.

²⁷ Ntá ch'ín Pedro xikjinchemá ch'án inaá kixin jehya ch'án, ichro ch'án. Ntá xringhya tuéxín itsje ijnko kochíntōa.

Ch'ín Jesús kjuák'e nkayakon tí ch'ín Pilato
(Mt. 27.1-2, 11-14; Mr. 15.1-5; Lc. 23.1-5)

²⁸ Ntá k'uaxrjexín sín ntōe ch'ín Caifás, sákjuíko sín ch'ín Jesús tí palacio t'etōanxín tí ch'ín gobernador. Ntá ó kjuankixin k'uinkaséyan kjuji sín ntiha. A ntá tí sín judío la mé í k'uixenhya sín tí palacio kixin tí xikaha chrók'uixenhen sín tí nchia a la chrókuamá sín tí jie sín ntiha la í xitjahya sine sín tí kia pasua, ichro sín.

²⁹ A ntá ch'ín Pilato k'uaxrjexín ch'án tí nchia t'etōanxín ch'án kjuanchankíhi ch'án sín kixin:

—¿Nkehe tí jie chóna tí nkexro i? —ichro ch'án.

³⁰ Ntá kjuátēhe sín ntáchro sín kixin:

—Tí chróchóntahya ch'án jie jie la chrókjuíkōahyani ch'án —ichro sín.

³¹ Ntá k'uetōan ch'ín Pilato kixin:

—Sátjikoará ch'án nchekitōexínrá nkerí jie chóna ch'án kixin éxí ntáchro tí ley kuéntará —ichro ch'án.

Ntá kjuátēhe tí sín judío ntáchro sín kixin:

—Jeheni chojni judíoni la chóntahyani kjuachaxin ts'óyanni ninkexró —ichro sín.

³² Mé xikaha tsoxiteyá tí nkehe tsintachro ch'ín Jesús kixin nkexrí ts'enxín ch'án.

³³ Ntá ch'ín Pilato xik'ixenhen ch'án tí nchia t'etōanxín ch'án ntá k'uíyēhe ch'án tí ch'ín Jesús kjuanchankíhi ch'án kixin:

—¿Á jaha tí nkexro Rey t'etuenhen tí sín judío ní? —ichro ch'án.

³⁴ Ntá ntáchro ch'ín Jesús kjuanchankí ch'án kixin:

—Tí nkehe tjanhankíná, ¿á jahyá kjuenkayáxian xikaha, o á í jnko nkexro kjuanchia jie kixin tí janhan? —ichro ch'án.

³⁵ Ntá kjuátēhe ch'ín Pilato ntáchro ch'án kixin:

—¿Á kjanhya janhan tí judío kixin? Tí sín chjasán la ko tí sín nchat'á t'etōan mé kjuikaán sín tí jaha. ¿Xá nkehe kjuích'e kixin? —ichro ch'án.

³⁶ Ntá kjuátēhe ch'ín Jesús ntáchro ch'án kixin:

—Tí kjuachaxin chonta janhan jehya kixin chjasintajni chrókuétoan. Náhi. Tí chrókuétoan chjasintajni ntá tí sín xrikjan chrókjuanjonko sín tí sín judío kixin chrótséhyana sín la chrókjuikánhyana sín ntihi. Kjánchó tí kjuachaxin chonta janhan jehya kixin chjasintajni chrókuétoan —ichro ch'án.

³⁷ Ntá ntáchro ch'ín Pilato kixin:

—¿Á jaha chaxín ijnko rey? —ichro ch'án.

Ntá kjuátēhe ch'ín Jesús ntáchro ch'án kixin:

—Janhan tí rey éxí ntáchrúa jaha. Tí xra ó kokjina la ko tí xra ó k'uinka chjasintajni kixin tsoxrxjanka nkehe tí chaxín ntoá. Káin tí sín titekaon tí nkehe chaxín ntoá mé tjejótinhin sín tí nkehe tjákua —ichro ch'án.

³⁸ Ntá ntáchro ch'ín Pilato kixin:

—¿Xá nkehe tí nkehe chaxín ntoá, ichrúa? —ichro ch'án.

Ch'ín Pilato kjuanjon kjuachaxin kixin its'en ch'ín Jesús
(Mt. 27.15-31; Mr. 15.6-20; Lc. 23.13-25)

Ntá kjuixín kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sín judío nixjēhe ch'án sín ntáchro ch'án kixin:

—K'uitjáhya ninkehó jie chóna tí nkexro i.

³⁹ Kjánchó jahará la ó kuánhanrá kixin tí kia pascua tsjánjuan kjuachaxin kixin ts'atjánta ijnko nkexro tjechjina. ¿Á tjínkáonrá kixin ts'atjánta tí ch'ín Rey t'etueñhen tí sín judío? —ichro ch'án.

⁴⁰ Ntá kaín sín k'óyako sín kjuanchia sín kixin:

—Tí ch'ín a la náhi. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19

¹ Ntá ch'ín Pilato mé k'uetqan ch'án kixin tsjate sín tí ch'ín Jesús.

² Ntá tí sín soldado kjuich'éna sín ntach'í ijnko corona ntá kjuak'enkaya sín ikja tí ch'ín Jesús. La ko kjuínchek'inkáya sín ch'án ijnko ka kjátse tié kixin jehe sín tsjikosáyehe sín ch'án éxí ijnko rey, kjánchó chaxínhya tíha.

³ Ntá kóchjinehe sín tí tjen ch'án ntáchro sín kixin:

—Isé tsjak'e tséueñhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuéñxín itja sín kjuatexín sín nkayakon ch'án.

⁴ Ntá ch'ín Pilato k'uaxrxéjín ch'án tí nchia t'etqanxín ch'án inaá nixjehe ch'án tí sín tsíkójkotsé ntáchro ch'án kixin:

—Tsjeherá tsakítsjexián ch'án ntihi kixin tsonohará kixin k'uitjáhya janhan ninkehó jie ch'óna ch'án —ichro ch'ín Pilato.

⁵ Ntá k'uaxrxéjín ch'ín Jesús ntiha tjenkáya kja ch'án tí corona tsik'óna ntach'í la ko tjenkáya ch'án tí ka kjátse tié. Ntá ntáchro ch'ín Pilato kixin:

—Tsjeherá, ntihi tjen ch'án —ichro ch'án.

⁶ A ntá tió k'uikon tí sín nchat'á t'etqan la ko tí sín policía kuènte njnko ntá kjuankixin sín t'óyako sín ntáchro sín kixin:

—¡Tjakénkanirá ch'án ntacruz! ¡Tjakénkanirá ch'án ntacruz! —ichro sín.

Ntá ntáchro ch'ín Pilato kixin:

—Jahará tjíkoará ch'án tjaké nkanirá ch'án ntacruz kixin janhan k'uitjáhya ninkehó jie ch'óna tí jehe ch'án —ichro ch'án.

⁷ Ntá kjuátehe tí sín judío kixin:

—Jeheni chojni judío mé ch'ónani ijnko ley t'etqan kixin chrók'uen ch'án kixin ncheyóhe ch'án asén ch'án kixin Xjeen Dios tí jehe ch'án —ichro sín.

⁸ Ntá tió kuínhin ch'ín Pilato tíha ntá antsí chrakon ch'án

⁹ ntá xik'ixenhen ch'án tí nchia t'etqanxín ch'án inaá kjuanchankíhi ch'án tí ch'ín Jesús kixin:

—¿Nketí k'uinkaxian jaha? —ichro ch'án.

Ntá ch'ín Jesús ninkehó kjuáteheya ch'án.

¹⁰ Ntá ntáchro ch'ín Pilato kixin:

—¿Jaha nkekuènté tjáteheya nkehe tjánchánkíha? ¿Á noahya jaha kixin chonta janhan kjuachaxin tsétoan tsjak'enkania ntacruz la ko kjaxin chonta janhan kjuachaxin tsontáxrjan kixin sátsjia kohya nkehe tsonhan? —ichro ch'án.

¹¹ Ntá kjuátehe ch'ín Jesús ntáchro ch'án kixin:

—Ninkehó kjuachaxin chróchontahya jaha chrókuétoan chrók'uen o sáchrókuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsí jie jie ch'óna sín, a ntá jaha la kánhyó —ichro ch'án.

¹² Ntá kuínhin ch'ín Pilato tíhi ntá kjuankixin ch'án kjuéyá ch'án nkexri chrók'uetqan ch'án kixin sáchrókjui ch'ín Jesús kohya nkehe chrókónhen ch'án. Kjánchó tí sín judío k'óyako sín ntáchro sín kixin:

—Kja tí tsjtohé sátsji ch'án kohya nkehe tsonhen ch'án ntá jaha jnkokoáhya tjenkayáxinkoa tí ch'ín t'etueñhen tí nación kuénténi. Tí nkexro ch'éna asén ch'án éxí ijnko rey mé nínkakonhen ch'án tí ch'ín t'etueñhenni —ichro sín.

¹³ Ntá kuínhin ch'ín Pilato tíhi ntá k'uetqan ch'án kixin tsakitsje sín tí ch'ín Jesús ntója ntá ch'ín Pilato kjuak'etjaxin ch'án tí silla nchekitqexín ch'án jie, mé nkiva hebreo mé it'ín Gabata, mé t'axrxéjín kixin tjat'q noi jehó xro tsik'óna.

¹⁴ Na mé ó chjina chonkixin ntá tí tsonjín la mé ó tsjasin sín tí kia pascua. Ntá ch'ín Pilato ntáche ch'án tí sín judío kixin:

—Ntihi itjen tí ch'ín rey kuéntará —ichro ch'án.

¹⁵ Kjánchó jehe sín k'óyako sín ntáchro sín kixin:

—¡Its'en ch'án! ¡Its'en ch'án! ¡Tsjak'enkáni ch'án ntacruz! —ichro sín.

Ntá ntáchro ch'ín Pilato kixin:

—¿Á tjínkáonrá kixin janhan chrókjuakénkania ijnko ntacruz tí ch'ín rey kuéntará ní? —ichro ch'án.

Kjánchó tí sín ncha'tá t'etqan mé kjuátehe sín kixin:

—Náhi. Chóntahyani í jnko rey, jehó tí ch'ín César —ichro sín.

¹⁶ Ntá ch'ín Pilato kjuanjon ch'án kjuachaxin sátsjiko sín tí ch'ín Jesús tsjak'enkanı sín ch'án ntacruz. Ntá sákjuiko sín ch'án.

Kjuák'enkáni ch'ín Jesús ntacruz

(Mt. 27.32-44; Mr. 15.21-32; Lc. 23.26-43)

¹⁷ Ntá sákjuiko sín tí ch'ín Jesús kuamá ch'án tí ntacruz tsjak'enkáni ch'án. Ntá kjuújiko sín ch'án ijnko tjo tükítexín sín Hueso Kja Chojni. A ntá nkíva hebreo mé tükítexín sín Gólgota.

¹⁸ Ntaha mé kjuák'enkanı sín ch'án tí ntacruz. Ntá kjaxin yaá sín nánánko k'uejó jnkojnko sín ntá jnkosiné kjuák'e ch'ín Jesús.

¹⁹ Ntá k'ueqan ch'ín Pilato kixin tsokjin sín ijnko ntachiso tsjak'enkanı sín ikja tí ntacruz ntáchro kixin: “Ch'ín Jesús kjuixín ch'án chjasin Nazaret, mé tí ch'ín Rey kuente tí sín judío”, tsixro.

²⁰ A ntá itsjé tí sín judío mé kjuínchekuáxin sín tí letra tsík'óna kixin chjino tí chjasin Jerusalén tsíkjak'enkanı sín ch'ín Jesús ntacruz la ko iní nkíva tsíkjin sín, na mé ijnko nkíva la hebreo, la ijnko nkíva la griego, la ijnko nkíva la latín.

²¹ Ntá tí sín ncha'tá t'etqan kuente tí sín judío mé ntáche sín tí ch'ín Pilato kixin:

—Chrókjinhya jaha xíkaha kixin jehe ch'án mé tí “Ch'ín Rey kuente tí sín judío.” Náhi. Íchá jína chrókjian jaha kixin “Jehe ch'án ntáchro ch'án kixin jehe ch'án mé tí ch'ín Rey kuente tí sín judío” —ichro sín.

²² Kjánchó kjuátehe ch'ín Pilato kixin:

—Tí letra kuéqan k'óna la ó k'óna, kjónté xíkahó tsitqhe —ichro ch'án.

²³ Ntá tí sín soldado tió tsíkjin tsíkjak'enkanı sín tí ch'ín Jesús tí ntacruz ntá kuákja sín tí ké ch'án la k'óxiqayehé sín jnkojnko ka kuákja sín kanoé sín. La ko kjaxin kuákja sín tí ka kjínjin k'uek'inkáya ch'án. Tí ka mé tsixronhya ka la me jnkokoá ka tíha.

²⁴ Ntá tí sín soldado kjo sín kichó sín ntáchro sín kixin:

—Tsótséchjehyani tí ké ch'án. Íchá jína sich'exinni suerte ntá tsotsjeheni síná nkexro ts'áyéhe tí ka.

Mé xíkaha xiteyá éxi ntáchro xroon itén Dios tsíkjin sín ósé ntáchro kixin: “Kjuích'exín sín suerte ntá k'óxiqayehé sín kaná.”* Mé xíkaha kjuích'e tí sín soldado.

²⁵ A ntá chjino tí ntacruz kjuák'enkáni ch'ín Jesús mé kjuák'e tí iné ch'án la ko tí tjan kichó tjan mé tjan María ichjién ch'ín Cleofas, la ko tí tjan María Magdalena.

²⁶ A ntá tió k'uíkon ch'ín Jesús kixin itjen tí iné ch'án la ko chjino tjen tí ch'ín qntsí tjuéhe ch'án k'uek'ajiko ch'án, ntá nixjehé ch'án tí iné ch'án, ntáchro ch'án kixin:

—Naná, tsjehé kixin ntaha tjen xjaan —ichro ch'án.

²⁷ Ntá nixjehé ch'ín Jesús tí ch'ín a ntáchro ch'án kixin:

—Tsjehé kixin ntaha itjen iná —ichro ch'án.

A ntá tí ch'ín a mé k'uáyéhe ch'án tí tjan a sákjuiko ch'án tjan ntqé ch'án k'óna éxi iné ch'án xíkaha.

Ik'uéen ch'ín Jesús

(Mt. 27.45-56; Mr. 15.33-41; Lc. 23.44-49)

²⁸ Ntá ó nohe ch'ín Jesús kixin kaín xra ó kjuixin xiteyá ntá tjinkaon ch'án kixin tsoxiteyá kaín nkehe ntáchro tí xroon tsíkjin sín ósé ntá xíkaha ntáchro ch'án kixin:

—Ik'uéen nta.

²⁹ Ntá ntíha tjen ijnko nchésen tsíkaón xranvino sán ntá kjuínchekjataxin sín ijnko ka tí xranvino, a ntá tí ka a kjuak'ekjen sín ijnko nta kjínjin, ntá kjuínchechriin sín tí tjen ir'va ch'án.

³⁰ Ntá ik'uí ch'ín Jesús tí xranvino sán ntá ntáchro ch'án kixin:

—Ó kjuixin xiteyá kaín xín nkehe —ichro ch'án.

Ntá k'uísén kja ch'án ntá ó kjuixin k'uéen ch'án.

Jnko soldado chr'áte ch'án chica yo tí chjia ch'ín Jesús

³¹ A ntá xíkaha yaon ntóye mé tí yaon kia pascua ntá tí sín judío tjinkakonhya sín kixin tí cuerpo kuente tí sín tsík'en naxa ts'ejóyáni tí ntacruz tí yaon t'ok'éhe sín kixin tí yaon pascua mé ijnko yaon imá jié, ichro sín. Mé xíkaha kjuanchehe sín tí ch'ín Pilato kixin ts'etqan ch'án kixin tsochjenjin toté tí sín tjejóyáni tí ntacruz la ko ts'inkajin tí cuerpo kuente tí sín tsík'en.

³² Ntá tí sín soldado sákjuí sín k'óhjenjin sín tí toté tí ch'ín saoxín tjen la ko k'óhjenjin sín tí toté tí ch'ín tjen nánko a tjejóyáni sín tí ntacruz tí tjen ch'ín Jesús.

³³ Ntá kjuíji sín tí tjen ch'ín Jesús ntá k'uíkon sín kixin ó tsíkjin tsík'en ch'án, ntá í k'óhjenjinhya sín toté ch'án.

* 19:24 Salmo 22.18

³⁴ A ntá ijnko ch'ín soldado mé chr'áte ch'án chica yo tí chjia tí ch'ín Jesús ntá tuénxín k'uaxrje jni la ko inta.

³⁵ A ntá janhan mé tjékjian tí xroon i mé kjuak'é ntiha k'uikuqan kixin xikaha kónhen ntá ntoá tjéxrijanka kixin jahará kjaxinrá chrókuítekaónra.

³⁶ Mé xikaha kónhen tíha kixin tsoxiteyá tí nkehe ntáchro xroon itén Dios tsikjin sín ntáchro kixin: “K'óchjenjinhya sín ninkehó huésqe ch'án.”†

³⁷ Kjaxin itjen í jnko nketí nixja tí xroon itén Dios tsikjin sín óse ntáchro kixin: “Tsokomá sín tí nkexro tsíchr'áte sín chica.”‡

Xravá ch'ín Jesús

(Mt. 27.57-61; Mr. 15.42-47; Lc. 23.50-56)

³⁸ Ntá ó kjuixín kónhen kain tíha ntá ch'ín José, mé ijnko ch'ín kjuixín chjasin Arimatea, mé kjuanchehe ch'án tí ch'ín Pilato kjuachaxin kixin tsjinkajinxín ch'án tí ntacruz tí cuerpo kuènte ch'ín Jesús sátsjiko ch'án tsjavá ch'án. Jehé ch'án imó kuinkáchónki ch'án tí ch'ín Jesús kixin chrakonhen ch'án tí sín judío. Ntá ch'ín Pilato mé kjuanjon ch'án kjuachaxin ntá sákjuiko ch'ín José tí cuerpo kuènte ch'ín Jesús.

³⁹ Kjaxin ch'ín Nicodemo, tí ch'ín kjuínixjehé tí ch'ín Jesús ijnko tie a mé kjui ch'án kjuikao ch'án treinta kilo xroqan xraxé tjiko xroqan mirra la ko xroqan áloes.

⁴⁰ Mé xikaha ch'ín José la ko ch'ín Nicodemo k'uáyéhe sín tí cuerpo kuènte ch'ín Jesús kjuínchek'ísímá sín ijnko ka kjijnin tsíka tí xroqan xraxé a kixin xikaha k'uékinkáchónki tí sín judío k'uékjavá sín chojni tsík'en.

⁴¹ Tí kjuak'enkáni ch'ín Jesús ntacruz ntá chjinaxón ntiha tjen ijnko huerto itjen ijnko tòye nixin naxa ninkexró tsíxrávähya ntiha.

⁴² Ntaha kjuavá sín tí ch'ín Jesús kixin chjinaxón tjen tí tòye a la ko í séhya tsoxrankíxin tí yaon t'ok'éhe tí sín judío.

20

La ntá ó tsíxechón ch'ín Jesús

(Mt. 28.1-10; Mr. 16.1-8; Lc. 24.1-12)

¹ A ntá tí yaon xrankíxixín semana ntá tí tjan María Magdalena naxa sítíe sákjuí tjan tí tjen tí tòye, ntá k'uikon tjan kixin ó tsikjiin tí xro tsík'ikjèxin tí tòye a.

² Ntá kuinká tjan sákjuí tjan tí tjen tí ch'ín Simón Pedro la ko tí ch'ín í jnko, mé tí nkexro imá k'uétjuèhe ch'ín Jesús, ntá ntáchro tjan kixin:

—Ó tsíkaksjèxin sín tòye tí cuerpo kuènte Ìnchéni ntá noehyani nketí tsíkjak'e sín —ichro tjan.

³ Ntá ch'ín Pedro la ko tí ch'ín í jnko mé kuínhin sín xikaha ntá sákjuí sín tí tjen tí tòye a. ⁴ Ntá yóí sín kuinká sín sákjuiko kichó sín. Kjánchó tí ch'ín í jnko antsí tjian kuinká ch'án ntá kánhyó tjian kuinká ch'ín Pedro, ntá tí ch'ín í jnko senó ch'án kjuíji ch'án tí tjen tí tòye a.

⁵ K'uísén ch'án tsjehé ch'án nkaxenhen tí tòye a. A tí ka tsík'ísímá ch'ín Jesús mé naxa tjejó k'uikon ch'án, kjánchó jehé ch'án k'uixenhya ch'án tí tòye a.

⁶ Ntá kjónté chr'éxin kjuíji ch'ín Simón Pedro ntá k'uixenhen ch'án tí tòye a. Ntá kjaxin k'uikon ch'án kixin tjejó tí ka tsík'ísímá ch'ín Jesús

⁷ la ko k'uikon ch'án tí ka tsík'ísímá ikja ch'án na mé tí ka tsíxreya ka la ókjé tjen ka, a ntá tí í so ka na mé ókjé tjejó ka kjaxin.

⁸ Na ntá tí ch'ín í jnko k'uék'ajiko ch'ín Jesús, mé tí ch'ín tsíkjií senó na kjaxin k'uixenhen ch'án tí tòye ntá k'uikon ch'án tí nkehe tsíkónhen ntá kuítekaon ch'án.

⁹ Kixin naxa k'uékienxínhya sín tí nkehe k'uéchrónka xroon itén Dios kixin t'ichjánxin tsoxechón tí ch'ín Jesús.

¹⁰ A ntá tí sín sátsíkjijsjehé tòye la xíjkan sín ntqe sín.

Titáya k'uikuèn tjan María Magdalena tí ch'ín Jesús

(Mr. 16.9-11)

¹¹ Ntá tjan María mé ntahó kuítqhe tjan ntója tí tòye tsjánka tjan. Naxa tsjánka tjan k'uísén tjan tsjehé tjan nkaxenhen tí tòye

¹² ntá xrinahya k'uikon tjan yaá sín ángel tjejóyá sín ka tjóá tjejójtjxin sín tí tsíkjak'e tí cuerpo kuènte ch'ín Jesús na mé ijnko ch'ín ángel na mé tjen ch'án tí tsíkjak'e ikja ch'ín Jesús la ko tí í jnko a itjen ch'án tí tsík'ejó toté ch'án.

¹³ A ntá tí sín ángel mé kjuanchankí sín kixin:

—Naná, ¿kuènte tsjánka? —ichro sín.

Ntá kjuátqhe tjan ntáchro tjan kixin:

—Sátsíkjiko sín Ìnchéni, ntá nonahya nketí tsíkjak'e sín ch'án —ichro tjan.

¹⁴ Kjuixin ntáχρο tjan tíha ntá kuinkátjía tjan ntá k'uíkon tjan kíxin itjen ch'ín Jesús, kjánchó kjuátsoanhya tjan kíxin jehe ch'án.

¹⁵ Ntá ch'ín Jesús kjuanchankíhi ch'án tjan ntáχρο ch'án kíxin:

—Naná, ¿nkekuènté tsjan̄ka? ¿Nkexro tjeýá? —ichro ch'án.

Á ntá jehe tjan kjuenkayáxin tjan kíxin jehe ch'án mé t'ayakonhen ch'án tí huerto, a ntá ntáχρο tjan kíxin:

—Kja tí jaha sákjuíkoa ch'án ntá jie chrónka nketí sákjuíkoa ch'án kíxin janhan sátsjikjan ch'án jie —ichro tjan.

¹⁶ Ntá ch'ín Jesús mé nixjehe ch'án tjan ntáχρο ch'án kíxin:

—jMaría! —ichro ch'án.

Ntá kuinkátjía tjan ntá nixjaxin tjan nkíva hebreo ntáχρο tjan kíxin:

—jRaboni! —ichro tjan. Tíha mé t'axrjexin kíxin Maestro.

¹⁷ Ntá ntáχρο ch'ín Jesús kíxin:

—Tatjántana kíxin naxa sátjijhya janhan tí tjen T'aná. Sátjia tjítsjehé tí sín kíchiná chénka sín kíxin sátsjijá tí tjen T'aná na mé kjaxin It'ará tí jahará na mé Dios kuèntana la ko kjaxin Dios kuèntará —ichro ch'án.

¹⁸ Ntá tí tjan María Magdalena sákjuíchénka tjan tí sín k'uék'ajiko ch'ín Jesús chrónka tjan kíxin xikaha tsík'ikon tjan Ínchéni. La ko kjaxin chrónka tjan kíxin xikaha tsíntáχρο ch'án.

Tí sín k'uék'ajiko ch'ín Jesús titàya k'uikuèn sín ch'án

(Mt. 28.16-20; Mr. 16.14-18; Lc. 24.36-49)

¹⁹ Á ntá ó kónjin tí yaon a mé tí yaon xrankixín semana, a ntá tí sín k'uék'ajiko ch'ín Jesús jnkokoá kójnkotsé sín nkaxenhen nchia tsík'ikjehe sín ntója nchia jina kíxin chrakonhen sín tí sín judío. Ntá xringhya titàya kónohe sín k'uíkon sín kíxin jnkosiné tí tjejó sín itjen ch'ín Jesús, ntá nixjehe ch'án kjuajná tí sín k'uék'ajiko ch'án ntáχρο ch'án kíxin:

—Jina tjejorá —ichro ch'án.

²⁰ Ntá kjuixin ntáχρο ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kíxin k'uíkon sín Ínchéni.

²¹ Ntá ntáχρο ch'ín Jesús inaá kíxin:

—Kjuaxróxin ts'ejorá. Yóhe T'aná k'uetuanna k'uinka, a ntá jie la janhan tétuanhan tí jahará —ichro ch'án.

²² Ntá k'uánote ch'án tí jehe sín ntáχρο ch'án kíxin:

—T'ayéhérá Nchakuen Dios.

²³ Tí ts'itjáyahanhá tí jie kjuasin jnkojin chojni ntá xikaha tsjin tí ijje sín. Ntá tí ts'itjáyahanhá tí jie kjuasin jnkojin chojni ntá naxa kjuinhya tí ijje sín —ichro ch'án.

Ch'ín Tomás k'uíkon ch'án kíxin tsíxechón Ínchéni

²⁴ Á ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tikjitéxin sín ch'ín Nóhé mé kohya ch'án tí kui ch'ín Jesús.

²⁵ Ntá chr'éxin tí í so sín k'uék'ajiko ch'ín Jesús ntáche sín ch'án kíxin:

—Ó k'uíkonni Ínchéni —ichro sín.

Kjánchó ntáχρο ch'ín Tomás kíxin:

—Tí ts'íkónhya janhan tí tsíkjiatexín chica clavo itja ch'án la ko tsochr'ánxianhya dedo tjaná ntíha la ko tí tsochr'ánxianhya tjaná tí chjia ch'án, ¿na mé nkexrí chrókuitekavan? —ichro ch'án.

²⁶ Á ntá tí k'uásínka ijnko semana ntá jnkokoá kójnkotsé sín nkaxenhen nchia la ko kjaxin kjuák'eko sín ch'ín Tomás. Tsík'ikjehe sín ntója nchia jina ntá xringhya titàya kónohe sín k'uíkon sín kíxin jnkosiné tí tjejó sín itjen ch'ín Jesús, ntá nixjehe ch'án tí jehe sín k'uék'ajiko ch'án ntáχρο ch'án kíxin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'ín Tomás kíxin:

—Chr'axénhén dedo tjá tí tsíkjiatexín chica clavo tjaná la ko xráko tjá chr'axénhén chjiana. Chróntáχροhya kíxin chaxínhya. Tsítékávan kíxin chaxín —ichro ch'án.

²⁸ Ntá kjuátēhe ch'ín Tomás ntáχρο ch'án kíxin:

—jÍnchéni jaha la ko Dios kuèntana! —ichro ch'án.

²⁹ Ntá ntáche ch'ín Jesús tí ch'ín Tomás kíxin:

—Jaha Tomás k'uíkonjian ntá kuitekávan. Ntá antsí náxrjón tjejó tí sín kjónté k'uíkonhya la titekaon sín —ichro ch'án.

Tíhi mé chrónka nkekuènté tsíkjin ch'ín Juan tí xroon í

³⁰ Ch'ín Jesús kjuasin ch'án itsjé í so kjuaxroan náxrjón k'uíkon tí sín k'uájiko ch'án kjónté chrónkaha tí xroon í kíxin xikaha kónhen.

³¹ Tí nkehe chrónka tí xroon i ikjian janhan kixin chrókuítekáonrá jahará kixin Jesús mé tí Cristo, mé tí Xjeen Dios kixin ntá kaín ni chróhóntani kjuachón jnkochrín kixin chrókuítekaonni ch'án.

21

Yato tí sín k'uek'ajiko ch'in Jesús xrínahya titàya k'uikon sín ch'án

¹ A ntá chr'éxin tí sín k'uek'ajiko ch'in Jesús titàya xik'ikon sín tí jehe ch'án inaá chrínta ntayaon Tiberias. Mé xikaha kónhen

² kixin jnkokoá k'uejó sín ch'in Simón Pedro la ko ch'in Tomás, me tí ch'in tikítexín sín ch'in Nóhé, la ko ch'in Natanael kuixin ch'án chjasin Caná estado Galilea, la ko tí yaá xjeen ch'in Zebedeo la ko tí yaá sín inaá k'uek'ajiko ch'in Jesús.

³ Ntá ntáchro ch'in Simón Pedro kixin:

—Sátsjitse koche —ichro ch'án.

Ntá kjuátèhe sín kixin:

—Koíni sátsjikoani —ichro sín.

Ntá sákjuí sín k'ujt'ótjen sín ijnko ntabárcó. Kjánchó ninkehó koche tséhya sín kuenté tie.

⁴ A ntá ó chjina ts'inkaséyan ntá xrínahya titàya k'uikon sín itjen ch'in Jesús chrínta ntayaon, kjánchó kjuátsoanhya tí sín k'uek'ajiko ch'án kixin jehe ch'án.

⁵ Ntá kjuanchankíhi ch'án sín kixin:

—Jahará ntasoá, ¿á naxa ninkehó koche tsehyará? —ichro ch'án.

Ntá kjuátèhe sín ntáchro sín kixin:

—Naxa ninkehó ko tséhyani —ichro sín.

⁶ Ntá ch'in Jesús ntáche ch'án sín kixin:

—Itérá tí nchísén tí nánko chjia chjina tí ntabárcó la tsótsesá va —ichro ch'án.

Ntá xikaha kjuich'e sín k'ue sín nchísén ntá í tjachahya sín tsakitsjenkixin sín ntá tí nchísén kixin nchónhya koche tjinká.

⁷ A ntá tí ch'in antsí tjuèhe ch'in Jesús mé ntáche ch'án tí ch'in Pedro kixin:

—¡Inchéni tí méhe! —ichro ch'án.

Ntá kuinhin ch'in Simón Pedro kixin Inchéni tíha ntá k'uinkáya ch'án iké ch'án inaá (kixin tsíkakitsje ch'án iké ch'án) ntá kjuíankí ch'án ntá.

⁸ Tí í so sín k'uek'ajiko ch'in Jesús mé kjuíji sín tí chrínta ntayaon kjuikáo sín tí ntabárcó tinkánkákjéntóxin tí nchísén tjinká koche chrítaón ntá kixin ijnko ciento metro kjinxin tí chrínta ntá k'uejó sín.

⁹ Ntá kjuíji sín chrínta ntá ntá k'uínkajinxin sín tí ntabárcó ntá k'uikon sín tjeche xrohi síxènkí xrínta ntá chrítaón tí xrínta tjekjen ijnko koche la ko nánko síin niotja.

¹⁰ Ntá kjuanchia ch'in Jesús ntáchro ch'án kixin:

—Xrákoará iso koche tsitserá nantá —ichro ch'án.

¹¹ Ntá ch'in Simón Pedro k'ujt'ótjen ch'án tí ntabárcó kuákja ch'án tí nchísén kuínkánkákjen ch'án xráko ch'án tí nchísén tjinká koche iye na mé ijnko ciento cincuenta y tres va. Ntá kjónté nchónhya va la k'uichjehya tí nchísén a.

¹² Ntá ntáchro ch'in Jesús kixin:

—Xrákirá, interá —ichro ch'án.

A ntá nijnko tí sín k'uek'ajiko ch'án chrókuanchankíhi sín ch'án kixin nkexro tí jehe ch'án kixin ó kjuátsoan sín kixin Inchéni tíha.

¹³ Ntá kóchjina ch'in Jesús kuákja ch'án tí niotja chjéhe ch'án tí jehe sín la ko xikaha xíkjanjon ch'án tí koche.

¹⁴ Tíhi mé níxin k'uikon tí sín k'uek'ajiko ch'in Jesús kixin síxechón ch'án.*

Ch'in Jesús itjo ch'án tí ch'in Simón Pedro

¹⁵ Kjuixin kjóne sín ntá kjuanchankíhi ch'in Jesús tí ch'in Simón Pedro kixin:

—Jaha Simón, xjeen Jonás, ¿á antsí tjuana jaha, a ntá tí í so la kánhyó? —ichro ch'án.

Ntá kjuátèhe ch'in Pedro ntáchro ch'án kixin:

—Jeén, Inchéni, ó noha kixin tjínkavan tí jaha —ichro ch'án.

Ntá ntáchro ch'in Jesús kixin:

—Ntá xikaha la t'ayakonhén tí kolélo kuéntana —ichro ch'án.

¹⁶ Ntá yóxin kjuanchankí ch'in Jesús inaá kixin:

—Jaha Simón, xjeen Jonás, ¿á tjuana jaha? —ichro ch'án.

Ntá kjuátèhe ch'in Pedro ntáchro ch'án kixin:

—Jeén, Inchéni, ó noha kixin tjínkavan tí jaha —ichro ch'án.

Ntá ntáchro ch'in Jesús kixin:

* 21:14 Juan 20.19,26

—Ntá xikaha la t'ayakonhén tí kolélo kuèntana —ichro ch'án.

¹⁷ Ntá níxin kjuanchankí ch'ín Jesús kixin:

—Jaha Simón, xjeen Jonás, zá tjinkávan tí janhan? —ichro ch'án.

A ntá k'uává ch'ín Pedro kixin níxin kjuanchankí ch'ín Jesús kixin á tjinkaon ch'án tí jehe ch'án ntá ntáchro ch'án kixin:

—Jaha Inchéni, ó noha kain xín nkehe. Ó noha kixin tjinkávan tí jaha —ichro ch'án.

Ntá ntáchro ch'ín Jesús kixin:

—Ntá xikaha t'ayakonhén tí kolélo kuèntana.

¹⁸ Ntá ijnko nkehe chaxín tjétjonka kixin tí naxa k'uéntasoyá jaha k'uék'inkaya ká jahvá la ko k'uékjia tí k'uékóxrjínhan jaha. A ntá tió tsotáda jaha ntá tsjéntoá tjá ntá í jnko nkexro sintak'inkaya ka la ko sátsjikoa sín tí tóxrjíanhya sáchrókjuia —ichro ch'án.

¹⁹ A ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjexín nkexrí tsochjéhe ch'án Dios kjuasáya. Ntá kjuixín ntáchro ch'ín Jesús kixin:

—Chréhé tí janhan —ichro ch'án.

Nkehe tsonhen tí ch'ín antsí tjuèhe ch'ín Jesús

²⁰ Ntá kuinkátjía ch'ín Pedro ntá k'uikon ch'án kixin tinkáchréhe tí ch'ín antsí tjuèhe ch'ín Jesús, na mé tí nkexro kjuák'e chjinaxón tí kjuák'e ch'ín Jesús tí kjóne sín tsíkjanhankíhi ch'án tí ch'ín Jesús kixin nkexro sinchekji ch'án.[†]

²¹ Ntá ch'ín Pedro k'uikon ch'án kixin tinkáchréhe tí ch'ín a ntá kjuanchankíhi ch'án tí ch'ín Jesús kixin:

—Inchéni, zá ntá tí ch'ín i la nkehe tsonhen ch'án a? —ichro ch'án.

²² Ntá kjuátehe ch'ín Jesús kixin:

—Tí tjinkávan naxa chrókjuak'echón ch'án tí chrókjan la jaha la chrókjuiatéhya tíha. Ntá jaha la chréhé tí janhan —ichro ch'án.

²³ Ntá kjuankixin kjo tí sín k'uék'ajiko ch'ín Jesús kixin ts'enhya tí ch'ín a. Ntá jehya kixin ntáchro ch'ín Jesús kixin chrók'uenhya tí ch'ín a. Náhi. Ó jehí ntáchro ch'án kixin tí tjinkaon ch'án naxa chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsonhen í jnko chojni.

²⁴ A ntá tí nkexro a mé tí nkexro chrónka kixin chaxín kónhen kain tíha la ko ikjin ch'án tí xroon i. Ntá ó noheni kixin tí nkehe tsíkjin ch'án la chaxín ntoá tíha.

²⁵ Naxa síin nchónhya nkehe kjuakoxín ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kixin kjá chrókjuachahya tí chjasintajni chrók'uinka kain tí xroon chrók'óna xikaha. Amén. Ó tjen.

[†] 21:20 Juan 13.25

Tí xra kjuích'e tí sín kjueyá ch'ín Jesús

Itsi Nchakuen Dios

¹ Tjuaḡa jaha Teófilo na tí libro saḡoxín mé kjiān kaín nkehe kjuako ch'ín Jesús la ko tí xra kjuích'e ch'án tí xrankixín

² hasta tí yaon sákjuí ch'án nkaya nkajní. A ntá tí naḡa sákjuíhya ch'án nkajní la kjueyá ch'an tí sín sich'ehe ch'án xra la ntá tí Nchakuen Dios mé kjuínkítsa ch'án ntá nixjehé ch'án sín la k'uetuēnhen ch'án sín kixin tsoḡohe sín nkehe tí xra chrókjuich'e sín.

³ Tíó kjuixín k'uén ch'án ntá kónoxín kixin tjechón ch'án, k'uíkon tí jehe sín la ko cuarenta yaon mé k'uíkon sín ch'án jnkoyaxón. Itsjé nkehe kjuakoxín ch'án kixin tsoḡoexín sín kixin chaxín tjechón ch'án la ko kjuako ch'án nkexrí tí kjuachaxín kuēntē Dios.

⁴ Tí naḡa kójnkotséko ch'án tí sín k'uájiko ch'án la jehe ch'án mé k'uetuēnhen ch'án sín kixin naḡa sátsjixinhya sín tí chjasin Jerusalén. Chrónka ch'án kixin:

—Chróchonhénrā ntiḡo chrók'uayéhérá tí nkehe tsjanjon T'aná, me tí nkehe kuinhínrā xrxanka janhan.

⁵ A ntá chaxín ch'ín Juan inḡa ó kuíkítexín ch'án chojni. A ntá ijie kánhyó itsjé yaon ntá jahará la Nchakuen Dios la tsikítiaxínrā.

Sákjuí ch'ín Jesús nkaya nkajní

⁶ Ntá tí naḡa kójnkotséko sín ch'ín Jesús, kjuanchankíhi sín ch'án kixin:

—Jaha Inchéni, zá tsjánjonhya kjuachaxín jaí ts'etḡoanni chjasénni Israel inaá? —ichro sín.

⁷ Ntá kjuátehe ch'ín Jesús kixin:

—Náhi. Chontahyará kjuachaxín tsoḡohará nkesá tsoḡnhen tíha. Jehó T'aná chónḡa kjuachaxín ts'etḡoan tíha.

⁸ Ntá itsi tí Nchakuen Dios ntá ts'ayéhérá kjuachaxín sátsjichronkará nkehe tí xra kjuít'a, mé sátsjirá tsjákohérá kaín sín chjasin Jerusalén, la ko estado Judea, la ko estado Samaria, la ko kuēntē chjasintajní.

⁹ Ntá kjuixín nixja ch'ín Jesús ntá xrínahya tinkák'it'ótjen ch'án sákjuí ch'án la tjejótsjehe sín. Sákjuí ch'án hasta kjuák'enkákjan ch'án ijnko tjuí. Ntá í t'íkonnhya sín nkeri kjuíji ch'án.

¹⁰ Ntá naḡa tjejókonta sín tí sákjuí ch'ín Jesús nkajní, a ntá xrínahya titàya k'uíkuēn sín yaá chojni ntoa tjejóya sín ka tjóá tjejó sín chjínaxón tí tjejó tí jehe sín.

¹¹ Ntá tí sín a mé ntáchro sín kixin:

—Jahará chojni kjuixínrā estado Galilea, ¿nkehe tsoḡnhen naḡa kontará nkajní? Xíkaha tjejókontará sákjuí Jesús la ko mé xíkaha xiki ch'án inaá —ichro sín.

Xreyá ch'ín Matías tsjiatéhe lùké ch'ín Judas

¹² Na ntá kjanxín sín tí jnā it'in Olivo na ikjan sín chjasin Jerusalén. Tíha a mé kjínhyó tjen kixin ó xíkaho k'uetḡoan tí ley sátsji sín tí yaon t'ok'éhe sín.

¹³ Na ntá kjuíji sín tí chjasin ntiha ntá k'ujit'ótjen sín tí yóxin piso tí nchia tsíkjen sín k'uék'ejó sín. Mé ntiha tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxín ch'ín Jacobo, mé it'é ch'án it'in Alfeo, la ko ch'ín Simón, mé tí ch'ín a mé kuēntē tí partido cananista, la ko kjaxin ch'ín Judas, savé ch'án mé it'in Jacobo.

¹⁴ Kaín sín kójnkotsé sín ntiha tsonixjehé sín Dios la ko k'uéjóko sín tí kíchó tí ch'ín Jesús la ko tí tjan María, iné ch'án, la ko iso chojni chjin.

¹⁵ Ntá tí yaon a tí ch'ín Pedro k'uínkatjen ch'án kjuák'exín toté ch'án jnkosiné tí tjejó tí sín tinkáchónki Inchéni mé ijnko ciento ikán chojni mé tsikójnkotsé ntiha. Ntá ntáchro ch'án kixin:

¹⁶ —Kíchóni, t'ichjánxín tsoxiteyá éxí nixja xroon itén Dios éxí tsínixja ch'ín David tsíchronka Nchakuen Dios nkehe sich'e ch'ín Judas. Tí ch'ín Judas mé kjuíkḡo ch'án tí sín tsotsé ch'ín Jesús.

¹⁷ Jehe ch'án mé kjaxin k'uék'ajikoni la jnkokón xra k'uáyèkoni ch'án.

¹⁸ A ntá jehe ch'án mé sákjuík'énaxín ch'án ijnko nonte tí chichaon kjuacha ch'án kixin tí jje kjuasin ch'án. Ntá k'uánótjen ch'án la ikja ch'án k'uitja nonte la xitjehé tsee ch'án k'uaxrje kaín sntanòé ch'án.

¹⁹ Ntá xíkaha kónohe kaín tí sín chjasin Jerusalén ntá tí nonte kjuínchek'in sín nkívee sín Acéldama mé t'axrxén kixin ijnko nonte síin ijní.

²⁰ Tí xroon Salmo mé nixja xíkíhi:

Tsitḡhe ntḡé ch'án a,
la kohya nkexro ts'ejó ntiha.
La ko kjaxin ntáchro kixin:

Í jnko nkexro ts'áyéhe tí xrá kuènte ch'án.*

Mé xíkaha tsíkjin ch'ín David.

²¹ Tí tjejóni ntihi la siín chojni ó k'uájikoni xráxín tí k'uék'ajikoni Ìnchéni Jesús

²² desde k'uíkoni nkexrí kuíkíte ch'ín Juan tí jehe ch'án la ko hasta k'uíkoni sákjuí ch'án nkaya nkajní. Ntá ijie t'ichjánxín tsoxreyá jnkojin tí sín a tsojnkotsékoni sín kixin kjaxin tsochrónka sín kixin chaxín xechón Ìnchéni Jesús —mé xíkaha chrónka ch'ín Pedro.

²³ Ntá kjuenkayáxin sín tsoxoxín yaá chojni mé tí ch'ín José, t'ikõn ch'án Barsabás la ko Justo, la ko kjaxin í jnko ch'án it'in Matías.

²⁴ Ntá nixjehe sín Dios la ntáchro sín kixin:

—Ìnchéni jaha mé choxian asén kaín chojni. Tjákehéni nkexro tsohnen tocar xrá tí yaá tí nkexro í kónoxín

²⁵ tsjiatéhe xrá apóstol kuènte ch'ín Judas. A ntá tí ch'ín Judas mé kuítõhe ch'án tí xrá kixin kjuasin ch'án ijie la ntá ijie sákjuí ch'án tjetjasóte ch'án —ichro sín.

²⁶ Ntá kjuich'e sín suerte ntá xrínahya kónhen tocar tí ch'ín Matías, ntá tuénxín tí hora a kuákja ch'án xrá k'uéjoko ch'án tí tejnko tí sín kjueyá Ìnchéni.

2

Ó kui Nchakuen Dios

¹ Ntá ó kui tí yaon kia Pentecostés ntá kaín tí sín tinkáchónki Jesús mé kójnkotsé sín jnkokóá tjejó sín.

² Xrínahya kuínhin sín ijnko tóvéntó kuixín nkajní. Tí tóvéntó mé éxi ijnko xrintõ fuerte chjéhe. Kuènté tí nchia tjejóxehen sín mé kóvéntó kjaxin.

³ Ntá xrínahya k'uikon sín nkehe éxi xrohi nene tsjehe. Ntá tíha xikayéhe la k'uéjokjen jnkojnko kja tí jehe sín.

⁴ Na ntá kaín sín k'uáyéhe sín tí Nchakuen Dios ntá kjuankixin sín nixja sín í jnko nkíva kixin Nchakuen Dios kjuínkítsa sín nixja sín.

⁵ A ntá tí yaon a la tí chjasin Jerusalén k'uéjó chojni judío tjinkaon sín sinchexiteyéhe sín tí nkehe tinkáchónki sín, mé tsíkjin sín nkuixín chjasintajní.

⁶ A ntá jehe sín mé tsikinhin sín tí tóvéntó ntá tsikóchjina nchónhya chojni. Ntá í noehya sín nkehe chrókjuenkayáxin sín kixin jnkojnko tí jehe sín mé kuínhin sín kixin nixja tí sín a jnkojnko nkívee sín.

⁷ Ntá síxránká sín, chrakon sín ntá jehe sín mé tjo sín kichó sín kixin:

—¿Á jehya kaín tí sín tjejónixja mé tsíkjin sín estado Galilea?

⁸ La ¿nkekuènté tjejótinhinni kixin nixja sín jnkojnko nkíveeni?

⁹ Kixin ntihi mé siín chojni tsíkjin chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia,

¹⁰ la ko Frigia, la ko Panfilia, la ko Egipto la ko nkuixín Africa antsí nó ntaha Cirene. La ko kjaxin chojni romano tjejó ntihi. Iso tí sín a mé chaxín tsikokjéxín judío, la í so la tinkáchónki sín Dios éxi tí sín judío xíkaha.

¹¹ La kjaxin siín chojni tsíkjin Creta, la ko Arabia. Mé xíkaha kaín ni tsíkjinni tí chjasin a mé tsikinhinni tjejónixja tí sín a tí kjuaxroan kuènte Dios jnkojnko nkíveeni —mé xíkaha ichro sín.

¹² Ntá tóxakonhen kaín sín la chrakon sín ntá kjuanchankíhi kichó sín kixin:

—¿Nkehe t'axrxjín kaín tíha? —ichro sín.

¹³ A ntá iso sín kjuanoá sín ntáchro sín kixin:

—Tsékoan tí sín a —ichro sín.

A ntá ch'ín Pedro chénka tí sín siín

¹⁴ Ntá jehe ch'ín Pedro mé k'uínkatjen ch'án, kjuák'exín toté ch'án la ko tí tejnko sín apóstol mé k'uínkatjen sín la ntá ch'ín Pedro mé itsen nixja ch'án. Ntáchro ch'án kixin:

—Jahará chojni judío la ko jahará tjejórá chjasin Jerusalén. Kaínrá tjejórá tinhínra tí nkehe tsoxrxjanka.

¹⁵ Tí sín tjejó ntihi la jehya tsékoan sín éxi ntáchrorá, kixin na ntá las nueve nchítjen la kohya nkexro tsékoan.

¹⁶ Tíhi mé tsichrónka ch'ín profeta Joel:

¹⁷ Ntáchro Dios kixin: Itsi ijnko yaon tsjixixín ntá tsochr'an Nchakuenná ntá ts'áyéhe chojni.

Ntá tí xjaanrá ntoa la ko tí xjaanrá chjin mé tsonixja tan kuèntana.

La ko tí sín ntasoá mé titàya ts'ikuèn sín tí nkehe tsjákõhã sín.

La ko tí sín ó táda la kotáchrién sín ts'ikonxín sín kixin nkexrí tjinkaon Dios.

* 1:20 Salmos 69.25; 109.8

18 Tí yaon tsonhen kaín tíha la tsochr'an tí Nchakuenná ts'áyéhe kaín tí sínntoa ch'ena xra la ko tí síchjin kjaxin

la tsochrónka sín tanná.

19 Ntá janhan mé tsjákoxián ijnko kjuachrakon nkajní.

A ntá chjasintajni tsjákoxián kjuaxroan:

mé ts'ixin ijní la ko xrohi la ko itjuí tsík'óna ihnchi.

20 Mé tí yaon la ts'inkaséyanxínhya, ts'óna ts'ixin tie.

A ntá tí nitjó mé ts'óna ijní.

Xikaha senó tsonhen ntá itsi Inchéni.

Tíhi mé ijnko yaon imá jié la imá náxrjón.

21 A ntá kaín tí nkexro tsjanchehe ihnié Inchéni kíxin tsjinkítsa sín mé tsaá sín.*

Mé xikaha tsíchrónka ch'ín Joel.

22 Jahará chojni israelita tinhínrá tí nkehe tsoxrjanka. Tí ch'ín Jesús tsíkijxin chjasin Nazaret mé Dios kjuakoxin ch'án kíxin tsíchr'án ch'án kíxin kjuasin ch'án itsjé kjuaxroan jié k'uikonrá la ko kjuako ch'án kíxin Dios tsíchjéhe ch'án kjuachaxin kíxin tjínkaon ch'án chrók'uikonrá. Jahará ó jina nohará kaín tíha.

23 Kjónté xikaha k'uikonrá la jahará itsérá ch'án éxí tsikjenkáyáxin Dios ósé. A ntá jahará kjuinchek'ayéhérá ch'án tí sín jínahya, a ntá tí sín jínahya mé k'óyán sín ch'án, kjuak'enkanı sín ch'án ijnko ntacruz.

24 Kjánchó Dios la kjuínchexechón ch'án inaá la kjuatsen ch'án tí kjuatjoté kuénte kjuach'én kíxin ntá tí kjuach'én xitjahya ts'etuenhen tí jehe ch'án.

25 A ntá ósé tí ch'ín rey David tsíchrónka ch'án kuénte Jesús ntáchro ch'án kíxin:

Jaha Inchéni t'ikuán kíxin jnkochríxin tjétaón ntja tí xritjak'é janhan.

Jaha mé itjen tjaná chjina kíxin chrókohya jie chrókjuásian.

26 Méxra imá chéhe asenná. Ir'va tsjexián tí nkehe náxrjón.

Ó nóna kíxin kohya nkehe ts'atsínka kjónté its'én.

27 Ó nóna kíxin tí jaha tsitgéhya asenná chríkjan tí síin chojni tsík'en.

Tsjánjonhya kjuachaxin kíxin tsóxíka ntóna kíxin janhan mé ijnko nkexro t'aha xra jina tjuéhe.

28 Jaha mé kjuáqona tí ntja tsjanjon kjuachón. Jaha mé nchechána kíxin t'ayakonna.†

Mé xikaha tsíkjin ch'ín David.

29 Kíchóni tjtóhérá tsontáxrjan kíxin ch'ín David, tí nkexro k'uaxrjeníxinni mé tsík'én ch'án la ko tsíkijxravá ch'án. Ntá naxa noheni nketí tsíxravá ch'án.

30 A ntá ch'ín David mé ijnko nkexro tsíchrónka itén Dios la ó nohe ch'án kíxin chaxín Dios chrónka kíxin ijnko nkexro ts'axrjeníxin ch'án mé ts'óna rey mé ts'etqan éxí jehe ch'án k'uetqan ch'án.

31 Mé xikaha ch'ín David la ósé ó nohe ch'án nkehe tsonhen la mé chrónka ch'án kíxin tsoxechón Cristo la ko ntáchro ch'án kíxin tí asén ch'án tsitqehya tí síin tí sín tsík'en la ts'itjáyanyha tí cuerpo kuénte ch'án.

32 Méxra Dios kjuínchexechón tí ch'ín Jesús, mé k'uikonni kaín ni la mé chrónkani kíxin chaxín tíha.

33 Ntá ijie Jesús mé sákjuiko ch'án Dios la nánko itja chjina Dios mé tjen ch'án. Ntá tsintáchro It'é ch'án Dios kíxin tsochr'án ch'án tí Nchakuen ch'án. Ntá jie ó kui la ó k'uikonrá la ko kuínhínrá nkehe kónhen.

34 Tí ch'ín David la jehya jehe ch'án sákjuí nkaya nkajní, kíxin jehe David ntáchro ch'án kíxin:

Inchéni Dios mé ntáche tí Inchéni kíxin:

“Tjak'e tjaná chjina ntihó tsétoan,

35 tsjixinjian kaín xín tí sín ninkakonhan la tsjachahya sín ts'etqan sín kíxin jahvá mé tsétoan.”‡

Mé xikaha tsíkjin ch'ín David.

36 Ntá kaín rá chojni israelita chrókónohará chaxín kíxin jehe tí ch'ín Jesús ó kjuakénkanirá

tí ntacruz la Dios mé kjuích'éna Inchará ijie, mé tí Cristo —mé xikaha chrónka ch'ín Pedro.

37 Ntá tí kuínhin sín tíha ntá imá kóxakonhen asén sín. La ntá kjuanchankíhi sín ch'ín Pedro la ko tí í so sín kjueyá ch'ín Jesús. Ntáchro sín kíxin:

—Kíchóni, a ntá jie la ¿nkexrí chrókjuich'eni?

38 Ntá kjuátehe ch'ín Pedro ntáchro ch'án kíxin:

—Chrókuitóhérá tí ijjárá la chrórxáinkáonrá Dios. Ntá chrókuikitiaxínrá ihnié Jesucristo

ntá Dios mé tsjakjínhanrá tí ijjárá ntá jehe ch'án tsjanjon ch'án Nchakuen ch'án ts'ayéhérá.

* 2:21 2.17–21 Joel 2.28–32 † 2:28 2.25–28 Salmo 16.8–11 ‡ 2:35 2.34–35 Salmo 110.1

³⁹ Dios mé sinchekitõnhanrá ch'án tí Nchakuen ch'án ts'ayéhérá jahará la ko xjaanrá la ko kjaxin tsochjéhe ch'án Nchakuen ch'án kaín xín tí sín tjejó ikjín. Mé jehe ch'án tsochjéhe ch'án Nchakuen ch'án jnkojnko tí nkeexo tsjeyá ch'án.

⁴⁰ Mé xikaha ntáchro ch'ín Pedro la ko i so nkehe ntáchro ch'án. Nta nixjehe ch'án sín inaá, ntáchro ch'án kixin:

—Chrókuiõtohérá tí jínahya tjenkayáxin tí chojni síin chjasintajni kixin jahará me jína chrókuaará.

⁴¹ Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina iní mil chojni kjuankixin tinkáchónki Ìnchéni Jesús la k'uító tí sín ó xráxin síin.

⁴² Ntá kaín sín mé jína k'uék'ejó sín mé kuítekaon sín tí nkehe kjuako tí sín kjueyá Jesús la kjuinkisa sín jmanjon sín tí nkehe chrókjóné tí i so sín la ko chjéhe sín Dios kjuasáya la ko kójnkotsé sín kixin sine sín niõtja xraxinkakonxín sín kixin ik'uén Ìnchéni.

Mé xikaha k'uéjé tí sín xránkixín tinkáchónki Ìnchéni

⁴³ La ntá kaín tí i so sín mé chrakon sín kixin tí sín tsíkjeýá Jesús kjuasin sín itsjé kjuaxroan.

⁴⁴ La kaín tí sín tinkáchónki Jesús mé jnkokqá k'uéjé sín la jnkokqá chóna sín tí nkehe sine sín.

⁴⁵ Kjuínchejki sín tí nkehe chóna sín ntá k'óxikeyehe sín tí chichaon la chjéhe sín tí sín chóntahya.

⁴⁶ Jnkojnko yaon kójnkotsé sín tí nínko la ntá jnkojnko ntõe sín kjóneko kichó sín. La ko kjóné sín niõtja kixin xraxinkakonxín sín kixin ik'uén Ìnchéni la ko kjuaxróxin k'uéjé sín la kohya nkeexo kjuínchehne.

⁴⁷ Kjuanchehe sín kjuasáye Dios. Ntá kaín chojni k'uéchéntehe sín kjuasáya. A ntá jnkojnko yaon Ìnchéni mé kjueyá iso chojni kixin tsotsjé tí sín tsaá.

3

Kuítóhe jína jnko nkeexo xitjahya tji

¹ Jnko yaon tí ch'ín Pedro la ko ch'ín Juan mé chrin sín sákjuí sín tí tjen tí nínko. Mé kjuíji sín las tres kónjín, tí hora mé nixjehe sín Dios.

² Kaín yaon kjuák'e ntiha jnko ch'ín tsíkokjéxín xitjahya tji. Sátsíkjiko sín ch'án tí nínko la tsíkjak'etjajin sín ch'án tí ntója puerta mé it'in Ntója Náxrjón. Ntaha tjetjanach'éhe ch'án chichaon tí sín sí'ixenhen ntiha.

³ Ntá xrínahya k'uíkon tí ch'ín xitjahya tji kjuíji tí ch'ín Pedro la ko ch'ín Juan ts'ixenhen sín nínko, a ntá kjuanchak'éhe ch'án sín chichaon.

⁴ Na ntá ch'ín Pedro la ko ch'ín Juan mé komá sín tí ch'ín a la ntá ntáchro ch'ín Pedro kixin: —Tsjehé ntihi.

⁵ A ntá tí ch'ín a tjetsjehe ch'án jína kixin ách'e ichrén nkehe tsjanjon tí sín a, ichro ch'án.

⁶ A ntá ch'ín Pedro ntáchro kixin:

—Na chontahya plata ni oro kjánchó tí nkehe chonta la tsotjahá. Mé kjuachaxin ihnjé Jesucristo, tí nkeexo tsíkjin chjasin Nazaret, la t'ínkatjen itjia —mé xikaha ichro ch'ín Pedro.

⁷ Ntá ch'ín Pedro mé itsé ch'án tí tja chjina tí ch'ín xitjahya tji ntá k'uínkatjen ch'án. Ntá xrínahya ó kósóji tí nta ntoá toté ch'án.

⁸ Ntá tí ch'ín xitjahya tji la chrika ch'án la kjuák'exín toté ch'án ntá kjuankixin ch'án itji ch'án. Ntá k'uixenko sín ch'án nkaxenhen nínko. Tjetji ch'án la ko chrika ch'án la chjéhe ch'án kjuasáya Dios.

⁹ Na ntá kaín tí chojni síin tí chjasin ntiha la k'uíkon sín kixin ó tji ch'án la ko chjéhe ch'án kjuasáya Dios.

¹⁰ Ntá chrakon sín kixin xikaha tsíkónhen kixin tsíkjatsõan sín kixin jehe tí nkeexo kjuák'etjajin kjuanchak'á ch'án chichaon ntója nínko it'in Ntója Náxrjón.

Nixjehe ch'ín Pedro tí chojni síin tí ntasin Salomón

¹¹ Na tí ch'ín xitjahya tji la mé tíõehya ch'án tí ch'ín Pedro la ko ch'ín Juan. Ntá kaín xín tí sín síin ntiha chrakon sín kuinká sín sákjuítsjehe sín tí ntasin kuente nínko it'in ntasin Salomón kixin ntaha tjejó tí sín a.

¹² Ntá tí k'uíkon ch'ín Pedro xikaha la ntáche ch'án sín kixin:

—Jahará chojni israelita, znkeuente chrakonrá jahará la ko nkeuente komaráni? ¿Á tjenkayáxinrá kixin jehóni kjuínchekitõheni jína tí ch'ín i kixin jehóni chóntani kjuachaxin la ko kixin imá tinkáchónkini Dios?

¹³ Náhi. Tí Dios k'uékinkáchónki ch'ín Abraham, la ko Isaac, la ko Jacob mé imá chjéhe ch'án kjuachaxin tí Xjeen ch'án Jesús. Kjánchó jahará tsíkikjenhenrá ch'án tí sín t'etõan.

Ntá tí ch'in Pilato mé tjinkaon ch'an chrók'uatjánta ch'an tí ch'in Jesús kjánchó jahará la tjinkákonhyará xikaha.

¹⁴ A ntá jahará chrókjuanchiará chrókuítóhe sáchrókjui tí nkexro tjóá jina asén. A ntá náhi. A ntá jahará mé tjinkáonrá sátsji ijnko chojni chóna nchónhya jje.

¹⁵ A ntá jahará tsík'oyánrá tí nkexro tjanjon kjuachón. A ntá Dios mé kjuínchexechón tí jehe ch'an la mé xikaha k'uikoni la chrónkani.

¹⁶ Tí kjuachaxién ihnié Jesús mé tinkáchónkini la ntá tíha mé kuitgexín jina tí nkexro k'uikonrá la ko choxinrá. Tí ch'in a mé kuitekaon ch'an ntá kuitghe ch'an jina. Mé xikaha ó k'uikonrá kaín rá.

¹⁷ Kíchóni ó ñona kixin tió jahará la ko tí sín t'etqan k'oyánrá Jesús la ni kónoahyará nkehe kjuich'erá.

¹⁸ Ntá ó xiteyá tí nkehe tsintáchro Dios tsínixjaxín tí sín tsíchrónka itén ch'an kixin tí Cristo t'ichjánxin tsjasóte ch'an.

¹⁹ Méxra tsitohérá ijjará ntá xráxinkáonrá Dios ntá jehe ch'an mé ts'óxika ijjará ntá Inchéni mé sinchekitohará ch'an jina.

²⁰ Ntá jehe ch'an mé tsochr'an Jesucristo inaá la xra ó tsi kixin tsáaxinrá.

²¹ Na ntá ijie la Jesucristo la nkaya nkajni ntahó tsitghe ch'an hasta tsjasiyóxinjian Dios kaín nkehe éxi tsintáchro ch'an tsínixjaxín ch'an tí sín tsíchrónka itén ch'an ósé.

²² A ntá senó tí ch'in Moisés tsíchénka tí sín tsík'axrjenixinni kixin: "Inchéni Dios mé tsochr'an ijnko nkexro ts'axrjenixinrá tsochrónka itén ch'an éxi tsíchr'an ch'an tí janhan. T'ichjánxin tinhinrá kaín tí nkehe tsontáchro ch'an.

²³ A ntá tí chojni titekakonhya tí nixja tí nkexro a la ts'itjayan sín la tsítghe sín tí nación Israel,"* mé xikaha tsíchrónka ch'in Moisés.

²⁴ Kaínxin tí sín tsíchrónka itén Dios kjuankixixín ch'in Samuel la ko kaín tí sín kui chr'éxin mé chrónka sín kixin kaín tíha tsqnhen xikaha tí yaon i.

²⁵ Mé tí nkehe tsintáchro Dios tsínixjaxín ch'an tí sín tsíchrónka itén ch'an kixin xikaha chrók'uayehérá jahará tí nkehe chrókjuanjon ch'an kixin chrók'uejorá jina. Dios tsíkjich'éna ch'an ijnko pacto mé nixjehe ch'an tí sín tsík'axrjenixinrá mé tsintáche ch'an tí ch'in Abraham kixin: "Kaínxin chojni chjasintajni mé tsoyaonxín sín kixin ijnko nkexro ts'axrjenixín tí jaha."†

²⁶ Dios kjuínchexechón ch'an tí Xjeen ch'an la saoxín ichr'an ch'an tí tjejorá jahará israelitará kixin chrókjuantayaonrá ch'an kixin jnkojnko tí jahará chrókuitgohérá tí nkehe jinahya ich'erá —ichro tí ch'in Pedro.

4

Tí ch'in Pedro la ko ch'in Juan nkayakon tí sín t'etqan

¹ Ch'in Pedro la ko ch'in Juan la naxa tjejónixjehe sín tí sín tsíkójnkotsé ntá xrinahya ikui tí sín nchát'á la ko tí ch'in t'etuenhen tí sín soldado kuente tí njnko la ko tí sín saduceo.

² Imá kónínkaon sín kixin ch'in Pedro la ko ch'in Juan kjuakqohé sín tí sín tsíkójnkotsé nkexri tsoxechón chojni tsík'en kixin xikaha xechón ch'in Jesús.

³ Ntá kuínhin sín xikaha ntá itsé sín tí sín a ntá sákjuíko sín, chr'áxenhén sín ntqechiso. Ntahó k'uéjé sín hasta kóyaon kixin ó ntá kóntó.

⁴ A ntá nchónhya tí sín tsíkinhin tí tan a la kuitekaon sín. Ntá kjuixraká tí número tí chojni ntoa mé in'ó mil chojni ntoa ó.

⁵ A ntá tí yaon chr'éxin kójnkotsé tí chjasin Jerusalén tí sín t'etqan kuente tí sín judío la ko tí sín tjako tí ley.

⁶ Mé kjaxin ntaha tjeen ch'in Anás, mé jehe ch'an mé tí nchát'á imá t'etqan, la ko ch'in Caifás, la ko kjaxin ch'in Juan, la ko ch'in Alejandro, la ko kaín tí chojni kjéhya tí nchát'á t'etqan.

⁷ Ntá k'uetqan sín kixin síxakraoa ch'in Pedro la ko ch'in Juan. Ntá k'uéjé sín jnqosiné la ntá kjuanchankíhi sín ntáchro sín kixin:

—¿Nkexro kjuanjon kjuachaxin ó nkexro kjuachaxin ihnié kixin xikaha ich'erá tí nkehe?

⁸ Ntá ch'in Pedro imá chóna ch'an kjuachaxin kuente Nchakuen Dios ntá kjuátghe ch'an ntáchro ch'an kixin:

—Jahará chojni t'etqan kuente chjasin la ko jahará sín táda kuente chjasin Israel,

⁹ jahará mé tjanchankirá kixin nkexri kuitghe ijnko chojni níhi jina kixin tjinkáonrá tsonohará.

¹⁰ Ntá tinhinrá jina tí nkehe tsochrónkaxinni kixin kaín rá chojni chjasin Israel tsonohará kixin tí ch'in i tjeen ntíhi mé kuitghe ch'an jina kjuachaxién ihnié Jesucristo, tí nkexro

* 3:23 3.22-23 Deuteronomio 18.15,19 † 3:25 Génesis 22.18

tsíkjiixin chjasin Nazaret. A ntá jahará mé tsíkjakénkanirá ch'án tí ntacruz la ntá Dios kjuínchexechón ch'án inaá.

¹¹ Tí ch'ín Jesús i mé tí xro náxrxónhya kuitóéntará tió kjuich'énará tjat'ò ntá mé jie k'óna tí xro tjetóan.*

¹² Kohya í jnko nkexro chóna kjuachaxin chrókuaáxinni kixin kohya í jnko ihnjé chojni ntihi chjasintajni chrókuinkáchónkini chrókuaáni —mé xikaha ichro ch'ín Pedro.

¹³ Tí sixréé mé k'uikon sín kixin ch'ín Pedro la ko ch'ín Juan mé nixja sín kaín asén sín la ntá kónohe sín kixin tí sín a mé noehya sín xroon la tjetuanhya sín. Ntá chrakon tí sín t'etóan ntá kjuátsóan sín kixin tí sín a mé tsík'ajiko ch'ín Jesús.

¹⁴ A ntá tí ch'ín tsíkitohe jina mé ntiha tjejóko sín ch'án. Méxra xitjahya tsjanchia sín jie tsjasóte tí sín a.

¹⁵ Ntá tí sixréé a mé k'uetóan sín kixin tí sín a ts'axrje sín ntója ntá jehó sín k'uéjoxenhen sín nchia ikjo sín kichó sín.

¹⁶ Ntá ntáchro sín kixin:

—¿Nkehe chrókjuich'eheni tí sín a? Kaínxín tí chojni ntihi chjasin Jerusalén mé ó k'uikon sín kixin kjuínkítsa Dios tí sín a ntá kjuasin sín ijnko kjuaxroan jie ntá xitjahya tsontáchroni kixin chaxínhya tíha.

¹⁷ Í tjinkakonhyani kixin náxa tsochrónka sín tíha kixin náxa tsinhin chojni. Méxra ts'etóanni kixin í tsochénkahya sín ninxeró tí ihnjé Jesús.

¹⁸ Na ntá k'uúyehé sín tí sín a inaá ntá k'uetuenhen sín kixin ninkehó chrónixja sín la ko chrókjuako sín ihnjé Jesús, ichro sín.

¹⁹ A ntá ch'ín Pedro la ko ch'ín Juan kjuátéhe sín ntáchro sín kixin:

—Tjenkayáxinrá jahará, ¿á chrókóxrxinhin Dios chrókjuintaxiteyáharáni jahará ó chrókjuinchesteyéheni tí jehe ch'an?

²⁰ A ntá jeheni la xitjahya tsítóheni tsochrónkani tí nkehe ó k'uikonni la ko tí nkehe kuínhini —ichro sín.

²¹ A ntá kjónté xikaha kuínhin tí sixréé la jiehe k'uetóan sín ntá kjuanjón sín kjuachaxin kixin sátsji tí sín a kixin k'uitjahya sín nkexrí sinchekjasóte sín tí sín a kixin kaín tí sín chjasin ntiha chjéhe sín Dios kjuasáya kixin tí kjuaxroan kjuich'e sín.

²² Na mé tí ch'ín kuitóhe jina kixin tí kjuaxroan mé chjina k'uaxitjehe ch'án cuarenta nánó a.

Tí sín tinkáchónki Jesús tjanchia sín kixin tsochrakonhya sín

²³ Ntá tí ch'ín Pedro la ko ch'ín Juan tsíxranjón kjuachaxin sátsji sín na ntá sákjuí sín tí tsíkójnkotsé iso tí sín chóxin sín. Ntá chrónka sín kaín nkehe k'uetóan tí sín nchat'a t'etóan la ko tí sín táda.

²⁴ Ntá kjuixin kuínhin tí sín tsíkójnkotsé na ntá kaín sín nixjehe sín Dios la ntáchro sín kixin: —Inchéni, jaha mé kjuich'éna nkajni la ko chjasintajni la ko tí ntayaon la ko kaín xín tí nkehe siín.

²⁵ Jaha mé kjuachaxién Nchakuan nixjaxian ch'ín David tí nkexro kjuí'aha xra. Ntáchro ch'án kixin:

¿Nkekuénte kixin kónínkaon kaín tí chojni nación ókjé?

A ntá tí chojni israelita mé tjenkayáxin nkehe ninkehó sínkíhya.

²⁶ Tí sín rey siín chjasintajni la ko kaín tí sín tí chjasin kójnkotsé sín

nínkakonhen sín Inchéni la ko Cristo.†

Mé xikaha tsíkjin ch'ín David ósé.

²⁷ Mé xikaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkjiixin ókjé, la ko tí sín israelita mé tsíkójnkotsé sín tí chjasin ntihi kixin kónínkakonhen sín tí Xjaan Jesús chónahya jie, mé tí nkexro tsíkjéya jaha sit'aha xra.

²⁸ Mé xikaha kjuínchesteyá sín tí nkehe ósé tsíkjenkayáxian kixin t'ichjánxin xikaha tsonhen.

²⁹ A ntá Inchéni, tsjehé kixin imá jiehe k'uetóan tí sín a. La ntá jaha tsjínkítsa tí sín sit'aha xra tsochrakonhya sín tsochrónka sín itán.

³⁰ La ko tí kjuachaxián sinchekitoxén jina tí chojni níhi la ko tsjáoxian kjuaxroan kjuachaxién ihnjé tí nkexro Jesús t'aha xra —mé xikaha nixjehe sín Dios nkaya nkajni.

³¹ A ntá tí kjuixin nixjehe sín Dios a ntá tí tjejó sín mé kuínkí nonte. La ntá kaín sín antsí k'uáyehé sín Nchakuen Dios ntá kaín asén sín kjuankixin sín chrónka sín itén Dios.

Tí kaín nkehe siín la kaín sín mé kuénte sín

³² La kaín tí sín kuinkáchónki sín Jesús mé jnkokoá kjuenkayáxin sín. Kohya nkexro ntáchro kixin jehó kuénte tí nkehe siín. Náhí. Kaín sín mé kuénte sín.

* 4:11 Salmo 118.22 † 4:26 4.25-26 Salmo 2.1-2

³³ Tí sín tsikjeyá Jesús mé kaín asén sín chrónkaxín sín kixin nkexrí xechón Ìnchéni Jesús. Ntá Dios antsi kjuíncheyaoon kaín sín.

³⁴ Kohya ninkexró nóaxinhya tjejó ntiha kixin kaín tí sín chóna nontee sín o ntøe sín kjuíncheki sín. Na ntá tsikjikao sín tí chichaon

³⁵ chjéhe sín tí sín kjueyá Jesús. A ntá tí sín k'óxikayehe sín tí chichaon, kuákja tí sín nò.

³⁶ Mé xikaha kjuich'e ijnko ch'ín levita it'in José. Jehé ch'án la tsikjixin ch'án nonte Chipre jnkosiné ntayaon. Tí sín kjueyá Jesús mé kjuínchek'in sín ch'án Bernabé, mé t'axrjéxin kixin tí ch'ín nchechéhe asén chojni.

³⁷ Jehé ch'án a mé kjuíncheki ch'án ijnko nontee ch'án ntá kjuikao ch'án tí chichaon kjuínchek'áyéhe ch'án tí sín kjueyá Jesús.

5

Ijje kjuasin ch'ín Ananías la ko tjan Safira

¹ A ntá í jnko ch'án mé it'in Ananías, a ntá ichjién ch'án mé it'in Safira, mé jehé sín mé kjuíncheki sín ijnko nontee sín.

² A ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuiko ch'án la chjéhe ch'án tí sín kjueyá Jesús la kjuanjon ch'án éxi kaín.

³ Ntá ntáchro ch'ín Pedro kixin:

—Ananías, ¿kuènté chjéhe kjuachaxin tí Tsochren kixin k'uetuénhen asán? Ntá kjuich'iyehé tí Nchakuen Dios kixin kjuínchemá iso chichaon kjuínchekjixián nontaa.

⁴ ¿Á jehya nontaa tíha? Ntá tió kjuínchekjia la, tí chichaon la, ¿á jehya kuèntá? ¿Kuènté kjuenkayáxian sich'e tíha? Kjuich'iyehé Dios, jehya chojni kjuich'iyehé.

⁵ Na ntá kuínhin tí ch'ín Ananías ntá kjuítsínka ch'án ntá ik'uén ch'án. La ko kaín xín tí sín ntiha kónohe sín nkehe kónhen tí ch'ín a la imá chrakon sín.

⁶ Na ntá ikjuí iso sín ntasoá la ntá kjuínchek'ísímá sín ika tí cuerpo kuènté ch'án la ntá sákjuiko sín, sákjuikjavá sín.

⁷ Ntá k'uátsínka iní hora ntá kjuíji ichjién ch'ín Ananías k'uixénhen tjan tí nchia ntaha a. La noehya tjan nkehe tsíkónhen tí ntiha.

⁸ Ntá ch'ín Pedro mé kjuanchankíhi tí tjan a, ntáchro ch'án kixin:

—Chronka, ¿á chaxín xikahó kóxixín tí nonte ó kjuínchekjirá? —ichro ch'án.

Ntá kjuátehe tjan kixin:

—Chaxín xikahó kóxixín.

⁹ Ntá ntáchro ch'ín Pedro kixin:

—¿Nkekuènté jnkoka kjuenkayáxinrá kjuich'iyehérá Nchakuen Ìnchéni? Kjá ntáchrórá kohya nkehe chrókónhanrá. Ntihi ó kui tí sín ntasoá sákjuikjavá sín xia na ntá jaí sátsjiko sín tí jaha —mé xikaha ichro ch'ín Pedro.

¹⁰ Ntá tuénxín kjuítsínka tjan Safira toté tí itjen ch'ín Pedro ntá ik'uén tjan. Ntá k'uixénhen tí sín ntasoá tí nchia a ntá k'uikon sín kixin tsikjixin tsík'en tjan. La ntá sákjuiko sín tí cuerpo kuènté tjan la kjuavá sín tjan tí chjinaxón tsíxrává tí xì tjan.

¹¹ Na kaín tí sín kuènté njnko la ko tí í so sín kuínhin tí xikaha tsíkónhen, mé imá chrakon sín.

Itsjé kjuaxroan kjuakoxin sín

¹² A ntá tí sín kjueyá Jesús mé kjuakoxin sín nchónhya kjuaxroan tí síin chojni ntiha la ko kaín sín mé kójnkotsé sín tí ntásin it'in Salomón.

¹³ Chrakon iso sín k'uítóhya tí jehé sín la kjónté la kaín chojni tjikosáyehe tí jehé sín.

¹⁴ La ntá xrinahya nchónhya chojni ntoa la ko chojni chjin kjuankixin tinkáchónki sín Ìnchéni.

¹⁵ Ntá itsjé chojni mé kuakitsje sín tí chojni níhi k'uejo sín ntja. Tjéjóták'á sín chrítaón cama la ko kania kixin ts'atsínka ch'ín Pedro ntá kjónté its'uéen ch'án ó ts'atsínka tí tjejó sín mé chrókuítøexín sín jina.

¹⁶ Kjaxin tí chjasin chjino mé kjuixín nchónhya chojni ikjuí sín chjasin Jerusalén la kjuikao sín tí chojni níhi la ko tí chojni chóna nchakuen tí jinahya. La kaín sín a mé kuitøhe sín jina.

Ch'ín Pedro la ko ch'ín Juan mé chónkíhi sín

¹⁷ Na ntá tí sín ncha'tá t'etøan la ko tí sín kuènté tí sín saduceo mé imá kóchjinoxínhin sín.

¹⁸ Na ntá itsé sín tí sín kjueyá Jesús la chr'áxénhen sín ntøechiso.

¹⁹ A ntá ijnko ángel kuènté Ìnchéni ikui tí tie a kuakitjehé ch'án ntója ntøechiso ntá kuakitsje ch'án tí sín a. La ntá k'uetuénhen ch'án sín kixin:

²⁰ —Sátjirá njnko la tsjákohérá kaín tí sín ntiha tí tan njxin tsjanjon kjuachón.

²¹ Kjuixin kuínhin sín ntá sákjuí sín ntá tí k'uínkaséyan k'uixénhen sín tí njnko kjuako sín.

Ἀ ντά τί νχατ'ά τ'ετοαν λα κο τί σίν κ'υέjόκο χ'án mé κ'υίεγε σίν τσοjнкotsé каín τί síxреé, mé tí σίν τ'ετοан куένте Israel. Na ntá k'uetoan sín kíxín тsoxракoа tí σίν тjejóчjina тsíkjeяá Ìnчéni.

²² Ἀ ντά κjuíjι τί σίν policía τί ntóechiso a ntá k'uitjahya sín τί σίν a. La ntá ikjan sín la

²³ ntáчro sín kíxín:

—Kjuíjini ntíha la k'uikonní тsíkjege jína ntóechiso a la k'uejó tí σίν soldado a ntója. Ntá kuakítjeheni ntóechiso la k'uitjahyani nínkexró tí nkaxenhen —ichro sín.

²⁴ Ntá каín τί νχατ'á τ'ετοан λα κο τί ч'ín k'uetuenhen tí policía куένте nínko la ko i so tí σίν νχατ'á τ'ετοан mé куínhin sín ntá ntáчro sín kíxín xá nkexrí чrókónhen чrók'uitjáyan tí xpa куένте tí σίν a.

²⁵ Na ntá tuénxín kjuíjι ijnko nkexro ntáчro kíxín:

—Tí σίν k'uejochjínará jahará mé ó nkaxenhen nínko ntaha тjejó σίν тjejótjakoge sín chojni —ichro ч'án.

²⁶ La ntá tí ч'ín k'uetuenhen tí σίν policía mé sákjuiko ч'án tí σίν policía la kjuikakjín tí σίν tjako. Nínkehó kjuich'ehya tí σίν policía tí σίν tjako kíxín чrakon sín kíxín áч'e tí σίν síin ntíha mé тsjak'e sín xpe, ichro sín.

²⁷ Na ntá tío kjuíkao sín τί σίν a la k'uejó sín nkayakon tí σίν τ'ετοан ntá τί νχατ'á τ'ετοан ntáчro ч'án kíxín:

²⁸ —Jeheni kjuanjonhyani kjuachaxín kíxín тsjákorá ihníé tí nkexro a. ¿Ἀ ntá nkehe kjuich'era jahará? Kuenté чjasín Jerusalén тsíkjákorá. La тjínkáonrá тsékaráni jie kíxín jeheni тsík'óyáni tí ч'ín a —ichro ч'án.

²⁹ Ἀ ntá ч'ín Pedro la ko tí iso sín kjueya Jesús ntáчro sín kíxín:

—Ἀ ntá jeheni т'ichjánxin sínчехитеyéheni Dios senó. Ἀ ntá чr'éxin sínчехитеyéheni chojni.

³⁰ Tí Dios тsíkínkáчónki tí σίν тsík'axjeníxinni ósé mé kjuínчехechón Jesús, tí nkexro a mé kjuakékanirá tí ntacruz тsík'oyánrá.

³¹ Ntá ijie тjeко ч'án Dios nkaya nkajní la nángo itja чjina Dios mé тjen ч'án la Dios kjuich'éna ч'án ijnko nkexro τ'ετοан kíxín sínчekaá ч'án chojni kíxín tí nacióн Israel чrókjan чrókuínkáчónki sín Dios ntá чrók'uitjáyan tí jie чónta sín.

³² La ko kjaxín jeheni чrónkani каín tí nkehe k'uikonní kjuachaxién Nчакuen Dios. Tí Nчакuen ч'án mé чjéhe Dios каín tí nkexro чaxín sínчехитеyéhe tí jehe ч'án.

³³ La ntá tí σίν τ'ετοан a mé куínhin sín tíha ntá kónínkaon sín la ko тjínkaon sín чrók'óyán sín τί σίν a.

³⁴ Na ntá тjen ijnko chojni fariseo mé ijnko síxреé it'in ч'án Gamaliel. Jehe ч'án mé ijnko maestro kjuako tí ley la каín chojni чjasín ntíha чóntehе ч'án kjuasáya. Mé k'uinatjen ч'án kjuák'exín toté ч'án la níxja ч'án k'uetoan ч'án kíxín tí σίν тsíkjeяá Ìnчéni mé тs'axrje sín ntója intsí, ichro ч'án.

³⁵ Na ntá níxjege ч'án каín τί síxреé ntáчro ч'án kíxín:

—Jahará chojni israelita, тóxakonhanrá kíxín kohya nkehe чrókjuich'eherá tí σίν a.

³⁶ Xráxínkáonrá kíxín senó kjuák'e ijnko ч'án it'in Teudas la тónhen asén ч'án kíxín imá τ'ετοан ч'án. Ntá itsjé sín mé noó ciento chojni kjuichréhe ч'án. Na ntá ókjé chojni k'óyán sín tí ч'ín a la ntá каín τί σίν куínkáчréhe tí jehe ч'án mé xíka sín sákjuí sín ntá ntahó kjuéxin tí xpa k'uekjich'e sín.

³⁷ Ntá чr'éxin tío xrenájín каín ihníé chojni k'uejó na ntá ikjuí í jnko ч'án mé it'in ч'án Judas la kjuixín ч'án estado Galilea. Ntá itsjé chojni kjuichréhe ч'án. La ntá kjaxín k'óyán sín ч'án la ntá каín xín τί σίν kjuichréhe ч'án xíka sín sákjuí sín inaá.

³⁸ Méxpa тjтohérá тjтatéhyará tí jehe sín a. Ἀ ntá tí тjejóч'e sín xpa куένте chojni ó la kjaxín тs'itjáyan.

³⁹ Ἀ ntá tí чaxín tjako sín kjuachaxién Dios ntá тsjachahyará sнчех'itjáyanrá tíha. Méxpa тjтohérá sín kíxín тsjánjonkohyará Dios.

⁴⁰ Na ntá каín τί síxреé mé куítekaon sín la ntá k'uíege sín τί σίν kjueya Jesús. La ntá kjuate sín la xík'etuenhen sín kíxín í тsonixjahya sín ihníé Jesús la ntá kjuanjon sín kjuachaxín kíxín sátsji sín.

⁴¹ Ntá tí σίν kjueya Jesús mé k'uaxrxén sín τί тjejó tí σίν τ'ετοан kjónté xíkaha kónhen sín la чéhe sín kíxín Dios kjuanjon kjuachaxín kjuasóte sín kíxín tí kjuako sín ihníé Jesús.

⁴² Kuítóehya sín тsjako sín куένте Jesucristo каín yaon tí nkaxenhen nínko la ko tí jnkojnko ntóe chojni.

6

¹ Na ntá tí yaon a tjoka sítinkákótsjé tí sín tinkáchónki Ìnchéni. A ntá tí sín nixja nkíva griego mé kónínkakhonen sín tí sín nixja nkíva hebreo. Ntáchro sín kixin tí sín chjín k'án kuènte sín la kánhyó jína k'uáyéhe tí nkehe síxikayéhe sine sín jnkojnko yaon, ichro sín.

² Na ntá tí teyó tí sín tsíkjeýá Jesús mé k'uíyehé sín kaín tí sín tinkáchónki Ìnchéni. Ntá nixjehé sín, ntáchro sín kixin:

—Jeheni la jehya jína tsítgheni tí xra tjakoni itén Dios, kixin ntá sit'aharáni xra ts'óxikayeheni tí nkehe sine tí sín k'án.

³ Méxra jahará kichó ni tsjéýará yato chojni ntoa tí tjeýorá, tí chojni jína choxinrá la ko nohe sín la ko antsí chóna sín Nchakuen Dios mé tí sín a sinchek'áyéheni tí xra a.

⁴ A ntá jeheni la tsonixjeheni Dios la ko tsinkákjakoni itén ch'án —mé xíkaha ichro sín.

⁵ La ntá kaín sín mé kuínhin sín xíkaha ntá jnkoqá kjuenkayáxin sín. La ntá kjuéýá sín ch'ín Esteban, mé ijnko nkexro imá tinkáchónki Ìnchéni la ko antsí chóna ch'án tí Nchakuen Dios. La kjaxin kjuéýá sín ch'ín Felipe, la ko ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehé ch'án mé tsíkijxin ch'án chjasin Antioquía la óse mé tsíkinkáchónki ch'án tí nkehe tinkáchónki tí sín judío.

⁶ Ntá kjuixin kjuéýá sín tí sín a ntá kjuíkao sín tí tjeýó tí sín tsíkjeýá Ìnchéni. La ntá tí sín a mé nixjehé sín Dios la ko k'uejotja tja sín chrítaón tí ikja tí sín tsíkónoxín.

⁷ Tí itén Dios sítinkákji la tinkákótsjé tí sín tinkáchónki Ìnchéni chjasin Jerusalén. Kjaxin itsjé tí sín nchat'á judío kjuankixin sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóna kjuachaxin kixin Dios tsíkjincheyaon ch'án la nchónhya kjuaxroan kjuakoxín ch'án tí sín chojni.

⁹ A ntá iso sín tsíkijxin tí njnko judío kuente tí sín senó k'uejó esclavo sín tsíkijxin sín chjasin Cirene, la ko Alejandría, la ko Cilicia, la ko estado Asia, mé kjuankixin sín ikjo sín ch'ín Esteban.

¹⁰ Kjonté xíkaha la kjuachahya sín kixin Nchakuen Dios mé kjuínkítsa tí ch'ín Esteban nixja ch'án.

¹¹ Na ntá jehé sín mé kjuenkehe sín ókjé chojni kixin tsochrónka sín kixin kuínhin sín k'uántaxínhin ch'án ch'ín Moisés la ko Dios, ichro sín.

¹² Mé xíkaha k'uixité kaín chojni la ko tí sín t'etoan kuente njnko la ko tí sín tjako tí ley. La ntá itsé sín tí ch'ín Esteban la tinkánkákjen sín ch'án sákjuiko sín ch'án tí sín tí síxreé a.

¹³ Kjaxin kjuéýá sín chojni tsochrónka kixin ntoáhya kjuako ch'ín Esteban la ntáchro tí sín a kixin:

—Tí ch'ín a mé títoehya ch'án t'ántaxínhin ch'án tí njnko kuénténi la ko tí ley.

¹⁴ Ó kuínhini kixin chrónka ch'án kixin tí ch'ín Jesús, tí ch'ín tsíkijxin chjasin Nazaret, mé sinchek'itjayan ch'án tí njnkgeni ntihi la ko tsjitóxinhin ch'án tí nkehe tinkáchónkini mé tí nkehe tsík'etoan ch'ín Moisés —mé xíkaha ichro sín.

¹⁵ Ntá tí síxreé la ko kaín tí sín sitjaxin ntiha la komá sín tí ch'ín Esteban la mé k'uíkon sín kixin tí kàre ch'án mé éxí ijnko ángel mé xíkaha tsjehe tí jehé ch'án.

7

Tí nkehe kjuátehe ch'ín Esteban

¹ A ntá tí sín nchat'á t'etoan kjuanchankíhi sín tí ch'ín Esteban kixin:

—¿Á chaxín kaín tíhi tsíntáchrúa?

² Na ntá jehé ch'án kjuátehe ch'án ntáchro ch'án kixin:

—Káinrá kichó ni Israel la ko sín táda tnhínrá tí nkehe tsonatxrxan. Dios kuènteni chóna kjuachaxin mé kjuakohe ch'ín Abraham tí nkexro k'uaxrxenixinni tió kjuák'e ch'án nación Mesopotamia tí naqá sátiyhya ch'án tsjak'e ch'án nonte Harán.

³ Dios tsíntáchro kixin: “Tjtohé chjasán la ko kaín tí nkexro kjéhya. Na ntá sátiya tí nonte tsjákohá jaha.”*

⁴ Na ntá ch'ín Abraham k'uaxrxenín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixin ik'uén it'é ch'án na ntá Dios kjuíkao tí jehé ch'án tí nonte tjeýorá ijje.

⁵ Kjánchó ch'ín Abraham la kuákjahya ch'án nít'o nonte hasta ni tí tsjak'e toté ch'án la chóntahya ch'án. A ntá chrónka Dios kixin chaxin chr'exín tió tsjixin ts'en ch'ín Abraham la tí sín ts'axrxenín ch'án mé ts'áyéhe sín tíha. Kjonté naqá kohya njnko xjeen ch'án la mé xíkaha ntáchro Ìnchéni.

* 7:3 Génesis 12.1

⁶ Kjaxin tsintácho Dios kixin tí sín ts'axrjeníxin ch'in Abraham la ts'ejó sín ókjé nonte, la ko sich'exón sín xra la ko náxrjónhya ts'ejó sín noó ciento nánó.

⁷ La kjaxin xintácho Dios inaá kixin: "Ntá chr'éxin janhan sintakjasóte tí sín kjuínchekjasóte xjaan. La ntá tí xjaan mé tsokjan sín ntihi ntá tsoxraxinkakonxín sín tí janhan," mé xikaha ichro Dios.

⁸ Na ntá Dios mé tsíkjo ch'in Abraham kixin kaín tí chojni ntoa ts'axrjeníxin ch'án mé itsa sín xroye. Na ntá xikaha tió kokjilhi xjeen ch'an Isaac ntá ch'in Abraham mé chjéhe ch'án xjan xroye tió xétehe xjan ijní yaon. Ntá kjaxin xikaha kjuích'e ch'in Isaac tió ch'óna ch'án xjeen ch'án Jacob, la ntá ch'in Jacob la xikaha kjuích'e ch'án inaá. Ntá tí sín a mé k'óna it'é tí teyó tribu tsík'axrjeníxin tí sín Israel.

⁹ Tí xjeen ch'in Jacob mé tí sín k'uaxrjeníxinni ósé la jehe sín k'uéchjinoxínhin sín tí kichó sín José ntá kjuínchekji sín ch'án la tí sín k'uena la sákjuiko sín ch'án nó nación Egipto, kjánchó Dios mé kjuínkjtsa tí jehe ch'án.

¹⁰ Dios mé kjuínchekaá ch'án tí náxrjónhya k'uékjak'e ch'án. La ko Dios kjuanjon kjuachaxin kixin imá tsoñohe ch'án. Na ntá k'uikon ch'in Faraón tí rey kuente nación Egipto a xikaha tí xra jina kjuích'e ch'in José ntá kjuanjon ch'án kjuachaxin kixin ts'et'oan ch'in José tí nación Egipto la ko tí ntqe ch'án.

¹¹ Na ntá kókjinta xrinahya la náxrjónhya k'uejó tí sín nación Egipto la ko nonte Canaán la tí sín tsík'axrjeníxinni la k'uitjahya sín nkehe sine sín.

¹² A ntá tsikinhin ch'in Jacob kixin tí nación Egipto mé sítóxi noa trigo ntá k'uetuenhen ch'án tí sín xjeen ch'án kixin sátsji sín ntiha tsjik'ena sín noa, la jehe tí sín a mé tí sín tsík'axrjeníxinni. Tíha mé tí saoxín sákjuí sín.

¹³ Ntá tí yóxin sákjuí sín ntiha ntá ch'in José kjuínchenohe ch'án sín kixin tí sín a la savé ch'án. La ntá kjuakohe ch'án tí ch'in Faraón tí sín naxa kjéhya ch'án.

¹⁴ La ntá k'uet'oan tí ch'in José kixin sátsjikakjín sín it'é ch'án Jacob la ko kaín tí sín kjéhya ch'án, mé ijnko setenta y cinco chojni kjéhya ch'án.

¹⁵ Mé xikaha kónhen la tí ch'in Jacob mé sákjuí ch'án la kjuák'e ch'án nación Egipto ntá chr'éxin ntiha mé k'uénxin ch'án. La ntá chr'éxin kjaxin tí sín tsík'axrjeníxinni k'uénxin sín ntiha.

¹⁶ Ntá chr'éxin kuakitsjexín sín tòye tí huésóé tí ch'in Jacob la sákjuiko sín tí nonte Siquem, la ntá ntiha mé kjuavá sín tí nonte tsík'ena ch'in Abraham mé tsík'enehe ch'án tí xjeen ch'in Hamor chjasin Siquem.

¹⁷ La ntá ó kuichjina tsoxiteyá tí nkehe tsintácho Dios tsíkjo ch'in Abraham ntá tí sín Israel imá kótsjé sín nación Egipto.

¹⁸ A ntá xrinahya í jnko ch'in rey kjuankixin k'uet'oan nación Egipto la k'uéchónhya ch'án tí ch'in José.

¹⁹ La ntá tí ch'in rey kjuích'iyehé ch'án tí sín naxa kjéhyani la ko kjuínchekjasóte ch'án sín. La tsík'et'oan ch'án kixin tí xjan ntoa na ntá kokjilhi mé tsjik'itji sín xjan kixin its'en xjan.

²⁰ Na ntá tí yaon a tsíkokjilhi ch'in Moisés ntá imá kóxrjinhin Dios tí xjan a. It'é la ko iné xjan mé k'uéchóna sín xjan iní nitjó koá ntqe sín.

²¹ Ntá chrokjuahya tsjak'emá sín xjan la ntá kjuíkjáka sín xjan. La ntá xjeen tí ch'in rey kuente Egipto mé kjuíkkaja tjan xjan la sákjuiko tjan ntqe tjan la kjuínchek'ánkí tjan xjan éxi xjeen tjan xikaha.

²² La ntá tí ch'in Moisés mé k'uitja ch'án kaín nkehe nohe tí sín Egipto a la imá tjet'oan tí nkehe k'uéntácho ch'án la ko tí nkehe k'uékjich'e ch'án.

²³ La ntá tió ch'óna tí ch'in Moisés cuarenta nánó ntá tjinkaon ch'án tsjtsjehe ch'án tí sín israelita naxa kjéhya ch'án.

²⁴ Ntaha mé k'uikon ch'án kixin ijnko chojni Egipto kjuate ijnko chojni naxa kjéhya tí jehe ch'án. Ntá chrókjuinkjtsa ch'án tí sín naxa kjéhya ch'án ntá k'oyán ch'án tí ch'in Egipto a.

²⁵ Kjuenkayáxin ch'án kixin tí sín naxa kjéhya ch'án, mé tí sín israelita, mé tsoñoexín sín kixin Dios mé tsichr'án tí jehe ch'án sinchekaá sín ch'án. Kjánchó tí sín a kjuátsqanhya sín.

²⁶ La ntá í jnko yaon tí ch'in Moisés k'uikon ch'án kixin yaá sín israelita tjanjonko kichó sín. La ntá tjinkaon ch'án chrókjuí'oxin ch'án kixin chrokjuanjonhya sín. La ntácho ch'án kixin: "Jahará jnkokoá kichuará la, ¿nkekuenté tjánjonrá?"

²⁷ A ntá tí nkexro ch'óna tí jje mé kónínkaon ch'án la kótéka ch'án tí ch'in Moisés. Ntá ntácho ch'án kixin: "¿Nkexro kjuanjon kjuachaxin kixin jaha k'óna juez kuenténi?"

²⁸ ¿Á tjínkáván ts'oyánni kjaxinni éxi k'oyán tí ch'in Egipto ijna ní?"

²⁹ A ntá kuínhin tí ch'in Moisés tíha ntá tjoka sákjuí ch'án. Sákjuí ch'án tí nación Madián ntá ntiha kjuák'e ch'án éxi ijnko chojni tsíkjixín ókjé. Ntá ntaha tsíkótehe ch'án la ko kjuích'ena ch'án yaá xjan ntoa.

³⁰ Na ntá k'uaátsínka cuarenta nánó ntá tí nteje chjino jna it'in Sinai mé xrínahya k'uikon ch'án ijnko ángel tjenkákjan tí xrohi chríkjan tí ntayoa tjeche.

³¹ Ntá tí ch'ín Moisés la chrakon ch'án k'ín xikaha k'uikon ch'án la ntá kóchjinehe ch'án k'ín chrótsjehe ch'án la ntá kuínhin ch'án itén Ìnchéni ntáchro k'ín:

³² “Janhan mé Dios tinkáchónki tí sín tsík'axrjenixian mé Abraham, la ko Isaac, la ko Jacob,” mé xikaha ichro Dios. Ntá tí ch'ín Moisés la kjuank'ín chrakon ch'án la síx'ránka ch'án ntá í tjinkakonhya ch'án tsotsjehe ch'án.

³³ Na ntá ntáchro Ìnchéni k'ín: “Takítsje tokatá k'ín tí nonte tinkatja la nonte tjóá chóntahya jie.

³⁴ Ó k'uikuan k'ín tí sín kuéntana mé imá tjejtjasóte sín nació n Egipto. La ó kuínhan k'ín t'èya sín. La ntá ije ó k'uinka k'ín tsjínkítsa sín. Méxra xrákía jaha tsétuanhan jaha sátsjia nació n Egipto,”[†] ichro Dios.

³⁵ Tí sín israelita mé kjuanoá sín tí ch'ín Moisés. Tsintáchro sín k'ín: “¿Nkexo kjuanjón kjuachaxin k'ín jaha k'óna juez?” ichro sín. Kjánchó Dios ichr'án ch'án tí ch'ín Moisés k'ín ts'etoan ch'án la ko sinchekaá ch'án tí sín israelita kjuachaxin tí ángel k'uikon ch'án chríkjan tí nta.

³⁶ Ntá tí ch'ín Moisés kuakitsjexin ch'án Egipto tí sín tsík'axrjenixinni ósé. La imá itsjé kjuaxroan kjuasin ch'án la itsjé kjuakoxin ch'án tí nació n Egipto, la ko tí Ntayaon Kjátse, la ko tí nteje k'ujáji sín cuarenta nánó.

³⁷ Jehé tí ch'ín Moisés a mé chénka tí sín israelita k'ín: “Dios mé tsochr'án ijnko chojni tsonixja itén Dios ts'axrjenixin tí sín k'íchuará éxi ichr'án ch'án tí janhan. Títekákonhé nra tí jehe ch'án.”[‡]

³⁸ Tí ch'ín Moisés mé kjuák'eko ch'án tí chojni tí k'uejó sín tí nteje. Nta ijnko ángel mé nixjehe ch'án tí jna Sinai la ko tí sín k'uaxrjenixinni mé k'uaýéhe sín tí tan tjanjon kjuachón, ntá tí tan mé k'uaátsínka tí jeheni ije.

³⁹ A ntá tí sín k'uaxrjenixinni ósé mé tjinkakonhya sín k'ín chrókuitekaon sín la kjuanoá sín tí ch'ín Moisés la ko tjinkaon inaá chrókjan sín nació n Egipto.

⁴⁰ A ntá ntáche sín ch'ín Aarón k'ín: “Tjinkaonni sích'èna ijnko dios k'ín tsinkáchónkini k'ín í noehyani nkehe kónhen tí ch'ín Moisés, tí nkexo kjuínkítsa k'uaxrjenixinni nació n Egipto.”[§]

⁴¹ Ntá kjuínchekjanoya sín ijnko koxintáxjan la ntá k'oyán sín iko kjókehe tí nkehe tsíkjanoya a la imá kóchéhe sín k'uikon sín tí nkehe tsík'ónaxin tja chojni.

⁴² A ntá Dios mé kuitóhe tí jehe sín k'ín tsinkáchónki sín tí konotsé siín nkajní. Tíhi mé tsíkjin ijnko nkexo k'uechrónka itén Dios ntáchro xíkíhi: Jahará chojni Israel, ¿á k'oyánra tí iko kjókanará tí janhan tí cuarenta nánó k'uejorá nteje ní?

⁴³ Kja náhi, jehó tí nkehe kjuich'énará mé kjókehérá tí ko a. Kjuikoará tí njnkoje tí dios Moloc la ko kjaxin kjuikoará tí konotsé kuénte dios Renfán.

A ntá tí nkehe tsík'ich'énará jahará mé xráxinkákonxínra éxi Dios kuéntará.

Méxra janhan tsakítsjexínra tí tjejorá la tsétuanhánra sátsjirá chjasin Babilonia.* Mé xikaha ntáchro Dios ósé.

⁴⁴ Naxa k'uejó tí sín k'uaxrjenixinni tí nteje la chóna sín ijnko njnko kamantá chóna tí ley tsík'etoan Dios. Tíhi kjuich'èna sín éxi tsík'etuenhen Dios tí ch'ín Moisés k'ín sích'èna ch'án káin nkehe k'uikon ch'án.

⁴⁵ Ntá tí sín tsík'axrjenixinni mé k'uaýéhe sín tí njnko kujtonhen sín. Ntá tí sín kjuikao ch'ín Josué mé kjuikao sín tí njnko tió kjuacha sín k'uaýéhe sín í jnko nonte kuénte í so chojni kuakitsje Dios, k'ín ts'áyéhe tí jehe sín. Mé xikaha kónhen hasta tí yaon kjuank'ín k'uetóan ch'ín David.

⁴⁶ Imá kjuíncheyaon Dios tí ch'ín rey David la ntá tí ch'ín David mé tjinkaon ch'án sích'èna ch'án ijnko njnko kuénte Dios mé tí Dios k'uekinkáchónki ch'ín Jacob.

⁴⁷ Kjánchó jehe ch'án kjuich'ènahya ch'án tí njnko a. Tí ch'ín Salomón mé kjuich'èna.

⁴⁸ Kjánchó Dios nkaya nkajní chroya tsjak'exenhen ijnko nchia tsík'ich'énaxin chojni itja. Ntáchro ijnko ch'ín nixja itén Dios k'ín:

⁴⁹ Janhan Dios nkaya nkajní itjén tétóanxián ntá chjasintajni tjejen totená.

¿Xá nkexéhe tí nchia chrók'juich'énará?

¿Xá nketí chrók'juak'é chrók'ók'ánaxián?

⁵⁰ ¿Xá jehya tjaná kjuit'ánaxián káin tí nkehe ní?[†]

Mé xikaha ichro Dios.

[†] 7:34 7.30-34 Éxodo 3.1-10

[‡] 7:37 Deuteronomio 18.15,18

[§] 7:40 Éxodo 32.1

* 7:43 7.42-43 Amós 5.25-27

[†] 7:50 7.49-50 Isaias 66.1-2

⁵¹ A ntá jahará la icha asánrâ xrâxín títékákonhyará. Jahará tinhínrâ kjánchó ich'erá éxí chojni chónhya Dios. Xrâxín tjánjonkoará Nchakuen Dios. Jahará mé tóyohará tí sín tsík'axrjenínxínrâ ósé.

⁵² Tí sín tsík'axrjenínxínrâ kjuínchekjasóte kaín tí sín tsíchronka itén Dios. K'óyán sín tí sín k'uechrónka kixin itsi tí nkexro chóntahya jje. A ntá ó kui tí nkexro a ntá jahará kjuínchekjirá ch'án ntá k'óyán sín ch'án.

⁵³ Jahará k'uayéhérâ tí nkehe k'uetōan Dios senó, mé tí nkehe chrónka tí ángel, la kjónté xikaha kuítékákonhyará —ichro ch'in Esteban.

Ik'uén ch'in Esteban

⁵⁴ Ntá tí kuínhin tí jehe sín tí nkehe ntáchro tí ch'in Esteban ntá imâ kónínkaon sín la netaón neno sín kixin nínkakonhen sín ch'án.

⁵⁵ A ntá ch'in Esteban antsí chóna ch'án Nchakuen Dios la konta ch'án nkajní k'uíkon ch'án kjuachaxién Dios la ko k'uíkon ch'án kixin ch'in Jesús tjexín toté ch'án nángo tja chjina Dios.

⁵⁶ Ntá ntáchro ch'in Esteban kixin:

—Tsjehérâ kixin k'uíkuan kixin xitjehē nkajní la ntaha itjen tí Xjeen Dios K'óna Chojni nángo tja chjina Dios.

⁵⁷ A ntá jehe sín la k'uíkjehe sín ntatsjon sín la itsen k'uixité sín ntá sákjuí sín k'uixitja sín ch'án

⁵⁸ sákjuíko sín ch'án ikon chjasin ntá ixro chjéhe sín ch'án. La tí sín tjanchia jje mé kuakitsje sín iké sín la k'uejo sín toté ijnko ch'in ntasoá it'in Saulo kixin ts'ayakonhen ch'án tí ka a.

⁵⁹ La it'e sín xro ntá ch'in Esteban mé chrónóehē ch'án Închéni la ntáchro ch'án kixin:

—Închéni Jesús takjá nchakuenâ.

⁶⁰ Ntá tuénxín kjuák'exín toh'in ch'án la k'uèya ch'án itsen ntáchro ch'án kixin:

—Închéni jaha mé tahya kuentá tí jje kjuasin sín.

Mé xikaha ichro ch'án ntá ik'uén ch'án.

8

Ch'in Saulo chrók'óyán ch'án tí sín tinkáchónki Jesús

¹ La tí ch'in Saulo mé jnkokón kjuenkayáxinko ch'án tí sín k'óyán tí ch'in Esteban.

A ntá tí yaon a na mé kjuankixin sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankixin tinkáchónki Cristo mé xikayehe sín sákjuí sín nkuixín estado Judea la ko estado Samaria. A ntá jehó tí sín tsíkjeýâ Jesús mé kuítóhe sín ntiha.

² Na iso sín imâ tinkáchónki Dios mé kjuavâ sín ch'in Esteban la ko tsjánkama sín ch'án la ko t'avéhe sín ch'án.

³ A ntá tí ch'in Saulo la kjuankixin kónínkakonhen ch'án tí sín tinkáchónki Cristo. K'uixenhen ch'án jnkoinko jnkoinko ntōe sín la itsé ch'án tí sín ntoa la ko tí chojni chjin. La ntá kuínkánkajen ch'án sín sákjuíko ch'án sín kixin ts'ejóchjina sín.

Kjuako sín itan jina tí estado Samaria

⁴ A ntá tí sín sákjuíxin chjasin Jerusalén mé xritjako sín nkexrí tí tan tsaáxinni nkuixín tí sákjuí sín.

⁵ La ijnko ch'in it'in Felipe mé sákjuí ch'án ijnko chjasin estado Samaria la kjuankixin ch'án chrónka ch'án itan kuènte Cristo.

⁶ Na ntá nchónhya chojni kójnkotsé ntiha la kaín sín kuínhin sín jina tí nkehe ntáchro ch'in Felipe kixin ó k'uíkon sín tí kjuaxroan kjuakoxín ch'án.

⁷ Itsjé chojni chóna nchakuen tí jínahya mé kuítóhe sín jina la tí nchakuen tí jínahya k'óyako k'uaxrxjén tí jehe sín. La nchónhya tí sín chóna chin xitjahya itji la ko tí sín sixénkâ toté mé kuítóhe sín jina.

⁸ A ntá imâ kóchéhe kaín tí sín siín chjasin ntiha.

⁹ Tí chjasin a mé kjuák'e ijnko ch'in it'in Simón mé ijnko ch'in ósé mé k'uékjinchexroan ch'án. K'uékjich'iyehē ch'án tí sín estado Samaria ntáchro ch'án kixin ijnko chojni imâ tjetoan tí jehe ch'án.

¹⁰ La kaín tí sín ntiha k'uejó sín kuínhin sín jina, mé tí chánjan ntsínsi hasta tí chojni imâ táda la k'uéntáchro sín kixin:

—Tí ch'in i imâ chóna ch'án tí kjuachaxin kuènte Dios —ichro sín.

¹¹ K'uékitekakonhen sín ch'án kixin k'uékjinchexroan ch'án k'uékjich'iyexín ch'án sín itsjé nánó.

¹² Ntá tió kuítekaon sín tí tan jina kjuako ch'in Felipe kuènte tí kjuachaxin kuènte Dios la ko Jesucristo la ntá chojni ntoa la ko chojni chjin mé kuíkite sín.

¹³ A ntá kjaxin tí ch'ín Simón, mé kuítekaon ch'án la kuíkite ch'án, koí ch'án. Ntá kjuankixin k'uájiko ch'án tí ch'ín Felipe la imá chrakon ch'án kixin k'uíkon ch'án tí kjuaxroan jié kjuasin tí ch'ín Felipe.

¹⁴ A ntá tí sín apóstol, mé tí sín tsíkitohe chjasin Jerusalén, kuínhin sín kixin itsjé tí sín estado Samaria ó kuítekaon sín itén Dios. Ntá k'uetuenhen sín ch'ín Pedro la ko ch'ín Juan sátsji sín ntiha.

¹⁵ Ntá tió kjuíji sín ntá kjuanchehe sín Dios kixin tí sín ntiha tinkáchónki Cristo chrók'uáyéhe sín Nchakuen Dios

¹⁶ kixin nijnko tí jehe sín ntiha naxa tsík'áyèhya sín Nchakuen Dios. Jehó tsíkikitexín sín ihnié Ìnchéni Jesús.

¹⁷ Ntá tí ch'ín Pedro la ko tí ch'ín Juan mé k'uejotja itja sín chrítaón kja tí sín a la ntá ó k'uáyéhe sín Nchakuen Dios.

¹⁸ Na ntá tí ch'ín Simón mé k'uíkon ch'án kixin tí sín apóstol k'uejotja itja sín chrítaón kja tí sín a ntá k'uáyéhe tí sín a Nchakuen Dios. La ntá xróxin ch'án chichaon

¹⁹ la ntáchro ch'án kixin:

—Chjehéni jeheni tí kjuachaxin kixin kjaxin jeheni chrókjuak'etja itjani chrítaón ikja jnkojín chojni ntá chrók'uáyéhe sín Nchakuen Dios —ichro ch'án.

²⁰ Ntá ntáchro ch'ín Pedro kixin:

—Jaha la ko tí ch'íchakoán ts'itjáyankõa kixin tjenkayáxian kixin chrók'uèna tí kjuachaxin kuènte Dios.

²¹ Jaha chontahya kjuachaxin ts'ixènhén tí xra a kixin ó nohe Dios kixin jaha la tjuáhya asán.

²² Méxra tsjtohé tí ijjá la chrónóhé Dios kixin ách'e tsjakjìnhan ch'án tí jié tjenkayáxian.

²³ Ó t'íkuan kixin imá chjìnxínhin asán la ko nchónhya jié chonta —ichro ch'ín Pedro.

²⁴ La ntá ch'ín Simón kjuátehe ch'án ntáchro ch'án kixin:

—Nixjehérá Ìnchéni kixin tí janhan kixin chrókónmahya tí janhan éxí tí ntáchrórá —ichro ch'án.

²⁵ Ntá kjuixin chrónka tí sín apóstol tí tan kuènte Dios ntiha ntá sákjuí sín kjuako sín tí tan tsjanjon kjuachón nchónhya tí chjasin ntsíntí estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkixin nación Etiopía

²⁶ A ntá kjuixin tíha ntá ijnko ángel kuènte Ìnchéni mé ntáche tí ch'ín Felipe kixin:

—T'ínkatjen sátsjia nó sur tsoxeta tí ntja t'ínkajjìnxin chjasin Jerusalén hasta chjasin Gaza —ichro tí ch'ín ángel.

Na ntá tí ntja a mé ijnko ntja t'atsínka nó nteje.

²⁷ Na ntá tí ch'ín Felipe k'uínkatjen sákjuí tí ntja. La ntiha xrinahya xeta ch'án ijnko chojni tsíkixin nó nación Etiopía. Jehe ch'án mé ijnko chojni eunuco mé tja ch'án síin ch'íchakõen tí tjan reina Candace t'etuenhen tí nación Etiopía. Jehe ch'án sátskijí ch'án chjasin Jerusalén xraxinkakonxín ch'án Dios.

²⁸ A ntá tí ch'ín a la xikjan ch'án inaá chjasén ch'án. Kjuak'exenhen ch'án ijnko carro la tjenchekuáxin ch'án ijnko xroon tsíkjin ch'ín Isaías, ijnko nkexro k'u'échrónka itén Dios.

²⁹ La ntá tí Nchakuen Dios mé k'uetuenhen tí ch'ín Felipe ntáchro kixin:

—Sátsjia tóchjina antsí tí tjen tí carro.

³⁰ Ntá kóchjinehe tí ch'ín Felipe tí tjen tí carro a, la ntá kuínhin ch'án kixin tjenchekuáxin tí ch'ín a tí xroon tsíkjin ch'ín Isaías. La ntá kjuanchankíhi ch'án kixin:

—¿Á tiénxian tí nkehe tjenchekuáxian méhe?

³¹ La ntá kjuátehe tí ch'ín a ntáchro ch'án kixin:

—¿Nkexrí chrókuiánxian kixin kohya nkexro tsjinkítsana tsochrónkaxín nkexrí t'axrjexín tíha? —ichro ch'án.

Ntá kjuanchia ch'án kixin tí ch'ín Felipe ts'it'ótjen la tsjak'etjajxin chjinaxón tí tjen ch'án.

³² Na tí xroon itén Dios tjenchekuáxin ch'án mé tíhi:

Jehe ch'án mé sákjuíko sín éxí ijnko kolélo kjuíko sín ts'óyán sín.

La éxí ijnko kolélo tsjánkahya tió kjínhin sín kaxrèe va

mé xíkaha jehe ch'án ninkehó xítjeehya ir'va ch'án.

³³ K'uíkon sín ch'án éxí ijnko chojni chónka jié la ntoáhya kjuínchekjasóte sín ch'án.

Kohya nkexro tsjacha tsochrónka kuènte tí sín chrók'uaxrjénixin ch'án

kixin jehe ch'án la k'uénxín ch'án chjasintajni.*

Mé xíkaha chrónka tí xroon itén Dios.

³⁴ A ntá tí ch'ín eunuco mé kjuanchankíhi ch'án tí ch'ín Felipe ntáchro ch'án kixin:

* 8:33 8.32-33 Isaías 53.7-8

—Tsotsenkávan chrónka nkexro tsonhen tíha. ¿Á jehe ch'án tsonhen tíha ó á ókjé nkexro ní? —mé xíkaha kjuanchankí ch'án.

³⁵ La ntá tí ch'ín Felipe kjuankíxin chrónka ch'án kuènte tí nkehe tjenchekuáxin tí ch'ín a la chrónka ch'án tí tan jína kuènte Jesús.

³⁶ A ntá xrínahya kjuíji sín tí tjía ntá, ntá ntáchro tí ch'ín eunuco kíxin:

—Tsjehé tjía ntá. ¿Á xitjahya chrókuíkítana? —ichro ch'án.

³⁷ Na ntá ntáchro tí ch'ín Felipe kíxin:

—Tí kuítekávan kaín asán la kjá jína tsikitia.

La ntá kjuátehe tí ch'ín a, ntáchro ch'án kíxin:

—Títekávan kíxin tí Jesucristo la Xjeen Dios —ichro ch'án.

³⁸ La ntá tí ch'ín tsíkíxin Etiopía a k'ueṭoan ch'án tsochónhen tí carro a la ntá yóí sín mé tí ch'ín Felipe la ko tí ch'ín tsíkíxin Etiopía mé k'uínkajin sín ntá kjuíánkí sín ntá la tí ch'ín Felipe kuíkíte ch'án tí ch'ín a.

³⁹ La ntá kjuixin k'uaxrenkí sín ntá la ntá tí Nchakuen Ìnchéni sátsíkíko tí ch'ín Felipe ókjé. A ntá k'uíkonhya kíchó sín inaá. Ntá kjónté xíkaha la tí ch'ín eunuco sákjuí ch'án la antsí chéhe asén ch'án.

⁴⁰ A ntá tí ch'ín Felipe xrínahya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Ìnchéni kíxin nkexrí tsaáxin sín hasta kjuíji ch'án chjasin Cesarea a.

9

Tí nkehe kónhen ch'ín Saulo

(Hch. 22.6-16; 26.12-18)

¹ A ntá tí ch'ín Saulo la imá tjínkaon ch'án chrók'óyán ch'án tí sín tinkáchónki Ìnchéni Jesús. Méxra sákjuitsjehe ch'án tí ch'ín nchat'á t'etōan.

² Ntá kjuanchía ch'án ijnko xroon kíxin ts'áyéhe ch'án kjuachaxin kíxin sátsji ch'án tí njnko chjasin Damasco tsjeyá ch'án tí sín kuákja ntja njxin mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén.

³ La ntá kjuíji ch'án chjinaxón chjasin Damasco, a ntá xrínahya titàya ikui ijnko xrohi t'inkaséyan kuíxin nkaya nkajní k'uantatjen ch'án a.

⁴ A ntá ch'ín Saulo mé kjuítsínka ch'án nonte, a ntá kuínhin ch'án nixja ijnko nkexro kíxin: —Saulo, Saulo, ¿nkekuènte ninkákonna xritjéyá tí janhan?

⁵ A ntá ch'ín Saulo kjuanchankí ch'án kíxin:

—¿Xá nkexro jaha?

Ntá tí tan mé kjuátehe, ntáchro kíxin:

—Janhan mé Jesús, mé tí nkexro xritjéyá jaha.

⁶ T'áya sáttja. T'ixenhen tí chjasin Damasco, ntá ntiha mé tsinhín nkehe sích'e —ichro tí ch'ín Jesús a.

⁷ La ntá tí sín k'uájiko ch'ín Saulo la imá chrakon sín. Kuínhin sín tí itén tí nkexro kjánchó k'uíkonhya sín ninkexró.

⁸ La ntá tuénxín k'uàya ch'ín Saulo ntá kuakitjenkí ch'án ikon ch'án kjánchó t'ikonhya ch'án. A ntá tí sín xriko ch'án tinkátséhe sín itja ch'án sákjuíko sín ch'án chjasin Damasco.

⁹ A ntá ntiha kjuák'e ch'án la iní yaon k'uíkonhya ch'án la ko kjaxin kjónehya ch'án la ko ninkehó k'uíhya ch'án.

¹⁰ A ntá chjasin Damasco mé kjuák'e ijnko ch'ín tinkáchónki Ìnchéni it'in Ananías. La ntá titàya k'uikuèn ch'án Ìnchéni ntáchro kíxin:

—Ananías.

A ntá ch'ín Ananías mé kjuátehe ch'án kíxin:

—Ntíhi tjenni, Ìnchéni.

¹¹ Ntá ntáchro Ìnchéni kíxin:

—T'inkatjen sáttja tí ntja it'in Ntja Ntoí. Ntá tió tsjasán ntōe ch'ín Judas tjanchankíhí sín á ntahya itjen ijnko ch'ín tsíkíxin chjasin Tarso me it'in ch'án Saulo. Jehe ch'án mé tjechrónóna ch'án.

¹² A ntá titàya k'uikuèn ch'án kíxin tsjiji ijnko ch'ín it'in Ananías ts'ixenhen ch'án tsjak'etja tjá ch'án chrítaón kja tí jehe ch'án kíxin xik'íkon ch'án inaá —ichro Ìnchéni.

¹³ Ntá kuínhin ch'ín Ananías tíha ntá ntáchro ch'án kíxin:

—Ìnchéni náhí, tsjihyani kíxin ó kuínhinni chrónka nchónhya chojni kíxin nkexrí xéhe tí ch'ín a. Imá tsjé nkehe jehya jína kjuích'ehe ch'án tí sín kuítekaon tí jaha chjasin Jerusalén.

¹⁴ A ntá jie la ó kjuí ch'án ntíhi kíxin tsík'áyéhe ch'án kjuachaxin kuènte nchat'á t'etōan kíxin tsotsé ch'án kaín tí sín tinkáchónki ihnjá.

¹⁵ Kjánchó Ìnchéni ntáchro kixin:

—Sátjia. Janhan kjuéyá tí ch'ín a kixin tsjako ch'án tanná. Tsjakohe ch'án tí sín ókjé nación la ko tí sín rey la ko kjaxin tí sín israelita.

¹⁶ Janhan tsjakohe ch'án kixin nchónhya tsjasóte ch'án kixin tsinkáchónkina ch'án.

¹⁷ A ntá ch'ín Ananías sákjuí ch'án tí nchia itjen ch'ín Saulo la ntá k'uixenhen ch'án. La ntá kjuak'etja tja ch'án chrítaón ikja tí ch'ín Saulo la ntáchro ch'án kixin:

—Kíhóni Saulo, Ìnchéni Jesús, tí nkexro k'uikuan tí ntja k'uinkaxian, mé k'uetuanna kjuíha kixin sintak'ikuan inaá la ko ts'ayéhé Nchakuen ch'án —ichro tí ch'ín Ananías a.

¹⁸ Ntá tuénxín k'uanotjexin ikon ch'ín Saulo ijnko nkehe éxi kjoé koche xíkaha. Ntá xík'ikon ch'án inaá. La ntá k'uínkatjen ch'án la ko kuíkite ch'án.

¹⁹ La ntá chr'éxin ntá kjóne ch'án la ntá ikjan asén ch'án inaá. Ntá kuítóhe ch'án iso yaon k'uejóko ch'án tí sín tinkáchónki Ìnchéni chjasin Damasco.

Kjuako ch'ín Saulo chjasin Damasco

²⁰ Na ntá kjuankixin ch'ín Saulo kjuakoxin ch'án iso núnko Israel kixin Jesús mé Xjeen Dios.

²¹ La kaín tí sín tjejótinhin imá chrakon sín la ntáchro sín kixin:

—¿Á Jehya tí ch'ín i tjinkaon sinchek'itjáyan ch'án kaín tí chojni tinkáchónki Jesús chjasin Jerusalén? ¿Á Jehya tí xra a kjuixin ch'án ntihi kixin tsotsé ch'án sín la sátsjiko ch'án sín tí tjejó tí sín ncha'tá t'etqan? —ichro sín.

²² Kjánchó antsí má fuerte kjuako ch'ín Saulo kixin chaxín tí ch'ín Jesús mé tí Cristo. La tí sín judío k'uejó chjasin Damasco kjuachahya kjuachaxin sín ch'án.

Kjuachahya tí sín judío chrótsé sín tí ch'ín Saulo

²³ Na ntá ó k'uátsínka nchónhya yaon ntá tí sín judío kjuenkayáxin sín nkexrí chrók'óyán sín tí ch'ín Saulo.

²⁴ A ntá ó kuínhin ch'án nkehe kjuenkayáxin sín. A ntá nchakotjin la ko tie tjejóchónhen tí sín chrók'óyán tí jehe ch'án tí ntója ts'axrxén ch'án chjasin.

²⁵ A ntá tí sín tinkáchónki Ìnchéni mé kjuak'enkaya sín tí ch'ín Saulo ijnko ntaxra jié ijnko tie. Ntá kjuinkajinxin sín tí ntaxra tjenkaya tí ch'ín Saulo nóton tí tja't'o tsik'antatjen tí chjasin a. Ntá kuaá ch'án.

Ch'ín Saulo sákjuí chjasin Jerusalén

²⁶ Ntá tí kjuíji ch'ín Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Ìnchéni. Kjánchó kaín sín chrakonhen sín ch'án kixin kuítekakonhya sín kixin á chrókóchaxín kjaxin ch'án tinkáchónki ch'án Ìnchéni.

²⁷ A ntá ch'ín Bernabé mé sákjuíko ch'án tí ch'ín Saulo tí tjejó tí sín apóstol la ntá chrónka ch'án kixin ch'ín Saulo mé tsík'ikon ch'án Ìnchéni tí ntja sákjuí ch'án ntá Ìnchéni mé nixjehe ch'án. Méxra chjasin Damasco k'uekjako ch'án ihníé Ìnchéni la chrakonhya ch'án.

²⁸ Méxra ch'ín Saulo kuítóhe ch'án chjasin Jerusalén la ko k'uájiko ch'án tí sín a. La chrakonhya ch'án kjuako ch'án kjuachaxién ihníé Ìnchéni Jesús.

²⁹ La ikjo ch'án tí sín judío nixja nkiva griego. A ntá jehe sín la tjinkaon sín chrók'óyán sín tí jehe ch'án.

³⁰ A ntá tí sín kíchó ní tinkáchónki Cristo mé tsíkinhin sín nkehe chrókónhen ch'án la ntá sákjuíko sín ch'án tí chjasin Cesarea la k'uetuénhen sín ch'án sátsji ch'án chjasin Tarso.

³¹ Na ntá tí sín tinkáchónki Ìnchéni kuenté estado Judea, la ko estado Galilea, la ko estado Samaria la kjuaxróxin k'uejó sín la antsí má tinkáchónki sín Ìnchéni. K'uechóna sín kjuasáyé Ìnchéni la ko tí Nchakuen Dios kjuínkítsa sín la ntá antsí má sitinkákótsjé sín.

Ch'ín Eneas kuítóhe ch'án jina

³² Na ntá tí ch'ín Pedro xrisjehe ch'án kaín tí sín tinkáchónki Ìnchéni. Kjaxin sákjuítsjehe ch'án tí sín kíchó ní tjejó chjasin Lida.

³³ Ntiha mé k'uitja ch'án ijnko ch'ín it'in Eneas. Ijní nánó tjetsinkaták'á ch'án cama kixin tsík'en toté ch'án.

³⁴ Na ntá ntáchro ch'ín Pedro kixin:

—Eneas, Jesucristo mé sintakitoha jina ijie. T'inkatjen tjatsiyan camá —ichro ch'án.

Na ntá ch'ín Eneas tuénxín k'uínkatjen ch'án.

³⁵ La kaín tí sín sín chjasin Lida la ko chjasin Sarón k'uíkon sín kixin kuítóhe ch'án jina la ntá kjaxin sín kuinkáchónki sín Ìnchéni.

³⁶ A ntá tí yaon a mé kjuák'e ijnko tjan chjasin Jope tinkáchónki tjan Ìnchéni mé it'in tjan Tabita. Ntá nkíva griego la mé t'axrjexín kixin Dorcas. A ntá tí tjan a mé jína kjuích'e tjan tí k'uékjak'e tjan la kjuínkítsa tjan tí chojni nòa.

³⁷ Ntá ijnko yaon imá kóníhi tjan ntá ik'uén tjan. La ntá kjuínchek'ónti sín cuérpogé tjan la ntá tí yóxin piso noi kjuák'e sín tjan.

³⁸ Tí chjasin Jope mé chjino tí chjasin Lida la mé ntiha kjuák'e ch'in Pedro. A ntá tí sín tinkáchónki Ìnchéni mé nohe sín kixin ntiha tjen ch'án. Ntá ichr'án sín iyó chojni tsonátche sín ch'án kixin tjoka itsji ch'án í sinchexrjenhya ch'án, tsixro sín.

³⁹ Na ntá sákjuiko sín ch'in Pedro. Ntá kjuíji sín ntiha ntá tuénxín sákjuiko sín ch'án tí tjen tí cuérpogé tí tjan tsík'en. La ntaha tjejó kaín chojni chjin k'án imá tsjánka sín. La kjuako sín tí iké sín tsíkjon tí tjan Dorcas tí naxa kjuák'e tjan.

⁴⁰ A ntá k'uetqan ch'in Pedro kixin kaín sín ts'axrje sín ntója. Na ntá kjuák'exín toch'in ch'án nixjehe ch'án Dios. Ntá komá ch'án tí tjan tsík'en ntá ntáχρο ch'án kixin:

—Tabita, t'aya.

Ntá kuakitjenkí tjan ikon tjan ntá k'uíxon tjan kixin ntaha itjen ch'in Pedro ntá k'uàya tjan, kjuák'etjaxin tjan.

⁴¹ A ntá itsé ch'án itja tjan la k'uínkatjen tjan. La ntá k'uíyehé ch'án kaín tí sín tinkáchónki Ìnchéni la ko kjaxin kaín chojni chjin k'án kixin ntá ts'ikon sín kixin ó xíxechón tjan.

⁴² Na ntá kaín sín siín chjasin Jope mé kónohe sín tí kjuaxroan kjuích'e ch'in Pedro ntá itsjé sín kuínkáchónki Ìnchéni.

⁴³ A ntá ch'in Pedro kuítóhe ch'án itsjé yaon tí chjasin a la kjuák'e ch'án ntqe ch'in Simón, ijnko ch'in nchentá tjeó iko.

10

Ch'in Pedro la ko ch'in Cornelio

¹ Chjasin Cesarea kjuák'e ijnko ch'in it'in ch'án Cornelio. Jehe ch'án mé capitán k'uetuenhen tí sín soldado italiano.

² Tí ch'in a la imá jína ch'án la kaín tí sín kjéhya ch'án mé imá xraxinkaon sín Dios. Kjaxin kjuanjon ch'án nchónhya chichaon kixin tjinkaon ch'án tsjinkítsa tí sín judío la ko xráxin nixjehe ch'án Dios.

³ La ntá ijnko yaon las tres kónjín titàya k'uíkuèn ch'án ijnko ángel kuénte Dios k'uixenhen tí tjen ch'án ntáχρο kixin:

—Cornelio.

⁴ A ntá tí ch'in Cornelio komá ch'án tí ángel la chrakon ch'án kjuanchankíhi ch'án kixin:

—¿Nkehe tjinkávan jaha? —ichro ch'án.

Ntá ntáχρο tí ángel kixin:

—Dios kóxrjínhin kixin tí nixjehé ch'án la ko tí jína ch'e tjínkítsa tí sín nòa.

⁵ Ntá jaha tétuenhén jnkojín chojni sátsji chjasin Jope kixin tsjikakjín sín ch'in Simón kjaxin it'in ch'án Pedro.

⁶ Itjen ch'án ntqe ijnko ch'in kjaxin it'in Simón. Tí ch'in a mé nchentá tjeó iko. Mé tjen ntqe ch'án chjinaxón tí ntayaon a.

⁷ Ntá tió sákjuj tí ángel nixjehe ch'in Cornelio la ntá jehe ch'án k'uíyehé ch'án yaá sín ch'ehe ch'án xra la ko ijnko ch'án soldado kjaxin xraxinkaon Dios, la chónetehe sín kjuasáya kichó sín.

⁸ Ntá kjuixin chénka ch'án kaín sín tí nkehe k'uíkon ch'án ntá k'uetuenhen ch'án sín sátsji sín chjasin Jope.

⁹ Jnko yaon chr'éxin chjina chonkixin tjejóyá sín ntja chjino chjasin Jope ntá ch'in Pedro mé k'uit'ójen ch'án chrítaón nchia kixin ntaha nixjexín ch'án Dios.

¹⁰ Ntá imá k'uén ch'án kjinta la tjinkaon ch'án chrókjone ch'án. Nachrohe tsochján tí nkehe sine ch'án la ntá titàya k'uíkuèn ch'án nkehe

¹¹ mé k'uíkon ch'án kixin xitjehe nkaya nkajní ntá ntiha k'uínkajinxin ijnko ka jié. Kanoé punté tí ka tjejóte.

¹² Tí nkaxenhen tí ka a tjinká ko noó toté la ko konche la ko kaín ko xritjaká.

¹³ Ntá kuínhin ch'án nixja ijnko nkexro ntáχρο ch'án kixin:

—Pedro, t'aya, t'oyán tí ko a ntá inte.

¹⁴ Ntá ch'in Pedro kjuátqhe ch'án kixin:

—Náhi, Ìnchéni. Nunca nehyani tí nkehe tjuáhya.

¹⁵ Ntá kjuátqhe tí tan inaá ntáχρο kixin:

—Tí nkehe ó kjuínchetjóá Dios. La ntáχροhya kixin tjuáhya —ichro ch'án.

¹⁶ Xíkaha kónhen iní veces ntá tuénxín sákjuj tí ka nkaya nkajní.

¹⁷ Ntá ch'ín Pedro naxa tjenkayáxin ch'án nkehe t'axrjexín tí k'uíkon ch'án la xríngahya ó kui tí sín ichr'án ch'ín Cornelio ntója nchia. Ó tsíkjančhankí sín nketí tjen ntqe ch'ín Simón.

¹⁸ Ntá kjuanchankí sín itsen kixin:

—¿Á ntihi tjen ch'ín Simón kjaxin it'in ch'án Pedro?

¹⁹ Naxa tjenkayáxin tí ch'ín Pedro tí nkehe k'uíkon ch'án ntá Nchakuen Dios chrónka kixin: —Tsjehe ó kui ini sín xritjeyá tí jaha.

²⁰ T'áya t'inkajián sátijskóa tí sín a. Tóxakuanhya jaha, janhan mé kuétuñhan sín ikui sín —ichro Nchakuen Dios.

²¹ Ntá k'uínkajin tí ch'ín Pedro tí tjejó tí sín a ntá ntáchro ch'án kixin:

—Janhan tí nkexro xritjeyará. ¿Nkehe tí tsonhen tjínkaonrá?

²² Ntá kjuátehe sín ntáchro sín kixin:

—K'uetóan tí ch'ín capitán Cornelio ikuihi ntihi. Jehe ch'án me ijnko chojni imá jína la ko xraxinkaon ch'án Dios. Kain tí sín judío tjikosáyehe ch'án la ko tjeuhe sín ch'án. Ijnko ángel kuènte Dios mé nixjehe ch'án chénka ch'án kixin chrók'uíyehé ch'án tí jaha kixin chrókjuia ntqe ch'án la ntá chrókuinhin ch'án tí nkehe tsontáchrúa —mé xíkaha chrónka sín.

²³ Na ntá tí ch'ín Pedro kjuanjon kjuachaxin kixin ntahó chrók'ok'éhe sín tí tie a. Ntá kóyaon ntá sákjuiko ch'án sín. Kjaxin iso sín tinkáchónki Ìnchéni tjejó chjasin Jope mé sákjuikotoxin sín.

²⁴ Na ntá í jnko yaon a kjuíji sín chjasin Cesarea. Ntiha chónhen tí ch'ín Cornelio la ko kjaxin kain sín kjéhya ch'án la ko tí sín chóxin ch'án. K'uíyehé ch'án tí jehe sín kixin tsinhin sín.

²⁵ Ntá tió kjuíji tí ch'ín Pedro ntqe tí ch'ín Cornelio ntá k'uaxrjexín ch'án nchia nixjehe kichó sín. Ntá kjuák'exín toch'in tí ch'ín Cornelio nkayakon tí ch'ín Pedro la kjuikosáyehe ch'án.

²⁶ A ntá tí ch'ín Pedro kjuínček'inkatjen ch'án tí ch'ín a la ntáchro ch'án kixin:

—T'inkatjen. Tjak'exián totá. Janhan mé ijnko chojni éxi tí jaha.

²⁷ A ntá kjuixin ikjo sín la ntá k'uixenhen sín ntqe ch'án la ntá k'uíkon tí ch'ín Pedro kixin nchónhya chojni tsikójnkotsé ntiha.

²⁸ Ntá ntáchro ch'án kixin:

—Jahará nohará kixin tí jeheni judíoni chóntahyani kjuachaxin tsojnkotsékoni chojni ókjé la ko chóntahyani kjuachaxin ts'ixenhenni ntqe chojni ókjé. Kjánchó Dios kjuakona kixin xitjahya tsontáxrjan kixin tjuáhya nijnko chojni.

²⁹ Méxra tió k'uíyanará la tjoka k'uínka. Tjínkavan chrókónóna kixin nkekuènte k'uíyanará.

³⁰ Ntá kjuátehe ch'ín Cornelio ntáchro ch'án kixin:

—K'uátsinka tí noó yaon ntá tí hora kjuák'eni ntihi ntqeni kjónehyani la nixjeheni Dios. Ntá xríngahya k'uíkonni ijnko chojni chóna iké tjákjini.

³¹ La ntáchro ch'án kixin: “Cornelio, ó kuínhin Dios tí nkehe nixjehé ch'án la ó nohe ch'án kixin imá tjínkítsa jaha tí chojni nóa.

³² Méxra tétuñhén chojni sátsji chjasin Jope kixin tsjikakjín sín tí ch'ín Simón mé kjaxin it'in ch'án Pedro. Itjen ch'án ntqe ijnko ch'ín mé kjaxin it'in Simón nchentá ch'án tjeó iko. Chjino tí tñayaon a itjen ntqe ch'án,” ichro tí ángel.

³³ Méxra xíkaha tjoka ichr'anni sín tsíkjeyá sín tí jaha. Jína k'uínka ntqeni. Ntá ijie ó nohe Dios kixin kain ní tjínkaonni tsinhinni nkehe tí k'uetuñhan Ìnchéni tsochrónka tsinhinni.

Ch'ín Pedro kjuakohe ch'ín Cornelio ntqe ch'án

³⁴ Ntá ntáchro ch'ín Pedro kixin:

—Ijie ó t'íkuan kixin jnkokón t'ikon Dios kain xín chojni.

³⁵ Tí nkexro kain nación titekaon la chónthe kjuasáyé Dios la mé tóxrjinhin ch'án.

³⁶ Dios mé nixjehe ch'án tí sín k'uaxrjenixin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehe ch'án mé Ìnché ch'án kain nkehe.

³⁷ Jahará ó nohará jína kain tí nkehe tsikónhen nkuíxin tí tjejó tí sín judío mé kjuankixin estado Galilea tió kjuixin kjuako ch'ín Juan kixin t'ichjánxin tsikite chojni.

³⁸ Jahará ó nohará kixin Dios kjuanjon kjuachaxián ch'án la ko Nchakuen ch'án k'uáyehé tí ch'ín Jesús tí nkexro tsíkjin chjasin Nazaret. Ó nohará kixin tí ch'ín Jesús mé k'uáji ch'án ntiha la tí nkehe jína kjuích'e ch'án kixin kjuínčekitohé ch'án jína kain chojni tjasótéxin kain tí kjuachaxián tí jínahya. Mé xíkaha jína kjuích'e ch'án kixin Dios tjeko tí jehe ch'án.

³⁹ A ntá jeheni mé chaxin k'uíkonni kain tí nkehe kjuích'e tí ch'ín Jesús tí estado Judea la ko tí chjasin Jerusalén. A ntá chr'éxin kjuak'enkanı sín ch'án ijnko ntacruz la k'óyan sín ch'án.

⁴⁰ A ntá Dios kjuínchexechón ch'án tí nixin yaon la kjuanjon ch'án kjuachaxin kixin k'uíkonni ch'án inaá.

⁴¹ Jehya kixin kaín chojni chrók'uikon sín ch'án. Náhí. Jehó tí sín tsíkjeýá Dios kixin ts'ikon chaxín xechón ch'án. Jeheni kjónekoni ch'án la ko k'uíkəoni ch'án tió xixechón ch'án inaá.

⁴² K'uetəon ch'án kixin jeheni tsjakoheni chojni la tsochrónkani kixin jehe ch'án mé tí nkexro juez sinchekitəoxín ijje tí sín tjejóhón la ko tí sín ó tsík'en.

⁴³ Kaín tí sín k'uéchrónka itén Dios mé chrónka sín kixin jnkojnko tí sín tinkáchónki Jesús mé ts'óxika ch'án ijje sín —ichro ch'in Pedro.

Tí sín jehya judío k'uáyəhe sín Nchəkuen Dios

⁴⁴ Naɣə tjenixja ch'in Pedro ntá kaín tí sín tjejótinhin tí nkehe kjuako ch'án k'uáyəhe sín tí Nchəkuen Dios.

⁴⁵ Ntá tí sín judío kjuikotoxin ch'in Pedro la chrakon sín kixin Dios mé kjuanjon Nchəkuen ch'án, kjaxin k'uáyəhe tí sín jehya judío.

⁴⁶ Méxɣə kuínhin sín nixja sín jnkojnko nkiva ókjé la ko kuínhin sín tjanchehe sín Dios kjuasáya.

⁴⁷ Ntá ntáchro ch'in Pedro kixin:

—Jehe sín ó k'uáyəhe sín tí Nchəkuen Dios xikaha jeheni. Ntá chrókjuanjonni kjuachaxin kixin tsikite sín —ichro ch'án.

⁴⁸ La ntá k'uetəon ch'in Pedro kixin tsikite kaín sín kjuachaxién ihnjé Jesucristo. Ntá tí sín kuikite mé kjuanchia sín kixin chrókuitəhe tí ch'in Pedro ntiha iso yaon.

11

Nixjehé ch'in Pedro tí sín tinkáchónki Cristo chjasin Jerusalén

¹ Na ntá tí sín tsíkjeýá Ìnchéni la ko kaín tí sín tinkáchónki Ìnchéni k'uéjó estado Judea mé kuínhin sín kixin tí sín jehya judío ó tinkáchónki sín itén Dios.

² Na ntá ch'in Pedro ikjan ch'án chjasin Jerusalén. La ntá iso tí sín judío tinkáchónki sín Ìnchéni tjonta sín ch'án.

³ Kjuanchankíhi sín ch'án ntáchro sín kixin:

—¿Nkeuənté kjuítsjehé tí sín jehya judío, la ko kjóntekoa tí jehe sín? —mé xikaha kjuanchankí sín.

⁴ Ntá tí ch'in Pedro kjuankixin ch'án chrónka ch'án desde tí xrankixixin kaín nkehe tsíkónhen ch'án. Ntáchro ch'án kixin:

⁵ —Janhan mé kjuak'é chjasin Jope kjuak'énixjəhə Dios. La ntá titəya k'uíkəen ijnko ka jie k'uínkajinxin nkaya nkajní. Kanoé punté tí ka tjejóte la kjuak'e chjino tí tjén.

⁶ Ntá tsjəhə jina tí nkehe la k'uíkəun kixin tí nkaxenhen tí ka tjínkə ko noó toté la ko iko nteje la ko konche la ko iko xritjaká.

⁷ La kjaxin kuínhan itén ijnko nkexro nixjana ntáchro ch'án kixin: “Pedro, t'əya t'oyán tí ko a ntá inte.”

⁸ A ntá kjuatəhə kixin: “Náhí, Ìnchéni. Nunca nehyani tí nkehe tjuáhya.”

⁹ A ntá kjuatəhe tí tan kuixin nkaya nkajní a inaá chrónka kixin: “Tí nkehe a mé ó kjuínchetjóá Dios. La ntáchrohya kixin tjuáhya,” ichro ch'án.

¹⁰ Xikaha kónhen iní veces. Ntá sákjuj kaín tí nkehe a nkaya nkajní inaá.

¹¹ Ntá xrinəhya tuénxin kjujji iní chojni ntoa tí nchia tjejóni. Tsíkijixin sín chjasin Cesarea xritjeyá sín tí janhan.

¹² Tí Nchəkuen Dios mé k'uetəon kixin sáchrókjuikian sín la chrókóxakonahya. Kjaxin sákjuikian injon tí sín kichó ni tjejó i. Kaíni k'uixenhenni ntəe tí ch'in a.

¹³ A ntá tí ch'in ntəe ntiha mé chrónka ch'án kixin k'uikon ch'án ijnko ángel tjexín toté la nixja ntáchro kixin: “Tətuənhén chojni sátsji chjasin Jope kixin tsjakakjin sín ijnko ch'in it'in Simón la ko kjaxin it'in ch'án Pedro.

¹⁴ Jehe ch'án mé tsonixjəhə ch'án tsochrónka ch'án nkexrí tsaá jəhə la ko kaín tí sín kjəhya.”

¹⁵ Ntá kjuankixian nixjəhə sín na ntá ó kui tí Nchəkuen Dios k'uáyəhe sín éxi k'uáyəhəni tí senó a.

¹⁶ Na ntá xraxinkaonni tí nkehe k'uénixja Ìnchéni. K'uéntáchro ch'án kixin: “A ntá chaxín ch'in Juan intə ó kuikjətəxín ch'án chojni, a ntá ijje jaharə tsikitiaxín rá tí Nchəkuen Dios.”

¹⁷ Éxi xikaha jeheni tió kjuankixin kuinkáchónkini Ìnchéni Jesucristo ntá kjuanjon Dios Nchəkuen ch'án k'uáyəhəni mé xikaha ijje la kjuanjon Dios tí Nchəkuen ch'án k'uáyəhe tí jehe sín kjaxin. ¿Xá nkexro tí janhan kixin chrókjuánjenkian Dios? —ichro ch'in Pedro.

¹⁸ A ntá tí sín kichó ni tjejó chjasin Jerusalén kuínhin tí nkehe tsíkónhen ntá tání sín ntá kjuanchehe sín kjuasáyé Dios. Ntáchro sín kixin:

—Kjuanjon Dios kjuachaxin kjaxin kixin tí sín jehya judío ts'áyəhe sín kjuachaxin kixin tsinkáchónki sín Dios la ko tsjəja sín kjuachón jnkochrixin —mé xikaha ichro sín.

Tí ninko chjasin Antioquia

¹⁹ Ti kjuixin k'uen ch'in Esteban ntá kjuankixin sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaon la ko sákjuí sín chjasin Antioquía. Kjuakohe sín tí sín judío nkexrí tjen tí tan jína. A ntá tí sín jehya judío la náhi.

²⁰ A ntá í so sín tinkáchónki Ìnchéni tsíkjiixin chjasin Chipre la ko tsíkjiixin sín Cirene sákjuí sín chjasin Antioquía. Tió kjuíji sín ntiha mé kjuakohe sín tí sín jehya judío nkexrí tjen tí tan jína kuènte Ìnchéni Jesucristo.

²¹ Tí kjuachaxin kuènte Ìnchéni mé chóntha tí jehe sín; méxra nchónhya tí sín ntiha mé kuithe sín tí nkehe k'uékinkáchónki sín ntá kuítekaon sín Ìnchéni Jesús.

²² Tí sín tinkáchónki Ìnchéni chjasin Jerusalén mé kuínhin sín nkehe tsíkónhen chjasin Antioquía. Ntá ichr'án sín ch'in Bernabé sákjuí ch'án ntiha.

²³ Ntá tió kjuíji ch'án ntiha ntá k'uikon ch'án kixin Dios imá kjuínkítsa tí sín ntiha kjaxin. Ntá imá kóchéhe asén ch'án. Ntá nixjehé ch'án sín kixin kaín asén sín ts'ejó sín tsinkáchónki sín Ìnchéni.

²⁴ Ch'in Bernabé la ijnko chojni imá jína asén la antsí chóntha ch'án Nchakuen Dios la jína tinkáchónki ch'án; méxra kóchjina nchónhya sín kuínkáchónki sín Ìnchéni.

²⁵ Kjuixin tíha a ntá ch'in Bernabé sákjuí ch'án chjasin Tarso sákjuíkjevá ch'an tí ch'in Saulo.

²⁶ Ntá tió k'uitja ch'án ntá sákjuíko ch'án chjasin Antioquía. Ntá k'uejóko sín tí sín tinkáchónki Ìnchéni ntiha kuénté ijnko nánó la kjuakohe sín itsjé chojni. Ntiha chjasin Antioquía kjuankixin sín kuíkítexín sín tí sín tinkáchónki Cristo mé ihnié cristiano.

²⁷ A ntá iso sín chrónka itén Dios sákjuixin sín chjasin Jerusalén la kjuíji sín chjasin Antioquía.

²⁸ Ijnko ch'in it'in Agabo k'uínkatjen ch'án kjuák'exín toté ch'an tí tsíkójnkotsé tí sín tinkáchónki Jesús la kjuachaxién Nchakuen Dios chrónka ch'án kixin tsokjinta nkuixín ntiha. Tí nkehe chrónka ch'án mé chaxín kónhen tió kjuák'e ch'in Claudio k'uetqan ch'án.

²⁹ A ntá tí sín tinkáchónki Ìnchéni chjasin Antioquía kjuenkayáxin sín kixin jehe sín tsjinkítsa sín tí sín kíchó sín tinkáchónki Ìnchéni estado Judea. La jnkoinko sín kjuanjón sín tí nkehe chóntha sín.

³⁰ Mé xikaha kjuenájin sín chichaon sákjuíko ch'in Bernabé la ko ch'in Saulo chjéhe sín tí sín t'ayakonhen njnko estado Judea.

12

Ik'uéni ch'in Jacobo la ko kjuák'echjina ch'in Pedro

¹ A ntá tí yaon a tí ch'in rey Herodes mé ntá kjuankixin ch'án kóninkakonhen ch'án tí sín tinkáchónki Jesús.

² La k'uetqan ch'án kixin tí ch'in Jacobo ts'enixín ijnko chica espada tjate. Jehe ch'án mé kíchó ch'án tí ch'in Juan a.

³ Ntá k'uikon ch'in Herodes kixin imá kóchéhe tí sín judío kixin xikaha kónhen la ntá kjaxin itsé ch'án tí ch'in Pedro. Tíha mé kónhen tí yaon kia pascua tió kjóne sín niqtja chónthaha tí xrojan nchek'ánkí niqtja.

⁴ Kjuixin itsé ch'in Herodes tí ch'in Pedro ntá chr'áxenhén ch'án ntqechiso. Ntá ntiha mé tjejónta noó grupo soldado la mé noó soldado jnkoinko grupo. Kjuenkayáxin ch'in Herodes kixin tsjixin ts'átsínka tí kia pascua ntá sátsjiko ch'án tí ch'in Pedro tí siín tí sín israelita kixin ts'ikon kuénté chjasin ntiha kixin nkexrí its'en ch'án.

⁵ Méxra ch'in Pedro naça tjechjina ch'án la naha sínta sín ch'án, la ntá kaín tí sín tinkáchónki Ìnchéni la tjejónixjehé sín Dios kaín asén sín kixin tsjinkítsa Dios tí ch'in Pedro.

Dios kjuínkítsa ch'in Pedro k'uaxrjexín ch'án ntqechiso

⁶ Tí tie a mé kjuenkayáxin ch'in Herodes kixin tsoyaon ntá tsakitsje ch'án ch'in Pedro sátsjiko ch'án tí siín tí sín chjasin. A ntá ch'in Pedro tjejua ch'án la nánánko tí jehe ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejónta sín ntója ntqechiso.

⁷ A ntá xrínahya tuénxín ikui ijnko ángel kuènte Ìnchéni, a ntá tí nkaxenhén ntqechiso imá k'uínkaséyan ijnkóyé ntiha. Kjuak'etja itja tí ángel tí chjia ch'in Pedro kjuínchekjayehe ch'án. Ntá k'uetqan tí ángel ntáchro kixin:

—Tjoka t'áya.

La ntá tí chica cadena tjejóchróntetoxín itja ch'in Pedro mé k'uánótjen.

⁸ Ntá xik'etqan tí ángel ntáchro kixin:

—T'inkaya iká la tjanka tokatá.

Ntá kuítekaon ch'in Pedro la kjatée xik'etqan tí ángel ntáchro kixin:

—T'ítsate iká ntá chréhé sátsjini —ichro ch'án.

⁹ Ntá ch'ín Pedro chréhe ch'án iton tí ángel a ntá noehya ch'án á chaxín xikaha kónhen tí nkehe kjuich'e tí ángel o náhi. Ntáchro ch'án kixin ách'e ijnko nkehe k'uikonxón ch'án.

¹⁰ Ntá kjuixin k'uaátsínka sín tí tjejó tí soldado saxóin la kjuixin xik'atsínka sín tí tjejó tí soldado a yóxin. La ntá kjuíji sín ijnko puerta chica ijié chjinaxón ntja. La ntá tí puerta chica la jehó xitjehe. Ntá k'uaaxrje sín tjejóti sín ijnko ntja la ntá xrinahya tí ángel ó sákjuí la ntá jehó ch'ín Pedro kuitqhe ch'án.

¹¹ A ntá tí ch'ín Pedro kónohe ch'án kixin chaxín kónhen tíha. Ntá ntáchro ch'án kixin: —Ntá ó noheni kixin chaxín Inchéni tsichr'án tí ángel kuénte ch'án kixin sinchekaáni kixin ts'óyánhyani ch'ín Herodes la ko tsogenhyani kaín tí nkehe tjinkaon tí sín judío —ichro ch'án.

¹² Ntá ó nohe ch'án kaín nkehe kónhen ch'án ntá sákjuí ch'án ntqje ijnko tjan María, iné ch'ín Juan kjaxin tikítexín sín Marcos. Ntaha tsikójnksé itsjé sín tinkáchónki Inchéni tjeónixjehe sín Dios.

¹³ La ntá t'ínka ch'án tí puerta chjinaxón ntja la nixja ch'án. La ntá ijnko tjan it'in Rode k'uaaxrje tjan kjuitsjehe tjan kixin nkexro tíha.

¹⁴ A ntá tíó kjuátsqan tjan itén ch'ín Pedro ntá k'uitjáyenhen tjan kuakitjeehya tjan tí ntója a kixin imá kóchéhe tjan. Kuinká tjan sákjuíchrónka tjan kixin ntója puerta ntíha itjen ch'ín Pedro.

¹⁵ Ntá ntáchro sín kixin:

—Lqntia.

La naxa chrónka tjan kixin chaxín jehe ch'án ntá xintáchro sín kixin:

—Jehya jehe ch'án. Kjá tí xrjntqje ch'án.

¹⁶ A ntá ch'ín Pedro naxa t'ínka ch'án tí ntója puerta la ntá tíó kuakitjehe sín la k'uíkon sín ch'án ntá chrakon sín.

¹⁷ A ntá kjuaxóxin ch'ín Pedro itja ch'án kixin tsotáni sín ntá chrónka ch'án kixin Inchéni mé kuakitsjexín ch'án ntqechiso. Ntá k'uetqan ch'án ntáchro ch'án kixin:

—Chenkará ch'ín Jacobo la ko kaín kichó ni nkehe k'uaátsínka janhan —ichro ch'án ntá sákjuí ch'án ókjé.

¹⁸ Ntá tí kóyaon a imá kóxakonhen tí sín soldado a kixin noehya sín nketi sátsíkji ch'ín Pedro.

¹⁹ La ntá k'uetqan ch'ín Herodes kixin sátsjikjeyá sín ch'án, kjánchó k'uitjahya sín ch'án. A ntá tí sín soldado kuamá sín tíha ntá k'uetqan ch'ín Herodes kixin its'en sín. Na ntá kjuixin tíha ntá ch'ín Herodes k'uaaxrjexín ch'án estado Judea ntá sákjuí ch'án chjasin Cesarea la ntíha kjuák'e ch'án.

Ik'uén ch'ín Herodes

²⁰ A ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokoá kjuenkayáxin sín kixin sátsjitsjehe sín ch'án. Ntaha itjen ijnko ch'ín it'in Blasto k'uaýakonhen ch'án ntqje ch'ín Herodes ntá kjuanchehe sín ch'án kixin tsonixjayákonhen sín ch'án tí ch'ín t'etqan. Kjuanchia sín kixin chrókónínkakuenhya sín ch'ín Herodes kixin naxa tsochr'án ch'án tí nkehe sine sín kixin chjasén ch'án sitjxin tí nkehe ine sín.

²¹ Ntá ch'ín Herodes k'uiyehje ch'án sín kixin tsojnksé sín ijnko yaon. Ntá jehe ch'án k'uitsá ch'án ka náxrjón kuénte chojni t'etqan la kjuák'enkáya ch'án ijnko silla kuénte chojni t'etqan. La ntá kjuankixin ch'án nixjehe ch'án tí sín tsikójnksé.

²² A ntá tí sín a kjuankixin k'ueya sín, ntáchro sín kixin:

—Jehya chojni tjenixja. Dios tjenixja —ichro sín.

²³ A ntá tuénxin ijnko ángel kuénte Inchéni kjuíncheníhi ch'ín Herodes kixin kjuíncheyóhe ch'án asén ch'án Dios. La ntá kosintq kjóne nkaya tseje ch'án ntá k'uén ch'án.

²⁴ La ntá itsjé chojni tinkáki nhin itén Dios la nkuíxin tinkákótsjé tí sín tinkáchónki Inchéni.

²⁵ La ntá tí ch'ín Bernabé la ko tí ch'ín Saulo ó kjuixinhin sín ixra kuénte sín chjasin Jerusalén la ntá sáxíkji sín chjasin Antioquia la sákjuíko sín ch'ín Juan mé kjaxin tikítexín sín ch'án Marcos.

13

Ch'ín Saulo la ko ch'ín Bernabé sákjuíkjako sín

¹ A ntá tí nínko chjasin Antioquia la siín iso sín nixja sín itén Dios la kjuakohe sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijnko ch'ín tsik'ánkíko ch'ín Herodes tí ch'ín t'etqan estado Galilea, la ko ch'ín Saulo.

² Ijnko yaon la tjejótnksé sín xraxinkaon sín Dios la kjónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'ín Bernabé la ko ch'ín Saulo kixin ó kjuéyá sín tsjánjuan ijnko xra sich'e sín.

³ Ntá nixjehe sín Dios la kjónehya sín la ntá kjuixín ntá k'uejotja tja sín chrítaón ikja tí sín a la nixja sín jnkjokno sín kixin ó sátsji sín.

Ch'in Pablo la ko ch'in Bernabé tjako sín nonte Chipre

⁴ A ntá tí Nchakuen Dios ichr'án ch'in Bernabé la ko ch'in Saulo sákjuí sín chjasin Seleucia. Ntá ntaha k'uixenhen sín ijnko ntabárcó sákjuí sín ijnko nonte it'in Chipre.

⁵ Ntá kjuíji sín ijnko puerto it'in Salamina. Ntaha kjuakoxín sín itén Dios tí njnko kuènte tí sín judío. Kjaxín kjuíjiko sín ch'in Juan kixin tsjinkítsa ch'án.

⁶ La ntá sákjuí sín nkuixín nonte Chipre hasta kjuíji sín chjasin Pafos. Ntaha xéta sín ijnko ch'in nchexroan me ijnko ch'in judío it'in Barjesús. Jehe ch'án kjuích'ia ch'án ntáchro ch'án kixin kjaxín ch'án nixja ch'án itén Dios.

⁷ A ntá tí ch'in nchexroan a mé kjuák'eko ch'án tí ch'in gobernador Sergio Paulo. A ntá tí ch'in gobernador mé imá jína kjuenkayáxin ch'án. K'uíyehé ch'án tí ch'in Bernabé la ko tí ch'in Saulo kixin jehe ch'án tjinkaon ch'án tsinhín ch'án itén Dios.

⁸ A ntá tí ch'in nchexroan, nkíva griego mé tikjéxín sín ch'án Elimas, mé nínkakonhen ch'án tí sín tjako a kixin tjinkakonhya ch'án kixin tí ch'in t'etóan chrókuitekaon ch'án Inchéni.

⁹ A ntá tí ch'in Saulo, kjaxín tikjéxín sín ch'án Pablo, imá chóna ch'án Nchakuen Dios. La ntá komá ch'án tí ch'in nchexroan.

¹⁰ Ntáchro ch'án kixin:

—Jaha mé chojni ch'ia, jínahya, xjeen Diablo la nínkakonhén kaín nkehe jína. ¿Nkekuènte kixin ch'ena jínahya tí ntia ntoá kuènte Inchéni?

¹¹ A ntá ijie la Inchéni sintakjasótia. Tsitoha ntakótán iso yaon la ts'ikonhya tí xrohi kuènte yaon —ichro ch'in Pablo.

Ntá tuénxin tí ch'in Elimas la k'uixitie tjen ch'án. La ntá kjueyá ch'án ijnko nkexro tsínkátséhe tja ch'án sátsjiko ch'án kixin t'ikonhya ch'án.

¹² A ntá xíkaha mé k'uikon tí ch'in gobernador nkehe kónhen la ntá kjuankixin tinkáchónki ch'án Inchéni kixin k'uikon ch'án tí kjuachaxin kuènte Inchéni.

Ch'in Pablo la ko ch'in Bernabé tjejó chjasin Antioquía estado Pisidia

¹³ Ntá tí ch'in Pablo la ko tí sín xriko ch'án sákjuixin sín chjasin Pafos. K'uixenhen sín ntabárcó sákjuí sín kjuíji sín chjasin Perge estado Panflia. Ntá ntaha ch'in Juan* kuitóhe tí jehe sín ntá kjan ch'án chjasin Jerusalén.

¹⁴ Ntá sákjuixin ch'in Pablo la ko ch'in Bernabé chjasin Perge kjuíji sín chjasin Antioquía chjinaxón Pisidia. A ntá tí yaon t'ok'éhe sín ntá k'uixenhen sín tí njnko Israel na ntaha k'uejótjaxín sín.

¹⁵ Ntá kjuixin kjuínchekuáxin sín tí xroon kuènte ley la ko tí nkehe tsíkjin tí sín k'uechrónka itén Dios ntá tí sín t'etóan kuènte njnko mé k'uíyehé sín tí sín a ntá ntáchro sín kixin:

—Kíchóni tí chonta nkehe tsóchronka kixin antsí má tsóchéheni la chronka jie tsinhinni —ichro sín.

¹⁶ Ntá ch'in Pablo k'uínkatjen ntá kjuakoxín itja ch'án kixin tsotání sín. Ntá ntáchro ch'án kixin:

—Chrókuinhínra jahará chojni israelita la ko kjaxín chrókuinhínra jahará tsíkjixinra chjasin óké tí chaxín tjinkáonra nchexitexéhérá Dios.

¹⁷ Tí Dios tinkáchónki tí sín chjasin Israel mé kjueyá ch'án tí sín tsík'axrjeníxinni. Ntá chr'éxin Dios kjuanjon kjuachaxin kixin chrókótsjé tí jehe sín tí naça k'uejó sín chjasin Egipto. Éxí chojni tsíkjixin óké k'uejó sín a ntá chr'éxin ntá kjuachaxién Dios kjuínkítsa sín k'uaxrjexín sín tí nonte ntiha inaá.

¹⁸ Dios kjuínkítsa sín tí cuarenta nánó k'uejó sín tí nteje.

¹⁹ Ntá chr'éxin kjuínchek'itjáyán ch'án yato nación k'uek'ejó nonte Canaán, kixin tí sín tsík'axrjeníxinni chrók'uáyéhe tí nonte a.

²⁰ Ntá kaín sín k'uejó sín ntiha ijnko cuatrocientos cincuenta nánó. K'uek'etóan tí sín juez hasta ikjuí tí ch'in Samuel ijnko ch'in k'uechrónka itén Dios.

²¹ Ntá kjuanchia tí sín israelita ijnko ch'in rey ts'etuenhen sín. Ntá kjueyá Dios tí ch'in Saúl la k'uetóan ch'án cuarenta nánó. Jehe ch'án it'é ch'án mé ch'in Cis la k'uaxrjeníxin ch'án ch'in Benjamín.

²² Ntá chr'éxin Dios kuakitsjehe ch'in Saul tí xra kjuák'e ch'án ntá k'uáyéhe ch'in David tí xra rey. Ntá ntáchro Dios kixin: “Ó k'uitjá ch'in David, it'é ch'án mé Isai. Jehe ch'án mé ijnko chojni nchekhàna mé sinchexitexyàna ch'án kaín nkehe tjínkavan”.

²³ Ijnko tí chojni k'uaxrjeníxin tí ch'in David mé Jesús. Tíha la Dios tsíchr'án ch'án kixin sinchekaá tí sín israelita. Mé xíkaha tsintáchro ch'án.

* 13:13 Hechos 12.25

²⁴ Naxa tjakohya ch'in Jesús ntá ch'in Juan kjuako ch'án tí tan kuínhin tí sín israelita la ntáchro ch'án kixin chrókjan sín chrórxaxinkaon sín Dios ntá chrokuikite sín.

²⁵ Ntá chjina its'en ch'in Juan ntá ntáchro ch'án kixin: "Janhan na jehya tí nkexro tjenkayáxinrá. Náhi. Chr'éxin na itsi í jnko nkexro la chrókósuána chrókjuasintanka tí correa tqakaté ch'án kixin antsí mé t'etqan tí jehé ch'án la kánhyó t'etqan tí janhan," mé xikaha tsintáchro ch'in Juan.

²⁶ Jahará kichó ni tsík'axrjeníxinrá ch'in Abraham tinhínrá la ko kaín rá chojni tsíkjixin ikjin nchexiteyéhérá Dios, tinhínrá tí tán tsaáxinrá.

²⁷ Méxra tí sín k'uék'ejó sín chjasin Jerusalén la ko tí sín t'etqan ntiha mé kónoehya sín nkexro tí ch'in Jesús la ko kuienxínhya sín tí nkehe tsíkjin tí sín k'uéchrónka itén Dios senó tió kjuínchekuáxin sín tí xroon tí nkaxenhen nínko jnkojnko tí yaon t'ok'éhe sín. Mé xikaha jehé sín tió kjuínchekjasóte sín tí ch'in Jesús la kjuínchexiteyá sín éxi níxja tí xroon a.

²⁸ Ntá k'uitjahya sín ninkehó jie kixin chrók'uen ch'án ntá kjónté kjuanchehe sín tí ch'in Pilato kixin ts'etqan ch'án kixin its'en ch'án.

²⁹ A ntá ó xiteyá tí nkehe tsíkjin tí sín ósé kuènte ch'án. Ntá kjuixin k'uén ch'án ntá kjuinkajinxin sín tí cuerpo kuènte ch'án tí ntacruz ntá kjuavá sín ch'án.

³⁰ A ntá Dios kjuínchexechón tí jehé ch'án inaá.

³¹ A ntá nchónhya yaon k'uikon sín ch'in Jesús tí sín k'uék'ajiko ch'án tió sákjuixin sín estado Galilea la sákjuí sín chjasin Jerusalén. A ntá ijie tí sín a mé tjeónixja sín nkexrí kjuako ch'in Jesús, tjakohe sín kaín chojni.

³² A ntá jie jeheni tjakoni tí tan jina, mé tí nkehe tsíkjanjon Dios tsík'áyéhe tí sín tsík'axrjeníxinni ósé.

³³ Mé xikaha xiteyá k'uáyéheni tí jeheni tsík'axrjeníxinni tí sín a. A ntá Dios kuènte tí sín a mé kjuínchexechón tí ch'in Jesús éxi níxja tí xroon yóxin Salmo, ntáchro kixin: "Jaha mé xjanna. Janhan mé tjahá kjuachón jie."[†]

³⁴ Ntá tsintáchro Dios kixin sinchexechón ch'án tí ch'in Jesús kixin tsóxikahya cuérpoé ch'án. Mé xikaha chrónka tí xroon itén Dios. Ntáchro kixin: "Janhan mé sjintaxiteyá tí nkehe chaxin tjanka ch'in David."[‡]

³⁵ La ko í jnko Salmo mé ntáchro xikihi: "Jaha tsjánjonhya kjuachaxin kixin tsóxika tí cuérpoé tí nkexro tjóá kjuít'aha xra."[§]

³⁶ A ntá ch'in David kjuínchexiteyá ch'án éxi tsík'etqan Dios tí kjuák'e ch'án ntá kjónté chr'éxin ik'uén ch'án ntá xravá ch'án xikaha k'uéxravá tí sín tsík'axrjeníxinni la ntá kjónté la xika ntqé ch'án.

³⁷ A ntá tí cuérpoé tí nkexro kjuínchexechón Dios la kótjehya.

³⁸ Méxra kichó ni t'ichjánxin tsqonohará kixin nkexrí tsjin ijíará kixin Jesús mé k'uenyákonhánrá.

³⁹ A ntá kaín nkexro tinkáchónki Jesús mé ó kjuínchetjóá ch'án asén sín. A ntá tí ley k'uetqan ch'in Moisés kjuachahya kótjuáxin tí jie.

⁴⁰ Chrókóxakonhánrá kixin chrókuánhyará xikaha éxi tsíkjin tí sín ósé xikihi:

⁴¹ Tsjehérá jahara chojni titekakonhya. Ijie la tsochraconrá kixin nkehe tsqonhen kixin janhan Dios tsjáqxian ijnko nkehe jie ijnko yaon

kjánchó tsitekákonhyará kjónté ókjé nkexro chróchrónka.*

⁴² A ntá ch'in Pablo la ko tí nkexro k'uájiko ch'án k'uaxrjexin sín nkaxenhen tí nínko, a ntá chrónóla tí sín jehya sín judío tsíkokjéxin, kjuanchia sín kixin í jnko semana tí yaon t'ok'éhe sín la inaá tsochrónka ch'án éxi tí kjuako ch'án.

⁴³ Ntá tí kjuixin xikaxin sín tí kójnkotsé sín tí nínko ntá nchónhya tí sín judío, la ko tí sín jehya sín judío, mé tí sín na ntá kuínkáchónki sín éxi tí sín judío la xraxinkaon sín Dios, la mé imá kóxrjínjin sín tí nkehe kjuako ch'in Pablo la ko ch'in Bernabé la ntá sákjuichréhe sín. A ntá jehé sín mé k'uetqan sín kixin antsí jina chrókuinkáchónki sín tí Dios tjuéhe kaín chojni.

⁴⁴ A ntá í jnko semana kjuéxin, tí yaon t'ok'éhe sín la kójnkotsé kaín tí sín síin tí chjasin ntiha kixin tjinkaon sín tsinhin sín itén Dios.

⁴⁵ A ntá k'uikon tí sín judío a kixin nchónhya chojni tsíkjónkotsé, ntá imá kóchjinoxínhin sín, ntá kjuankixin sín k'uántaxínhin sín tí ch'in Pablo.

⁴⁶ A ntá ch'in Pablo la ko ch'in Bernabé la íchá antsí má chraconhya sín níxja sín ntáchro sín kixin:

—T'ichjánxin senó jahará judiorá chrókuinhínrá itén Dios. Kjánchó tjínkákonhyará tsinhínrá tí nkehe jina tsjanjon kjuachón jnkochríxin. A ntá ijie la tsitohará tí jahara judiorá la ntá jeheni la sátsjini tsjakoheni tí sín jehya judío

⁴⁷ xikaha tsík'etqan ñchéni. Ntáchro ch'án kixin:

Janhan ichr'an tí jahará éxí xrohi ts'inkaséyanxín kaín nación kixin sátsjikoará tí tan tsjanjon kjuachón tsaáxin chojni hasta tí antsí má kjín kjuèxin chjasintajni.†

Mé xíkaha k'ueṭoan Dios.

⁴⁸ A ntá kuínhin tí sín jehya sín judío tíha la kjuankíxin kóchéhe sín la ntácho sín kixin tí tan kuente Ìnchéni la nkehe jína, ichro sín.

La ntá kjuankíxin kuinkáchónki kaín tí sín tsíkṭoexín sín kixin tsochóna sín kjuachón jnkochrín.

⁴⁹ Ntá xíkaha xránkíxin xrako tí itén Ìnchéni nkuíxín tí chjasin ntiha.

⁵⁰ A ntá tí sín judío nixjehé sín iso chojni chjin jína tjetooan la ko tí chojni ntoa t'etooan tí chjasin ntiha la ntá kjuínchekónínkaon tí sín a la ntá kjuankíxin sín chrók'óyán sín tí ch'in Pablo la ko tí ch'in Bernabé ntá sákjuíxin sín chjasin ntiha.

⁵¹ A ntá jehé sín la kótsjéna sín tṭkaté sín kixin tsoxénjin tí nche chóna toté sín. Tíha mé kjuakoxín sín kixin ntoáhya kjuenkayáxin tí sín a. A ntá sákjuí tí jehé sín chjasin Iconio.

⁵² Ntá tí sín tinkáchónki Ìnchéni la imá chéhe sín kixin antsí chóna sín Nchakuen Dios.

14

Ch'in Pablo la ko ch'in Bernabé tjejó chjasin Iconio

¹ Ntá kjuíji ch'in Pablo la ko ch'in Bernabé tí chjasin Iconio. Ntá k'uixenhen sín nṭnkoé tí sín judío ntá jína kjuako sín. La ntá nchónhya tí sín judío la ko tí sín jehya judío mé kuitekaon sín tí nkehe kjuako sín.

² A ntá iso tí sín judío kuítekakonhya la ntá kjuankíxin nchekónínkaon sín tí chojni jehya judío kixin tsoṇínkakonhen sín tí sín tjako.

³ A ntá tí sín tjako la ko tí sín ntiha la chrakonhya sín nixja sín la ko tinkáchónki sín Ìnchéni Jesús. La ntá Ìnchéni kjaxin kóxrjínjin ch'an tí nkehe nixja sín kixin nkexrí tjeheheni Dios la kjuanjon ch'an kjuachaxin tsjasin sín kjuaxroan.

⁴ A ntá tí sín tjejó chjasin ntiha la jnkokónhya kjuenkayáxin sín. Iso sín kuítekakonhen sín tí sín judío la í so sín kuítekakonhen sín tí sín tsíkjevá Ìnchéni.

⁵ A ntá tí sín judío la ko tí sín jehya judío mé kjuenkayáxinko sín tí sín t'etooan kixin sinchekrakon sín tí sín tsíkjevá Ìnchéni la ko tsochjéhe sín xro.

⁶ La ntá tí ch'in Pablo la ko tí ch'in Bernabé kónohe sín nkehe kjuenkayáxin tí sín a ntá sákjuí sín chjasin Listra la ko chjasin Derbe estado Licaonia la nkuíxín ntiha.

⁷ La kjaxin ntaha kjuako sín tí tan jína kuente Ìnchéni.

Chjéhe sín xro ch'in Pablo chjasin Listra

⁸ Ntá tí chjasin Listra itjen ijnko ch'in xitjahya tji. Nunca xitjahya k'uáji ch'an kixin tsíkokjéxin ch'an xitjahya itji ch'an.

⁹ Méxra ó tjetjaxínkoá ch'an ntá kuínhin ch'an nkehe tí tjako ch'in Pablo. Ntá ch'in Pablo komá ch'an tí ch'in a ntá kónohe ch'an kixin tí ch'in antsí tinkáchónki ch'an Ìnchéni kixin tsitṭohe ch'an jína.

¹⁰ Ntá jehé ch'an itsen ntáche ch'an tí ch'in a kixin:

—T'inkatjen, ntoá tjak'exián totá —ichro ch'an.

Ntá tuénxín k'uínkatjen ch'an, chrika ch'an, kjuák'exín ch'an toté ch'an ntá ó jína tji ch'an.

¹¹ Ntá kaín tí sín chjasin ntiha k'uíkon sín nkehe kjuích'e ch'in Pablo, ntá kaín sín k'uíyexin sín nkíveé sín Licaonia ntácho sín kixin:

—Dios tsík'óna chojni mé tsíkixín nkajní tjejókoni nihi —ichro sín.

¹² La ntá kjuínchek'in sín ch'in Bernabé mé tí dios Júpiter a ntá ch'in Pablo mé tí dios Mercurio kixin imá nixja ch'an.

¹³ Ntá tí ch'in nchaṭ'á kuente tí dios Júpiter mé chóna ch'an nṭnko tí t'ixenxínni ikon chjasin ntá kjuíkao ch'an koxinta tjeteyá tsjo. A ntá jehé ch'an la ko kaín tí chojni la chréhe sín kixin tjínkaon sín chrókjuikosáyehe sín tí sín tjako la ko tjínkaon sín chrók'óyán sín tí koxinta chrók'uáyéhe tí sín a.

¹⁴ A ntá tí sín apóstol mé ch'in Pablo la ko ch'in Bernabé mé kónohe sín tíha ntá kjuankíxin sín kótséchje sín iké sín la sákjuíkjakjan sín tí chojni siín ntiha la t'óyako sín ntácho sín kixin:

¹⁵ —¿Kuénté kixin tjejoch'erá xíkaha? Jeheni chojni éxí tí jahará. Tí xra ó kuini kixin tsochrónkami itén Dios kixin tsitṭohérá kaín tí nkehe ninkehó sínkíhya la ntá chrókjanrá chrókuinkachónkirá Dios tjechón. Jehé ch'an mé kjuích'éna ch'an nkajní la ko chjasintajni la ko tí ntayaon la ko kaín tí nkehe siín.

¹⁶ Ntá ósé mé kuítṭohe Dios chojni kixin jehó ts'aji sín ntje sín.

† 13:47 Isaías 42.6; 49.6

¹⁷ Kjǫnté la Dios tjakoxin ch'án kixin jehe ch'án t'etǫan ch'án kixin kjuich'éna ch'án kaín nkehe. Jehe ch'án mé t'etǫan kixin ts'aniá chrin ntá ts'enkani la jina ts'óneheni, la jehe ch'án tjanjon ch'án nkehe kixin jnkochríxin ts'ixin nkehe sineni, la ko jehe ch'án mé nchechéhēni ch'án —mé xikaha ichro ch'in Pablo.

¹⁸ Kjǫnté xikaha ichro tí sín tjako la naḡa tjinkaon tí chojni chrokjuikosáyehe sín chrók'óyán sín koxinta chrókjokéhe sín tí sín tjako.

¹⁹ A ntá ikui iso tí sín judío kjuixin sín chjasin Antioquía la ko chjasin Iconio. Nixjehe sín tí sín ntiha kixin tsítǫhe sín tí nkehe jehya jina tjako tí sín a ntá kóninkaon sín ntá kjuankíxin chjéhe sín xrǫ tí ch'in Pablo. La ntá áche'ó kjuixin tsík'en ch'án ntá kuinkánkákjen sín ch'án sákjuiko sín ch'án ikon chjasin.

²⁰ Ntá tí sín tinkáchónki Ìnchéni mé kójnkotsé sín k'uañtatjen sín tí ch'in Pablo ntá k'uàya ch'án xíkjan ch'án tí chjasin ntiha inaá. Ntá tí yaon chr'éxin ntá sákjuiko ch'án tí ch'in Bernabé chjasin Derbe.

²¹ A ntá ó kjuixin chrónka sín tí tan jina la ko kjuacha sín itsjé chojni kuinkáchónki Ìnchéni ntiha ntá kjan sín chjasin Listra la ko chjasin Iconio la ko chjasin Antioquía.

²² Nkuixin tí chjasin k'uaúsínka sín mé kjuínchechéhe sín tí sín kuinkáchónki Ìnchéni. K'uetǫan sín kixin naḡa jina chrókuinkáchónki sín Ìnchéni la ntá chro sín kixin tí ts'ixenhēni tí kjuachaxin kuente Dios t'ichjánxin tsjasóteni.

²³ A ntá ntiha kjueyá sín chojni jnkojnko nínko kixin ts'etueñhen sín tí sín tinkáchónki Jesús kixin jina ts'ejó sín. Ntá nixjehe sín Dios tí naḡa kjónehya sín la ntá ntáche sín Ìnchéni kixin ts'ayakonhen ch'án tí sín ó kuinkáchónki tí jehe ch'án.

Ch'in Pablo la ko ch'in Bernabé ikjan sín chjasin Antioquía estado Siria

²⁴ Ntá chr'éxin k'uaúsínka sín estado Pisidia la ntá kjuíji sín estado Panfilia.

²⁵ Ntá chjasin Perge kjuako sín tí tan kuente Ìnchéni la ntá kjuixin ntá sákjuí sín chjasin Atalia.

²⁶ Ntá ntiha k'uixenxín sín ntabárçǫ ntá sákjuí sín chjasin Antioquía tí chjasin k'uénixjehe chojni Dios k'uékjanchia sín kixin Dios tsjinkítsa tí sín a sich'e sín tí xrǫ. La ntá ó kjuixin xiteyá.

²⁷ Ntá tió kjuíji sín chjasin Antioquía ntá kójnkotsé kaín tí sín tinkáchónki Jesús. Ntá kjuankíxin chrónka ch'in Pablo nkexrí kjuinkítsa Dios tí jehe sín la ko nkexrí kjuanjon Dios kjuachaxin tsjakǫhe sín tí chojni jehya judío kixin kjaxin sín tsitekaon sín Ìnchéni.

²⁸ A ntá tí ch'in Pablo la ko tí ch'in Bernabé itsjé yaon k'uéjóko sín tí sín tinkáchónki Ìnchéni ntiha.

15

Kójnkotsé sín chjasin Jerusalén

¹ A ntá iso chojni tsikíxin sín estado Judea ntá kjuíji sín chjasin Antioquía. Ntá kjuankíxin sín kjuakǫhe sín tí sín kichó ní kixin xitjahya tsaáxin sín tí chónthaha sín tí xroye tsik'etǫan ch'in Moisés.

² Ntá tí ch'in Pablo la ko tí ch'in Bernabé la ko tí sín judío kjuankíxin kjuanjonkoxin sín kichó sín. Ntá áxri ntá kónoxin kixin tí ch'in Pablo la ko tí ch'in Bernabé la ko í so chojni la sátsji sín chjasin Jerusalén. Ntaha tsonixjehe sín tí sín apóstol la ko tí sín t'etǫan nínko kixin nkexrí tsonhen tí xroye tsik'etǫan ch'in Moisés.

³ Tí sín tinkáchónki Ìnchéni chjasin Antioquía mé ichr'án sín tí sín a ntá k'uaúsínka sín estado Fenicia la ko estado Samaria la tinkáchrónka sín kixin nkexrí tí sín ókjé jehya sín judío kjuitoxinhin tí k'uékjenkaxin sín ntá kuákja sín ntje Dios. Ntá kaín tí sín kichó ní imá kóchéhe sín tí kuínhin sín xikaha.

⁴ La ntá kjuíji ch'in Pablo la ko ch'in Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'etǫan kuente nínko mé kjuanjon sín kjuachaxin ts'ejó tí sín a. Ntá chrónka sín kixin Dios imá kjuinkítsa tí jehe sín.

⁵ Ntá iso tí sín fariseo ó tsikitekaon Ìnchéni mé k'uínkatjen sín ntá ntáchro sín kixin:

—T'ichjánxin itsa xroye tí sín jehya judío tinkáchónki Ìnchéni la ko t'ichjánxin ts'ituenhen sín sinchexiteyéhe sín kaín tí ley —ichro sín.

⁶ Na ntá kaín tí sín apóstol la ko tí sín t'etǫan nínko mé kójnkotsé sín kjuenkayáxin sín nkexrí tsonhen kixin xikaha ichro tí sín judío.

⁷ Ntá imá nixjehe kichó sín ntá k'uínkatjen ch'in Pedro ntáchro ch'án kixin:

—Jahará kichó ní ó nohará nkexrí kixin senó Dios tsikjeyá tí jeheni kixin tsjakǫhēni kaín tí sín jehya judío kixin tsinhin sín tí tán jina kuente Cristo kixin kjaxin jehe sín tsitekaon sín.

⁸ Dios mé ó nohe ch'án nkexéhe kaín asén chojni. Kjuakǫxin ch'án kixin k'uáyéhe ch'án tí sín jehya judío kixin chjéhe ch'án sín Nchakuen ch'án éxí tí xikaha k'uáyéhēni tí jeheni.

⁹ Dios la t'ikon kaín chojni jnkokón éxí tí jeheni. Ntá kjuínchetjóá ch'án asén sín kixin ó tinkáchónki sín Ìnchéni.

¹⁰ Méxra çnkekuènté títékákonhyará tí nkehe kjuích'e Dios la ntá tétuènhénrá chojni sinchexiteyá sín kaín tí nkehe ixrā tsitekaon sín? Ni jeheni la ko ni tí sín tsík'axrjeníxinni kjuachahya sín kjuínchexiteyá sín tíha.

¹¹ Náhí. Ó noheni kixin kjuasáyé Ìnchéni Jesús mé kuaáxinni la ko kjaxin xíkaha kuaáxin tí jehé sín kuitekaon —mé xíkaha ichro ch'in Pedro.

¹² Ntá kaín tí sín tsíkójkotsé tání sín kuínhin sín nkexrí chrónka tí ch'in Bernabé la ko tí ch'in Pablo kixin Dios kjuínkítsa sín kjuasin sín itsjé kjuaxroan k'uikon tí sín jehya sín judío.

¹³ Kjuixin nixja ch'in Pablo la ko ch'in Bernabé ntá kjuankixin nixja ch'in Jacobo, ntáchro ch'án kixin:

—Kíchóni, tinhírrá tí nkehe tsóxrjanka.

¹⁴ Ch'in Simón Pedro chrónka nkexrí kjuakoxin Dios kixin tjuèhe ch'án tí chojni jehya judío la nkexrí kjueyá Dios iso tí sín kixin tsinkáchónki sín tí jehé ch'án.

¹⁵ Mé xíkaha chaxin chrónka tí xroon tsíkjin tí sín k'uéchrónka itén Dios kixin:

¹⁶ Janhan mé tsokjan chr'éxin.

Tió ts'inka ntá sjt'ána nixin tí nchia tsík'oyá kuènte David

la janhan la tsjínkítsa sín ts'etóan sín.

¹⁷ Kixin kjaxin kaín xín chojni mé tsjeyá sín Ìnchéni

la ko kjaxin kaín xín tí sín ókjé nacióon mé tí sín kótjuáxin ñina mé tsinkáchónkina sín.

¹⁸ Ìnchéni mé kjuakoxin kaín tíha tí ósé la tsíkjanjon ch'án tí tan kuènte ch'án.*

Mé xíkaha ichro itén Dios

¹⁹ Méxra ntáxrjan kixin tí sín jehya judío la t'ichjánxinhya sinchexiteyá sín kuènté tí ley kixin ó kuitóhe sín tí nkehe kuinkáchónki sín senó kixin jina chrókjueyá sín Dios.

²⁰ Méxra tsochr'énhenni sín ijnko xroon la jehó ts'etuenhenni sín kixin chrókjónehya sín tí nto tsíkjokehé chojni tí nkehe tsíkjanoya la ko chróchóntahya sín chojni chjin ókjé la ko chrókjónehya sín tí nto kuènte ko tsíchrínjinhya ikja va la ko chrókjónehya sín ijnié va.

²¹ A ntá jnkojnko chjasin sijn nkexro chrónkaxin tí ley kuènte ch'in Moisés nchekuáxin sín tí nkaxenhen ñinko jnkojnko tí yaon t'ok'éhe sín —ichro ch'in Jacobo.

²² Ntá kaín tí sín tsíkjeyá Ìnchéni la ko tí sín t'etóan kuènte ñinko la ko kaín tí í so sín tinkáchónki Ìnchéni kjueyá sín iso chojni tsochr'án sín chjasin Antioquia, mé kjueyá sín ch'in Judas, tükítexin sín ch'án Barsabás, la ko ch'in Silas sátsjiko sín ch'in Pablo la ko ch'in Bernabé. Tí sín a mé sín tjeoan tíha.

²³ Ntá ichr'án sín tí xroon sákjuiko tí sín a ntáchro kixin:

“Jeheni chojni tsíkjeyá Ìnchéni la ko chojni t'etóan kuènte ñinko ntihi la nixjहारáni tí jahará, kíchó ni jehya judío, tjejorá chjasin Antioquia la ko estado Siria la ko estado Cilicia.

²⁴ Ó noheni kixin iso chojni tsíkixin chjaséni kjónté k'uéchóntahya sín kjuachaxin la kjuínchexakonhanrá sín kixin ntáchro sín kixin t'ichjánxin itsará tí xroye tsík'etóan ch'in Moisés.

²⁵ Ntá jnkokoá kjuenkayáxinni tsjeyáni nkexro tjejó ntihi kixin sáchrókjuitsjehe tí jahará la chrókjuijiko sín ch'in Bernabé la ko ch'in Pablo kixin imá tjuèheni sín.

²⁶ Tí sín a mé ántgsen sín kjónté chrók'uenxin sín kixin tí tinkáchónki sín Ìnchéni Jesucristo.

²⁷ Méxra tsochr'ánni ch'in Judas la ko ch'in Silas tsjiji sín kixin jehé sín mé tsonixjहारá sín tsochrónkaxin sín kaín tíha.

²⁸ Jina kixin Nchakuen Dios mé kjuínkítsani kjuenkayáxinni kixin jehya chrók'uetuanhanráni ijnko nkehe imá xra. Náhí. Jehó tí nkehe kánhyó xra t'ichjánxin sinchexiteyará mé t'etóanni:

²⁹ chrókjóntehyará tí iko tsíkjokehé chojni tí nkehe tsíkjanoya la ko kjaxin chrókjóntehyará ijnié tí ko a la ko chrókjóntehyará tí nto kuènte tí ko tsíchrínjinhya kja la ko kjaxin ninkexró chrókjuakjahya í jnko chojni chjin ókjé. Ntá tí sinchexiteyará kaín tí nkehe t'etóanni la jina ts'ejorá.” Mé xíkaha nixja tí xroon.

³⁰ Ntá kjuixin nixja sín ntá tí sín a sákjuí sín chjasin Antioquia. Ntá tíó kjují sín ntiha ntá kójkotsé tí sín tinkáchónki Jesús ntá kjuanjon sín tí xroon a.

³¹ Ntá tíó kjuínchekuáxin tí sín kíchó ni tí xroon a ntá imá kóchéhe sín kixin xíkaha chrónka tí xroon a.

³² Ntá tí ch'in Judas la ko tí ch'in Silas kjaxin sín ó nohe sín tsochrónkaxin sín itén Dios la nixja sín jina la imá kjuínchechéhe sín tí sín kíchó ni kixin tí nkehe nixja sín.

³³ Ntá ntahó k'uéjé sín iso yaon, ntá tíó sátsji sín ntá kaín tí sín tinkáchónki Ìnchéni nixjehe sín jina ntá ó xíkjan sín inaá tí tsíkixin sín tí tjejó tí sín tsíchr'án sín.

* 15:18 15.16-18 Amós 9.11-12

³⁴ Kjárńchó ch'ín Silas kjuenkayáxin ch'án kixin ntaó chrókuitohe ch'án.

³⁵ A ntá ch'ín Pablo la ko ch'ín Bernabé kuitohe sín chjasin Antioquia. Jehé sín la ko í so chojni mé kjuako sín la ko chrónkaxín sín itén Ìnchéni.

Ch'ín Pablo kjuankixin tí yóxin viaje

³⁶ A ntá chr'éxin ch'ín Pablo nixjehe ch'án ch'ín Bernabé. Ntáchro ch'án kixin:

—Sátsjtsjeheni tí sín kichó ni kaín tí chjasin kjuakoxinni itén Ìnchéni ósé. Tsjtsjeheni nkexri tjejó sín ntiha —ichro ch'án.

³⁷ A ntá ch'ín Bernabé la tjinkaon ch'án kixin kjaxin sáchrókjuiko sín ch'ín Juan kjaxin tikítexín sín ch'án Marcos.

³⁸ A ntá ch'ín Pablo kóxrjénhya sátsjiko sín tí ch'ín Marcos a kixin jehé ch'án kuitohe ch'án sín estado Panfilia la kjuínkítsahya ch'án kixin naxá tsonhen tí xra.[†]

³⁹ Méxra jnkokoáhya kjuenkayáxin sín la ntá xikayehe sín la ókjé sákjuí sín. Ch'ín Bernabé sákjuiko ch'án tí ch'ín Marcos la k'uixenhen sín ijnko ntabárcó sákjuí sín nonte Chipre.

⁴⁰ A ntá tí ch'ín Pablo la jehó ch'án mé kjueya ch'án tí ch'ín Silas ntá chr'éxin sákjuí sín. Tí sín kichó ni ntiha kjuanchehe sín Dios kixin jina ts'ayakonhen sín ch'án la ntá sákjuí sín.

⁴¹ Ntá k'uátsínka sín estado Siria la ko estado Cilicia la kjuínchechéhe sín asén tí sín tinkáchónki Ìnchéni njnko ntiha.

16

Ch'ín Timoteo sákjuiko ch'án ch'ín Pablo la ko ch'ín Silas

¹ Ntá kjuíji ch'ín Pablo chjasin Derbe la ko chjasin Listra. Ntá ntaha itjen ijnko ch'ín tinkáchónki Jesús it'in ch'án Timoteo. Jehé ch'án mé xjeen ijnko tjan judía tinkáchónki Ìnchéni. A ntá it'é ch'án mé ijnko ch'ín griego.

² Ntá tí sín kichó ni tjejó chjasin Listra la ko chjasin Iconio mé nixja sín kixin jina tí ch'ín Timoteo.

³ A ntá ch'ín Pablo mé tjinkaon ch'án sáchrókjuiko ch'án tí ch'ín Timoteo. Ntá senó k'uetóan ch'án chrókua tí ch'ín Timoteo a tí xroye kixin tsonínkakahya tí sín judío tí chjasin sátsji sín kixin ó nohe tí sín a kixin it'é ch'ín Timoteo la mé griego.

⁴ Ntá sákjuí sín la kaín tí chjasin k'uátsínka sín la nixjehe sín tí sín kichó ni la chrónkaxín sín tí nkehe tsík'etóan tí sín apóstol la ko tí sín t'etóan kuente njnko chjasin Jerusalén.

⁵ Ntá tí chojni tinkáchónki Ìnchéni mé antsí má ntoá k'uejó sín la ko jnkojnko yaon sitinkákótsjé sín.

Xrínghya titàya k'uikuèn ch'ín Pablo ijnko chojni estado Macedonia

⁶ Ntá Nchakuen Dios kjuanjonyha kjuachaxin kixin sátsjikjako sín itén Dios estado Asia ntá k'uátsínka sín nó estado Frigia la ko estado Galacia.

⁷ Ntá tió kjuíji sín estado Misia ntá kjuenkayáxin sín sáchrókjui sín nó estado Bitinia. Ntá Nchakuen Jesús kjuanjonyha kjuachaxin kixin sátsji sín nó ntiha.

⁸ Méxra k'uátsínka sín ikjín tí estado Misia la ntá kjuíji sín chjasin Troas chrínta ntayaon.

⁹ Ntá ijnko tie xrínghya titàya k'uikuèn ch'ín Pablo ijnko ch'ín estado Macedonia kjuak'exin toté ch'án chrónòa ch'án kixin: "T'átsínka Macedonia tsjinkítsani," ichro ch'án.

¹⁰ Méxra tíha tsík'ikon ch'ín Pablo la ntá tuénxín kóyaxínhinni kixin sátsjini estado Macedonia kixin kónoexinni kixin Dios kjueyáni kixin ntiha tsjakoni tí tan jina tsaáxin chojni. [Janhan tí ch'ín Lucas ikjinni tí xroon i k'uejókotoxinni kichó ni ntiha.]

Ch'ín Pablo la ko ch'ín Silas, k'uejó sín chjasin Filipos

¹¹ Ntá ntaha chjasin Troas k'uixenxinni ijnko ntabárcó ntá sákjuíni ntoí ijnko nonte ntsí tinkátaón ntá it'in Samotracia. Ntá tí yaon chr'éxin kjuíjini chjasin Neápolis.

¹² Ntá ntiha sákjuíxinni la kjuíjini chjasin Filipos. Tí chjasin a mé k'uechónta tí sín romano ósé ntá ijnko chjasin antsí má tjeotan tí it'ó tí estado Macedonia. Ntaha mé k'uejóni iso yaon.

¹³ Ntá tí yaon t'ok'éhe sín ntá k'uaxrxjexinni tí chjasin Filipos ntá sákjuíni ijnko chrínta ntario mé ntiha kuènhen sín tsojnkotsé sín tsonixjehe sín Dios. Mé ntaha k'uejótjaxinni la kjuankixinni kjuakoheni iso chojni chjin tsíkójnkotsé ntiha.

¹⁴ Ntá ijnko tí jehé sín mé ijnko tjan it'in tjan Lidia la tsíkjixin tjan chjasin Tiatira. Jehé tjan mé nchekji tjan ika náxrxjón kjátse tié. Ntá jehé tjan xraxinkaon tjan Dios la jina tjetinhin tjan la Ìnchéni mé kjuínkítsa asén tjan kixin tsinhin tjan jina tí nkehe kjuako ch'ín Pablo.

¹⁵ Ntá jehé tjan la ko kaín tí sín tjejó ntóe tjan mé kulkite sín. Ntá chrónóhehe tjan tí ch'ín Pablo ntáchro tjan kixin:

—Tí chaxin tjátsqan kixin chaxín tinkáchónkini Ìnchéni la jina chrókuitohe ntóeni ntihi —ichro tjan.

[†] 15:38 Hechos 13.13

Ntá kjónté kuítgheni ntiha.

¹⁶ Ntá ijnko yaon sákjuúni tí nó kuénhen sín nixjeexín sín Dios ntá ó xétani ijnko tjan tjarisoá chónta nchakuen tí jínahya tónoexín tjan. Ó tsik'íná tjan la nchónhya chichaon tjacha tí inché tjan kixin xikaha tónohe tjan.

¹⁷ A ntá tí tjan tjarisoá a kjuankíxin tjan tinkáchrē tjan tí ch'ín Pablo la ko tí jeheni ntá t'èya tjan ntáchro tjan kixin:

—Tí sín i ch'ehe sín xrá Dios nkaya nkajni la tjako sín ijnko ntja jína tsaáxin chojni.

¹⁸ Mé xikaha kjuich'e tjan itsje yaon. Ntá kóchjinhin ch'ín Pablo la nkátjía ch'án nixjehe ch'án tí nchakuen tí jínahya chónta tí jehe tjan, ntáchro ch'án kixin:

—Kjuachaxiēn ihnjé Jesucristo tétuānhán kixin ts'axrjéxian tí jehe tjan —ichro ch'án.

Ntá tuénxín ó k'uaxrjéxín tí nchakuen tí jínahya tí jehe tjan.

¹⁹ Na ntá tí inché tí tjan a mé k'uikon sín nkehe kónhen tjan la ó nohe sín kixin í tsjachahya sín chichaon kuente tí xrá ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinkánkákjen sín sákjuiko sín tí tjejó tí síxreé ntasin tjeotoan.

²⁰ Ntá kjuikaán sín ntaha tí tjejó tí sín juez la ntáchro sín kixin:

—Tí sín i mé sín judío la imá sítjité sín chjasénni.

²¹ Tjako sín tí nkehe kuénhyani tsonoheni la tóxrjéghyani sich'eni kixin jeheni mé chojni romanoni.

²² Kaín tí sín ntiha kónínkakohen sín tí jehe sín. Ntá tí sín juez mé k'uetōan ts'axrjehe sín iké sín ntá ts'ekonxín sín nta sé.

²³ Ntá tió kjuixin k'uékon sín nchónhya ntá chr'áxenhén tí sín a ntōechiso ntá k'uetuēnhen sín tí ch'ín t'ayakonhen ntōechiso kixin jína chrók'uayakonhen sín tí sín a.

²⁴ Ntá tí ch'ín t'ayakonhen ntōechiso mé k'uáyéhē ch'án kjuachaxin ntá chr'áxenhén ch'án tí sín a ijnko cuarto chríka ntōechiso kixin ts'axrjehya sín. Ntá chr'áxenhén ch'án tōté sín tí nta tjejóxrja la ko ch'ica ye.

²⁵ A ntá tió k'áxrótjen la ch'ín Pablo la ko ch'ín Silas mé nixjehe sín Dios la ko itsje sín himno kuente Dios. La tí sín í so tjejóchjina mé tjejótinhin sín kixin xikaha tjejóch'e sín tjejótjsje sín.

²⁶ Ntá xrínahya tjan kuínkí nonte la kjuínchekinkí kuente tí xránkixixín ntōechiso ntá tuénxín kaín tí ntója puerta mé xitjehē la ko k'uánótjen tí ch'ica cadena tsíchróntetoxin kaín tí sín tjejóchjina.

²⁷ Ntá tí ch'ín t'ayakonhen ntōechiso mé k'uàya ch'án. Ntá k'uikon ch'án kixin síxítjehē tí ntója puerta ntōechiso a. Ntá kuakítsje ch'án ch'ica espada ntá chrók'óyan ch'án asén ch'án kixin kjuenkayáxin ch'án kixin ó kjuixin tsíkinká kaín tí sín síchjina, ichro ch'án.

²⁸ Ntá ch'ín Pablo k'uèya ch'án itsen ntáchro ch'án kixin:

—Náhi kohya nkehe ch'ehé asán kixin kaín ní naxá tjejóni ntihyó —ichro ch'án.

²⁹ Ntá tí ch'ín t'ayakonhen ntōechiso kjuanchia kixin ts'ákjen xrohi ntá k'uixenhén ch'án kuínká ch'án la síxránká ch'án chrakon ch'án ntá kjuítsínka ch'án tōté tí ch'ín Pablo la ko tí ch'ín Silas.

³⁰ Ntá tuénxín kuakítsjéxín ch'án sín ntiha ntá kjuanchankíhi ch'án sín kixin:

—¿Nkexí chrókjuít'a kixin chrókuaána? —ichro ch'án.

³¹ Ntá kjuátēhe sín ntáchro sín kixin:

—Titekávan Inchéni Jesucristo la tsaá jaha la ko tí sín tjejó ntōa.

³² Ntá kjuakōhe sín tí jehe ch'án a la ko kaín tí sín tjejó ntōe ch'án tí tan kuente Inchéni.

³³ Na kjónté sítíe la tí hora a sákjuiko ch'án sín kjuínchek'íjmá ch'án tí tsíchrít'ō sín. Ntá tuénxín jehe ch'án la ko kaín xín sín tjejó ntōe ch'án mé kuíkite sín.

³⁴ Na ntá chr'éxin tí jehe ch'án sákjuiko sín ntōe ch'án. Ntá ntiha kjuanjon ch'án nkehe sine sín. Imá chéhe ch'án la ko kaín tí sín ntōe ch'án kixin ó kuítekaon sín Dios.

³⁵ Ntá kóyaon nchítjen ntá tí sín juez k'uetuēnhen sín tí sín policia sátsjtsjehe sín tí ch'ín t'ayakonhen ntōechiso kixin chrókjuanjon ch'án kjuachaxin ts'axrje ch'ín Pablo la ko ch'ín Silas.

³⁶ Ntá tí ch'ín t'ayakonhen ntōechiso mé chénka ch'án tí ch'ín Pablo tí nkehe chrónka sín ntáchro ch'án kixin:

—Tí sín juez a mé tsik'etōan sín kixin tsjánjuan kjuachaxin kixin sátsjirá. Méxrā sátsjirá kjuaxróxin —mé xikaha ichro tí ch'ín a.

³⁷ Ntá ch'ín Pablo ntáche ch'án tí sín policia kixin:

—A ntá jeheni kjónté chojni romanoni mé kjuateni sín nkayakon nchónhya chojni. Jehya kixin chrókjuanchia sín nke jie chóntani. Náhi. Kjónté la chr'áxenhenni sín ntōechiso. A ntá ijie la zā imó chrókuakítsjeni sín ní? Náhi. Tsjjia tí jehe sín tsakítsjeni sín —ichro ch'án.

³⁸ Ntá tí sín policia mé sákjuíchénka sín tí sín juez nkehe ntáchro tí sín tjejóchjina. Ntá imá chrakon sín kixin kuínhin sín kixin tí sín a mé chojni romano.

³⁹ A ntá sákjuí tí sín juez ntá chrónòhehè sín tí ch'ín Pablo la ko ch'ín Silas kixin tsonínkakhonhya sín kixin xíkaha kónhen sín ntá k'uaxrjexín sín ntiha ntá chrónòa tí sín a sátxixín sín tí chjasin ntiha.

⁴⁰ Ntá ch'ín Pablo la ko ch'ín Silas tió k'uaxrjexín sín tí ntòechiso ntá kjuíji sín ntòe tí tjan Lidia. Ntá tió kjuixín sákjuítsjehe sín tí sín kichó ni la kjuínchechéhe sín ntá sákjuíxín sín ntiha.

17

Kónínkaon tí chojni chjasin Tesalónica

¹ Ntá ch'ín Pablo la ko ch'ín Silas la k'uátsínka sín chjasin Anfipolis la ko chjasin Apolonia ntá kjuíji sín chjasin Tesalónica. Ntaha itjen ijnko nínko judío.

² A ntá ch'ín Pablo sákjuí ch'an nínko éxí kuèhnen ch'án la jnkojnko yaon t'ok'éhe sín chjina iní semana ikjo ch'án tí jehe sín la chrónkaxín ch'án nkexrí ntáchro xroon itén Dios.

³ Kjuako ch'án kixin tí nkexro Cristo mé t'ichjánxín its'en la ko chr'éxín tsoxechón ch'án inaá. Ntáchro ch'án kixin:

—Tí ch'ín Jesús a mé jeheni chrónkaxínni kixin tsinhínrá jahará mé Cristo tíha.

⁴ A ntá iso tí sín judío kuítekaon sín ntá k'uíto sín tí ch'ín Pablo la ko tí ch'ín Silas. Ntá kjaxín kuítekaon itsjé tí sín griego xraxínkaon Dios a la ko kjaxín nchónhya chojni chjin tjetooan kuítekaon.

⁵ A ntá iso tí sín judío tinkáchónkihya Ìnchéni mé imá kóchjio sín ntá kójnkotséko sín iso chojni jínahya ch'e, ch'ehya sín xra, ixri ntiha. Ntá kaín sín k'uixité sín la kjuínchexakonhen sín tí sín siín chjasén sín. Ntá itsjé sín k'uixenhen sín ntòe ijnko ch'ín it'ín Jason kjueyá sín ch'ín Pablo la ko ch'ín Silas kixin tjínkaon sín sáchrókjuíkohe sín tí sín a tí sín t'etooan.

⁶ A ntá k'uitjahya sín tí sín a ntá kjoné itsé sín tí ch'ín Jason la ko í so tí sín tinkáchónki Ìnchéni ntá kuínkánkájen sín sákjuíko sín tí sín tí síxreé tí chjasin ntiha. Ntaha nínkaon sín k'uèya sín ntáchro sín kixin:

—Tí sín í mé kjuínchexakonhen chojni kuénté chjasintajni. La ntá ó kjuí sín chjasénni ntihi kjaxín.

⁷ La ntá tí ch'ín Jason a mé kjuanjon ch'án kjuachaxín kixin tí sín a mé ts'ejó sín ntòe ch'án. Kaín sín titekakhonhya sín tí ley kuénte tí ch'ín romano t'etooan. Ntáchro sín kixin itjen í jnko nkexro antsí má t'etooan, ntá tíha mé Jesús —ichro sín.

⁸ Ntá tió kuínhin kaín tí sín tsikójnkotsé la ko tí síxreé ntá k'uixité sín kónínkaon sín.

⁹ Ntá ch'ín Jason la ko tí sín tjejóko ch'án kjuenka sín ntá tí síxreé kuítòhe sákjuí sín.

Ch'ín Pablo la ko ch'ín Silas sákjuí sín chjasin Berea

¹⁰ Ntá tuénxín tí tie a tí sín kichó ni mé ichr'án sín ch'ín Pablo la ko ch'ín Silas kixin sátsji sín chjasin Berea. Ntá tió kjuíji sín ntaha k'uixenhen sín tí nínkoé tí sín judío.

¹¹ A ntá tí sín judío ntiha la antsí má jina asén sín, ntá tí sín chjasin Tesalónica la náhi. Antsí má kóxrjínhin sín tsinhín sín tí itén Dios la jnkojnko yaon kjuínchekuáxín sín tí xroon chóna itén Dios kixin tsonòhe sín á chaxín ntoá xíkaha tí ntáchro tí sín a.

¹² Méxra nchónhya tí jehe sín kuítekaon sín la ko kjaxín nchónhya tí chojni chjin griego tjetooan mé kuítekaon la ko kjaxín tí chojni ntoa.

¹³ A ntá tí sín judío chjasin Tesalónica kónòhe sín kixin ch'ín Pablo mé kjuakoxín itén Dios chjasin Berea inaá. Ntá sákjuí sín ntiha a ntá kjuínchekónínkaon tí sín a.

¹⁴ A ntá tí sín kichó ni tinkáchónki Ìnchéni ichr'án sín tí ch'ín Pablo sátsji nó chrínta ntayaon. A ntá ch'ín Silas la ko ch'ín Timoteo naxa kuítòhe sín tí chjasin Berea.

¹⁵ Ntá iso tí sín ntiha sákjuíko sín tí ch'ín Pablo la kjuíji sín tí chjasin Atenas. Ntá kjan sín chjasén sín kixin k'uètoan ch'ín Pablo kixin tsochrónka sín kixin tjoka chrókóxakonhen tí ch'ín Silas la ko tí ch'ín Timoteo tsjiji sín ntiha tsoxéta sín ch'án.

Ch'ín Pablo itjen chjasin Atenas

¹⁶ Ntá nachrohe kjuák'echónhen ch'ín Pablo kixin itsji tí ch'ín Silas la ko tí ch'ín Timoteo chjasin Atenas ntá imá k'uává asén ch'án kixin k'uikon ch'án kixin tí chjasin ntiha siín nchónhya tí nkehe tsíkjangya.

¹⁷ Ntá tí nínko ntiha kjuakohe ch'án iso sín judío la ko iso tí chojni xraxínkaon Dios. La kaín yaon ntsin kjuák'e ch'án kjuakoxén ch'án tí chojni siín ntiha.

¹⁸ La iso tí sín kjuínchekuáxín tí xroon kuénte tí chojni it'ín epícúreo la ko iso tí sín kjuínchekuáxín tí xroon kuénte tí chojni it'ín estoico kjuankáxín nixjehe sín tí ch'ín Pablo. Iso sín ntáchro sín kixin:

—¿Nkekuénté kixin ánta tjenixja tí nkexro a?

La í so sín ntáchro sín kixin:

—Méxra tjenixja ch'án kuénte í jnko dios.

Mé xikaha ichro sín kixin kjuako ch'in Pablo tí tán jina kuente Jesús la ko kjuako ch'an kixin Jesús kjónté k'uén ntá xechón.

¹⁹ Ntá sákjuiko sín ch'in Pablo ijnko tjo it'in Areópago. Ntiha mé kuénhen sín tójnkotsé sín kixin tjenkayáxixin sín. Ntá nixjehe sín tí ch'in Pablo, ntáchro sín kixin:

—Tjinkaonni tsochronka tí nkehe nixin kjuíkoa.

²⁰ Itsjé tí nkehe ókjé tjetjákua la tjinkaonni tsonoheni nkehe t'axrjexín kaín tíha —ichro sín.

²¹ Ntá kaín tí sín chjasin Atenas la ko tí sín tsíkixín ókjé tjejó ntiha mé tóxrjénhya sín í jnko xra, jehí tóxrjínhin sín chrókuinhin sín la ko chrónixja sín ijnko nkehe nixin.

²² Ntá ch'in Pablo k'uínkatjen ch'an kjuák'exín toté ch'an tí síin tí jehe sín chrítaón tí Tjo Areópago. Ntá ntáchro ch'an kixin:

—Jahará tjejorá chjasin Atenas tinhínra. Janhan ó k'uikuán kixin jahará la itsjé dios tinkachónkirá.

²³ Ntá tí kjuak'é ntiha k'uájia la k'uikuán itsjé tí nketí njásixínra culto ntá k'uitja ijnko altar ts'inixin kixin: “Ntihi xraxinkakonxinni ijnko Dios naḡa chónhyani”. Méxra tí Dios xráxinkáonra kjónté naḡa chonhyará mé tí Dios a mé tjákoḡará.

²⁴ Tí Dios mé kjuích'éna ch'an chjasintajni la ko kaín nkehe síin chjasintajni. Jehe ch'an mé inché nkajni la ko chjasintajni. La tjejenhya ch'an ijnko njnko tsíkijch'énaín chojni tja.

²⁵ La t'ichjánxienhya ch'an kixin chojni chrókjuinktsa tí jehe ch'an kixin jehe ch'an mé chjéhe kjuachón kaín chojni la ko tjanjon ch'an xrinto la ko kaín nkehe síin.

²⁶ Kaín tí nación k'uaxrjenixin jnkokóá chojni kixin chrók'uejó sín nkuixín chjasintajni. Kjaxin chrónka Dios nkesá la ko nketí ts'ejó chojni.

²⁷ Méxra jeheni t'ichjánxin tsjeyáni Dios kixin ntá tsienxinni nkexrí ts'itjani ch'an. Jehya imá ikjín itjen ch'an, chjino tí tjejóni itjen ch'an.

²⁸ Jehe ch'an tjejóchónxinni ch'an la ko nchekinkíni ch'an la jehe ch'an t'ayakonhenni ch'an. Mé xikaha tsintáchro jnko ch'in chjasánra ósé kixin: “Jeheni mé naḡa kjéhya Dios.”

²⁹ Jeheni mé naḡa kjéhyani Dios méxra xitjahya tsjenkayáxinni kixin sich'énani Dios chica oro o chica plata o xro kixin éxí tsikjenkayáxin chojni kixin sich'éna sín dios kuente sín.

³⁰ Senó Dios kóninkakonhya ch'an kixin ó nohe ch'an kixin naḡa chónhya sín ch'an. Ntá ijie t'etuenhen Dios kaín xín chojni síin chjasintajni tsokjan sín la tsinkáchónki sín tí jehe ch'an.

³¹ Dios tsíkjejá ijnko yaon sinchekitqexín ijje chojni chjasintajni. Tsíkjejá ch'an ijnko chojni la kjuakoxín kaín kjuachaxin kixin tí nkexro kjónté tsík'en la xechón inaá —ichro ch'in Pablo.

³² Na ntá tíó kuínhin sín kixin nkexrí tsoxechón chojni tsík'en ntá iso sín kjuanoá sín ch'an. Ntá í so sín ntáchro sín kixin:

—Chr'éxin tsinhinni inaá tí nkehe ntáchrúa —ichro sín.

³³ Ntá ch'in Pablo kuitqhe ch'an tí jehe sín.

³⁴ Na ntá iso sín kjuíchréhe sín ch'in Pablo la kjuankixin tinkáchónki sín Inchéni. Ijnko tí sín tinkáchónki a mé it'in ch'an Dionisio mé ijnko tí síxreé kjuínchekitqexín ijje chojni chrítaón tí Tjo Areópago la ko ijnko tjan tinkáchónki tjan mé it'in tjan Dámaris la ko í so sín kjaxin kjuankixin sín tinkáchónki sín Inchéni.

18

Sákjuí ch'in Pablo chjasin Corinto

¹ Ntá kjuixin tíha ntá ch'in Pablo sákjuixin ch'an chjasin Atenas la sákjuí ch'an chjasin Corinto.

² Ntiha mé xéta ch'an ijnko ch'in judío it'in Aquila. Jehe ch'an mé tsíkixín ch'an estado Ponto la séhya jehe ch'an la ko ichjién ch'an Priscila mé kjuixín sín nación Italia kixin t'ichjánxin ts'axrjexín sín ntiha kixin tí ch'in t'etqan mé it'in Claudio k'uetqan ch'an kixin kaín tí sín judío mé ts'axrjexín sín tí chjasin Roma. Ntá ch'in Pablo mé kjuínixjehe ch'an sín.

³ Jnkokón xra ch'e sín la ko jehe ch'an, ch'éna sín kamantá t'óna nchia. Méxra ntá ntahó kuitqeko kichó sín kixin jnkokóá sich'e sín tí xra a.

⁴ Ntá jnkojnko tí yaon t'ok'éhe sín sákjuí ch'in Pablo tí njnko nixjehe ch'an tí sín judío la ko tí sín jehya judío kixin tjnkaon ch'an kixin kaín tí chojni chrókuitekaon sín.

⁵ Ntá tíó ch'in Silas la ko ch'in Timoteo kjuixín sín estado Macedonia ntá ch'in Pablo kjuák'e xra ó kjuako ch'an itén Dios kixin tsonohé tí sín judío kixin Jesús mé tí nkexro Cristo.

⁶ Ntá tí sín judío mé kjuankixin kóninkakonhen sín tí ch'in Pablo la imá k'uántaxínhin sín ch'an. Ntá jehe ch'an k'ótsjènka ch'an iké ch'an kixin kjuakoxín ch'an kixin xikaha tsjasóte sín. Ntá ntáchro ch'an kixin:

—A ntá ijie la jahará kjuéyará tí jie ts'itjáyanxínrá. A ntá janhan la í chontahya jie kixin ó kjuákoqhará tí tán jína, a ntá kuítékákonhyará. A ntá ijie la íchá jína sátsjia tsjákoqhá tí sín jehya judío —íchro ch'án.

⁷Ntá k'uaxrjexín ch'án nínko ntá sákjuí ch'án ntøe ijnko chojni mé it'in Justo mé jehe ch'án xraxinkaon ch'án Dios. Ntøe ch'án mé chjinaxón nínko.

⁸Ntá ch'in Crispo, ijnko nkexo t'etøan kuente nínko, la ko kaín tí sín tjejó ntøe ch'án, mé kjuankixin sín kuítekaon sín Ìnchéni. Kjaxin itsjé tí sín tjejó chjasin Corinto mé kuínhin sín tí tan la ntá kjuankixin sín kuítekaon sín Ìnchéni la kuíkite sín.

⁹Ntá ijnko tie titáya k'uikuén ch'in Pablo Ìnchéni nixjehe ch'án ntáchro kixin:

—Chrakonhya tjákua itan kuéntana. Tjtoéhya tsøchronka

¹⁰kixin janhan tjejóko kichó ni kixin ninkexró kohya nkehe sit'aha. Kixin janhan la chonta itsjé chojni tí chjasin ntihi tinkáchónki tí janhan.

¹¹Méxra ch'in Pablo mé kuítøe ch'án ijnko nánó ko t'ø ntiha chjasin Corinto, kjuákoqhe ch'án sín itén Dios.

¹²A ntá tí yaon k'uetøan ch'in Galión estado Acaya, ntá itsjé tí sín judío kónínkakohen sín tí ch'in Pablo. Ntá itsé sín ch'án sákjuíko sín ch'án tí tjejó tí sín t'etøan.

¹³A ntá ntáche sín tí ch'in t'etøan kixin:

—A ntá tí nkexro i ixri ch'án tjachroe ch'án chojni kixin ókjé nkexrí chrókuínkáchónki sín Dios la ko tsitekakonhya sín tí nkehe t'etøan tí ley.

¹⁴Na ntá tjinkaon ch'in Pablo chrónixja, ntá ch'in Galión ntáche ch'án tí sín judío kixin:

—Tí chaxín ijnko jie jie kjuasin tí ch'in í ntá kjónté chrókuínhan tí nkehe ntáchrorá jahará judíorá.

¹⁵A ntá jehí tjanjønxinrá tí nkehe nixjará la ko ihnjé chojni la ko tí ley tinkáchónkirá. Méxra jahórá chrókuínchekitøexínrá tíha kixin janhan tjínkakonhya ts'óna juez sjntakítóaxian kuente tí nkehe a —íchro ch'án.

¹⁶Ntá k'uetøan ch'án kixin sátsjixin sín ntiha.

¹⁷Ntá tí sín griego la kónínkaon sín la itsé sín tí ch'in Sóstenes tí ch'in t'etøan kuente tí nínko judío, la ntahó kjuatexín sín ch'án. Jehe ch'in Galión a la mé kjónté k'uíkon ch'án la ántøsen ch'án.

Ch'in Pablo xíkjan ch'án chjasin Antioquía ntá sákjuí ch'án nixin viaje

¹⁸A ntá ch'in Pablo kuítøe ch'án chjasin Corinto itsjé yaon ntá nixjehe ch'án tí sín kichó ni ntiha ntá k'uixenhen ch'án ntabárcø sákjuí ch'án nó estado Siria a sákjuíko ch'án tjan Priscila la ko ch'in Aquila. Ntá kjuíji sín chjasin Cencrea la ntá naxa k'uixenhya ch'án ntabárcø inaá la ikjín ch'án mòløé kixin xíkaha kjuákoqxín ch'án kixin kjuínchexiteyá ch'án tí nkehe chrónka ch'án.

¹⁹Ntá tió kjuíji sín tí chjasin Éfeso ntá kuítøe ch'in Pablo tí tjan Priscila a la ko tí ch'in Aquila. Ntá sákjuí ch'án ijnko nínko la ikjo ch'án tí sín judío tsikójnkotsé ntiha.

²⁰Ntá jehe sín chrónøa sín kixin chrókuítøe ch'án isé ntiha, kjánchó jehe ch'án la chrohya ch'án.

²¹Ntá tuénxín nixjehe ch'án sín ntáchro ch'án kixin:

—T'ichjánxin tsjak'é chjasin Jerusalén tí yaon kia itsi. Kjánchó tsokjan inaá tsotsjahá tí jahará tí naxa tjinkaon Dios —íchro ch'án.

Ntá kuítøe ch'án sín ntá k'uixenhen ch'án ntabárcø sákjuíxin ch'án chjasin Éfeso.

²²Ntá tió kjuíji ch'án chjasin Cesarea ntá sákjuí ch'án chjasin Jerusalén na ntá sákjuínixjehe ch'án tí sín tinkáchónki Ìnchéni ntiha. Ntá tuénxín xíkjan ch'án chjasin Antioquía.

²³Ntá kuítøe ch'án ntiha itsjé yaon ntá xíkji ch'án inaá ntá xik'atsínka ch'án itsjé chjasin estado Galacia la ko estado Frigia la kjuínchexéhe ch'án kaín tí sín tinkáchónki Ìnchéni.

Ch'in Apolos kjuako ch'án chjasin Éfeso

²⁴Ntá tí yaon a mé ijnko ch'in judío it'in Apolos ikui chjasin Éfeso mé tsikjixin ch'án chjasin Alejandría. Jehe ch'án mé ijnko nkexro antsí nohe chrónka kixin chóxin ch'án xroon itén Dios.

²⁵Jehe ch'án ó xrakoqhe ch'án ntje Ìnchéni ntá imá tòxrxínjin ch'án nixja ch'án la ko tsjako jína kuente ch'in Jesús. Kjánchó jehó nohe ch'án nkexrí kuíkite chojni ch'in Juan.

²⁶A ntá ch'in Apolos kjuák'e ch'án kjuako ch'án tí nínko la chrakonhya ch'án. Ntá tió kuínhin tí tjan Priscila la ko tí ch'in Aquila tí kjuako ch'án ntá k'uaxrjentako sín ch'án la kjuákoqhe sín ch'án tí nkehe naxa noehya ch'án kuente ntje Dios.

²⁷Ntá tjinkaon ch'in Apolos sátsji ch'án estado Acaya. Ntá tí sín kichó ni kjuínkítsa sín ch'án la ikjín sín ijnko xroon chr'énhen sín tí sín tinkáchónki Ìnchéni tjejó ntiha kixin jína tsjanjon

sín kjuachaxin tsjak'e ch'án. Ntá tió kjuíji ch'án estado Acaya ntá kjuínkítsa ch'án kjuakohe ch'án tí sín tsíkjinkítsa Dios tsíkitekaon sín ch'án.

²⁸ Ntá kjuakoexín ch'án kaín chojni kixin ntoáhya ch'e tí sín judío, la xitjahya tsontáχρο sín náhi. Kjuakohe ch'án sín kixin tí xroon itén Dios chrónka kixin Jesús mé tí nkexro Cristo.

19

Kjuák'e ch'in Pablo chjasin Éfeso

¹ Ntá naxá itjen ch'in Apolos tí chjasin Corinto ntá ch'in Pablo k'uatsínka ch'án nchónhya chjasin chrík'á jna la ntá kjuíji ch'án chjasin Éfeso la ntaha xéta ch'án nchónhya chojni tinkáchónki ntje Dios.

² Ntá kjuanchankíhi ch'án sín kixin:

—¿Á k'uayéhérá Nchakuen Dios tió kuinkachónkirá Ìnchéni? —ichro ch'án.

Ntá kjuátjehe sín kixin:

—Náhi, kíenhyani á tjen Nchakuen Dios —ichro sín.

³ Ntá kjuanchankí ch'in Pablo kixin:

—¿Nkexro kjuachaxién kuíkitiará? —ichro ch'án.

Ntá kjuátjehe sín kixin:

—Éxí kjuako ch'in Juan kuíkiteni —ichro sín.

⁴ Ntá ntáχρο ch'in Pablo kixin:

—Ch'in Juan mé kuíkíte ch'án chojni kixin chrókjan sín chrókuinkáchónki sín Dios la ko kjuako ch'án kixin chrókuitekaon sín tí nkexro itsi chr'éxin. Tíha mé Jesús, tí Cristo —ichro ch'án.

⁵ Ntá kuínhin sín xíkaha ntá kuíkíte sín kjuachaxién ihníé Ìnchéni Jesús.

⁶ A ntá ch'in Pablo kjuák'etja itja ch'án chrítaón ikja sín ntá ikui Nchakuen Dios k'uáyéhe sín ntá kjuankixin sín nixja sín itsjé nkíva ókjé la ko kjuankixin sín kjuako sín tí nkehe kjuanjon Dios.

⁷ Kaín tí sín ntoa tinkáchónki mé chjina teyó sín.

⁸ A ntá chjina iní nitjé, la ch'in Pablo k'uékji ch'án nínko la kjuako ch'án kaín asén ch'án. Nixjehe ch'án chojni la chrónka ch'án nkexrí tjen tí kjuachaxin kuénte Dios.

⁹ A ntá iso sín la kjónté la imá icha asén sín tjinkakonhya sín tsinkáchónki Ìnchéni. Ntá imá t'ántaxínhin sín tí tan jina kuénte Ìnchéni nkayakon chojni. Ntá tí ch'in Pablo k'uaxrjentako ch'án tí sín tinkáchónki Ìnchéni ntá ijnko escuela it'in Tiranno ntaha kjuakoxin ch'án kaín yaon.

¹⁰ Mé xíkaha kjuák'e ch'án kjuako ch'án iyó nánó, ntá kaín tí sín k'uéjé ntíha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío.

¹¹ Ntá Dios antsí má kjuakoxin kjuaxroan jie kixin tí nixja ch'in Pablo.

¹² Ntá itsjé chojni kjuíkao sín pañitje sín la ko iké sín kuákóxin ch'in Pablo ntá sákjuiko sín kjuínchekakóxin sín tí sín níhi ntá kuítjehe sín jina la ko kjaxin nchakuen tí jínahya k'uaxrjexin tí jehe sín.

¹³ A ntá iso tí sín judío ixri sín ntáχρο sín tónohe sín tsakitsje sín nchakuen tí jínahya ch'iyehé sín chojni mé tjinkaon sín tí kjuachaxién ihníé Jesús. La ntá ntáche sín tí nchakuen tí jínahya kixin:

—Kjuachaxién ihníé tí Jesús tjako tí ch'in Pablo t'etoxáninni kixin jaha nchakuen jínahya sátjixian ntíhi —ichro sín.

¹⁴ Mé xíkaha k'uékjich'e tí yato xjeen ijnko ch'in judío it'in Esceva mé ijnko nchat'á t'etoxan.

¹⁵ Ntá ijnko yaon nixjehe sín nchakuen tí jínahya. Ntá tí nchakuen tí jínahya kjuátjehe ntáχρο kixin:

—Chóxinni nkexro ch'in Jesús la ko ó noheni nkexro ch'in Pablo. A ntá jahará, ¿la nkexro tí jahará? —ichro tí nchakuen tí jínahya.

¹⁶ Ntá tí ch'in chóna tí nchakuen tí jínahya kjaminkitaón ch'án tí jehe sín a la ntá imá tsehe ch'án kjuacha ch'án kjuíncheníhi ch'án kaín sín la imá kjoté sín. Ntá k'uaxrjexin sín ntje sín tjóchin sín la ko síchrít'je cuérpé sín.

¹⁷ Ntá kaín tí sín judío la ko tí sín jehya judío tjeje chjasin Éfeso mé kuínhin sín tí nkehe tsíkónhen la imá chrakon sín. Imá jie tí kjuachaxin ihníé Ìnchéni Jesús, ichro sín.

¹⁸ Kjaxin itsjé tí sín tinkáchónki Ìnchéni mé kjuíchrónka sín kixin tí ósé k'uékjich'e sín nchónhya nkehe jínahya.

¹⁹ Itsjé tí sín k'uékjich'e nkehe jínahya k'uékjinchexroan sín la kuíkao sín libro k'uékjich'exin sín xra ntá kjuaka sín tí libro a la k'uíkon nchónhya chojni. Ntá kuákjaxin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín.

²⁰ Ntá tí itén Ìnchéni síntinkák'ánkí la tjákoxin kixin chaxin chóna kjuachaxin.

²¹ Ntá kjuixin tíha ntá ch'in Pablo mé kjuenkayáxin ch'an chrókjuitsjehe ch'an tí sín nó Macedonia la ko Acaya ntá ntaha sáchrókjuixin ch'an chjasin Jerusalén. Ntá kjaxin ntáχρο ch'an kixin tsjixin sátsji ch'an chjasin Jerusalén ntá kjaxin t'ichjánxin sátsji ch'an chjasin Roma.

²² Ntá ichr'an ch'an iyó tí sín tjinkítsa ch'an sátsji sín estado Macedonia, mé ch'in Timoteo la ko ch'in Erasto, ntá nachrohe jehe ch'an naxa kuítóhe ch'an estado Asia iso yagon.

Kónínkaon k'uixité chojni chjasin Éfeso

²³ Ntá itsjé chojni chjasin Éfeso kónínkaon sín la k'uixité sín kixin kóxrjénhya sín tí itén Ìnchéni.

²⁴ Kixin ntiha mé itjen ijnko ch'in it'in ch'an Demetrio. Kjuich'éna ch'an nkehe chica plata tsjehe éxi ñnko kuénte tí dios Diana la nchónhya chichaon kjuacha ch'an la ko tí sín kjuich'eko ch'an xra.

²⁵ Ntá kójnkotséko sín í so sín jnkokón tí xra ch'e sín. Ntá ntáχρο ch'an kixin:

—Jahará nohará kixin tí xra ch'eni la tjachani jina la náxrxón tjejóni.

²⁶ Kjánchó ó k'uikonrá la ko ó kuinhinrá tí nkehe xritjako ch'in Pablo. Tjako ch'an kixin tí nkehe tsikjanoya mé jehya Dios. Kjánchó jehya chjasin Éfeso ó. Náhí, nkuixín estado Asia kuítekaon chojni.

²⁷ Imá tóxakonhenni kixin tí xra ch'eni ts'itjáyán la kjaxin tóxakonhenni tsontáχρο sín kixin chónkó tí ñnkoje tí dios Diana imá jié la ko ts'itjáyán tí kjuachaxin kuénte tjan. Ntá í tsitekakonhya sín tí kjuachaxin kuénte tjan nkuixín estado Asia la ko kuenté chjasintajni —ichro ch'in Demetrio.

²⁸ Ntá tí kuinhin sín xikaha la imá kónínkaon sín ntá k'uèya sín ntáχρο sín kixin:

—Ts'itjáyánhya tí dios Diana kuénte sín Éfeso.

²⁹ Ntá imá tóxakonhen tí sín chjasin Éfeso la í noehya sín nkehe chrókjuich'e sín kixin kónínkaonhen sín tí ch'in Gayo la ko tí ch'in Aristarco mé iyó sín tsíkjixin sín Macedonia. Ntá kuinkánkákjen sín kuikao sín tí nchia jié tójnkotséxin sín xráxin.

³⁰ Ntá ch'in Pablo tjinkaon ch'an chrók'uixenhen ch'an tí nchia kixin tsonixjehe ch'an sín, a ntá tí sín tinkáchónki Ìnchéni mé chrohya sín kixin ts'ixenhen ch'an tí nchia a.

³¹ Kjaxin iso tí síxreé kuénte tí estado Asia mé chóxin sín ch'in Pablo, ntá k'uetóan sín kixin tsochéna chojni tí ch'in Pablo kixin chrókjuiatéhya ch'an tí sín sín ntiha.

³² A ntá iso tí sín tsíkójnkotsé ntáχρο sín ijnko nkehe, la í so sín ntáχρο sín ókjé nkehe kixin ñnkaon sín. La itsjé sín la í noehya sín nkehe xra tsíkójnkotséxin sín kixin ñnkaon sín.

³³ La iso sín judío chénka sín ijnko ch'in it'in Alejandro nkeri xra kjuixin sín kixin tsonixja ch'an. Ntá kjuák'e ch'an jnkosiné ntá kjuakoxin ch'an itja ch'an kixin tsotáni sín ntá tsonixjaxin ch'an tí sín judío tsinhin kaín chojni.

³⁴ Ntá tíó kjuátsoan tí sín tsíkójnkotsé kixin kjaxin tí ch'in a mé judío ch'an ntá kaín sín k'óyako sín chjina iyó hora ntáχρο sín kixin:

—Ts'itjáyánhya tí dios Diana kuénte tí sín chjasin Éfeso —ichro sín.

³⁵ Ntá tí ch'in secretario kuénte tí chjasin ntiha mé k'uetóan ch'an tsotáni sín. Ntá ntáχρο ch'an kixin:

—Chojni chjasén Éfeso tinhinrá. Kuenté chjasintajni nohe sín kixin tí sín chjasin ntihi mé t'ayakonhen sín tí ñnko kuénte tí dios Diana. Tí retrato kuénte tjan mé tsíkixin nkaya nkajni.

³⁶ Kohya nkexro tsontáχρο kixin chaxínhya tíha. Méxra tánirá. Tjenkayáxinrá jina nkehe chrókjuich'erá.

³⁷ Jahará kjuikoará tí sín a ntihi la kjánchó k'uántaxiénhya sín tí ñnkoeni la ko k'uántaxiénhya sín tí tjan santo kuénténi.

³⁸ Méxra ch'in Demetrio la ko tí sín ch'eko ch'an xra la tí tjanchia sín jié jnkojín nkexro la sín juez sinchekitogéxin. Méxra tsochrónka sín tí tjan tí ch'in juez kixin jnkojnko sín la chrókuitogéxin tí jié chóna sín.

³⁹ Ntá tí sín ijnko nkehe tsjanchará ntá t'ichjánxin tsojnkotsérá la ntoá chrókuitogéxin.

⁴⁰ Tóxakonhenni kixin kjá tí sín t'etóan ts'ekani sín jié kixin jehya jina k'uixiténi kónínkaonni. Noehyani nkehe tsjatéheni kixin tí tsjanchanki sín nkekuénte k'uixiténi, tsixro sín.

⁴¹ La ntá k'uetóan ch'an kixin sátsji sín kixin ó kjuixin tí kójnkotsé sín.

20

Sátsji ch'in Pablo estado Macedonia la ko estado Grecia

¹ Ntá tí kjuixin k'uixité sín, a ntá ch'in Pablo k'uíyehé kaín tí sín tinkáchónki Ìnchéni ntiha ntá kjuako ch'an iso kjuaxrexinkaon jina, ntá nixjehe kichó sín ntá sáxíkji ch'an nó estado Macedonia.

² Ntá nkuixín k'uatsínka ch'án la kjuínchechéhe ch'án tí sín tinkáchónki Ìnchéni kixin tí nkehe nixja ch'án. Ntá chr'éxin kjuji ch'án estado Grecia.

³ Ntiha kuitóhe ch'án iní nítjó ntá chrók'uixenhen ch'án ijnko ntabárcq ntá sáchrókjuí ch'án estado Siria. Ntá kónohe ch'án kixin iso sín judío nínkakonhen sín tí jehe ch'án a ntá kjuenkayáxin ch'án tsokjanxin ch'án tóté ch'án inaá ts'atsínka ch'án Macedonia.

⁴ Ntá tí sín sákjuiko ch'ín Pablo mé tí ch'ín Sópater mé jehe ch'án tsíkjin ch'án chjasin Berea, la ko kjaxin ch'ín Aristarco, la ko ch'ín Segundo. Jehe sín mé tsíkjin sín chjasin Tesalónica, la ko ch'ín Gayo tsíkjin ch'án chjasin Derbe, la ko kjaxin sákjuiko ch'án ch'ín Timoteo, la ko ch'ín Tíquico, la ko ch'ín Trófimo, mé tsíkjin sín estado Asia.

⁵ Ntá tí sín kichó ni a mé kuitónxin sín ntja ntá tjejóchónhen sín tí jeheni chjasin Troas.
⁶ Kjuixin k'uatsínka tí kia tió kjóne sín niótja chóntahya tí xrqan t'ánkixin niótja, ntá k'uixenhenni ijnko ntabárcq k'uaxrjéxinni Filipos ntá k'uatsínka in'ó yaon ntá kjujini chjasin Troas ntá ntiha xétani tí sín kuitónxin sín ntja. A ntá ntiha kuitóheni yato yaon.

Ch'ín Pablo sákjuí chjasin Troas

⁷ Ntá tí yaon xránkixín semana ntá kójnkotséni kixin tsochrít'q niótja tsoxraxinkakonxinni Ìnchéni. Ntá ch'ín Pablo nixjehe ch'án kaín tí sín tinkáchónki Ìnchéni la tjinkaon ch'án sátsjixin ch'án ntiha tí yaon chr'éxin, ntá qntsi má sé tí nkehe chrónka ch'án la naxa tjenixja ch'án k'áxrótjen.

⁸ Tí tsikójnkotsé sín a mé ijnko piso noi la ntiha mé síche nchónhya xrohi.

⁹ Ntá ntiha itjen ijnko ch'ín ntsaó it'ín ch'án Eutico mé tjetjaxin ch'án chrítaon ventana. Ntá tí ch'ín Pablo imá sé nixja ch'án ntá tí ch'ín ntsaó mé tsikihi ch'án kotáchrin. A ntá xrínahya tsík'ajua ch'án ntá tsík'anótjénxin ch'án tí ventana tí nixin piso ntiha ntá sákjuikjatsen sín ch'án la ó tsíkjin tsík'en ch'án.

¹⁰ Ntá ch'ín Pablo k'uínkajin ch'án ntá kjuítsínkaták'á ch'án chrítaon tí ch'ín tsík'anótjen a la kjóa ch'án. Ntá ntáche ch'án tí sín kichó ni kixin:

—Chrakonhyará tsík'enhya ch'án, tjechón ch'án —ichro ch'án.

¹¹ Ntá ch'ín Pablo k'ujit'ójen ch'án inaá tí k'uínkajinxin ch'án kixin ntiha ts'óxikeye ch'án niótja sine sín tsoxraxinkakonxín sín Ìnchéni. Ntá naxa tjenixja ch'án hasta k'uínkaséyan a ntá sákjuí ch'án.

¹² Ntá tí ch'ín ntsaó tsík'anótjen sákjuiko sín la tjechón ch'án kohya nkehe xéhe ch'án ntá kaín sín imá kóchéhe sín.

Sákjuixin ch'ín Pablo chjasin Troas kjuji ch'án chjasin Mileto

¹³ Jeheni mé kuitónxinni ntja saxón la k'uixenhenni ijnko ntabárcq sákjuini nó chjasin Asón kixin ntiha tsoxetani ch'ín Pablo éxi tsintáchro ch'án kixin tjinkaon ch'án sátsjixin ch'án tóté ch'án ntiha.

¹⁴ Ntá ó xetani tí jehe ch'án chjasin Asón ntá k'uixenhen ch'án tí ntabárcq kjaxin ch'án ntá sákjuikoni ch'án nó chjasin Mitilene.

¹⁵ Ntá tí sákjuixinni ntiha ntá tí yaon chr'éxin ntá k'uátsínkani estado Quío ntá tí yaon chr'éxin kjujini chjasin Samos. Ntá inaá k'uixenhenni tí ntabárcq ntá sákjuini chjasin Trogilio ntá ntiha k'ók'éheni. Ntá xík'ixenhenni ntabárcq inaá ntá tí yaon chr'éxin kjujini chjasin Mileto.

¹⁶ Mé xíkaha kjuich'eni kixin ch'ín Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kixin tjinkaon ch'án tjoka chrókjuji ch'án chjasin Jerusalén kixin ntiha chrókjuak'e ch'án tí yaon Pentecostés, ichro ch'án.

Nixjehe ch'ín Pablo tí sín t'etuenhen nínko chjasin Éfeso

¹⁷ Tí itjen ch'ín Pablo tí chjasin Mileto k'uíyehé ch'án tí sín t'etuenhen tí nínko chjasin Éfeso.

¹⁸ Ntá tió kui sín ntá ntáchro ch'án kixin:

—Tí jahará la ó nohará nkexr'í kjuak'é la ko kjuákua desde tí yaon xránkixín k'uinka estado Asia.

¹⁹ Ó nohará kixin kaín tí yaon k'uéjóni la kaín asenná kjuít'aha xra Ìnchéni la kjuíntahnkehya. Imá tsjanka kixin nchónhya kjuasóténa kixin tjinkaon tí sín judío chrók'óyáanna sín.

²⁰ Janhan la kuitóahya kjuákua kaín tí nkehe jina t'ichjánxin tsonohará. Mé xíkaha kjuákua tió kójnkotsérá la ko xíkaha kjuíkjuakuaaxian jnkojnko ntoará.

²¹ Kjuáqoha kaín chojni judío la ko kaín chojni jehya judío kixin t'ichjánxin tsítóhe sín tí jie tjasin sín la ko tsitekaon sín Dios la ko Ìnchéni Jesucristo.

²² Ntá ijie sátsjyá chjasin Jerusalén kixin Nchakuen Dios k'uétuanna la í nonahya nkehe tsonna ntiha.

²³ Ntá jehó nõna kixin kaïn chjasin ts'atsinka la chrónka Nchakuen Dios kixin ts-jak'echjinana la ko tsjasótëna.

²⁴ Kaïn tíha la tóxakonahya. Kjënté chrókjuasótëxián la ninkehó sínkihyana la janhan la chàna kixin tí xra chonta la chrókjuintaxín la chrókjuintaxiteyá tí xra chjina Ìnchéni Jesús kixin tsjakua tí tan jina nkexrí tjuèhe Dios chojni.

²⁵ 'Ntá jie ó nõna kixin tí jahará kjuákoahará kjuachaxin kuènte Dios la nijnkorá ts'ikonhyará tí janhan inaá.

²⁶ Méxra tinhínra ijie kixin í jehya jiëna kixin jnkojínra chrók'uitjayanra.

²⁷ Kixin ó kjuákua kaïn tí nkehe tjinkaon Dios kixin tsonohará la í t'itjayanhya ninkehó.

²⁸ Méxra xráxinkáonra ts'ejorá jnkojína la ts'ayakonhénra kaïn tí sín tinkáchónki Ìnchéni kixin Nchakuen Dios mé tjáhará tí xra pastor kixin ts'ayakonhénra tí sín kuènte tí njnkoje ch'án k'uënxín ch'án tí ijnié ch'án.

²⁹ Ó nõna tió sátsjia ntá itsji í so chojni éxi kolóbo jiehe tsotjinkaon sinchek'itjayan tí sín tinkáchónki Ìnchéni.

³⁰ La ntá kjónté jahará la isorá tjeorá ntihi tsjankixinra tsjakorá kjuach'ia chrínki chrókjuákoahérá kichuárá tí nkehe chaxín. A ntá tí sín tinkáchónki tsjichréhe sín tí nkehe ntoáhya.

³¹ Méxra chrórxáxinkáonra kixin chjina iní nanó kjuak'é kjuákoahará nchakotjin la ko tie la kuitoahya kjuintaxraxinkávan hasta kjuínchenihi asenná nixjahará jnkojnko tí jahará.

³² A ntá jie la jahará kichó ní tjetjáncháha Dios kixin t'ayakuanxínra ch'án tí itén ch'án kixin tjuahará ch'án. Jehe ch'án imá chóna kjuachaxin tsjinkitsará ntá ts'ayéhérá kaïn tí nkehe tjinkaon ch'án tsochjéhe ch'án kaïn tí chojni tsikótjía.

³³ Janhan mé kjuakéhya asenná ch'ichakoen chojni o iké jnkojin chojni.

³⁴ Náhí. Jahará ó nohárá jina kixin janhan na mé tjaná kjuít'axián xra kjuácha k'uënxín tí nkehe t'ichjánxinna la ko kjaxin tí nkehe t'ichjánxinhin tí chojni k'uejókian.

³⁵ Méxra kjuákuaxínra xikaha s'ich'erá xra kixin jina tsjinkitsará tí chojni chónahya. Xráxinkáonra kixin tsintácho Ìnchéni Jesús kixin: "Antsí tsochéhëni kixin tí nkehe chrókjuanjonni, a ntá kánhyó tsochéhëni kixin tí nkehe chrók'uáyéhëni."

³⁶ Ntá kjuixin ntácho ch'in Pablo xikaha ntá jehe ch'an la ko kaïn sín k'uejóxin toch'in sín ntá nixjehe sín Dios.

³⁷ Ntá kaïn sín tsjanka sín la ko kjóla sín ch'án la ko tséhe sín tja ch'an.

³⁸ Imá k'uává sín kixin chrónka ch'án kixin í ts'ikonhya sín ch'án inaá. Ntá sákjuikotoxin sín ch'án nó tí tjen tí ntabarco sátsjiko ch'án.

21

Sákjuí tí ch'in Pablo nó chjasin Jerusalén

¹ A ntá tió kuitoheni tí sín kichó ní ntá k'uixenhenni ntabarco la ntá tuéxín sákjuíni estado Cos. Ntá tí yaon chr'éxin sákjuíni chjasin Rodas, ntá ntiha sákjuíni chjasin Pátara.

² Tí chjasin Pátara la mé ntiha k'uitjani ijnko ntabarco sátsji nó estado Fenicia. Ntá k'uixenhenni tí ntabarco a ntá sákjuíni.

³ Ntá tió k'uátsínkani la k'uikonní tí nonte Chipre itjani ikjon kuitohe ntá k'uatsínkani estado Siria. Ntá tí ntabarco la ts'atsinka tsitöhe tí nkehe tjinka tí puerto chjasin Tiro, la jeheni la nachrohe sákjuíni tí chjasin a.

⁴ Ntá ntiha k'uitjani tí sín tinkáchónki Ìnchéni a ntá ntiha kuitohëkoni sín yato yaon. A ntá jehe sín mé kjuínchenohe sín Nchakuen Dios chénka sín tí ch'in Pablo kixin sáchrókjuihya ch'án chjasin Jerusalén.

⁵ Ntá kjuixin k'uátsínka tí yato yaon a ntá sákjuíxinni ntiha. La kaïn tí sín tinkáchónki Ìnchéni la ko ichjién sín la ko xjeen sín sákjuikotoxiníni tí k'uaxrjentani ikon chjasin ntá sákjuíni chrínta ntayaon. K'uejóxinni toch'inni nixjehëni Dios

⁶ ntá tuéxín nixjehëni sín jnkojína ntá tséhe tja kichó ní. Ntá k'uixenhenni tí ntabarco, a ntá jehe sín ikjan sín ntqë sín.

⁷ Ntahó chjasin Tiro kjuixixín tí k'uixenhenni tí ntabarco ntá kjuíjini chjasin Tolemaida. Ntiha kjuínixjehëni tí sín kichó ní tinkáchónki Ìnchéni. Ntá ntiha k'uejókoni sín ijnko yaon.

⁸ Ntá tí yaon chr'éxin sákjuíxinni ntiha ntá kjuíjini chjasin Cesarea. Ntá ntiha sákjuíni ntqë ch'in Felipe, ijnko ch'in kjaxin tjako itén Ìnchéni. Jehe ch'án mé ijnko tí sín yatoxin tjinkitsa tí sín kjuéyá Ìnchéni. A ntá jeheni mé kuitohëni ntiha.

⁹ Tí ch'in Felipe a mé chóna ch'án noó xjeen ch'án chjin naxa tóteheya sín. Tí xjeen ch'án a mé chrónkaxín sín tí itén Dios.

¹⁰ Ntá ntaha k'uejókoni sín itsjé yaon ntá ikjui ijnko ch'in nixja itén Dios it'in Agabo, tsikjixín ch'án estado Judea.

¹¹ Ikjui ch'án kjuinixjehé ch'án tí jeheni la ntá kuákja ch'án tí tjoa t'ínkat'óxin ch'ín Pablo na ntá kjuínchetotoxín toté ch'án la ko itja ch'án ntá ntáchro ch'án kixin:

—Tí Nchakuen Dios mé ntáchro kixin mé xikaha chjasin Jerusalén tí sín judío sincheteto sín Inché tí tjoa sinchek'áyéhé sín ch'án tí sín jehya judío —ichro ch'án.

¹² Ntá kjuixin kuínhinni tíha ntá jeheni la ko tí sín chjasin Cesarea chrónógheni tí ch'ín Pablo kixin sáchrókjuihya ch'án tí chjasin Jerusalén.

¹³ Ntá kjuátehe ch'ín Pablo kixin:

—¿Nkeuènté tsjankará la ko nkeuènté nchek'ávárani? Janhan na chrakonhya kjónté jehya tí sinchetetona sín ó. Náhí. Kjónté kjaxin chrók'uénxian chjasin Jerusalén tí tinkachónkia Ìnchéni —ichro ch'án.

¹⁴ Ntá kjuachahyani nixjeheni ch'án ntá kuitóhenni ch'án. Ntáchroni kixin:

—Tí nkehe tjinkaon Ìnchéni mé tsoñhen —ichroni.

¹⁵ Ntá kjuixin tíha ntá kóyaxínhinni ntá sákjuíni nó chjasin Jerusalén.

¹⁶ Ntá sákjuíkoni iso tí sín tinkáchónki Ìnchéni tsíkijxin chjasin Cesarea. Sákjuíkoni sín ntóe ijnko ch'ín tsíkijxin Chipre it'ín ch'án Mnasón. Jehe ch'án mé ósé tinkáchónki ch'án Ìnchéni. Ntá kjuanjon ch'án nketí kuitóhenni.

Ch'ín Pablo sákjuitsjehe tí ch'ín Jacobo

¹⁷ Tió kjuíjini chjasin Jerusalén ntá tí sín kichó ni tinkáchónki Ìnchéni mé kjuanjon sín kjuachaxin k'uéjóni la chéhe sín.

¹⁸ Ntá tí yaon chr'éxin ch'ín Pablo sákjuíkoni ch'án kjuitsjeheni ch'ín Jacobo la ntaha tjejó kain tí sín t'etoan kuènte njnko.

¹⁹ Ntá ch'ín Pablo kjuixin nixjehé ch'án sín ntá tuénxín chrónka ch'án kain tí xra kjuích'e Dios tió kjuakohe ch'án tí sín jehya sín judío.

²⁰ Tió kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kixin:

—Kichóni, jaha k'uikuqan kixin siin itsjé mil sín judío ó kuinkáchónki sín Jesús kjánchó kain sín ntáchro sín kixin t'ichjánxin tsítóehyani tí ley.

²¹ Ntá tsíkinhin sín kixin jaha mé tsíkjakohé tí sín judío tjejó chjasin ókjé kixin t'ichjánxienhya sinchexiteyéhe sín tí nkehe k'uetóan ch'ín Moisés. La kjaxin kuínhin sín kixin jaha tsíkjakohé sín kixin tí xjeen sín t'ichjánxienhya itsa sín tí xroye la ko t'ichjánxienhya tinkáchónki sín éxi k'uéinkáchónkini ósé.

²² ¿Ntá nkehe chrókjuich'eni? Kixin tió tsinhin sín kixin kjuihá la tsojnkotsé nchónhya sín.

²³ Méxra íchá jína jaha sinchexiteyá tíhi. Ntíhi tjejó noó sín t'ichjánxin sinchexiteyá sín tí nkehe chénka sín Dios.

²⁴ Jaha sáchrókjuikoa sín la chrókótjóá jaha la ko jehe sín. La ko kjaxin chrókjuènka tsokjín sín ntá tsoñoexín tí sín judío kixin chaxínhya tí nkehe tsíkinhin sín la ko tsoñoexín sín kixin kjaxian jaha nchexiteyéhé tí ley.

²⁵ A ntá tí sín jehya judío tsíkitekaon Ìnchéni la ikjinni ijnko xroon ó chr'énhenni sín. K'uetóehenni sín kixin sinehya sín tí nto tsíkjokehé chojni tí nkehe tsíkjanoya, la ko kjaxin sinehya sín jnj, la ko sinehya sín tí nto tsichrinjinhya isin va, la ko chróchóntahya sín í jnko chojni chjin ókjé —ichro sín.

Tséxin sín tí ch'ín Pablo tí njnko

²⁶ Ntá ch'ín Pablo sákjuíko ch'án tí noó sín la ntá tí yaon chr'éxin kjuínchetjóá asén sín. Ntá kjuixin ntá k'uixenhen ch'án tí njnko kixin tsochrónka ch'án kixin ó kjuixin kjuínchexiteyá ch'án tí nkehe k'uituenhen ch'án. Tíhi mé t'axrxjén kixin jnkojnko sín tsíkjo sín nkehe tsjanjon sín.

²⁷ Ó chjina chróxétja tí yato yaon ntá iso tí sín judío tsíkijxin estado Asia mé tsík'ikon sín ch'ín Pablo nkaxenhen tí njnko. Ntá kjuínchekóninkaon sín kain chojni chjasin ntiha ntá itsé sín tí ch'ín Pablo.

²⁸ Ntá k'uèya sín ntáchro sín kixin:

—Káinrá chojni chjasin Israel tsjínktsaráni kixin tsotséni tí ch'ín i. Jehe ch'án mé ixri nkuixín xritjakohe ch'án chojni nkehe jehya jína kuènte chjaséni, la ko titekakonhya ch'án tí ley kuènte Moisés, la ko titekakonhya ch'án njnkoeni. A ntá ijie la tsík'ixenko ch'án iso sín griego la kjuínchekjita sín nkaxenhen tí njnko tjóá —ichro sín.

²⁹ Mé xikaha ichro sín kixin tsík'ikon sín senó kixin chjasén sín mé xriko ch'ín Pablo tí ch'ín Trófimo tsíkijxin chjasin Éfeso. Kjuénkayáxin sín kixin ch'ín Pablo la kjá tsíkjiko ch'án tí ch'ín a nkaxenhen njnko.

³⁰ Ntá kuenté tí chjasin a kóninkaon sín la ntá kain tí chojni kuinká sín ikui sín ntá itsé sín tí ch'ín Pablo. Ntá kuinkánkákjenxín sín ch'án nkaxenhen njnko la kuakitsje sín ch'án ntója ntá tuénxín k'uíkjehe sín tí puerta njnko.

³¹ Ntá tjinkaon sín chrók'óyán sín ch'án ntá ijnko ch'ín comandante k'uetuēnhen itsjé tí sín soldado romano kuínhin ch'án kixin kuenté tí chjasin Jerusalén k'uixité nínkaon sín.

³² Ntá tí ch'ín comandante sákjuiko ch'án iso sín soldado la ko tí sín k'uetuēnhen tí soldado a la kuinká sín sákjuí sín tí síin tí chojni. Ntá tíó k'uikon tí sín a kixin ó kjuíjí tí ch'ín comandante la ko tí sín soldado a ntá kuitōhe sín, í kjuatehya sín ch'ín Pablo.

³³ Ntá tí ch'ín comandante kóchjina ch'án la itsé ch'án tí ch'ín Pablo. Ntá k'uetōan ch'án kixin tí sín soldado sinchentetoxín sín tí ch'ín Pablo yaá chica cadena. Ntá chr'éxin kjuanchankíhi ch'án sín kixin nkexro tí jehe ch'ín Pablo la ko nkehe tí kjuích'e ch'án.

³⁴ A ntá tí chojni tsikójnkontsé la ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuēntē xíkaha kjuích'e sín kixin k'uixité sín. Ntá k'uetōan ch'án kixin tí sín soldado sátsjiko sín tí ch'ín Pablo tí cuartel síin tí sín soldado.

³⁵ La ntá tíó kjuíjiko sín ch'án tí t'it'ótjēnxin sín tí nchia a ntá t'ichjánxin kuámá sín tí ch'ín Pablo kixin tí chojni tjinkaon sín chrókjuate sín ch'án kixin nínkaon sín.

³⁶ Kaín tí chojni chréhe nóton t'eya sín ntáchro sín kixin:

—Chrók'uen ch'án —ichro sín.

Ch'ín Pablo chrónka nkayakon chojni kixin chóntahya ch'án jie

³⁷ Ntá tíó sáchrókjuiko sín ch'ín Pablo tí nkaxenhen tí cuartel kuēnté tí sín soldado a ntá kjuanchankíhi ch'ín Pablo tí ch'ín comandante ntáchro ch'án kixin:

—¿Á jina tsonixjahani jaha intsí? —ichro ch'án.

Ntá kjuátēhe tí ch'ín comandante ntáchro ch'án kixin:

—¿Jaha la á noha nixja griego?

³⁸ Méxra ¿á jehya jaha tí chojni tsikjixin Egípto kjuínchenínkaon chojni la ko sákjuiko nteje tí noó mil chojni tsíkjàya? —ichro ch'án.

³⁹ Ntá kjuátēhe ch'ín Pablo ntáchro ch'án kixin:

—Náhi, janhan mé ijnko chojni judío. Tsíkokjínaxián chjasin Tarso, estado Cilicia. Janhan mé ijnko chojni tsíkjixin ijnko chjasin imá tjetōan. A ntá ijie xrjannógha kixin tsjánjuan kjuachaxin tsonixjahá tí chojni —ichro ch'án.

⁴⁰ Ntá tí ch'ín comandante kjuanjōn kjuachaxin ntá ch'ín Pablo kjuák'exin toté ch'án tí tjen escalera ntá tja ch'án ó kjuakoxin ch'án kixin tsotáni sín. Ntá tání sín ntá kjuankixin nixjaxin ch'án nkíva hebreo. Ntáchro ch'án kixin:

22

¹ —Jahará kichó ni la ko chojni it'é xjan tinhúnra nkehe tí tsōxrjanka kixin chontahya jie —ichro ch'án.

² Ntá kuínhin sín kixin nixjaxin ch'án nkíva hebreo ntá qntsí má tání sín. Ntá ntáchro ch'ín Pablo inaá kixin:

³ —Janhan mé ijnko chojni judío tsíkokjínaxián chjasin Tarso estado Cilicia. K'uankixian ntihi chjasin Jerusalén la kjuíntakuxián tí nkehe kjuako tí ch'ín Gamaliel la títēkavan tí ley tsíkináchónkí tí sín tsík'axrjenixinni ósé. Tjínkavan chrókjuít'aha Dios xra kaín qsená éxí tjínkáonrá jahará ch'erá tí yaon ijie.

⁴ Tí senó k'uénínkakhōnhan chrók'oyán tí sín tinkáchónki Inchéni kjuíntanteto chojni ntoa la ko chojni chjin kixin chrók'uejóchjina sín.

⁵ A ntá tí sín ncha't'á t'etōan la ko kaín tí sín táda t'ayakonhen núnko la mé nohe sín kaín tíha kixin jehe sín mé kjuanjōn sín xroon ts'áyēhe tí sín kichó ni judío tjejó chjasin Damasco. Ntá sákjuia nó ntiha kixin chrókjuíkjéyá tí sín tinkáchónki Inchéni kixin chrótse sín ntá chrókjuíkan sín ntihi Jerusalén chroklusóte sín.

*Ch'ín Pablo chrónka nkexrí kjuankixin tinkáchónki ch'án Inchéni
(Hch. 9.1—9; 26.12—18)*

⁶ A ntá tíó kjuasán chjina chjasin Damasco chjina chonkixin ntá xrinahya k'uinkáséyan jnkontatjén tí tjén ijnko xrohi imá t'inkaséyan kuíxin nkajni.

⁷ Ntá kjuachr'itsjnka nonte ntá tuéxín kuínhan itén ijnko nkexro nixjana ntáchro kixin: “Saulo, Saulo, ¿nkekuēnté ninkákonna xritjéyá tí janhan?”

⁸ Ntá kjuánchánkiá kixin: “¿Xá nkexro jaha?” Ntá kjuátēhe ch'án ntáchro ch'án kixin: “Janhan mé tí nkexro Jesús tsíkjixin chjasin Nazaret, mé tí nkexro xritjéyá.”

⁹ La ntá tí sín k'uájkian mé k'uikon sín tí xrohi la chrakon sín kjánchó kuénhya sín itén tí nkexro nixjana.

¹⁰ Ntá kjuánchánkiá kixin: “¿Xá nkehe tsonhen tjínkavan sít'aha jaha?” Ntá kjuátēhe ch'án ntáchro kixin: “T'áya sáttja t'ixēnhén chjasin Damasco ntá ntiha tsochrónka sín kaín nkehe s'ich'e.”

¹¹ Ntá tí xrohi a mé k'uixenka ikuḡan ntá í xitjahya t'íkuḡan. Ntá tí sín chríkjan mé kuinkátséna sín sákjuíkjan sín chjasin Damasco.

¹² Ntá ntaha kjuák'e ijnko ch'in it'in Ananías ijnko chojni jína kjuínchexiteyéhe ch'án tí ley kuènte ch'in Moisés. Kaín tí sín judío siín chjasin Damasco tjikosáyehe sín tí jehe ch'án.

¹³ Ntá ch'in Ananías mé kuitsjehe ch'án tí janhan ntá tíó kui ch'án ntáχρο ch'án kixin: “Kíchóni Saulo, ijie la ts'ayéhé kjuachaxin ts'íkuan inaá.” Ntá ó jína t'íkuan.

¹⁴ Ntá tuénxín ntáχρο ch'án inaá kixin: “Tí Dios kuinkáchónki tí sín tsík'axrjeníxinni la ó tsíkjeýá ch'án tí jaha kixin tsoñoḡa nkehe tjinkaon ch'án la ko kixin ts'íkuan tí nkexro jína la ko tsinhín tan k'uaxrjéxín ir'va ch'án.

¹⁵ Jaha mé tsochronka tí nkehe k'uíkuan la ko tí nkehe kuínhín tsinhín kaín tí chojni chjasintajni.

¹⁶ A ntá jie la í choénhya má. T'áya la tsikitiaxián ihnjé Inchéni kixin mé ts'ímáxin ijíá,” ichro ch'in Ananías.

Pablo chrónka kixin Dios ichr'án ch'án tsjakohé tí sín jehya sín judío

¹⁷ Na ntá tíó xíkjan chjasin Jerusalén ntá sákjuia nínko tsonixjahá Dios ntá titáya k'uikuén

¹⁸ Inchéni ntáχρο ch'án kixin: “Tjoka ts'axrjéxian chjasin Jerusalén kixin tsitekakuenhya sín tí nkehe tjákua mé tí tan kuéntana.”

¹⁹ Ntá janhan ntátjan ch'án kixin: “Inchéni, jehe sín ó nohe sín kixin senó k'uék'atsinka kaín tí nínko la k'uétsé tí sín tinkáchónki tí jaha la sákjuíkjan sín ntóechiso k'uékon sín.

²⁰ Tíó k'óyán sín tí ch'in Esteban tí nkexro k'uékjit'aha xra, k'uénixja tí tan kuènta ntá janhan kjaxin tjéntaxián ntiha la janhan ntáxrjan kixin ó nchoxon its'en ch'án la k'uáyakonhan tí iké tí sín kjuàya.”

²¹ Ntá Inchéni xínixja inaá, ntáχρο ch'án kixin: “Tétuanhan jaha kixin sátsjia chjasin kjin kixin tsjakohé tí chojni jehya judío.”

Ntá tí ch'in comandante k'uáyéhe tí ch'in Pablo kixin tsjasóte ch'án

²² Ntá tí sín tsíkójnkotsé mé kuínhin sín kaín tíha ntá kjuankixin k'uèya sín ntáχρο sín kixin: —Its'en ch'án, í tsjak'echónhya ch'án —ichro sín.

²³ Naxa t'ixratáhya sín t'óyako sín ntá tótsjénka sín iké sín la ko kuákja sín nche it'e sín.

²⁴ Ntá tí ch'in comandante mé k'uètuénhen ch'án tí sín soldado a kixin sátsjiko sín ch'in Pablo nkaxenhen tí cuartel kuènte sín. Ntá ntiha k'uètoḡan ch'án kixin tsjatexín sín ch'án chikoté ntá tsoñoexín tí ch'in comandante nkekuènte imá t'óyako sín nínkakonhen sín tí jehe ch'án.

²⁵ Ntá kjuixin kjuínchenteto sín ch'án kixin tsjate sín ch'án ntá nixjehé ch'in Pablo ijnko ch'in capitán itjen ntiha ntáχρο ch'án kixin:

—¿A chontará kjuachaxin tsjaterá ijnko chojni romano, kixin naxa kjuéyáhyará nkerí jie chonta? —ichro ch'án.

²⁶ Tíó kjuixin kuínhin tí ch'in capitán ntá sákjuíchénka ch'án tí ch'in comandante ntáχρο ch'án kixin:

—¿Nkehe sích'e jaha kixin tí nkexro i mé ijnko chojni romano?

²⁷ Ntá tí ch'in comandante mé kóchjinehe ch'án tí ch'in Pablo la kjuanchankí ch'án, ntáχρο ch'án kixin:

—¿A jaha chaxín chojni romano? —ichro ch'án.

Ntá kjuátehe ch'in Pablo kixin chaxín jehe ch'án.

²⁸ Ntá ntáχρο tí ch'in comandante kixin:

—¿A ntá nkexrí kixin janhan nchónhya chichaon kjuènká kixin ts'ónana chojni romano?

A ntá ntáχρο ch'in Pablo kixin:

—Janhan na chojni ntiha tsíkókjinaxián.

²⁹ Na ntá tí sín soldado chrókjuate ch'in Pablo mé kuínhin sín kixin ch'in Pablo ijnko chojni romano ntá kuitóhe sín ch'án sákjuí sín ókjé. Ntá tí ch'in comandante a mé kónohe ch'án kixin tí ch'in Pablo a mé ijnko chojni romano ch'án chaxín. Ntá chrakon ch'án kixin tsíkjinchenteto ch'án.

Ch'in Pablo nixjehé ch'án tí sín t'etḡan kuènte tí sín judío

³⁰ A ntá tí kóyaon ntá tí ch'in comandante a mé tjinkaon ch'án tsoñohe ch'án nkehe tí jie chrók'ueka tí sín judío tí ch'in Pablo. Ntá kjuasintanká ch'án chica cadena tsíchróntetoxín tja tí ch'in Pablo ntá k'uètoḡan ch'án kixin tsojnkotsé kaín tí nchat'á t'etḡan la ko tí sín t'etḡan kuènte sín judío, a ntá kuakitsje ch'án tí ch'in Pablo la kjuak'e ch'án jnkosiné tí siín tí jehe sín.

—Kíchóni, tí k'uékjak'é hasta ijie la Dios tjetsjehe kíxin ijnko kjuaxrexinkaon jína chonta —ichro ch'án.

² Ntá tí ch'ín Ananías tí ch'ín nchať'á t'et'oan mé k'u'etuenhen ch'án tí sín chjino tjejó tí tjen ch'ín Pablo tsochjéhe sín ir'va ch'án.

³ Ntá kjuátehe ch'ín Pablo kíxin:

—Dios mé sinchekjasóte tí jaha kíxin ntoáhya kjujch'e. Tjetjaxian méhe kíxin tsjéyá nkehe tí jie chonta éxí nixja tí ley. A ntá ¿nkekuènte kuítekákonhya tí ley, la kuét'oan kíxin ts'ékonna? —ichro ch'án.

⁴ A ntá tí sín síin ntiha ntáchro sín kíxin:

—¿Á xíkaha ts'antaxínhín tí nchať'á t'et'oan kuènte Dios?

⁵ Ntá kjuátehe ch'ín Pablo ntáchro ch'án kíxin:

—Kíchóni, kjuatsganhya janhan kíxin jehe ch'án mé tí nchať'á t'et'oan. Ntáchro tí xroon itén Dios kíxin: “Chrók'uantaxíenhya tí chojni t'etuenhen chjasán”^{*} —ichro ch'án.

⁶ Ntá ch'ín Pablo mé kónohe ch'án kíxin iso chojni síin ntiha mé chojni kuènte partido saduceo, ntá í so sín a mé kuènte partido fariseo. Ntá itsen k'u'éya ch'ín Pablo, ntáchro ch'án kíxin:

—Kíchóni, janhan mé ijnko chojni fariseo la tí sín kjéhyana mé fariseo kjáxin. Jahará mé tjeýará nkehe tí jie chonta kíxin janhan mé tinkachónkia kíxin tsoxechón chojni tsík'en.

⁷ Ntá kjuixín ntáchro ch'án tíha ntá tí sín fariseo la ko tí sín saduceo mé kjuankíxin sín ikjo kíchó sín ntá xíkaha jnkokónhya kjuenkayáxin tí sín tsikójnkotsé ntiha.

⁸ Kíxin tí sín saduceo a mé ntáchro sín kíxin tsoxechónhya chojni tsík'en la ko kjáxin kohya sín ángel la ko kohya nchaċkuen. A ntá tí sín fariseo la titekaon sín kaín tí nkehe a.

⁹ Ntá kaín sín k'u'éya sín la ntá iso tí sín maestro tjako ley kuènte sín fariseo mé k'uínkatjen sín ntáchro sín kíxin:

—Tí ch'ín i, kohya ninkehó nkehe jínahya kjuích'e ch'án. Ách'e ijnko nchaċkuen chojni o ijnko ángel mé nixjehe ch'án —ichro tí sín fariseo.

¹⁰ Ntá imá sítjité sín níinkaon sín. Ntá tí ch'ín comandante a mé tóxakonhen ch'án kíxin chrókjuincheken sín tí ch'ín Pablo ntá k'u'etuenhen ch'án tí sín soldado a kíxin sátsjikakjín sín ch'án la tsíkao sín ch'án inaá tí cuartel kuènte tí sín soldado.

¹¹ A ntá tí tie a na ntá xringhya titáya k'uíkuèn ch'ín Pablo ínchéni nixja ch'án, ntáchro kíxin:

—Chrakonhya Pablo kíxin éxí chronka tanná chjasin Jerusalén la mé xíkaha tsochronka chjasin Roma.

Kjuenkayáxin sín chrók'óyán sín tí ch'ín Pablo

¹² Ntá tí yaon chr'éxin a ntá iso tí sín judío a mé kjuenkayáxin sín kíxin ts'óyán sín tí ch'ín Pablo. Ntá k'uákjenxin sín íhnjé Dios chaxín tsoxiteyá la sinehya sín la ko ts'hya sín ninkehó tí naxa ts'óyánhya sín ch'án.

¹³ Chjina cuarenta sín kjuenkayáxin sín kíxin xíkaha sich'e sín.

¹⁴ Ntá sákjuichenka sín tí sín nchať'á t'et'oan la ko tí sín t'etuenhen kuènte tí sín judío la ntáche sín kíxin:

—K'uákjenxinni íhnjé Dios kíxin chaxín tsoxiteyá kíxin í sinehyani ninkehó tí naxa ts'óyánhyani tí ch'ín Pablo.

¹⁵ Méxra ntá jahará la ko í so tí sín t'etuenhen tí sín judío tsontácherá tí ch'ín comandante a kíxin tsjikao sín tí ch'ín Pablo ntihi tí tjejórá ntóye nchítjen kíxin antsí má tsjanchankíhírá ch'án nkehe sín á chaxín tí jie t'íká ch'án. A ntá jeheni senó ts'ejóchónhenni tí tsjixín ch'án ntá ts'óyánni ch'án kíxin í tsjihya ch'án ntihi —ichro sín.

¹⁶ Ntá tí xjeen tí kjáve tí ch'ín Pablo a mé tsíkinhin ch'án nkehe tí tjo tí sín a. Ntá sákjuí ch'án k'uixenhen ch'án cuartel kuènte tí sín soldado kíxin tsochronka ch'án nkehe tí tjo sín kuínhin ch'án.

¹⁷ La ntá ch'ín Pablo mé k'uíyehé ch'án ijnko tí sín capitán la ntáchro ch'án kíxin:

—Sátsjioa tí ch'ín ntasoá tí tjen tí ch'ín comandante kíxin tjinkaon ch'án tsochronka ch'án nkehe —ichro ch'án.

¹⁸ Ntá tí ch'ín capitán a mé sákjuíko ch'án tí tjen tí ch'ín comandante ntá ntáchro tí ch'ín capitán a kíxin:

—A ntá tí ch'ín Pablo tjechjina mé k'uíyeheni ch'án kíxin tsjikáoni tí ch'ín ntasoá ntihi kíxin tjinkaon ch'án tsonixjaha jaha —ichro ch'án.

¹⁹ Ntá tí ch'ín comandante a mé tséhe ch'án itja tí ch'ín ntasoá a ntá k'uaxrjentako ch'án jehó ch'án ntá kjuanchankíhi ch'án kíxin:

—¿Nkehe tí tjínkávan tsochronka? —ichro ch'án.

²⁰ Ntá ntáchro tí ch'ín ntasoá a kíxin:

* 23:5 Éxodo 22.28

—Iso tí sín judío mé kjuenkayáxin sín káxin tsjanchaha sín káxin ntóye nchtjen sátsjikoa ch'ín Pablo tí tsojnkotsé tí sín judío t'etqan. Sit'ayaha sín tsonáchro sín káxin tjínkaon sín tsjanchankíhi sín ch'ín Pablo tí nkehe antsí má xra.

²¹ A ntá jaha la chrókuitekákonhya káxin chjina cuarenta chojni tjejóhónhen sín imó la k'uákjenxín sín ihníé Dios káxin sinehya sín la ko ts'ihya sín ninkehó tsjinxinjian its'en ch'ín Pablo. Ntá ijie tjejóhónhen sín tsonóne sín nkehe tsixrua jaha —ichro ch'án.

²² A ntá tí ch'ín comandante a mé nixjehé ch'án tí tí ch'ín ntasoá la k'uetqan ch'án káxin: —Tsochenkahya ninkexró káxin xíkaha kjuíchronka —ichro ch'án.

Ichr'án sín tí ch'ín Pablo tí itjen tí ch'ín gobernador Félix

²³ Ntá tí ch'ín comandante a mé k'uíyehé ch'án yaá tí sín capitán a ntá k'uetqan ch'án káxin tsoyaxínhin sín sátsjiko sín iyó ciento sín soldado sátsjixín toté la ko setenta tí sín tsjiták'á kokaṭe la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án.

²⁴ La ko k'uituenhen sín sinchekamá sín kokaṭe tsjiták'á ch'ín Pablo la ts'ayakonhen sín ch'án jina káxin kohya nkehe tsonhen káxin tsjiji ch'án tí tjen ch'ín Félix, tí ch'ín gobernador.

²⁵ Ntá tí ch'ín comandante ikjin ch'án ijnko xroon a, ntáchro káxin:

²⁶ “Janhan mé tí ch'ín Claudio Lisias chr'anhan ijnko xroon káxin jaha ch'ín Félix ijnko gobernador jina, nixjaha.

²⁷ Tí sín judío a mé itsé sín tí ch'ín i káxin chrók'óyán sín ch'án. Ntá tió kónóna káxin ijnko chojni romano tí jehe ch'án la ntá sákjuíkian sín soldado kjuintakaá ch'án.

²⁸ Tjínkavan tsonóna nkeuente káxin nínkakonhen sín ch'án. Ntá sákjuíkian ch'án tí tsikójkotsé tí sín judío.

²⁹ Ntá kónoxín káxin nínkakuénxín sín ch'án káxin tí ley kuente sín kjuínchexiteyáhya ch'án, ichro sín. Jehya jie jie tsíkjasin ch'án káxin chrók'óyán sín ch'án o chrókjuak'e chjina sín ch'án.

³⁰ Ntá ó kuínhan káxin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuáncháha tí sín a káxin chrókjuuij sín tí tjen jaha chrókjuá sín káxin nkeuente nínkakonhen sín ch'án. Kjuasáyá. Ó tjen.”

³¹ Ntá tí sín soldado a mé kjuínchexiteyá sín éxi k'uituenhen sín a ntá sákjuiko sín tí ch'ín Pablo tí tie a chjasin Antípatris.

³² Ntá tí yaon chr'éxin tí sín soldado xrixín toté ó a mé xíkjan sín tí cuartel kuente sín. Ntá tí sín k'uejókjen kokaṭe a mé naxa sákjuiko sín tí ch'ín Pablo.

³³ Ntá tió kjuíji sín tí chjasin Cesarea ntá tí sín soldado a mé kjuanjón sín tí xroon a chjéhe sín tí ch'ín gobernador la ko kjaxin kjuínchek'áyehé sín ch'án tí ch'ín Pablo.

³⁴ Ntá kjuixin kjuínchekúaxín tí ch'ín gobernador a tí xroon ntá kjuanchankí ch'án nketí chjasén ch'ín Pablo. La ntá kónóne ch'án káxin estado Cilicia tsíkixín tí ch'ín a.

³⁵ Ntá ntáchro ch'án káxin:

—Ntá tsinhan nkehe tsixro tí sín itsji ts'eka jie.

Ntá k'uetuenhen ch'án tí sín soldado a káxin ts'ayakonhen sín tí ch'ín Pablo tí nchia kuente ch'ín Herodes.

24

Ch'ín Pablo nixjehé ch'án ch'ín Félix chrónka ch'án káxin kjuasinhya ch'án jie

¹ Ntá k'uatásinka in'ó yaon, ntá ch'ín Ananías, tí ncha'tá imá t'etqan, kjuíji ch'án chjasin Cesarea. Kjaxin kuíkao ch'án iso tí sín t'etqan kuente núnko a la ko ijnko ch'ín abogado it'ín Tértulo. Tí ch'ín a mé tsonixjehé tí ch'ín gobernador káxin tsjanchia sín jie kuente ch'ín Pablo.

² Ntá tió kuíkao tí sín soldado tí ch'ín Pablo ntiha ntá tí ch'ín Tértulo kjuankáxin ch'án nixjehé ch'án tí ch'ín Félix ntáchro ch'án káxin:

—Kjuasáyá jaha gobernador káxin imá kjuínkítsa káxin kjuaxróxin tjejóni la kjuasáyá káxin imá noha kjuíncheyóxian tí nación kuénteni.

³ Kjuasáyá jaha Félix. Imá jina jaha káxin k'uáyéheni kaín tíha.

⁴ Tjínkakonhya sintak'itjáyanhan nchónhya tiempo la xrxanóaha káxin chrókjuak'é chrókuinhín intsikóá tí nkehe tsóxrjanka.

⁵ A ntá ijie ó k'uitjani káxin tí ch'ín i mé éxi ijnko chin t'óxika kuenté chjasintajni káxin ch'iyehé ch'án tí sín judío ntá xíka sín. Jehé ch'án mé t'etqan ch'án tí sín tinkáchónki tí ch'ín tsíkixín chjasin Nazaret.

⁶ Jehé ch'án mé kjaxin chrókjuínchekjita ch'án tí núnko. A ntá itséni ch'án ntá chrókjuínchekitpexínni tí ijie ch'án éxi t'etqan tí ley kuénteni.

⁷ A ntá tí ch'ín comandante Lisias kjuixrónkáxin ch'án kuíkao ch'án nchónhya sín soldado la kuakitsje sín tí ch'ín Pablo.

⁸ Ntá k'uetōan ch'án kixin tí sín tjanchia jiē chrókuitsjehe sín tí jaha kixin jaha chrókjuanchankíhí ch'án kixin chrókónoha jína nkexéhe tí jiē chrókjuinchekjásótexín sín ch'án —ichro tí ch'ín Tértulo.

⁹ Ntá ntáchro kaín tí sín judío síin ntiha kixin:

—Kaín tíha la chaxín —ichro sín.

¹⁰ Ntá tí ch'ín gobernador a mé kjuáqoxín tja ch'án kixin tsonixja tí ch'ín Pablo a. Ntá ntáchro ch'ín Pablo kixin:

—Chéheni kixin tsonixjahani tsochrónkani kixin kohya jiē kjuasinni kixin ó noheni kixin jaha la juez kuènte tí nación ntihi la nchónhya nánó tétōan.

¹¹ Jaha la kjaxin ó chrókónoha kixin na ntá teyó yaon kjuíjini chjasin Jerusalén kixin ntaha tsoxráinkakónxíini Dios.

¹² Kónoxínhya kixin nijnko nkexro chrókjuachaxíini, la ko kjuínchexakuenhyani ninkexró nijnko la ko ní tí nijnko ntsí la ko ninketó chjasin.

¹³ Tí sín i la xitjahya tsontáchro sín kixin xikaha tí jiē kjuasinni.

¹⁴ Janhan chaxín xrjanka kixin t'ahá xrá tí Dios k'uékinkáchónki tí sín tsik'axrjeníxinni mé yóhé tí ntá nixin. A ntá jehe sín ntáchro sín kixin ókjé nkehe tinkáchónkini. Kjánchó janhan mé tinkáchónkia kaín tí nkehe tsikjin sín tí xroon kuènte ley la ko tinkáchónkia kaín tí nkehe k'uénixja tí sín k'uéchrónka itén Dios.

¹⁵ Kjaxín tinkáchónkia tí Dios tinkáchónki tí jehe sín kixin tjéchonhan kixin Dios sinchexechón kaín chojni jína la ko kaín chojni jínahya kjaxin.

¹⁶ Méxra tóxakonna kixin tjóá chrókjuak'é kixin chrókjuanchahya Dios jiē la ko kjaxin chojni chrókjuanchahya jiē.

¹⁷ Nta kjuixín k'uatúsinka iso nánó ixrini ókjé ntá kjuíjini chjaséni kixin tsjanjonni chichaon la ko kjaxin tsochjéheni Dios nkehe.

¹⁸ Méxra mé xikaha tjenni nkaxenhen nijnko nta iso sín judío tsíkjiixín estado Asia ó xetani ntiha. Ntá kjuínchetjóáni aséni la tsjéhya chojni k'uíkon la kohya chojni kjuánjonkoni.

¹⁹ A ntá tí sín a mé t'ichjánxín chrókui sín ntihi kixin chrókjuanchia sín jiē tí nínkakonna sín.

²⁰ A ntá tí náhi la tí sín tjejó ntihi chróchrónka sín kixin nkehe tí jiē k'uitjaxín sín tió kjuák'eni tí tjejó tí sín t'etōan kuènte tí sín judío.

²¹ Kjá tí tsontáchro sín kixin náxrxónhya ijnko nkehe itsen k'uèya ntáxrjan kixin: “Tjie sijnchekitōexinrá jiēna kixin sijnchekjásótenará kixin janhan tinkáchónkia kixin tsoxechón chojni tsik'en” —ichro ch'án.

²² Ntá kjuixín kuínhin tí ch'ín Félix, la jehe ch'án jína kónohe ch'án kixin nkexrí tí ntá nixin. Ntá kjuínchekitōexínhya ch'án ijje ch'ín Pablo. Ntáchro ch'án kixin:

—Tsjijia tí ch'ín comandante Lisias ntá tsochrónka ch'án nkekuènte tí jiē tjanchiará ntá tsonóna —ichro ch'án.

²³ Ntá k'uetuenhen ch'án ijnko ch'ín capitán kixin ts'ayakonhen ch'án ch'ín Pablo kjánchó tsitōhe sín ch'án intsí la ko tsítōhe sín ts'ixenhen tí sín chóxin ch'án, tsjitsjehe sín ch'án.

²⁴ Ntá iso yaon chr'éxin ntá kjuíjiko ch'ín Félix tjan Drusila ichjién ch'án, mé ijnko tjan judía. Ntá k'uetōan ch'án kixin tsjik'íyehé sín tí ch'ín Pablo kixin tsochrónka ch'án nkexrí tinkáchónki chojni Jesucristo.

²⁵ A ntá ch'ín Pablo mé kjuako ch'án kixin nkexrí ts'ejó chojni jína la ko nkexrí ts'etuenhen chojni asén sín kixin ch'ehya sín tí jínahya la ko nkexrí Dios sijnchekitōexín ijje chojni tí tsjixixín. Ntá ch'ín Félix kuínhin ch'án xikaha ntá chrakon ch'án, ntáchro ch'án kixin:

—A ntá jie la sátiya. Ntá ts'iyaha tió chonta tiempo —ichro ch'án.

²⁶ A nta ch'ín Félix tjechónhen ch'án kixin kjá ch'ín Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uíyehé ch'án tí ch'ín Pablo kixin tsonixjehé ch'án.

²⁷ Ntá xikahó kónhen hasta k'uatúsinka iyó nánó ntá tí ch'ín Félix kuitōhe ch'án tí xra gobernador la ntá ijnko ch'ín it'ín Porcio Festo mé k'uíxenhen ch'án tí xra a inaá. A ntá ch'ín Félix mé kuitōhe ch'án tí ch'ín Pablo tjechjina ch'án kixin tjinkaon ch'án chrókjuinchejiteyá ch'án tí nkehe tjinkaon tí sín judío.

25

Ch'ín Pablo nkayakon tí ch'ín Festo

¹ Ntá tí ch'ín Festo kjuíji ch'án ntiha kixin ts'ixenhen ch'án tí xra gobernador. Ntá iní yaon chr'éxin ntá sákuixín ch'án chjasin Cesarea la kjuíji ch'án chjasin Jerusalén.

² Ntiha tí sín nchát'á t'etōan la ko tí sín judío imá tjeoan mé kjuanchia sín kixin tsjasóte ch'ín Pablo.

³ Kjuanchia sín kixin xra ó chrók'uetqan ch'an kixin chrókjui ch'in Pablo ntiha chjasin Jerusalén. Kixin jehe sín ó tsíkjenkayáxin sín kixin tsochr'an sín iso chojni tsochónhen tí ntiha ts'óyán sín tí ch'in Pablo.

⁴ Kjánchó ch'in Festo kjuátqhe ch'an ntáχρο ch'an kixin ó tsíkjenkayáxin ch'an kixin í séhya tsjak'e ch'an ntiha. Méxra tí ch'in Pablo la tjechjina ch'an chjasin Cesarea la xitjahya ts'etqan ch'an kixin tsjixrakoa.

⁵ Ntá ntáχρο ch'an kixin:

—Tí chojni tjetqan kuéntará sáchrókjuikian ntiha chjasin Cesarea. A ntá tí chaxín tsíkjasin ch'an jie ntá ntiha la jina tsjanchia sín jie —ichro tí ch'in Festo.

⁶ Ntá ch'in Festo kjuák'e ch'an chjasin Jerusalén chjina ijní o ite yaon ntá ikjan ch'an chjasin Cesarea ínaa. Ntá tí yaon chr'éxin a kjuák'etjaxin ch'an tí tjet'etqanxín ch'an ntá k'uetqan ch'an kixin tsjikakjín sín tí ch'in Pablo.

⁷ Ntá tíó k'uixenhen ch'in Pablo ntiha ntá tí sín judío kuixin Jerusalén kóchjinehe sín ch'an ntá kjuanchia sín nchónhya jie imá hyé. Kjánchó ijnko nkehe chaxínhya t'eka sín ch'an jie.

⁸ A ntá tí ch'in Pablo a chrónka ch'an kixin kjuasinhya ch'an jie. Ntáχρο ch'an kixin:

—Ninkehó jie kjuasinhyani mé ninkexró kjuánjonkohyani la ko kjaxin jehya chrókuitekakonhyani tí ley kuénte tí sín judío la ko jehya chrókuitekakonhyani tí nínko la ko jehya chrókuitekakonhyani tí ch'in gobernador romano.

⁹ A ntá ch'in Festo tjinkaon ch'an kixin tsonínkakuenhya ch'an tí sín judío ntá kjuanchankíhi ch'an tí ch'in Pablo ntáχρο ch'an kixin:

—¿A tjinkávan sátsjia chjasin Jerusalén kixin ntaha janhan chrókjuintakitqaxián nkehe tí jie chonta jaha? —ichro ch'an.

¹⁰ Ntá kjuátqhe ch'in Pablo kixin:

—Náhi, jeheni ó ntihi tjenni tí t'etqanxín tí sín gobierno romano la jina chrókjuinchekitqexián ijieni kixin jaha la ó noha kixin ninkehó ije kjuich'ehyani tí sín judío.

¹¹ Kja tí chaxín kjuásian ichrén jie jie chrók'uénxian la chrakonhyana kjónté chrók'uén. A ntá tí chaxínhya xikaha t'ekana sín jie la ninkexró chóntahya kjuachaxin chrók'uetqan sáchrókjuikoni tí jehe sín. A ntá tjánchiá kixin jehe tí ch'in imá t'etqan mé sinchekitqexin tí jie —ichro ch'an.

¹² Ntá ch'in Festo mé kjuanchankíhi ch'an iso tí sín tjinkítsa ch'an ntá ntáχρο ch'an kixin:

—Jaha mé tjanchia kixin tí ch'in imá t'etqan sinchekitqexin ch'an ijíá. Méxra tétuanhan sátsjia tí tjen tí ch'in a —ichro ch'an.

Ch'in Pablo nkayakon tí ch'in rey Agripa

¹³ Ntá k'uátsínka iso yaon ntá tí ch'in rey Agripa la ko tjan Berenice kjuiji sín chjasin Cesarea kixin tsonixjehé sín tí ch'in Festo.

¹⁴ Ntá ntiha mé kuitohe sín itsjé yaon ntá ch'in Festo a mé chénka ch'an tí ch'in rey nkehe kuénte tí ch'in Pablo. Ntáχρο ch'an kixin:

—Ntihi itjen ijnko ch'in tjechjina tsikitohe ch'in Félix.

¹⁵ A ntá tíó kjuak'é chjasin Jerusalén ntá tí sín nchat'a t'etqan la ko tí sín t'etuenhen tí sín judío a mé kjuijitsjehe sín tí janhan ntá kjuanchia sín jie kuénte ch'in Pablo. Kjuanchia sín kixin chrók'óyánni tí jehe ch'an.

¹⁶ Ntá janhan kjuátqah kixin: Jeheni chojni t'etqan kuénte sín romano mé kuénhyani ts'etqanni its'en ninkexró tí naxa tsqchjinahya tí ch'in kjuasin jie kixin tsontáχρο ch'an á chaxín tí jie tjanchia sín o náhi.

¹⁷ Ntá tí sín judío kui ntihi ntá chuanyha má. Kjónté tí yaon chr'éxin kjuak'etjaxian tí ntakitqexián ijie chojni la kuétoan kixin síxrakoa tí ch'in Pablo.

¹⁸ A ntá tí sín kóchjina kohya ninkehó ichro sín kuénte tí jehe ch'an éxi kjuenkayáxian janhan chróntáχρο sín.

¹⁹ Jehó nínkakuénxín sín ch'an kixin tí nkehe tinkáchónki ch'an la ko nínkakuénxín sín ch'an kixin tí nkexro it'in Jesús mé ik'uén ch'an ntá jie ntáχρο ch'in Pablo kixin tjechón ch'an ínaa.

²⁰ Janhan la nonahya nkexrí tsitqexin tí ijie ch'an ntá kjuánchánkíhā tí ch'in Pablo á tjinkaon ch'an sátsji ch'an chjasin Jerusalén kixin ntaha tsitqexin tí jie ch'an.

²¹ A ntá jehe ch'an tsíkjanhia ch'an kixin tí ch'in imá t'etqan mé chrókjuinchekitqexin ch'an ijie ch'an. Ntá kuétoan janhan kixin naxa ntihyó tsjak'echjina ch'an tsononajia janhan nkesá tsétuanhan ch'an sátsji ch'an ntiha —ichro ch'an.

²² A ntá ch'in Agripa ntáche ch'an tí ch'in Festo kixin:

—Kjaxian janhan tjinkávan tsjnhan tí nkehe tsochrónka tí ch'in a.

Ntá kjuátqhe ch'in Festo ntáχρο ch'an kixin:

—Ntóye tsinhín nkehe tsochrónka ch'an.

²³ Ntá tí yaon chr'èxin tí ch'ín Agripa la ko tí tjan Berenice kjuíji sín la k'uúixenhen sín la ko tí sín soldado t'etóan tsíjkjkaó sín, la ko k'uúixenko sín iso chojni tjetóan kuènte chjasin ntiha. Ntá k'uetóan ch'ín Festo kíxin tsjixrakoa tí ch'ín Pablo.

²⁴ Ntá ntáχρο ch'ín Festo kíxin:

—Jaha ch'ín rey Agripa tinhín la ko tinhínrá kaín rá tsíkójnksotá ntihi. Tsjehérá tí ch'ín Pablo itjen ntihi. Kaín tí sín judío k'ueka sín ch'án jie tí chjasin Jerusalén la ko kjaxin chjasin Cesarea ntihi la kuítóehya sín, tjanchana sín kíxin chrók'uen ch'án.

²⁵ A ntá tónhenni kíxin kohya jie jie kjuasin ch'án kíxin chrók'uen ch'án. Kjánchó jehe ch'án mé tsíkjanchia ch'án kíxin tí ch'ín imá t'etóan chrókjuinchekitóexín ijie ch'án. Ntá kjuenkayáxian kíxin tsétuanhan ch'án sátsji ch'án ntiha.

²⁶ Nonahya nkehe chaxín tsokjian ts'áyéhe tí ch'ín t'etóan. Ntá jie kuétóan kjuikakjín sín ch'án kjuíkkaó sín ch'án tí tjejóni ntihi kíxin tjetóan kíxin jaha ch'ín Agripa la ko kaín rá tjejórá ntihi tsjančankíhírá ch'án kíxin mé tsónóna janhan nkehe tsokjian.

²⁷ Méxra náxrjónhya chróchr'an ijnko tí chojni tjechjina náxa nonahya nkehe tí jie t'eka sín ch'án.

26

Ch'ín Pablo nkayakon tí ch'ín rey Agripa chrónka ch'án tí jie t'eka sín ch'án

¹ Ntá tí ch'ín rey Agripa a mé ntáche ch'án tí ch'ín Pablo kíxin:

—Ó nchóxon jahvá tsóchronka —ichro ch'án.

Ntá tí ch'ín Pablo mé kjuaya tja ch'án ntá kjuankíxin nixja ch'án, ntáχρο ch'án xíkíhi:

² —Chána kíxin tsonixja nkayakuan tí jaha rey Agripa tsóxrjanka kaín tí jie t'ekana tí sín judío.

³ Ó noheni kíxin jaha la ó noha jína kuènte tí ley la ko tí nkehe tinkáchónki tí sín judío, la ko jaha noha nkehe tí kjuachaxín sín kíchó sín. Méxra xrjannóaha kíxin tjak'etinhín jína.

Chrónka ch'ín Pablo nkexrí kjuák'e ch'án tí ósé

⁴ Kaín tí sín judío la ó nohe sín nkexrí k'uekjak'é tí chjasenná la ko chjasin Jerusalén tí náxa k'uéntasoána.

⁵ Kjaxin jehe sín la ó nohe sín la kjá jína chróchronka sín kíxin tí náxa k'uéntasoána la k'uéfariseona. A ntá tí sín fariseo a mé antsí má kjuínchexiteyéhe sín tí ley kuènte tí nkehe tinkáchónkini.

⁶ Ntá ijie sijnchekitóexián jieña kíxin níngaon tí sín judío a kíxin tjechónhan kíxin Dios mé sinchexéchón chojni inaá xíkaha tsíchénka ch'án tí sín tsík'axrjenúximí.

⁷ Tí teyó tribu tsík'axrjeníxin ch'ín Israel mé tjejóchónhen sín kíxin ts'íkon sín tsoxiteyá tí nkehe tsíchónka Dios. Méxra xraxínkaon sín Dios nchakotjín la ko tie. Méxra mé xíkaha tjechónhan, jaha rey Agripa, la mé xíkaha níngakonna tí sín judío ijie.

⁸ ¿Á titekákonhyará jahará kíxin Dios sinchexéchón chojni tsík'en?

Ch'ín Pablo k'uéninkakonhen ch'án tí chojni tinkáchónki Ìnchéni

⁹ Janhan mé kjaxin k'uekjekayáxian nchónhya nkehe k'uénínkakonhan tí sín tinkáchónki Jesús tí nkexro tsíkjixín chjasin Nazaret.

¹⁰ Mé xíkaha kjaxin k'uekjít'a chjasin Jerusalén. Tí sín nchat'á t'etóan mé kjuanjón sín kjuachaxín kíxin janhan tsochr'áxanhan ntóechiso nchónhya tí sín tinkáchónki Ìnchéni. Ntá tíó k'óyán sín tí sín a mé janhan la ntáxrjan kíxin ó nchóxon xíkaha kónhen.

¹¹ Nchónhya veces kjuúntakjasóte tí sín tinkáchónki Ìnchéni kíxin chrókúitóhe sín tí nkehe tinkáchónki sín. Mé xíkaha k'uekjít'a kaín xín njnko kíxin imá k'uénínkakonhan tí jehe sín la xíkaha k'uájichráha sín kjónté sátsíkji sín chjasin ókjé.

Chrónka ch'ín Pablo nkexrí kuínkáchónki ch'án Ìnchéni

(Hch. 9.1—19; 22.6—16)

¹² Méxra xra ó sákjuia janhan chjasin Damasco. Tí sín nchat'á t'etóan mé ó kjuanjón sín kjuachaxín kíxin xíkaha t'aha sín xra.

¹³ A ntá tí ntja a jaha rey chrókónoha kíxin chonkíxin k'uúkan éxí ijnko xrohi t'inkaséyan kuixín nkaya nkajní antsí má fuerte la kánhyó fuerte tí xrohi kuènte yaon la tí t'inkaséyan mé k'uantatjen tí janhan la ko tí sín xríkjan.

¹⁴ Ntá kaín ni kjuútsínkani nonte ntá xríngaha kuínhan nixja ijnko nkexro mé nkiva hebreo nixjajín ch'án. Ntáχρο tí nkexro a kíxin: “Saulo, Saulo, ¿nkekuènte níngakónna xríjtéyá tí janhan? Jahvá nchekjasóte asán kíxin tjanjónkoa tí janhan. Éxí yóhe ijnko koxinta kónínkaon va tí chriáte sín va chica yo mé xíkaha jaha.”

¹⁵ Ntá kjuánchánkiá kíxin: “¿Xá nkexro jaha?” Ntá tí nkexro me kjuátéhe kíxin: “Janhan mé Jesús mé tí nkexro chréhé jaha.”

¹⁶ Ijie t'aya jaha, tjak'exián totá. Janhan kjuánjuan kjuachaxin kixin k'uikuan tí janhan ijie kixin jaha sích'ena xra. Janhan kjuéyá tí jaha kixin tsochéna chojni kixin k'uikuan tí janhan la ko tsochronka tí nkehe tsjákohá inaá tí xik'ikuan tí janhan inaá.

¹⁷ Janhan ts'ayakonhan kixin kohya nkehe sit'aha tí sín judío la ko tí sín jehya judío. A ntá jie t'etöan satsjia.

¹⁸ Méxra t'etöan satsjia tí t'ejó tí jehe sín kixin takítjenkia ikon sín kixin í ts'ajihya sín ntja sítie la ts'aji sín ntja t'inkaséyan la ko tsochóntahya tí jínahya kjuachaxián ts'etuénhen tí jehe sín. Jehe sín mé tsinkáchónki sín tí janhan. Ntá janhan ts'áyaha sín la tsjiin ijie sín la ko tsjtonhen sín tí nkehe ts'áyehé kaín tí sín tsikjinchetjóá Dios," ichro Ìnchéni.

Ch'ín Pablo kuítekaon ch'án tí nkehe tsik'ikon ch'án

¹⁹ Mé xikaha jaha rey Agripa kjuintaxiteyáha tí nkehe k'uikuan kujxin nkaya nkajni.

²⁰ Saoxín kjuákoḥa tí sín síin chjasin Damasco, la ntá chr'éxin chjasin Jerusalén, la ko kuente tí estado Judea ntá kjaxin kjuákoḥa tí sín jehya judío. Kjuákoḥa sín kixin chrókuítehe sín ijie sín, la chrókjan sín chrókuinkáchónki sín Dios, la ko chrókuákoḥin sín xra jina kixin chaxín ó kjuítóxinñin sín tí nkehe tinkáchónki sín.

²¹ Mé xikaha tí xra tséxinna tí sín judío a nkaxenhen nínko la tjinkaon sín chrók'óyanna sín.

²² Ntá kjuasáyé Dios kjuínkítsana la ntoá itjén ijie tjákoḥa kaín chojni ntsínsí la ko chojni ihyé la ninkehó k'uantaxianhya kuente tí nkehe tsíchrónka tí sín tsichrónka itén Dios la ko tí nkehe tsíchrónka ch'ín Moisés tsonhen,

²³ Kixin t'ichjánxin its'en Cristo la ko tsoxechón ch'án inaá. Tí itén ch'án éxí ijnko xrohi ts'inkaséyanxín tí sín síin ntihí la ko tí sín síin í so nación kixin tsaáxin sín.

Ch'ín Pablo nixjehé ch'án ch'ín Agripa kixin chrókuinkáchónki ch'án Ìnchéni

²⁴ Mé xikaha ichro ch'ín Pablo kixin kohya jie kjuasin ch'án ntá tí ch'ín Festo mé itsen k'uèya ch'án kixin:

—Pablo jaha la kjá tsik'ixikján. Imá tsikjinchekuáxian mé xikaha tsikólókoxián —ichro ch'án.

²⁵ Ntá kjuátēhe ch'ín Pablo kixin:

—Jehya tsik'ixikjánna. Jaha Festo imá tjuaha. A ntá tí nkehe ntáxrjan la ijnko nkehe jina la ijnko nkehe chaxín.

²⁶ Ntíhi itjen tí ch'ín rey Agripa. Jehe ch'án mé jina nohe ch'án kaín tí nkehe a. Méxra tjenixjaha ch'án jnkojina kixin ó nòna kixin jehe ch'án ó nohe ch'an kaín nkehe kónhen kixin jehya ijnko nkehe imó kónhen tíha.

²⁷ Jaha, rey Agripa, zá titekávan tí nkehe tsíkjako tí sín tsíchrónka itén Dios ósé? Janhan la ó nòna kixin titekávan jaha.

²⁸ Ntá kjuátēhe ch'ín Agripa ntáχρο ch'án kixin:

—Ó antsíkoá chrokuacha chrókuachróena kixin chrók'ónana cristiano —ichro ch'án.

²⁹ Ntá ntáχρο ch'ín Pablo kixin:

—Ntáxrjan kixin á isé tsoxrjanka o á séhya la Dios mé tjinkaon kixin jehya jahvá chrókuinkáchónkia ch'an. Náhi. Kjaxin tjinkaon ch'án kixin kaín nkexro tjejótinñin chrók'óna sín éxí tí janhan kjánchó xikahya chróchóna sín cadena.

³⁰ Ntá kjuixin nixja ch'ín Pablo ntá k'uínkatjen tí ch'ín rey, la ko kjaxin tí ch'ín gobernador, la ko kjaxin tí tjan Berenice, la ko kaín xín tí chojni tjejótxajin ntíha.

³¹ Ntá kaín sín k'uaxrjenta sín la ikjo sín kichó sín. Ntáχρο sín kixin:

—Kohya jie tsíkjasin tí ch'ín a kixin chrók'uenxín ch'án la ko chrókuak'echjinaxín ch'án ntqechiso.

³² Ntá tí ch'ín Agripa ntáche ch'án tí ch'ín Festo kixin:

—Ó nchoxon chrókuánjuan kjuachaxin sáchrókjui tí ch'ín a tí jehe ch'án chrókuanchahya ch'án kixin tí ch'ín imá t'etöan sinchekítöexin ijie ch'án —mé xikaha ichro tí ch'ín Agripa.

27

Ch'ín Pablo sákuí ch'án chjasin Roma

¹ Ntá k'uetoan sín sátsjini nación Italia. Tí ch'ín Pablo la ko í so sín tjejóchjina a mé k'uáyéhe ijnko ch'ín capitán mé it'ín Julio. Jehe ch'án me ijnko policia kuente tí ch'ín t'etöan Augusto César.

² Ntá k'uixenhenni ijnko ntabarco tsíkjixin nó puerto Adramitio, la ó chjina sátsji tí puerto nó estado Asia. Kjaxin tjejókoni tí ch'ín Aristarco tsíkjixin chjasin Tesalónica nó estado Macedonia.

³ A ntá tí yaon chr'éxin mé kjujini ti puerto chjasin Sidón. Ntá ch'in Julio mé ikjo jnkojina ch'in Pablo ntá chjéhe ch'an kjuachaxin kixin sátsjitsjehe ch'an tí chojni chóxin ch'an ntíha kixin tsjinkjitsa sín ch'an.

⁴ Ntá chr'éxin sákjuixinni chjasin Sidón. Ntá kjujini ijnko isla it'in Chipre la nó tja kjonni kuitóhe tíha la imá chjéhe xrinto.

⁵ Ntá k'uatöyeni tí ntayaon chjinaxón chjasin Cilicia la ko Panfilia la ntá kjujini chjasin Mira estado Licia.

⁶ A ntá ntíha tí ch'in capitán, tí ch'in k'uuetuenhen tí sín soldado a, mé k'uitja ch'an í jnko ntabarco tsikjixin nó chjasin Alejandría sátsji nó nación Italia. Ntá ntáchro ch'an kixin tíha sátsjikoni kixin tsjjini ntíha.

⁷ Nchónhya yaon kjujixinni kixin imá iyó la imá xra kjujini chjino chjasin Gnido. Ntá naxa chjéhe xrinto tsanká ntá k'uátsínkani chjinaxón Salmón ntá kuinkátjixinni chjino tí isla Creta.

⁸ Ntá xikahó imá xra k'uátsínkani chjinó chrínta ntá kjujini ijnko chjasin it'in Puertos Jina chjino chjasin Lasea.

⁹ Ntá k'uitjáyannki nchónhya yaon, ntá ó kjuixraká tí yaon xitjahya sátsjiko sín ntabarco chritaón ntayaon kixin ó kóchjina tí nchakuen kin. Méxra ch'in Pablo nixjehé tí sín a.

¹⁰ Ntáchro ch'an kixin:

—Tinhínrá tí nkehe tsoxrjanka. T'íkuan kixin nchónhya kjuachrakon tsonhen. Sinchek'itjáyanni tí ntabarco a la ko tí nkehe tjinká la kjaxin jeheni chrók'uitjáyanni —ichro ch'an.

¹¹ A ntá tí ch'in capitán kuènte tí sín soldado a mé antsí má tjinkaon ch'an chrókuinhin tí nkehe chrónka tí ch'in tjiko ntabarco la ko tí nkehe chrónka tí inché tí ntabarco a ntá tí nkehe ntáchro ch'in Pablo la náhi.

¹² Jehya jina kixin tí puerto ntahó chrók'uejóni ntá chrók'uatsínkajia tí nchakuen kin, ichro sín. Kaín sín kjuenkayáxin sín kixin íchá jina sátsjixinni ntíha kixin ákué xitjahya chrókjujini chjasin Fenice, ijnko puerto estado Creta nó chók'á noroeste la ko suroeste, la ntaha chrók'uejóni ntá chrók'uatsínkajia tí nchakuen kin.

Tí xrinto chjéhe chrítaón ntayaon

¹³ Ntá kjuankíxin chjehe xrinto kjuixín nó sur kjánchó kánhyó fuerte ntá kjuenkayáxin sín kixin kjá jina sátsjini.

Ntá sákjuixinni ntíha kjánchó kjónté naxa sákjuíni chjinaxón tí chrínta ti isla Creta a.

¹⁴ A ntá chr'éxin ikjuí ijnko xrinto kjuixín noroeste k'uintaté tí ntabarco.

¹⁵ La kjuankíxin xrinto sákjuíko tí ntabarco kixin tsjachahyani sátsjini tí sítjixin tí xrinto a. Ntá t'ichjánxin kuitoheni sákjuíko xrinto tí ntabarco tjejóxenhenni.

¹⁶ Ntá k'uátsínkani chjino ijnko isla ntsí it'in Claudia kixin ntíha mé kánhyó tjiän chjéhe xrinto. Ntá imá xra k'uitjijanni tí ntabarco ntsí t'etenixín nóton ntabarco jie.

¹⁷ Ntá kjuixín kjuínchek'it'ótjen sín tí ntabarco ntsí ntá imá chrakon sín ntá kjuínchenteto sín tí ntabarco jie kixin kohya nkehe tsonhen. Kjaxin tóxakonhen sín chrakon sín tsíkjine nchesen tí ntabarco tí tsjiji sín tí it'in Sirte. Ntá kuakjinjin sín tí ka chóna ntabarco ntá kuitóhe sín sátsjiko xrinto.

¹⁸ Ntá tí yaon chr'éxin ntá naxa imá tjiän chjéhe xrinto. Ntá ik'ue sín tí nkehe sítjinká tí ntabarco a chrínta ntayaon kixin kánhyó tsöye.

¹⁹ A ntá tí yaon nixin a mé itjani ó kuakitsjexinni tí nkehe kuènte tí ntabarco.

²⁰ Isé k'uikonhyani yaon la k'uikonhyani konotsé kixin imá tjiän chjéhe xrinto la ko kjaxin ó k'uitjáyenhenni kaín tí tjenkayáxinni kixin naxa chrókuaáni.

²¹ Ntá ó k'uatsínka itsjé yaon kjónehanyi ntá k'uínkatjen ch'in Pablo nixjehé ch'an kaín tí sín tjejóxenhenn ntabarco a ntáchro ch'an kixin:

—Chrókuitekáoaná tí nkehe xrxanka kixin chrókuitóheni tí estado Creta ntá chrók'uitjáyenhanyi tí nkehe tjinká tí ntabarco a.

²² A ntá ijie la tóxakuanhyará kixin kohya nijnko tí jahará its'enrá kixin kjónté tí ntabarco la ts'itjayan.

²³ Ntá tí tie a mé k'uíkuan ijnko ángel tsíchr'an Dios tinkachónkia la ko t'aha xra.

²⁴ A ntá tí ángel mé chrónka kixin: “Chrakonhya jaha Pablo. T'ichjánxin tsjasán tí tjen tí ch'in César t'etjan la kjaxin Dios la tsjinkjitsa jaha la ko tí sín tjejókoa kixin ts'enhya sín.”

²⁵ Méxra chróchrakonhyará jahará kixin tí Dios tinkachónkia la chaxín nchexiteyá tíha, éxi tsintáchro tí ángel.

²⁶ Kjónté ó jehí t'ichjánxin sátsjikoni xrinto ijnko nonte jnkosiné ntayaon —ichro ch'an.

²⁷ Kjuixín k'uátsínka iyó semana ntá ijnko tie ntá kjujini ijnko ntayaon it'in Adria ntá sákjuíko tí ntabarco ijnko lado la í jnko lado ti xrinto. Ntá chjino k'áxrótjen ntá tí sín tjiko ntabarco mé ó kónohe sín kixin ó chjina kjuixraká sín ijnko nonte xamá.

²⁸ Ntá kjuáchroa sín tí nkekjaín nínkaxín tí ntá mé chóna treinta y seis metro nínkaxín. Ntá sákjuini kjinhya la ó xíkjachroa sín la veintisiete metro ó nínkaxín.

²⁹ Imá chrakon sín kixin ts'itjatón tí ntabárcō itjō ntá kjuinkajin sín noó chica gancho tí nóton tí ntabárcō a kixin ntahó tsochónhen tí ntabárcō hasta chrók'uinkaséyan.

³⁰ Ntá tí sín tjiko ntabárcō kjuenkayáxin sín sáchrókjui sín ntá kjuankixin kjuinkajin sín tí ntabárcō ntsi chrítaón ntá éxi tjinkaon sín chrókjuinkajin sín tí gancho chóna tí kja ntabárcō.

³¹ A ntá ch'ín Pablo ntáche tí ch'ín capitán la ko kaín tí sín soldado kixin:

—A ntá tí tsitgehya tí sín i ntihi nkaxenhen ntabárcō ntá xitjahya tsaará —ichro ch'án.

³² Ntá tí sín soldado a mé kóchrinjint'ō sín tí hñō kuénte ntabárcō ntsi tsitōhe sín tsjiankí ntá.

³³ Ntá chjina t'inkaséyan a ntá ch'ín Pablo nixjehē ch'án kaín tí sín siín ntiha ntáchro ch'an kixin chrókjóne sín ichrén nkehe. Ntáchro ch'án kixin:

—Ó k'uátsínka iyó semana k'uejóchrinhyará la ko kjóntehyará.

³⁴ Tinhínrā t'ichjánxin chrókjónterá ichrén nkehe tí tjínkaónrā tsaará kixin ntihi la kohya nkexro ts'itjayan la nijnko tí kaxihi chóna kjará ts'itjayan.

³⁵ Ntá xíkaha ichro ch'ín Pablo ntá kuákja ch'án ijnko niotja a la ntiha tí tjejó kaín sín ntá kjuanchia ch'án kjuasáyē Dios ntá kóchrít'ō ch'án ntá kjuankixin kjóne ch'án.

³⁶ Ntá kóchéhe sín kaín sín kjuankixin kjóne sín kjaxin.

³⁷ Kaínni tsik'ixenhenni ntabárcō mé iyó ciento setenta y seis chojni.

³⁸ Ntá kjuixin kjóne sín la kókjehē sín ntá ik'ue sín tí noa trigo a tjínká tí ntabárcō a chrínkí tí ntayaon a kixin kánhyó tsoyē tí ntabárcō a.

Tí ntabárcō kjuixin k'uániánki ntá

³⁹ A ntá ó k'uinkaséyan, a ntá tí sín tjiko ntabárcō la kjuátsoanhya sín tí nonte ntá k'uikon sín ijnko chrinta ntá. Ntáchro sín kixin ákué tsjachahya sín sátsjiko sín tí ntabárcō ntiha.

⁴⁰ Ntá kóchrinjint'ō sín tí hñō síchroéxin tí gancho kixin ntahó tsitōhe chrínkí ntayaon. Ntá kjuínchenta sín tí nkehe tjikoxín sín tí ntabárcō a. Ntá kjuínchek'it'ótjen sín tí ka tjiko nkayakon tí ntabárcō. A ntá tí ntabárcō kjuankixin sákjuí chrinta ntá.

⁴¹ Xrínahya kjuiji ntabárcō tí iyó kójkójéxin ntayaon ntá ntiha kjuikjiat'ó tí kja tí ntabárcō tí nchesen siín ntiha. Ntá í xitjahya nchekinkí ninkehó, a ntá nóton tí ntabárcō kjuankixin síxika kixin imá sítji chjéhe ntá a.

⁴² Ntá tí sín soldado a mé tjinkaon sín chrók'óyán sín tí sín tjejóchjina kixin tjinkakonhya sín kixin ninkexró sáchrókjui ókjé.

⁴³ A ntá tí ch'ín t'etuenhen tí sín soldado a mé tjinkakonhya ch'án kixin its'en ch'ín Pablo ntá kjuanjonhya ch'án kjuachaxin. Ichá k'uetōan ch'án kixin tí sín jina tjitaón ntá la senó sátsji sín kixin tsjiji nonte xámá

⁴⁴ la ko tí sín noehya tsjitaón ntá a mé sátsjiko sín tí ntaba la o it'ō tí ntabárcō. Ntá xíkaha kaín ni kjuijini tí nonte xámá la ó kuaáni.

28

Itjen ch'ín Pablo tí isla Malta

¹ Ntá tió tjejóni kaín ni kuaáni ntá kónoheni kixin tí isla la mé nchek'in sín Malta.

² A ntá tí sín chjasin ntiha mé imá jina kjuinkítsa sín kaín ni la kjuaka sín ijnko xrohi jié kixin imá kín kixin síf'aniá chrin. Ntá k'uèya sín kixin tsochjinani kaín ni tsochjixroheni.

³ A ntá ch'ín Pablo mé sákjuikakja ch'án í so njo tsixámá ntá kjuasinkáte ch'án tí xrohi a. Ntá xrínahya k'uaxrjenkixin ijnko konche tí xrohi a kixin imá sóa ntá xrínahya k'uúsimá itja ch'ín Pablo.

⁴ Ntá tí sín chjasin ntiha mé k'uikon sín tí konche kjítjankítjen itja ch'án ntá ikjo sín kichó sín. Ntáchro sín kixin:

—Kjá tí ch'ín a la ijnko chojni tsíkjàya a kixin kjónté kuaá ch'án k'uénxinhya ch'án ntayaon la Dios la í tjinkakonhya kixin naxá tsjak'echón ch'án.

⁵ A ntá jehē ch'án kótsjénka ch'án itja ch'án chrítaón tí xrohi kixin ntiha ts'anótjen tí konche, ntá jehē ch'an la kohya nkehe kónhen ch'án.

⁶ Ntá kaín sín tjejóchónhen sín kixin ách'e ts'atjoyé itja ch'án o ách'e its'en ch'án. Ntá kjuixin k'uejóchónhen sín isé la k'uikon sín kixin kohya nkehe kónhen ch'án ntá kjuítóxin sín tí nkehe kjuenkayáxin sín la ntáchro sín kixin jehē ch'án mé ijnko dios tñha, ichro sín.

⁷ Ntá chjino tí k'uejóni a mé itjen nontē ijnko ch'ín t'etōan kuénte isla me it'in Publio. Mé jina kjuanjon ch'án kjuachaxin k'uejóni ntōe ch'án la kjuanjon ch'án nkehe kjóneni iní yaon.

⁸ Ntá it'é tí ch'ín Publio a mé tjetsínka ch'án kixin níhi ch'án chóna ch'án sóa la ko chúnjni. Ntá ch'ín Pablo sákjuítsjehē ch'án la kjuixin nixjehē ch'án Dios, ntá kjuák'etja itja ch'án tí ch'ín a ntá kuitōhe ch'án jina.

⁹ Mé xíkaha kjaxin kóchjina í so tí sín níhi siín tí isla ntá kaín sín kuitōhe sín jina.

¹⁰ Na ntá imá kjuikosáyehe sín ch'án. A ntá chr'éxin tió kjuixin k'uixenhenni ntabárcɔ inaá ntá kjuanjon sín kain nkehe t'ichjánxinhinni sátsjikoni.

Kjuuji ch'in Pablo chjasin Roma

¹¹ Ntá k'uaátsínka iní ntájɔ tjejóni tí isla ntá k'uixenhenni ijnko ntabárcɔ mé ntahó tsikítqhe k'uaátsínkajia tí nchákuen kin. Tí ntabárcɔ a mé tsíkijxin chjasin Alejandria la ko mé chóna nkehe tsíkjanoya chóna ihnjé dios Cástor la ko Pólux.

¹² Ntá sákjuíni ntá kjuíjini puerto chjasin Siracusa la ntaha kútoheni iní yaon.

¹³ Ntá xík'ixenhenni tí ntabárcɔ la k'uaátsínkani chjinaxón tjen ijnko nonte ntá kjuíjini chjasin Regio. Ntá tí yaon chr'éxin a ntá kjuankíxin chjéhe xríntɔ kjuixín nó sur; ntá yaon yóxin ntá kjuíjini chjasin Puteoli.

¹⁴ Ntá ntíha xetani iso kichó ni, a ntá tjinkaon sín ts'ejókoni sín ntíha. Ntá k'uejókoni sín ijnko semana ntá chr'éxin sákjuíni chjasin Roma.

¹⁵ Ntá tí sín kichó ni chjasin Roma la ó nohe sín kíxin tsjjini. Ntá iso sín la xetani sín ntja chjasin Foro Apio la ko í so sín xetani sín chjasin Tres Tabernas. Tió tí ch'in Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án.

¹⁶ Ntá tió kjuíjini sín chjasin Roma ntá tí ch'in capitán kjuikénhen tí sín tjejóchjina, k'uaáyehé tí ch'in jefe ts'ayakonhen ch'án. A ntá ch'in Pablo la kútohe ch'án ókjé kjuák'e ch'an la ijnko soldado a k'uaáyakonhen tí jehe ch'án.

Ch'in Pablo kjuako chjasin Roma

¹⁷ Ntá k'uaátsínka iní yaon ntá tí ch'in Pablo a mé k'uíyehé ch'án kain tí sín judío tjeoan kuénte chjasin Roma. Ntá tió kjuixin kójnkotsé kain sín ntá ntáchro ch'án kíxin:

—Kichóni, kohya ninkehó jie kjuásian kíxin chrókónínkakonna tí sín judío la jehya kíxin ninkákonxian tí nkehe k'uekínkáchónki tí sín tsík'axrjeníxinni. A ntá kjónté itséna sín kjuak'echjina sín tí janhan chjasin Jerusalén la ko kjuínchekjasótena tí sín romano a.

¹⁸ Ntá k'uitjahya sín ninkehó jie chonta. Ntá tjinkaon sín chrók'uatjántana sín kíxin k'uitjahya sín ninkehó jie chrók'ueñxian.

¹⁹ A ntá tí sín judío a mé imá kónínkaon sín tjanchia sín jie. Ntá t'ichjánxin tsjanchiani kíxin tí ch'in César mé chrókjuínchekitqexín ch'án nkehe tí jie chóntani, kjónté chóntahyani ninkehó jie ts'eka tí sín tí nacióon kuénténi.

²⁰ Méxra k'uíyahará kíxin tjinkaonni ts'íkuan tí jahará la ko tsonixjaharáni kíxin tinkáchónkini tí nkexo tjejóchónhen kain tí sín israelita mé xíkaha t'ikonrá kíxin tjechronte-toxínni cadena ntíhi.

²¹ Ntá ntáchro sín kíxin:

—K'uaýèhyani ninkehó xroon chrókjuixin Judea kuénte tí jaha la ko kuihya nijnko tí sín kichó ni judío chróntáchro sín ichrén nkehe jínahya tsíkijch'e.

²² Tjinkaonni chrókjuínchekitqexín nkexrí tjenkayáxian kíxin ó noheni kíxin itsjé chjasin t'ántaxínhin sín tí nkehe nixín tjákua —mé xíkaha ichro sín.

²³ Ntá chr'éxin kjuéyá sín ijnko yaon tsinhin sín nkehe tsochrónka ch'in Pablo. Ntá kójnkotsé nchónhya chojni tí nchia kjuák'e ch'án. Kuenté yaon chrónka ch'án nkexrí tí kjuachaxin kuénte Dios. Nixjehe ch'án sín kíxin chrókuitekaon sín tí nkehe kjuako ch'in Jesús, la chrónkaxín ch'án kíxin nkexrí nixja tí ley kuénte ch'in Moisés la ko tí tsíkjin tí sín profeta ósé.

²⁴ Ntá iso tí sín mé kuítekaon sín tí nkehe ntáchro ch'in Pablo. A ntá í so sín na kuítekakonhya sín.

²⁵ Ntá jnkokoáhya kjuenkayáxin tí jehe sín la iso sín tjinkaon sín kíxin sáchrókjui sín, ntá ch'in Pablo mé ntáchro ch'án kíxin:

—Ntoá nixja tí nkehe chénka Nchákuen Dios tí sín tsík'axrjeníxinni ósé chrónkaxín ch'in profeta Isaias ntáchro kíxin:

²⁶ Sátjia nixjehé tí chojni a kíxin jehe sín kjónté tjejótinhin sín la tienxínhya sín, la kjónté tjejótsejehe sín la t'ikonhya sín.

²⁷ A ntá asén tí chojni tí chjasin í la tsík'óna imá cha la ntatsjon sín la tsík'íkjehe

la ikon sín la tsíchr'áto

kíxin t'ikonxínhya sín

kíxin tinhin sín la tjinkakonhya sín chrókuiénxín sín,

la tjinkakonhya chrókuiénxín asén sín.

Í tjinkakonhya sín chrókjan sín chrókuienkáchónki sín tí janhan kíxin ntá janhan chrókjuíntakitqəhə sín jina.*

* 28:27 28.26–27 Isaias 6.9-10

Mé xikaha tsíkjin ch'ín Isaías.

²⁸ Méxrā chrókónohará jahará kixin ijie tí sín jehya judío me ts'áyéhe sín tí nkehe tsjanjon Dios tsaáxin sín kixin jehe sín mé tsinhin sín.

²⁹ Ntá xikaha ichro ch'ín Pablo ntá tí sín judío sákjuí sín la tinkákjo sín kichó sín.

³⁰ A ntá ch'ín Pablo kuítóhe ch'án tí nchia tsíkjen ch'án iyó nánó. La kjuanjon ch'án kjuachaxin k'uéjó tí sín kjujitsjehe ch'án.

³¹ La kjuako ch'án tí kjuachaxin kuènte Dios la ko kjuako ch'án kuènte Ìnchéni Jesucristo. La kohya ninkexró k'uínkákonhēn tió kjuako ch'án. Ó tjen.

Tí xroon ikjin ch'ín Pablo chr'énhen ch'án tí sín romanos

Ch'ín Pablo ikjin xroon k'uáyéhe tí nínko chjasin Roma

¹ Janhan Pablo mé t'aha xra Jesucristo mé kjian tí xroon i. Kjueyána Dios kixin sít'aha ch'án xra tsjúkua tí tan jína tsaáxinni.

² Tíha mé tsintácho Dios senó kixin tsoxiteyá éxi nixja tí xroon nixjaxin tí sín tsíchronka itén ch'án ósé.

³ Tí tan a mé chrónka nkexrí tjen Ìnchéni Jesucristo Xjeen Dios. Jehe ch'án mé tsik'óna ch'án chojni k'uaxrjeníxin ch'án tí sín tsik'axrjeníxin tí rey David.

⁴ Tí kjuachaxin jie mé kjuakoxin kixin jehe ch'án mé chaxin Xjeen Dios kixin ó xechón ch'án la chóna ch'án Nchakuen Dios imá tjetoo.

⁵ Kjuasáyé Jesucristo k'uáyéheni kjuachaxin kixin sich'ehe ni ch'án xra sátsjichronkaxinni itén ch'án kixin kaín xín chojni chónhya ch'án kuenté chjasintajni chrókuitekaon sín ch'án la ko chrójuéhe sín ch'án.

⁶ Jahará k'uek'ejorá éxi tjejó tí jehe sín, a ntá jie la kjueyará Dios kixin chrókuítekaonrá Jesucristo.

⁷ Janhan ikjian tí xroon chr'anhánrá kaín rá tjejórá chjasin Roma. Tjuáhará Dios la kjueyará ch'án kixin tjóá chrók'uejórá. Kjuasáyé It'eni Dios la ko Ìnchéni Jesucristo kixin kjuanjon ch'án kjuaxroxin k'uáyéhérá.

Ch'ín Pablo tjinkaon chrókjuitsjehe ch'án chjasin Roma

⁸ Xrankixixin kjuachaxien Jesucristo tjánchaxian Dios kjuasáya kixin jahará ó kuítekaonrá ch'án la ko nkuíxin chjasintajni nixja sín nkexrí tinkachónkirá ch'án.

⁹ Dios, tí nkexro t'aha xra kaín asenná xrjanka tí tan jína kuente Xjeen ch'án, mé nohe ch'án kixin xráxin xráxinqavan tí jahará tíó nixjahá ch'án.

¹⁰ Xráxin tjáncháha Dios kixin tí chrókjuanjon ch'án kjuachaxin la chrókjuasántsahará.

¹¹ Kixin tjínkavan chrókjuasántsahará tí jahará kixin chrókjuínkítsa tí jahará kixin chrók'uitjará jína nkexrí chrók'uejórá ntoá.

¹² Me xikaha tsócháhará la ko tsóchána kixin jnkokóá tinkáchónkini Ìnchéni, jahará la ko janhan.

¹³ Kichóni, tjínkavan chrókónohará kixin nchónhya veces tjínkavan chrókjuásantsahará kjánchó naxá xitjahya tsjasán. Tjínkavan chrókjuasán kixin chrókjuít'a xra kuente Ìnchéni kixin chrókjuachani nchónhya chojni chrókuinkáchónki Dios éxi kjuít'a xra í so chjasin naxá chónhya sín Dios.

¹⁴ T'ichjánxin tsjáqoha kaín chojni, á chojni griego o á chojni jehya griego o á chojni nohe o á chojni noehya.

¹⁵ Mé xikaha xra ó tjéchnhan chrókjuasán chrókjuákohará tí tan tsaáxinrá tí jahará tjejórá chjasin Roma.

Tí kjuachaxin kuente tí tan jína

¹⁶ Tósuánaha xrjanka tí evangelio kixin táha ijnko tan jína kixin chóna kjuachaxin kuente Dios chrókuaáxin kaín xín tí chojni chrókuitekaon, mé saxín tí sín judío la ko kjaxin tí sín jehya judío.

¹⁷ Kixin tí tan jína kuente Dios tjákuexin tí jeheni kixin chrókótjuáxin ijjéni kixin tinkáchónkini ch'án la jehó ch'án tinkáchónkini. Exí ntácho xroon itén Dios kixin: "Tí nkexro kótjóá kixin kuítekaon sín Dios mé táhó ts'ejóchónxin sín."*

Tí jie tjasin chojni

¹⁸ Dios tjen nkaya nkajni mé tsóninkakonhen ch'án tí sín jínaha tjasin jie, mé sinchekjasóte sín ch'án. Tí jie jínaha tjasin sín mé t'inkákonhen kixin chrókónohe sín tí nkehe jína chaxin.

¹⁹ Jehe sín ó nohe sín jína nkexrí tjen Dios kixin jehe ch'án kjuakuexin ch'án tí jehe sín.

²⁰ Tí kjuachaxin kuente Dios kjónté t'ikonhyani la kjánchó noexinni kixin tí nkehe kjuích'éna ch'án. Kixin tí naxá k'ónaha chjasintajni kónoxin kixin jehó ch'án mé Dios t'etoo la ko chóna ch'án kjuachaxin jnkochrín. La ntá tí sín jínaha xitjahya tsontácho sín kixin k'uénoehya sín.

²¹ Kjónté nohe sín kixin xikaha itjen Dios la tjikosáyehya sín ch'án la ko ni tjanchehya sín ch'án kjuasáya. Tjenkayáxin sín tí nkehe ninkehó sinkíhya kixin jínaha asén sín la tí sítie ó kuítghe sín.

* 1:17 Habacuc 2.4

²² Kjónté ntáchro sín kixin imá nohe sín kjánchó imá lontj sín kixin antsí kjuasin sín jie.

²³ A ntá ó kjuixin kjuinkí sín tí nkehe tinkáchónki sín la ko kuítekakonhya sín tí kjuachaxiën Dios itjen jnkochrín, t'enhya. A ntá ijie tinkáchónki sín tí nkehe tsíkjanöya tóyöhe chojni it'en. Kjaxin tinkáchónki sín koxroxé tsíkjanöya la ko konche la ko iko chóna noó toté.

²⁴ A ntá xikaha Dios kuítóhe ch'án tí jehe sín kixin chrókjuich'e sín tí nkehe jínahya tjenkayáxin sín ntá xikaha ch'e sín ijnko nkehe chrókósuëxin sín ch'ehe kíchó sín

²⁵ kixin kuítekakonhya sín tí nkehe chaxín kuënte Dios, a ntá tí nkehe jínahya mé kjueyá sín. Kjuich'ëna sín dios kuënte sín tí nkehe tsíkjih'ëna Dios. A ntá tí nkexro kjuich'ëna tí nkehe la titekakonhya sín. Jehe ch'án mé chrókjuancheheni ch'án kjuasáya jnkochrín kixin jehe ch'án mé kaín tí nkehe síin mé kuënte ch'án. Amén.

²⁶ La ntá xikaha kjuich'e sín ntá Dios kuítóhe ch'án tí jehe sín kixin chrókjuich'e sín tí nkehe chrókósuëxin sín chrókjuich'e sín. Kjónté tí chojni chjin la kuítóhe sín tí ichjin sín la ntá kjuich'ëna sín asén sín chojni ntoa.

²⁷ A ntá kjaxin xikaha tí chojni ntoa kuítóhe sín chróchóna sín chojni chjin la tjinkaon sín tí nkehe ntoáhya. La ntá ch'e sín nkehe chrókósuëxin sín ch'ehe kíchó sín jnkokón ntoa sín. Mé xikaha mé tí cuerpo kuënte sín mé tsjasótëxin sín tí jie kjuasin sín.

²⁸ Tjinkakonhya sín tsoxraxinkaon sín Dios ntá jehe ch'án mé kuítóhe ch'án tí jehe sín kixin xikaha tsjenkayáxin sín tí nkehe jínahya kixin sich'e sín tí nkehe chrókjuich'ehya sín.

²⁹ Nchónhya jie chóna sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróchóna sín itsjé nkehe, la ko imá tjasin sín jie, la ko jehe sín chjinoxínhin sín, la ko tjinkaon sín chrók'óyán sín kíchó sín, la ko itje sín kjuanínkaon, la ko ch'ia sín la ko jínahya sín xriko sín kjuach'ia.

³⁰ T'ántaxínhin sín kíchó sín la ko nínkakonhen sín Dios, la ko jehó sín chrók'úetöan sín, la ko nchehnke sín, la ko jehó sín ch'ëna sín nkehe jínahya tjasixín chojni jie, la ko tjikosáyhya sín it'é sín la ko lné sín.

³¹ Tienxínhya sín la nexhiteyáhya sín nkehe nixja sín, la ko tjuëhya sín kíchó sín, la ko tjinkakonhya sín sinchek'itjáyenhen sín ichrén jie kjuasinhin kíchó sín, la ko tikonóehya kíchó sín.

³² Jehe sín ó nohe sín jína kixin nkexrí k'úetöan Dios la jehe sín ó nohe sín kixin tí jie kjuasin sín chrók'uenxín sín, la kjónté xikaha ó nohe sín, la naxá tjasin sín jie la kjaxin chéhe sín chrók'uikon sín ókjé nkexro chrókjuasin jie xikaha.

2

Dios nchekitöexín ch'án tí jie tjasin chojni

¹ Mé xikaha jahará xitjaha tsontáchrórá kixin chontahyará jie a ntá tékará jie tí í so sín tjasin jie. A ntá tí xikaha ch'erá la jahará xritjéyará nkexrí chrókjuasótëxinrá kjaxin kixin jahará jnkokón jie tjásinrá.

² Ó noheni kixin ntoá sínchekitöexín Dios tí jie kjuasin chojni kixin sinchekjasóte ch'án tí sín xikaha tjasin jie.

³ A ntá jahará la tékará jie í so chojni ntá jahará kjaxin la xikaha jnkokón jie tjásinrá. ¿Á tjenkayáxinrá kixin tsjachará tsinkeherá tí sinchekjasótiará Dios ní?

⁴ ¿Á kjoniehérá tí kjuaxróxin tsjéjehya tjanjon Dios kixin tjechónhen ch'án naxá nínkakuanhyará ch'án? A ntá jahará la kuiëxinhyará kixin Dios tjuàhará kixin tjinkaon ch'án chrókjuítóhérá tí nkehe jínahya tjenkayáxinrá.

⁵ Kjánchó jahará imá icha asánrá, tjinkákonhyará chrókjuítóhérá tí nkehe jínahya tjenkayáxinrá, a ntá antsí má nchek'ánkírá tí nkehe jínahya tsjasótëxinrá tí yaon tsjixixín tió tsonoxín kixin sinchekjasóte Dios chojni.

⁶ Jehe ch'án mé tsjenkehe ch'án jnkojnko chojni nkehe tí xřá tsíkjih'e sín.

⁷ Tsjanjon ch'án kjuachón ts'áyéhé tí sín tjeýá sín tí nkehe náxrjón la ko tí kjuachaxin ts'itjáyanhya la ko xráxin kjuich'e xřá jína.

⁸ A ntá tsonínkaon Dios sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. A ntá náhi, la íchá má kóxrjínhin sín kjuich'e sín tí nkehe jínahya.

⁹ Mé xikaha tsjasóte sín la ko kjuaxróxinhya tsonhen kaín tí sín kjuich'e tí nkehe jínahya, mé senó tí sín judío la ko kjaxin tí sín jehya judío.

¹⁰ A ntá Dios mé tsjanjon kjuachaxin la ko tsjanjon ch'án kjuaxróxin la ko tsjikosáyehe ch'án kaín tí sín kjuínchexiteyéhé ch'án kjuich'e tí nkehe jína, mé senó tí sín judío la ko kjaxin tí sín jehya judío.

¹¹ Dios la t'ikon kixin kaín chojni la jnkokón sínkí.

¹² Kaín tí sín tjasin jie kixin noehya sín tí ley tsíkjin ch'ín Moisés la kjónté chónhya sín tí ley la its'en sín. A ntá tí sín ó nohe tí ley tsíkjin ch'ín Moisés ntá tjasin sín jie, la tí ley a mé tsjanchia jie tsjasótëxin sín.

¹³ Jehya tí sín ó chrókúinhón tí ley la ó chrókótjuáxin ijíé sín. Náhí. Tí sín sinchexiteyéhe sín tí nkehe k'uetqan Dios mé tsotjuáxin ijíé sín.

¹⁴ A ntá tí sín jehya judío chóntahya sín tí ley t'etuenhen sín la ntá tió jehó sín chrókjuinchexiteyéhe sín éxi nixja tí ley la jehí jehó sín t'etuenhen asén sín.

¹⁵ Kíxin tí kjuinchexiteyá sín ch'e sín tí nkehe jína mé tjáqoxin sín kíxin asén sín xraxinkakonxin sín tí nkehe ntoá la ko asén sín tjanchankíhi sín á jína tjejó sín o náhi.

¹⁶ Itsi tí yaon la Dios mé sinchekitqexín kjuachaxin Inchéni Jesucristo kaín nkehe imó kjuich'e chojni éxi nixja tí tan jína tjákua janhan.

Tí sín judío la ko tí ley tsíkjin ch'in Moisés

¹⁷ A ntá jahará ntáchrórá kíxin jahará judíorá la tinkachónkirá tí ley tsíkjin ch'in Moisés la ko nchehnkerá kíxin tinkachónkirá Dios.

¹⁸ Ó nohará tí nkehe tjinkaon Dios la ko tí ley ó kjuaqohará kíxin chrókjuéyará tí nkehe jína.

¹⁹ Ihnkerá kíxin nohará tsjákohérá tí sín t'ikonyha la ko jahará mé xrohi ts'inkáséyanxin tí sín ixri sítié, ichrorá.

²⁰ Ntáchrórá kíxin nohará tsjákohérá tí sín noehya la ko tsjínkitsará tí sín tienxínhya kíxin jahará chontará tí ley chrónka kjuaxrexinkaon jína la ko tí nkehe chaxín, ichrorá.

²¹ Jahará tjákohérá í so chojni, a ntá jahará, ¿nkekuènté tjákoéhyará asánrá xíkaha? Jahará tjákohérá chojni kíxin chrókueéhya sín, a ntá jahará la, ¿nkekuènté teerá?

²² Ntáchrórá kíxin xitjahya tsochónta chojni yaá chojni chjin, a ntá jahará la, ¿nkekuènté xíkaha ch'erá? Ntáchrórá kíxin titekákonyhará tí nkehe tsíkjanoya, kjánchó jahará, ¿nkekuènté teerá tí nkehe tjeje siín nkaxenhen njnko?

²³ Nchehnkerá kíxin chontará tí ley, a ntá jahará chontahyará kjuasáyé Dios kíxin kjuinchexiteyéhyará éxi k'uetqan tí ley.

²⁴ Ntoá ntáchro tí xroon itén Dios kíxin: "Tí sín jehya judío la t'ántaxínhin sín Dios kíxin tí ijíará."

²⁵ A ntá tí chaxín kjuinchexiteyará tí ley tsíkjin ch'in Moisés la ntá jehya chónkó tsíkará xroye. A ntá tí kjuinchexiteyéhyará tí ley la éxi tsíkahyará ninkehó xroye.

²⁶ A ntá tí sín tsíkahya xroye kjánchó titekaon sín nkexrí t'etqan tí ley la tjejó sín éxi ó tsíka sín xroye kjónté chaxínhya chónnta sín.

²⁷ A ntá tí nkexro kuáhya xroye tí cuerpo chónnta kjánchó nchexiteyéhe tí ley, mé jehe sín tsjanchia sín jje tí jahará kíxin jahará kuitekákonyhará kjónté chontará tí xroon nixja tí ley la ko kjónté ó tsíkará xroye.

²⁸ A ntá tí xíkaha la chaxínhya judío jahará kíxin ó ntója ó chontará xroye la chaxínhya tsíkará xroye kíxin chrítaón cuépporá ó, chontará.

²⁹ A ntá tí chojni chaxín judío la t'ichjánxin chróchónnta sín xroye nkaya asén sín. Jehya tí ley chrók'uetqan xíkaha chrókonhen. Náhí. Táha la Nchakuen Dios. Jehya kíxin chojni chrókóxrjínhin kíxin ó nchoxon. Náhí. Dios mé tsqxrjínhin kíxin nchoxon tíha.

3

¹ ¿A ntá nkehe tsonhen kíxin ntáchro sín kíxin judío sín la ko nkehe tsonhen kíxin tsíka sín xroye?

² Chaxín xíkaha jína kíxin Dios kjuanjón tí itén ch'án saoxín k'uáyéhe tí sín judío kíxin chrókjuinchexiteyá sín.

³ A ntá ¿nkehe tsonhen tí jnkojín tí jehe sín chrókjuinchexiteyáhya sín? Kjónté xíkaha chrókjuich'e sín la, ¿á chrókúitqhe Dios chrókjuinchexiteyáhya ch'án tí nkehe tsintáchro ch'an?

⁴ Kjá náhi. Dios la sinchexiteyá kaín nkehe tsintáchro ch'án kjónté kaín chojni chrókjuich'ia. Ntáchro xroon itén Dios kíxin:

Tsontáchro chojni kíxin ntoá tí nkehe ntáchroa.

Tíha mé tsjachaxian tí tsjanchia sín jje.*

⁵ Tí jje chónntani mé tjáqoxin kíxin Dios mé nohe nkexrí sinchekitqexín ch'án ijíé chojni. ¿A ntá nkehe chróchroni? ¿A ntoáhya chrókjuich'e Dios kíxin chrókjuinchekjasóteni ní? (A ntá janhan nixja éxi nixja chojni ó.)

⁶ Kjá náhi. A ntá tí jehya ijnko nkexro jína tí jehe ch'án, ¿ntá nkexrí chrókjuinchekitqexín ch'án ijíé chojni chjasintajni?

⁷ A ntá tí chrókjuínkítsa tí kjuach'ia kuèntana kíxin chrókónoaxínrá tí nkehe chaxín kuènte Dios, ¿a ntá nkekuènté ts'ekaráni jje kíxin janhan mé ijnko chojni chónnta jje?

⁸ Tí xíkaha la, ¿á chrókjuich'eni tí nkehe jínahya kíxin ntá chrókui tí nkehe jína? Mé xíkaha ichro iso chojni t'ekani jje kíxin xíkaha tjakoní, ichro sín. Tí sín a chrókjuasóte sín kíxin xíkaha ichro sín.

* 3:4 Salmo 51.4

Káinni chóntani jie

⁹ ¿Ntá nkexrí? Jeheni judíoni la, ¿á antsí má tjeoanni, a ntá tí sín í so la, á náhí? Kjá náhí. Kíxin kaín ni chojni judíoni la ko tí sín jehya judío mé kaín ni kjuínchexiteyéheni tí jie kjuasinni.

¹⁰ Ntáchro tí xroon itén Dios kíxin:

Kohya ninkexró chrókjuich'e tí nkehe jína, la kohya nijnko chojni.

¹¹ Kohya ninkexró tienxín,

Kohya ninkexró chrókjueyá Dios.

¹² Kaín chojni k'uék'aji sín tí ntja jínahya la ko kaín chojni jnkokón k'uáji sín ntoáhya, kohya ninkexró chrókjuich'e tí nkehe jína la kohya nijnko chojni.†

¹³ Tí isin chojni la éxí tòye tsíxrankehe tsíxravá chojni

kíxin tí nejen chojni ch'iyaxín.

La tí veneno kuènte konche chóna ir'va chojni.‡

¹⁴ Tí ir'va chojni tsíkaón nkehe jínahya la ko kjuanínkaon.§

¹⁵ Xritínká sín kíxin tjínkaon sín chrók'óyan sín chojni.

¹⁶ Tí ntja k'uáji sín tíó xíkaha kjuích'e sín mé kjuínchek'itjáyan sín kaín kjuaxróxin k'uéchóna ókjé chojni.

¹⁷ Chónhya sín tí ntja tjanjon kjuaxróxin *

¹⁸ Kíxin kjuenkayáxinhya sín chróchrakonhen sín Dios.†

Mé xíkaha ntáchro itén Dios.

¹⁹ Ó noheni kíxin kaín tí nkehe nixja tí xroon chóna tí ley mé k'uètuènen kaín tí sín tinkáchónki tí ley kíxin ntá kaín chojni chjasintajni chrótání sín kíxin kaín chojni tsjasóte kíxin Dios mé sinchekítjexin ijíé kaín chojni.

²⁰ Kíxin ninkexró chrókjuacha chrókótjuáxin ijíé sín kíxin chrókjuínchexiteyéhe sín tí nkehe t'etjoan tí ley. Tí ley la jehó ch'e xrá tsoñoexinni kíxin chóntani jie.

Tsaáxinni kíxin tinkáchónkini Cristo

²¹ A ntá jehya tí ley chrókuaáxinni. La ntá ó kónoxín nkexrí Dios tsaáxinni la kjaxin tí xroon chóna ley la ko tí nkehe nixja tí sín profeta la ó nixja xíkaha.

²² Tsojtjuáxin ijíéni kíxin titekaonni Jesucristo kíxin kaín chojni chrókuaáxin tí tsitekaon sín tí jehe ch'án kíxin t'íkon ch'án kíxin jnkokón tsjehe kaín chojni.

²³ Kíxin kaín xín chojni kjuasin jie la k'uáyèhya sín tí kjuachaxin chrókuaáxin sín.

²⁴ A ntá kjuasáyé Dios kíxin k'uenyákonhenni Cristo Jesús la kótjuáxin ijíéni.

²⁵ Dios mé ichr'án ch'án Cristo, kuamá ijíéni, k'uenyákonhenni ch'án kíxin chrókuiinkáchónkini ch'án ntá chrókuaáxinni. Mé xíkaha kjuích'e Dios kíxin kjuakoxin ch'án kíxin ntoá kjuenkayáxin ch'án kíxin kónínkakonhya ch'án kjónté nchónhya jie tsíkjasinni senó.

²⁶ Xíkaha kónhen kjuakoxin Dios kíxin jína ch'án ijie la naxa tjechónhen ch'án sinchetjóá ch'án ijíé tí sín kuítekaon Jesús.

²⁷ A ntá ¿nkekuènté chrókjuínchehnkeni? Xitjahya sinchehnke chojni nkayakon Dios kíxin jehya kíxin kjuínchexiteyéheni tí nkehe k'uètoan tí ley ntá chrókuaáxinni. Náhí. Kíxin Ínchéni kuítekaonni ntá kuaáni.

²⁸ Mé xíkaha ó noheni kíxin tsojtjuáxin ijíéni tí tsitekaonni Dios kíxin Dios tahya cuenta á kjuínchexiteyéheni tí nkehe k'uètoan tí ley.

²⁹ ¿Xá Dios mé kuènte tí sín judío ó? ¿Á kjaxinhya Dios kuènte tí sín jehya judío? Kjá kjaxin Dios mé kuènte tí sín jehya judío.

³⁰ Kíxin kohya í jnko Dios la jehe ch'án sinchetjóá ch'án ijíéni kíxin tinkáchónkini ch'an la tahya ch'an cuenta á chóntani xroye o náhí.

³¹ A ntá tí tinkáchónkini Ínchéni, la ¿á í chrókjuínchexiteyáhyani tí ley? Kjá náhí. Íchá antsí má jína chrókjuínchexiteyéheni tí ley.

4*Tí kjuakoxin ch'ín Abraham*

¹ ¿Nkehe tsixroni kíxin nkehe k'uitja ch'ín Abraham, tí nkexro k'uaxrjeníxinni ósé?

² Ntá ch'ín Abraham tí chrókótjuáxin ijíé ch'án kíxin tí xrá kjuích'e ch'án ntá chrókóhnke ch'án, kjónté jehya nkayakon Dios.

³ A ntá ntáchro xroon itén Dios kíxin: “Ch'ín Abraham kuítekaon Dios ntá táhó kuaáxin ch'án la ko kótjuáxin ijíé ch'án.”*

† 3:12 3.10-12 Salmo 14.1-3, Salmo 53.1-3 ‡ 3:13 Salmi 5.9, 140.3 § 3:14 Salmo 10.7 * 3:17 Isaías 59.7-8 † 3:18 Salmo 36.1 * 4:3 Génesis 15.6

⁴ Jnkojín chojni kjuich'e xṙa la jehya k'uáyéhekoá ch'án tí chichaon. Náhi. Táha la tí xṙa kjuich'e ch'án mé kjuacha ch'án.

⁵ A ntá kjónté jnkojín chojni kjuich'e hya ninkehó xṙa ntá chrókuitekaon ch'án Dios a ntá Dios la sinchetjóá ch'án kjónté tí nkexro chónṙa jṙe, ḱxín tí kuítekaon ch'án Dios la táhó mé kuaáxin ch'án.

⁶ Mé kjaxin tsintáchro ch'ín David ḱxín náxṙjón tí nkexro kótjóá ḱxín Dios kuáhya kuéntá nkerí jṙe tsíkjasin ch'án.

⁷ Ntáchro ch'ín David ḱxín:

Náxṙjón tjejó tí nkexro kjuíncheyaon Dios kjónté jínahya kjuich'e sín la kjuakjṙin ch'án ijṙé sín.

⁸ Náxṙjón tjejó tí nkexro ḱxín Ínchéni kuáhya ch'án kuéntá tí jṙe k'uéchénta sín.[†]

⁹ ¿Á jehó tí sín ikuá xroye la náxṙjón tjejó sín o á kjaxin náxṙjón tjejó tí sín chónṙahya xroye? Ó chrónkani ḱxín Dios la kuikonóḡhe tí ch'ín Abraham ḱxín kuítekaon tí jehé ch'án la táhó mé kótuáxin ijṙé ch'án.[‡]

¹⁰ ¿A ntá nkesá tsíkjincheyaon Dios tí ch'ín Abraham? ¿Á ó tsíka ch'án xroye o naṙa náhi? Kjá naṙa náhi. Senó tsíkjincheyaon Dios tí jehé ch'án.

¹¹ Ntá chr'éxin ch'ín Abraham ikuá ch'án tí xroye éxí ijnko sello kjuakoxin Dios ḱxín ó kótuáxin ch'án ḱxín kuinkáchónki ch'án Dios. Ḱxín ntá xíkaha ts'óna ch'ín Abraham xjeen kaín chojni tinkáchónki Dios, kjónté chojni tsíkaha xroye. Ntá kjaxin jehé sín la Dios sinchetjóá ijṙé sín.

¹² La ko jehé ch'ín Abraham mé ts'axrjenixin ch'án kaín tí sín tsíka xroye ḱxín ntá chrókuinkáchónki sín éxí kuinkáchónki tí jehé ch'án kjónté naṙa tsíkaha ch'án xroye.

Tí nkehe tsintáchro Dios la tsoxiteyá ḱxín tinkáchónki sín tí jehé ch'án

¹³ Dios tsintáche ch'ín Abraham ḱxín jehé ch'án la ko tí sín ts'axrjenixin ch'án ts'áyéhe sín chjasintajni ts'ejó sín. A ntá tí nkehe ts'áyéhe ch'ín Abraham la jehya ḱxín kuítekaon ch'án tí ley. Náhi. Ts'áyéhe ch'án tíha ḱxín kuítekaon ch'án Dios la ntá Dios mé kjuínchetjóá ijṙé ch'án.

¹⁴ A ntá tí jehó tí sín tsíkjinchexiteyéhe tí ley ó chrók'uáyéhe sín tí nkehe chrókjuanjon Dios, a ntá tí nkehe tinkáchónkini la ó chrókóchónkó xíkaha la ko tí nkehe tsintáchro Dios la kjá ninkehó sínkíhya tí xíkaha.

¹⁵ Ḱxín tí ley la tjíka o ḱxín tsjasótexín chojni, a ntá tí chrókókohya ley la chrókókohya nkehe chrókjuanchia jṙe.

¹⁶ Méxṙa tí nkehe tsintáchro Dios la kjuasáyé ch'án tsjanjon ch'án ḱxín kuinkáchónki ch'ín Abraham tí jehé ch'án la ntá Dios sinchekitonhen tíha kaín tí sín tsík'axrjenixin ch'án. Jehya jehó tí sín tinkáchónki tí ley chrók'uáyéhe sín tí nkehe tsjanjon Dios. Náhi. Kjaxin tí sín tsitekaon éxí kuítekaon ch'ín Abraham mé ts'áyéhe sín tíha. A ntá jehé ch'án mé k'óna ch'án it'é kaín ní.

¹⁷ Éxí nixja xroon itén Dios ḱxín: "Janhan kjuánjuan kjuachaxin ḱxín jaha ts'óna it'é nthónhya chojni chjasintajni."[§] Mé xíkaha tjetsjehé Dios ḱxín jína kuítekaon ch'ín Abraham tí jehé ch'án. Tí Dios a mé sinchexechón tí chojni tsík'en la ko t'etṙan ch'án ḱxín ts'óna tí nkehe naṙa kohya.

¹⁸ Kjónté k'uéchéntahya ch'ín Abraham xjeen ch'án la kuítekaon ch'án la chónhen ch'án ḱxín ts'óna ch'án it'é nthónhya chojni éxí tsíchronka Dios ḱxín xíkaha nthónhya chojni ts'axrjenixin ch'án.

¹⁹ Ch'ín Abraham k'uéchénta ch'án chjina ijnko ciento nánó la kjánchó k'uítjáyenhya ch'án tinkáchónki ch'án Dios, kjónté jehé ch'án la ko tjan Sara mero its'en sín la ko ó má táda nána sín ḱxín naṙa chróhónṙa sín xjeen sín.

²⁰ Ch'ín Abraham la kóxakuenhya ch'án la ko chrakonhya ch'án ḱxín tí nkehe tsjanjon Dios. Náhi. Íchá antsí má kuinkáchónki ch'án Dios la ko kjuanchehe ch'án kjuasáyé Dios.

²¹ Ó nohe ch'ín Abraham ḱxín Dios chónṙa kjuachaxin sinchexiteyá kaín nkehe tsintáchro ch'án.

²² Dios k'uikon ḱxín jehé ch'ín Abraham kuítekaon ch'án ntá Dios kjuínchetjóá ijṙé ch'án.

²³ La jehya ḱxín tsík'óna tí xroon ḱxín tí ch'ín Abraham ó.

²⁴ Náhi. Tsíkjin sín xroon ḱxín kjaxin jeheni chrókótuáxin ijṙéni ḱxín tsitekaonni Dios. Tíhi mé tí nkexro kjuínchexechón Ínchéni Jesucristo.

²⁵ Jehé ch'án mé k'uenyákonhenni ch'án ḱxín tí jṙe chónṙani. Ntá xechón ch'án inaá ḱxín tsotjuáxin ijṙéni ḱxín ó kuítekaonni tí jehé ch'án.

5

Kótuáxin tí jṙe chónṙani

¹ Kótjuáxin tí jië chóntani kixin tinkáchónkini Cristo la kjuaxróxin ts'ejókoni Dios kixin k'uenyákonhenni Ìnchéni Jesucristo.

² Kjuasáyé Cristo kixin jina tsochjinehene Dios kixin tinkáchónkini ch'án ntá ts'áyéheni kjuachaxin kuènte ch'án. Ntá tí kjuachaxin la jina tsjinkítsa kixin jina ts'ejóni la ko tsochéheni ts'ejóchónhenni kixin ntá tsjintaxin ts'áyéheni tí kjuachaxin jié kuènte Dios.

³ Kjaxin jehya táhó. Náhí. Kjaxin tsochéheni kjónté nchónhya nkehe tsoñhenni kixin ó noheni kixin xíkaha tsoñhenni kixin ntá ts'itjani tsoñínkakohyani.

⁴ A ntá tí xíkaha jina chrók'uejóni ntá tsjachani kixin jina ts'ejóchónhenni.

⁵ A ntá tí tjejóchónhenni la tósuehyani kixin Dios imá tjuèheni ch'án la tí Nchakuen ch'án kjuanjon ch'án mé nchechéhe asénni.

⁶ Tí jehóni xitjahya chrókuaáni. A ntá tió ikui Cristo la k'uenyákonhenni ch'án kixin tí jië chóntani.

⁷ Kjá ninkexró chróntáchro chrók'uenyákonhene sín í jnko chojni kjónté ijnko chojni imá jina tjuèhe kichó. Kohya nkexro xíkaha chrókjuich'e.

⁸ A ntá Dios mé kjuakoxin kixin imá tjuèheni ch'án kixin kjónté naxa chóntani jië la Cristo k'uenyákonhenni.

⁹ A ntá Dios mé kjuínchetjuáxin ch'án ijéni kixin Cristo k'uenyákonhenni ch'án ntá ó noheni kixin jehé ch'án tsaáxinni ch'án kaín tí nkehe chrókjuasótéxinni.

¹⁰ Kjónté naxa k'uenínkakohenni Dios la jehé ch'án mé kjuanjon ch'án kjuaxróxin kixin k'uenyákonhenni tí Xjeen ch'án. A ntá chaxín tsaáxinni ch'án kixin tjechón ch'án la ntá ijie kjuaxróxin tjejókoni ch'án.

¹¹ La jehya chrókótíhó. Kjaxin tsochéheni kixin tinkáchónkini Dios kixin kjuasáyé Ìnchéni Jesucristo kixin Cristo chóntaxinni kjuaxróxin tí tjen Dios.

Adán la ko Cristo

¹² Mé xíkaha ó jnko nkexro kjuasin jië ntá k'uúxin jië kuenté chjasintajni. Mé xíkaha kjuankixin k'uen chojni ntá kaín chojni kjuankixin k'uen kixin kaín sín kjuasin sín jië.

¹³ Kixin ósé la k'uékohya ley ntá ó xráxin k'uúxin jië chjasintajni kjánchó naxa kohya ley chrókjuanchia jië chrókjuasótéxín sín.

¹⁴ Desde kjuák'e ch'ín Adán hasta kjuák'e ch'ín Moisés la k'uéchónta kjuachaxin tí kjuach'én kixin tí jië kjuasin sín mé k'uenxín sín. Kjánchó tí jië kjuasin sín la yóghya tí nkehe kjuich'e ch'ín Adán, kuítekakohya ch'án tí nkehe k'uetqan Dios. Ntá ch'ín Adán yóghé tsotsjehe éxí tí nkexro tsi chr'éxin.

¹⁵ Ntá tí jië kjuasin ch'ín Adán la xitjahya chrókóyóghé tí nkehe tsjanjon Dios kixin tí jië kjuasin jnkokoá chojni la ntá nchónhya chojni k'uenxín. A ntá tí tsaáxinni la kjuasáyé Dios ich'r'án jnkokoá nkexro mé Jesucristo la antsí má jina tíha kixin tsaáxin nchónhya chojni.

¹⁶ A ntá tí jië kjuasin jnkokoá chojni la tóyóghya tí nkehe tsjanjon Dios tsaáxinni. Kixin tí jië kjuankixin kjuasótéxín chojni kjuasin jnkokoá chojni jië. A ntá tí tsaáxinni la kjuasáyé Dios sincheakaáni ch'án la ko nchetjóá ch'án tí jië chóntani kjónté nchónhya jië kjuasin chojni.

¹⁷ Tí kjuach'én la k'uéchónta kjuachaxin kixin tí jië kjuankixín kjuasin jnkokoá chojni. A ntá kjuasáyé Dios kjuínchetjóá ch'án tí jië chóntani la ntá antsí tsochóntani kjuachaxin ts'ejóni jina kixin k'uenyákonhenni jnkokoá nkexro, mé Cristo tíha.

¹⁸ A ntá tí jië kjuasin ch'ín Adán la ntá kaín chojni kjuasin sín jië chrokkjuasótéxín sín. A ntá ijie la Cristo mé kótjuáxin ijie kaín chojni kixin tí jina ch'án k'uenyákonhenni ch'án.

¹⁹ Mé xíkaha kuítekakohya jnkokoá chojni, mé Adán tíha, ntá nchónhya chojni kjuasin jië. A ntá jnkokoá nkexro jina kuítekaon kjuakoxin, mé Cristo tíha, a ntá nchónhya chojni tsaáxin tí jehé ch'án kjónté k'uéchonta sín jië.

²⁰ Ikui tí ley kuínhin sín ntá kónoxín kixin íchá antsí kjuasin sín jië. A ntá antsí k'uúxin jië la kjónté xíkaha la antsí má kuikonógheni Dios kixin jehé ch'án tsjinkítsani ch'án tsaáxinni.

²¹ Mé xíkaha tí jië k'uúxin k'uéchónta kjuachaxin kjuikao kjuach'én chrók'uenxinni. A ntá kjuasáyé Dios kjaxin antsí má chóna ch'án kjuachaxin sinchetjóá ch'án tí ijéni la ko tsjanjon ch'án kjuachón jnkochríxín kixin Ìnchéni Jesucristo ikui ch'án k'uenyákonhenni ch'án, tsaáxinni.

6

Ó k'uen tí jië ntá Cristo kjuínchexechónni

¹ A ntá ijie ¿nkehe tsixroni? ¿A naxa chrókjuasinni jië kixin ntá Dios naxa chrókjuakoxin ch'án kixin chrókjuikonógheni ch'án?

² Kjá náhi. A ntá jeheni la éxí chojni tsík'en chrokkjuahya tsjasin jië. ¿A ntá nkekuènte naxa chrókjuasinni jië inaá?

³ ¿Á noahyará jahará kixin tí kuíkiteni kixin tinkáchónkini Cristo la yóghé k'uenkoni ch'án?

⁴ Tí kuíkiteni la éxi yóhe xravákoni Cristo la ko tsík'enkonni ch'án kixin ntá ó xechónni ntá chrók'uajini ijnko ntja nixin mé xikaha Cristo xechónxin ch'án tí kjuachaxin jié chóna tí It'é ch'án.

⁵ Kixin tí chaxin k'uenxinni éxi ik'uén tí jehe ch'án la ntá kjaxin tsoxechónni éxi xechón tí jehe ch'án.

⁶ Ó noheni kixin nkexrí k'uejóni senó mé táha mé k'uenxín Cristo kjuák'enkánixín ch'án ntacruz kixin ntá chrók'uitjányanxín kaín tí jié k'uekjasinni kixin ijie í chrókjuinchexiteyéhyaní tí jié.

⁷ Tí nkexro ó k'uén la ntá ó kuítøhe tí jié.

⁸ A ntá jeheni tí k'uenxinni Cristo la ó noheni kixin ts'ejókoni tí jehe ch'án.

⁹ Kixin ó noheni kixin Cristo jnkokoá vez xechón ch'án a ntá í ts'enhya ch'án inaá kixin tí kjuach'én í chónahya kjuachaxin kixin naxa ts'óyan tí jehe ch'án.

¹⁰ Tí ik'uén Cristo la ó naá ik'uén ch'án kixin k'uenyákonhenni ch'án kixin tí ijjeni. Ntá xechón ch'án ijie kixin tsjak'eko ch'án Dios.

¹¹ A ntá kjaxin jahará chrókjuenkayáxinrá kixin ik'uénrá, xitjahya tsjásinrá jié kixin ntá ijie la xíxechonrá chrókjuich'eherá xra Dios kixin tinkachónkirá Cristo Jesús, mé Ìnchéni tíha.

¹² Méxra chrókuitoéhyará kixin chrókjan tí jié chrók'uetuēnhen tí cuérporá inaá kixin tí jié chrók'uetøan kixin chrókjuinchexiteyéhérá tí nkehe tjenkayáxinrá.

¹³ Tjájonhyará tí cuérporá kixin chrók'óna nkehe chrókjuásixínrá jié. A ntá íchá jina chróchéjehérá asánrá Dios éxi ijnko chojni tsík'en ó xíxechón inaá. Chjehérá Dios tí cuérporá ts'óna ijnko nkehe sich'exín ch'án xra jina.

¹⁴ Kixin tí jié la í chónahya kjuachaxin ts'etueñhen tí jahará. Jehya tí ley ts'etøan ijie. Náhí, jehó kjuasáyé Dios.

Kjuíncheyóexin ch'ín Pablo nkexrí tí chojni ch'exón xra

¹⁵ A ntá ijie ¿nkexrí? ¿A chrókjuasinni jié kixin í t'etueñhyani tí ley? Kjá náhí. Kjuasáyé Dios tsaáxinni la kjá í chrókjuasinhyaní jié.

¹⁶ Jahará ó nohará jina kixin tí sich'eheñi ijnko lámø xra la tsitekakonhenni ch'án la tí xikaha la t'ichjánxin ch'eheñi xra tí lámø la t'ichjánxin sinchexiteyéhēni ch'án. Mé xikaha tónhen tí naxa sinchexiteyéhēni tí jié la táha mé ts'énxinni. A ntá tí sitekaonni Dios la mé chrók'uejóni jnkojína.

¹⁷ Jahará la ósé k'uekjasinrá jié, a ntá ijie kjuasáyé Dios kuikónoáhará ch'án kixin kaín asánrá kuítekaónrá tí nkehe xrakohará.

¹⁸ A ntá ó kuítøhérá tí k'uekjínchexiteyéhérá tí jié. A ntá ijie ó kjuánjonrá asánrá kixin sich'erá xra jina kuente Ìnchéni.

¹⁹ A ntá jié nixja éxi ijnko chojni ó kixin jahará la tiénxinhyará jina tí nkehe i. A ntá xikaha tí senó kjuinchexiteyéhérá tí nkehe ntoáhya la ko jínahya kixin sich'erá tí nkehe jínahya. A ntá ijie la xikaha chrókjuánjonrá tí cuérpo kuéntará kixin chrókjuich'exínrá tí xra jina éxi tjinkaon Dios kixin ntá jehe ch'án chrókjuinchetjøará ch'án.

²⁰ A ntá tí jahará tió naxa kjuinchexiteyéhérá tí jié la ntá xitjahya sich'erá tí xra jina ntoá.

²¹ ¿A ntá nkehe chrókjuachará kixin xikaha kjuich'erá tí nkehe chrókósuáxinrá ó? Ntá xikaha kjuéyará tí nkehe ts'énxínrá ó.

²² Na ntá ijie ó kjuin tí nkehe k'uek'etueñhanrá k'uekjasinxínrá jié. A ntá ijie ch'eherá xra Dios. Táha la tsjinkítsa kixin ts'ejoxínrá jina kixin ntá tsjixixín tsotjuáxinrá ts'ayéhérá kjuachón jnkochrixín.

²³ A ntá tí chrókjuasinni jié la chrókjuachani kixin éxi chrók'uenni ó. A ntá tí nkehe chrókjuinchekitønhenñi Dios la kjuachón jnkochrixín kixin tinkáchónkini Ìnchéni Cristo Jesús.

7

Kjuíncheyóexin ch'ín Pablo kuente tí sín tsíkótehe

¹ Kichóni, jahará ó choxinrá tí ley la ó nohará kixin tí ley chóna kjuachaxin ts'etueñhen tí chojni naxa tjejóhón ó.

² Tíha mé ts'axrxéñi éxi ijnko chojni chjin tsíkótehe la tí xii tjan chóna kjuachaxin ts'etueñhen tjan kixin naxa tjechón ch'án. A ntá tió tsík'en tí xii la ntá tí tjachjin la ó kuítøhe tí k'uek'etueñhen ch'án tjan.

³ A ntá tí jehe tjan chrókuaqja í jnko chojni ntoa tí naxa tjechón xii tjan la ó chrókjuasin tjan jié. A ntá tió tsík'en xii tjan la jehe tjan la ó kuítøhe tí k'uek'etueñhen ch'án tjan la jina tsotøhe tjan í jnko chojni ntoa la jehya jié tíha.

⁴ Mé xikaha jahará kichó ni mé k'uenyákonhenni Cristo la ntá jahará la éxi tsík'enrá kixin í t'etueñhyará tí ley la éxi chrókuaqjárá í jnko xiará la mé xikaha tinkachónkirá Cristo. Cristo mé xechón ch'án inaá kixin ntá jina chrókjuich'eheñi xra Dios.

⁵ Tió naxa k'uekjasinni jie a ntá tí ley chrókjuich'e xra kixin chrókjuasinhvani jie, a ntá íchá antsí má kjuasixinni jie tí cuerpo kuénteni, la táha mé kjuixín tí ts'énxinni.

⁶ A ntá ijie la éxí yóhe ik'uénni, a ntá tí ley chóntahya kjuachaxin naxa ts'etuenhenni. A ntá ijie í kohya nkehe t'inkákonhen kixin jína sich'ehe ni xra Dios kixin k'onani ijnko chojni nixin kixin tí Nchakuen Dios k'uáyeheni. A ntá í t'etuenhyani tí ley ntaxin tsik'óna.

Tí jie naxa chonta

⁷ A ntá tí xikaha la, ¿nkehe chróchroni? Kixin tí ley la, ¿á jie táha ní? Kja náhi. Kjánchó janhan chrókónonahya nkehe tí jie tí chrókohya tí ley chróchrónka. Chrókónonahya kixin tí nkehe ókjé chrókjuakéhya asenná tí chróchrónkahya tí ley kixin chrókjuakéhya asenná tí nkehe ókjé.

⁸ A ntá tió kónona tí ley a ntá tí jie antsí kjuacha k'uetóan. La ntá k'uixín kaín nkehe ntáχρο asenná. A ntá tí chrókohya ley la chrókónoxinhya tí jie chrók'uenxian.

⁹ A ntá tí ósé la nonahya nkehe tí ley. A ntá tió nóna nkehe tí ley, a ntá antsí kjuasian jie la ntá ó nóna kixin tí jie kjuasian me ts'énxian.

¹⁰ Mé xikaha kónhen kixin tí ley chrókjuanjon kjuachón ntá kjuikao tí ts'énxinni.

¹¹ Ntá tí jie mé kjuacha k'uetóan kixin sintaxiteyáhya tí ley. A ntá tí ley mé kjuanchia jie ts'énxian.

¹² Mé xikaha tí ley la chaxín jína la ko tí nkehe t'etóan Dios la kjaxin jína.

¹³ Mé xikaha tí nkehe jína la ¿á táha chrók'uenxian? Kja náhi. Tí jie kjuasian mé ts'énxian. Mé xikaha kjuakoxín tí nkehe jie kixin tsonoxín tí jie kixin tí ley la jína. Mé xikaha kjuakoxín tí ley kixin tí jie tjasin chojni mé imá jínahya tíha.

¹⁴ Ó noheni kixin tí ley la kuente Dios tíha. A ntá janhan la kjujntaxiteyáha tí ntáχρο asenná kixin tí jie kjuacha k'uetóanna.

¹⁵ A ntá tí janhan la tí nkehe tjét'a la kjaxin naxa tjanxínhya kixin janhan la t'ahya tí nkehe tjínkavan chrókjuít'a, a ntá ijie mé it'a tí nkehe tóxrjínahya chrókjuít'a.

¹⁶ A ntá tí nkehe tjínkakonhya chrókjuít'a la tíha me it'a la mé xikaha tjátsoanxián kixin tí ley la jína.

¹⁷ A ntá jehya janhan it'a tíha. Náhi tí jie chonta mé ch'e tíha.

¹⁸ Kixin janhan ó nóna kixin tí ntáχρο asenná la kohya nkehe jína chrókjuít'a. Tjínkavan chrókjujntaxiteyá tí nkehe jína kjánchó tjachahya sit'a tíha.

¹⁹ T'ahya tí nkehe jína chrókjuít'a. Tí nkehe jínahya tjínkakonhya chrókjuít'a mé it'a.

²⁰ A ntá tí it'a tí nkehe jínahya tjínkakonhya chrókjuít'a la ntá jehya janhan it'a tíha. Náhi. Tí jie chonta mé ich'e tíha.

²¹ Tónóna tíhi. Tí tjínkavan chrókjuít'a tí nkehe jína la mé íchá antsí it'a janhan tí nkehe jínahya.

²² Kjónté xikaha la tóxrjínna chrókjujntaxiteyáha tí ley kuente Dios.

²³ T'ikuán kixin tí nkehe ntáχρο asenná mé t'inkákonhen tí nkehe tjínkavan chrókjuít'a. A ntá tí jie chonta mé éxí tjéchjínaxián tíha.

²⁴ Nóna tí janhan. ¿Xá nkexro chrókjuatsen tí jie chóna tí cuerpo kuéntana chrók'uenxian?

²⁵ Kjuasáya tjahá Dios kixin ikui Inchéni Jesucristo kuaáxinni. Mé xikaha tí janhan la it'óna tjenkayáxian kixin chrókjujntaxiteyáha Dios a ntá tí t'óna mé ntáχρο asenná chrókjujntaxiteyáha tí nkehe kuente tí jie.

8

Tjejóchónxinni Nchakuen Dios

¹ A ntá ijie tí sín tinkáchónki Cristo Jesús la kohya jie chrókjuasótéxín sín. Jehé sín í tjínkakonhya nchexiteyá sín xikaha ntáχρο asén sín. Jehó tjínkaon sín sinchexiteyéhé sín Nchakuen Dios.

² Kixin tí nkehe t'etóan Nchakuen Dios mé tjanjon kjuachón kixin tinkáchónkini Cristo Jesús. Tíha mé kjuatsen tí nkehe kuente jie chrók'uenxinni.

³ A ntá Dios kjuich'e tí nkehe kjuachahya kjuich'e tí ley kuente ch'in Moisés kixin jeheni kjuachahyani chrókjuinchexiteyéhéni tíha. A ntá Dios mé ichr'an ch'an Xjeen ch'an k'óna éxí chojni. La xra ó kui ch'an k'uenyákonhen ch'an tí ijje ni ni ntíhi chjasintajni la kjuatsen ch'an tí jie chrók'uitjányaxinni.

⁴ Mé xikaha kónhen kixin ntá jeheni jína chrókjuinchexiteyéhéni tí nkehe t'etóan tí ley la chrókjuinchexiteyéhéni tí nkehe ntáχρο asénni ó. Náhi. Chrókjuinchexiteyéhéni tí nkehe ntáχρο Nchakuen Dios.

⁵ A ntá tí sín tjínkaon nchexiteyéhé tí nkehe ntáχρο asén sín ntá táhó tjenkayáxín sín. A ntá tí sín tjínkaon nchexiteyéhé Nchakuen Dios la ntá xritjeyá sín tí nkehe kuente Nchakuen Dios.

⁶ A ntá tí sín tóxakonhen tí nkehe ntáchro asén sín la táhó ts'enzín sín. A ntá tí sín tóxakonhen tí nkehe kuènte Nchakuen Dios la tsochóntaxín sín kjuachón la ko kjuaxróxin.

⁷ A ntá tí sín imá tóxrjínhin tí nkehe ntáchro asén sín ó la mé nínkakonhen sín Dios kixin tjinkakonhya sín la ko titekakonhya sín tí ley.

⁸ Tí sín tóxrjínhin sín tí nkehe ntáchro asén sín ó la xitjahya sinchechéhe sín Dios.

⁹ A ntá jahará la nchexiteyehará tí nkehe ntáchro asánrá. Náhi. Jahará nchexiteyehára Nchakuen Dios tí chaxín chontará Nchakuen Dios. A ntá tí nkexro chóntahya Nchakuen Cristo la í tinkáchónkihya sín Cristo.

¹⁰ A ntá tí Cristo tjejókoará tí jahará la tí asánrá la tjechón kixin Dios kujikonóahará, kjuínchetjóá ch'án tí ijíará, kjánchó tí cuerpo la éxi tsík'en kixin tí jie chontará.

¹¹ A ntá jahará ó chontará Nchakuen Dios, tí nkexro kjuínchexechón Cristo Jesús. Tí Dios a mé kjuínchexechón Cristo la ntá kjaxin tsochjéhe ch'án kjuachón nixin tí cuerpo kuèntará kjónté chóna jie kixin tí Nchakuen Dios chontará jahará.

¹² Mé xikaha kichó ni, ó chóntani nkehe sinchexiteyeheni, kjánchó í chrókjuenkayáxinhyani tí nkehe ntáchro asénni.

¹³ A ntá jahará tí chrók'uejorá éxi ntáchro asánrá la tíha la mé chrók'ueñxinrá. A ntá jahará ó chontará Nchakuen Dios ntá chrók'uen tí nkehe ntaxin kjuenkayáxinrá la ntá jehó Nchakuen Dios chrók'uejochonxínrá.

¹⁴ Kaín tí nkexro t'etuenhen Nchakuen Dios la mé ó k'óna xjeen Dios.

¹⁵ Ntá Nchakuen Dios ó k'uayéherá jahará la jehya tí nchakuen tí nkehe k'uek'etuanhanrá ósé kixin chróchrakonrá. Náhi. Ntá tí Nchakuen chóntani la k'ónaxinni xjeen Dios. A ntá tí Nchakuen ch'án nchexraxinkaonni tsocháchroni kixin: "It'eni Dios kuèntá tí jeheni."

¹⁶ Tí Nchakuen Dios tónoexin nchakuenni kixin k'ónani xjeen Dios.

¹⁷ A ntá ó k'ónani xjeen ch'án la kjaxin tsjanjon ch'án tí nkehe ts'áyeheni éxi tsintáchro ch'án ósé. Mé ts'áyekoni Cristo tí nkehe tsjanjon Dios. Tí chaxín tsjasóteni éxi Cristo kjuasóte ntá chr'éxin ts'ejóki ch'án kjuaxróxin.

Tí kjuachaxin jie itsi chr'éxin

¹⁸ A ntá ijie la tóxakuenhyani kjónté nkehe ts'atsínkani tsjasótexínni kixin tíha la ninkehó sínkíhya kixin tíha la xitjahya tóyóhe tí nkehe ts'áyeheni chr'éxin kixin antsí má jína náxrjón tíha.

¹⁹ Tí nkehe tsík'óna tjejóchónhen kixin ts'ikon tí sín tsík'óna xjeen Dios.

²⁰ Kjónté kaín nkehe tsík'óna síni la ts'itjáyán tíha la jehya kixin xikaha tjinkaon tí nkehe tsík'óna. Náhi. Jehí xikaha tsík'etóan Dios. Ntá tjejóchónhen kaín nkehe tsík'jich'éna Dios

²¹ Kixin chróchóna kjuachaxin chrók'uitjáyánhya. Ntá náxrjón ts'ixin kaín nkehe éxi náxrjón ts'ejó tí sín tsík'óna xjeen Dios.

²² Ó noheni kixin kaín tí nkehe kjuich'éna Dios la naxá tsjasóte éxi yóhe tjetéxin ijnko chojni nchekokjhi xjeen.

²³ A ntá jehya jehó tí nkehe tsík'óna t'ikon chojni chrókjoté. Náhi. Kjaxin jeheni tjasóteni kjónté chóntani Nchakuen Dios kixin tí Nchakuen Dios la mé tí nkehe xrankixixin kuákjani la naxá ts'áyeheni inaá tí nkehe naxá tsjanjon Dios. Tjejótjasóteni la ko tjejóchónhenni kixin tsjintaxin ts'ónani xjeen Dios la ko ts'áyeheni tí cuerpo chónhya ts'en.

²⁴ Mé ó kuaáxinni la naxá tjejóchónhenni tí nkehe t'ikonhyani. Tí k'uíkoni tí nkehe tjejóchónhenni ntá t'ichjánxinhya chrók'uejóchónhenni. Tí nkehe ó t'ikonni la t'ichjánxinhya chrók'uejóchónhenni naxá chrók'uíkoni inaá.

²⁵ A ntá tí chónhenni tí nkehe naxá t'ikonhyani la ntá t'ichjánxin tsonínkakonhyani tsochónhenni.

²⁶ Mé kjaxin xikaha tí Nchakuen Dios tjinkitsani tí noehyani nkexrí tsonixjeheni Dios kixin chaxín noehyani tsonixjeheni ch'án éxi chrónixjani. A ntá tí Nchakuen Dios tjinkitsa nixjaxin ch'án tí jeheni kjónté noehyani nkexrí tsochrónóaxinni éxi tjinkaon ch'án.

²⁷ Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kixin tí Nchakuen ch'án mé chrónóaxin éxi tjinkaon Dios la nixjaxin ch'án tí sín tinkáchónki Dios.

²⁸ Ó noheni kixin Dios la k'uetóan kaín nkehe chrók'uaxrje jína kixin tí sín tjuèhe ch'án kixin tsík'jeyá ch'án sín kixin xikaha tjinkaon ch'án.

²⁹ Tí sín tsík'jeyá Dios ósé la ntá tsík'íyehé ch'án kixin ts'óna sín éxi tí Xjeen ch'án kixin ntá tí Xjeen ch'án mé ts'etuenhen nchónhya tí sín kichó ch'án.

³⁰ Mé xikaha tí sín tsík'jeyá Dios ósé mé kjaxin k'uíyehé ch'án sín la ko tí sín k'uíyehé ch'án la kjuínchetjóá ch'án ijíé sín la ntá tí sín kjuínchetjóá ch'án ijíé la kjuanjon ch'án kjuachaxin kuènte ch'án tsochóna sín.

³¹ ¿A ntá nkehe chróchroni tí xikaha? Tí Dios tjuèhe tí jeheni, ¿a ntá nkexro chrókjuacha chrókónínkakonhen tí jeheni?

³² Kíxin Dios la kjiakuènhya tí Xjeen ch'án. Kjuanjon ch'án k'uenyákonhenni kaín ni, a ntá tí ó kjuanjon ch'án Xjeen ch'án la kjá kaín nkehe chrókjuanjon ch'án.

³³ ¿Nkexro chrókjuacha chrókjuanchia jje chrókónínkakonhen tí sín kjueyá Dios? Kíxin Dios la ó kjuínchetjótá ijje tí sín a.

³⁴ ¿Nkexro chrókjuinçekjasóte tí jehe sín? Kíxin Cristo la ó k'uenyákonhen sín la kjaxin xechón ch'án inaá la itjen ch'án tí tja chjina Dios tjen nkaya nkajní la tjechroóna ch'án kíxin kaín tí jeheni.

³⁵ ¿Xá nkexro chrókuakitsjeheni tí tjuèheni Cristo? Kjóté ichrén nkehe chrókónhenni la ko chrókónínkakonhen chojni tí jeheni la ko kjóté chrók'uenxíni kjinta la ko chróchóntahyani ikéni o kjóté tí kjuaxikaon chrók'uenxíni la chrókuútoehya ch'án tí jeheni.

³⁶ Éxí ntáchro xroon itén Dios kíxin:
Tí tinkáchónkini tí jaha la siín kjuaxikaon kaín yaon chrók'uenxíni.
Chrók'óyánni sín éxí t'óyán sín kolélo tí matanza.*

³⁷ Kaín tíha la antsí chrókjuachaxíni kíxin kjuachaxién tí nkexro tjuèheni.

³⁸ Ó noheni kíxin ninkehó nkehe tsjachahya tsakitsjeheni tí tjuèheni Dios. Kjóté tí its'enni, o kjóté tí tjejóchónni, o kjóté tí sín ángel, o tí kjuachaxién tí jínahya, o kjóté tí nkehe sítonhen ijje, o tí nkehe tsonhen chr'éxin,

³⁹ o kjóté tí nkehe siín nkaya nkajní, o tí nkehe imá njnka siín chjasintajni, o í jnko nkehe kjuích'éna Dios. Mé kohya njnko tí nkehe a tsjacha tsakitsjeheni tí tjuèheni Dios kjuakoxin tí jehe ch'án kíxin k'uenyákonhenni Inchéni Jesucristo.

9

Dios kjueyá tí sín Israel

¹ Ntoá xrjanka kíxin janhan ijnko chojni tinkáchónki Cristo la t'ayahya. Tí nkehe tjenkayáxian la Nchakuen Dios nchexraxinkaonna kíxin chaxín.

² Imá t'ává asenná la ko náxrjónhya tjèn

³ kíxin tjínkavan kjóté chrók'uitjáyanxinna tí tinkáchónkia Cristo kíxin ntá jína chrókuinkáchónki Cristo tí sín kíchiná naxa kjéhyana.

⁴ Jehé sín mé tsík'axrjeníxin sín tí sín Israel la Dios k'uáyéhe sín éxí xjeen ch'án la ko Dios chónthehe tí jehe sín la kjuanjon kjuachaxién ch'án la kjaxin k'uáyéhe sín tí nkehe k'uetqan Dios la ko tí ley tsíkjin ch'ín Moisés la ko k'uáyéhe sín kjuachaxin ts'etqan sín kíxin nkehe tí xrá tsonhen nkaxenhen njnko la ko k'uáyéhe sín tí nkehe tsintáchro Dios.

⁵ Tsík'axrjeníxin sín tí sín tsík'axrjeníxinni ósé la kjaxin Cristo tsík'axrjeníxin tí sín israelita tíó k'óna ch'án chojni. Jehé ch'án mé Dios kuénte kaín nkehe la tinkáchónkini ch'án jnkochríxín. Amén.

⁶ A ntá tí nkehe chrókuakja tí sín Israel kjuanjon Dios la jehya kíxin chróxiteyáhya tíha. Náhí. Kíxin jehya kaín tí sín tsík'axrjeníxin tí sín israelita mé chrók'óna sín chojni chjasin Israel.

⁷ Kíxin kénhya tí sín k'uaxrjeníxin ch'ín Abraham chrók'óna xjeen ch'án. Dios mé tsintáche ch'ín Abraham kíxin: "Tí sín ts'óna kjéhyaha jaha mé ts'axrjeníxin sín tí ch'ín Isaac."*

⁸ Tíhi mé tienxíni kíxin ninkexró xitjahya ts'óna xjeen Dios kíxin tí tsík'axrjeníxin sín chojni ó. Náhí. Jehó tí sín tinkáchónki tí nkehe tsíchenka Dios tí ch'ín Abraham mé jehe sín mé chaxín tsík'axrjeníxin sín ch'án.

⁹ Tí nkehe tsíchenka Dios tí ch'ín Abraham mé tíhi: "Itsi ijnko yaon mé tjan Sara sich'éna tjan ijnko xjan."†

¹⁰ A ntá jehya táhó. Náhí. Kjaxin tí yaá chánjan tsík'ich'éna tjan Rebeca mé chóna jnkokoá it'é xjan mé it'ín Isaac, mé tsík'axrjeníxinni ch'án.

¹¹ A ntá tí xjan la naxa kokjehya xjan la ninkehó nkehe jína o jínahya kjuích'e xjan. Ntá kjuakoxin Dios kíxin chóna kuentá kjuachaxin éxí tsíkjenkayáxín ch'án tsjeyá ch'án nkexro ts'iyehé ch'án la tahya ch'án kuentá nkehe tí xrá kjuích'e sín.

¹² Ntá kjóté la ntá chenka ch'án tí tjan Rebeca kíxin: "Tí ch'ín saó mé sich'ehe xrá tí ch'ín tsoyo."‡

¹³ Mé kjaxin xíkaha ichro xroon itén Dios kíxin: "Tjuahá Jacob, a ntá Esaú la náhí."§

¹⁴ ¿A ntá nkehe chróchroni? ¿Á ntoáhya tjenkayáxín Dios? Kjá náhí.

¹⁵ Kíxin tsintáche Dios tí ch'ín Moisés kíxin: "Tsojtjuahá tí nkexro tjínkavan tsojtjuahá la ko tsikonóahá tí nkexro tjínkavan tsikonóahá."*

¹⁶ Jehya éxí tjínkaon chojni o jehya kíxin tí nkehe ch'e chojni. Náhí. Ó jehí Dios tsíkikonógehé tí jehe sín.

* 8:36 Salmo 44.22 † 9:7 Génesis 21.12 ‡ 9:9 Génesis 18.10 § 9:12 Génesis 25.23 § 9:13 Malaquías 1.2-3

* 9:15 Éxodo 33.19

¹⁷ Tí ntáchro xroon itén Dios mé nixjehé Dios tí ch'ín rey Egipto kixin: “Kjuánjuan kjuachaxin kixin jaha k'óna rey kixin tjínkavan chrókuákoxian kjuachaxin kuéntana kixin ntá kuenté chjasintajni chrókónohe la chrókuitekaon tí nina.”[†]

¹⁸ Mé xikaha tí tjinkaon Dios tsikonóehé ch'án chojni la tsikonóehé ch'án, a ntá tí nkexro tjinkakonhya ch'án tsikonóehé ch'án la tsikonóehya ch'án.

¹⁹ A ntá tsontáchorá kixin: “A ntá tí xikaha la, ¿nkekuénté t'eka Dios chojni jie? ¿Nkexro chrókuacha chrókuanjonko tí nkehe t'etgan Dios?”

²⁰ ¿Xá nkexro tí jahará kixin chróntácherá Dios xikaha? ¿Á ti chj tsík'óna nchetje chróntáche tí inché chj kixin: “¿Nkekuénté xikaha kjuich'énani?” chróchro.

²¹ A ntá kjaxin tí nkexro ch'éna chj mé chóna kjuachaxin tjinkaon sich'éna ch'án tí nkehe tóxrjínjin ch'án sich'éna ch'án, tí tjinkaon ch'án nchetje sich'éna ch'án nkehe imá náxrjón o tjinkaon ch'án sich'éna ch'án nkehe náxrjónhya.

²² Tjinkaon Dios chrókuákoxín ch'án tí kjuachaxin kuénté ch'án chrókuincheckjasóte ch'án chojni la kjónté xikaha kónhen la kjuacha ch'án kónínkakonhya ch'án la kuikonóehé ch'án tí sín chrókuincheckjasóte ch'án kixin chrókuincheck'itjáyán ch'án sín.

²³ Mé xikaha kjuich'e ch'án kjuákoxín ch'án tí kjuachaxin imá jie chóna ch'án kixin jehe ch'án kuikonóeheni ch'án kixin xikaha tsikjenkáyáxin ch'án ósé kixin náxrjón chrók'uejókoni tí jehe ch'án.

²⁴ Mé xikaha Dios tsikjeyá ch'án iso tí sín judío la ko iso tí sín jehya judío.

²⁵ Mé xikaha ntáchro tí xroon tsikjin ch'ín Oseas kixin:

Tí sín jehya chjasenná la mé sjintak'ian chjasenná.

La tí sín k'uetjuahya mé tsotjuahá sín ijie.[‡]

²⁶ Tí chjasin ntiha tsintáchro ch'án kixin: “Jahará jehya chjasenná”,

a ntá ijie sjintak'ian xjeen Dios tjechón.[§]

Mé xikaha ichro itén Dios.

²⁷ Kjaxin nixja ch'ín Isaías kuénté tí sín israelita tsintáchro ch'án kixin: “Nchónhya chojni ts'axrjeníxin tí sín Israel éxi tí nchónhya nchesen siín ntayaon kjánchó tsjéhya tí jehe sín tsjacha sín tsaá sín.

²⁸ Ntá tjoka tsonhen tí nkehe tsintáchro Inchéni sinchexityé ch'án.”*

²⁹ Ntá kjaxin ch'ín Isaías tsintáchro ch'án ósé kixin:

Tí Inchéni chóna kaín kjuachaxin kuítóehya chrók'uitjáyán kaín tí sín k'uaxrjeníxin Israel éxi k'uitjáyán tí sín chjasin Sodoma la ko Gomorra.[†]

Tí sín judío la ko tí tan jina

³⁰ ¿Ntá nkehe tsixroni? Tí sín jehya judío kjuéyáhya sín Dios sinchetjóá ijie sín ntá kjónté la k'uitja sín kixin tsotjóá ijie sín kixin tinkáchónki sín Cristo.

³¹ A ntá tí sín israelita chrókuincheckityéhe sín ley kixin chrókótjuáxin ijie sín kjánchó kjuachahya sín kjuincheckityéhe sín tíha.

³² ¿A ntá nkekuénté kixin xikaha k'uitjahya sín nkexrí chrókuinkáchónki sín Dios? Kixin kjuéyáhya sín nkexrí chrókuinchetjóá ch'án ijie sín kixin tinkáchónki sín ch'án. Jehó tí xra kjuich'e sín chrókuaáxin sín, ichro sín. La méxra xikaha tjen tí xro kóténkixin sín.

³³ Mé xikaha chronkaxín xroon itén Dios kixin:

Mé xikaha kjuaké tí xro chjasin Jerusalén mé tí xro tsóténkixin sín la ko tí tjó ts'ánótjénxin sín.

A ntá tí sín chrókuitekaon tí jehe la chrókósuéhya sín.[‡]

10

¹ Kichóni, kaín asenná níxjahá Dios kixin tjínkavan kixin tí sín israelita chrókuaá sín.

² Janhan ntáxrjan kixin tí sín israelita imá tjinkaon sín chrókuich'ehe sín xra Dios kjánchó chaxínhya kixin jehe sín la tienxínhya sín.

³ Kjaxin noehya sín kixin nkexrí chrókuinchetjóá Dios tí ijie sín. A ntá jehó sín xritjeyá sín nkexrí chrókótjóá sín la tjinkakonhya sín chrókuincheckityéhe sín Dios.

⁴ A ntá Cristo mé kjuincheckityé kaín nixja tí ley. A ntá ijie kaín tí sín kuítekaon tí jehe ch'án mé sinchetjóá ch'án ijie sín.

⁵ A ntá tí chrókótjóá ijie sín kixin tí ley la ch'ín Moisés mé tsikjin ch'án xikihi: “Tí nkexro chrókuincheckityéhe kaín tí ley la táhó chrókuaáxin sín.”*

⁶ A ntá tí chrókuinchetjóá Dios tí ijieni kixin tí tinkáchónkini ch'án ó mé ntáchro xikihi: “Ntáchrohyará kixin, ¿Xá nkexro sáchrókjuí nkaya nkajní? (Tí xikaha la t'axrjénin kixin náxa chrókui Cristo.)

† 9:17 Éxodo 9.16

‡ 9:25 Oseas 2.23

§ 9:26 Oseas 1.10

* 9:28 Isaías 10.22-23

† 9:29 Isaías 1.9

‡ 9:33

⁷ La ko ntáchrohyará kixin: ¿Xá nkexro chrók'uinkajin tí imá nínka?" (Mé t'axrjexín tíha kixin chrókjuikakjín sín Cristo chrók'uaxrjetaón ch'án kixin itjen ch'án tí síin tí sín tsík'en, ichro sín.)

⁸ ¿A ntá nkehe ichro? Ntáchro kixin: "Itén Dios la chjinaxón tjen tí tjejorá kixin ó nohará la ko xraxinkaon asánrá."† Tí tan a mé tí nkehe tinkáchónkini kjuakoní.

⁹ Tí ir'va tsontáchroxian kixin choxian Jesucristo mé Ìnchéni la ko tí asán tsitekaon kixin Dios kjuínchexechón ch'án ntá kjaxian tsaá.

¹⁰ A ntá tí asán tsitekaon la nta Dios sinchetjóá ch'án tí jaha la ko tí ir'va tsontáchroxian kixin choxian Jesucristo ntá sinchekaá ch'án tí jaha.

¹¹ Ntáchro xroon itén Dios kixin: "A ntá tí sín chrókuitekaon tí jehe ch'án la chrókósuèhya sín."‡

¹² Dios la t'ikon jnkokón tsjehe kaín chojni á tí sín judío ó á tí sín jehya judío. Tí Ìnchéni la mé Ìnché kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe.

¹³ Mé xíkaha ntáchro xroon itén Dios kixin: "Kaín tí sín tjanchaxín nkehe ihnjé Ìnchéni la tsaá sín."§

¹⁴ ¿A ntá nkexrí chrókjuanchehe sín ch'án kixin chrókjuinkítsa ch'án sín tí naxa kuítekakonhya sín ch'án? ¿A ntá nkexrí chrókuitekaon sín tí jehe ch'án tí naxa kuienhya sín nkexro tí jehe ch'án? ¿A ntá nkexrí chrókuinhin sín tí kohya nkexro tsjakõhe sín tí itan a?

¹⁵ ¿La nkexrí chrókjuichronka sín tí tan tí kohya nkexro ichr'án sín sátsji? Éxí ntáchro xroon chóna itén Dios kixin: "Náxrjón tí sín xrichronka itan jína."*

¹⁶ Kjánchó kénhya sín titekaon sín tí itan tsaáxinni. Tsíntáchro ch'ín Isaías kixin: "Ìnchéni ¿xá nkexro ó kuítekaon tí tan xrichronkani?"†

¹⁷ Méxra t'ichjánxin tsinhin sín, a ntá chrókuitekaon sín, a ntá tí tan tsinhin sín mé itén Cristo.

¹⁸ A ntá tjánchánkía kixin: ¿Á kuénhya sín tí tan? Kjá ó kuínhin sín. Ntáchro xroon itén Dios kixin:

A ntá tí nkehe kjuako sín la ó kuínhin chojni kuénté chjasintajni.

Tí nkehe nixja sín la ó kjuixraká hasta kjuèxin chjasintajni."‡

¹⁹ Ntá tjánchánkía ínaá: ¿Xá tí sín Israel la naxa kíenxínhya sín ní? Senó ntáchro ch'ín Moisés kixin:

Ijnko chjasin jehya chjasin kuéntana la tsóninkákonhénra sín

kixin injko chjasin tjinkakonhya tsinhin la tsóninkákonhénra sín.§

²⁰ Ntá ntáchro ch'ín Isaías kixin:

Tí sín xritjeyáhya tí janhan la mé tí sín a mé k'uitja sín tí janhan.

La ko kjuákuaxian tí sín kjuanchankíhya kixin nkexro tí janhan.*

²¹ La ko nixja ch'ín Isaías kuénte tí sín israelita kixin: "Kuenté yaon k'uíyaha injko chjasin síin chojni titekakonhya sín la ko jìhehe sín."†

11

Tí sín Israel tsíkjeyá Dios

¹ A ntá ijie tjánchánkía kixin: ¿Dios la á kuítóhe ch'án tí sín Israel? Kjá náhi, kixin janhan kjaxian israelitana la t'ikiníxinna ch'ín Abraham la ko k'uaxrjeníxinna ch'ín Benjamín.

² Kixin ósè tsíkjeyá Dios tí sín israelita kixin ts'óna sín chjasén ch'án. A ntá ijie la kjá sinchek'itjáyanhya ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elias nkexrí nixjèhe ch'án Dios tjanchia ch'án jìe kuénte tí sín Israel? Mé ntáchro xíkìhi:

³ "Ìnchéni, jehe sín k'óyán sín tí sín chrónka itán la ko k'óxíka sín tí altar kuéntá ntá jehóni kuítóheni tjechónni la tjinkaon sín kjaxin chrók'óyán sín tí jeheni."*

⁴ A ntá Dios kjuátèhe ch'án kixin: "Naxa kuítóhe yato mil chojni kuítekaon sín tí janhan kjuíxienhya sín toch'in sín tí nkehe tsíkjanõya Baal."†

⁵ Ntá kjaxin xíkaha ijie naxa kuítóhe iso tí sín naxa tinkáchónki Dios. Kjuasáyé Dios kixin kuikonóhe ch'án tí sín la tsíkjeyá ch'án kixin tsaá iso tí jehe sín.

⁶ Mé xíkaha kjuasáyé Dios sinchekaá ch'án tí jehe sín kixin jehya tí xra kjuích'e sín chrókuaáxin sín. Náhi, Kjuasáyé Dios mé sinchekaá sín ch'án. Kixin tí xra chrókjuich'e sín ntá chrókuaáxin sín la jehya kjuasáyé Dios tí xíkaha.

† 10:8 Deuteronomio 30.12-14 ‡ 10:11 Isaías 28.16 § 10:13 Joel 2.32 * 10:15 Isaías 53.1 † 10:16 Isaías 53.1

‡ 10:18 Salmo 19.4 § 10:19 Deuteronomio 32.21 * 10:20 Isaías 65.1 † 10:21 Isaías 65.2 * 11:3 1 Reyes 19.10,

14 † 11:4 1 Reyes 19.18

⁷ A ntá tí xikaha la, ¿nkexrí? Tí sín israelita la k'uitjahya sín tí nkehe xritjeyá sín. A ntá tí sín k'jueyá Dios la k'uitja sín. A ntá tí sín í so a la icha asén sín la kuítekakonhya sín.

⁸ Éxi ntáchro xroon itén Dios káxin: “Dios kjuanjonha kjuachaxin chrókienxín tí sín a la ko mé kjaxin xikaha naxá sítonhen tí yaon ijie. La kjuanjonha ch'án kjuachaxin káxin chrók'uikon sín la ko chrókienxín sín.”[‡]

⁹ Kjaxin tsintáchro ch'ín David káxin:

Tí kia tjasin sín mé tjasixín sín jje,
tsjasótexín sín.

¹⁰ Tí ikon sín ts'ikonxínhya sín káxin ts'óna sín ntakótán

ntá tí jje kuènte sín mé jnkochrixín yámá sín.[§]

Tsaá tí sín jehya sín judío

¹¹ A ntá ijie tjánchánká: Tí sín judío la tí kjuasin sín jje la ¿á ó naá kuítóexón Dios tí jehe sín? Kjá náhi. Tió kuítekakonhya tí sín judío a ntá tí sín jehya judío la mé kjuacha sín kuaá sín. A ntá tí sín israelita la kónínkaon sín káxin kjuachahya sín.

¹² A ntá tí jje kjuasin tí sín judío, a ntá kuítóhe Dios tí jehe sín, a ntá tí sín jehya judío antsí k'uitja sín nkexrí tsinkáchónki sín Dios. A ntá tí nkehe ntoáhya kjuich'e tí sín judío ntá tí sín jehya judío kjuacha sín kuaá sín. A ntá tí chrókjan tí sín judío chrókuitekaon sín Cristo la antsí má náxrjón tíha.

¹³ Chonta iso nkehe chrókuinhínrá jahará jehya judíorá káxin Dios mé chr'ánna káxin tsjakohá tí sín jehya judío la antsí tjetóan tí xra kuènte Ìnchéni chrókjuít'a.

¹⁴ Tjínkavan káxin tí sín chjasenná chrókóchjin oxínhin sín káxin jahará tinkachónkirá Dios káxin ntá chrókjuacha chrókuaá iso tí jehe sín.

¹⁵ Kuítóhe Dios tí sín judío, a ntá iso tí sín jehya judío k'uitja sín tí kjuaxróxin kuènte Dios. A ntá tí chrókuitekaon tí sín judío kjaxin la yóhe éxi chróxechón chojni tsík'en tí jehe sín.

¹⁶ Tí chrókjuinchetjóá Dios tí niotja xrankixixín chrók'óna tí ich'o la ntá kuènté tí ch'o chrókjuinchetjóá ch'án. A ntá kjaxin tí chrókjuinchetjóá ch'án tí nuèé ijnko nta la kjaxin káin tí chaon tí nta chrókjuinchetjóá ch'án.

¹⁷ Ntá isó tí sín judío la éxi iso chaon tí nta olivo mé xikaha tsíchrinjin la ntá jahará la éxi ijnko chaon nta olivo nteje tsík'óna injerto mé xikaha ts'ejóchónxin tí nta chaon tí tronco tí nta olivo jína xráxin tjechón.

¹⁸ Ntáchrohyará káxin tí chaon tí nta la antsí jína. Íchá jína tsontáchrórá káxin jehya tí nta t'etuenhen tí nuèé nta. Náhi. Tí nuèé mé tsjínkítsa tí nta mé xikaha tí jahará.

¹⁹ Ntá jahará tsontáchrórá káxin: “A ntá tí chaon tí nta la tsíchrinjin káxin ntá jeheni tsitóheni lúké tí nta chaon tsíchrinjin”.

²⁰ Tíha la chaxín. Kjánchó chrínjin káxin kuítekakonhya Dios. A ntá jahará la tjeorá ntiha káxin tinkachónkirá Dios. A ntá chrokjuinchehnkehyará. Íchá jína chróchrakonrá.

²¹ Káxin Dios la kujkonóehya ch'án tí nta chaon kuènte tí nta tronco la ntá mé xikaha kjaxin tí jahará la tsikonóahyará ch'án.

²² Tsjehérá káxin Dios la imá jína kjánchó kjaxin sinchekjásóte ch'án tí sín titekakonhya. A ntá jína ch'án la kjuínkítsa ch'án tí jahará. Kjánchó chrók'uejorá jnkójina éxi tjínkaon tí jehe ch'án. A ntá tí náhi la chaxín jahará la tsitóhará ch'án.

²³ A ntá tí sín judío tsítóhe sín tí nkehe ntoáhya k'uékjich'e sín ntá jehe ch'án kjónté senó kóchrínjin ch'án la ntá ijie sinchetséxín ch'án tí tronco ínaá káxin jehe ch'án la imá chóna ch'án kjuachaxin káxin xikaha sich'e ch'án.

²⁴ A ntá jahará jehya judíorá mé tsíkóchrínjinrá ch'án nta olivo nteje. A ntá antsí má xra tsotséxín tí nta olivo jína. A ntá tí sín judío la nta chaon kuènte tí tronco nta olivo jína la antsí xrahya tsjatsuenhen tsotséxín kíchó ínaá káxin ó nta chaon kuènte.

Tí tsjixixín ntá tsaáxin tí sín Israel

²⁵ Kíchóni, tjínkavan tsónohará tí nkehe jehó Dios nohe káxin sinchehnkehyará jahórá káxin ó nohará. Mé tí sín Israel tsitekakonhya sín hasta ts'ixenjian káin tí sín jehya judío tsitekaon.

²⁶ Tió xikaha tsónhen ntá káin tí sín Israel tsaá sín káxin tí xroon itén Dios ntáchro káxin:

Tí nkexro sinchekaáni mé tsjixín ch'án chjasin Jerusalén
la tsjatsen ch'án tí jje kuènte tí sín tsík'axrjeníxin ch'ín Jacob.

²⁷ Tíhi mé kjuachaxin nixín kuèntana ts'áyéhe tí jehe sín

káxin janhan mé kjuatsilyan ijje sín.*

‡ 11:8 Deuteronomio 29.4; Isaías 29.10

§ 11:10 Salmo 69.22–23

* 11:27 Salmo 14.7; Isaías 59.20

²⁸ Xikaha kixin tí tan nixin tsaáxinni ntá tí sín judío mé tsonínkakohen sín Dios kixin ntá jahará ts'ayéherá tí nkehe kuènte Dios. Kjánchó Dios naxa tjuèhe tí jehe sín judío kixin jehe ch'án tsík'jeyá ch'án tí sín tsík'axrjenínxín tí jehe sín.

²⁹ Kixin tí kaín nkehe kjuanjón Dios la tsákitsjehya ch'án la ko tsítóehya ch'án tí sín tsík'íyehé ch'án.

³⁰ Senó la jahará k'uékitekákonhyará Dios a ntá ijie la tí sín judío titekakonhya sín. A ntá jahará la kjónté la kujkonóghará Dios.

³¹ Mé xikaha jehe sín kuítékakonhya sín Dios la ntá kjónté xikaha la jehe ch'án tsíkonóghé tí jehe sín éxi kujkonóghará ch'án.

³² Kixin Dios la kuítóhe ch'án kaín chojni kixin chrókjuasin sín jie kixin ntá tsjakoxín ch'án tí kjuachaxin kuènte ch'án kixin sinchetjóá ch'án kaín sín kjónté chojni chóna jie.

³³ A ntá tí kjuachaxin kuènte Dios la imá jíé la ko imá nohe ch'án. Ninkexró tsjachahya tsochronkaxin nkexrí tjenkayáxin ch'án la ko ninkexró tsjachahya tsienxín tí tña kuènte ch'án.

³⁴ Ntáchro xroon itén Dios kixin: “¿Xá nkexro chrókienxín nkexrí tjenkayáxin Ìnchéni la xá nkexro chrókjuinkítsa chrókjuakohe tí jehe ch'án?”

³⁵ ¿Xá nkexro kjuanjón nkehe senó k'uáyéhe Dios a ntá ijie tjinkaon chrók'uáyéhe inaá?”†

³⁶ Kixin kaín nkehe la tixín tí tjen Dios kixin kaín nkehe la kjuich'éna ch'án kixin jehe ch'án chóna ch'án. Mé xikaha tjancheheni kjuasáyé Dios jnkochrín. Amén.

12

Chjehérá cuérporá Dios kixin sinchetjóá ch'án

¹ Mé xikaha kichó ni, xrjanóghará kixin Dios ó kujkonóghará ch'án ntá jahará chróchjehérá cuérporá Dios éxi ijnko nkehe tjechón kixin jehe ch'án ó kjuíntatjóará ch'án la mé xikaha chrócoxíjnín ch'án. Tíhi mé ijnko nkehe ntoá t'ichjánxín chróchjeheni ch'án.

² Chrócoxíjnínhyará tí nkehe sín chjasintajni. Náhi. Chrókónjínxín tí nkehe tjenkayáxinrá kixin jína chrókjuenkayáxinrá. Xikaha ntá chrókónohará kixin nkexrí tjinkaon Dios kixin ntoá chrók'uejorá éxi tóxrjínín ch'án.

³ Kjuasáyé Dios kjuanjón ch'án tí xra tjet'ágha ch'án. Mé xikaha nixjahará kaín rá kixin chrókjuenkayáxinhyará kixin imá tjeoanrá. Náhi. Chrókjuenkayáxinrá jína éxi tí kjuachaxin tjáhará Dios éxi nkexrí tinkachónkirá ch'án.

⁴ Mé xikaha ijnko cuerpo la nchónhya parte chóna. A ntá tí parte la jehya jnkokón xra chrókjuich'e.

⁵ Mé kjáxin xikaha tí jeheni kjónté nchónhyani la ts'ónani jnkokóá cuerpo kuènte Cristo. Mé xikaha jnkokóá chrókjuenkayáxinni kixin ó k'ónani jnkokóá cuerpo.

⁶ Dios kjuanjón nchónhya clase xra éxi tjinkaon ch'án chróchjé ch'án jnkojnko chojni tí xra. Ntá t'ichjánxín jína sich'eni tí xra kjuanjón ch'án. A ntá tí kjuanjón ch'án kjuachaxin kixin tsochronkaxinni tí tan kuènte ch'án ntá t'ichjánxín sich'eni tí xra éxi titekaonni ch'án.

⁷ A ntá tí kjuanjón ch'án xra tsjinkítsani í jnko nkexro ntá t'ichjánxín jína sich'eni tí xra a. A ntá tí nkexro tsík'áyéhe kjuachaxin tsjako la t'ichjánxín jehó tí xra a chrókjuako.

⁸ Tí nkexro tsík'áyéhe kjuachaxin nhexraxinkaon í jnko nkexro la kaín asén chrókjuich'e ch'án tí xra a. A ntá tí nkexro tsjanjón ichrén nkehe la chrókójiehya chrókjuanjón ch'án. A ntá tí nkexro t'etóan la jína chrókjuich'e ch'án xra la ko tí nkexro chrókjuinkítsa tí sín chónahya la kjuaxróxin chrókjuinkítsa sín.

Tí nkehe chrókjuich'e tí sín tinkáchónki Cristo

⁹ Kaín asánrá chrótjuèherá kichuárá. Chrókútohérá tí nkehe jínahya tjenkayáxinrá la chrókjuenkayáxinrá tí nkehe jína.

¹⁰ Chrótjuèherá kichuárá la ko chaxín chrókjuíkosáyehérá kichuárá.

¹¹ Chrókósáhyará la chrókjuich'eherá Ìnchéni xra kaín asánrá.

¹² Chrókóchághará kixin tjejóchonénrá la chrókóninkákonhyará kjónté chrókjuasótíará. Chrókútoéhyará chrónixjehérá Dios.

¹³ Chrókjuinkítsará tí sín tinkáchónki Ìnchéni tí chónahya sín nkehe sine sín. Chjehérá kjuachaxin ts'ejó tí sín tsjijínixjahará sín.

¹⁴ Nixjehérá Dios la tsjancheherá ch'án kixin sincheyaoon ch'án tí sín chonkíhará. Tjancheherá Dios tsjinkítsa tí jehe sín la jehya kixin chrókóninkákonhénrá sín.

¹⁵ Tóchághakóará tí sín tjejóchéhe sín la ko tí tjejótsjánka sín la kofrá chrótsjankará.

¹⁶ Kjuaxróxin chrók'uejorá. Chrókjuinchehnkehyará. Náhi. Chrókóyóghará éxi tí sín noa. Chrókjuinchehnkehyará kixin nohará.

† 11:35 Isaías 40.13-14

¹⁷ Chrókujuich'ehyará jínahya tí sín kjuít'ahará ichrén nkehe jínahya. Náhi. Íchá jína chrókujuákoxinrá nkehe jína kixin chrók'uikon kaín chojni.

¹⁸ Chrókujuéyará jnkójína chrók'uejórá. Exí nkexrí chrókujuachará la kjuaxróxin chrók'uejórá kaín rá.

¹⁹ Tjuahará kichó ni, la chrókujuinchekjásótehyará jahórá tí sín ichrén nkehe kjuít'ahará. Náhi. Tjtohérá kixin Dios sinchekjásóte tí sín a. Ntáchro xroon itén Dios kixin: "Ixra kuéntana sintakitoaxián tíha. Janhan tsjénkahá tí sín a, ichro Ìnchéni."*

²⁰ Kjaxin ntáchro xroon itén Dios kixin: "Tí sín nínkakonhan t'enxín sín kjinta la chróchjehé sín nkehe chrókjóné sín la tí t'enxín sín ntá la kjaxin chróchjehé sín nkehe chrók'ui sín. Mé xikaha chrókujuich'e kixin chrókósuehé sín kixin tí nkehe kjuich'e sín."†

²¹ Chrókujtóehyará kixin chrókujuacha tí nkehe jínahya chrók'uetuanhanrá. Náhi. Chrókujuich'erá tí nkehe jína kixin chrókujuachahya tí nkehe jínahya chrók'uetóan.

13

¹ Kaín chojni t'ichjánxin sinchexiteyéhe sín tí gobierno kixin tí kjuachaxin chóna sín la Dios tsikjanjon kixin kohya nijnko gobierno chrók'uejótí jehya kjuachaxián Dios.

² Mé xikaha tí sín tjanjonko tí sín t'etóan la kjaxin nínkakonhen sín tí nkehe k'uetóan Dios. A ntá tí sín xikaha ch'e la mé jehé sín tjejá sín jie tsjasótéxin sín.

³ A ntá tí sín gobierno t'etóan la sinchekjásótehyará sín tí nkexro titekaon ch'e nkehe jína. Náhi. Tsonínkakonhen sín tí nkexro ch'e tí jínahya. Tí tjinkáonrá tsonínkakuanhyará sín la chrók'uejórá jnkójína. Chrókujuinchejiteyéhérá sín kixin chrókónínkakuanhyará sín.

⁴ Kixin Dios k'uetóan tí xra tjejóch'e sín kixin ntá jahará la jína chrók'uejórá. A ntá tí chrókujuich'erá nkehe jínahya la chróchakonrá kixin jehya chónkó tjejó tí gobierno. Náhi. Chóna sín kjuachaxin sinchekjásótiará sín kixin jehé sín la Dios k'uetóan tjejó sín tí xra a kixin sinchekjásóte sín tí sín jínahya tjenkayáxin.

⁵ Mé xikaha t'ichjánxin sinchexiteyéhérá tí gobierno la jehya jehí kixin chrókujuinchekjásótiahará sín. Náhi. Ó jehí jahará chrórxáinkáonrá kixin t'ichjánxin sinchexiteyéhérá sín.

⁶ La kjaxin jehya táhó. Náhi. T'ichjánxin chrókujuenkehérá gobierno tí chichaon kuénte tí xra ch'erá tjanchia sín kixin tí gobierno la Dios k'uetóan tjejó sín t'etóan sín.

⁷ Kjaxin chrókujuenkehérá kaín chojni tjasikéhérá. Tí nkexro síká kuénte xra la chrókujuenka sín kuénte tí xra, la tí nkexro síká ichrén nkehe nchekji ntá tíha kjaxin chrókujuenka sín, la kjaxin chrókujuikosáyehérá tí sín t'etóan.

⁸ Kjaxin chrókujuasikéhyará ninkexró. T'ichjánxin chrótuéhérá kichuárá kixin tí nkexro tjeúhe kichó la mé xikaha kjuinchejiteyérá tí nkehe k'uetóan tí ley.

⁹ Kixin ntáchro tí mandamiento kixin: "Tjakéhya asánrá í jnko chojni chjin la ko t'oyánhyará kichuárá la ko teehyará la nixjahyará kjuach'ia kuénte í jnko chojni. La ko tjaké hya asánrá nkehe óké."* Kaín tíha la ko í so nkehe t'etóan Dios mé tienxínni t'axrxéxin kixin: "Chrótjuéheni kichó ni éxi tjeúxin asénni."

¹⁰ Tí chojni tjeúhe kichó la ninkehó nkehe jínahya sich'ehe kichó. Mé xikaha chrótuéhé kichuárá la mé xikaha mé chróxiteyé jína tí nkehe nixja tí ley.

¹¹ Kaín tíha chrókónoheni tí tjejóni kixin ó kui tí hora chrók'uejótjeheni chrók'uajuahyani. Tí nkexro tsaaxinni la í séhya itsi ch'án ijie, a ntá tí kjuankíxinni kuítekaonni itén ch'án la ísé tsjxin ch'án.

¹² A ntá tí tie la í séhya tsjak'e kixin ó tsi tí t'inkáséyan la chrókuítóheni tí nkehe ch'eni kuénte sítié la chróchóntani kjuachaxin kuénte Nchakuen Dios kixin tsjinkitsa ts'ajini tí t'inkáséyan, éxi ijnko soldado t'inkáyate ch'án ka tsík'óna chica kixin kohya nkehe tsonhen ch'án.

¹³ Chrók'uejóni jnkójína éxi nkexrí chrók'uajini chaxin ntoá tí t'inkáséyan a. Chrókujuasinyani kia chrókujuanjonxin chojni la ko chrókókoanhyani la ko chrókujuenkayáxinhyani chróchóntani nchónhya chojni chjin la ko chrókujuenkayáxinhyani tí nkehe ntáchro asénni la ko chrókujuéyahyani kjuanínkaon la ko chrókóchjinqóxiénhyani.

¹⁴ A ntá jahará tákjárá tí kjuachaxin kuénte Ìnchéni Jesucristo tsjinkitsará la tíha mé éxi chrók'uinkayará nkehe tsík'óna chica kixin kohya nkehe chrókónhanrá. La ko chrókujuenkayáxinhyará tí nkehe ntoáhya tjenkayáxin chojni jínahya.

14

Tjóntahyará kichuárá

* 12:19 Deuteronomio 32.35 † 12:20 Proverbios 25.21-22 * 13:9 Éxodo 20.13-15, 17; Deuteronomio 5.17-19, 21; Levítico 19.18

¹ A ntá kjónté ijnko chojni kánhyó tinkáchónki Ìnchéni la chrók'uejokoará ch'án la ko chrókjontahyará ch'án kjónté kánhyó nohe ch'án.

² A ntá iso sín chaxín nohe sín la tjinkaon sín chrókjóné sín kaín nkehe. A ntá tí sín kánhyó tinkáchónki sín Ìnchéni ntá tjinkaon sín chrókjónéhya sín nto, ntá kayoa ó chrókjóné sín.

³ Tí nkexro chrókjóné kaín nkehe chrókjonjehya tí nkexro tjinkaon chrókjónéhya nkehe. A ntá tí sín chrókjónéhya nkehe chrókjontahya sín tí sín chrókjóné sín kaín nkehe káxin kjónté xikaha la Dios tsakja tí jehe sín.

⁴ ¿Xá nkexro jaha káxin chrókjóné tí nkexro ch'ehe xra í jnko nkexro? Tíha la xra kuènte tí lámgé ch'án tsontácho á jína kjuich'e ch'án xra o náhi. A ntá kjá tsjak'e ch'án jína káxin Ìnchéni chóna ch'án kjuachaxin tsjinkitsa ch'án tsjak'e tí ch'in á jína.

⁵ Iso sín tjenkayáxin sín káxin imá tjetooan ijnko yaon a ntá í jnko yaon la náhi. La í so sín ntáchro sín káxin kaín yaon la ó jnkokón. Ntá jnkojnko sín la jehó sín chrókjuenkayáxin sín káxin nkehe tí chaxín titekaon sín.

⁶ Tí sín xraxinkaon tí yaon la tjikosáyehe sín Ìnchéni la kjaxin tí sín tinkáchónkihya sín xikaha la tjikosáyehe sín Ìnchéni kjónté xraxinkakonhya sín tí yaon. Kjaxin tí sín ine kaín nkehe la ine sín káxin xikaha tjikosáyehe sín Ìnchéni la kjaxin tjanchehe sín kjuasáyé Dios. A ntá kjaxin tí sín nehya kaín nkehe la xikaha mé tjikosáyehe sín Ìnchéni la kjaxin tjanchehe sín kjuasáyé Dios.

⁷ Nijnko tí jeheni tjeióni káxin jehóni chrók'uetqanni la ko jehya jehí chrók'uenni.

⁸ Tí tjeióni la tjeióni káxin sich'eheni xra Ìnchéni la kjónté its'enni la kuènte ch'án tí jeheni. Méxra kjónté chrók'uejóchónni ó kjónté chrók'uenni la kuènte ch'án tí jeheni.

⁹ Méxra xikaha ntá Cristo la ik'uén ch'án la ko xechón ch'án inaá káxin k'óna ch'án Ìnché tí sín tsík'en la ko tí sín tjejóhón.

¹⁰ A ntá jahará la, ¿nkekuènte tjóntará tí kichuárá o nkekuènte chontehyará kaín sín kjuasáya? Káxin kaín ní tsóhjinani tí tjen Dios káxin tsontácho ch'án á jína xra kjuich'eni o náhi.

¹¹ Ntáchro xroon itén Dios káxin:

Méxra janhan takjénxian asenná, ichro Ìnchéni, káxin tí tjèn la ts'ejóxin toch'in kaín chojni káxin kaín chojni la tsjanchia sín kjuasáya káxin janhan mé Dios kuènte sín.*

¹² Mé xikaha jnkojnkonni chrókónoheni káxin tsochenkani Dios nkexri kjuich'eni.

Tjachruehyará kichuárá

¹³ Méxra chrókjontahyará kichuárá. Íchá jína káxin ninkehó nkehe chrókjuich'ehyará káxin ntá tí sín kichó ní chrókjuasinxinhya sín jie káxin tí chrókjuasin sín jie ntá xikaha chrók'uitjáyaxín tí tinkáchónki sín Ìnchéni.

¹⁴ Janhan tinkachónkia Ìnchéni Jesús la ntá xikaha ó òna káxin kohya ninkehó nkehe jehí tjuáhya. A ntá ijnko nkexro tjenkayáxin káxin jehya nkehe jína tíha ntá chaxín tjuáhya tí nkehe káxin xikaha tjenkayáxin ch'án.

¹⁵ Tí tjenkayáxin tí kichuá káxin tí nkehe inte la ntoáhya a ntá tí xikaha ch'e la tjuèhya tí kichuá. Káxin jehya tí nkehe chrókjóné ó chrókjuinçek'itjáyaxián tí kichuá káxin Cristo k'uenyákonhen ch'án kjaxin.

¹⁶ Chrókjuich'ehyará nkehe jínahya káxin ntá xikaha chrók'uántaxínhin sín tí nkehe jína tinkachónkirá.

¹⁷ Káxin tí kjuachaxién Dios la jehya tí nkehe chrokjóneni o tí nkehe chrok'uini. Náhi. Tí tjen tí kjuachaxién Dios la chrók'uejóni jnkojína la ko kjuaxróxin chrók'uejóni la ko chrókóchéheni káxin chóntani Nchakuen Dios.

¹⁸ Tí nkexro ch'ehe Cristo xra mé chrókjuinchechéhe Dios la ko chrókjuinchechéhe chojni.

¹⁹ Mé xikaha chrókjuéyáni kaín tí nkehe tjikao kjuaxróxin káxin ntá tsjinkítsani tí sín kichó ní káxin ntá kjaxin sín antsí chrókuiinkáchónki sín Ìnchéni.

²⁰ Chrókjuinçek'itjáyahyará tí xra kuènte Dios káxin tí nkehe chrókjónterá ó káxin kaín nkehe chrókjónterá la ó tsikjinchetjóá Dios. Tí jínahya la tí chrókjóneni ókjé nkehe ntá xikaha la í so chojni chrók'uitjáyaxín tí nkehe tinkáchónki sín.

²¹ Ntá íchá jína chrókjontehyará into la ko chrók'uihyará vino la ko ninkehó nkehe chrókjuich'ehyará tí xikaha chrókjuasixín jie kichuárá.

²² Tí nkehe tinkachónkirá la jahórá chrókónohará káxin Dios la tjetsjehe ch'án. A ntá jína tsjak'e tí nkexro tí chrókjuasixinhya ch'án jie tí nkehe tjenkayáxin ch'án.

²³ A ntá tí nkexro ine nkehe la tjenkayáxin sín káxin tsjasixín sín jie ntá chaxín xikaha yamá sín jie káxin kénhya asén sín kjóné sín tí nkehe. La tí kénhya asén sín tjenkayáxin sín la ó kjuasin sín jie.

* 14:11 Isaiás 45:23

15

Nchechéhérá kichuárá la jehya jahóra

¹ Tí antsi tinkáchónkini Ìnchéni ntá chrókjuinkitsani tí sín kánhyó tinkáchónki tí jehé ch'án la chrókjuich'ehyani tí nkehe chrókóchéxinni jehóni.

² Kjaxin kaín ni chrókjuinchechéheni kichó ni kixin chrók'uejó sín jína la ko kixin antsi chrókjuinkáchónki sín Ìnchéni.

³ Kixin kjaxin Cristo kjuich'ehya ch'án tí nkehe chrókóchéxin ch'án jehó ch'án. Náhí. Kjuínchexiteyá ch'án éxi ntáchro xroon itén Dios kixin: "K'uinka kjuasótexinna kaín tí kjuanínkaon chóna tí sín nínkakonhen Dios."*

⁴ Kaín nkehe chrónka xroon itén Dios senó la tsíkjin sín ósé kixin chrókónoheni kixin ntá chrók'uejóchónhenni la chrókónínkakonhyani kixin tíha mé nchechéheni.

⁵ Dios, mé tí nkexro tjinkitsani la ko nchechéheni, la kjaxin tsjinkitsa ch'án tí jahará kixin ts'ejorá jnkójina la ko jnkokón tsjenkayáxinkoárá kichuárá kixin xikaha kjuáqoxin Cristo Jesús.

⁶ Kixin kaín ni jnkokóá chrók'uákjenxinni Dios la chrókjuancheheni kjuasáyé ch'án mé jehé ch'án mé It'é Ìnchéni Jesucristo.

Tí tan jína xraqohe tí sín jehya judío

⁷ Chrókjuánjonrá kjuachaxin ts'ejó í so chojni la chrótjuéherá sín kixin éxi Cristo tsík'áyéhe ch'án tí jahará mé xikaha tsjikosáyehérá Dios.

⁸ Janhan jína chróntáxrjan kixin Cristo ikui sich'ehe xra tí sín judío kixin tsoxiteyá tí nkehe tsíchénka Dios tí sín tsik'axrjenixinni ósé kixin xikaha tsjáqoxin kixin Dios la jína ch'án la sinchexiteyá ch'án tí nkehe tsintáchro ch'án.

⁹ La kjaxin ikui ch'án kixin kjónté tí sín jehya sín judío la chrókjuanchehe sín kjuasáyé Dios kixin kuikonóqhe ch'án sín éxi chrónka tí xroon itén Dios kixin:

Janhan la ko tí sín tjejó ókjé nación mé tsjancheheni kjuasáyé Dios la ko tsotsjeni himno kixin ts'ákjenxinni ihníé ch'án.†

¹⁰ Kjaxin ntáchro í jnko parte xroon itén Dios inaá kixin:

Tsocháqoará kaín tí sín kuénté Dios.‡

¹¹ Kjaxin ntáchro xroon itén Dios inaá kixin:

Tjanchehérá kjuasáyé Ìnchéni Dios kaín rá kjónté jehya judíorá

mé kaín chojni chrókjuanchehe sín kjuasáyé Dios.§

¹² Kjaxin ch'ín Isaías tsíkjin kixin:

Ts'axrjenixin ch'ín Isaí ijnko nkexro

la ts'etuenhen ch'án kaín tí sín jehya judío,

q ntá tí sín a mé tsinkáchónki sín tí nkexro a.*

Mé xikaha ichro itén Dios.

¹³ Dios mé tjetjanjon ch'án kjuachaxin tjejóchónhenni la jehé ch'án nchechéheni ch'án la tjanjon ch'án kjuaxróxin ts'ejóni kixin titekaonni tí jehé ch'án kixin ntá ts'ánkí tí kjuachéhe tjejóchónhenni kjuachaxién Nchaquen ch'án.

¹⁴ Kichóni, chaxín tónóna kixin jahará la jína tjejorá la kaín xín kjuaxrexinkaon jína tjenkayáxinrá la nohará tsjinkitsará chénkará kichuárá.

¹⁵ La kjónté xikaha la chrakónhya ikjian tí xroon í chr'anhánrá xrjanka kaín tí nkehe kixin chrók'uitjayanhyará chróxráxinkáonrá kaín nkehe. Mé xikaha it'á tí xra kixin kjuasáyé Dios kjuanjon ch'án tí xra.

¹⁶ Kixin sit'aha Jesucristo xra tsotjanka tí sín jehya judío tí itén Dios. Tí xra mé tjákua tí tan jína tsaáxin chojni kixin ntá janhan tsjánjan tí sín jehya judío ts'áyéhe Dios éxi ijnko nkehe tsóxrjinhin ch'án kixin Nchaquen ch'án kótjuáxin sín.

¹⁷ Janhan mé ijnko chojni tinkáchónki Cristo Jesús la mé xikaha sín kjuachaxin tsqchána kixin t'aha xra Dios.

¹⁸ Chrokjuahya tsóhnke tsontáxrjan í jnko nkehe. Jehó tsóxrjanka nkexrí tí kjuachaxin kjuanjon Cristo chjina kixin tsotjanka tí sín jehya judío tí itén ch'án kixin tsitekaon sín Dios. Ntá xikaha kuítekaon sín kixin tí itan kjuákua la ko tí nkehe jína kjuít'a.

¹⁹ Kixin tí kjuachaxién Dios mé kjuáqoxian tí kjuásian kjuaxroan la ko kjuáqoxian tí kjuachaxin kuénte Nchaquen Dios. Mé xikaha kjuintaxixin kjuákua tí tan jína tsaáxin chojni Cristo xrankixín chjasin Jerusalén la nkuíxín chjinaxón ntiha la hasta estado Ilírico.

²⁰ Mé xikaha tjínkavan tsjijkákua tí tan tsaáxinni tí chjasin naxa tienhyé sín ihníé Cristo kixin tí janhan tjínkakhonya tsjixrónkáxian tí xra kuénte í jnko chojni xráxin tjech'e xra.

* 15:3 Salmo 69.9 † 15:9 2 Samuel 22.50; Salmo 18.49 ‡ 15:10 Deuteronomio 32.43 § 15:11 Salmo 117.1

* 15:12 Isaías 11.10

²¹ Íchá jína éxí ntáchro xroon itén Dios kixin:
Chrókuihin tí sín naxá kienhyé sín tí tan kuènte tí jehe ch'án.
La ko chrókiénxín tí sín naxá kienhyé tí tan kuènte ch'án.†

Ch'in Pablo tjenkayáxin ch'án sátsji ch'án chjasin Roma

²² Nchónhya veces tjínkavan chrókjuasántsjahá tí jahará kjánchó naxá xitjahya kjuasán ntiha.

²³ Kjánchó ijie la ó kjuixinna tí xrá nkuíxín tí tjèn ntihi. Ntá itsjé nánó tjínkavan chrókjuasántsjahá tí jahará

²⁴ a ntá ijie ts'atsínka tsonixjahará tí sátsjia nacióon España. Ntá tsòchàna ts'íkuàn tí jahará ntá tsjixin ntá chr'éxin tjínkavan kixin jahará tsjínkítsará tí sátsjia.

²⁵ A ntá ijie la sátsjija chjasin Jerusalén, sátsjikian tí nkehe tsjínkítsa tí sín kichó ni ntiha.

²⁶ Kixin tí sín estado Macedonia la ko estado Acaya kjuenkayáxin sín tsjejo sín chichaoon kixin tsochr'énnen sín tí sín kichó ni ntiha tsochjéhe tí sín nòa tjejó chjasin Jerusalén.

²⁷ Jehe sín kóxrjnhn sich'e sín xikaha kixin tí sín judío tinkáchónki Cristo kjuínkítsa tí jehe sín tsoñohe sín itén Dios. Ntá ijie la jehe sín chrókjuínkítsa sín inaá chrókjuanjon sín iso tí nkehe chóna sín chrók'uáyéhe tí sín judío tinkáchónki Ìnchéni.

²⁸ A ntá tió tsjixin tí xrá la ts'áyéhe sín tí chichaoon la ntá janhan sátsjia España la ts'atsínkua tsonixjahará.

²⁹ Ó nòna kixin tió sátsjia la Cristo mé imá sincheyaoon ch'án tí janhan la ko tí jahará.

³⁰ Kichóni kjuasáyé Ìnchéni Jesucristo la ko tí Nchakuen ch'án tjanjon kjuachaxin tsotjuèhèni kichó ni mé xrjannóahará kixin jnkokoá chrókjuenkayáxinni kixin tí xrá tjét'a la ko chrónixjehérá Dios kixin tí janhan.

³¹ Tjanchehérá Dios kixin tsjínkítsa ch'án tí janhan kixin kohya nkehe tsoonna kixin kaín tí sín titekakonhya Dios siin chjasin Judea. La ko tjanchará kixin jína sátsjikian tí nkehe tsjínkítsa tí sín kichó ni tjejó chjasin Jerusalén kixin jína chrók'uáyéhe sín.

³² Ntá tí tjínkaon Dios la tsòchàna tsjasán tí tjejórá jahará la ko kjuaxróxin tsjak'é tí tsjasántsjahará.

³³ Dios tjanjon kjuaxróxin ts'ejokoará kaín rá. Amén.

16

Ch'in Pablo nixjehé ch'án tí sín chóxin ch'án

¹ Tétuanhanrá tsjínkítsará tí tjan kichó ni Febe ch'e tjan xrá njnko chjasin Cencrea

² mé tjánjonrá kjuachaxin tsjak'e tjan kjuachaxièn ihnié Ìnchéni éxí ch'eherá í so sín kichó ni tinkáchónki Ìnchéni. Tsjínkítsará tjan ichrén nkehe t'ichjánxinhin tjan kixin jehe tjan kjaxin kjuínkítsa tjan nchónhya chojni la kjaxin kjuínkítsa tjan tí janhan.

³ Nixjehérá tjan Priscila la ko ch'in Aquila. Jehe sín jnkokoá kjuích'ekoni xrá kixin kjaxin sín mé ch'ehe sín Cristo xrá.

⁴ Jehe sín chrók'uénxín sín kixin kjuínkítsana sín tí janhan mé xikaha tjahá sín kjuasáya la jehya janhvàn, kjaxin kaín sín kichó ni njnkoé tí sín jehya judío.

⁵ Nixjehérá kjaxin kaín kichó ni tóchjina ntòe tjan Priscila la ko ch'in Aquila. Nixjehérá tí ch'in choxian jína Epeneto mé jehe ch'án la saoxín kuitekaon ch'án Cristo estado Acaya.

⁶ Nixjehérá tjan María kixin kjaxin tjan kjuích'e tjan xrá tí tjejórá ntiha.

⁷ Kjaxin nixjehérá tí sín tsikjixin chjasenná mé ch'in Andrónico la ko ch'in Junias. Tí k'uikjèna ntòechiso la kjaxin tí jehe sín k'uikjehé sín. Kjaxin kaín tí í so sín apóstol la tjikosáyehe sín tí sín a. Jehe sín senó kuinkáchónki sín Cristo ntá chr'éxin janhan.

⁸ Nixjehérá ch'in Amplias kixin jehe ch'án mé ijnko nkexro choxian la ko tjahá tinkáchónki Ìnchéni.

⁹ Nixjehérá ch'in Urbano kixin jnkokoá kjuít'akian ch'án xrá kuènte Jesucristo la ko nixjehérá tí ch'in choxian Estaquis.

¹⁰ Nixjehérá ch'in Apeles. Jehe ch'án la kjónté nchónhya nkehe kónhen ch'án kjuasóte ch'án kixin tinkáchónki ch'án Cristo. Kjaxin nixjehérá tí sín kjéhya ch'in Aristóbulo.

¹¹ Kjaxin nixjehérá tí ch'in kjéhyana Herodión la ko kjaxin nixjehérá kaín tí sín kjéhya ch'in Narciso kixin kjaxin sín tinkáchónki sín Ìnchéni.

¹² Nixjehérá tjan Trifena la ko tjan Trifosa. Kjaxin jehe sín kjuích'e sín xrá kuènte Ìnchéni la ko nixjehérá kjaxin tí tjan kichó ni Pérsida. Kjaxin kjuínkítsa tjan kjuích'e tjan xrá kuènte Ìnchéni.

¹³ Kjaxin nixjehérá ch'in Rufo, ijnko chojni tsikjeyá Ìnchéni la ko nixjehérá tí iné ch'án kjaxin kixin kjaxin tjan kjuínkítsa tjan tí janhan la éxí naná k'uikuàn tí jehe tjan.

† 15:21 Isaías 52.15

¹⁴ Kjaxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kichó ni tjejóko tí jehe sín ntiha.

¹⁵ Nixjehérá kjaxin ch'ín Filólogo la ko tjan Julia la ko ch'ín Nereo la ko tí tjan kichó ch'án la ko ch'ín Olimpas la ko kaín tí sín kichó ni tinkáchónki Ìnchéni tjejóko sín ntiha.

¹⁶ Kjaxin tsehérá tja kichuárá kjuachaxin ihñié Ìnchéni. Kaín tí sín ñinko kuènte Cristo ntihi xraxinkaon sín tí jahará la nixjahará sín.

¹⁷ Kichóni, xrjanóghará kixin chrótsjehérá nkexro tí sín tjixrónkáxin chrók'óxiáka tí sín jnkokóá tinkáchónki Ìnchéni. Jehe sín titekakonhya sín tí itén Dios kjuáakohará k'uitjará. Tí xikaha ch'e sín la chrók'uaxrjekjanxínrá ntiha.

¹⁸ Tí nkexro xikaha ch'e la jehya Ìnchéni Jesucristo ch'ehe xra. Náhi. Jehí tjinkaon sín chrókjuixrónkáxin sín la nixja sín tí nkehe náxrjón ó la xikaha ch'iyehé sín asén tí chojni naḡa noehya.

¹⁹ Kaín chojni ó nohe kixin jahará la ó kuitekáonrá Ìnchéni. Mé xikaha chàna tí janhan la tjinkavan chrókóxakonhanrá chrókjuich'erá xra jina. Jehya kixin chrókjuich'erá nkehe jínahya.

²⁰ Tí Dios tjanjon kjuaxróxin mé tjoka tsinkátja Satanás, í ts'etueñhya. A ntá Ìnchéni Jesucristo mé sintayaonrá ch'án.

²¹ Ch'ín Timoteo nixjahará ch'án. Jehe ch'án jnkokón ch'ekoni xra. La kjaxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

²² Janhan Tercio ikjian tí xroon i k'uetqan ch'ín Pablo la kjaxin nixjahará kjuachaxièn Ìnchéni.

²³ Ch'ín Gayo nixjahará ch'án. Jehe ch'án kjuanjon kjuachaxin kjuak'é janhan ntqé ch'án la ko kaín tí sín kuènte ñinko tójkotsé ntqé ch'án. La ko nixjahará ch'ín Erasto. Jehe ch'án mé tesorero kuènte chjasin la ko tí ch'ín kichó ni Cuarto kjaxin nixjahará ch'án.

²⁴ Ìnchéni Jesucristo sincheyaon ch'án kaín tí jahará. Amén.

²⁵ Ntá ijie tsjancheheni kjuasáyé Dios kixin jehe ch'án tjinkitsa ch'án kixin jina chrók'uejorá éxi chrónka tí tan jina tsaáxinni la ko éxi kjuakoni kuènte Jesucristo. Tiha mé chaxín chrónka éxi Dios k'uetqan nchenoheni ch'án tí nkehe ninkexró k'uénoehya desde k'óna chjasintajni.

²⁶ A ntá ijie kaín ni tsoñoexínni nkexrí nixja xroon ikjin tí sín profeta kixin nkexrí k'uetqan Dios itjen jnkochrixin. Ntá kaín nkehe k'uénoehya ninkexró a ntá tsochóxin kuenté chjasintajni kixin tsinkáchónki sín la ko tsitekaon sín Dios.

²⁷ Itjen jnkokóá Dios la jehó ch'án imá nohe ch'án la jehó ch'án mé tjancheheni kjuasáya kixin tinkáchónkini Ìnchéni Jesucristo jnkochrixin. Amén. Ó tjen.

Tí xroon saxín ikjin ch'ín Pablo chr'énhen ch'án tí sín tinkáchónki Cristo siín chjasin Corinto

Ch'ín Pablo mé ikjin ch'án xroon ichr'án ch'án tí nínko chjasin Corinto

¹ Janhan Pablo mé kjueyána Dios tjinkaon ch'án kixin kjuachaxin kuente Ìnchéni Jesucristo mé chrókjuít'ahā ch'án xra. Janhan la ko kichó ni Sóstenes mé

² ikjinni tí xroon i chr'ánhanráni tí jahará tójnksotserá nínko chjasin Corinto. Ó kjuínchetjórá Ìnchéni Jesucristo na mé kjueyará Dios tí jahará kixin chrók'uaxrjekjanxínrá tí sín tjasin jie kixin tjinkaon ch'án tí jahará kixin tjóá chrók'uejorá la ko xikaha kjueyá ch'án kaín xín tí sín tjanchehe sín Ìnchéni Jesucristo kixin chrókjuinkítsa ch'án sín, tíha mé Ìnché sín la ko Ìnchéni.

³ Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaoon tí sín ntiha

⁴ Jnkochr'ixín tjáncháha Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús.

⁵ Na mé Dios tjáhará kjuachaxin kuente ch'án ntá xikaha antsí jina nohará chronkaxínrá kixin nkexrí tinkachónkirá Ìnchéni la ko kjaxin antsí jina tiénxinrá kaín nkehe chaxin ntoá.

⁶ Tí nkehe kuínhínrá kixin nkexrí tjen Cristo na ntá jie jahará tjáoxínrá.

⁷ Ntá jahará ó chontará kaín xín tí kjuachaxin kuente Nchakuen Dios, la í ninkehó t'itjáyankíhya tí kjuachaxin kuente ch'án k'uayéhérá nachrohe tjejochonhénrá tsokjan Ìnchéni Jesucristo.

⁸ Ntá Ìnchéni ts'ayakonhanrá ch'án kixin ts'itjéhyará tí tinkachónkirá ch'án hasta tsjixraká tí yaoon tsjixixín. Ntá ninkehró ts'ekahyará jie kixin ntoáhya tjejoch'erá, tsixro sín, tí yaoon tsokjan ch'án.

⁹ Ó noheni kixin Dios chaxín sinchexiteyá ch'án tí nkehe ntáchro ch'án kixin jehe ch'án mé tsíkjeýará ch'án kixin chrókuinkachónkirá tí Xjeen ch'án Jesucristo, mé Ìnchéni tíha.

Jnkokoáhya kjuenkayáxin tí sín tinkáchónki Cristo ntiha chjasin Corinto

¹⁰ Kichóni, xrxánóaxínrá tí kjuachaxin ihnié Ìnchéni Jesucristo kixin jnkokoá chrókjuenkayáxinrá la ko chrók'uaxrjentahyará ókje na mé jnkokoá chrókjuenkayáxinkoará kichuára.

¹¹ Kichóni, ó kuínhan tí nkehe chrónka tí sín kjéhya ch'ín Cloé kixin siín kjuanínkaon tí tjejorá tójnksotserá ntiha.

¹² Na mé ntáxrxán kixin isorá ntáchrórá kixin jahará chréhérá tí janhan Pablo, la ko í sorá ntáchrórá kixin jahará chréhérá tí ch'ín Apolos, la ko í sorá ntáchrórá kixin jahará chréhérá tí ch'ín Pedro, la ko í sorá ntáchrórá kixin chréhérá Cristo.

¹³ ¿Xá nkekjaín Cristo siín kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuikitexínrá tí njina ní?

¹⁴ Tjáncháha Dios kjuasáya kixin nijnko tí jahará kuikítiahyará ntiha. Jehó ch'ín Crispo la ko ch'ín Gayo mé kuikíte janhan.

¹⁵ Na mé nijnkorá xitjahya tsontáchrórá kixin njina kuikitexínrá.

¹⁶ Kjaxin jehó kuikíte tí ch'ín Estéfanas la ko tí sín kjéhya ch'án. Xrxáinkakonhya á kuikíte í so sín o náhi.

¹⁷ Kixin tí xra chjina Cristo jehya kixin chrókuikíte chojni. Náhi. Tí xra chjina Ìnchéni kixin tsóxrxánkaxián tí tan tsaáxinni. Tjínkakonhya kixin chrókjuákoxián palabra náxrxón noi kixin xikaha chrókjuákua ntá chrókjuintamá tí kjuachaxin jie kónoxín tí k'uénxin Ìnchéni Jesús tí ntacruz, kjuák'enkání ch'án, k'uényákonhenni ch'án.

Cristo mé tjáoxin tí kjuachaxién Dios la ko tjáoxin ch'án kixin imá nohe Dios

¹⁸ Chronkaxínni kixin k'uényákonhenni Cristo tí ntacruz. A ntá tí tsinhín tí sín xrxáin ts'itjáyán ntá ts'ikon sín tíha éxi nkehe chónkó. A ntá kaín ní chojni kuaáni mé t'íkonní kixin kjuachaxin jie tíha.

¹⁹ Mé xikaha ntáchro xroon itén Dios tsíkjin sín ósé kixin Dios mé sinchek'itjáyán tí nkehe tjenkayáxin tí sín imá nohe, la ko tsítjenta ch'án tí nkehe ntáchro tí sín imá tiénxín sín.*

* 1:19 Isaías 29.14

²⁰ ¿Mé nkehe tsonhen ntáchro sín kixin imá nohe sín la ko nkehe tsonhen tjako sín la ko nkehe tsonhen tí imá nohe sín nixja sín? Táha la nkehe síin chjasintajni ó. A ntá Dios mé t'ikon ch'án kixin lɔntj sín kixin xikaha ichro sín.

²¹ Kixin Dios antsí nohe ntá xikaha kuitgehya ch'án kixin kjuachaxin kuente sín ó chrókjuacha sín chróhóxixín sín ch'án. Ntá kóxrjínhjn Dios chrókjueya ch'án chrókjuinchekaá ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

²² Tí sín judío mé tjinkaon sín chrók'uikon sín kjuaxroan jíé, ichro sín. A ntá tí sín nkiva griego mé xritjeyá sín kixin antsí chrókónohe sín, ichro sín.

²³ A ntá jeheni kaín ni tinkáchónkini Cristo la tjinkakonhyani chrókónoheni kaín tíha la mé jehó Cristo tjakoşinni. Chrónkani kixin ijnko ntacruz kjuák'enkáni ch'án, k'uénxin ch'án. A ntá tí sín judío ntáchro sín kixin ijnko nkehe chrókósuèheni chrókuinkáchónkini tíha, ichro sín. A ntá tí sín jehya judío ntáchro sín kixin chojni lɔntj tí jeheni kixin xikaha tinkáchónkini, ichro sín.

²⁴ A ntá tí sín kjueyá Dios, kjónté judío sín na o griego sín, la kaín ni ntáchroni kixin Cristo mé k'uenyákonhenni ch'án. Mé xikaha tjakoşin Dios tí kjuachaxin jíé la ko tí kjuaxrexinkaon jina kuente ch'án.

²⁵ Ntá jehe sín ntáchro sín kixin éxi ijnko nkehe chónkó tí nkehe kjuenkayáxin Dios, na kjónté xikaha la antsí tjetóxin nohe Dios. A ntá tí sín imá nohe ntíhi chjasintajni tsjachahya sín sincheyóhe sín ch'án. La ko kjaxin ntáchro sín kixin jíehya tí kjuachaxin chónka Dios. A ntá tí sín antsí má chónka kjuachaxin ntíhi chjasintajni kjónté la tóyoehya sín Dios kixin antsí chónka ch'án kjuachaxin t'etɔan ch'án.

²⁶ Kichóni, xráxinkáonrá nkexi k'uéjorá ntá kjónté kjueyará Dios tí jahará. Na mé tsjéhyará imá kónohará éxi t'ikon tí sín chjasintajni la kjónté kjueyará Dios tí jahará. La ko tsjéhyará imá kuétoanrá la ko tsjéhyará k'uaxrjenixínrá tí sín imá k'uék'etɔan.

²⁷ Ntá kjónté Dios mé kjueyá iso tí sín noehya éxi t'ikon tí sín chjasintajni kixin xikaha tjinkaon ch'án chrókjuinchesuehé ch'án tí sín imá nohe ntíhi chjasintajni. La ko kjaxin kjueyá Dios iso tí sín chóntahya kjuachaxin éxi t'ikon tí sín chjasintajni kixin xikaha tjinkaon ch'án chrókjuinchesuehé ch'án tí sín imá chónka kjuachaxin ntíhi chjasintajni.

²⁸ Dios mé kjueyá ch'án iso tí sín t'etɔanhya la ko iso tí sín ninkehó sínkíhya tónhen sín ntíhi chjasintajni kixin jehe ch'án mé chrókjuinchek'itjáyan ch'án kjuachaxién tí sín jehó chrók'uetɔan.

²⁹ Méxra xikaha ninkexró tsjachahya sinchehnke tí tjen Dios.

³⁰ A ntá tí kjuachaxin kuente Dios mé tinkáchónkirá Cristo Jesús, a ntá chóntaxinni Cristo kjuaxrexinkaon jina, la ko tí kjuachaxin kuente ch'án kóxika tí jie kuèteni, la ko tí kjuachaxin kuente ch'án sinchetjuáxinni ch'án, la ko tí ijnùé ch'án k'uénaxinni ch'án.

³¹ Mé xikaha éxi chrónka tí xroon tsíkjin sín ósé ntáchro kixin: "Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuakoşin ch'án kixin imá t'etɔan tí kjuachaxin kuente Dios."[†]

2

Ch'in Pablo mé tjako ch'án kixin Jesucristo kjuák'enkáni ch'án ntacruz

¹ Kichóni, tió kjuasán ntíha chjasánrá níxjohará chrókjuákohará nkexrí tjen Dios la jehya ijnko tan tienxínhya chojni la ko jehya itan imá noi chrókjuákoáxinrá.

² Kixin tió k'uéjóni jnkokoá ntíha kjuenkayáxinhya janhan kixin í so nkehe chrók'uitja chróxrjanka la jehó tjínkavan chróxrjanka kixin Jesucristo la kjuák'enkáni ch'án tí ntacruz.

³ K'uéjóni jnkokoá ntíha la ntá jahará ó nohará kixin janhan kjuak'é éxi chrókjuachahya kixin sixránkãna, chrãkonna.

⁴ Tí kjuankíxian níxjohará la ko xrjankaxián tí tan tsaáxin chojni, la tjínkakhonyha chrókjuáchrúáxinrá tí nkehe náxrjón níxja chojni tsíkónohe má. Náhi. Tió kjuákohará kónoxin kixin tjékian Nchãkuen Dios la ko kónoxin tí kjuachaxin jíé kuente ch'án,

⁵ kixin jehya kjuaxrexinkaon kuente chojni tsíkónohe má chrókuinkáchónkirá. Náhi. Tí kjuachaxin kuente Dios mé chrókuinkáchónkirá.

Nchãkuen Dios mé tsóhóxixinni ch'án

⁶ Kjãnchó tió tjãkõhã tí sín chaxín ó nohe sín tinkáchónki Ìnchéni mé xrjanka tí kjuaxrexinkaon antsí noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etɔan chjasintajni, na mé tí kjuachaxin kuente sín la tjoka ts'itjáyan.

⁷ Jeheni mé antsí chrónkani tí nkehe jehó Dios nohe, na mé tí nkehe tsíkjenkayáxin ch'án naxã k'ónahya chjasintajni kixin nkexrí tsaáxinni.

⁸ Nijnko tí sín t'etɔan chjasintajni kienxínhya sín tí nkehe tsíkjenkayáxin Dios. A ntá tí chrókiénxín sín tíha la ntá chrókjuák'enkãnihya sín Ìnchéni tjetɔan tí ntacruz.

[†] 1:31 Jeremías 9.23

⁹ Éxi ntáchro xroon itén Dios tsíkjin sín ósé kixin: Naᵗa k'uikohya chojni la ko naᵗa kíenya chojni, la ko naᵗa kjuenkayáxinhya chojni

kixin nkexrí siín kaín xín nkehe kjuich'éna Dios ts'áyéhe tí sín tjuéhe ch'án.*

¹⁰ A ntá Dios mé nchenoexínni kaín tíha kixin chóntani Nchakuen ch'án. Na mé tí Nchakuen Dios mé tjetsjehe kixin nkexrí siín kaín xín nkehe la ko kjaxin nkexrí tjen tí nkehe tjenkayáxin Dios.

¹¹ Na mé ninkexró mé noehya nkexrí tjenkayáxin asén chojni. Na mé jnkojnko chojni mé nohe kixin nkexrí tónhen asén. Méxra xikaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe.

¹² A ntá jehya tí nchakuen chojni chjasintajni k'uáyéheni. Náhi. Tí Nchakuen kuixín tí tjen Dios mé k'uáyéheni kixin ntá tsonoexínni kixin kaín xín nkehe kjuínchekitonhenni Dios.

¹³ Kjaxin jeheni chrónkani tíhi, a ntá jehya chronkaxínni tí nkehe tsíkónohe chojni ó. Náhi. Tí Nchakuen Dios mé nchenoexínni nkexrí tsjakoxénni tí sín chóna Nchakuen ch'án.

¹⁴ Kjánchó tí sín naᵗa chóntahya Nchakuen Dios mé xitjahya ts'áyéhe sín tí nkehe tjanjon Nchakuen Dios. Na mé éxi lóco t'ikon sín kaín tíha kixin jehó tí sín chóna Nchakuen Dios mé tsjacha sín tsiénxín sín tíha.

¹⁵ A ntá tí nkexro chóna Nchakuen Dios mé chrókjuacha chrókónohe nkexrí siín kaín xín nkehe. Kjánchó tí nkexró chóntahya Nchakuen Dios tsjachahya tsjanchia jie tí jehe ch'án.

¹⁶ Méxra ntáchro xroon itén Dios kixin: ¿Xá ninkexró chrókónohe kixin nkexrí tjenkayáxin Ìnchéni kixin chrókjuacha sín chrókjuakohé sín ch'án inaá?† Kjánchó jeheni la ó chóntani tí kjuaxrexinkaon kuènte Cristo.

3

Tí sín jnkokoá kjuich'ehe sín Dios xra

¹ Mé xikaha, kichó ni, kjuachahya janhan chrónixjahará éxi chojni t'etuenhen asén sín Nchakuen Dios. Náhi. Éxi chojni naᵗa nchexiteyéhe sín tí nkehe ntáchro asén sín, na mé éxi xjan ntsínsi na ntá kjuankixin kuinkáchónki Cristo mé xikaha tí jahará.

² Janhan na kjuákoáxinrá nkehe xrahya éxi yóhe ijnko xjanhnté tí jahará naᵗa nchekakí iné tsjen kixin naᵗa xitjahya sine nkehe cha. Mé xikaha tí jahará naᵗa xitjahya sinterá nkehe cha

³ Kixin naᵗa éxi chojni ó nchexiteyéhérá tí nkehe ntáchro asánrá kixin tí naᵗa siín kjuachjínqoxínhin la ko siín kjuaninkaon la ko jnkokoáhya tjenkayáxinrá, la mé tjejoch'erá éxi ch'e kaín xín chojni chjasintajni.

⁴ Isorá ntáchrórá kixin chréhérá tí janhan Pablo, la ko í sorá ntáchrórá kixin chréhérá tí ch'ín Apolos. Na mé éxi chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehí ijnko chojni kjuich'ehe Dios xra, a ntá jahará kuinkachónkirá Ìnchéni kixin janhan kjuákoahará. Jnkojnkoní kjuich'eni tí xra kjuanjon Ìnchéni.

⁶ Janhan kuènká, a ntá ch'ín Apolos ìntá kjuáka ch'án, a ntá Dios la mé kjuínchek'ánki ch'án tí nkehe a.

⁷ Méxra tí nkexro k'uenkaxin la ko tí nkexro tjáka ntá la kánhyó tjetooan kixin Dios mé chóna kaín kjuachaxin la jehe ch'án nchek'ánki kaín nkehe siín.

⁸ A ntá tí sín t'enká la ko tí sín tjáka ntá la ó jnkokón ch'e sín xra, a ntá Dios mé tsjenkehe sín jnkojnko tí xra kjuich'e sín.

⁹ Méxra jeheni mé jnkokoá ch'eheni Dios xra, a ntá jahará mé éxi tí nontee Dios, ntaha ch'e ch'án xra, la ko kjaxin jahará mé tí nchia tjech'éna ch'án.

¹⁰ Janhan mé tí maestro ch'éna nchia kixin Dios kjuanjon kjuachaxin tsjaké tí xro xránkixín, a ntá í jnko nkexro sich'éna nchia chrítaón tí xro a. A ntá jnkojnko nkexro t'ichjánxin ntoá chrókjuich'éna sín nchia chrítaón tí xro a,

¹¹ kixin kohya ninkexró tsjacha tsjak'e í jnko xro xránkixín tí nchia a kixin táha la ó tsíjixin tsík'óna, kixin Jesucristo tíha.

¹² A ntá chrítaón tíha mé tsjacha sich'éna chojni nchia tsík'óna chica oro, la ko chica plata, la ko xro náxrjón tjete, la ko inta tabla, la ko kaní, la ko ntaxro.

¹³ Na mé tsonoxín nkehe tí xra kjuich'e jnkojnko chojni tió tsi tí yaon tsjixixín. Kixin tí yaon a mé tsi xrohi. A ntá tí xrohi mé tsjakoxín nkexéhe tí xra tsoche la ko nkexéhe tí xra tsochehya.

¹⁴ A ntá tí jnkojín chojni kjuich'éna ijnko nchia tsochehya la mé tsjacha ch'án tí xra kjuich'e ch'án.

* 2:9 Isaías 64.4 † 2:16 Isaías 40.13

¹⁵ A ntá tí chróche tí nchia kjuích'éna ijnko chojni, ntá chrók'uitjáyan kuenté. A ntá tí nkexro kjuích'éna nchia la tsaa éxi yóhe chrókuinkehe ch'án xrohi.

¹⁶ ¿Á noahyará kixin jahará kaín rá na mé ijnko ninkoe Dios la ko Nchakuen Dios mé chóna asánrá?

¹⁷ A ntá jnkojin nkexro tjinkaon ts'óxíka tí ninkoe Dios na mé Dios mé sinchek'itjáyan tí nkexro xíkaha sich'e kixin tí ninkoe Dios la tjóá tíha. A ntá tí njnko a mé jahará tíha.

¹⁸ Ninkexró chrókjuenkayáxin kixin imá nohe. Tí jnkojinrá tónhen asánrá kixin imá nohará éxi nohe chojni chjasintajni ó, na ntá chrókjanrá chrók'ónará éxi chojni noehya kixin ntá chrók'uitjárá chrók'ónará ijnko chojni chaxín nohe.

¹⁹ Tí nkehe nohe tí chojni chjasintajni la mé ijnko nkehe lontí t'ikon Dios. A ntá ntáchro tí xroon itén Dios tsíkin sín ósé kixin: "Tí nkehe tsík'tjá sín ch'iyaxín sín la tíha mé tsokjan ts'énxín sín."*

²⁰ La ko kjaxin ntáchro xroon itén Dios kixin: "Ínchéni la ó nohe ch'án kixin kaín nkehe tjenkayáxin tí sín ntáchro sín kixin imá nohe sín la mé ijnko kjuaxrexinkaon lontí tíha, ichro Dios."†

²¹ Méxra chrókjuinchehnkehyará jahará kixin chréhérá ijnko chojni imá nohe, kixin kaín xín nkehe síin la kuéntará jahará,

²² mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítónhen jie, la ko tí nkehe tsónhen chr'éxin, la kaín la kuéntará tí jahará.

²³ A ntá jahará la Cristo mé t'ayakonhanrá. Kixin Cristo la jehe ch'án la mé kuénte Dios.

4

Tí xra kjuích'e tí sín kjueyá Ínchéni

¹ Jahará chrók'uikonrá tí jeheni éxi chojni ch'ehó Cristo xra k'uáyéheni tí xra tjakoni tí nkehe kuénte Dios ninkexró k'úénoehya.

² A ntá ijnko chojni k'uáyéhe xra ts'etqan chrókjuakoxín kixin jína ch'án la ko jína ch'e ch'án xra.

³ A ntá janhan tóxakonnahya tí nkehe chróntáchrorá jahará chrókjuanchiará jie tí janhan kixin tí xra t'ahá Dios, la ko kjaxin tóxakonnahya tí nkehe chróntáchro í so chojni chjasintajni, chrókjuanchia sín jie tí janhan. Kjaxin janhan la tékahya jie asenná.

⁴ Kjánchó janhan tjenkayáxinhya kixin chonta jie. Kjánchó jehya xíkaha tsontáxrjan kixin Dios t'ikon kixin chontahya jie janhan. Náhi. Jehe Ínchéni mé tsotsjehe ch'án nkehe tí jie chonta janhan.

⁵ Méxra naxá kjuixrakáhya yaon chrókjuinchekitqoxínrá ichrén jie. Chonhénrá tí tsi Ínchéni kixin jehe ch'án mé sinchenoxín ch'án kaín tí nkehe símá tí sítié, la ko sinchenoxín ch'án kaín xín nkehe imó tjenkayáxin sín asén chojni. A ntá Dios mé tsjanjon ch'án tí nkehe tsjacha jnkojnko chojni.

⁶ Kichóni, nixjahará tí nkehe í kixin jína chrók'uejorá jahará ntá xíkaha kjuintayóaxian éxi ch'ín Apolos la ko éxi janhan kixin chrók'uitjárá kixin chrókjuenkayáxinrá jehó tí nkehe tsíkin sín ósé, kixin nijnko nkexro chrókjuinchehnkehya kixin chréhe sín ijnko chojni, a ntá tsochóntehya sín kjuasáyé tí í jnko chojni.

⁷ ¿Méxra nkexro ntáchro kixin jahará antsí tjetoaná? ¿Xá nkehe chontará naxá kjuanjonhya Dios kixin? Tí kjuanjon Dios kaín nkehe chontará, ¿ntá nkekuénte nchehnerá kixin jahórá tsík'yará tíha?

⁸ Jahará tónhanrá kixin imá rícorá. Na mé chaxín chontará kaín xín nkehe tjenkayáxinrá. Ntá jie tónhen asánrá éxi ijnko rey, la í t'ichjánxianhyará ninkehó tí jeheni kixin naxá chrókjuinkitsani. Tí chrókchaxín chrók'ónará ijnko rey chaxín ntá kjaxinni chróchóntani kjuachaxín chrók'uetqanni.

⁹ Ntá tónhen asenná kixin jeheni chojni kjueyá Ínchéni mé kjuanjon Dios kixin jeheni chrókjuixín chrók'uejóni éxi chojni kuítqnhenni kixin noxín chrók'ueni ts'ikon kaín xín chojni chjasintajni la ko ts'ikon tí sín ángel kjaxin.

¹⁰ A ntá jeheni tinkáchónkini Cristo, a ntá xíkaha t'ikon sín tí jeheni éxi chojni lontí. A ntá t'ikon sín tí jahará éxi imá nohará. Jeheni la éxi chóntahyani kjuachaxin, a ntá jahará la éxi imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín.

¹¹ A ntá kjónté naxá jie jeheni t'énxínni kjinta, la ko t'énxínni ntá, la ko chóntahyani ikéni, la ko nínkakonhenni chojni, la ko chóntahyani nkerí ts'ejóni.

¹² La ko tóxrjéni kixin itjani ch'exínni xra. A ntá tió t'ántaxínhínni sín la tjancheheni Dios kixin sincheyaon ch'án tí jehe sín. La ko tió chónkíhi sín tí jeheni la tónínkakuenhyani sín.

* 3:19 Job 5.13 † 3:20 Salmo 94.11

¹³ Tió t'ántaxínhinni sín la jnkojína tjeteheni tí jehe sín. T'íkon sín tí jeheni éxi chjinínó ntihi chjasintajni, na mé éxi ijnko nkehe ninkehó sinkíhya la ko mé xíkaha naxa sítóhnen tí yaon jie.

¹⁴ Ikjian tíhi na jehya kixin chrókujuintasuàhará. Náhi. Tjínkavan chrókujuintaxránkáonrá kixin éxi xjanna t'íkuan tí jahará, tjuàhará.

¹⁵ Kjonté chróchontará ite mil chojni chrókujuakohará nkexrí tjen Cristo la chontahyará itsjé it'ará. Ntá janhan mé k'óna it'ará tí jahará tió kuítekáonrá Cristo Jesús kixin kjuákohará tí tan jína tsaáxinni.

¹⁶ Mé xíkaha xrjanóahará kixin chrókujuakoxínrá éxi tí janhan.

¹⁷ Méxra kuétuanhan tí ch'in Timoteo kixin tsjiji ch'án ntiha. Na mé éxi xjanna t'íkuan tí jehe ch'án, tjuaha ch'án, kixin kjuákoħa ch'án ntá kuítekaon ch'án Ìnchéni ntá xráxin jína ch'e ch'án xra. Ntá tsjiji ch'án sintaxraxínkáonrá ch'án nkexrí tjákoħian tí ntje Cristo éxi xráxin tjákua kain xín nínko t'atsínka tí janhan.

¹⁸ Ntá iso tí jahará imá ihnkerá kixin tjenkayáxinrá kixin chaxínhya chrókujuasántsahará.

¹⁹ A ntá tjoka chrókujuasántsahará tí chaxín xíkaha tjínkaon Ìnchéni. A ntá jehya jehó tí nkehe nixja tí sín xriko kjuahnke mé chrókujuinhan. Náhi. Na mé ts'íkuan á chaxín chóna sín kjuachaxín kixin xíkaha nixja sín.

²⁰ A ntá tí kjuachaxién Dios la jehya tí nkehe tsonixjani ó. Náhi. Tí tjákoħinni la tí kjuachaxién Dios.

²¹ ¿Nkehe tjínkáonrá tí jahará, kixin á chrókujuasán chrókujuintakjasótiará? o ¿á tjínkáonrá kixin jnkojína chrókujuasán?

5

Tsitoxén ijnko jie tjaħeħe kichó chojni

¹ ¿Á chaxín tsík'íkon sín kixin tí tjeorá ntiha la ijnkorá mé chontará nájoanrá éxi ichjiánrá? Tíha mé ijnko jie jie, la mé kjonté tí sín chónhya Dios la xíkahya ch'e sín.

² A ntá kjonté xíkaha tsíkónhen la imá ihnkerá. Íchá jína imá chrók'uavará. A ntá tí xíkaha ch'e ijnko chojni ntá chrókuétuēnhénrá ch'án sáchrókjui ch'án, chrók'uejokoahyará ch'án ntiha.

³ A ntá ntáxrjan janhan kjonté tjenhya cuerpo kuéntana tí tjeorá ntiha la tí tjenkayáxian la ntaha tjén éxi chrókujuak'é janhan, ntá t'ákjénxian ihnjé Ìnchéni Jesucristo la ntáxrjan kixin ó kjuixin kjuenkayáxian kixin nkexrí chrókujuasóte tí ch'in xíkaha tsíkijch'e.

⁴ Tió tsojnkotsérá kain rá ntiha la éxi koyá tsjak'é ntiha la kjánchó nchakuenná ó la ko koí tí kjuachaxién Ìnchéni Jesús ts'ejókoará ntiha.

⁵ A ntá tí ch'in a la nchek'ayéhérá tí ch'in Tsochren kixin tsjasóte tí cuerpo kuénte ch'án. Ntá tió tsokjan Ìnchéni mé tsaá asén ch'án.

⁶ Jahará chrókujuinchehnkehýará kixin tí nkehe tsíkónhen ntiha. ¿Á noahýará nkehe ntáħro sín, kixin tí ch'o a mé tjiko intsíkoá tí xroħan nchek'ánkí niotja, ntá kjonté la tsosán kain tí ch'o?

⁷ Méxra chrókuakítsjerá ntója kain tí xroħan ntaxin nchek'ánkí niotja, kixin ntá jahará ts'ejorá éxi niotja tsík'óna ch'o nixin tsíkijkohya xroħan nchek'ánkí niotja. Éxi niotja ine sín tí yaon pascua, mé jahará tíha. Kixin jehe Cristo, éxi ijnko kolélo t'óyán sín tí yaon pascua, mé k'uenyákonhēni ch'án.

⁸ A ntá chrókujuasinni tí kia a la kain asēni chrórxaxínkaonni, tíha la éxi tí niotja chóntahya xroħan nchek'ánkíxin. La jehya kixin chrókujuasinni tí kia naxa chróchóntani kjuanínkaon kixin táha la yóħe tí xroħan ntaxin nchek'ánkí tí niotja a.

⁹ A ntá í jnko xroon chr'anhánrá k'ueéntáxrjan kixin ninkehó chrók'uítohyará tí sín tjasin jie chóna chojni chjin ókjé.

¹⁰ Ntá jehya kixin kuétuanhanrá kixin chrók'uítohyará tí sín chjasintajni tjasin jie chóna chojni chjin ókjé, la ko tí sín tjínkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe tsíkjanoya. Náhi. Tí xíkaha chrókujuich'erá la t'ichjánxin chrók'uaxrxéxinrá tí chjasintajni.

¹¹ Méxra ó kuétuanhanrá kixin chrók'uítohyará ninkehó jnkojín chojni ntáħro sín kixin kichó ní tí jehe sín, ntá naxa tjasin sín tí jie chóna sín chojni chjin ókjé, la ko tjínkaon sín jehó sín tsochóna sín itsjé nkehe, la ko tí sín naxa tinkáchónki sín nkehe tsíkjanoya, la ko tí sín naxa tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xíkaha ch'e la chrókjontekoahýará sín.

¹² Jehya xraħa chrókujuintakitoaxián tí ijje tí sín jehya kuénte nínko ntiha. A ntá tí xra kuéntará jahará kixin chrókujuinchekitóexinrá tí ijje tí sín kichó ní tójkotsé nínko ntiha.

¹³ A ntá Dios mé sinchekitöexín ch'án ijíé tí sín jehya kuènte n̄nko. Méxra, takítsjekjanxinrá tí ch'ín jínahya kjuasin jje tí tjeorá ntiha.

6

Chrókjuikjanchahya sín jie nkayakon tí ch'ín juez tinkáchónkiya Ìnchéni

¹ A ntá jnkojinrá chrókjuánjonkoará kichuára chrókjuikjanchahyará jie nkayakon tí ch'ín juez tinkáchónkiya Ìnchéni. Íchá jína chrókjuírá chróchenkará tí sín tinkáchónki Dios.

² ¿Á noahyará kixin tí sín tinkáchónki Ìnchéni mé sinchekitöexín sín ijíé kaín xín chojni chjasintajni? A ntá xikaha sinchekitöexínrá ijíé kaín xín chojni chjasintajni, ¿ntá nkekuènte tsjachahyará sinchekitöexínrá kjónté ijnko jie ntsi?

³ ¿Á noahyará jahará kixin kjónté tí sín ángel tsotsjeheni nkehe tí xra kjuich'e sín? A ntá ijnko nkehe intsi ntihyó, la ¿á xitjahya chrókjuásiyóxinrá?

⁴ A ntá xikaha chrókjuánjonkoará kichuára, ¿ntá nkekuènte tjíkjanchiará jie nkayakon tí sín tikínixinhya kuènte n̄nko?

⁵ Ntáxrjan xikaha kixin chrókjuintasuáhará. ¿Xá kohya ninkexró kichó ni ntiha chóna kjuaxrexinkaon jína tsjacha sincheyóxinhin ijíé kichó ni?

⁶ Jahará jnkokoá kichuára ntá tjanjonrá, la ko kjaxin sátjilkjanchiará jie nkayakon tí ch'ín juez tinkáchónkiya Ìnchéni.

⁷ Kjónté ijnko jie ntsi ntá imá tjanjonkoáxinrá kichuára; tíha mé t'óna ijnko jie jíé. Íchá jína chrókóninkákonhyará kixin tí nkehe jínahya kjuít'ahará sín. Íchá jína chrókuitöghérá sín kjónté tsaáhará sín.

⁸ Kjánchó kjaxin jahará ntoáhya tjejoch'erá kixin kjónté jnkokoá kichuára la teeherá sín.

⁹ ¿Á noahyará kixin tí sín jínahya ch'e la ts'áyèhya sín kjuachaxin kuènte Dios? Chrókuitöghéyará chrókjuít'áyahará sín, chrókónohará kixin tí sín tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjáchehe kichó sín, la ko tí chojni t'ö chjin, t'ö ntoá, la ko tí sín jnkokón ntoá sín tóxrjinhin kichó sín,

¹⁰ la ko tí sín xichee, la ko tí sín tjinkaon sín jehó sín tsochóna sín itsjé nkehe, la ko tí sín tókoan, la ko tí sín ch'éna kjuach'ia, la ko tí sín ixri ch'ia sín kixin tsjacha sín chichaon, na mé ts'áyèhya sín kjuachaxin kuènte Dios.

¹¹ Xikaha k'uejórá isorá senó. Ntá jie ó k'uíjmará, kjuínchetjórá Dios, ntá ó xíka ijjárá kjuachaxin ihnjé Ìnchéni Jesucristo la ko kjuachaxin kuènte Nchakuen Dios.

Tí cuerpo ó tsikótjóa

¹² Síin kjuachaxin kaín nkehe chrókjuít'a, kjánchó iso nkehe la ó chónkó. Síin kjuachaxin kaín nkehe chrókjuít'a, kjánchó chrókuitöghéya ninkehó nkehe chrók'uetuanna.

¹³ Chaxin tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsík'óna tseeni kixin ts'inka nkehe sineni. Kjánchó Dios mé sinchek'itjáyán yóí tíha. A ntá k'ónahya tí cuerpo kuènteni kixin chrókjuasixinni jie. Náhi. Tí cuerpo kuènteni mé k'óna kixin tsochjéxinni Ìnchéni kjuasáya, la ko jehe Ìnchéni mé ts'ayakonhen ch'án tí cuerpo kuènteni.

¹⁴ Méxra Dios mé kjuínchexechón Ìnchéni, mé xikaha sinchexechónxinni ch'án tí kjuachaxin kuènte ch'án.

¹⁵ ¿Á noahyará kixin jnkojnko cuerpo kuèntará mé it'ö tí cuerpo kuènte Cristo? ¿Á chrókjuít'a janhan kixin it'ö tí cuerpo kuènte Cristo chrók'óna it'ö cuerpo kuènte ijnko chojni chjin ch'iyehé nchónhya chojni ntoá? Méxra kjá náhi.

¹⁶ ¿Á noahyará kixin tió ijnko chojni ntoá chrókuaqja ijnko chojni chjin chóna nchónhya chojni ntoá, ntá tí jehe sín yóí sín chrók'óna sín jnkokoá cuerpo? Kixin ntáchro xroon itén Dios kixin: "Yóí sín la ts'óna sín jnkokoá chojni."*

¹⁷ A ntá tí jnkojin chojni tinkáchónki Ìnchéni, ntá jehe la ko Ìnchéni mé ts'óna jnkokoá.

¹⁸ Méxra chrókuitöghérá chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín nchekjasóte sín. A ntá tí sín tjasinko jie chojni chjin ókjé la mé nchekjasóte sín tí cuerpo kuènte sín.

¹⁹ ¿Á noahyará kixin jnkojnko cuerpo kuèntará mé éxi ijnko n̄nko itjen Nchakuen Dios kjuanjon ch'án k'uayéhérá, la ko chontará tí Nchakuen ch'án tjóá? Jahará la jehya inché tí cuerpo kuèntará

²⁰ kixin jahará la tjete k'uénaxínrá Dios. Méxra chjééxinrá kjuasáyé Dios tí cuerpo kuèntará la ko tí nchakónrá kixin yóí la kuènte Dios.

* 6:16 Génesis 2.24

7

Chenka ch'án tí sín tsikótehe káxin nkexrí chrók'uejó sín

¹ A ntá jie tsjatahá tí nkehe tsikjínrá kjuanchankínará, na mé ntáxrjan káxin chaxín chrókójina káxin tí chojni ntoa chrókuakjahya ichjién.

² Kjánchó tí xíkaha imá tjínkaon sín tsochónta sín itsjé chojni chjin tsjasinko sín jie, la íchá jina jnkojnko chojni ntoa chróchónta jnkojnko ichjién kuénte la ko jnkojnko chojni chjin chróchónta jnkojnko xii kuénte.

³ Tí chojni ntoa la ko tí chojni chjin chrókjuinchexiteyéhe sín kíchó sín.

⁴ Tí chojni chjin jehya inché tí cuerpo kuénte tjan, na mé kuénte xii tjan. Ntá kjaxin xíkaha tí chojni ntoa la jehya inché tí cuerpo kuénte ch'án, na mé kuénte ichjién ch'án.

⁵ Chrókjuincheniéhyará kichuára, jehí jnkokoá chrókjuenkayáxinrá yóirá káxin tsochonteherá iso yaon káxin ntá kaín asánrá chrónixjehérá Dios. Ntá tsjixin ntá chrókóchjineherá kichuára inaá káxin chrókuítóehyará káxin ch'ín Tsochren chrókjuacha chrókjuachroerá ch'án chrókjuásinrá jie.

⁶ Kaín tíhi tjónkará káxin tsohohará káxin siín kjuachaxin xíkaha na kjánchó jehya káxin xíkaha tétuanhanrá.

⁷ A ntá janhan ntáxrjan káxin chrókójina káxin kaín rá chojni ntoará chrókóyóhará éxí tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la í jnko nkehe tjenkayáxin.

⁸ A ntá tí sín naḡa tóteheya la ko tí chojni tsikók'án na ntátjan sín káxin chrókójina káxin xíkahó chrók'uejó sín chrókóteheya sín éxí tí janhan xíkaha.

⁹ Kjánchó tí chrókjuachahya sín tí tjak'e asén kíchó sín, naḡa chrókjuasin sín jie, ntá íchá jina chrókótehe sín káxin jehya jina káxin jnkochrixín chrókjuak'ó asén sín.

¹⁰ A ntá jahará ó tsikjixin tsikótahará, la tétuanhanrá tíhi: a ntá jehya káxin kjuachaxin kuéntana tétóanxinrá. Náhi. Kjuachaxin kuénte Inchéni mé tétóanxinrá káxin tí chojni chjin chrókjuákeheya xii.

¹¹ A ntá tí chrókjuákehe ijnko chojni chjin tí xii, ntá xíkahó chrókuitohe tjan jehó tjan la ko chrókójina chrókóyóxin, chrókjuinhin tí kjuanínkaon káxin tí kjuákehe kíchó sín. Kjaxin xíkaha tí chojni ntoa la chrókjuákeheya tí ichjién.

¹² A ntá tí nkehe tétuanhan tí í so sín jaí la kuéntana janhvàn, jehya kuénte Inchéni, káxin tí tjan ijnko ch'ín kíchó ní chóna ch'án ichjién ch'án tinkáchónkihya Inchéni, na kjónté naḡa tjínkaon tjan chrókjuak'eko tjan tí jehe ch'án la chrókjuákeheya ch'án tí jehe tjan.

¹³ La ko tí tjan ijnko tjan kíchó ní chóna xii tjan tinkáchónkihya Inchéni, ntá kjónté naḡa tjínkaon ch'án chrókjuak'eko ch'án tí jehe tjan, ntá chrókjuákeheya tjan tí jehe ch'án.

¹⁴ Káxin tí xii tjan tinkáchónkihya Inchéni ntá jie ó kótjóá ch'án káxin tí ichjién mé tinkáchónki Dios, la ko tí ijnko tjan tinkáchónkihya Inchéni ntá jie ó kótjóá tjan káxin tí xii tjan mé tinkáchónki Dios. A ntá tí xíkahya, la tí xjeen sín chrókótjuáhya, na ntá jie la mé ó kótjóá tí xjeen sín.

¹⁵ A ntá tí ch'ín ntoa o tí tjachjin tinkáchónkihya Inchéni tjínkaon chrókjuákehe kíchó sín, la ája nohe sín tjákehe kíchó sín, káxin Dios tjínkaon káxin kjuaxróxin chrók'uejorá.

¹⁶ Jahará chojni chjínrá, ¿nkexrí chrókónohará káxin nkexrí chrókuaá xiará? La ko jahará chojni ntoará, ¿nkexrí chrókónohará káxin nkexrí chrókuaá ichjiánrá?

¹⁷ A ntá jnkojnko chojni chrók'uejó sín éxí tsikjanjon Inchéni kjuachaxin tsik'áyéhe sín, la ko éxí tí k'uejó sín tió k'uíyéhe sín Dios, kjánchó chrókuitoheya sín tí jehe ch'án. Mé xíkaha tétuanhan kaín tí njnko.

¹⁸ Tí chrók'uíyéhe Dios ijnko ch'ín chóna xroye, ntá xíkahó chrókuitohe ch'án. A ntá tí chrók'uíyéhe Dios ijnko ch'ín chóntahya tí xroye a, ntá kjónté chrókuaahya ch'án tí xroye a.

¹⁹ Na mé tjetuanhya á chóna chojni tí xroye o á chóntahya chojni tí xroye. Na mé tí nkehe tjetóan káxin chrókjuinchexiteyéheni tí nkehe k'uetjan Dios.

²⁰ Chrók'uejóni jnkojnkonni éxí k'uejóni tí k'uíyéheni Dios.

²¹ A ntá tió Dios k'uíyaha jaha, kjónté jaha ijnko chojni ch'exón xra, ntá chrókóxakuanhya kjónté xíkahó tjech'e xra. Kjánchó tí chrók'uitjá tí tsaaxian la chrókuaákjá tíha.

²² Káxin tí nkexro kjuich'exón xra tió k'uíyéhe Inchéni káxin tsinkáchónki ch'án, la mé jie chóna ch'án tí kjuachaxin tjanjon Inchéni. Kjaxin tí nkexro k'úituenhya tió k'uíyéhe Inchéni la mé jie mé ch'ehe ch'án xra Cristo.

²³ Dios imá tjehe k'uegaxín ch'án tí jahará. Méxra chrókjuánjonhyará kjuachaxin káxin ókjé chojni chrók'óna inchárá.

²⁴ Méxra kíchó ní, éxí k'uejorá tió k'uíyehará Dios káxin tsinkáchónkirá ch'án, la xíkahó naḡa chrók'uejorá jie káxin chontará Inchéni tsjinkítsa.

²⁵ A ntá tí chojni naxa tótehya sin na mé janhan chontahya nkehe kuente Ìnchéni chrókuétuanhan sín. Kjánchó tsoxrjanka tí nkehe tjenkayáxian janhvàn, a ntá chrókuítekáonrá tí janhan kixin kujikonóana Ìnchéni.

²⁶ Mé xikaha tónna kixin chrókójina kixin jnkojnko chojni chrókuítehe sín éxi tjejó sín chrókótehya sín, kixin ijie la kjuaxróxinhya tjejóni.

²⁷ A ntá tí chontará ichjiánrá ntá chrókjuakéehyará tjan. A ntá tí chontahyará ichjiánrá ntá íchá jina chrókjuéyáhyará.

²⁸ Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjaxin jehya jie. A ntá tí sín tsikótehe la tsochóna sín kjuaxikaon, mé xikaha janhan chrókjuinkitsa sín kixin chróchóntahya sín kjuaxikaon.

²⁹ Mé xikaha tjétjonkará kichó ni kixin tsjéhya yaon naxa t'itjáyán tsokjan Ìnchéni. Mé xikaha tí chojni ntoá chóna ichjién sín, la antsí tjeoan saxín chrórxaxikaon sín Ìnchéni, la ntá chr'éxin chrótjuéhe sín ichjién sín.

³⁰ A ntá tí sín tsjanka la chrók'uejó sín éxi chrótsjánkahya sín. La ko tí sín chéhe la chrók'uejó sín éxi chéhya sín. La ko tí sín t'ena nkehe la chrók'uejó sín éxi chóntahya sín tí nkehe tsík'ena sín.

³¹ La ko tí sín kjuacha nkehe siín chjasintajni la chrók'uejó sín éxi ninkehó chróchóntahya sín, kixin kaín nkehe t'ikonni chjasintajni ntíhi mé tjoka tsjeje.

³² Tjínkakahya kixin jahará chrókóxakonhanrá. Tí ch'ín ntoá chóntahya ichjin antsí má tóxakonhen tí xra kuente Ìnchéni chrókjuinchexiteyéhe ch'án tí nkehe tóxrjínhin Ìnchéni.

³³ A ntá tí ch'ín tsikótehe antsí tóxakonhen tí nkehe siín chjasintajni kixin xikaha mé sinchechéhe ch'án ichjién ch'án.

³⁴ Ókjé tjenkayáxin tí tjan tsikótehe la ko tí tjan tsikótehya kixin tí tjan tsikótehya la antsí má tóxakonhen tjan tí xra kuente Ìnchéni kixin tjinkaon tjan kixin Dios sinchetjóá tí cuerpo kuente tjan la ko tí asén tjan. A ntá tí tjan tsikótehe mé tóxakonhen tjan tí nkehe siín chjasintajni kixin xikaha sinchechéhe tjan xì tjan.

³⁵ Tjétjonkará tíhi kixin tjínkavan kixin jina chrók'uejorá, jehya kixin xikaha chrókuétuanhanrá. Náhi. Tjínkavan kixin kjuasáya chrók'uejorá jnkojina la jehó Ìnchéni chrókjuich'ehará xra.

³⁶ A ntá jnkojínrá tjenkayáxinrá kixin chrókójina chrókótehe ijnko xjaanrá chjin kixin ó tsícha tjan, la ntá tí xikaha la ó nchoxon tsoetehe tjan na mé jehya jie.

³⁷ A ntá jnkojínrá tjínkáonrá kaín asánrá kixin chrókótehya xjaanrá chjin la kjaxin tjan xikaha tjenkayáxin tjan la antsí jina tíha.

³⁸ Mé xikaha tí tjtóhéra xjaanrá chjin kixin tsoetehe tjan la ó nchoxon. La ko kjaxin tí tjínkakahya tjan kixin chrókótehe tjan na mé antsí jina tíha.

³⁹ Tí tjan tsikótehe mé k'uituenxín tjan kjuachaxin tí ley kixin tsjak'eko tjan tí xii tí naxa tjechón ch'án. A ntá tí chrók'uen ch'án ntá tsochóna tjan kjuachaxin tsoetehe tjan inaá tí nkexro tsoxrjínhin tjan, kjánchó jehó ijnko nkexro tinkáchónki Ìnchéni mé chrókótehe tjan.

⁴⁰ Kjánchó antsí chrókóchéhe tjan tí jehó tjan chrókuítehe tjan, tí í chrókótehya tjan. Méxra xikaha tjenkayáxian janhan la ko kjaxin tónna janhan kixin chonta janhan tí kjuachaxin kuente Nchakuen Dios.

8

Tí nkehe ine sín tjokehe sín tí nkehe tsíkjanoya

¹ A ntá jie tsoxrjanka kuente ti ko its'en tjokehe sín tí nkehe tsíkjanoya. Na mé chaxín kaín ni noheni tíha. Ntá chrókóxakonheni kixin tí chrók'uitjani má ntá chrókóhnkeni má. Antsí tjeoan chrótjuéheni kichó ni kixin xikaha antsí chrókuinkáchónkini Ìnchéni.

² Tí jnkojín nkexro ntáchro kixin nohe ch'án, na mé chaxínhya tíha la naxa t'itjáyán tí nkehe chrókónohe ch'án.

³ A ntá jnkojín nkexro tsoetjuéhe Dios la Dios tsochóxin tí jehe ch'án.

⁴ A ntá tí chrókójoni nto tsíkokehe sín tí nkehe tsíkjanoya, la ó noheni jina kixin tí nkehe tsíkjanoya la t'etuánhya ninkehó ntíhi chjasintajni, la ko ó noheni kixin jnkokoá Dios tjan.

⁵ A ntá siín nkehe nchek'in sín díos nkaya nkajíní la ko chjasintajni na, kjánchó tí xikaha la kjá chrók'uixin itsjé díos la ko itsjé ìnché sín.

⁶ A ntá jeheni chóntani jnkokoá Dios na mé It'eni tíha, la jehe ch'án mé kjuich'ena ch'án kaín xín nkehe la ko tjejóni kixin chrókjuinchexiteyéheni ch'án. La ko kjaxin itjen jnkokoá Ìnchéni Jesucristo, na mé kaín xín nkehe siín la kjuich'ena ch'án la ko kjaxin tí jeheni tsíkjich'ena ch'án.

⁷ Kjánchó kénhya chojni nohe sín tíhi. Na mé iso sín ó kuénhen sín kuinkáchónki sín tí nkehe tsíkjanoya, a ntá jie tíó ine sín tí nkehe tsíkokehe chojni tí nkehe tsíkjanoya na mé tjenkayáxin

sín kixin ó tsik'áyehē ijnko dios, kixin naḡa noehya sín má, ntá ntáchro sín kixin ó kuámá sín tí jie kuente tí nkehe tsikjanoya.

⁸ Ó noheni chaxín kixin jehya kixin chrókóxrjínhin Dios tí jeheni kixin tí nkehe jína chrókjóneni. Náhi. Jehya kixin chrók'uejóxinni jína kixin tí nkehe chrókjóneni na ko tí nkehe chrókjónehyani.

⁹ Méxra títóéhyará kixin tí kjuachaxin chontará káin xín nkehe mé xikaha chrókjuachroe ijnko chojni kichó ni naḡa noehya jína tinkáchónki Ìnchéni ntá tíha chrókjuasixin sín jie.

¹⁰ A ntá tí chrók'uikon sín kixin jahará ó nohará jína ntá ts'ejorá sinterá nkehe nkaxenhen ijnko njnkoqe nkehe tsikjanoya, ntá tí chojni kichó ni naḡa noehya jína ntá chrók'uikon sín xikaha ntá kjaxin jehe sín tsotjinkaon sín sine sín tí nkehe tsikjokehe chojni ijnko dios chaxínhya.

¹¹ A ntá jahará ó nohará jína ntá xikaha tjejoch'erá itsará sinček'itjányará tí kichó ni naḡa noehya jína tinkáchónki Ìnchéni kixin Cristo k'uenyákonhen tí jehe ch'án kjaxin.

¹² Méxra tí xikaha chrókjuich'erá la chrókjuásinhrá jie tí sín kichó ni naḡa tinkáchónkihya sín Ìnchéni jína, na mé xikaha kjaxin chrókjuásinrá jie chrókuitekákuenhyará Cristo.

¹³ Méxra tí xikaha chrókjuasixin jie ijnko kichó ni kixin tí nkehe chrókjóneni, ntá íchá jína chrókjónehyani nto inaá kixin xikahya ntá chrókjuichroexín tí sín kichó ni ntá chrókjuasixin sín jie.

9

Tí kjuachaxin chóna ijnko apóstol

¹ Chaxín janhan la kohya nkexro t'etuanna kixin janhan la chonta kjuachaxin kixin ijnko apóstol tsikjeyá Ìnchéni kixin janhan k'uikuḡan ch'án. Jahará mé tjákoxinrá tí xra kjuít'a kuente Ìnchéni.

² Iso sín ntáchro sín kixin tjátsoanhyana sín kixin ijnko apóstol tsikjeyá Ìnchéni. Ntá jahará káin rá mé chrókjuátsoanrá tí janhan kixin tí kuitekáonrá kuinkachónkirá Ìnchéni mé xikaha tjákoxinrá kixin chaxín janhan tsikjeyána ch'án.

³ Méxra janhan jína chrókjuátaha tí sín xritjontana, chróntáxrjan kixin:

⁴ Janhan chonta káin kjuachaxin chrók'uayáha nkehe chrókjonè la ko chrók'uia.

⁵ Kjaxin chonta kjuachaxin chróchonta ijnko chojni chjin tinkáchónki Ìnchéni chrók'uajikian éxi chóna tí í so sín tsikjeyá Ìnchéni, la ko tí sín kichó Ìnchéni, la ko éxi chóna ch'ín Pedro.

⁶ ¿Á tjenkayáxinrá kixin ch'ín Bernabé la ko janhan jehóni chóntahyani kjuachaxin tsítóheni tí xra sich'exinni tjani?

⁷ ¿Nkexro ch'e xra soldado ntá chichákoen ch'án ó chrókuicháxinhin? Nkexro k'uēnka nta to uva ntá kjónehyá ch'án to? ¿La ko nkexro t'ayakonhen kolélo ntá k'uíhya tí tsjen t'énhen sín va?

⁸ Ntáchróhyará kixin janhvàn kjuenkayáxian tíha kixin kjaxin xroon tsikjin ch'ín Moisés xikaha nixja.

⁹ Méxra kjaxin ntáchro tí xroon tsikjin ch'ín Moisés ósé kixin: "Chrókjuéjójáyahará kamposa ir'va koxinta tí tsinkátja va noatrigo tíó tsónkéhe sín noa."* Tíha mé t'axrjexín kixin jehya koxinta ó tóxakonhen Dios.

¹⁰ Náhi. Tóxakonhen ch'án kixin tí jeheni. Méxra xikaha nixja tí xroon kixin chrók'uejóxinni jína. A ntá tí nkexro kjuinchentá nche la ko tí nkexro tsónkéhe noa, yóí sín la chróchónhen sín chrók'uáyehē sín tí nkehe k'óna.

¹¹ A ntá tí k'uēnkaní tí itén Dios asánra, la kjá chróchóntani kjuachaxin chrókjuanchaharáni ichrén nkehe t'ichjánxínhinni.

¹² A ntá tí xikaha í so sín chóna sín tí kjuachaxin tjanchia sín nkehe ts'áyehē sín, ntá jeheni ántsí má chóntani kjuachaxin chrók'uáyehēni nkehe.

Kjonté chóntani kjuachaxin xikaha la kjuanchahyani nkehe, kjonté kánhyó náxrjón k'uejóni kixin tjinkakonhyani chrókjuanchiani nkehe chrók'uichjánxínhinni kixin ách'e xikaha ntá chrók'uinkákonhen tí itén Cristo chrókjuakoni.

¹³ Jahará ó nohará kixin tí sín ch'e xra kuente njnko mé ntaha xránjon nkehe ine sín. La ko tí sín t'óyánxin sín ko tí altar tsochjéhe sín Dios kjaxin ine sín tí ntqé tí ko t'óyánxin sín ntiha.

¹⁴ Méxra xikaha kjaxin k'ueḡoan Ìnchéni kixin tí sín ch'e tí xra ó chrónka sín tí tan tsaáxinni na mé tí xra a chrók'uaxrjenixin tí nkehe chrókjóné sín.

* 9:9 Deuteronomio 25.4

¹⁵ Kjǒnté janhan síin kjuachaxin xíkaha chrókjuít'a, la xíkahya kjuít'a la ko kjaxin xíkahya ikjian tí xroon i kixin jahará chróhjinárá ichrén nkehe. Náhi. Kjǒnté chrók'uénxian kjinta chrókjuáncháhyará nkehe kixin tjínkakonhya kixin ninkexró chrókuakitsjena tí kjuachéhe chonta.

¹⁶ Jehya kixin chrokjuíntahnke chrókjuákua tí tan tsaáxinni. Náhi. Janhan na ó jehí sít'a tí xra a. Nóa tí janhan tí chrókjuákohya tí tan jina chrókuaáxin chojni.

¹⁷ A ntá tí janhván tjínkavan chrókjuákua la xíkahó chrókjuacha janhan. A ntá tí tjákua itén Dios kixin xíkaha kuítuanna ntá xíkahó ntáxiteyá tí xra chjina Dios.

¹⁸ ¿A ntá nkehe chrókjuacha janhan? Tíha mé chrókjuacha janhan kixin chrókóhàna má kixin chrókjuákua tí itan tsaáxinni la ninkehó chrókjuáncháhya chrókjuacha la ntá tí xíkaha la chrókuaákjaáhya tí kjuachaxin tí chrókjuákua.

¹⁹ Méxra kohya nkexro t'etuanna. Kjánchó ó jehí chrókjuít'aha kaín xín chojni xra kixin xíkaha antsí tsjé chojni chrókjuacha janhan kixin chrókuitekaon sín Cristo.

²⁰ Tí tjèn tí síin tí sín judío ntayóha éxi jehe sín xíkaha janhan kixin xíkaha chrókjuacha jnkojin sín chrókuitekaon sín. Na mé t'axrxéxin kixin tí chrókjuacha iso tí sín nchexiteyèhe tí ley k'uetoan ch'ín Moisés, la t'ichjánxin kixin kjaxin janhan chrókjuíntaxiteyá tí ley kjǒnté janhan la xíkahya t'etuanna tí ley.

²¹ A ntá tí chrókjuacha jnkojin tí sín nchexiteyèhya tí nkehe k'uetoan ch'ín Moisés la ntayóha éxi tí jehe sín xíkaha janhan kjaxin, kjǒnté chaxin t'etuanna tí nkehe k'uetoan Dios méxra ntáxiteyá tí nkehe k'uetoan Cristo.

²² Tió tjèn tí síin tí sín tienxínhya jina, ntá kjaxin janhan t'óna éxi tí jehe sín kixin xíkaha chrókjuacha jnkojin tí jehe sín chrókuitekaon sín. Méxra ntayóha éxi kaín xín chojni xíkaha janhan kixin xíkaha chrókjuacha janhan kixin chrókuaá iso tí jehe sín.

²³ Mé xíkaha kaín tíha tjét'a kixin chrókuinhin sín tí tan chrókuaáxin sín la ko kjaxinna antsí má chrókjuíntayaonna Dios.

²⁴ Jahará ó nohará kixin tió itsjé sín tsinkáko kichó sín la kjánchó ójnkó nkexro tsjacha tí tsjontnhen nkehe. A ntá jahará xíkaha chrókuinkará kixin chrók'uayéherá tí nkehe chrókjuíntonhanrá.

²⁵ Tí sín tinkáko kichó sín na mé jina t'ayakonhen sín asén sín, títohe sín kaín xín nkehe chrókjuich'ehe sín dañó kixin tjínkaon sín chrókjuacha sín, chrók'uáyéhe sín kjǒnté ijnko corona tsik'óna kayoa ó tjóna tsoxámá. Kjánchó jeheni ch'eni xra kuènte Inchéni kixin ntá ts'áyéheñi ijnko nkehe chónhya tsoxámá.

²⁶ A ntá janhan jehya éxi ijnko chojni t'ikonhya chrókuinka. Jehya éxi xrintó ó chrókjuánjonkian.

²⁷ Náhi. Janhan tjánjonkian tí cuerpo kuèntana, tétuanhan kixin jina chrókjuinchexiteyàna kixin tóxakonna kixin chrókjuásian ichrén jie ntá janhan chrókjuachahya kjǒnté senó kjuákqaha itsjé chojni.

10

Tí nkehe t'etoan ch'án kuènte tí nkehe tsíkjangya

¹ Tjínkavan janhan kixin chrókónohará kichó ní kixin tí sín k'uaxrxeníxinni ósé, kaín sín k'uixinkánki sín chrínki tí tjuí, la ko kaín sín k'uátóye sín Ntayaon Kjátse,

² la ko kaín sín k'uéchréhe sín ch'ín Moisés éxi yóhe chrókuikite sín kixin jnkoqóá k'uéjé sín tí tjen tí tjuí la ko tí ntayaon la ko kjuínchexiteyèhe sín ch'án kixin jehe ch'án k'uék'etoan ch'án.

³ La ko kaín sín kjóne sín jnkokón nkehe kujxin nkaya nkajní

⁴ la ko kaín sín ik'ui sín jnkokón nkehe kjuanjon Dios kixin ik'ui sín ntá k'uaxrxéxin ijnko tjó kjuíncheyaoon Dios, na mé tí tjó a la mé t'axrxéxin kixin Cristo tíha.

⁵ Kjánchó itsjé tí jehe sín kjuínchéchèhya sín Dios, méxra kónínkaon ch'án la tí nteje ó k'uéxín tí sín a.

⁶ Kaínxín tíha kónhen kixin chrórxaxinkakonxíni jeheni, chróntáchrohya asénni chrókjuich'eni tí nkehe jínahya éxi kjuích'e tí jehe sín.

⁷ Méxra chrókuinkachónkihyará jahará nkehe tsíkjangya éxi k'uékinkáchónki iso tí jehe sín, éxi ntáchro tí xroon itén Dios tsíkjin sín ósé kixin: "Kaín sín k'uéjótjaxin sín kjóne sín la ko ik'ui sín, ntá kjuixin la k'uínkatjen sín la ité sín".*

⁸ Méxra chrókjuasinkohyani jie chojni chjin ókjé éxi kjuích'e iso jehe sín ntá ik'uén sín, ventitres mil sín, jnkokoqá yaon.†

⁹ Kjaxin chrókjuinchekóninkakonhyani Inchéni éxi kjuích'e sín ntá ik'uén sín kixin kjónehe sín konche,‡

* 10:7 Éxodo 32.6 † 10:8 Números 25.6-9 ‡ 10:9 Números 21.5-6

¹⁰La ko chrók' uántaxiñhyani Dios éxi k' uántaxiñhin tí jehe sín ntá tí ángel kuènte kjuach'én mé kui k'óyán sín.[§]

¹¹Kaín tíha kónhen tí sín k' uaxrjeníxinni ósé kixin chrók'ónoexínni la ko k'óna xroon chrónka xikaha kixin nhexraxinkaonni tí jeheni tjejóni jie kixin í séhya tsjixixín tsjeje chjasintajni.

¹²A ntá tí nkexro ntácho kixin ntoá tjen na chrók'óxakonhen kixin chrók'juichroehya.

¹³Jahará naxa k' uatsinkahyará ninkehó nkehe tí chrók'juachahya chojni chrók'ónhen. Méxra jahará chróxráxinkáonrá Dios kixin jehe ch'án chrókuítgehya ch'án tí jahará kixin chrók' uatsinkará nkehe imá xra chrók'juachahyará. Méxra tí itsi ichrén nkehe tsonhanrá la Dios tsjinkítsará ch'án kixin chrók'juachará chrók' uatsinkará tí nkehe chrók'ónhanrá.

¹⁴Méxra tjuahará jahará kichó ni, la ntá ntáxrjan kixin chrók'uiñtoherá tí nkehe tsíkjanoya.

¹⁵Nixjahará jahará kixin jahará chojni ó tienxín. Méxra jahóra chrokJuenkayáxinrá kixin á jina tí nkehe ntáxrjan.

¹⁶Tí tjanchiani kjuasáya kixin tí nkehe it'ini na mé kaín ni jnkokoá tjakoqxiníni tí ijnié Cristo ó k'uíñji. La ko tió tóchrít'óni tí niqtja ineni, na mé kaín ni jnkokoá tjakoqxiníni tí cuerpo kuènte Cristo.

¹⁷Kjónité nchónhyani jeheni la kaín ni na jnkokoá niqtja ineni kixin kaín ni jnkokoá k'ónani cuerpo kuènte Cristo.

¹⁸Chrók'ónohará nkexrí ch'e tí sín chjasin Israel, na mé ine sín tí ko tsíkjokehe sín Dios ntá xikaha tjakoqxin sín kixin xikaha tinkáchónki sín.

¹⁹Ntáxrjanhya kixin tí nkehe tsíkjanoya la chóna kjuachaxin, la ko ntáxrjanhya kixin tí nto tsíkjokehe sín tí nkehe tsíkjanoya la antsí chóna kjuachaxin.

²⁰Náhi. Ntáxrjan kixin tí nkehe tjanjon tí sín chónhya Dios na mé tjokehe sín tí nchakuen tí jinahya la jehya Dios tjokehe sín tíha. Méxra janhan tjínkakonhya kixin xikaha chrók'juich'erá jahará chróxráxinkáonrá tí nchakuen tí jinahya.

²¹Tí its'ini tí nkehe xraxinkakonxínni ijnié Ìnchéni ntá kjaxin tí chrók' uini tí nkehe xraxinkakonxín sín tí nchakuen tí jinahya la jehya jina tí xikaha chrók'juich'eni chrók' uini. Tí sineni tí nkehe xraxinkakonxínni tí cuerpo kuènte Ìnchéni ntá kjaxin tí chrók'jóneni tí nkehe xraxinkakonxín sín tí nchakuen tí jinahya la jehya jina tí xikaha chrók'juich'eni chrók'jóneni tí nkehe.

²²¿A jina chrók'juinchekóninkaonni Ìnchéni ní? ¿Á jeheni antsí chónani kjuachaxin la ntá jehe ch'án la náhi ní?

Chónani kaín kjuachaxin kaín xín nkehe na kjónité antsí tjeotan tsotjuèhene kichó ní

²³Siín kjuachaxin ichrén nkehe chrók'juich'eni. Kjánchó jehya kixin kaín nkehe la jina. Siín kjuachaxin ichrén nkehe chrók'juich'eni na kjánchó kénhya nkehe chrók'juinkítsa chrók'ónoheni tí nkehe kuènte Dios.

²⁴Chrók'juéyáhyará tí nkehe chrók'uejóxinnrá jina jahóra. Náhi. Kjaxin chrók'juéyará tí nkehe chrók'uejóxín jina í so chojni.

²⁵Chrók'jónterá kaín nto sitóxin la chrók'juanchankíhyará ninkehó kixin tí xikaha ntá ntoáhya chrók'juenkayáxinrá,

²⁶kixin kuènte chjasintajni la kaín xín nkehe siín la kuènte Ìnchéni.

²⁷A ntá jnkojin chojni tinkáchónkihya Ìnchéni chrók'uiyahará sín kixin chrók'jóntekoará sín la ko tjínkáonrá sáchrók'juirá ntaha la ntá ó nchoxon chrók'jónterá tí nkehe tjáhará sín la chrók'ókakuanhyará chrók'juanchankíhyará ninkehó.

²⁸Kjánchó tí chróntácho jnkojin sín kixin tí nto la ó tsíkjokehe sín ijnko nkehe tsíkjanoya, ichro sín, ntá tí xikaha la chrók'jóntehyará jahará, chrók'ókakonhanrá kixin ntoáhya chrók'juenkayáxin tí nkexro chrónka xikaha.

²⁹Méxra ntáxrjan tíhi kixin tjínkakonhya kixin ntoáhya chrók'juenkayáxin chojni ókjé, jehya kixin ntoáhya chrók'juenkayáxinrá jahará.

Kjánchó isorá tsjanchankínará kixin nkekuènte chrók'ókakonhanrá nkehe chrók'juenkayáxin ókjé chojni kixin tí kjuachaxin chontará.

³⁰Tí tjáncháha Dios kjuasáya kixin tí nkehe iné, ¿ntá nkekuènte kixin chrók'jontana chojni kixin kuènte kjoné?

³¹Tí chrók'jónterá nkehe la ko chrók'uirá nkehe la ko ichrén xra chrók'juich'erá la chrók'juákoqxinrá kixin Dios kjuinkítsará.

³²Ch'ehyará ninkehó nkehe chrók'juichroexin í so chojni kjónité judío sín la kjónité jehya judío sín la o tí chojni njnkoje Dios.

³³Janhan mé tjéyá kixin kaín xín xra tjét'á chrók'óxrjñhin kaín xín chojni, na mé jehya kixin tjéyá kixin janhvan chrók'juak'é jina. Náhi. Kjaxin tjínkavan kixin chrók'uaáxin í so chojni.

11

¹ Chrókjuákoxinrá jahará éxi kjuákoxián janhan kixin janhan mé kjuákoxián éxi kjuákoxin Cristo.

Jína chrók'uejó tí chojni chjin tió tójnksé chojni

² Kichóni, chàna kixin xráxin xráxinkáonrá tí janhan la ko nchexiteyéherá tí nkehe kjuákohará.

³ A ntá tjínkavan kixin chrókiénxinrá kixin Cristo t'etuñhen jnkojnko chojni ntoa, la ko kjaxin xikaha jnkojnko chojni ntoa mé t'etuñhen tí ichjién, la ko kjaxin xikaha Dios mé t'etuñhen Cristo.

⁴ A ntá tí jnkojin chojni ntoa xrasixin kachjinke ch'án tí tjenixjehe ch'án Dios, o xrasixin ch'án kachjinke ch'án tí tjechronka ch'án iten Dios, mé xikaha tjakoxin ch'án kixin chóntehya ch'án kjuasáyé tí Inchéni t'etuñhen ch'án.

⁵ A ntá ijnko chojni chjin tjóchin kja tjan tí tjenixjehe tjan Dios la o tjóchin kja tjan tí tjechronka tjan iten Dios, mé xikaha tjakoxin tjan kixin chóntehya tjan kjuasáyé tí xii tjan. Mé tóyóhé éxi tsikjin tjan xikaha.

⁶ A ntá tí chojni chjin tjínkakonhya kixin chrók'uiáxin kja tjan nkehe mé chrókin tjan. Kjánchó tí chrókósuèhé tjan chrókin tjan, ntá chrók'uiáxin kja tjan tóte tió tójnksé.

⁷ Kixin tí chojni ntoa chrókjuasinhya ch'án kachjinke ch'án kixin jehe ch'án mé éxi retratogé Dios la ko t'inkaséyanxin ch'án tí kjuachaxin kuènte Dios. A ntá tí chojni chjin mé t'inkaséyanxin tjan tí kjuachaxin kuènte tí xii tjan.

⁸ Kixin tí chojni ntoa saoxin k'óna mé k'uaxrjenixinhya ch'án chojni chjin. Náhi. Tí chojni chjin mé k'uaxrjenixin tí chojni ntoa.

⁹ Chaxin k'ónahya tí chojni ntoa kixin jehó tsjak'e ch'án. Náhi. Tí chojni chjin mé k'óna kixin tsjak'ekotoxin ch'án.

¹⁰ Ntá t'ichjánxin kixin tí chojni chjin ts'iáxin kja sín tóte chrókjuákoxin sín kixin t'ituñhen sín kixin xikaha ts'ikon tí sín ángel.

¹¹ Kjánchó kaín ni tinkáchónkini Cristo t'ichjánxin kixin tí chojni ntoa chrókjuinkitsa tí chojni chjin la ko tí chojni chjin chrókjuinkitsa tí chojni ntoa.

¹² Kixin chaxin tí chojni chjin na tí chojni ntoa k'uaxrjenixin. A ntá jie tí chojni chjin na mé t'axrjenixin tí chojni ntoa. A ntá kaín ni k'uaxrjenixinni Dios.

¹³ Jahará nkechorá, zá ó nchoxon kixin ijnko chojni chjin tjóchin kja tjan chrónixjehe tjan Dios?

¹⁴ Jahóra chrókónohará kixin chrókósuèhé tí chojni ntoa chóna kaxihi kjinjin.

¹⁵ A ntá tí chojni chjin chóna kaxihi kjinjin la mé ntoá tíha kixin ó kuñtuñxin tjan kixin tsochóna tjan kaxihi tjan kjinjin kixin tsotjóchinhya kja tjan.

¹⁶ A ntá tí tjen jnkojin nkexro titekakonhya tíha xikaha ntá chrókónohará kixin jeheni la ko kaín xin tí sín njnkoé Dios la xikahó kuènhenni.

Ntoáhya kjóne sín tí niotja xraxinkakonxin sín Inchéni

¹⁷ Méxra tí nkehe tjékjan la mé ijnko nkehe tóxrjinnahya tjejoch'erá. Tió tójnksérá ntiha la ijnko nkehe jína chrókjuich'erá. A ntá náhi la ijnko nkehe jínahya tjejoch'erá.

¹⁸ Na mé saoxin na mé ntáchro sín kixin tió tójnksérá la jnkokoáhya tjenkayáxinrá. Ntáxrjan kixin ách'e chaxin xikaha tjejorá.

¹⁹ ¿Xá t'ichjánxin kixin chrók'uaxrjentará kixin chrókónoexinni kixin nkexro chaxin tinkáchónki Inchéni la ko nkexro tí náhi?

²⁰ Méxra tí xikaha jnkokoáhya tjenkayáxinrá ntá tió tójnksérá chrókjónterá niotja la chaxinhya xraxinkákonxinrá Inchéni tí xikaha.

²¹ Kixin tió sinterá la senó isorá tjejonterá tí nkehe tsikjasánkoará, la isorá la kjónté naxa t'énxinrá kjinta, la í sorá la tsikókoaná.

²² ¿Á chontahyará nchia ntogar? Ntahó chrókjontexinrá la ko chrók'uixinrá nkehe. Mé xikaha chontahyará kjuasáyé tí njnkoé Dios la ko nchesuèherá tí sín nóa chónthaha njnkehó. ¿Nkehe tsontáxrjan? ¿Á tsontáxrjan kixin jína tjejoch'erá? Kjá náhi. Jehya jína tjejoch'erá.

Jína chróxraxinkakonxinni Inchéni

(Mt. 26.26-29; Mr. 14.22-25; Lc. 22.14-20)

²³ Kixin Inchéni mé chjina ch'án tí nkehe kjuákohará: kixin tí tie tsikóxi ch'án na mé jehe ch'án kuákja ch'án tí niotja

²⁴ ntá kjuixin kjuanchia ch'án kjuasáya ntá kóchrít'o ch'án tí niotja ntá ntáchro ch'án kixin: "Tíhi mé ntóna xránjon its'en kixin jína ts'ejóxin tí jahará. Méxra xikaha sich'erá kixin tsoxraxinkákonxinrá tí janhan", ichro ch'án.

²⁵ La ko kjaxin xikaha tió kjuixin kjóne sín ntá kuákja ch'án tí vaso la ntácho ch'án kixin: "Tíhi mé tjakoxin kixin chaxín tsoxiteyá ijnko nkehe nixin kuente Dios kixin ts'ítji jnina. Tió its'irá tíhi mé tsoxraxinkákonxínrá tí janhan", mé chro ch'án.

²⁶ Kixin tí interá tí nioṭṭja la it'irá tí ínté to uva mé xikaha tjeotjakoṭxinrá kixin xikaha k'uénxin Ínchéni. Mé xikaha tsjakoṭxinrá tsjixrakájia yaon tsokjan ch'án.

Ntoá chrókjóneni tí nioṭṭja kuente Ínchéni

²⁷ A ntá jnkojin nkeṭro chjini chrókjóne sín tí nioṭṭja la ko chrók'ui sín tí ínté to uva xraxinkakonxínni Ínchéni, mé xikaha chrókjuasin sín jie chrókjuikosáyehya sín tí cuerpo la ko tí ijné Ínchéni.

²⁸ Méxra jnkojnkonni chrókjuenkayáxinni senó kixin á chóntahyani jie na ntá chrókjóneni tí nioṭṭja la ko chrók'uini tí ínté to uva.

²⁹ A ntá tí xikaha chjini chrókjóneni la ko chjini chrók'uini la chaxínhya chróxraxinkakonxínni tí cuerpo kuente Ínchéni la mé tí xikaha chrókjuich'eni la chrókjuasótexínni tíha.

³⁰ Mé xikaha itsjérá nihará la ko itsjérá tsankahyará la ko jnkojínrá k'uénrá.

³¹ A ntá tí chrókjuasóanni nkeṭrí tjen asénni jeheni ntá Ínchéni t'ichjánxienhya chrókjuinchejasóteni ch'án.

³² A ntá kjónté chrókjuinchejasóteni Ínchéni ntá chrók'uitjani chrókjuinchexiteyéheni ch'án, ntá chrókjuasótehyani éxi tsjasóte tí í so chojni chjasintajni.

³³ Méxra kichó ni, tió tójnkoṭsérá sinterá la chróchonhénnrá chrókui tí í so sín ntá chrókjuóntekoará sín jnkoṭoá.

³⁴ A ntá tí nkeṭro ik'uén kjinta la íchá jina senó chrókjuónexín nkehe nṭoé ó kixin ntá chrókjuinchejasótehyará Dios kixin xikaha ntoáhya tójnkoṭsérá. A ntá tí í so nkehe la tsjasiyóxian janhan tió tsjasántsjahará.

12

Nchaṭuen Dios mé chjéhe kjuachaxin jnkojnko chojni

¹ Kichóni, tjínkaṭvan kixin tsonohará jina kixin nkeṭrí siín tí kjuachaxin tjanjon Nchaṭuen Dios t'áyéhe jnkojnko chojni.

² Jahará ó nohará jina kixin tió naṭa kuinkachónkehyará Ínchéni na mé kuinkachréhérrá tí nkehe tsíkjangya nixjahya.

³ Méxra chróknohará kixin nijnko nkeṭro nixjāxin kjuachaxin Nchaṭuen Dios tsjacha ts'ántaxínhin Jesús, la ko nijnko nkeṭro tsjacha tsontácho sín kixin Jesús mé Ínché sín tí nixjāxínhya sín tí kjuachaxin Nchaṭuen Dios.

⁴ A ntá nchónhya xra kuente kjuachaxin Nchaṭuen Dios siín la kjánchó jnkoṭoá Nchaṭuen Dios mé tjetjanjon.

⁵ La ko siín nchónhya nkeṭrí sich'ehe ni xra Ínchéni, kjánchó Ínchéni la ójnkó nkeṭro tíha.

⁶ La ko nchónhya nkehe t'axrjéxín tí xra ch'e jnkojnko chojni la kjánchó jnkoṭoá Dios tjetjanjon tí kjuachaxin ch'exínni xra kaín ni.

⁷ Jnkojnko chojni mé kuṭonhen kixin chrókjuakoṭxin kjuachaxin kuente Nchaṭuen Dios kixin xikaha chrókjuinkjitsa kichó.

⁸ Iso chojni mé ts'áyéhe kjuachaxin tsonixja sín kjuaxrexinkaon jina kixin tjínkjitsa Nchaṭuen Dios, la ko í so chojni ts'áyéhe kjuachaxin tsochrónka ijnko nkehe kuente Dios noehya tí í so sín kixin Nchaṭuen Dios mé tjínkjitsa sín tsonixja sín.

⁹ La ko í so chojni mé ts'áyéhe kjuachaxin tsjatsóanxín á kjuachaxin kuente Nchaṭuen Dios mé tjínkjitsa. La ko í so chojni mé ts'áyéhe kjuachaxin sinchekitóhe chojni jina.

¹⁰ La ko í so chojni mé ts'áyéhe kjuachaxin tsjasin sín kjuaxroan, la ko í so chojni mé ts'áyéhe kjuachaxin kixin Dios sinchenohe sín ijnko nkehe tsochenka sín tí í so kichó ni, la ko í so chojni mé ts'áyéhe kjuachaxin tsjatsóanxín á kjuachaxin kuente Nchaṭuen Dios o á kjuachaxin kuente ijnko nchaṭuen jínahya chronkaxín ijnko chojni, la ko í so chojni mé ts'áyéhe kjuachaxin kixin ijnko nkiva ókjé naṭa k'uitjahya sín tsonixjāxin sín ijnko nkehe kuente Dios, la ko í so chojni mé ts'áyéhe kjuachaxin tsochronkaxín nkeṭrí t'axrjéxín tí nkehe ókjé nkiva tsichronka tí í jnko chojni.

¹¹ Kjánchó kaín tíha jnkoṭoá Nchaṭuen Dios mé tjínkjitsa, na mé k'uáyéhe jnkojnko chojni jnkojnko kjuachaxin éxi tjínkaon tí Nchaṭuen Dios nkeṭrí xra chrókjuich'e sín.

Káinni k'ónani jnkoṭoá cuerpo kuente Cristo

¹² Cristo la éxi yóhe ijnko cuerpo chónṭa nchónhya parte. A ntá ijnko cuerpo la jnkoṭoá kjánchó nchónhya parte chónṭa. Kjónté nchónhya parte chónṭa tí cuerpo la tí cuerpo la ójnkó. Mé xikaha Ínchéni Cristo la ójnkó tí jehe ch'án.

¹³ Kaínni kjónté chojni judío la kjónté chojni jehya judío, la kjónté chojni ch'exón xra, la kjónté chojni t'ituenhya, kaín ni na mé jnkokoáxón Nchakuen Dios kuikitehínni, na kaín ni k'ónani jnkokoá cuerpo kuènte Cristo, na mé éxi jnkokoá nkehe ik'uíni kaín ni na mé k'uáyeheni tí jnkokoá Nchakuen Dios.

¹⁴ Kíxin tí cuerpo kuènteni la jehya jnkokoá parte chóna. Náhí. Itsjé parte chóna tí cuerpo.

¹⁵ Tí chróntácho tí toteni kíxin: “Jehya itja tí jeheni na mé jehya jeheni kuènte tí cuerpo”, na mé chaxínhya tíha kíxin ó jehé cuerpo kuènte.

¹⁶ Kjaxín tí chróntácho ijnko ntatsjoni kíxin: “Jehya ikon tí jeheni na mé jehya jeheni kuènte tí cuerpo a”, na mé chaxínhya tíha kíxin ó jehé cuerpo kuènte.

¹⁷ Tí chaxín kuenté cuerpo kuènteni chrók'óna ikonni, ¿ntá nkexrí chrókuinhinni? A ntá tí chaxín kuenté cuerpo kuènteni chrók'óna ntatsjoni, ¿ntá nkexrí chrókókaxraxéheni?

¹⁸ A ntá Dios kjuanjon ch'án kjuachaxin nkexrí ch'e xra jnkojnko nkehe kuènte cuerpo kuènteni kíxin jehé ch'án nkexrí tjnkaon ch'án kóxrjnhjn ch'án.

¹⁹ A ntá tí chrók'óna jnkokoá nkehe tíha, ¿a ntá nkexrí chrókjuak'e tí cuerpo a?

²⁰ Kjánchó jie nchónhya parte chóna tí cuerpo kuènteni la ó jnkokoá tíha.

²¹ Tí ikonni la mé xitjahya tsontáche tí tjani kíxin: “T'ichjánxienhyani tí jaha”, la ko kjaxín tí kjani xitjahya tsontáche tí toteni kíxin: “T'ichjánxinnahya tí jaha.”

²² Náhí. Tí nkehe kuènte tí cuerpo tónhenni kíxin tjetuanhya na mé kjónté antsí má t'ichjánxjn

²³ la ko í so nkehe kuènte tí cuerpo la kánhyó chóntheni kjuasáya na kjánchó antsí nchek'ítsáni ka. La ko tí nkehe náxrjónhya la antsí tóxakohenni kíxin tsonoxínhya.

²⁴ A ntá tí nkehe náxrjón na mé t'ichjánxienhyani ka ts'ítsá. Mé xikaha Dios kjuincheyóxin kaín tí nkehe kuènte tí cuerpo kuènteni la ko jehé ch'án antsí chjéhe ch'án kjuasáya tí nkehe chrókjuikosáyehyani jeheni

²⁵ kíxin ninkehó xitjahya chrókikayéhe tí cuerpo kíxin kaín tí nkehe la jnkokón tjnkjtsa kichó.

²⁶ Tíó tsíkónhí ijnko parte kuènte tí cuerpo la kaín tí í so parte la kjaxín tjeté; la ko tíó tjikosáyehe sín ijnko parte la kuenté tsochéhe.

²⁷ A ntá jahará na mé kuènte tí cuerpo kuènte Cristo la ko jnkojnkorá mé ijnko parte kuènte tí cuerpo kuènte ch'án.

²⁸ Méxra Dios kjuéyá ch'án chojni sich'ehe ch'án xra kuènte njnko, na mé saoxín kjuéyá ch'án tí sín apóstol; la ko yóxin kjuéyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko níxin kjuéyá Dios iso chojni chjéhe ch'án kjuachaxin tsjako sín itén ch'án, la ko kjaxín kjuéyá ch'án iso chojni chjéhe ch'án kjuachaxin tsjasin sín kjuaxroan, la ko kjaxín kjuéyá ch'án í so chojni chjéhe ch'án kjuachaxin sinchekitohe chojni níhi jína, la ko kjaxín kjuéyá ch'án í so kjojni chjéhe ch'án kjuachaxin antsí tjnkjtsa kichó, la ko kjaxín kjuéyá ch'án í so chojni chjéhe ch'án kjuachaxin ts'etgan xra kuènte ch'án, la ko kjaxín kjuéyá ch'án í so chojni chjéhe ch'án kjuachaxin tsonixjaxín sín í jnko nkíva.

²⁹ Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin tsjasin sín kjuaxroan,

³⁰ la ko kénhya chojni chóna kjuachaxin sinchekitohe sín chojni jína, la ko kénhya chojni chóna kjuachaxin tsonixjaxín sín ijnko nkíva ókjé, la ko kénhya chojni chóna kjuachaxin tsochronkaxín sín nkexrí t'axrxjén tí nkehe chrónka tí sín nixjaxín ijnko nkíva ókjé. Chaxín kjá náhi.

³¹ Méxra tjéyará tí kjuachaxin antsí jína chrótjáhará Dios. Ntá jie tsjákohará ijnko ntía antsí jína chrók'uejorá.

13

Chrótjuèheni kichó ni

¹ Tí chrónixja nkívee chojni ó la ko kjaxín chrónixja éxi nixja tí sín ángel, ntá naça chrótjuahya kichó ni la ó chónkó tíha la mé éxi chrókóyona chica tsjánga ó la ko éxi ijnko chica platillo nchevékjan sín ó, kíxin ninkehó són chónahya.

² La ko tí chrónixja itén Dios, la ko tí chrókianxian kaín nkehe kuènte Dios naça noehya chojni, la ko tí chrókónona kaín nkehe, la ko antsí chrókuinkachónkia Dios ntá chrókjuacha chróntátjan ijnko jna sáchrókjui ókjé, kjónté tí xikaha ntá naça chrótjuahya kichó ni, ntá ninkehó sínkíhya tí janhan.

³ Tí chrókjuinktáqonhan tí sín nòa kaín nkehe chonta, la ko tí chrókjuánjuan kjuachaxin kíxin chróchena kuenténa, kjónté tí xikaha ntá naça chrótjuahya kichó ni la ntá ninkehó sínkíhya tíha.

⁴ Tí tjuèhèni kichó ni na ts'ejóchónhenni kichó ni, tsonínkakuenhyani kichó ni, la ko sinchejína asénni, la ko tsochjinoxienhyani, la ko sinchehnkehyani, la ko tsohnkehyani,

⁵ la ko ch'ehyani ninkehó nkehe náxrjónhya, la ko tjejáhyani nkehe kuènteni ó, la ko tsonínkakonyani tjoka, la ko tsochóntahyani kjuanínkaon isé,

⁶ la ko kjaxin tsöchèhyani tió í jnko chojni tjasin jie. Náhi. Chrókóchéhèni tió ijnko nkehe jína sítóhnen.

⁷ Tí tjuèhèni kichó ni la kjónté kaín nkehe chrókjuasótexínni la chrókuitekaonni kixin jína sín la ko náxa chrok'uejóchónhenni chrókónínkakonyani.

⁸ Tí tjuèhèni kichó ni la jnkochríxín tsjak'e ts'itjányanya. A ntá itsi ijnko yaon í t'ichjánxínhya tsochrónka chojni itén Dios, la ko tsókohya kjuachaxin tsonixjaxin chojni ókjé nkíva, la ko tsókohya kjuachaxin tsonohe chojni má.

⁹ Náxa t'itjányan tí nkehe chrókónohèni la ko náxa t'itjányan tí nkehe chróchronkaxínni.

¹⁰ A ntá tió tsonohèni kaín xin nkehe ntá tí nkehe ntoáhya k'uénohèni la mé ts'itjányan.

¹¹ Tió náxa chánjan janhan k'uéníxja éxi chánjan la ko k'uékjenkayáxian éxi chánjan. Ntá kóntetona ntá kujtóhjá tí nkehe kuènte chánjan.

¹² Méxra éxi ijnko xrosentá t'ikonxínhyani jína jie, ntá tsi ijnko yaon chr'éxín ntá ts'ikonxínni jína kaín nkehe. Ijie náxa t'itjányan tí nkehe chrókónóna; ntá tsi ijnko yaon tsonóna jína kaín xin nkehe éxi xíkaha kjaxin Dios chóxin ch'án tí janhan.

¹³ Méxra, iní nkehe tjejó jnkochríxín, la mé ts'ejó chojni tsínkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kichó. A ntá iní nkehe síin, la kjánchó antsí má t'ichjánxín tsotjuèhèni kichó ni.

14

Tí nixjaxin chojni ókjé nkíva

¹ Chrókóxakonhanrá kixin chrótjuèhérá kíchuará la ko kjaxin chrókjuéyará kixin Nchakuen Dios chrótjáhará kjuachaxin. Kjánchó antsí chrótjínkáonrá tí kjuachaxin tsóchronkará ijnko nkehe kuènte Dios.

² Méxra, tí nkexro nixjaxin ijnko nkíva ókjé mé nixjehé sín Dios ó la ntá chojni la náhi, kixin kohya ninkexró tiénxín tí nkehe nixja sín la mé nchakuen sín ó mé chronkaxín sín ijnko nkehe kuènte Dios noehya tí í so sín.

³ A ntá tí nkexro chronkaxín ijnko nkíva tiénxín tí í so sín ijnko nkehe kuènte Dios mé nixjehé chojni ntá xíkaha tjínkítsa tí í so sín kixin antsí chrók'uitja sín nkehe kuènte Dios la ko chrókóchéhè sín.

⁴ A ntá tí nkexro nixjaxin ijnko nkíva ókjé la mé tjínkítsa jehó ch'án antsí tsonohe tí kjuachaxin kuènte Dios. A ntá tí nkexro chronkaxín ijnko nkehe kjuínchenohe Dios mé tsjínkítsa tí sín kuènte njnko kixin antsí chrók'uitja sín nkehe kuènte Dios.

⁵ Tjínkávàn kixin kaín rá chróchontará kjuachaxin chrónixjaxínrá ijnko nkíva ókjé. Kjánchó antsí tjeotan chróchontará kjuachaxin chróchronkará ijnko nkehe kjuínchenohará Dios. A ntá kánhyó tjeotan chrónixjaxínrá ókjé nkíva tí noahyará tsóchronkaxínrá nkexrí t'axrjéxín tí nkehe chróchronkará kixin chrókuinhin kaín tí sín tínkáchónki Inchéni kixin antsí chrók'uitja sín nkehe kuènte Dios.

⁶ A ntá kichó ni, tí chrókjuasántsajahará chrónixjaáxinrá ijnko nkíva ókjé la ó chónkó tíha. Íchá jína chrónixjaáxinrá ijnko nkíva tiénxinrá chróxrjankaxián ijnko nkehe kjuínchenóna Dios la chróxrjankaxián ijnko nkehe kuènte Dios náxa noahyará, la chróxrjankaxián ijnko nkehe tjínkaon Dios chrókónohará, la chrókjuákoáxinrá ókjé nkehe njxin.

⁷ Kixin kjaxin tí ison flauta la ko tí isón arpa, tí jnkokónhya chróntáchro jnkojnko són, ntá chrókjuachahyani chrókjuatsóanni nkehe tí ntáchro tí són a.

⁸ La ko éxi yóhé tí síin guerra, tjanjonko kichó sín, la ntá ntoáhya chrók'uánoa sín tí chica trompeta, ntá kohya nkexro chrókóyaxínhin sín sáchrókjuikjanjonko kichó sín.

⁹ Kjaxin xíkaha tí jahará tí nixjahyará ijnko tan tiénxín sín, çntá nkexrí chrókónohe sín nkehe tí ntáchrorá? Mé xíkaha tjeonixjará éxi chjéhe xrjntó ó.

¹⁰ Chaxin síin itsjé nkíva chjasintajni la ko kaín nkíva la síin chojni tiénxín sín.

¹¹ Kjánchó tí chrókianxínhya janhan tí nkehe tsontáchro ijnko nkexro, ntá tí nkexro a ts'ikon tí janhan éxi ijnko nkexro tsíkjixín ókjé la ko kjaxin janhan ts'íkuan tí jehé ch'án éxi ijnko nkexro tsíkjixín ókjé.

¹² Méxra jahará imá tjínkáonrá chrók'uayéhérá ijnko xra kuènte Nchakuen Dios, ntá chrókójína chrókjuéyará tí xra chrókjuinkítsa tí í so sín kuènte njnko kixin antsí chrók'uitja sín ijnko nkehe kuènte Dios.

¹³ Méxra tí nkexro nixjaxin ijnko nkíva ókjé la chrókjuanchehe Dios kixin chrókjuinkítsa chróchronkaxín ch'án nkexrí t'axrjéxín tí tan a.

¹⁴ Kíxin tí tsonixjaxian Dios ijnko nkíva ókjé, ntá tí nchakuenná ó mé tjenixjehe Dios, la ntá tí kjuaxrexinkaon kuéntana la ókjé tjen.

¹⁵ A ntá tí xíkaha, ¿nkehe chrókjuít'a? Íchá jína chrónixjaxian Dios tí nchakuenná la chrókianxian janhan, la ko tió chrótsje janhan himno la chrótsjexian nchakuenná la ko chrókianxian janhan.

¹⁶ Kíxin tí tsochjeéxinrá kjuasáya Dios nchakuenná ó ntá tjejótinhin í so chojni, ¿ntá nkexrí kíxin tí sín naxá kienxínnya sín tí nkehe nixjehérá Dios chróntácho sín "Amén, ó nchoxon"?

¹⁷ Kjónté imá náxrjón tí chrókjuanchehérá Dios kjuasáya la ntá chrókienxínnya tí sín tjejótinhin, ntá chrókjuinkjitsahya kíxin chrók'uitja sín nkehe kuénte Dios.

¹⁸ Tjánehá Dios kjuasáya kíxin antsí chonta janhan kjuachaxin tsonixjaxian ókjé nkíva, la ntá jahará la kánhyó nixjará xíkaha.

¹⁹ Kjánchó tió tójnkotsé chojni kíchó ní la mé ntáxrjan kíxin antsí tjínkavan chróníxja janhan kjónté in'to palabra ó tienxín sín kíxin xíkaha chrókjuákuaxian sín, la ntá kánhyó chrókójína kjónté íte míl palabra chróníxjaxian ijnko nkíva ókjé tienxínnya chojni.

²⁰ Kíchóni, chrókjuenkayáxinhará éxi chánjan. Kjánchó chrók'uejorá éxi chánjan naxá noehya nkehe jínahya. A ntá chrókjuenkayáxinrá éxi chojni ntego.

²¹ Tí xroon tsíkjin sín ósé nkexrí k'uetqan Dios mé ntácho kíxin: "Janhan tsonixjaxian ókjé nkíva la ko itén chojni ókjé kíxin tsinhin tí nació Israel na kjónté tsitekakonhya sín, xíkaha ichro Ínehéni."*

²² A ntá tí kjuachaxin tsonixjaxin chojni ókjé nkíva mé xránjon kíxin chrókjuákoxin chojni chrókuinhin tí sín tinkáchónkihya Ínehéni, jehya kíxin t'ichjánxin chrókuinhin tí sín tinkáchónki Ínehéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon kíxin chrókjuákoxin chojni chrókuinhin tí sín tinkáchónki Ínehéni, jehya kíxin chrókuinhin tí sín tinkáchónkihya Ínehéni.

²³ A ntá tió tójnkotsérá kaín rá tinkáchónkirá Ínehéni, a ntá kaín rá chrónixjaxinrá ókjé nkíva, ntá tí chrók'uíxenhén nchia ijnko chojni naxá kuénhya sín xíkaha, o chrók'uíxenhén nchia ijnko chojni naxá tinkáchónkihya Ínehéni ntá chrókuinhin sín xíkaha la kjá tsontácho sín kíxin ó k'uíxikjánrá.

²⁴ Kjánchó tí chróchronkará kaín rá ijnko nkehe kjuínchenohará Dios ntá chrók'uíxenhén nchia ijnko nkexro tinkáchónkihya Ínehéni, o chrók'uíxenhén ijnko chojni naxá tienhyé, ntá chrókuinhin sín nkehe tjejonixjará kaín rá ntá chrórxaxinkaon sín tí jie chóna sín ntá chrókuítqhe sín kaín jie chóna sín.

²⁵ Ntá tsonoxín tí nkehe mó tjenkayáxin sín nkaya asén sín ntá ts'ejóxin toch'in sín tsoxraxinkaon sín Dios la ko tsontácho sín kíxin chaxin tjejókoará Dios.

Ntoá chrókjuich'eni kaín xín nkehe tió tójnkotséni

²⁶ A ntá kíchó ní, ¿nkehe chrókónhen? Tió tójnkotsérá na mé isorá chrótsjerá salmo, la ko isorá chrókjuákorá, la ko isorá chróchronkará ijnko nkehe kjuínchenohará Dios, la ko isorá chrónixjaxinrá ijnko nkíva ókjé, la ko isorá chróchronkaxinrá nkexrí t'axrxjén tí nkehe nixjaxin tí í so sín ókjé nkíva. Kjánchó kaín tíha tsonhen kíxin tí sín kuénte njnko chrók'uitja sín nkehe kuénte Dios.

²⁷ A ntá tí chrónixjaxin sín ijnko nkíva ókjé na mé yaá o iy'á chojni chrónixja sín la ko chrók'uíxinkí chojni tsonixja, la ko t'ichjánxin kíxin jnkojin nkexro nohe tsochronkaxin nkexrí t'axrxjén tí nkehe nixja sín.

²⁸ A ntá tí kohya njnko xroon tí njnko ntaha tsjacha tsochronkaxin nkexrí t'axrxjén tí nkehe chrónixja sín, ntá chrónixjaxinnya sín ókjé nkíva tí tjejótójnkotsé sín, na mé chrónixjehe sín asén sín ó la ko chrónixjehe sín Dios ó.

²⁹ Tjánjonrá kjuachaxin kíxin tsonixja yaá o y'á chojni k'uáyéhe sín kjuachaxin tsochronka sín nkehe kjuínchenohe sín Dios. A ntá tí sín tjejótinhin mé chrókjuenkayáxin sín á ó nchoxon tí nkehe kuínhin sín.

³⁰ A ntá tí xringhya chrókjuinchenohe Dios ijnko nkehe ijnko nkexro tjetjaxin ntá chróchronka ch'án tíha. A ntá tí nkexro senó kjuankíxin chrónka nkehe la chróchónhen ch'án chrónixjahya ch'án.

³¹ Ó nchoxon jnkojnkorá chróchronkará nkehe tjáhará Dios kíxin xíkaha kaín rá chrók'uitjára la ko chrókócháhará.

³² A ntá tí nkexro k'uáyéhe kjuachaxin tsochronka nkehe kjuínchenohe Dios kjaxin t'ichjánxin chróchónhen tsochronkaxin í jnko nkexro.

³³ Kíxin Dios tjanjon tí kjuaxróxin, a ntá tjinkakonhya ch'án kíxin yóxinnya chrók'uejóni.

Tiú tójnkotsé chojni kíchó ní tinkáchónki Ínehéni

* 14:21 Isaías 28.11-12

³⁴ chrónixjahya tí chojni chjin jnkosiné servicio. Kohya kjuachaxin xikaha, na mé chrókjuinchexiteyéhe sín tí sín ntoa éxi t'etoan tí ley kuènte Dios.

³⁵ Tí tjinkaon sín tsonohe sín nkehe na mé chrókjuanchankíhi sín xii sín tió tjiji sín ntøe sín. Nàxrxjónhya chrónixja ijnko chojni chjin nkehe jnkosiné servicio.

³⁶ Chrókónohará kixin tí itén Dios xránkixixínhya tí tjejorá la ko jehya jahorá k'uayéherá tíha.

³⁷ A ntá tí tjen jnkojin nkexro tjenkayáxin kixin nixja itén Dios o tjenkayáxin kixin tí Nchakuen Dios tjinkítsa tí jehe ch'án ntá chrókónohe ch'án kixin tí nkehe tjejkian mé ijnko nkehe tsík'etoan Inchéni.

³⁸ A ntá tí nkexro titekakonhya tíhi na ntá jahará chrókuitekákauénhyará ch'án kjaxin.

³⁹ Méxra kichó ni, chrókjuéyará kixin chrók'uayéherá kjuachaxin chróchrónkará nkehe kjuínchenohará Dios la ko chrókuítóherá tsonixjaxin chojni ókjé nkíva.

⁴⁰ Kjánchó kaín xín nkehe la jnkojína la ko kjuasáya chrókónhen.

15

Tsíxechón Cristo

¹ A ntá jie kichó ni, tjínkavan chrórxaxinkáonrá nkehe tí tan kuaáxinrá kjuákohará. Tíha mé kuítekáonrá, la mé tíha mé tjejóxinrá jína.

² Kjaxin tí nkehe kjuákohará mé kuaáxinrá, tí tjejóhyará tí nkehe kjuákohará; tí la náhi la chónkó kuinkachónkirá tí nkehe kjuákua.

³ Saoxín, kjuákohará tí nkehe k'uayáha kixin Cristo k'uenyákonhen ijíeni, na mé xikaha kjuínchexiteyá ch'án tí nkehe ntáchro tí xroon itén Dios

⁴ la ko tsíkjavá sín ch'án la ko tsíxechón ch'án tí nixin yaon éxi ntáchro tí xroon itén Dios.

⁵ Ntá k'uikon ch'ín Pedro tí jehe ch'án, ntá chr'éxin inaá tí teyó sín k'uék'ajiko ch'án k'uikon sín tí jehe ch'án.

⁶ A ntá chr'éxin chjina quinientos chojni kichó ni jnkokoá k'uéjé sín k'uikon sín ch'án. A ntá jie itsjé tí sín a naça tjejó sín, a ntá jnkojin sín na ó tsík'en sín.

⁷ Chr'éxin k'uikon ch'ín Jacobo tí jehe ch'án, la ko k'uikon kaín tí í so sín apóstol inaá.

⁸ A ntá kjuixixín janhan k'uikuán Inchéni éxi ijnko xjan naça xetjahya yaon chrókokjíhi.

⁹ Kjánchó janhan kánhyó tjejoan la mé tóyóehya tí í so sín tsíkjevá Inchéni la ko tósuána chrók'óna ijnko nkexro ch'ehe xra Inchéni kixin janhan mé k'uénínkakhonhan tí sín njnkøe Dios.

¹⁰ Kjonté jínhya kjuít'a la kjuasáyé Dios la ko kjuachaxin kuènte ch'án mé kjuítóxinhin tí kjuenkayáxin, na mé chónkóhya kuíkonóana ch'án, kixin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhi. Dios kjuinkítsana ch'án kjuít'a xra.

¹¹ Kjánchó tjetuanhya á janhan o á jehe sín kjuako sín, kixin xikaha tí itan kjuakoni, a ntá kuítekáonrá.

Tsoxechón tí sín tsík'en

¹² A ntá tí tjakoni kixin Cristo la xechón, ¿ntá nkekuènte ntáchrórá jnkojínrá kixin tsoxechónhya chojni tsík'en?

¹³ Tí chrókóchaxín tí nkehe ntáchrórá kixin tsoxechónhya chojni tsík'en, ntá kjaxin chróxechónhya Cristo.

¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekáonrá.

¹⁵ A ntá tí chaxínhya xikaha tsíkónhen, la jeheni la ijnko chojni ntoáhya chrónka kuénté Dios, kixin ó chrónkani kixin Dios kjuínchexechón Cristo. A ntá tí chrókóchaxínhya kixin chróxechón Cristo, ntá kjaxin chrókóchaxínhya kixin chróxechón chojni tsík'en

¹⁶ kixin tí chróxechónhya tí chojni tsík'en, ntá kjaxin Cristo chróxechónhya ch'án.

¹⁷ A ntá tí Cristo chróxechónhya ch'án ntá chrókóchónkó tí kuítekáonrá tí jehe ch'án kixin naça chrókjuínhya tí ijjárá.

¹⁸ La ko tí chrókóchaxín tíha ntá chrók'uitjáyan tí sín kuítekaon Cristo ik'uén sín.

¹⁹ Méxra tí chrókúinkáchónkini Cristo kixin chrókjuinkítsa ch'án tí jeheni chjasintajni ntíhyó, ntá kohya chojni chrókóyóhe tí jeheni, imá chrókónóeni chrók'uejóni kaín ni.

²⁰ Kjánchó náhi, la chaxín ó xechón Cristo. Jehe ch'án éxi tí nkehe tsík'óna saoxín kixin jehe ch'án saoxín xechón ch'án.

²¹ Méxra jnkokoá chojni ntoa kjuankíxin kjuasin jie, ntá kjuankíxin k'uén kaín xín chojni chjasintajni, la ko kjaxin jnkokoá chojni ntoa xechón, ntá xikaha tsoxechón kaín chojni tsík'en.

²² Kixin tí jie kjuasin ch'ín Adán ntá kaín xín chojni sí't'énxín sín. A ntá Cristo la kaín ni toschóntaxíni kjuachón.

²³ Jnkojnko ni éxi tsoñhenni tocar, na mé saoxín xechón Cristo, a ntá chr'èxin tió tsokjan ch'án ntá tsoxechónni kaín ni kuitekaonni tí jehé ch'án.

²⁴ A ntá ó tsi yaon tsjixixín ntá sinček'itjáyán Cristo kaín xín nkehe t'etóan la ko kaín xín kjuachaxin ókjé, ntá tsjanjon ch'án tí xra t'etóan kixin ts'áyéhe It'é ch'án Dios.

²⁵ Na mé t'ichjánxin ts'etóan Cristo tsjixrakájia tí yaon tsjachahya tí sín núnkakhon ch'án.

²⁶ A ntá tí nkehe tsjixixín ts'itjáyán la mé tí kjuach'én.

²⁷ A ntá Dios kjuanjon kjuachaxin kixin kaín nkehe siín mé chrók'uetuñhen Cristo.* Kjánchó tió xíkaha ntácho tí xroon itén Dios tsíkjin sín ósé kixin kaín xín nkehe mé ts'etuñhen ch'án, ntá ó noheni jina kixin jehya kixin Dios la chrók'uituñhen ch'án inaá. Náhí. Jehé ch'án mé chjéhe Xjeen ch'án kaín kjuachaxin ts'etuñhen ch'án kaín xín nkehe.

²⁸ A ntá tió tsjixin tsjacha Cristo ts'etuñhen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhe ch'án It'é ch'án Dios kixin ntá Dios mé ts'etuñhen ch'án kaín xín nkehe.

²⁹ A ntá í jnko nkehe, la iso sín tikiteyákonhen tí sín tsík'en. ¿Nkekuènte xíkaha ch'e sín tí titekakhonhya sín kixin tí sín tsík'en tsoxechón sín inaá?

³⁰ A ntá tí xíkaha, ¿nkekuènte kixin kaín yaon kjuaxróxinhya tjejóni núnkakhonhenni chojni?

³¹ A ntá kichó ni, kaín yaon siín kjuachrakon chrók'uen janhan. Chaxín tíhi, kjánchó chàna kixin jahará kjaxinrá tinkachónkirá Ìnchéni Jesucristo.

³² Kjonté kóninkakonna chojni chjasin Éfeso éxi iko jiehe la kjonté kjuak'é ntiha, ¿la ntá nkehe chrókjuacha tí janhan tí chrók'ochaxínhya chrók'echón chojni tsík'en? Tí xíkaha la ó nchoxon tí nkehe ntácho tí sín titekakhonhya Ìnchéni kixin chrók'jóné sín la ko chrók'ui sín kixin ijie la o ntóye chrók'uen sín.

³³ Chrók'it'ogéhyará chrokjuit'áyahará sín. Éxi ntácho sín kixin: "Tí chrók'uejókotoxínni chojni jínahya ntá chrók'uitjáyán tí nkehe jina tjenkayáxinni."

³⁴ Chrókjanrá ntja jina ntoá la chrókjuásinhyará jie. Méxra isorá naxa chonhyará Dios. Na mé ntáxrjan tíhi kixin chrók'ósuhará.

Nkexrí tsoxechón tí sín tsík'en

³⁵ Kjá jnkojínra tsjanchankinará kixin: "¿Nkexrí tsoxechón tí sín tsík'en la ko nkexrí tsotsjehe tí cuerpo tsochónta sín?"

³⁶ Lontjrá tsjanchankinará xíkaha. Tí noatje t'enkanı nonte t'ichjánxin its'en ts'itjáyán kixin tsjak'echón tí nkehe ts'ayan.

³⁷ Tí nkehe t'enkanı la jehya tí ka a. Náhí. Tí nkehe t'enkanı la noatrigo o í jnko tje.

³⁸ Kjánchó Dios kjuanjon kjuachaxin kixin jnkojnko nta ts'óna éxi tjinkaon ch'án, la ko jnkojnko nta tsochónta tje kuènte.

³⁹ A ntá jehya kaín tí cuerpo la jnkokon. Náhí. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxé, la ko í jnko la cuerpo kuènte koche.

⁴⁰ Na mé kjaxin xíkaha siín cuerpo kuènte tí sín ángel tjejó nkaya nkajni la ko siín cuerpo kuènte chojni tjejó chjasintajni. A ntá tí cuerpo kuènte tí sín ángel la náxrjón tsjehe la ko kjaxin tí cuerpo kuènte tí chojni la náxrjón tsjehe, kjánchó ókjé nkexrí tsjehe.

⁴¹ Ókjé nkexrí t'inkaséyanxin tí yaon la ko ókjé nkexrí t'inkaséyanxin tí nitjó la ko kjaxin konotsé la ókjé nkexrí t'inkaséyanxin la ko kjonté itsjé konotsé la ókjé t'inkaséyanxin jnkojnko.

⁴² Kjaxin xíkaha tsoñhen tí chojni tsík'en tsoxechón sín. Tí nkehe tsoxravá la mé ijnko nkehe tsotje, a ntá tí nkehe tsoxechón la mé ijnko nkehe ts'itjáyánhya.

⁴³ Tí nkehe tsoxravá la ijnko nkehe náxrjónhya tíha, la ntá tí nkehe tsoxechón la ijnko nkehe imá náxrjón. Tí nkehe tsoxravá la ijnko nkehe chóntahya kjuachaxin, la ntá tí nkehe tsoxechón la ijnko nkehe tsochónta kjuachaxin.

⁴⁴ Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochónta kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochóntani cuerpo antsí tsochónta kjuachaxin kuènte Nchakuen Dios.

⁴⁵ A ntá éxi ntácho tí xroon itén Dios kixin: "Tí chojni ntoa k'óna saoxín mé ch'in Adán tíha mé k'uáyéhe ch'án kjuachón ó."† A ntá tí ó kjuixixín ikui í jnko ch'in éxi yóhe Adán, kjánchó jehé ch'án mé chónta ch'án nchakuen tjanjon kjuachón.

⁴⁶ Kjánchó jehya saoxín k'óna tí cuerpo antsí chónta kjuachaxin kuènte Nchakuen Dios. Náhí. Saoxín k'óna cuerpo kuènte chojni chjasintajni ó, la ntá chr'èxin k'óna cuerpo antsí chónta kjuachaxin kuènte Nchakuen Dios.

⁴⁷ Tí nkexro k'óna saoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajni kjuixin ch'án.

* 15:27 Salmo 8.6 † 15:45 Génesis 2.7

⁴⁸ Tí cuerpo síin chjasintajni mé yóhe tí cuerpo k'uechóna tí nkeexo tsík'óna nche. A ntá tí cuerpo síin nkaya nkajni mé yóhe tí cuerpo chóna tí nkeexo kujxin nkaya nkajni.

⁴⁹ Éxi senó tóyóhēni tí nkeexo k'óna nche, ntá xikaha chr'éxin tsoyóhēni tí nkeexo kujxin nkaya nkajni.

⁵⁰ Ntá tsotjonkará nkehe, kichó ni. Tí cuerpo k'óna nto la ko hueso chónani jie xitjahya sátsjikoni tí tjen Dios t'etōan ch'án. Na mé tí nkehe tsjeje xitjahya ts'áyéhe tí nkehe tsjejehya.

⁵¹ A ntá tsotjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxinhin tí cuerpo chónani.

⁵² A ntá xrínahya titáya tjejóni ntá éxi chróchr'áton konni la ko chrókuakitjenkjni konni xikaha tió tsjixixín tsinhinni tsontácho trompeta, la ntá kaín chojni tsík'en tsosexchón, í ts'enhya sín, la ko kjaxin jeheni kaín ni ts'ixitóxinhin tí cuerpo chónani.

⁵³ A ntá tí cuerpo chónani la tsjeje, ntá t'ichjánxin ts'inkáya nkehe chónhya tsjeje. La ko tí cuerpo chónani la ts'en ntá t'ichjánxin ts'inkáya nkehe chónhya ts'en.

⁵⁴ A ntá tió tí cuerpo chónani la tsjeje, na mé t'ichjánxin ts'inkáya tí nkehe chónhya tsjeje, la ko tió tí cuerpo chónani la ts'en, na mé t'ichjánxin ts'inkáya tí nkehe chónhya ts'en. Ntá tí xikaha na ntá tsoxiteyá éxi nixja tí xroon itén Dios ntácho kixin: "Tsjachahya tí kjuach'én la mé tsjacha tí kjuachón."*

⁵⁵ "Jaha kjuach'én, ¿kjá tí kjuachaxin kuenta kixin chrókuacha jaha? Jaha kjuach'én, ¿kjá tí kjuachaxin kuenta kixin chrók'oyánni?"[§]

⁵⁶ Tí jie tjasinni mé kujxin tí ts'enni. A ntá tí ley k'uetōan ósé antsí k'uixixín jie.

⁵⁷ A ntá tjancheheni Dios kjuasáya kixin ichr'án ch'án Ìnchéni Jesucristo kixin táha mé tsaxinni.

⁵⁸ A ntá jahará kichó ni, imá tjuahará. Chrókuitoéhyará tinkachónkirá Ìnchéni. Jnkochrixin chrókjuich'ehérá Ìnchéni xrá antsí jina kixin ó nohará jahará kixin tí xrá ch'eheni Ìnchéni jehya chónkó tíha.

16

Tí ofrenda tjenájín sín tsochr'énhen sín tí sín tjejó chjasin Jerusalén

¹ A ntá tí chichaon tjenájínrá kixin tsjínkĩsará tí sín kichó ni tinkáchónki Ìnchéni na mé chrókjuich'erá éxi kuétuñhan tí sín n̄nko estado Galacia.

² Jnkojnko domingo jnkojnkorá chrókuakitsjenteherá nkeri síká chichaon kjuachará tí semana kjuich'erá xrá kixin t'ichjánxinhya chrókjuasánjia janhan ntá chrókjuénájínrá chichaon.

³ A ntá tió tsjasán janhan tsétuñhan tí sín tsjéyará kixin sátsji sín chjasin Jerusalén, na ntá tsolkjan xroon tsjikoxin sín tí chichaon tsikjénájínrá tsjikaán tí sín kichó ni ntíha.

⁴ A ntá tí chrókójina kjaxin janhan sáchrókjuiyá, a ntá sáchrókjuikian tí jehe sín kjaxin.

Tjenkayáxin ch'in Pablo nkexrí sátsji ch'án

⁵ Tí sátsjia la t'ichjánxin ts'atsínka janhan estado Macedonia ntá chr'éxin tsjasán ntíha chjasin Corinto.

⁶ Ách'e ntaho chrókuitona chrók'uatśínkajia nchakuen kin. A ntá jahará chrókjuínkĩsará tí janhan tió sátsjia ókjé chr'éxin.

⁷ Méxra tjinakonhya chrók'uatśínkoá chrótsjahará ó. Náhi. Tjínkavan chrókuitona iso yaon tí tjejorá ntíha tí Ìnchéni chrókjuanjon kjuachaxin.

⁸ Kjánchó tsitōna chjasin Éfeso tsjixrakájia yaon Pentecostés,

⁹ kixin ntíhi antsí chonta kjuachaxin chrókjuit'a xrá kuente Ìnchéni la ko jina chrókónhen tí xrá kjónté nchónhya chojni nínakonna.

¹⁰ A ntá tí tsjiji ch'in Timoteo ntíha la antsí jina chrónixjehérá ch'án kixin kjuaxróxin chrók'uejokoará ch'án kixin jehe ch'án kjaxin ch'ehe Ìnchéni xrá éxi janhan.

¹¹ Kaín tí jahará chróchonteherá ch'án kjuasáya. Tjínkĩsará ch'án kixin jina itsi ch'án ntíhi tsitsjehe ch'án tí janhan kixin tjéchonhan chrókui ch'án la ko tí í so sín kichó ni.

¹² A ntá tí kichó ni Apolos la imá xrjanóahá ch'án kixin kjaxin chrókjuijiko ch'án tí í so kichó ni, kjánchó tjinkakonhya ch'án jie. Chr'éxin tsjiji ch'án tió ts'ixranka.

Kjuixixín nixja ch'in Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókuitōéhyará tí tinkachónkirá Ìnchéni.

¹⁴ Kaín nkehe chrókjuich'erá la koí chrótjuéhérá kichuárá.

¹⁵ Na ntá kichó ni, ó nohará kixin tí sín kjéhya ch'ín Estéfanas saoxín kuinkáchónki sín tí tan tsaáxin chojni tí estado Acaya, la ko jehe sín kuákja sín xra a tjinkĩtsa sín tí sín kichó ni tinkáchónki Ìnchéni.

¹⁶ Tjínkavan kixin chrókjujinchexiteyéhérá tí sín tjinkĩtsa éxí tí jehe sín la ko kaín tí sín ch'e xra.

¹⁷ Chàna kixin ó kui ch'ín Estéfanas la ko ch'ín Fortunato la ko ch'ín Acaico, kixin jahará kjónté tjejohyará.

¹⁸ A ntá jehe sín kjuínchechéhe sín asenná éxí kjuínchecháhará sín. Chróchontehérá kjuasáyé chojni xjkaha.

¹⁹ Tí sín tójnkotsé estado Asia xraxinkaon sín tí jahará. Kjaxin ch'ín Aquila la ko tjan Priscila la ko tí sín tójnkotsé ntqe sín ima xraxinkaon sín tí jahará kixin tinkachónkirá Ìnchéni.

²⁰ Kaín tí sín kichó ni ntihi xraxinkaon sín tí jahará. Nixjehérá kichuárá kaín rá tsehérá tja kichuárá jnkojina.

²¹ Janhan Pablo xráxinkavan tí jahará ikjian xroon chr'anhánrá la tjaná kjinxiàn tí letra i.

²² Tí nkexro tjuèhya Ìnchéni Jesucristo la tsjasóte. A ntá jeheni, la Ìnchéni xrákiá.

²³ A ntá kjuasáyé Ìnchéni Jesucristo mé sintayaonrá ch'án.

²⁴ Tjuahará kaín rá kixin kaín ni tinkáchónkini Cristo Jesús. Amén. Ó tjen.

Tí xroon yóxin ikjin ch'ín Pablo chr'énnen ch'án tí nínko chjasin Corinto

¹ Janhan Pablo mé kjueyána Dios kixin sít'aha Ìnchéni Jesucristo xra, la ko kichó ni Timoteo ikjinni tí xroon í chr'ánhanráni tí jahará nínkqe Dios chjasin Corinto la ko kaín tí í so kichó ni tinkáchónki Ìnchéni tjeorá nkuixín estado Acaya.

² Kjuasáyé It'eni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Tí kjuasóte ch'ín Pablo

³ Tjancheheni kjuasáyé Dios It'é Ìnchéni Jesucristo. Jehe It'eni mé tikonógheni ch'án la ko xráxin nchechéheni ch'án.

⁴ Jehe ch'án mé nchechéhe ch'án kaín tí jeheni tió tsi ijnko kjuaxróxinhya kixin ntá tsjachani sinchechéheni í so chojni kjuaxróxinhya ts'atsínka sín éxi yóhe jehe ch'án kjuínchechéhe ch'án tí jeheni.

⁵ Mé xíkaha tjejtjasóteni éxi yóhe kjuasóte Cristo ntá kjaxin jehe ch'án imá sinchechéheni ch'án kixin tinkáchónkini ch'án.

⁶ Tjejtjasóteni kixin tí jahará chrókócháxinrá la ko chrókuaáxinrá. A ntá Dios nchechéhe tí jeheni kixin kjaxin jahará chrókócháhará kixin ntá chrókjuachará kjónté chrókjuasóterá éxi tjasóteni jeheni.

⁷ Na mé ó noheni kixin chaxín ntoá tinkachónkirá Ìnchéni kixin ó noheni kixin jnkokón tjejtjasóteni kaín ni ntá kjaxin jnkokón sinchechéhe Dios tí jeheni kaín ni.

⁸ Kichóni, tjinkaonni kixin chrókónohará kixin nkexrí imá kjuasóteni tí k'uejóni tí estado Asia. Imá náxrjónhya kjuasóteni la chrókjuaachyani, la k'uitjáyenhenni tí tjenkayáxinni kixin chrók'uaxrjéxinni ntiha naxá chrók'uejóhónni.

⁹ Ó kónoheni kixin chrók'uenxínni ntiha. Mé xíkaha kónhenni kixin chrókónoexínni kixin tí jehóni la chrókjuaachyani tíha. Náhi. Chrókuínkáchónkini Dios, mé tí nkexro nchexechón chojni tsík'en.

¹⁰ Jehe Dios mé kjuínchekaáni ch'án la ko naxá sinchekaáni ch'án kixin tí nchónhya nkehe chrók'uenxínni. Méxra ó noheni kixin chaxín jehe ch'án sinchekaáni ch'án

¹¹ tí tjínktsaráni tjancheherá Dios kixin tsjínktsani ch'án. A ntá tí tsjé chojni chrókjuaanchehe Dios kixin tsjínktsani ch'án ntá chr'éxin ítsjé chojni tsjanchehe sín ch'án kjuasáyé kixin xíkaha jehe ch'án kjuínktsani ch'án.

Nkekuènte sákjuíhya ch'ín Pablo tí chjasin Corinto

¹² Chéheni kixin noheni kixin ntoá k'uejóni ntihi chjasintajni kjuích'iyehyani chojni, mé xíkaha k'uejókoaráni. Ntá jehya kjuachaxin kuènteni kjuachaxínni xíkaha. Náhi. Kjuachaxin kuènte Dios mé kjuínktsani kixin xíkaha k'uejóni.

¹³ Tió chr'ánhanráni xroon, kjinhyani nkehe chrókiénxinhyará. Náhi. Jehó tí nkehe chrókjujnchekuáxinrá chrókiénxinrá. Tjéchonhan kixin chrókiénxinrá jína.

¹⁴ A ntá ó tinkakiénxinrá ntsí kixin tió tsokjan Ìnchéni Jesús tsocháhará kixin xíkaha kjuakoharáni jeheni la ko kjaxin tsochéheni kixin jahará kuítekáonrá.

¹⁵ Mé xíkaha kjuenkayáxian kixin saoxín chrókjuasántsahará tí jahará kixin chrókócháhará kixin yáya chrókjuasántsahará.

¹⁶ Kjuenkayáxian janhan chrókjuasántsahará saoxín tió sáchrókjuia estado Macedonia la ko chrókjuasántsahará inaá tió chrókjanxian ntiha. Mé xíkaha chrókuínktsarána tió sáchrókjuiyá janhan estado Judea.

¹⁷ ¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó nkehe kjuenkayáxian kixin jnkokoá chróntáxrjan kixin chrókjuasán la ko chrókjuasánhya?

¹⁸ Méxra tjetsjehe Dios kixin xíkaha kjuátgheni tí jahará kixin chrókjuuijini la ko chrókjuijihyani.

¹⁹ Kixin Cristo Jesús mé Xjeen Dios, na mé tí nkexro kjuakoxin ch'ín Silvano la ko ch'ín Timoteo la ko kjuákoxian janhan tí k'uejóni ntiha, mé xíkaha k'uechronka ch'án, kjuích'iyahya ch'án ninkehó. Náhi. Kaín nkehe tjakoni kuènte Cristo la chaxín tíha.

²⁰ Kixin kaín nkehe tsichronka Dios la mé jehe Cristo kjuínchexiteyá ch'án. Mé xíkaha tió tjancheheni Dios kjuasáya la mé ntáchroni "Amén, ó nchoxon" kixin tí kjuachaxin kuènte Cristo Jesús.

²¹ A ntá Dios mé kjuínkítsa ch'án tí jeheni la ko tí jahará kixin kaín ni ntoá chrókuínkáchónkini Cristo la ko jehe ch'án mé kjueyáni ch'án.

²² Kjaxin jehe ch'án tsíjkinčekani ch'án xroye, na mé kjuanjon ch'án Nchakuen ch'án tsochónta asénni senó kixin tsoñoexinni kixin chaxín ts'áyeheni nkehe chr'éxín.

²³ A ntá tí naxa kjuasánhya janhan chjasánrá Corinto éxí kjuenkayáxian la tjetsjehe Dios kixin tjínkakonhya kixin chrókóxakonhanrá tí chrókuéútuáhára tí jahará inaá.

²⁴ Jehya kixin chrókuéútuánhárá kixin nkexrí chrókuínkáchónkirá Inchéni kixin ó nòna kixin ntoá tinkachónkirá ch'án. Ó jehí tjinkaonni chrókuínkítsaráni kixin antsí má chrókócháhárá.

2

¹ Mé xíkaha kjuenkayáxian kixin chrókjuasánhya janhan ntiha inaá tí naxa xrásínrá kjuaníinkaon.

² A ntá tí naxa chrókujuntak'ávára, za ntá nkexro chrókuinčekhána inaá tí chrókuinčekhánahará jahará kixin janhan kjujuntak'ávára?

³ Mé xíkaha ikjian tí xroon chr'anhánrá senó kixin tjínkakonhya chrókjuasán chrókjuínčekókaxonnará inaá. Náhi. Jahará chrókuinčekhánará. Méxra ó nòna kixin tí chrókócháhána janhan ntá chrókócháhárá kaín rá.

⁴ Kjánchó tíó ikjian tí xroon a chr'anhánrá senó la imá kóxakonhen asenná tsjanka kjaxin. Kjánchó jehya kixin ikjian tí xroon a chr'anhánrá kixin chrókujuntak'ávára. Náhi. Ikjian tí xroon chr'anhánrá kixin chrókónoaxínrá kixin imá tjuahará tí jahará.

Ch'in Pablo chrókuinček'itjáyenhen ch'án tí jie kjuasin tí nkexro a

⁵ A ntá tí nkexro kjuínčekaxonna la jehya janhvàn kóxakonna. Náhi. Kaínrá kóxakonhanrá. Kjánchó tjínkakonhya tjetóxin tsoántxran tíha.

⁶ Na mé itsjé tí jahará nixjehérá ch'án kóyakoterá ch'án kixin chrókjuasinhya ch'án jie xíkaha la táhó la ó tjen.

⁷ Ntá jie chrók'uitjáyanhanrá tí jie kjuasin ch'án, chrókuínkítsará ch'án, kixin tí náhi la ts'itjáyanxín ch'án tí kjuanchenihi.

⁸ Méxra xranóahára kixin chrókjuákoxínrá inaá kixin chaxín tjuèhérá ch'án.

⁹ Mé xíkaha senó ikjian xroon chr'anhánrá kuente tí kjuaníinkaon chontará kixin tsoonaxian á chrókuinčekhiteyánará kaín nkehe chrókuéútuánhárá.

¹⁰ A ntá tí sínček'itjáyenhenrá ijnko chojni ihrén jie kjuasin ch'án ntá janhan kjaxian sintak'itjáyanhan ch'án tí jie kjuasin ch'án. Méxra tí chaxín k'ué ihrén jie chrókujuntak'itjáyanhan ijnko chojni la ó kjuixin kjujuntak'itjáyanhan ch'án tí jie a kixin chrók'uejorá jnkojína. Kjaxin xíkaha tjetsjehe Cristo,

¹¹ kixin ntá tí ch'in Tsochren na tsjachahya ch'án tsjachroe ch'án tí jeheni, kixin ó noheni nkexrí ch'ia tí ch'in Jínahya.

Kóxakonhen ch'in Pablo tí kjuák'e ch'án chjasin Troas

¹² A ntá tíó kjuasán tí chjasin Troas chrókjuákua tí tan jína kuente Cristo la antsí xranjon kjuachaxin kixin chrókónhen xra kuente Inchéni.

¹³ Kjánchó náxrjónhya tjen asenná kixin k'uitjahya tí kichó ni Tito. Ntá tuénxín níxjahá tí jehe sín tjejó ntiha ntá sákjuia tí estado Macedonia.

Ntá ó tsjacha sín tsochónta sín kjuachaxin kuente Cristo

¹⁴ Kjuasáyé Dios kixin xráxín jehe ch'án tjínkítsani ch'án ntá tjachani kixin chóntani tí kjuachaxin kuente Cristo Jesús. Ntá kaín nketí sáchrókuini mé tjakoxínni tí tan kuente ch'án éxí ijnko nkehe xraxé náxrjón chrókóxrjínhin kaín xín chojni.

¹⁵ Kaínni la éxí yóhé tí xraxé náxrjón kuente chjincó chrókjuanjon Cristo chrók'uáyéhé Dios kixin tíha mé chrókónoexín tí sín tsaá la ko kjaxin chrókónoexín tí sín ts'itjáyan.

¹⁶ Tí sín ts'itjáyan mé tókaxraxéhé sín éxí ts'énxín sín tí xraxé a. A ntá tí sín tsaá mé tóxrjínhin sín kixin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha?

¹⁷ A ntá jeheni mé xrinčekjijihyani nkexrí níxja itén Dios éxí ch'e nchónhya chojni chrókjuacha sín chichaon. Náhi. Kaín asénni tjakoni itén Dios kixin kjueyáni ch'án sich'eheni Cristo xra, la ko tjetsjehe ch'án tí xra tjejóch'eni.

3

Tí pacto nixin

¹ A ntá xíkaha ntáchroni, zá tjenkayáxínrá kixin kjuankíxinni tsochronkani inaá kixin jína tí jeheni, ó á t'ichjánxín kixin chrókjuijikoni xroon kixin tsoñoaxínrá kixin jína tjakoni? ¿Xá t'ichjánxín kixin chrókjuanchaharáni ijnko xroon tsochrónka kixin jína tjakoni? ¿Xá t'ichjánxín kixin chrókjuanchaharáni ijnko xroon tsochrónka kixin jína tí jeheni éxí ch'e í so sín?

² Náhí. T'ichjánxienhyani nijnko xroon kixin jahará mé éxí yóhé ijnko xroon tsíkjiní xrikoni chróchóxin la ko chrókuinchekuáxin kaín xín chojni tsoñoexín sín kixin jeheni mé ch'eheni Cristo xra.

³ T'ikon sín noxín kixin tí jahará mé éxí yóhé ijnko xroon tsíkjin Ínchéni Cristo xrikoni nchekuáxin chojni. Kjánchó jehya ntáhni tsíkjinxin ch'án. Náhí. Kjuanjon ch'án Nchakuen ch'án tjechón chontará la kjaxin jehya xrotabla tsíkjin ch'án. Náhí. Táha la asén chojni.

⁴ Ntá ó noheni chaxín tíhi kixin tinkáchónkini Dios kixin tjinkitsani Cristo.

⁵ Jehya kixin ó jehí chróchóntani kjuachaxin kixin chrókuich'eni xra. Náhí. Kaín tí xra ch'eni na Dios tjetjanjon kjuachaxin.

⁶ Jehé ch'án mé kjuanjon ch'án kjuachaxin kixin chrókuich'eheni ch'án xra tsochenkani chojni tí tan nixin kui. Tíha jehya ijnko nkehe tsíkjin chojni chrókuinchexiteyéheni. Náhí. Tíha mé kjuachaxin kjuanjon Nchakuen Dios kixin sinchexiteyéheni ch'án. Kixin tí ley ntáchro kixin its'en chojni. Kjánchó tí Nchakuen Dios la mé tjanjon kjuachón.

⁷ Tí ley tsík'óna letra xrotabla mé imá kuikao t'inkaséyan la mé kjuachahya tí sín israelita chrókomá sín ikon ch'ín Moisés kixin imá tjákiní tsjehe ikon ch'án.* Kjánchó tí t'inkaséyan kjuankixin ó tinkák'anka. Méxra tí xikaha tí ley tjanjon kjuach'én mé kuikao ijnko t'inkaséyan imá náxrjón.

⁸ Já chrókójehya kixin antsí má t'inkaséyan kuikao tí tan nixin kuixin kjuachaxin Nchakuen Dios?

⁹ Méxra xikaha tí ley k'uéchónta kjuachaxin jié kjónté ntáchro kixin its'en chojni, a ntá antsí má jina tí tan chrónka Dios kixin tsojtúaxin tí jie chóntani.

¹⁰ Méxra tí kjuachaxin k'uéchónta tí ley k'uék'etóan ósé la ninkehó tóyóghya tí kjuachaxin jié tjen jie.

¹¹ A ntá tí k'uéchónta kjuachaxin tí nkehe séhyó ntá tinkákjeje, a ntá antsí má chóna kjuachaxin tí nkehe tsjak'e jnkochríxin.

¹² Mé xikaha tí nkehe tsjejehya tjejóchónhenni ntá chrakonhyani chronkaxinni kaín tíha.

¹³ Ch'ehyani éxí kjuich'e ch'ín Moisés k'uikjèxin ch'án ka ikon ch'án kixin tsoñoehya tí sín israelita kixin ó tinkákjeje tí t'inkaséyan chóna ch'án.

¹⁴ Kjánchó jehé sín naxa kienxínhya sín la ko naxa xikaha tjejó sín ijie tíó nchekuáxin sín tí nkehe k'uítuénhen sín ósé kixin tí ka naxa t'inkákonhen tí chrókiénxín sín kixin naxa kjuinhyá tí ka. A ntá tí chrókuinkáchónki sín Cristo la ntá jehé ch'án chrókujuatsen tí ka a.

¹⁵ A ntá kjónté jie tíó nchekuáxin sín tí xroon tsíkjin ch'ín Moisés la tjejó sín éxí naxa t'inkákonhen tí ka a kixin tienxínhya sín.

¹⁶ A ntá tíó ijnko chojni tsjankixin tsinkáchónki Ínchéni ntá tí ka t'inkákonhen la tsjin.

¹⁷ A ntá Ínchéni mé Nchakuen Dios tíha. A ntá tí tjen Nchakuen kuénte Ínchéni Dios la ntiha kohya nkehe ts'inkákonhen.

¹⁸ A ntá jeheni kaín ní kohya nkehe t'inkákonhen ikonni la mé tjejóni éxí xrosenta tjákiní tí kjuachaxin kuénte Ínchéni, na mé tinkák'ixitóxin tí kjuaxrexinkaon kuénténi kixin antsí chrókóyógheni éxí tí jehé ch'án kixin antsí tsochóntani tí kjuachaxin kuénte ch'án, kixin Ínchéni, na tí Nchakuen a, mé xikaha ch'e xra.

4

¹ Méxra xikaha chrókóxrjéhyani chrókuich'eni tí xra kjuanjon Dios kixin jehé ch'án kuikonógheni ch'án.

² Ó kuítógheni kaín nkehe imó la ko kaín nkehe chrókósuèxinni, la ko ch'iyehyani kichó ní, la ko tjitoxienhyani itén Dios. Náhí. Jehí tí nkehe ntoá chrónkani. A ntá xikaha chrókónoexín kaín xín chojni kixin ntoá tjejóni éxí tjinkaon Dios.

³ A ntá jeheni mé tjakoni tí itan tsaáxinni, kjánchó iso sín kjónté xikaha tinhin sín mé tienxínhya sín kixin xráxin jehé sín la ts'itjayan sín.

⁴ A ntá jehé sín kuitekakonhya sín, a ntá tí dios kuénte chjasintajni mé kjuínchek'ikonhya sín kixin chrókiénxínhya sín, kixin ntá chrók'uikonhya sín tí t'inkaséyan kuénte tí tan kuénte Cristo, mé tí nkexo chóna kjuachaxin, a ntá jehé ch'án la mé yóhé éxí tsjehe Dios.

⁵ Tíó tjakoni na mé jehya tjakoni kixin jeheni chrókuitekáonrá. Náhí. Chronkaxinni kixin chrókuitekáonrá Jesucristo mé Ínchéni la ko chrónkani kixin jeheni mé t'aharáni xra tsjinkitsani tí jahará kixin tjuahará Jesús.

⁶ Na mé jehé Dios k'uetoan kixin tí xrohi ts'inkaséyanxín tí sítié a na mé kjaxin jehé ch'án kjuanjon ch'án xrohi ts'inkaséyanxín nkaya asénni kixin chrókuachani chrókónoheni nkexrí tjen tí kjuachaxin jié kuénte Dios t'inkaséyanxín Ínchéni Jesucristo.

Nkexrí chrók'uejóni kixin tinkáchónkini Ínchéni

* 3:7 Éxodo 34.29-35

⁷ A ntá tí cuerpo kuènteni la yóhe ijnko ch̄i tsik'óna nchetje tjinká nkehe tjete, mé xikaha ts'ikon sín kixin tí kjuachaxin jié chóntani la kuix̄in tí tjen Dios kixin jehya kuènteni tíha.

⁸ Chóntani nchónhya kjuaxikaon la kjónté tsjachahya tí kjuaxikaon a. Imá tóxakonhenni la kjónté títoehyani tinkáchónkini ch'án.

⁹ Kjónté chónkíhi sín tí jeheni kjánchó Dios la kuítóehya ch'án tí jeheni. Kjónté k'uékoni kjuítsínkani kjánchó kjuínchek'itjáyanyani sín.

¹⁰ Kjónté nketí sájtini xráxin chrók'uenxínni éxi k'uénxin Ìnchéni Jesús, kixin xikaha tjakox̄inni tí kjuachón chóna ch'án.

¹¹ Méxra jeheni naxa tjejóchónni la xráxin síin kjuaxikaon kixin chrók'uenxínni kixin tinkáchónkini Jesús kixin kjáxin xikaha chrókjuakox̄inni tí kjuachón chóna ch'án kjónté chrók'uen tí cuerpo chóntani.

¹² Kjónté xikaha chrók'uenxínni, a ntá jahará tsochontará kjuachón.

¹³ Éxi ntáchro tí xroon itén Dios tsikjin sín ósé kixin: “Kuítékavan ntá xikaha xrxanka.”* A ntá kjáxin jeheni kuítékaooni ntá xikaha chrónkani.

¹⁴ A ntá ó noheni kixin Dios mé tí nkexro kjuínchexechón tí Ìnchéni Jesús kjáxin sinchexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjáxinrá tí tjen Dios.

¹⁵ Kaín tíha kónhen kixin jahará jina chrók'uejox̄inrá. La ko kjáxin xikaha nchónhyará chrók'uayéhérá tí kjuasáyé Dios, ntá antsí tsjé chojni ts'ejóni tsjancheheni Dios kjuasáyé kixin tí kjuachaxin jié chóna ch'án.

¹⁶ Méxra chrókóxrjéhyani kjónté tinkákjeje tí cuerpo chóntani kixin ó noheni kixin jnkojnko yaon Ìnchéni mé tjenchek'ánkí ch'án tí kjuaxrexinkaon kuénténi.

¹⁷ A ntá tí nkehe tjasótéxínni tí tjejóni ntíhi jie mé tíha la tjoka ts'atsínka la ts'áyèxinni ijnko nkehe imá jié la ko í tsjejehya tíha.

¹⁸ Ntá chrókomáhyani tí nkehe síin chjasintajni ntíhyó. Náhi. Chrókjuéyáni tí nkehe naxa t'ikonhyéni kixin tí nkehe t'ikonxínni ikonni na mé nkehe chóxin tsjeje. A ntá tí nkehe t'ikonhyani mé nkehe tsjejehya.

5

¹ A ntá ó noheni kixin tío tsjeje tí cuerpo chóntani na mé yóhe éxi ijnko nchia tjoka tsjeje, a ntá Dios mé kjuích'éna jnkojnko nchia n̄xin ts'itjáyanyani jnkochrix̄in nkaya nkajni kixin jehya tjá chojni kjuích'énaxin tíha.

² Tí naxa chóntani cuerpoéni ntíhi la náxrxónhya tjejóni tjinkaonni tí ókjé cuerpo tsochóntani nkaya nkajni

³ kixin táha ts'inkáyani éxi ijnko ka, ntá xitjahya chrókótjóchínni.

⁴ Tí naxa tjejóchónxinni tí cuerpo chóntani jie la náxrxónhya tjejóni tjasóteni. Tjinkakonhyani xikahó chrókuítokoni tí cuerpoéni ntáxin, na mé tjinkaonni kixin tí cuerpoéni ntáxin chrókónix̄in ó. Ntá chrók'uitjáyán tí chrók'uenxínni la ntá chrókuakjani tí kjuachón n̄xin.

⁵ Dios mé kjuenkayáxin ch'án kixin xikaha sinchekit̄onhenni ch'án ntá kjuínchekit̄onhenni ch'án tí Nchakuen ch'án kixin ntá chrókónoexínni kixin chax̄in ts'áyéheñi tí nkehe tsjanjon ch'án.

⁶ Mé xikaha xráxin ó noheni kixin tí naxa tjejóni ntíhi naxa chóntani cuerpoéni ntá naxa tjejókohyani Ìnchéni.

⁷ A ntá jeheni tjejóni tinkáchónkini ch'án kjónté t'ikonhyani ch'án.

⁸ Kjánchó jeheni na imá chéheñi tjinkaonni chrókuítogheni tí cuerpoéni chóntani jie kixin sáchrókjuíni tí tjen Ìnchéni, chrók'uejókoni ch'án ntíha.

⁹ Méxra xikaha tjinkaonni chrókjuinchechéheñi Ìnchéni kjónté naxa chróchóntani cuerpoéni ntíhi la o í chróchóntahyani, la naxa chrókuinkáchónkini ch'án.

¹⁰ Kixin kaín ni t'ichjānxin tsochjineheni Cristo tí tjen ch'án t'etoan ch'án kixin nkehe ts'áyéheñi jnkojnkoni kixin nkerí xra kjuích'eni á jina o náhi tí naxa k'uéchóntani cuerpoéni ntíhi chjasintajni.

Tí tan tjanjon kjuaxróxin

¹¹ Méxra xikaha noheni chróchrakoghenni tí kjuachaxin jié kuènte Ìnchéni ntá tóxakonhenni tjakoghēni chojni kixin chrókuinkáchónki sín ch'án. Ó nohe Dios kixin nkexrí tjejóni la ko tjinkaonni kixin kjáxinrá chrókónohará.

¹² Jehya kixin chrótjonkará inaá kixin jina ch'eni xra. Náhi. Jehí ntáchroni kixin síin nkehe chrókóchāxinrá kixin tí jeheni ntoá chrónkani kixin chrókónohará nkexrí chrókjuátēherá tí sín imá nchehnke sín kixin imá náxrxón nixja sín a ntá xraxinkakonhya sín tí jie chóna asén sín.

* 4:13 Salmo 116.10

¹³ A ntá tí lóconi na mé tíha káxin tjinkaonni chrókjuich'eheni Dios xra. A ntá tí jehya lóco tí jeheni la mé jehí tjinkaonni chrókjuinkítsani tí jahará.

¹⁴ Káxin Cristo la imá tjuèhe kaín xín chojni ntá t'etuenhenni ch'án káxin ó noheni jína káxin jehó ch'án k'uenyákonhenni ch'án tí ijíeni kaín ni káxin éxi kjaxinni ik'uénni kaín ni káxin jehé ch'án k'uenyákonhenni ch'án.

¹⁵ Mé xíkaha Cristo mé k'uenyákonhèn ch'án kaín ni. Na ntá jeheni tjejóchónni mé tjejóchónxinni ch'án la jehya tí kjuaxrexinkaon kuènteni chrókjuinchexiteyéhèni. Náhi. Chrókjuinchexiteyéhèni ch'án káxin k'uenyákonhenni ch'án la ko xechón ch'án inaá káxin tsaáxinni ch'án.

¹⁶ A ntá jie jeheni tjenkayáxinhyani éxi tjenkayáxin chojni chjasintajni ó. Kjánchó senó k'uéchóxinni Cristo káxin nkexrí kjuák'e ch'án chjasintajni ó, a ntá jie la xíkaha t'ikonni ch'án.

¹⁷ Méxra tí nkexro tinkáchónki Cristo mé k'óna ijnko chojni nixin. A ntá kaín nkehe ntaxin la ó kjuixin k'uáínska la ntá jie la kaín nkehe ó k'óna nixin.

¹⁸ Kaín tíha mé tí xra kjuích'e Dios. Jehé ch'án mé kjuanjon ch'án kjuaxróxin káxin jína chrók'uejókoni ch'án káxin k'uenyákonhenni Cristo. Ntá jie jeheni k'uáyéhèni tí xra tsochénkani í so chojni káxin kjuaxróxin chrók'uejóko sín ch'án.

¹⁹ A ntá ó noheni káxin Dios ichr'án Cristo k'uenyákonhenni ch'án, ntá xíkaha Dios tjinkaon káxin kjuaxróxin chrók'uejóko ch'án tí sín chjasintajni, la ko jehé ch'án tahya ch'án kuentá kaín tí jie chóna chojni, a ntá jeheni k'uáyéhèni tí xra tsjakoni itén ch'án.

²⁰ Ntá jeheni kjuachaxin kuènte Cristo chronkaxinni káxin Dios chrónóaxinrá ch'án tí jeheni. Mé xíkaha tí kjuachaxin kuènte Cristo chrónóaxinráni káxin kjuaxróxin chrók'uejokoará Dios.

²¹ A ntá Cristo la ninkehó jie kjuasinhya ch'án, ntá ijíeni k'uénxin ch'án. Kjánchó Dios k'uíkón káxin éxi tí jehé Cristo chóna ch'án jie, kjuenkayákonhèn ch'án kaín tí jie k'uéchóntani.

6

¹ Ntá kaín ni jnkokóá ch'eheni Dios xra, ntá chrónóaharáni káxin chrókuítóéhyará tí kjuasáyé Dios kjuakuaxinrá ch'án.

² Káxin ntáchro xroon itén Dios káxin:

A ntá tí yaon kóxrjínhìn Dios kuínhin ch'án tí nkehe chronóa chojni;

Tí yaon tsaáxin chojni mé kjuínkítsa ch'án tí jehé sín.*

A ntá jie ó kui tí yaon kjuéyá Dios. A ntá jie ó kui tí yaon tsaáxin chojni.

³ Ch'ehyani ninkehó nkehe jínahya káxin ntá chrók'uántaxínhìn sín tí xra tjejóch'eni.

⁴ Náhi. Kaín nkehe ch'eni tjákoxinni káxin ch'eheni Dios xra. Na mé tjachani tónínkakohyani kjónté nchónhya nkehe tjasótéxinni, la kjónté ichrén nkehe t'ichjánxínhinni, la kjónté ichrén kjuaxikaon sín.

⁵ Na mé k'uékoni, la k'uéjóchjinani, la nchónhya k'uixite chojni kónínkakohenni sín, la ko tí xra kjuích'eni la imá xra. Kjaxin k'uájuahyani la ko kjónehyani.

⁶ Tjákoxinni káxin tjóá tjenkayáxinni, la ko tjákoxinni káxin ó noheni tí nkehe chaxín, la ko tjákoxinni káxin tónínkakohyani, la ko tjákoxinni káxin ch'eni tí jína. La ko chóntani Nchakun Dios, la ko kaín asénni tjuèhèni kíchó ní,

⁷ la ko chrónkani tí tan ntoá kuènte Dios, la ko tjákoxinni káxin chóntani tí kjuachaxin kuènte ch'án. Ntoá tjejóni ntá xíkaha tsjachani ntá kohya nkehe tsonhenni.

⁸ Iso sín náxrjón nixjehé sín tí jeheni la ko iso sín náxrjónhya nixjehèni sín, la ko iso sín jína nixja sín nkexrí tjejóni la ko iso sín t'ántaxínhinni sín. Iso sín t'ikon sín tí jeheni éxi chojni ch'á la ko iso sín ntáchro sín káxin jeheni chojni ntoá chrónka.

⁹ Iso sín ntáchro sín káxin chónhya sín tí jeheni kjónté chóxinni sín. Iso sín tjinkaon chrók'óyánni sín la kjónté naxa tjejóchónni. Kjuateni sín na kjónté k'óyanhyani sín.

¹⁰ T'ávani la kjónté xraxinkaonni káxin Ínchéni t'ayakonhenni la chéheni. Éxi nóani jeheni na kjónté chénkani itsjé chojni tí itén Dios tsaáxin sín éxi chróchjéheni sín ijnko nkehe imá tjete xíkaha. Éxi chóntahyani ninkehó nkehe la kjónté la kaín nkehe chóntani.

¹¹ Kíchóni tjejórá chjasin Corinto, ntoá chrónkani nixjaharáni la ninkehó t'ayaharáni la mé kaín asénni tjuahará.

¹² Jehya jeheni chrók'uitjáyan káxin chrótkuahará. Náhi. Jahóra t'itjáyan káxin chrótkuèhérá tí jeheni.

¹³ Janhan xrjanóahará éxi ijnko it'é xjan chrónóehé tí xjeen ch'án káxin kjaxinrá kaín asánrá chrótkuèhérá tí jeheni éxi tjuèhèni tí jahará.

Jeheni mé éxi njnkoqe Dios tjechón

* 6:2 Isaias 49.8

¹⁴ Chrók'uitoohyará tí sín tinkáchónkihya Ìnchéni kixin tíha mé éxí yóhë ijnko yunta, jnkokónhya koxinta. ¿La ko nkexrí chrókóyóhë ijnko chojni ó kótjóá la ko ijnko chojni naxa náhi? ¿La ko nkexrí chrókóyóhë tí t'ínkáséyan la ko tí sítíé?

¹⁵ Xitjahya chrók'uixin kjuaxróxin tí tjen Cristo la ko tí Tsochren. Xitjahya ts'ejóko kichó ijnko chojni tinkáchónki Cristo la ko ijnko chojni tinkáchónkihya.

¹⁶ Xitjahya chrók'uito tí nínkqe Dios la ko tí nkehe tsíkjanöya. Kixin jeheni mé tí nínkqe Dios tjechón, kixin jehe ch'án tsíntácho ch'án kixin:

Ntaha tsjak'é la ko xritjak'é tí tjejó tí jehe sín,
 a ntá janhan mé ts'óna Dios kuènte sín
 la ko jehe sín mé ts'óna chjasin kuèntana.†

¹⁷ Méxra xíkaha kjaxin ntácho Ìnchéni kixin:
 T'axrjekjanxinrá tí jehe sín na ókjé tjejórá;
 tsehyará tí nkehe tjuáhya.

A ntá janhan mé ts'ayáha tí jahará.‡

¹⁸ Ntá janhan mé ts'óna It'ará,
 a ntá jahará ts'ónará xjanna ntoa la ko xjanna chjin,
 ichro Ìnchéni Dios chóna kaín kjuachaxin.§

7

¹ Mé xixaha kichó ni, tí nkehe i mé tsíntácho Dios tsjanjon ch'án. Méxra t'ichjánxin kixin tjóá chrók'uejóni, chrókuítóhëni kaín nkehe chrókjuinchekjita tí cuérpóeni la ko tí asënni. Ntá chrókóxakonhëni chróchrakónhëni Dios la t'ichjánxin chrókjuanchehëni ch'án chrókjuinchetjóáni ch'án kixin jehó ch'án chrókuinkáchónkini.

Tí sín Corinto kjuitoxínhin sín ntje sín

² Chrókjuánjonrá kjuachaxin kaín asánrá chrókuinhínrá tí nkehe chróchronkani. Nínkehó jie chóntehyani nínkexró, la ko kjuích'iyehyani nínkexró.

³ Jehya ntáchroni tíhi kixin chrókuékará jie. Náhi. Ó nohará kixin ósé chrónkani kixin kaín asënni tjehehëni tí jahará kixin jnkokóá chrók'uejóni la ko jnkokóá chrók'uenni.

⁴ Janhan la imá tjikosáyahará tí jahará la ko imá chàna kixin jina tjejórá. Kjónté kaín nkexrí tjejórtjasóteni na imá chàna.

⁵ A ntá tíó kjuíjini estado Macedonia la xitjahya chrók'ok'éhëni kixin nkuíxín síin chojni nínkakonhëni la ko kóxakonhëni asënni.

⁶ Kjánchó Dios na mé tí nkexro nchechéhe asén kaín tí sín tsíkóxrxé mé kjuínchechéhe ch'án asënni kixin ó kjuíji ch'ín Tito.

⁷ Ntá jehya kixin tí kjuíji ch'án ó chrókóchéxinni. Náhi. Chéhëni kixin jahará kjuínchechéhérá ch'án. Chrónka ch'án kixin imá tjínkáonrá chrók'uíkonrá tí janhan la ko chrónka ch'án kixin tóxakonhanrá kixin tí jie kjuásinrá la ko kjaxin tóxakonhanrá chrókjuich'erá tí nkehe kuétuánhanrá. Mé kuínhan kaín tíha ntá ántsi má kóchéna.

⁸ Kjuíntak'ávára kixin tí xroon kjian chr'anhánrá la kjónté la ntá jie í tóxakonnahya. Na mé senó kóxakonna ntá k'uíkuñ kixin tí xroon kjuíntaxakonhanrá kjánchó kánhyó isé tíha.

⁹ Ntá jie chàna, kjánchó jehya kixin tí nkehe kjuíntak'ávára. Náhi. Chàna kixin tí kjuat'áva a ntá ikjanrá kuinkachónkirá Dios. Kjuachará kjónté tí kjuat'áva ntá kjanrá kuinkachónkirá Dios la kóxrxínhin ch'án. Méxra xíkaha jeheni la nínkehó nkehe jínahya kjuít'aharáni.

¹⁰ A ntá tí kjuat'áva kjuacha chojni ntá sinchechéhe sín Dios kixin kjuítoxínhin sín tí nkehe tjenkayáxin sín la ntá xíkaha mé tsaáxin sín ntá í ts'áváhya sín chr'ëxín. A ntá tí sín kuítóehya tí nkehe kuènte chjasintajni mé t'áva sín kixin táhó ts'enxin sín.

¹¹ A ntá jahará kjuachará k'uaátsínkará tí kjuat'áva éxí kóxrxínhin Dios, a ntá jie kónohará kixin jina tjejórá, la ó ntoá tjenkayáxinrá, ntá jie chrónkaxínrá nkexrí k'ueékjich'erá. Tí nkehe kuinhínrá ntá kjuínchechónínkaonrá la ko kjaxin kjuínchechrakonrá. Ntá chr'ëxín ntá tjínkáonrá chrók'uíkonrá tí janhan. Ntá kjuínchechjasóterá tí nkexro kjuasin jie. Kaín tíha kjuákoxinrá kixin chontahyará nínkehó jie tí nkehe tsíkónhen.

¹² A ntá tí nkehe kjian la jehya kixin kjuenkayáxian janhan kuènte tí ch'ín kjuasin jie, la ko jehya kixin kjuenkayáxian janhan kuènte tí ch'ín k'uává ó. Náhi. Íchá jina kixin jahará chrókjuákoxinrá nkayakon Dios kixin imá tóxakonhanrá kixin jeheni xíkaha k'ueótanni.

¹³ Mé xíkaha kjuích'erá ntá kóchéhëni.

Kjánchó ántsi má kóchéhëni kixin k'uíkonni kixin kóchéhé ch'ín Tito kixin jahará kaín rá kjuínktsará kixin kjuaxróxin kjuák'e ch'án ntiha.

¹⁴ Janhan k'uetjanka tí ch'ín Tito kixin chàna kixin tí jahará la jehya kjuach'ia tíha la kósuànaha. Náhi. Kaín nkehe k'uetjonkará la chaxín la ko kjaxin kaín nkehe k'uentátjan ch'ín Tito la chaxín kixin chéheni kixin kuítekáonrá.

¹⁵ A ntá jie antsí tjuahará ch'án kixin xráxinkaon ch'án kixin nkexrí jina kuítekáonrá la ko nkexrí imá kjuikosáyehérá ch'án kjuánjonrá kjuachaxin kuítóhe ch'án ntiha.

¹⁶ Ntá imá chàna kixin ó nòna kixin jahará sjnchexiteyànará.

8

Antsi má chrókuinkitsa sín kichó sín

¹ Ntá jie kichó ní, tjinkaonni chrókónohará kixin nkexrí tí sín tinkáchónki Ìnchéni tójnoktsé sín estado Macedonia kjuakoxin sín nkexrí tí kjuasáyé Dios.

² Kjonté nchónhya nkehe tsikónhen sín la kjonté la kóchéhe sín; la ko kjonté nòa sín la antsí má kjuinkitsa sín tí sín í so éxi chojni chóntha itsjé chichaon xikaha kjuich'e sín.

³ Chaxín k'uukuán kixin kjuanjon sín éxi tí nkehe chóntha sín la ko antsí má xikjanjon sín inaá kixin xikaha kjuenkayáxin sín.

⁴ Nchónhya chrónóhehe sín tí jeheni kixin chrókjuanjonni kjuachaxin kixin chrókjuinkitsa sín tí sín kichó ní tinkáchónki Dios.

⁵ Na mé antsí má kjuanjon sín la xikahya kjuenkayáxinni kixin xikaha chrókjuanjon sín, na mé senó kuinkáchónki sín Ìnchéni, ntá kjuixin ntá kjuinchesteyéhe sín tí jeheni éxi tóxrjínhin Dios.

⁶ Méxra chrónóhehe ní ch'ín Tito kixin chrókjuenájín ch'án chichaon tí tójnoktsérá ntiha éxi kjuankixin ch'án senó.

⁷ A ntá jahará la tjákoxinrá jina kixin antsí tinkachónkirá Ìnchéni, la ko antsí k'uitjará chrónkaxínrá itén Dios, la ko antsí k'uitjará nkehe kuente Dios, la ko antsí chontará kjuachéhe, la ko antsí tjuèhéra tí jeheni. Méxra xikaha antsí chrókjuákoxinrá tí xra jina chrókjuinkitsará tí sín kichó ní.

⁸ Jehya ntáxrjan tíhi kixin chrókuétuanhanrá xikaha. Náhi. Jehí tjínkavan chrókónohará nkexrí jina kjuich'e ní í so sín kixin kjaxínrá chrókjuákoxinrá kixin tjuèhéra kichuárá.

⁹ Kixin ó nohará nkexrí tí kjuasáyé Ìnchéni Jesucristo kixin k'uéríko ch'án la ntá kónòa ch'án kixin imá tjuèhe ch'án tí jahará kixin tí kónóaxin ch'án mé jahará kórikóxinrá.

¹⁰ Méxra tsotjonkará tí nkehe tjenkayáxian janhan kuente tí xra í kixin jahará tí nánó k'uátsínka kjuankixinrá kjuinkitsará kjuánjonrá nkehe, la mé jehya kixin ó jehí kjuinkitsará sín. Náhi. Kjaxin imá kócháhará kixin kjuinkitsará sín.

¹¹ A ntá jie chrókjuintaxin chrókjuánjonrá éxi tí chrókjuachará chrókjuánjonrá éxi xrankixixin tsíkateherá tsjinkitsará tsjánjonrá nkehe.

¹² Mé xikaha tí chaxín tjinkaon jnkojin chojni chrókjuanjon sín nkehe, ntá tsoxrjínhin Dios tí tjanjon sín tí nkehe chóntha sín. Dios la tjanahya ch'án tí nkehe chóntahya chojni.

¹³ Jehya kixin xikaha tí í so sín chrók'uejé sín jina kixin tí nkehe kjuinkitsará sín la ntá jahará chrók'uitjayan nkehe t'ichjánxinhanrá. Náhi.

¹⁴ Chrókójina chrókóyóhe chróchontará nkehe jnkokón. A ntá jie jahará chontará tí nkehe chóntahya tí í so sín. A ntá í jnko yaon jehe sín tsochóntha sín tí nkehe tsochontahyará. Chrókjuinkitsará tí sín chóntahya kixin chróchontará nkehe jnkokón.

¹⁵ Éxi ntáchro xroon itén Dios kixin: "Tí sín kjuenájín sín nchónhya la mé xèhya sín ninkehó, la ko tí sín kjuenájín sín tsjèhya na mé kjonté tsjèhya la kjuacha tí nkehe kuicháxinhin kjuenájín sín."*

Ch'ín Tito la ko tí sín k'uájiko ch'án

¹⁶ A ntá kjuasáyé Dios kixin kjuinchestaxinkaon ch'án tí ch'ín Tito ntá kóxakonhen ch'án éxi tóxakonna kixin tí jahará.

¹⁷ Ntá kóxrjínhin ch'án tí nkehe k'uetuèhenni ch'án, la ntá kjaxin jehe ch'án kóxakonhen ch'án kixin á jina tjejorá, ntá jehe ch'án tjínkaon ch'án chrókjuijitsjehe ch'án tí jahará.

¹⁸ Kjaxin k'uetqanni sátsjikotoxin tí ch'ín Tito í jnko kichó ní, na mé kaín chjasin tí sín tinkáchónki Ìnchéni mé chóxin sín ch'án kixin tí xra jina tjehe ch'án tjako ch'án tí tan tsaáxinini.

¹⁹ La ko kjaxin tí sín kaín tí njnko ntihi kjuéyá sín tí nkexro kichó ní kixin sátsjikotoxin ch'án tí jeheni tí xra sátsjikoni tí chichaon tsjikèhenni tí sín nòa. Na mé tí xra ch'eni kixin xikaha tsjikosáyeheni Ìnchéni la ko xikaha tjákoxinni kixin tjinkaonni chrókjuinkitsani sín.

²⁰ Tjinkaonni kixin tsqohya nkexro chrók'uántaxínhinni kixin tí chichaon xrenájín kjuújikoni.

* 8:15 Éxodo 16.18

²¹ Méxra tjincaonni chrókuich'eni tí nkehe ntoá, jehya jehó tí nkehe chrókóxrjnhin Ìnchéni. Náhí. Kjaxin tjincaonni kixin chrók'uikon chojni kixin jina tjejóch'eni.

²² La ko kjaxin k'uetuenhenni sín sátsjikotoxin sín í jnko kichó ni, na mé ijnko nkexro nchónhya nkexrí kjuakoxin ch'án kixin chéhe ch'án chrókuínkítsa ch'án kixin itsjé xra kjuich'e ch'án. A ntá jie antsí má chrókuich'e ch'án xra kixin chóxin ch'án tí jahará.

²³ A ntá jnkojin sín tsjanhankí sín kixin nkehe tí xra ch'e ch'ín Tito la mé chenkará sín kixin jehe ch'án mé tjinkítsa ch'án tí janhan kixin xikaha tjinkítsa ch'án tí jahará. A ntá tí tsjanhankí sín kixin nkehe tí xra ch'e tí í so kichó ni ntá chenkará sín kixin tí sín kaín njnko k'uetoan sín kixin sátsji sín ntíha kixin mé xikaha tsjikosáyehe sín Cristo.

²⁴ Méxra chrókuákoxinrá kixin chaxin tjuéhérá kichuárá kixin tsongohe tí sín kichó ni í so njnko la ko kjaxin tsongohe sín kixin chaxin chéheni kixin tí jahará.

9

Tí chichaon xrenájin tsjinkítsa tí sín kichó ni

¹ A ntá tí xrenájin chichaon kixin tsjinkítsará tí sín kichó ni tinkáchónki Ìnchéni, la t'ichjánxjenhya tsokjian xroon tsochr'anhánrá

² kixin xráxin kónona kixin jahará tjinkáonrá chrókuínkítsará, na mé xikaha chàna la tjanka tí sín tjejó estado Macedonia kixin jahará chojni estado Acaya desde tí nánó k'uátsinka xráxin tjejórá tjinkáonrá chrókuínkítsará. A ntá antsí tsjé sín estado Macedonia tjincaon sín chrókuínkítsa sín kixin jahará xikaha kjuákoxinrá nkexrí tjinkáonrá chrókuínkítsará.

³ A ntá ichr'an tí sín kichó ni kixin tjinkávan kixin tsontáchrohya sín kixin chaxinhya tí nkehe jina ntátjan sín senó. Mé xikaha jahará chrókóyaxinhanrá chrókuínkítsará tí sín kichó ni éxi ntátjan sín senó.

⁴ Kixin tí chrókjuasánkian iso tí sín Macedonia ntá tí chrókónoxin kixin naxa kohya nkehe tsjánjonrá ntá chrókósuéhéni tí jeheni kixin imá chóxinni kichó ni la ko kjá chrókósuàhará kjaxinrá.

⁵ Méxra xikaha tóna kixin t'ichjánxin tsontátjan tí sín kichó ni kixin sátsji sín tsitónxin sín ntía tsjijitsjehe sín tí jahará senó tsjinkítsa sín kixin tsjenájinrá tí chichaon tsintáchorá senó kixin chrókuánjonrá. A ntá chrókóyaxinhanrá kixin chrókuánjonrá tí chichaon éxi ijnko nkehe chaxin tjinkáonrá chrókuánjonrá la jehya éxi ijnko nkehe chrókjuanchaharáni afuerza.

⁶ Xráxinkáonrá kixin tí nkexro k'uenka tsjéhya na mé tsjéhya tsotjá. A ntá tí nkexro k'uenka itsjé mé tsotjá itsjé.

⁷ Méxra jnkojnko chojni chrókjuanjon tí nkehe kjuenkayáxixin sín asén sín. Na mé tjinkakonhya Dios kixin kénhya asénni chróchjéheni ch'án nkehe, kixin Dios mé tjuèhe ch'án tí nkexro chéhe tjanjon nkehe.

⁸ A ntá Dios chóna kaín kjuachaxin jíé ntá tsotjáhará ch'án kaín nkehe t'ichjánxinhanrá kixin tsochontará nkehe tsochjehérá í so chojni chónahya kixin xikaha s'ich'erá kaín xra jina.

⁹ Éxi ntáchro tí xroon itén Dios kixin:

Tí nkexro t'óxikáyehe ch'án itsjé nkehe nchekítõnhen ch'án tí sín nõa

na mé nunca tsjejehya tí xra jina ch'e ch'án.*

¹⁰ Dios mé tjanjon noatje kixin ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxinhanrá la ko jehe ch'án sinchek'ánkí ch'án tí nkehe ts'énkará la ko jehe ch'án sinchek'ánkí ch'án tí xra jina tjejóch'erá.

¹¹ A ntá tsochontará kaín nkehe tjeje kixin ntá antsí tsjachará tsjinkítsará tí í so sín kichó ni. A ntá xikaha tsjijikenhenni sín tí nkehe tsochjehérá tí sín kichó ni ntá tsjanchehe sín Dios kjuasáya.

¹² Kixin xikaha chrókuínkítsará tí sín kichó ni na jehya kixin chrók'uáyéhe sín tí nkehe t'ichjánxinhin sín ó, la mé kjaxin chróchjéhe sín Dios kjuasáya.

¹³ Mé xikaha tsjanchehe sín Dios kjuasáya kixin tí nkehe kjuánjonrá kjuákoxinrá kixin nchexiteyéherá tí tan kuente Cristo. Kjaxin tsjikosáyehe sín Dios kixin tí í so nkehe kjuánjonrá k'uáyéhe sín la ko tí nkehe k'uáyéhe í so chojni.

¹⁴ La ko jehe sín tsjanchehe sín Dios kixin tsjinkítsa ch'án tí jahará kixin jehe sín tjuahará sín kixin t'ikon sín kixin tjákoxinrá kixin tí kjuasáyé Dios chontará.

¹⁵ Tjancheheni Dios kjuasáya kixin kjuínchekítõnhenni ch'án ijnko nkehe imá jíé tsaáxinni la tsjachahyani tsochronkaxinni kaín tíha.

10

Kjuachaxin chóna ch'ín Pablo kixin tsík'óna ch'án apóstol

* 9:9 Salmo 112.9

¹ Janhan Pablo tió xrjanóghará nkehe la jnkojína xrjanóghará la mé tjáqoxian éxi toxrjínhin Cristo. Ntáchrorá kixin tió tjèn tí tjejorá ntiha la tósuàna, a ntá tí kjin tjèn la imá jiena, ichrorá.

² Méxra xrjanóghará kixin tí tsjasántsahará tjínkakhonhya kixin chrókuinjchekóninkáonráni kixin ntá tsonínkakhonhánrá jnkojínrá kixin tsékaráni jie kixin ixria éxi chojni chjasintajni ó, tsixrorá. A ntá xra ó tsjasán tsjentuáha tí jehe sín.

³ Chaxín tjejóni éxi chojni ó, na kjánchó tió tjanjónni la tjanjonyani éxi tjanjon chojni chjasintajni.

⁴ Kixin tí nkehe xraáni tjanjónxinni jehya nkehe kuènte chjasintajni. Náhi. Táha la kjuachaxin kuènte Dios la tíha mé tsjacha sinchek'itjáyan kaín kjuachaxin kuènte tí Jínahya.

⁵ Na mé tsjachani sinchek'itjáyaní tí nkehe ntoáhya tjenkayáxin chojni la ko kaín nkehe nchehnkexín sín t'inkákonhen kixin chrókóchóxin chojni Dios. A ntá kjuachaxin kuènte Cristo tjáqoheni kaín chojni kixin ntá tsitóhe sín kaín nkehe ntoáhya tjenkayáxin sín, a ntá chrókuitekakonhen sín tí jehe ch'án

⁶ la ko tjejóchónhenni sinchekjasóteni kaín tí sín ntiha naxa tjinkakonhya sín chrókuinjchexiteyá sín tí tsjixin tsonoheni kixin á chaxín tsjachará sinchexiteyará jína.

⁷ A ntá jahará tékaráni jie kixin tí nkehe t'ikonrá ó. A ntá tí nkexro tjenkayáxin kixin chaxín ch'ehe Cristo xra la mé kjaxin chrókujátsoan kixin kjaxinni jeheni la ch'ehe Cristo xra.

⁸ A ntá tí chrókujintahnkena ntsí kixin tí kjuachaxin chonta janhan ntá chrókósuànahya kixin Ìnchéni kjuanjon tí kjuachaxin kixin chrókujínkítsa tí jahará kixin antsí chrók'uitjará kuènte Dios, la mé jehya kixin chrókujintak'itjáyanrá.

⁹ Tjínkakhonhya kixin chrókujintachrakonxínrá tí xroon chr'anhánrá.

¹⁰ Kixin ntáchro sín kixin ixra la ko jiehe tí nkehe ikjian janhan, a ntá tí chrókujak'é ntiha la jienahya la ko kánhyó chonta janhan kjuachaxin tí nixja janhan.

¹¹ Kjánchó tí nkexro xikaha ntáchro chrókónohe ch'án kixin jnkokón nixja janhan éxi nixja tí xroon tsíkian kjónté ikjin tjèn la ko kjónté tí chrók'uejóni ntiha.

¹² Tjínkakhonhyani chrókujenkayáxiní kixin chrókóyóhenni tí í so sín ntáchro sín kixin jína tí jehe sín. Jehe sín mé lontí sín kixin ncheyóhe sín asén sín í so chojni.

¹³ A ntá jeheni la chrókuinchehnkexínhyani ijnko xra jehya xra kuènteni. Dios mé kjuako nketí sich'eni xra la kjuanjon ch'án kjuachaxin kixin kjujini kjuich'eni xra tí tjejorá chjasin Corinto.

¹⁴ Jehya kixin chrókóntahyani kjuachaxin chrók'uetuághanrání. Tí chaxín jehya jeheni saoxín kjujini tí tjejorá ntá xikaha chrókóntahyani kjuachaxin. Ntá náhi, kixin jeheni saoxín kjujini ntiha kjuakógharáni itan kuènte Cristo.

¹⁵ Chrókuinchehnkexínhyani ijnko xra kjuich'e ókjé chojni éxi xra chrókuich'eni jeheni. Náhi. Tjinkaonni kixin antsí chrók'uitjará tsinkachónkirá Ìnchéni ntá xikaha la antsí chrókujinkítsani tí jahará kixin jehó tí xra k'uáyéhenni tjejóch'eni.

¹⁶ Kjaxin tjinkaonni chrókujakoni tí itén Ìnchéni chrókuaáxin chojni í so chjasin sáchrókujini la ko kjaxin chrókuinchehnkexínhyani tí xra chrókuich'e ókjé chojni.

¹⁷ A ntá jnkojín sín tjinkaon sín chrókuinchehnke sín ntá jehó chróntáchro sín kixin kjuachaxin Ìnchéni mé chóntha sín.*

¹⁸ Kixin toxrjínghya Dios ijnko nkexro jehó chróntáchro kixin jína ch'án. Náhi. Ìnchéni mé tsontáchro ch'án nkexro chaxín jína.

11

Ch'ín Pablo la ko tí sín chaxínghya apóstol

¹ Tjínkavan chrókuinhínrá ntsí tí lontína. ¿Á chrókuachará chrókuinhínrá nkehe tsontáxrjan?

² Janhan tjínkakhonhya kixin í jnko nkexro chrókuinkachónkirá. Kjaxin xikaha tjínkakhonhya Dios. Ó ikjuá Cristo kixin chrókuakja ch'án tí jahará. Tjínkavan chrókujánjuan tí jahará chrókuakja tí jehe ch'án éxi yóhe ijnko tjan tjarisoá chrókótehe jnkokoá xii.

³ Tóxakonna kixin éxi tí konche tí kjuach'ia xriko ntá kjuich'iyehé tjan Eva, ntá xikaha kjaxinrá jahará tsitóhérá sit'ayahará ókjé chojni ntá tsitóhérá tí nkexrí kaín asánrá tinkachónkirá Cristo.

⁴ A ntá jahará cháhará tjánjonrá kjuachaxin tjiji ókjé chojni ntiha chronkaxín sín í jnko Jesús ókjé jehya éxi tí chronkaxinni jeheni, la ko kjaxin cháhará k'uayéhérá ókjé nchakuen jehya tí Nchakuen Dios k'uayéhérá saó, la ko cháhará chrókuitekáonrá ijnko nkehe ókjé chrókuaáxinrá jehya éxi tí nkehe kuitekáonrá senó.

* 10:17 Jeremías 9.24

⁵ Ó nõna kixin chaxínhya ninkehó sínkíhyana janhan, a ntá antsí sínkí tí sín chréhérá jahará, ichrorá.

⁶ Kjóté kánhyó náxrjón níxja janhan la jehya kixin kánhyó chrókónõna chrókuàkua. A ntá tjákoáxinrá jahará tíhi kixin kaín nkehe t'a.

⁷ ¿Á ntoáhya kjuít'a janhan xrjankaxián tí tan tsaáxinni kixin ninkehó kjuáncháhya chrókuacha la ko éxi ijnko chojni nõè kjuak'é janhan kixin tjínkavan chrókuínkĩtsará chrók'uitjará?

⁸ Tí sín í so njnko kjuínkĩtsana sín kjuanjon sín chichaon k'uayáha kixin tsjak'é tsjákohará jahará.

⁹ Tí kjuak'é tí tjeorá jahará la kjóté t'itjáyan nkehe la ninkexró kjuáncháhya nkehe. Jehó tí sín kichó ní kjuixin estado Macedonia kjuikao sín tí nkehe t'ichjánxinna. Méxra tjínkakonhya kixin chrótjahará xra tí jahará la ko xikaha naxa tjet'a jie.

¹⁰ Xikaha chaxin choxian tí tan chaxín ntoá kuente Cristo, a ntá kohya ninkexró nkuixin estado Acaya tsjacha tsakitsjena tí kjuachéhe chonta.

¹¹ ¿Nkeuente xikaha ntáxrjan? ¿Á xikaha ntáxrjan kixin tjuahyará tí jahará ní? Náhí. Dios la ó nohe kixin imá tjuahará.

¹² Kjánchó ó jehí tsjintaxín xikaha sit'a kixin tjínkakonhya tsjánjuan kjuachaxin kixin nchehnkexín tí sín ixri ntáchro kixin jnkokón kjuachaxin chóna tí nkehe tjákua la ko tí nkehe tjako sín.

¹³ Kjánchó jehe sín ijnko apóstol chaxínhya mé ch'ia sín ncheyóhó sín éxi chojni kjueya Cristo.

¹⁴ Jehya ijnko kjuachrakon tíha kixin kjáxin ch'ín Tsochren kjáxin xikaha ncheyóhe ch'án éxi ijnko ángel kuente tí t'inkaséyan.

¹⁵ Méxra xikaha kjáxin kuèhen tí sín ch'ehe tí Jínahya xra mé ncheyóhe sín tí sín jína. Ntá tsjixixín mé tsjasótexín sín tí xra jínahya kjuích'e sín.

Kjuasóte ch'ín Pablo kixin apóstol tí jehe ch'án

¹⁶ Ntáxrjan inaá kixin nijnkorá chrókuenkayáxinrá kixin lócona. Kjánchó tí xikaha tjenkayáxinrá la tjtghérá tsonixja janhan éxi lócona kixin kjáxinna jína chrókujintahnke ntsí.

¹⁷ Tí xikaha ntáhnkexián la jehya kjuachaxin kuente Inchéni ntáxrjanxian tíha. Náhí. Jehí éxi ijnko chojni lóco níxja.

¹⁸ A ntá nõhónhya chojni siín nchehnkexín sín tí nkehe nohe sín a ntá jie la kjáxin janhan sjintahnke.

¹⁹ Kixin jahará ntáchrorá kixin imá nohará ntá cháhará tjejó tí sín lóco.

²⁰ Kixin tjánjonrá kjuachaxin t'etuáhanrá sín la nchexiteyéhérá sín la ko takitsjahará sín tí nkehe chontará la ko ch'éna asén sín éxi inché sín tí jahará, la ntá kjóniéhýará sín la ko tjate sín nkaya ikonrá.

²¹ Kjóté chrókósuána tsonáxrjan kixin jeheni la kánhyó jiehe k'uetuanhanráni.

Kjánchó tí nkehe nchehnkexín sín la janhan ntáhnkexián kjáxinna, kjóté ntáxrjan tíhi éxi ijnko chojni lóco.

²² ¿Á chojni hebreo jehe sín? Kjáxin janhan. ¿Á chojni israelita jehe sín? Kjáxin janhan. ¿Á k'uaxrjenixín sín ch'ín Abraham? Kjáxin janhan k'uaxrjenixian ch'án.

²³ Ch'ehe sín Cristo xra kjánchó janhan la antsí má la jehe sín la kénhyó, kjóté ntáxrjan tíhi éxi ijnko chojni lóco. Janhan la antsí má kjuít'a xra a ntá jehe sín la kénhyó, la ko antsí má kjuak'échjina ntogchiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nõhónhya veces k'uixin kjuaxikaon kixin chrók'uén.

²⁴ In'ó veces tí sín judío kjuatena sín la ko treinta y nueve tí kjuatjoté.

²⁵ Níya kjuatexinna sín inta la ko í jnko vez kjuak'e sín xro. Níya k'uaniánkí ntabarco ntá ntá ijnko yaon la ko ijnko tie tjenkataván ntayaon.

²⁶ K'uájia má, k'uikuán kjuaxikaon chrók'uénxian tí ntarío la ko chrók'óyánna tí xichee la ko chrók'óyánna tí sín chjasenná la ko tí sín tsikjixín ókjé. K'uikuán kjuaxikaon tí chjasin jie la ko tí nteje la ko tí ntyaon la ko chrók'óyánna tí sín chaxínhya tinkáchónki Inchéni.

²⁷ Kóxrjéna kixin tí xra kjuít'a la ko itsjé nkehe náxrjónhya kónna. Itsjé tie kjuak'échrinhya jína la ko itsjé yaon ik'uén kjinta la ko ik'uén ntá la ko itsjé yaon kjónehya ninkehó la ko kókinna la ko chontahya kaná.

²⁸ Kjóté kaín tíha la ko í so nkehe kónna la mé jnkojnko yaon imá tóxakonna kixin kaín tí sín tójnkotsé sín kaín tí njnko.

²⁹ ¿Á tjen jnkojínra níhará? A ntá tí xikaha la koína éxi nõna. ¿Á tjen jnkojínra kjuásinrá jie? A ntá tí xikaha la kjáxin tóxakonna.

³⁰ Tí chrókujintahnkexian nkehe la mé tjínkavan kixin jehó chrókuákoxian kixin kánhyó jiéna.

³¹ Dios, It'é Ìnchéni Jesucristo, na mé tí nkexo chrórxaxinkaonni jnkochrínín mé ó nohe ch'án kixin chaxín tí nkehe ntáxrjan.

³² Ntá tí kjuak'é chjasin Damasco la mé tí ch'ín gobernador kjuich'ehe ch'ín rey Aretas xra mé k'uetuēnhen ch'án tí sín soldado kixin tsochónhen sín tí ntója tí chjasin kixin chrótséna sín chrókjuak'échjina.

³³ Kjánchó siin nkexo k'uínkajinxinna ijnko ntaxra ijnko ventana tí tját'ò k'uantatjen chjasin la mé xikaha kuaána, tséhyana sín.*

12

Tí nkehe k'uíkon ch'ín Pablo

¹ Ninkehó tsjachahya tí nkehe tsoxrjanka kuèntana ó. Íchá jína tsoxrjanka tí nkehe k'uíkuan la ko tí nkehe kjuínchenóna Ìnchéni.

² Choxian ijnko nkexo tinkáchónki Cristo. A ntá k'uátsínka catorce nánó sátsíkji ch'án tí nixin nkajní. Nonahya á sátsíkji ch'án cuerpo kuènte ch'án ò asén ch'án ó. Jehó Dios mé nohe.

³ Méxra ó nóna kixin xikaha sátsíkji ch'án la ntá nonahya á koí cuerpo kuènte ch'án ò asén ch'án ó. Jehó Dios mé nohe.

⁴ A ntá sátsíkji ch'án nkajní. La ntá tí palabra kuínhin ch'án la kohya kjuachaxin nijnko chojni tsochronka.

⁵ Jína chrókjuíntahnkexián kixin xikaha kónhen tí nkexo a. A ntá tí chrókjuíntahnkexián kixin kjuachaxin kuèntana la jehya jína tíha. Íchá jína chrókjuákoxian kixin janhvàn la chontahya kjuachaxin.

⁶ Tí chrókjuíntahnkexián tí nkehe kónna la chrókólócohyana kixin chaxín tí nkehe chróxrjanka. Kjánchó xikaha t'a kixin tjínkakhonhya kixin xikaha chrókjuenkayáxin chojni kixin ántsi jína janhan. Náhi. Tjínkaxan kixin tí xra t'íkon sín la ko tí nkehe tinhin sín mé chrókjuenkayáxin sín kixin á jína tí janhan, tsixro sín.

⁷ Méxra chrókjuíntahnkexinhyana ntá xikaha xránjon kjuachaxin kixin chrók'uayáha ijnko kjuatjoté éxi ijnko ch'j kúikjiáte cuerpo kuèntana mé ijnko nkehe sík'etuenhen ch'ín Tsochren ikui kjuínchekjoténa.

⁸ Iní veces xrxanóaha Ìnchéni kixin chrókjuatsen ch'án tí kjuatjoté chonta.

⁹ Kjánchó ntáchro Ìnchéni kixin jehó tí kjuachaxiēn ch'án chrókjuachaxian janhan. Kixin tí kjuachaxiēn ch'án ántsi tsjākoxin chojni fuértehya. Méxra ntá chàna kixin fuértehyana kixin ntá xikaha tsjākoxian tí kjuachaxin kuènte Cristo.

¹⁰ Méxra chàna kjónté fuértehyana la ko kjónté t'ántaxina sín la ko kjónté t'ichjánxinna nkehe la ko kjónté chónkina sín chrók'óyánna sín la ko kjónté siin kjuaxikaon chrókjuasótexinna kixin tí tinkachónkia Cristo. Chàna kixin fuértehyana na mé fuérte janhan kixin Cristo tinkachónkia.

Tóxakonhen ch'ín Pablo kixin tí sín tjejó ninko chjasin Corinto

¹¹ ¿Á lócona kixin xikaha xrxanka? Kjánchó jahará kuítekákonhyará ntá xikaha xrxanka. Jahará chróchronkará xikaha kixin jína janhan. Jehya kixin kánhyó sínkina la ntá tí sín chréhérá la ántsi sínkí sín. Náhi. Kjónté janhan la chaxin ninkehó sínkíhyana.

¹² Kjuásian itsjé kjuaxroan jié la jína kjuak'é kónínkakhonhya kjuákoxian kixin chaxín janhan ijnko nkexo tsíkjevá Ìnchéni.

¹³ ¿Xá k'uíkuan tí jahará éxi kánhyó sínkírá a ntá tí í so ninko la ántsi sínkí sín kixin tí kjuasán janhan la ninkehó xra tjaáhyará? A ntá tí xikaha ntoáhya kjuít'la la tónínkakhonhyará.

¹⁴ A ntá ijie ó yaxinna tí nixin vez chrókjuasántsjahará la ko tjaáhyará ninkehó xra. Janhan la tjéyáha tí nkehe chontará. Tí nkehe tjéyá janhan la mé jahará kixin jahará éxi yóhe xjanna t'íkuan. Méxra tí sín it'é xjan chrókjuenájín sín chichaon chrók'uayakuēnxín sín xjeen sín. Jehya xra kuènte tí xjan chrókjuenájín xjan chichaon chrók'uayakuēnxín sín tí it'é xjan.

¹⁵ Tóxakonnahya kjónté chrókjuíntakjeje kaín nkehe chonta janhan ò kjónté chrók'uēnxian kixin tí jahará la jína chrók'uejorá. A ntá janhan imá tjaáhará la kjánchó éxi tóna janhan kixin jahará kánhyó tjeèherá tí janhan.

¹⁶ Méxra kjónté janhan tjaáhyará ninkehó xra la kjónté xikaha ntáchrórá kixin kjuít'ayahará, ichrorá.

¹⁷ ¿Xá kjuít'ayahará kixin jnkójín sín ichr'an kjuíjitsjehe sín tí jahará?

¹⁸ Kjuáncháha tí ch'ín Tito kixin tsjijitsjehe ch'án tí jahará la ko kjaxin kuétuānhan tí í jnko kichó ní sátsjikotoxin ch'án. ¿Á kjuít'ayahará ch'ín Tito ní? ¿Á chaxinhyana jína k'uéjóni yóini ntíha kixin jnkokón Nchakuen Dios chóntani?

* 11:33 Hechos 9.23-25

¹⁹ ¿Á tjenkayáxinrá kixin xikaha kjuáteheni kixin chótani jie ní? Kjánchó xikahya. Dios tjetsjehe kixin nixjani éxi chojni tinkáchónki Cristo. Kíhóni tjuahará la kain tíha ntáxrjan kixin tjínkavan kixin ántsi chrókuinkachónkirá Ìnchéni.

²⁰ Tóxakonna kixin tió tsjasántsjahará la tsóxrjinnahya nkexrí tjeorá la ko kjaxinrá tsóxrjianhyará tí nkehe tsontáxrjan. Tóxakonna kixin náxa ts'ixín kjuanínkaon la ko náxa ts'ixín kjuachjinoxínhin la ko tsonínkákónhénrá kíchuárá la ko chrókuétoanrá jahórá la ko náxa tsinkachónkirá kjuach'ia la ko náxa ts'ántaxínhínrá kíchuárá la ko náxa chontará kjuahnke la ko jnkokoáhya tsjenkayáxinrá.

²¹ Tóxakonna kixin tió tsjasántsjahará inaá la tí Dios kuéntana mé sinchesuàna tí tjeorá la ntá imá tsotsjanka kixin itsjérá tsíkjasinrá jie tí ósé la náxa tjuéhyará tí nkehe tjuáhya ch'erá la ko náxa tjuéhyará chontará chojni chjin ókjé tjasinkoará jie la ko tjuéhyará kain tí í so nkehe jínahya k'uékjich'erá ósé.

13

Nchexraxínkaon ch'án sín la ko tsjixixín nixja ch'án

¹ A ntá jie la níyaxín tsjasántsjahará. A ntá tí kain nkehe tjínkáonrá tsonóna la mé chróchrónka yaá o iy'á chojni tsík'ikónxín kon sín tí nkehe tsíkónhen.

² Nixjahá tí sín tsikjasin jie ósé, la ko nixjahará kain rá kixin kjónté ikjín tjèn la inaá nixjahará éxi nixjá tí kjuak'é k'uéjóni tí iyó kjuasántsjahará kixin tió tsjasán inaá la í tsíkónóahya tí sín kjuasin jie.

³ Jahará tjínkáonrá tsinhínrá á chaxín nixjaxian kjuachaxin kuènte Cristo. Jehya kixin Cristo tsjachahya tsjakoxín ch'án tí kjuachaxién ch'án tí tjeorá ntiha. Náhí. Chaxín tjakoxín ch'án tí kjuachaxin chóna ch'án tí tjeorá ntiha.

⁴ Chaxín tí k'uénxin ch'án tí ntacruz la mé éxi chóntahya ch'án kjuachaxin. Kjánchó ijie tjechónxin ch'án tí kjuachaxin kuènte Dios. Kjaxinni jeheni éxi kjuak'é ch'án k'uéchóntahyani kjuachaxin la ntá ijie tinkáchónkini tí jehe ch'án la tjejóchónxinni tí kjuachaxin kuènte Dios kixin jina tsjinkitsani tí jahará.

⁵ Jahará chrókjuenkayáxinrá á nchoxon tjeorá, á kain asánrá tinkachónkirá Ìnchéni. ¿Á noahyará kixin tjejokoará Jesucristo? A ntá jahará tsonohará á chaxin tinkachónkirá o náhi.

⁶ Kjaxin tjínkavan chrókónohará kixin jeheni la jehya chojni chaxínhya tinkáchónki Ìnchéni.

⁷ Nixjeheni Dios kixin chrókuítóehya ch'án tí jahará kixin ninkehó nkehe jínahya chrókjuich'erá. Jehya kixin chrókjuakoxínni kixin jina tí jeheni. Náhí. Jehí tjínkaonni kixin jahará chrókjuich'erá nkehe jina. Ántosénni kjónté tsóntáchro sín kixin chótani jie.

⁸ Ninkehó nkehe chrókjuich'eni kixin chrókjuinçek'itjáyanni tí nkehe chaxín. Kain nkehe ch'eni la tjikosáyehehe ní nkehe chaxín.

⁹ Méxra chrókóchéhehe ní t'ichjánxínhya imá chrók'uétoanni, tí chaxín jina chrók'uejorá. Ntá náxa tsonixjeheni Dios kixin chrókjuixraká chrók'uejorá ntoá.

¹⁰ Mé xikaha ikjian tíhi senó náxa tsjasántsjahyará ntiha kixin ntá tió tsjasán la ts'ichjánxínhya náxa sinčekónínkáonrána tsonixjaxian tí kjuachaxin chonta janhan. Kixin Ìnchéni mé chjina tí kjuachaxin jehya kixin chrókjuintak'itjáyanrá. Náhí. Kjuanjon ch'án tíha kixin jahará ántsi chrókuinkachónkirá Ìnchéni.

¹¹ Na ntá kíchó ní, chrókócháhará. Tjéyará kixin jina chrók'uejorá. Chrókjuinchechéhérá kíchuárá la jnkokoá chrókjuenkayáxinrá la ko kjuaxróxin chrók'uejorá. Kixin Dios mé ts'ejokoará ch'án.

¹² Nixjehérá kíchuárá jnkójina la tsehérá tja kíchuárá.

¹³ A ntá kain tí sín tinkáchónki Ìnchéni ntíhi mé xraxínkaon sín tí jahará.

¹⁴ Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjinkitsará kain rá. Amén. Ó tjen.

Tí xroon ikjin ch'ín Pablo k'uáyéhe tí sín Galacia

Ch'ín Pablo ikjin xroon k'uáyéhe tí nínko chjasin Galacia

¹ Janhan Pablo mé tsíkjeýána Ìnchéni tsjàkua itén ch'án. Janhan la jehya chojni kjueyána la ko jehya chojni ichr'anna. Náhí. Kjueyána Jesucristo la ko It'eni Dios, mé tí nkexro kjuínchexechón Jesús.

² Janhan la ko kaín tí sín kíchó ni tjejókoni ntihi ikjinni tí xroon ts'áyéhe tí nínko síin estado Galacia.

³ Tjancheheni It'eni Dios la ko Ìnchéni Jesucristo kjuasáyé ch'án chrókjuincheyaonrá ch'án la ko chrók'uayéhérá tí kjuaxróxin kuénte ch'án.

⁴ Jesucristo mé k'uenyákonhen ch'án ijíeni ntá kuaáxinni la mé ijie tsjachahya tí nkehe jínahya síin chjasintajni tsjachroeni mé xíkaha tjinkaon It'eni Dios.

⁵ Tjánháha Dios kjuasáya jnkochrínin mé xíkaha tsoxiteyá. Amén.

Kohya í jnko tan tsaáxinni

⁶ Janhan tóxakonna kixin jahará imá tjoka tinkakjtóhérá Dios kjueyará kjuasáyé Cristo. Jahará la tjoka ó kjuankíxinrá chréhérá ókjé tan chrókuaáxinrá.

⁷ A ntá chaxínha xíkaha. Kohya í jnko tan tsaáxinni. Jehí iso chojni tjinkaon nchexakonhanrá la ko tjinkaon sín chrókjuítóxinhin sín tí tan chrókuaáxinni kuénte Cristo.

⁸ A ntá tí jnkójín nkexro chrókjuakohará ókjé tan chrókuaáxinrá yóghya tí nkehe ó kjuakoni la tí xíkaha la Dios mé sinchekjasóte tí sín kixin xíkaha sich'e sín, kjónté á janhan o ijnko ángel chrókuixin nkaya nkajni.

⁹ Senó xrjanka la inaá tsoxrjanka kixin jnkójín nkexro chrókjuako ijnko tan ókjé tsaáxinrá yóghya tí tan ó kuítékáonrá la mé Dios sinchekjasóte tí jehé sín.

¹⁰ Janhan la tjéyáha kixin chrókóxrjínhin chojni tí xra t'a. Náhí. Tjínkavan kixin Dios mé chrókóxrjínhin tíha. Tí chrókótjínkavan chrókóxrjínhin chojni ó a ntá xíkaha la jehya ijnko nkexro ch'ehe xra Cristo.

Ch'ín Pablo k'óna ijnko chojni tjako itén Dios

¹¹ Jahará kíchó ni chrókónohará kixin tí tan tjàkua tsaáxinni mé jehya ijnko nkehe kjuenkayáxin chojni ó.

¹² Jehya chojni chjina tí tan la jehya chojni kjuakona. Náhí. Jesucristo mé kjuakona.

¹³ Jahará la kjá ó kuinhínra nkexrí k'uékjak'é tió naxa k'uéchráha tí sín judío. Ó nohará kixin k'uéchonkíha tí sín tinkáchónki Ìnchéni la ko tjínkavan chrókjuíntak'itjáyan sín.*

¹⁴ Tí naxa k'uék'ájikian tí sín judío la antsí má k'uénóna. A ntá kaín tí sín chjasenná jnkokón nánó k'uéchontakian sín la kánhyó k'uénohe sín. Antsí má k'uékitekavan tí nkehe k'uék'etqan tí sín tsík'axrjeníxinni.

¹⁵ Kjánchó Dios kjueyána kjónté naxa tókjínahya la kjuasáyé ch'án kjueyána ch'án kixin xíkaha kóxrjínhin ch'án.

¹⁶ Kjuínchenóna ch'án nkexrí tjen tí Xjeen ch'án kixin tsjákgha tí sín jehya judío tí tan tsaáxinni. Tió kjueyána Dios la ninkexró kjuakonahya.

¹⁷ La ko kjáxin kjuítsjähya janhan tí sín tsík'óna apóstol síin chjasin Jerusalén. Náhí. Janhán tuénxín sákjuia chjasin Arabia, a ntá chr'éxin ikjan tí chjasin Damasco.

¹⁸ A ntá ini nánó chr'éxin na ntá sákjuiyá chjasin Jerusalén kixin tsochoxian ch'ín Pedro la ntá ntiha mé kjuák'ekían ch'án quince yaon.

¹⁹ Kjánchó k'uikónhya tí í so sín apóstol. Jehó k'uikuán ch'ín Jacobo kíchó Ìnchéni.

²⁰ Ó tjetsjehe Dios kixin tí nkehe ikjian la mé chaxin tíha.

²¹ A ntá chr'éxin ntá sákjuia nó estado Siria la ko Cilicia.

²² A ntá tí sín kíchó ni tinkáchónki Cristo tjejó estado Judea la naxa tjatsqanhyana sín.

²³ A ntá ó kuínhón sín kixin tí nkexro k'uéchréhe sín chrók'óyan sín la ntá ijie mé tjako tí tan chrókjuinche'itjáyan ch'án.

²⁴ A ntá ijie tjanchia sín kjuasáya kixin janhan ó tinkáchónkia Ìnchéni.

2

Tí iso sín kjueyá Jesús k'uáyéhe sín ch'ín Pablo

¹ La ntá catorce nánó chr'éxin ntá sákjuiyá chjasin Jerusalén inaá la sákjuikian ch'ín Bernabé la ko kjáxin ch'ín Tito.

* 1:13 Hechos 8.3; 22.4-5; 26.9-11

² SákJuiyá ntiha kixin Dios kjuínchenòna kixin sáchrókjuiyá. Ntiha chjasin Jerusalén la kójnkotsékoni tí sín t'etòan nínko ntiha la ntá xrjankaxián nkexri tí tan tsaáxinni tjákoḥa tí sín jehya judío. Mé xíkaha kjuít'a kixin janhan tjínkavan jnkokoá chrókjuenkayáxinni kixin ntá tí xra kjuít'a la jehya chrókóhónkó.

³ A ntá kjónté tí ch'ín Tito kjuák'ekian ch'án la jehe ch'án mé griego ch'án la k'uetuñhya sín kixin chrókua ch'án xroye.

⁴ Á ntá iso tí sín kichó ni chaxínhya tinkáchónki Ìnchéni k'uejókoni sín la jehe sín imó tsík'ixenhen sín kixin tsáyeheni sín kixin tsotsjehe sín nkexri kixin tí sín kuènte Cristo chóna kjuachaxin. A ntá jehe sín tjinkaon sín kixin chrókjuinchexiteyéḥeni inaá tí nkehe k'uek'etòan tí ley.

⁵ A ntá tahyani kuenté nkehe tí tjejóchro sín kixin jehí tjinkaonni kixin tí tan tsaáxinni la ntoá chrókuinkachónkirá jahará.

⁶ A ntá tí sín kónoxín t'etòan kjuakónahya sín ninkehó. A ntá jeheni la tahyani kuentá á chojni t'etòan o náhi kixin Dios la jnkokón t'ikon ch'án kaín chojni.

⁷ A ntá kjuátsòan sín kixin Dios ó chjina tí xra tjákoḥa tí sín jehya judío tí tan jina éxi yóḥe tsíchjéhe Dios xra ch'ín Pedro tjákoḥe ch'án tí sín judío.

⁸ Tí Dios tsík'etuñhen ch'ín Pedro ts'óna apóstol tsjákoḥe ch'án tí sín judío la ko kjaxin tsík'etuñna ch'án ts'óna apóstol tsjákoḥa tí sín jehya judío.

⁹ Méxra ch'ín Jacobo la ko ch'ín Pedro la ko ch'ín Juan, mé tí sín t'etòan kuènte njnko, mé kjuátsòan sín kixin Dios tsíkjanjon tí kjuachaxin. Ntá kóchéhe sín kixin jnkokón ch'eni xra la itsé sín tjani la ko itsé sín itja ch'ín Bernabé. Ntá kjuenkayáxinkoni sín kixin jeheni la tsjákoḥeni tí sín jehya judío la jehe sín nachrohe tsjákoḥe sín tí sín judío.

¹⁰ Jehó k'uetòan sín kixin tsòxrxinkonni la ko tsotjuéheni tí sín nòla la xráxín tóxakonhenni sinchexiteyáni tíha.

Ch'ín Pablo kjuentuéhe ch'án tí ch'ín Pedro chjasin Antioquia

¹¹ A ntá tió kjuíji ch'ín Pedro chjasin Antioquia la kjuentuáḥa ch'án kixin ntoáhya kjuích'e ch'án.

¹² Senó k'uekjineko ch'án iso chojni kjónté jehya sín judío. Ntá ikui iso sín kuixín tí tjen ch'ín Jacobo. A ntá kjuankixin k'uaxrjenta ch'án la kuítóhe kjónekohya ch'án tí sín jehya judío a. Xíkaha kjuích'e ch'án kixin chrakònḥen tí sín kui kixin tí sín neko ch'án naḥa tsíkaha sín xroye.

¹³ Tí iso sín kichó ni judío kjaxin kuítekakonhen sín tí ch'ín Pedro kjónté ntoáhya kjuenkayáxin ch'án. Kjaxin ch'ín Bernabé la kjuacha kjuachrohe sín ch'án kixin tí nkehe ntoáhya kjuích'e sín.

¹⁴ A ntá tió k'uíkuan kixin tí nkehe kjuákoḥin sín la tóyóḥehya tí chrónka tí tan jina tsaáxinni tjako sín la ntá níxjaha tí ch'ín Pedro nkayakon kain tí sín tsikójkotsé. Ntáxrjan kixin: "Jaha mé ijnko chojni judío la kjónté itjen éxi jehya ijnko chojni judío. ¿A ntá kuènte tétuñḥén tí sín jehya judío kixin chrók'uejó sín éxi chrókóyóḥe tí sín judío?"

Tí sín judío la ko tí sín jehya judío la jnkokón tsaá sín kixin chóna sín fe

¹⁵ Jeheni la k'uaxrjeníxinni chojni judío desde tí kokjéxinni la jeheni na chóntahyani jje éxi tí í so chojni chónhya Dios.

¹⁶ Kjónté xíkaha la ó noheni kixin tsotjuáxinhya ijje chojni tí nkehe tsík'etòan ch'ín Moisés. Jehó tí sín tinkáchónki Jesucristo mé tsotjóá ijje sín. Méxra kjaxinni tinkáchónkini Jesucristo kixin tjinkaonni sinchetjóá ch'án ijje kixin titekaonni ch'án. Méxra ninkexró tsjachahya tsotjuáxin ijje sín kixin chrókjuinchexiteyéḥe sín tí nkehe t'etòan tí ley.

¹⁷ Tí tjinkaonni tinkáchónkini Cristo kixin tsotjuáxin ijje, a ntá jeheni kjaxin xraxinkonni kixin ó kjuasinni jje. A ntá í jehya Cristo k'uetòan kixin chrókjuasinni jje. Kjá chaxín náhi.

¹⁸ Tí kuítóheni tí ley la ntá naḥa chrókjanni chrókuinkáchónkini tí ley inaá la tíha la ó jje kuènteni tíha.

¹⁹ A ntá tí ley la kjuanchia jje k'uénxian. A ntá ijje la tjeçuán kixin tinkáchónkia Dios.

²⁰ Janhan la ó tsík'en kixin ó k'uénkian Cristo. A ntá ijje la janhya tjeçuán. Cristo mé tjechónxin tí janhan. La ntá jje la tjechónxian tí cuerpo chonta kixin tinkáchónkia tí Xjeen Dios kixin jehe ch'án la tjuana ch'án la k'uenyákonhenni ch'án.

²¹ Tjinkakonhya tsjanoá tí kjuasáyé Dios. Tí chrókótjuáxin ijje chojni tí ley tsík'etòan ch'ín Moisés, a ntá ó chónkó ik'uén Cristo tí xíkaha.

3

Tí ley o tí fe

¹ Jahará kichó ni gálatas imá lontírá. ¿Nkexro kjuít'ayahará? Kíxin tí nkehe kjuákohará mé kuinhínrá kíxin Cristo k'uénxín tí ntacruz k'uenyákonhenni ch'án.

² Jnkokoá nkehe tjínkavan chrókuateherá. ¿Á k'uayèxínrá Nchakuen Dios kíxin kuítekáonrá tí nkehe tsík'etōan ch'ín Moisés o á k'uayèxínrá Nchakuen Dios kíxin kuítekáonrá tí tan chrónkani kuinhínrá?

³ Imá lontírá jahará. Tí kjuankíxixínrá la kuítekáonrá kjuachaxiën Nchakuen Dios. A ntá jie la tjínkáonrá jahóra sijnchekjintaxínrá tí xra.

⁴ ¿Á chónkó kaín tí nkehe tsík'atsínkará? Kjá chrókuinkjitsa chrókuich'e xra tíha. Jehya chónkó tí nkehe kjuasótiaxínrá.

⁵ ¿Nkekuënté kjuanjon Dios tí Nchakuen ch'án la ko kjuasin ch'án kjuaxroan k'uikonrá? Jehya k'uayèxínrá tíha kíxin kuítekáonrá tí nkehe tsík'etōan tí ley. Náhi. K'uayèxínrá tí nkehe kíxin kuinkachónkirá tí tan kuinhínrá.

⁶ Ch'ín Abraham kuítekaon tí nkehe k'uetōan Dios ntá Dios k'uikon kíxin jína ch'án.

⁷ Méxra chrókónohará jahará kíxin tí sín chaxín tikínixin sín ch'ín Abraham a mé tí sín a chaxín tinkáchónki Dios.

⁸ Tí xroon itén Dios mé chrónka kíxin tí sín jehya judío mé sinchetjóá Dios ijíe sín kíxin tsínkáchónki sín ch'án. Mé xíkaha Dios mé chénka ch'ín Abraham ósé tí tan jína, ntáchro ch'án kíxin: "Ijnko nkexro ts'axrjenixin tí jaha mé tsoyaonxín kaín nación.*"

⁹ Mé xíkaha kjaxin kaín sín tinkáchónki Dios mé tsoyaon sín jnkokón éxi kóyaon ch'ín Abraham kíxin kuítekaon ch'án.

¹⁰ Kaín sín jehó tinkáchónki tí nkehe tsík'etōan ch'ín Moisés la tsjasóte sín kíxin ntáchro xroon itén Dios kíxin: "Tsjasóte kaín tí sín tsjachahya sinchexiteyéhe tí nkehe tsík'etōan tí xroon chóna ley."[†]

¹¹ Ntá ó ntoá ntáchro kíxin kohya nkexro tsotjuáxin ijíe sín tí tsitekaon sín tí ley. Xroon itén Dios ntáchro kíxin: "Tí nkexro tsikótjóá la tjejóchónxin sín kíxin tinkáchónki sín Dios."[‡]

¹² Ntá tí chrókuinkáchónkini tí ley tsík'etōan ch'ín Moisés la chrókuinkáchónkiyhani Cristo. Ntáchro xroon itén Dios kíxin: "Tí nkexro sinchexiteyá tí ley la táhó chrók'uejóchónxin sín."[§]

¹³ A ntá Cristo kjuatsen ch'án kaín tí chrókjuasótexinni tí ley. Tí náhi la chrókjuasóteni kíxin chrókjuachahyani sinchexiteyéheni tí ley. Jehhe ch'án kjuenka ch'án tí ijíeni kíxin k'uenyákonhenni ch'án. Ntáchro xroon itén Dios kíxin: "Kaín tí chojni chóna jie ts'ejótjjan sín ijnko nta ntá its'en la mé xíkaha k'uáyéhe sín tí kjuanínkaon kuente Dios."^{*} Mé xíkaha k'uikon sín tí ch'ín Jesús.

¹⁴ Mé xíkaha kónhen kíxin ntá tí nkehe chénka Dios tí ch'ín Abraham senó mé ts'áyéhe tí sín jehya judío kíxin kjuachaxiën Cristo Jesús. Ntá xíkaha kaín ni ts'áyéheni tí Nchakuen Dios kíxin tinkáchónkini ch'án mé xíkaha tsintáchro ch'án.

Tí ley la ko tí nkehe kjuanjon Dios

¹⁵ Kichóni, tíhi mé sintayóaxian kuente chojni ó. Tió ijnko chojni ch'éna ijnko xroon tsochóna firma kuente sín la ntá xitjahya ts'óxika í jnko nkexro la xitjahya í jnko nkexro sich'éna í so nkehe.

¹⁶ A ntá Dios mé tsíkjo ch'án tí ch'ín Abraham kíxin tsjanjon ch'án nkehe ts'áyéhe tí nkexro ts'axrjenixin ch'án. Tí xroon itén Dios ntáchrohya kíxin kaín nkexro ts'axrjenixin ch'ín Abraham chrók'uáyéhe tíha. Náhi. Ntáchro kíxin ts'áyéhe jnkokoá nkexro ts'axrjenixin ch'án la mé Cristo tíha.[†]

¹⁷ Méxra xrxanka tíhi. Dios chénka tí ch'ín Abraham ijnko nkehe chaxín la tsoxiteyá tíha kíxin éxi yóhe ijnko xroon chóna firma tíha. A ntá cuatrocientos treinta nánó chr'éxin la ntá ikuí tí ley k'uéchrónka ch'ín Moisés. La ntá kjónté xíkaha la xitjahya tsoxika tí nkehe tsíchrónka Dios o tsontáchro chojni kíxin tjetoanhya tí nkehe tsintáchro ch'án.[‡]

¹⁸ Tí chrókuanjon Dios nkehe kíxin chrókuinchexiteyáni tí nkehe k'uetōan tí ley la ntá tí nkehe tsintáchro Dios senó mé chróxiteyáhya. A ntá Dios mé tsíchénka ch'ín Abraham kíxin sinchekjtonhen ch'ín Abraham tí nkehe kjuasáyé ch'án.

¹⁹ ¿A ntá xíkaha la nkehe tsonhen tí ley tsík'etōan ch'ín Moisés? Chr'éxin kjuanjon Dios tí ley kíxin tsonoxinni nkehe tí jie tjasinni. K'uetōan Dios sinchexiteyéhe chojni tí nkehe tsík'etōan ch'ín Moisés tsijia tí nkexro ts'axrjenixin ch'ín Abraham, mé tí nkexro kjueyá Dios kíxin xíkaha tsoxiteyá tí nkehe chrónka ch'án. A ntá tí ley mé chrónka tí sín ángel ntá k'uáyéhe ch'ín Moisés la ó chrónkaxón ch'án.

²⁰ A ntá tí nixjehé Dios tí ch'ín Abraham la jehó ch'án la ko jehó Dios la méxra t'ichjánxinhya í jnko nkexro.

* 3:8 Génesis 12.3 † 3:10 Deuteronomio 27.26 ‡ 3:11 Habacuc 2.4 § 3:12 Levítico 18.5 * 3:13 Deuteronomio 21.23 † 3:16 Génesis 12.7 ‡ 3:17 Éxodo 12.40

Tí xra kuènte tí ley

²¹ ¿A ntá á chrók'uaxrjéxin kixin tí ley tsík'etöan ch'ín Moisés chrókjuanjonko tí nkehe tsjanjon Dios? Kjá náhi. Tí chrók'uixin ijnko ley chrókjuanjon kjuachón la ntá chrókótjuáxin ijjeni tí chrókuitekaonni tí nkehe t'etöan tí ley.

²² A ntá tsintáχρο xroon itén Dios kixin tí jie mé t'etuenhen kaín xín chojni kixin ntá tí sín chrókuinkáchónki Jesucristo ntá chrók'uáyéhe sín tí nkehe tsíchrónka Dios.

²³ A ntá tí naça kuihya Cristo la ntá tí ley la k'uëtuenhen kaín ní la k'uejóchónhenni kixin chrókónoxín tí nkehe chrókuinkáchónkini.

²⁴ Tí ley la éxi ijnko maestro kuènte chánjan k'uëtöan. A ntá jie ikui Cristo la jehe ch'án mé kótjuáxinni ch'án kixin titekaonni ch'án.

²⁵ A ntá ijie ó titekaonni Cristo la í nchexiteyèhyani kaín tí nkehe t'etöan tí ley.

²⁶ A ntá jahará ó k'ónará xjeen Dios kixin ó tinkáchónkirá Jesucristo.

²⁷ Kaínrá kuiktiaxínrá kjuachaxién Cristo mé xikaha jehe ch'án kótjuáxinrá ch'án.

²⁸ A ntá jehya tjetöan á chojni judío ó á chojni jehya judío ó á chojni ch'exón xra ó á chojni t'etöan ó á chojni ntoa ó á chojni chjin. Kaínni la ó k'ónani jnkokóá kixin tinkáchónkini Cristo.

²⁹ A ntá tí tinkáchónkini Cristo chaxín la ntá tí xikaha ó chaxín tsík'axrjeníxinni ch'ín Abraham la ts'áyéheñi tí nkehe tsíchrónka Dios.

4

¹ Mé xikaha ntáxrjan tíhi. A ntá ijnko chánjan tió chrók'uen tí it'é ntá chrókuítöeko tí nkehe kuènte tí it'é la jehe ch'án la tóyóhó ijnko nkexro ch'exón xra kixin tí jehe la xitjahya t'etöan xra kjónté chaxín kuènte ch'án kaín tí nkehe a.

² Síin nkexro t'ayakonhen ch'án la t'etöan tí xra kuènte ch'án tsjixrakájia tí yaon tsintáχρο tí it'é.

³ Mé xikaha kónhen tí jeheni. Kixin tí naça k'uéchánjanni la kuítekaonni kaín tí nkehe kuènte chjasintajni.

⁴ A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjeníxin ch'án ijnko chojni chjin. La kjuínchexiteyá ch'án kaín tí nkehe tsík'etöan tí ley kuènte Moisés.

⁵ Ikui ch'án xikaha kixin tsaáxinni ch'án kjónté senó k'uék'etuenhenni tí ley. A ntá jie la chrók'uáyéhe Dios tí jeheni éxi xjeen ch'án.

⁶ A ntá kjuakoxín Dios kixin jeheni mé xjeen ch'án mé ichr'án Dios tí Nchakuen Xjeen ch'án tsochóna asénni la tí Nchakuen ch'án mé t'èyaxín: "It'èni jaha mé kuéntá tí jeheni."

⁷ Méxra xikaha jahará la jehya ijnko nkexro ch'exón xra. Náhi. Jahará mé xjeen Dios. Jahará mé xjeen ch'án la jehe ch'án tjinkaon sinchekjtonhanrá tí nkehe kuènte ch'án kixin tinkáchónkirá Cristo.

Ch'ín Pablo tóxakonhen ch'án kixin tí sín tinkáchónki Ìnchéni

⁸ Ósé la jahará k'uéchonhyará Dios la kjuínchexiteyéhérá tí dios chaxínhya.

⁹ A ntá ijie la ó choxínrá Dios, ó íchá jína chróntáchroni kixin Dios la ó chóxin ch'án tí jahará. A ntá jehya jína kixin naça chrókuinkáchónkirá inaá tí nkehe chónthya kjuachaxin la ko tí nkehe chónkó kixin tí xikaha naça chrókjuínchexiteyéhérá tí nkehe tinkáchónki chojni.

¹⁰ A ntá jahará la tjásinrá kia ichrén tí yaon la ko tí nitjó la ko tí yaon kia tí nánó.

¹¹ Imá tóxakonna kixin á chónkó tí xra kjuít'a kjuákohará.

¹² Kíchóni, xrjanóghará kixin chrókóyóghará éxi tí janhan kixin janhan mé tóyóhe éxi k'uejorá senó kixin t'etuenhyani tí ley. Janhan la tékahyará ninkehó jie.

¹³ Ó nohará kixin tió saoxín kjuákohará tí tan tsaáxinni la k'uétsanqahyana kixin k'uénina k'uéchonta ijnko chin k'uékjínchekjóténa.

¹⁴ Kjónté xikaha k'uénina la jahará kjuanoáhyará tí janhan la k'uéchontará kjuasáya tí janhan. A ntá jahará la jína kjuánjonrá kjuachaxin kjuak'é ntiha. Éxi chrók'uayéhérá ijnko ángel kuènte Dios ó éxi chrók'uayéhérá jehe Ìnchéni Jesucristo mé xikaha kjuak'é jína ntiha.

¹⁵ ¿Nkehe kónhen tí kjuachéhe k'uéchontará? Kixin ntáxrjan kixin jína tí jahará kixin tjinkaónrá kjónté ikonrá chrókuaítsjerá chróchjinará tí janhan.

¹⁶ A ntá ijie la, ¿á ninkákönnará jehó kixin kuinhínrá tí nkehe ntoá xrjanka?

¹⁷ Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kixin jehe sín tjinkaon sín kixin chrókuitöhérá tí jeheni kixin ntá tjinkaon sín kixin jahará chróchréhérá tí jehe sín.

¹⁸ Jína chrókótjinkaónrá tí í so sín kjánchó ntoá chrókjuenkayáxinrá kixin jehya tí chrókjuak'é tí tjejorá ó chrókuítekaónrá jína.

¹⁹ T'íkonní tí jahará éxi xjeenni. Ijie la imá kjuíncheníhi asénná kixin tóxakonna tí jahará. Éxi yóhe ijnko iné xjan tsjoté tjan tió sinchekokjíhi tjan xjeen tjan mé xikaha janhan la naça tsjasóténa kixin tjínkavan kixin Cristo chrókjuínchetjóá tí jahará.

²⁰ Chrókójina iije naxa chrókjuak'é ntiha ntá ókjé nkexrí chrónixjahará ntá iije la nonahya nkehe tí tjenkayáxinrá.

Kjuíncheyóexín ch'ín Pablo tí tjan Agar la ko tí tjan Sara

²¹ A ntá jie chronkará nkehe. Jahará naxa tjinkáonrá chrókjuínchexiteyéhérá tí ley tsík'etoan ch'ín Moisés la ;á kuiénhyará nkehe chro tí ley?

²² Ntáchro kixin ch'ín Abraham mé chóna ch'án yaá xjeen ch'án la ijnko mé xjeen tjan ch'exón xra la tí í jnko mé xjeen ichjién ch'án mé ijnko tjan t'ítuenhya.*

²³ Tí xjeen tjan ch'exón xra kokjíhi ch'án éxi tokjíhi chojni ó. A ntá tí xjeen tí tjan t'ítuenhya la mé ó kokjíhi ch'án kixin tsoxiteyá tí nkehe tsintáchro Dios.

²⁴ Tíhi mé ntayóaxián. Tí yaá chojni chjin mé tóyóexín tí yaá nkehe tsík'etoan Dios. Tí tjan Agar mé tóyóexín tí ley xránjonxín ijna Sinaí. La ntá tí sín titekaon tíha mé éxi chojni ch'exón xra tí jehe sín kixin t'ítuenhen sín.

²⁵ Mé xíkaha tí tjan Agar mé tóyóexín tí jna Sinaí nación Arabia la tíha tóyóexín tí chjasin Jerusalén kixin tí chjasin la ko tí sín tjejó ntiha la mé t'ítuenhen sín la ko kaín xjeen sín.

²⁶ A ntá tí chjasin Jerusalén itjen nkaya nkajni la mé t'ítuenhya. Náhi. Mé jeheni la kuènteni tíha.

²⁷ Ntáchro xroon itén Dios kixin:

Jaha chojni chjin chontahya chánjan kjónté chrokóchaha.

Jaha k'uikohya ninkehó kjuatjoté kixin kjuínchekokjéhya xjan la kjónté chrokóchaha.

Tí tjan kuítsínkehe na mé nchónhya inté tjan ts'ikon tjan,

a ntá tí tjan kjuák'eko xii tjan la kánhyó ts'ikon.†

²⁸ Kichóni jeheni la éxi yóhèni ch'ín Isaac kixin kaín ni la xjeen Dios kixin xíkaha tsintáchro ch'án.

²⁹ A ntá éxi senó tí xjan kokjíhi éxi tokjíhi chojni ó la jehe ch'án k'uéchónkíhi ch'án tí xjan kokjiéxin kjuachaxién Nchakuen Dios. Mé xíkaha kjaxin sítónhen jie.

³⁰ A ntá ntáchro tí xroon itén Dios kixin: “Tétuènhén tí tjan ch'exón xra sátsji tjan la ko tí xjeen tjan kixin tí xjeen tjan la ts'áyèhya ch'án tí nkehe tsítónhen tí xjeen tí tjan t'ítuenhya.”‡

³¹ Méxra kichó ni, kaín ni la jehya xjeen ijnko tjan ch'exón xra. Náhi. Jeheni mé xjeen tí tjan t'ítuenhya.

5

Jina chrók'uejorá kixin kuaáxinrá

¹ Cristo mé kuaáxinni la ntá ó tí ley la t'etuenhyani. Méxra jina chrók'uayakonhénra tí nkehe kuaáxinrá la í chrókjanhyará chrók'ónará chojni t'ítuenhen inaá.

² Tinhínrá, janhan Pablo mé ntáxrxjan kixin tí chrókuará tí xroye a ntá ó chónkó chrókuinkachónkirá Cristo.

³ Tjínkavan tsoxrxjan ka íxín kixin tí jnkojín nkexro itsa tí xroye la jehe ch'án mé t'ichjánxin sinchexiteyèhe ch'án kaín tí ley tsíkjin ch'ín Moisés.

⁴ A ntá jahará la xritjéyará tsotjuáxin ijjárá kixin sinchexiteyéhérá tí ley la ntá ó kuítòhérá Cristo la ko ó kuítòhérá tí kjuasáyé Dios tjuahará.

⁵ A ntá jeheni la tinkáchónkini Cristo la chóntani Nchakuen Dios la ntá tjejóchónhenni kixin tsjintaxín tsotjóá ijíeni.

⁶ Jeheni mé tinkáchónkini Jesucristo la ntá kánhyó tjeetoan tí xroye. Antsí tjeetoan chrókuinkáchónkini Ínchéni la ntá tí tinkáchónkini Ínchéni la chrótjuèhèni kichó ni.

⁷ Jahará la jina kjuankixinrá tinkáchónkirá Ínchéni. ¿A ntá nkexro k'uetjoan kixin chrókuítòhérá tí nkehe chaxín?

⁸ Jehya nkehe kuènte Dios tí tjejoch'erá méhe. Méxra jehe ch'án la kjueyará ch'án.

⁹ Ntáchro sín kixin tí ch'o t'óna niotja tsjiko intsíkoá tí xroan nchek'ánkí niotja, a ntá ts'ánkí kaín tí ch'o.

¹⁰ A ntá janhan tinkáchónkíni Ínchéni la ko ó nòna kixin jahará kjaxin tinkáchónkirá ch'án la kjá í chrókjuenkayáxinhyará í jnko nkehe. A ntá Dios mé sinchekjasóte ch'án tí nkexro ixri tixrxónkaxín kixin Dios la chrakuenhya ch'án ninkexró.

¹¹ Kichóni, tí naxa chrókuétoan chrókua chojni xroye la ntá tí sín judío chrókónínkakonnahya sín. Tí xíkaha la chrók'uántaxiènhya sín tí tan jina chrónka nkexrí k'uénxín Cristo tí ntacruz.

¹² Méxra tí sín ntaxakonhanrá la t'etjoan sín itsará xroye la íchá jina naá chrók'uátsínkó chrókóchrít'o sín kaín.

¹³ Jahará kichó ni, la Dios mé kjueyáni kixin tsaáni kjánchó chóntahyani kjuachaxin ch'eni tí nkehe jínahya. Náhi. Chrókjuinkítsani kichó ni la ko chrótjuèhèni kichó ni.

¹⁴ Mé xíkaha tí ley mé t'axrxjéxin kixin: “Chrótjuéhérá kichuárá éxi tjuéxinrá asánra.”*

* 4:22 Génesis 16.15; 21.2 † 4:27 Isaías 54.1 ‡ 4:30 Génesis 21.10 * 5:14 Levítico 19.18

¹⁵ **A** ntá tí chrókjóntehérá kichuárá la ko chrókjónterá kichuárá la ntá chrókóxakonhanrá kixin tí xikaha la chrókjuincheh'itjáyanrá kichuárá.

Tí jie chrókjuasin chojni la ko tí nkehe t'etqan Nchakuen Dios

¹⁶ **A** ntá ntáxrjan kixin chrók'uejorá éxi tjinkaon Nchakuen Dios, a ntá chrókjuéyáhyará tí nkehe jínahya chrókjuenkayáxinrá.

¹⁷ **A** ntá tí nkehe jínahya tjenkayáxinrá la tjanjonko Nchakuen Dios kixin Nchakuen Dios la tjanjonko tí nkehe jínahya la tí iyó nkehe tjenkayáxinrá la tjanjonko kichó. Méxra jahará la xitjahya ch'erá tí nkehe tjinkáonrá chrókjuich'erá.

¹⁸ **A** ntá tí Nchakuen Dios tjetjinkitsará, a ntá jehya tí ley t'etuanhanrá jie.

¹⁹ Xrahya ts'ikonni tí jie tjasin chojni jínahya tjenkayáxin. Mé tíha la tí sín tjasinko jie chojni chjin ókjé, la ko tí chojni ch'e tí nkehe jínahya, la ko tí chojni náxrjónhya tjenkayáxin,

²⁰ la ko tí chojni tinkáchónki nkehe tsíkjanoya, la ko tí chojni nchexroan, la ko tí chojni nínkaon, la ko tí chojni itje kjuanínkaon, la ko tí chojni chjio, la ko tí chojni xrahya tónínkaon, la ko tí chojni tjinkaon jehó tsochónta itsjé nkehe, la ko tí chojni tjinkaon ts'axrjenta, la ko tí chojni t'óxika kichó,

²¹ la ko tí chojni chjinóxinhin, la ko tí chojni tjàya, la ko tí chojni tókoan, la ko tí chojni kóchjinka, la í so nkehe tóyóhe xikaha. Na mé éxi yóhe senó mé k'uétjonkará la ko ijie la xikaha tjetjonkará inaá kixin tí nkexro xikaha tinkákjasin jie mé xitjahya ts'áyéhe sín tí kjuachaxin kuente Dios.

²² **A** ntá tíó chóntani Nchakuen Dios ntá tsojtjuèheni kichó ní, la ko tsochéheni, la ko kjuaxróxin ts'ejóni, la ko tsochónhenni tsonínkakhonyani, la ko jnkójina ts'ejókoni kichó ní, la ko nchexiteyáni jnkójina.

²³ La ko tsohnkehyaní, la ko ts'etueñhenni asénni kixin tsjasinhyaní jie. Kohya nijnko ley chrókjuinchekjásótení kixin tí jína chrók'uejóni xikaha.

²⁴ Mé tí chojni tinkáchónki Jesucristo la kaín jie k'uéchónta sín la ko tí jínahya k'uékjenkayáxin sín la ó kjuenká Inchéni kjuák'enkání ch'án ntacruz.

²⁵ **A** ntá tí tjejókoni Nchakuen Dios t'ichjánxin tsítóheni kixin Nchakuen Dios ts'etueñhenni.

²⁶ Méxra chrókjuinchehnkehyaní la ko chrókjuachaxínhyani kichó ní la ko chrókóchjinoxienhyani.

6

Tjinkitsará kichuárá

¹ Kichóni, a ntá tí chrók'uíkonrá jnkójín nkexro kjuasin ichrén jie a ntá tí jahará tí chaxín chontará Nchakuen Dios la chrókjuéntuéhéra sín la chrókjuinkitsará sín. **A** ntá jnkójina chrónixjehérá sín, a ntá jahará la chrókóxakonhanrá kixin xikahya chrókónhanrá chrókjuásinrá jie kjaxin.

² Tsjinkitsará kichuárá kixin jóhya tsamará tí nkehe ye. Kixin tí xikaha la ó chrókjuinchehiteyáni tí nkehe t'etqan Cristo.

³ Ntá jnkójín nkexro ntáchro kixin imá tjetqan tí jehé ch'án la chaxínhya tíha la jehó ch'iyéhe asén.

⁴ Jnkójnko chojni chrórxaxínkaon á nchoxon tjenkayáxin la chrókónohe kixin ó nchoxon la jehya jehó chrókjuikosáyehe asén. Náhí. Chrókjuikosáyehe í so chojni.

⁵ Kixin jnkójnko chojni yamá tí jie kuente.

⁶ Tí nkexro xrakohe tí tan jína la chrókjuinkitsa sín chrókjuanjón sín nkehe chrók'uáyéhe tí nkexro tjako.

⁷ Sích'iyéhyará asánrá. Kohya ninkexró tsjacha tsjanoá Dios. Tí nkehe ts'enka chojni la mé xikahó tsojtá.

⁸ Tí t'enka chojni tí nkehe jínahya tjenkayáxin sín la tí nkehe jínahya tsjacha sín mé ts'énxín sín. **A** ntá tí nkexro ts'enka tí nkehe tjinkaon Nchakuen Dios la Nchakuen Dios mé tsjanjón tí kjuachón jnkochrínxín ts'áyéhe sín.

⁹ Mé xikaha chrókóxrjéhyani chrókjuich'eni kaín nkehe jína kixin tí tsóxrjéhyani la ntá chaxín tsjixraká tí yaon tsjachani ts'áyéheni tí nkehe jína.

¹⁰ Méxra xikaha xráxín chrókjuich'eni nkehe jína la qntsí t'ichjánxin chrókjuinkitsani tí sín kichó ní tinkáchónki Inchéni.

Ch'ín Pablo nchexraxínkaon tí sín ntiha la ko kjuixixín nijxa ch'án

¹¹ Tsjehérá kixin imá ihyé tí letra tjékjinxian tjaná.

¹² Tí sín tjinkaon ts'etuanhanrá kixin chrókuará xroye la jehí tjinkaon sín tsjikosáyehe sín chojni la tjinkakonhya sín kixin chrókjuasótexín sín tí ntacruz kuente Cristo.

¹³ Kjónté tí sín tsíka xroye la nchexiteyáhya sín kaín tí nkehe t'etqan tí ley. A ntá tjinkaon sín kixin chrókuará xroye kixin ntá kjaxin sín tsohnke sín kixin tsontáchro sín kixin jahará kjaxinrá tjinkáonrá tsochontará xroye tí cuerpo kuèntará.

¹⁴ A ntá janhan mé tóxrjínahya sintahnke ninkehó. Íchá jína chróntáxrjan kixin Cristo k'uenyákonhenni. A ntá xikaha k'uenxin Cristo tí ntacruz la ntá tí nkehe k'uek'etqan kuènte chjasintajni la kjaxin k'uitjáyan la ko janhan kjaxin kuítóha tí nkehe kuènte chjasintajni.

¹⁵ La ntá ninkehó sínkíhya á tsíka chojni xroye o náhi. Tí nkehe sínki la chrók'ónani ijnko chojni njxin.

¹⁶ A ntá tí sín ts'áyéhe kjuaxróxin kixin kujikonóhe Dios tí jehe sín la mé kaín tí sín kuítekaon tí nkehe t'etqan ch'án mé kaín tí sín chaxín tsík'óna xjeen ch'án.

¹⁷ A ntá ijie la tjínkakonhya kixin chrók'uekana jie ninkexró. Janhan mé chaxín chonta tí tsíkjatsqenxín tsíchrit'o cuerpo kuèntana kixin kjuasótexinna kixin kjuj't'aha xra Inchéni Jesús.

¹⁸ Kíchóni tjáncháha Inchéni Jesucristo kixin kjuasáyé ch'án chrókjuincheyaon ch'án kaín rá. Mé xikaha tsoxiteyá. Amén. Ó tjen.

Tí xroon chr'énhen ch'ín Pablo tí sín tjejó chjasin Éfeso

Ch'in Pablo ikjin xroon k'uáyéhe tí ninko chjasin Éfeso

¹ Janhan Pablo tsikjeyána Jesucristo kixin xikaha tjinkaon Dios tsjáua itén ch'án. Janhan mé ikjian tí xroon chr'anhánrá tí jahará tjejorá chjasin Éfeso tinkachónkirá Dios la ko títékáonrá Cristo Jesús.

² Tjétjáncháha It'éni Dios la ko Ìnchéni Jesucristo kixin kjuasáyé ch'án chrókjuintayaonrá ch'án la ko chrótjáhará ch'án kjuaxróxin.

Ts'áyéheni tí nkehe jína kuènte Cristo

³ Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xikaha jehe ch'án mé kjuíncheyaonni ch'án kixin kaín nkehe jína tixín nkaya nkajní kjuanjón ch'án.

⁴ Dios mé kjuéyá ch'án tí jeheni kixin chrókuinkáchónkini Cristo tí naxá t'ónahya chjasin-tajni. Tjinkaon ch'án kixin chrók'uejóni tí tjen ch'án ntá kjuínchetjóáni ch'án kixin kaín jie kjuatsenhenni ch'án.

⁵ Imá tjuèhe Dios tí jeheni ntá tsíkjeyáni ch'án kixin ts'ónani xjeen ch'án kixin kuinkáchónkini Jesucristo. Mé xikaha tsíkjenkayáxin ch'án kixin xikaha kóxrjínhjin ch'án.

⁶ Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án.

⁷ Imá tjuèhe Dios tí jeheni la xikaha kuaáxinni ijnié tí Xjeen ch'án k'uitji la xikaha tsjixín kaín ijieni.

⁸ Dios kjuakoxin ch'án kixin imá tjuèheni ch'án. Kjuanjón ch'án kaín kjuachaxin kixin chrókuienxinni jína la ko kjuanjón ch'án kjuaxrexinkaon jína.

⁹ Dios kjuínchenoheni tí nkehe jehó ch'án tjenkayáxin ch'án, mé tí nkehe tóxrjínhjin ch'án tsoxiteyá.

¹⁰ Tí nkehe tsíkjenkayáxin ch'án la tsoxiteyá tí yaon tsíchrónka ch'án. La ntá jehe ch'án tsjanjón kjuachaxin kixin Jesucristo ts'etueñhen ch'án kaín xín nkehe siín nkaya nkajní la ko chjasintajni.

¹¹ Dios kjuéyáni kixin chrókuinkáchónkini Cristo la ntá xikaha chrók'uáyéheni tí nkehe tsík'áyéhe ch'án. Kaín tíha la mé xikaha tsonhen éxi tóxrjínhjin Dios.

¹² Mé xikaha kjuích'e ch'án kixin ntá jeheni kuítekaonni Cristo saoxín chrók'uejóni chrókjuancheheni kjuasáya Dios kixin tí kjuachaxin jie chóna ch'án.

¹³ A ntá kjaxin jahará ó kuinhínra tí tan jína ntoá chrónka nkexrí tsaáxinni, a ntá ó kuinkachónkirá Cristo. La ntá jnkokoá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xikaha ó xiteyá tí nkehe tsíntáchro ch'án.

¹⁴ Tí Nchakuen Dios kuítõnhenni mé kjuínchenoexinni Dios kixin tsakjani kaín nkehe tsjanjón ch'án tió tsaáxin kaín ni tinkáchónkini ch'án. Ntá xikaha kaín ni tsjancheheni kjuasáyé ch'án kixin tí kjuachaxin jie chóna ch'án.

Ch'ín Pablo kjuanchehe Dios kixin antsí chrókónohe tí sín tinkáchónki Ìnchéni

¹⁵ Méxra ó kuínhan kixin imá tinkachónkirá Ìnchéni Jesús la ko imá tjuèhéra kaín tí í so sín tinkáchónki Dios.

¹⁶ Ntá janhan nunca títuahya nixjahá Dios tjáncháha kjuasáya kixin ó tinkachónkirá ch'án.

¹⁷ Tjénixjahá Dios, mé jehe ch'án mé ich'án Ìnchéni Jesucristo, mé It'éni imá tjeotan la tjétjáncháha ch'án kixin tsotjáhará ch'án kjuaxrexinkaon jína kuènte Nchakuen ch'án kixin ntá antsí chrók'ueñxinrá jína tí nkehe kuènte ch'án kixin ntá antsí mé chrók'oxínra ch'án.

¹⁸ Kjaxin tjétjáncháha Dios kixin tsjinkítsa ch'án tsjanjón ch'án ijnko kjuaxrexinkaon jína kixin ntá tsonohará ts'ejochonhénra kixin xikaha kjuéyará ch'án. La ko tsonohará kixin imá tjeotan tí nkehe sinchekítõnhenni ch'án kixin jeheni mé tinkáchónkini ch'án.

¹⁹ La ko kjaxin tjétjáncháha Dios tsjinkítsará ch'án tsonohará kixin tí kjuachaxin kuènte ch'án mé ijnko nkehe imá jie noehyani nketí kjuèxin. Tí kjuachaxièn ch'án mé nchexraxinkaon tí sín tinkáchónki ch'án. Jnkokón tí kjuachaxin chónatani la ko tí kjuachaxin imá jie kjuakoxin ch'án

²⁰ tió kjuínchexechón ch'án Cristo. Ntá Cristo sákju kjuák'etjaxin ch'án tja chjina tí It'é ch'án itjen nkaya nkajní.

²¹ Mé xikaha kjuanjón Dios kjuachaxin kixin Cristo ts'etueñhen ch'án kaín xín gobierno la ko kaín tí sín t'etõan. Ijie tjet'etueñhen ch'án kaín xín nkehe siín chjasintajni la ko chr'éxin ts'etõan ch'án kjaxin.

²² Cristo k'uáyéhe ch'án kjuachaxin ts'etuenhen kaín xín nkehe síin. Jehé ch'án mé ts'etuenhen kaín tí sín k'óna nínkoé ch'án.

²³ Tí nínko mé éxi tí cuerpo kuènte ch'án la jehó ch'án mé t'etuenhen ch'án. Jehó ch'án mé kuènte ch'án kaín xín nkehe síin.

2

Kuaáxinni kjuachaxiën Dios

¹ La ntá ijie Dios mé kjuínchekitonhanrá tí kjuachón jnkochrixin kixin tinkachónkirá Cristo. Senó la jahará la éxi tsík'enrá kixin tí jínahya k'uékjich'erá la ko tí jie k'uékjásinrá.

² Mé xikaha k'uéchréhérá éxi sítóhnen chjasintajni. K'uékjinchexiteyéhérá éxi tóxrjínjin tí nchakuen jínahya t'etuenhen tí xrinto la ko t'etuenhen kaín xín tí chojni titekakuenhya Dios.

³ Kaínni xikaha k'uék'ejóni tí ósé a naḡa kjuínchexiteyéheni tí nkehe ntácho asénni la ko kjuínchexiteyéni tí kjuaxrexinkaon jínahya k'uéchóntani. A ntá tí naḡa xikahó chrókuich'eni la Dios imá chrókuínchekjasóteni éxi tsjasóte tí í so sín.

⁴ A ntá Dios mé imá kuikonóeheni ch'án la ko imá tjuèheni ch'án.

⁵ La ntá kjuanjon ch'án tí kjuachón éxi chóna Cristo. Jeheni la éxi chojni tsík'en k'uék'ejóni xikaha kixin tí jie k'uékjasinni. A ntá jie kjuasáyé Dios tsáaxinrá ch'án.

⁶ Dios mé kjuínchexechón Cristo Jesús la ko kjaxin jeheni tsoxechónni kixin ts'ejókoni ch'án nkaya nkajni.

⁷ Mé xikaha kjuich'e ch'án kjuakoxin ch'án la naḡa tjetjakoḡin ch'án kixin tjuèheni ch'án la ko kjuínkítsani ch'án kixin tinkáchónkini Cristo Jesús.

⁸ Kjuasáyé Dios kixin kuaáxinrá ch'án kixin tinkachónkirá ch'án kixin táha la jehya jahorá k'uitjará tíha. Náhi. Táha la mé kjuasáyé Dios kixin tjáhará ch'án.

⁹ Kixin jehya ichrén nkehe jína kjuich'eni kixin chrókuínchehnkexinni.

¹⁰ Dios mé kjuich'éna tí jeheni ntá chr'éxin kjuínkítsa ch'án kixin tsinkáchónkini Cristo Jesús, kixin ntá chrókuich'eni tí xḡa jína kixin xikaha tsíkjenkayáxin ch'án tí senó a.

Kjuaxróxin tjejóni kixin tinkáchónkini Cristo

¹¹ Méxḡa jahará la jehya chojni judíora. Mé tí sín judío ntak'inrá sín chojni chónthahya tí xroye tí jahará. A ntá tí sín judío, mé tí sín itsa sín xroye cuerpo kuènte sín, mé nchek'in sín asén sín tí chojni chóna xroye.

¹² Xráxinkáonrá kixin tí senó la k'uéchonhyará Cristo. Jahará la jehya kuènte tí nación Israel la xikaha k'uéchonhyará tí nkehe tsík'etóan Dios la ko tí nkehe tsintáchro ch'án tsjanjon ch'án. Mé xikaha k'uék'ejorá la k'uéchonhyará Dios la k'uéchoényará kixin chrókuuárá.

¹³ La ntá ijie la ó tinkachónkirá Cristo Jesús. Jahará tí ósé imá ikjín k'uék'ejorá. La ntá jie la ó kóchjineherá ch'án kixin k'uenyákonhánra ch'án, k'uitji ijnié ch'án.

¹⁴ Jehé Cristo mé tjejóxinni kjuaxróxin. La ntá tí sín judío la tí sín jehya sín judío ntá jie jnkokoá chrókuenkayáxin sín kixin k'óna éxi jnkokoá chjasin. Cristo k'óxia ch'án tí kjuanínkaon éxi ijnko tjat'o k'uinkákonhen.

¹⁵ Jehé ch'án kjuasóte ch'án, la kjuatsen ch'án tí ley. Tí iyó chjasin k'uéjó kjuich'éna ch'án jnkokoá chjasin nixin kixin tinkáchónki sín ch'án. Mé xikaha kjuanjon ch'án kjuaxróxin.

¹⁶ Mé xikaha k'uenyákonhenni ch'án k'uénxin ch'án tí ntacruz la kjuakjin ch'án tí kjuanínkaon k'uék'ixin tí iyó chjasin k'uékjanjon sín kixin ntá kjuaxróxin ts'ejóko sín Dios la kain sín jnkokoá k'óna éxi jnkokoá cuerpo kuènte ch'án.

¹⁷ Cristo mé ikui la kjuakoḡe ch'án kaín chojni tí tan jína kixin kjuaxróxin ts'ejóni kaín ni, mé tí jahará kjónté k'uék'ejorá ikjín tí tjen Dios la ko kjaxin tí sín chjinaxón k'uéjó.

¹⁸ A ntá kjuachaxin kuènte Cristo la kaín ni kjónté jeheni o í so chojni mé tsqchjineheni It'éni Dios kixin jnkokoá k'uáyéheni Nchakuen ch'án.

¹⁹ A ntá jahará la í tóyoahyará chojni tsíkjin ókjé la ko jahará la jehya ókjé chjasin tjejorá. Kaínni la chónani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án.

²⁰ Jahará la mé tsík'ónará ijnko nchia tjat'o jíé k'óna chrítaón tí xḡo k'uejé tí sín kjueyá Jesús la ko tí sín tsich'án Dios chrónka itén ch'án ósé. La ntá Jesucristo mé tí xḡo imá t'etóan kuènte tí tjat'o a.

²¹ Tí xrankixixin mé Cristo la chrítaón k'óna kuenté nchia la tinkák'ánki tí nchia kixin jína tsjak'e, ntá tsjixraká kixin ts'óna ijnko nínko tjóá kuènte Ìnchéni.

²² Mé xikaha jahará tinkachónkirá Cristo la tsojnkotsérá kaín rá ts'óna éxi ijnko nchia kuènte Dios la ntaha tsjak'exenhen tí Nchakuen ch'án.

3

Ch'in Pablo k'uáyéhe ch'án tí xḡa tsjakoḡe ch'án tí sín jehya judío tí tan jína

¹ Mé xikaha janhan Pablo mé tjéchjinaxián tí tjákua itén Cristo Jesús kixin jina ts'ejorá kjónté jehya chojni judío tí jahará.

² Chrókónohará kixin kjuasáyé Dios kjuanjon ch'án tí xra k'uayáha kixin tsjákohará.

³ Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xikaha ikjian ijnko xroon kánhyó tsjé nixja k'uayéhérá.

⁴ Tió sñchekuáxinrá tíha ntá tsonohará kixin ó nóna tí nkehe kuènte Cristo ninkexró k'uénoehya.

⁵ Tí nkehe la ninkexró k'uénoehya tí ósé a. A ntá jie kjuachaxin kuènte Nchakuen Dios la Dios kjuínchenoexín tí sín kjueyá Jesús ch'ehe ch'án xra la ko tí sín chrónka itén ch'án.

⁶ Tí nkehe ninkexró k'uénoehya la tíhi: Kuínhin tí sín jehya judío tí tan jina kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jina éxi ts'áyéhe tí sín judío. La ntá jnkokoá ts'óna sín tí cuerpo kuènte Cristo la jnkokón ts'áyéhe sín kaín tí nkehe tsíchrónka Dios sinchexiteyá Cristo Jesús.

⁷ Janhan k'uékítekakonhya, a ntá jie kjuasáyé Dios kjuanjon ch'án tí xra i sít'a kixin tsjákuá tí itén ch'án kixin tí kjuachaxin kuènte ch'án.

⁸ Janhan mé kánhyó tjeotan kixin janhan la imá intsína la kaín tí í so sín tsíkjinchetjóá Dios la antsí tjeotan sín. Kjónté la Dios mé kjuínchekítónna tí xra imá tjeotan kixin tsótjanka tí sín jehya sín judío tí tan jina nkexrí imá tjeotan tí nkehe kuènte Cristo.

⁹ La k'uayáha tí xra tsótjanka kaín xín chojni nkexrí tsíkjenkayáxin Dios tí ósé kixin nijnko nkexro k'uénoehya tíha. Mé jehe ch'án mé kjuich'éna ch'án kaín xín nkehe.

¹⁰ Mé xikaha kónhen kixin ntá tí sín kuènte njnko tsjákuexín sín kaín xín tí sín t'etotan nkaya nkajni kixin tsonohé sín kixin xikaha kaín nkehe jina tsíkjenkayáxin Dios.

¹¹ Kaín tíha kjuich'e Dios éxi tsíkjenkayáxin ch'án ntá Ìnchéni Jesucristo la ó kjuínchexiteyá tíha.

¹² Kjuasáyé Cristo ntá ó chóntani kjuachaxin tsochjineheni Dios kixin tinkáchónkini ch'án.

¹³ Méxra xrjanóghará kixin chrókuítóehyará chrókuínkachónkirá ch'án kjónté tjetjasótana kixin kaín tíha kónhen kixin jahará chrók'uejoxínrá jina.

Cristo imá tjuèheni

¹⁴ Méxra xikaha tjak'éxian tóch'ian nkayakon It'é Ìnchéni Jesucristo.

¹⁵ Mé tsík'áyéhe ihnié Dios kaín xín chojni tinkáchónki ch'án mé tí sín siín nkaya nkajni la ko tí sín siín chjasintajni.

¹⁶ Tjáncháha It'éni kixin tsjanjon kjuachaxin kuènte ch'án ts'ayéhérá kjuachaxién Nchakuen ch'án

¹⁷ kixin Cristo chróchóna asánrá kixin tinkáchónkirá ch'án la ntá ntoá chrók'uejorá éxi ijnko nta tsíkji nuèe njnka la chrójtjuèhérá kichuárá.

¹⁸ Ntá jahará la ko tí í so sín tinkáchónki Ìnchéni mé chrókuiénxinrá nkexrí tonxín la ko kjínxin la ko njnkaxín la ko ntetoxín kixin nkexrí tjuèheni Cristo.

¹⁹ Tjáncháha Dios kixin antsí chrókónohará nkexrí imá tjuèhe ch'án tí jeheni mé antsí má tjuèheni ch'án la tsjachahyani tienxínni kaín tíha. A ntá tí jehe ch'án chrókuínkítsani ch'án la antsí chrókuiénxinni tí kjuachaxin kuènte ch'án.

²⁰ Ijie la chjéheni kjuasáya Dios kixin jehe ch'án chóna kjuachaxin tsjanjon ch'án antsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kaín tíhi kjuachaxin kuènte ch'án mé tsjinkítsa tí jeheni.

²¹ Kjuasáyé Dios itjen jnkochrixín kixin Cristo Jesús kjuínchekaá ch'án tí njnko, mé xikaha ó xiteyá jnkochrixín. Amén.

4

Jina chrók'uejókoni kichó ni kixin chóntani Nchakuen Dios

¹ Janhan mé tjéchjinaxián tí xra kuènte Ìnchéni. Méxra xrjanóghará kixin jina chrók'uejorá kixin xikaha Dios tsíkjeýá tí jahará.

² Méxra chrókuínchehnkehyará la ko chrókójiahyará la ko chrókójínará chrókóninkákonhyará la ko chrójtjuèhérá kichuárá.

³ Méxra jina chrók'uejokoará kichuárá kixin chrókuínkítsa Nchakuen Dios kjuaxróxin chrók'uejorá la ko jnkokoá chrókjuenkayáxinrá.

⁴ Itjen jnkokoá cuerpo la ko itjen jnkokoá Nchakuen Dios la ko Dios k'uíyehé kaín ni kixin jnkokoá nkehe ts'ejóchónhenni.

⁵ Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni.

⁶ Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etuenhen ch'án kaín nkehe.

⁷ Jnkojnkoni k'uáyéheni kjuachaxin sich'eheeni Dios xra kixin xikaha kjuanjon Cristo.

⁸ Méxra xikaha nixja xroon itén Dios kixin:
 “Jehe ch'án sákjuí ch'án nkaya nkajni la ko sákjuiko ch'án tí sín tjejóchjina,
 la ntá kjuínchekitonhen ch'án chojni jnkojnko kjuachaxin kuente ch'án.”*

⁹ ¿Ntá nkexrí t'axrxéjin kixin sákjuí ch'án? Tíhi mé t'axrxéjin kixin jehe ch'án mé senó
 k'uínkajinxin ch'án nkaya nkajni la kjuák'e ch'án chjasintajni.

¹⁰ Jehe ch'án mé k'uínkajinxin ntíha mé ntá jie sáxikji ch'án tí nkajni imá noi. La ntá
 tje'tuēnhen ch'án kaín xín nkehe.

¹¹ Jehe ch'án mé kjuínchekitonhen ch'án ijnko kjuachaxin jnkojnko chojni. Kjueyá ch'án
 iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so
 sín tsochrónka sín tí tan tsaáxinni. La ko kjueyá ch'án í so sín ts'óna pastor la ko í so sín tsjako
 sín itén ch'án.

¹² Mé xikaha tí xra k'uáyéhe tí sín kjueyá ch'án kixin sich'ehe sín ch'án xra kixin ntá ts'ánkí
 tí sín k'óna tí cuerpo kuente Cristo.

¹³ Ntá xikaha kaín ni jnkokoá tsínkáchónkini tí Xjeen Dios la ko tsochóxinni ch'án jina kixin
 ntá xikaha ts'ónani chojni ntoá nchexiteyá la ko chróónoheni éxi nkexrí tjinkaon Cristo.

¹⁴ Méxra chrókónahyani éxi xjan ntsínsí. Tí xjanntsí la xrahya tsjinkí kjuaxrexinkaon
 éxi ijnko nkehe sákjuiko xrínto xikaha kixin sich'iyehé sín chojni ijnko nkehe nixin la
 xrahya titekaon sín. Tí chojni ch'ia tjinkaon sín tsjachroeni sín í jnko ntja ntoáhya kixin
 chrok'uitjáyenhenni Cristo ntá chrókjuasinni jie.

¹⁵ A ntá íchá jina chrónixjani tí nkehe chaxín ntoá la kaín asénni chrótjuēhenni kichó ni ntá
 xikaha chróónoheni kixin xikaha tjinkaon Cristo. Jehe ch'án mé tí kja t'etueñhen tí cuerpo
 kuente ch'án.

¹⁶ A ntá kjuachaxiēn Cristo kuenté tí cuerpo, tí ch'e xra jnkokón la tjinkitsa kuenté. Ntá
 jnkojnkoní jina ch'eni xra la mé xikaha ts'ánkí tí xra kuente ch'án la mé jina chrótjuēhenni
 kichó ni.

Tí kjuachaxin nixin kuente Cristo

¹⁷ Tíhi mé ntáxrjan la ko tétuñhanrá kjuachaxiēn ihñié Ìnchéni. Ijie la chrók'uejohyará
 éxi ch'e tí sín chónhya Dios. Kaín nkehe tjenkayáxin sín la ntoáhya tíha.

¹⁸ Tí nkehe tjenkayáxin sín la sítié la chónhya sín tí kjuachón tjanjon Dios kixin tienxínhya
 sín kixin chrohya tsitekaon sín Dios.

¹⁹ Ó tsíkjinchek'itjáyān sín tí kjuaxrexinkaon kuente sín la í tósuēhya sín chrókjuasin sín jie.
 Imá tóxrjinhin sín chrókjuich'e sín kaín nkehe jínahya.

²⁰ A ntá jahará xikahya xrakohará tí nkehe kjuako Cristo,

²¹ tí chaxín kuinhínra kuente ch'án la ko tsíxrakohará tí nkehe chaxín ntoá kuente ch'án.

²² Méxra tjtóhérá tí kjuaxrexinkaon ntaxin k'uékjenkayáxinrá ósé k'uék'ejorá mé ijnko
 nkehe jínahya naxa t'ayahará.

²³ Jahará t'ichjánxin kixin chrókónixin tí kjuaxrexinkaon kuentará la ko tí nchakuánra.

²⁴ Méxra chrókuákjárá tí kjuaxrexinkaon nixin kjuích'éna Dios xikaha tjinkaon ch'án la
 ntá chrókjuákoxinrá ijnko ntja jina ntoá.

²⁵ Méxra chrókuitóhérá tí kjuach'ia. Méxra jnkojnkorá chrónixjehérá kichuárá ntoá kixin
 kaín ni tsík'ónani jnkokoá cuerpo.

²⁶ Tí chrókóninkáonra la chrókjuásinhyará jie la chrókóninkákonhyará kuenté yaon.

²⁷ Chrókuitóehyará kixin Tsochren chrókjuít'ayahará.

²⁸ Tí jnkojínra kuera la tjtóhérá kjuachee. Íchá jina kixin itjárá chrókjuich'exínra xra kixin
 tsochontará chicháon sínchekitonhénra jnkojín nkexro t'ichjánxinhin.

²⁹ Nixjahyará tí nkehe náxrjónhya. Nixjará ijnko tan jina kixin tsjinkítsará ts'ánkí
 kjuaxrexinkaon kuente kichuárá la xikaha tsjinkítsará tí sín tjejótinhin.

³⁰ Nchek'ávahyará tí Nchakuen Dios kixin tíha mé k'uayéxinrá éxi ijnko xroye kixin
 tsoñoaxínra kixin jahará mé tinkachónkirá Dios la ko tsochonhénra tí yaon itsí ch'án ntá
 tsjintaxín tsaará.

³¹ Tjtóhérá tí kjuáninkaon chontará la ko tjtóhérá tí nkehe ntoáhya tjenkayáxinrá la ko
 tjtóhérá tí kjuanoñon la ko kaín nkehe jínahya.

³² A ntá chrókójínará chrókjuikonóhénra kichuárá. Sjnchek'itjáyenhénra ijje kichuárá kixin
 Dios kjuatsen tí jie chontará kixin tinkachónkirá Cristo.

5

Jina chrók'uejé tí sín k'óna xjeen Dios

¹ Jahará ó k'óna xjeen Dios la tjuahará ch'án. Méxra chrókóxakonhanrá chrókjuákoxinrá éxi
 kjuákoxin tí jehe ch'án.

* 4:8 Salmo 68.18

² Chrórtjuèhérá kíchuárá éxí Cristo tjuèhe tí jeheni kixin jehe ch'án la k'uenyákonhenni ch'án, éxí yóhe ijnko kolélo xíkaha kjoqehé sín Dios la kóchéhe Dios k'uáyéhe ch'án tí xraxé náxrjón.

³ Ntá jahará mé tsík'ónará chojni kuènte Dios la ntá chrónixjahyará kuènte í jnko chojni chjin ókjé chrókjuásinkoará jié la ko chrókjuenkayáxinhará ninkehó nkehe náxrjónhya la ko chrókjuakéhya asánrá tí nchónhya nkehe chróchontará.

⁴ Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kixin jehya kuènte Cristo tíha. Íchá jína antsí má chrókjuancheherá Dios kjuasáya.

⁵ Ó nohará kixin tí nkexro tjasinko jié í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e asén sín tí itsjé nkehe chróchónta sín la mé tíha ó yóhe tí nkexro tinkáchónki nkehe tsíkjanoya xíkaha. Mé tí nkexro xíkaha ch'e mé tsjachahya ts'ixenhen tí tjet'etqan Cristo la ko Dios.

⁶ Méxra tjánjonhará kjuachaxin sit'ayahará ninkexró chrónka tí nkehe chónkó. Méxra xíkaha ntá itsí tí kjuanínkaon kuènte Dios la tsjasóte tí sín titekakuenhya sín tí jehe ch'án.

⁷ Méxra chrók'uitohyará tí sín xíkaha ch'e.

⁸ Senó la k'uék'ájará ntja sítié. A ntá ijie ó k'ónará chojni kuènte Ìnchéni la ó xritjejorá tí ntja t'inkaséyan kuènte ch'án. Méxra tjenkayáxinrá jína éxí tí sín xritjejó tí ntja t'inkaséyan.

⁹ Tí t'inkaséyan t'axrjenixin kaín nkehe jína la ko tí nkehe chaxín la ko tí nkehe ntoá.

¹⁰ Tóxakonhanrá chrókjuich'erá tí nkehe tóxrjínhin Ìnchéni.

¹¹ Tankiéhyará tí sín ch'e xra náxrjónhya mé tí sín a ch'e xra tí sítié. Íchá jína tsjáqoxinrá tí xra tí itjen tí t'inkaséyan.

¹² Chrókósuèhèni chrónixjani kuènte tí nkehe imó ch'e tí sín jínahya.

¹³ Tí t'inkaséyan mé tsonoxixin kaín xín nkehe la mé tí xrohi ts'ikonxínni jína kaín nkehe.

¹⁴ Mé xíkaha ntáchro xíkahi:

T'áya jaha tjéchrían t'inkatjenxian tí síin tí sín tsík'en.

Cristo mé tjetjoka xrohi.

¹⁵ Méxra imá chrókóxakonhanrá jnkójina chrók'uejorá. Jehya éxí tí sín noehya chrók'uejorá. Náhí. Chrók'uejorá éxí ijnko chojni nohe má.

¹⁶ Chrókóxakonhanrá chrókjuich'erá xra tí jie kixin itsí ijnko yaon jínahya xitjahya s'ich'erá xra.

¹⁷ Chrókólontjihará. Chrókóxakonhanrá chrókuiénxinrá tí nkehe tóxrjínhin Ìnchéni.

¹⁸ Chrókókoanhará kixin tíha mé chrók'uitjayanxínrá. Íchá jína chrókjuánjonrá kjuachaxin chrók'uetuanhanrá Nchakuen Dios.

¹⁹ Chrónixjéxínrá kíchuárá tí salmo la ko chrótsjerá la xíkaha kaín asánrá chrókjuancheherá kjuasáyé Ìnchéni.

²⁰ Jnkochrín chjehérá kjuasáya It'eni Dios kixin kaín nkehe kjuanjon ch'án la ko chrókjuanchaxínrá kjuasáya kjuachaxién ihnié Ìnchéni Jesucristo.

Jína chrók'uejókoni tí sín kjéhyani kixin tinkáchónkini Ìnchéni

²¹ Titekákonhénrá kíchuárá kixin ó tinkáchónkirá Ìnchéni.

²² Tí chojni chjin chrókjuinchexiteyéhe xii sín éxí nchexiteyéhe sín Ìnchéni.

²³ Tí chojni ntoa chónka kjuachaxin ts'etuenhen ichjién éxí Cristo mé ikja t'etuenhen tí njnko. Kjaxín jehe ch'án kjuínchekaá ch'án tí njnko, mé tí cuérpóé ch'án.

²⁴ Méxra éxí tí njnko nchexiteyéhe Cristo mé xíkaha kjaxin tí chojni chjin chrókjuinchexiteyéhe tí xii.

²⁵ Tí chojni ntoa chrórtjuèhe tí ichjién kixin éxí Cristo la tjuèhe tí njnko la k'uenyákonhen ch'án.

²⁶ Mé xíkaha kjuich'e Cristo kixin sinchetjóá ch'án tí njnko mé kjuínchetjuáxin ch'án tí ntá kuikitexín sín kjuachaxién itén ch'án.

²⁷ Ntá tsjanjon ch'án tí jeheni éxí ijnko njnko imá jína chónthahya jié la ko chónthahya ninkehó nkehe náxrjónhya, mé ijnko njnko tjóá la ko ntoá.

²⁸ Mé xíkaha tí chojni ntoa chrórtjuèhe tí ichjién sín éxí tjuèxin ch'án cuérpóé ch'án. Tí nkexro tjuèhe ichjién mé kjaxin tjuèhe asén ch'án.

²⁹ Kohya ninkexró nínakonhen tí cuerpo kuènte. Kaín chojni la ine sín la t'ayakonhen sín cuérpóé sín la mé xíkaha Cristo t'ayakonhen tí njnko.

³⁰ Kaínni mé k'ónani cuerpo kuènte ch'án. Jeheni mé ntqé ch'án la ko huésóé ch'án.

³¹ Ntáchro kixin: "Méxra ijnko chojni ntoa mé tsítqhe it'é la ko iné kixin tsakja ichjién la yóí sín mé ts'óna éxí jnkokoá chojni."*

* 5:31 Génesis 2.24

³² Tíhi mé ijnko nkehe imá jié tienxínhya ninkexró. Mé janhan xrjanka kuènte Cristo la tíha mé nínkoé ch'án.

³³ Méxra kjaxin tjéxrjanka kíxin chojni ntoa t'ichjánxin tsotjuèhe ichjién sín éxi tjuèxin asén sín la tí chojni chjin chróchóntehe sín kjuasáya tí xii sín.

6

¹ Jahará chánjanrá la t'ichjánxin sinchexiteyéhérá it'ará la ko inará kíxin tjuèherá Ìnchéni kíxin tí xikaha mé jína.

² Tí nkehe saoxín tsík'ítuenhenni kíxin chrókuitekaonni ntá chrókjuanjon Dios nkehe mé tíhi: "Chrókjuikosáyeherá it'ará la ko inará

³ kíxin mé náxrjón chrók'uejorá la isé chrók'uejorá ntihi chjasintajni."*

⁴ Jahará it'é xjan la chrókjuinchecóninkakonhyará tí xjaanrá. Íchá jína kíxin sinchek'ánkixínrá xjaanrá ijnko kjuaxrexinkaon jína kíxin ts'ánkixín xjan tsinkáchónki xjan Ìnchéni.

⁵ Jahará chojni ch'e xra mé chrókuitekákónhérrá tí lámgará ntihi chjasintajni la chróchontehérá sín kjuasáya. Sjich'eherá sín xra éxi ch'eherá xra Ìnchéni Cristo.

⁶ Chrókjuich'erá xra jína la jehya kíxin tí tjejó sín tjejótsjehe sín kíxin ntá xikahó ntá jína chrók'uejoxínrá. Náhi. Éxi ch'eherá xra Cristo kaín asánrá sjich'erá xra kíxin mé xikaha tóxrjínjin Dios.

⁷ Kaín asánrá chrókjuich'erá xra éxi ch'eherá xra Ìnchéni la jehya éxi chojni ó chrókjuich'eherá xra.

⁸ Ó nohará kíxin jnkojnko nkexro kjónté ch'exón xra o kjónté chojni t'ítuenhya mé jnkojnko sín ts'áyéhe sín tí nkehe tsjanjon Ìnchéni kíxin nkexrí tí xra jína kjuich'e sín.

⁹ Tí jahará chojni lamó mé jnkojína chrókuétuéhénrrá tí sín t'ahará xra la séchrókóninkákónhérrá sín. Xráxinkáonrá kíxin jahará la ko jehe sín mé jnkokón chrókjuinchechiteyéhérá Ìnchéni itjen nkaya nkajni kíxin kaín chojni la jnkokón t'ikon ch'án.

Tí nkehe tjinkítsa t'ayakonhen tí sín tinkáchónki Ìnchéni

¹⁰ A ntá jie kichó ni, nchefuérte asánrá kíxin tjejókoni Ìnchéni la tjeoan tí kjuachaxin kuènte ch'án.

¹¹ Chrókuaáxinrá kaín tí kjuachaxin tsjanjon Dios kíxin ntá xikaha jína chrók'uejorá la chrókjuit'ayahyará Tsochren.

¹² Jehya tjanjonkoni chojni tsík'óna into la ko hueso. Náhi. Jeheni tjanjonkoni kaín tí nchakuen tí jínahya síin chjasintajni. Tíha mé tjinkaon chrók'uetqan tí chjasintajni sitié.

¹³ Méxra chrókuákjárá kaín tí kjuachaxin kjuanjon Dios kíxin ntá chrókjuachará tí itsi tí yaon jínahya ntá tí xikaha chrókjuich'erá la chr'exin la jína chrók'uejorá.

¹⁴ Nchefuérte asánrá. Jína chrók'uejorá. Chrókuitekáonrá tí itan chaxín kíxin tí nkehe ntoá mé chrók'uayakonhanrá.

¹⁵ Méxra listo chrók'uejorá sátsjichronkará tí tan tjanjon kjuaxróxin.

¹⁶ La antsí tjeoan chrókuiinkachónkirá Ìnchéni. Tíha mé chrok'uinkákonhen tí chica flecha tsochr'án Tsochren.

¹⁷ Tí chrókuaáxinrá la táha éxi yóhe ijnko chica casco t'ayakonhen ikja chojni la tí itén Dios la éxi yóhe ijnko chica espada mé tjanjon Nchakuen Dios.

¹⁸ La ko kjaxin chrókjuítóehyará chrónixjehérá Dios la jnkochríxin chrókjuanchehérá ch'án kaín nkehe t'ichjánxinhanrá la chrokjuanchatóxixínrá Nchakuen ch'án. Chrók'uejotsjehérá la chrókjuanchiará kíxin tsjinkítsa Dios kaín tí sín tinkáchónki ch'án.

¹⁹ Chrónóghérá ch'án kíxin kjaxin janhan tsjinkítsana ch'án tsjanjon ch'án tí tan t'ichjánxin tsonixja janhan kíxin ntá janhan antsí jína chrónixja kíxin ntá tsinhin sín tí nkehe ninkexró k'uénoehya kíxin nkexrí tjen tí itén ch'án tsaáxin chojni.

²⁰ Dios mé ichr'ánna tsqxrjanka tí itén ch'án, mé xikaha tjéchjnxaxián ijie. Nixjehérá ch'án kíxin jína tsqxrjankaxián tí itén ch'án la ko ninkexró tsochrakuanhya.

Kjuixixín nixja ch'ín Pablo

²¹ Kichóni Tíquico, tí nkexro imá tjuèheni la ko xráxin ch'ehe xra Ìnchéni mé tsochenkará ch'án tí jahará nkexrí tjen la ko nkexrí tí xra tjét'a.

²² Mé xikaha tétuanhan ch'án sátsjitsjehe ch'án tí jahará kíxin tsochrónka ch'án nkexrí tjejóni la xikaha chrókócháhará.

²³ Tjáncháha It'éni Dios la Ìnchéni Jesucristo kíxin tsochjéhe ch'án kaín kichó ni kjuaxróxin kíxin tsotjuèhe kichó sín la ko tsinkáchónki sín ch'án.

* 6:3 Éxodo 20.12; Deuteronomio 5.16

²⁴La ko kjuasáyé tí jehe ch'án sincheyaoon ch'án kaín tí sín chaxín tjuèhe Ìnchéni Jesucristo. Mé xíkaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí sín siín chjasin Filipos

Ch'ín Pablo ikjin xroon k'uáyéhe tí nínko chjasin Filipos

¹ Janhan Pablo la ko Timoteo ch'ehe ni xra Jesucristo, mé ikjinni tí xroon i chr'anhánrá kaín tí jahará kíchó ni tinkachónkirá Cristo Jesús tjejorá chjasin Filipos la ko tí sín t'etqan kuènte nínko ntiha.

² Tjanchiani kixin It'éni Dios la ko Ìnchéni Jesucristo kjuasáyé ch'án imá chrókjuincheyonrá ch'án la ko chrók'uayéherá kjuaxróxin.

Ch'ín Pablo tjechrónóge ch'án Dios kixin tí sín tinkáchónki Jesús ntiha

³ A ntá tíó xráxinkavan tí jahará la imá tjahá Dios kjuasáya

⁴ la ko nixjahá Dios la imá chàna tjáncháha ch'án kixin tsjinkítsa ch'án kaín tí jahará.

⁵ Jahará la kjuinkítsará tíó kjuákua tí tan jína tí saoxín kuinhínrá itén Dios la naxa tjejtjinkítsará ijie.

⁶ Ó nòna chaxín kixin xikaha Dios ó kjuankixin ch'án ch'e ch'án xra jína kixin kuítekáonrá mé xikaha naxa tsjintaxín sich'e ch'án tsjixrakája tí yaon tsokjan Jesucristo.

⁷ Jína kixin tjenkayáxian kuènte kaín tí jahará. Méxra xikaha imá tjuahará. Jahará la ko janhan la jnkokón kjuachaxin k'uáyéhe ni la kjónté janhan tjéchiina o tjén tí tjejó tí sín t'etqan tjéxrjanka kixin jína tí tan tsaáxinni.

⁸ Dios la ó nohe kixin imá tjínkavan chrók'uíkuan kaín tí jahará kixin éxi tjuáxinrá Cristo.

⁹ Tjáncháha Dios kixin tsjinkítsa ch'án tí jahará kixin ántsi má chrótjuéhé ch'án la ko chrók'uánkí tí kjuaxrexinkaon kuéntará kixin ántsi chrókuiénxinrá kaín nkehe.

¹⁰ La ntá chrókónohará chrókuákjárá tí nkehe jína. A ntá tí xikaha chrókjuich'erá la jína tjóá chrók'uejorá la ko kohya nkehe chrókjuanchia jje tíó tsokjan Jesucristo.

¹¹ Méxra jahará chrókjuich'erá xra jína éxi jínko nkehe jína chrók'óna kixin kjuasáyé Jesucristo la ntá xikaha la chrókjuíkosáyehérá Dios.

A ntá janhan la tjéçonxian Cristo

¹² Kíchóni tjínkavan tsonohará kixin tí nkehe kjuasótexinna la kjuínkítsa kixin kuinhin chojni tí itén Dios tsaáxinni.

¹³ Kaínxín tí chojni siín palacio la ko kaín tí í so sín mé nohe sín kixin tjéchiinaxián kixin tinkachónkia Jesucristo.

¹⁴ A ntá tí tjéchiina la itsjé tí sín kíchó ni ántsi má kóxrjínhin sín tjako sín itén Ìnchéni la í chrakonhya sín tinkáchónki sín ch'án.

¹⁵ A ntá chaxín iso sín nixja sín itén Cristo kjánchó chjinoxínhin sín kixin tjínkaon sín chrókjuachaxinna sín. A ntá í so sín tjako itén ch'án kixin tjínkaon sín jína chrókjuinkítsana sín.

¹⁶ Kjánchó iso sín tjínkaon sín chrókjuako sín kixin chrókjuacha sín la ntá kénhya asén sín tjako sín. Mé xikaha ch'e sín kixin tjínkaon sín chrók'uekana sín ántsi má jje kixin naxa tjéchiina.

¹⁷ La í so sín nixja sín kuènte Cristo kixin tjuèhe sín ch'án la ko tjuana sín la ó nohe sín kixin ntihi tjén kixin tsoxrjanka tí itan tsaáxinni.

¹⁸ Kjánchó ántosenná kjónté á chaxín kaín asén sín tjako sín o náhi, la imá chàna kixin chrónka sín tí tan jína kuènte Cristo la ántsi má chéhe asenná.

¹⁹ Ó nòna janhan kixin kjónté kaín nkehe tsonna la kjónté xikaha la tsaáxinna kixin kjuasáyará jahará tjejónixjehérá Dios la ko tí Nchakuen Jesucristo mé tjejinkítsana.

²⁰ Jína tjéçonhan kixin Dios la tsitóehya tí janhan kixin ichrén nkehe jinahya chrókóna. Tjínkavan tsochonta kjuachaxin kixin jína tsonixja kaín asenná nkayakon chojni. Ntá xikaha senó la xikaha ijie tíó ts'ikon chojni tí janhan la tsonoxin sín kixin Cristo imá chóna kjuachaxin kjónté á naxa tjéçuán o á ó tsik'ena.

²¹ Kixin janhan na Cristo tjéçonxian la ntá kjónté ts'énxian xikaha la mé chrókjuácha.

²² A ntá tí naxa tsjak'é naxa tjéçuán ntá naxa jína sít'aha Ìnchéni xra. Nonahya nkehe tí chrókuákjaá, á chrók'uéno o á chrókjuak'éçuán.

²³ Imá xra chrókjuenkayáxian chrókuákjaá tí yaá nkehe. Janhan na tí chrók'uéno la chrókjuak'ékian Cristo. A ntá janhan la ntáxrjan kixin ichá jína tíha.

²⁴ Kjánchó t'ichjánxin naxa chrókjuak'é kixin naxa chrókjuinkítsa tí jahará.

²⁵ Méxra ó nòna kixin naxa tsitona tí tjejorá kixin chrókjuinkítsa tí jahará kixin ntá ántsi chrókónohará la chrókócháhará kixin jína chrókjuinkachónkirá Ìnchéni.

²⁶ Ntá tió tsjasán janhan ts'ejóni ínaa la imá tsqcháhará la tsjancheherá kjuasáyé Jesucristo.

²⁷ A ntá jahará chrókjuákoqxinrá chrók'uejorá jína éxi ntáchro tí tan kjuákoqxin Ìnchéni Cristo. Mé xikaha tí tsjasántsahará o náhi la tjínkavan chrókujinhan kixin naxa imá tinkachónkirá Cristo la ko jnkokoqá tjenkayáxinrá la ko jnkokoqá tjejoch'erá xra tjákorá tí itan jína tsaáxinni.

²⁸ Chrókujtqéhyará kixin tí sín nínkakonhanrá chrókjuintachakonrá sín. Tí xikaha chróchrakonhyará la chrókónoexin sín kixin ts'itjáyan sín, a ntá chrókónoxin kixin jahará mé chaxin tsaará. Tíha mé Dios tsjinkátsará.

²⁹ Ó kujtonhanrá tí kjuachaxin kixin tsinkachónkirá Jesucristo la ko kjaxin kujtonhanrá kjuachaxin tsjasótiaxinrá kixin jahará mé tinkachónkirá ch'án.

³⁰ Jahará la ko janhan jnkokón ch'eni xra. Jahará ó k'uikonrá senó nkexrí kjujt'a xra la ó kuinhínrá ijie kixin naxa tjet'a xra kjónté nínkakonna sín.

2

Kuítohe Jesús tí kjuachaxin chrók'uetqan ch'án ntá ijie imá tjetoan ch'án

¹ Tí chaxín tí Cristo nchexraxinkaonrá la tí chaxín Cristo tjuàhará ch'án nchecháhará ch'án la tí chaxín tí Nchakuen ch'án xrikoará la tí chaxín nohará kixin tikonóghará ch'án

² la nchecháhará kixin jnkokoqá chrók'uejokoará kichuárá la ko jnkokoqá chrórtjuèhéra kichuárá la ko jnkokoqá chrókjuenkayáxin nchakuanrá la ko jnkokoqá xra chrókjuich'erá.

³ Chrókjuenkayáxinhyará chrókuètoanrá la ko chrókjuinchehnkehyará. Náhi. Chrók'ónará chojni t'etqanhya. Chrók'uikonrá éxi ántsi tjetoan tí í so sín, a ntá kánhyó tjetoan tí jahará.

⁴ Ninkexró chrókjuéyá tí nkehe kuènte jehó. Náhi. Chrókjuéyará tí nkehe chrókjuinkátsa tí í so chojni.

⁵ Jahará chrókjuenkayáxinrá éxi kjuenkayáxin Cristo Jesús.

⁶ Jehé ch'án chóna ch'án káin kjuachaxin kuènte Dios la kjónté xikaha la tjinkakonhya ch'án chrókjuinchejóhe ch'án éxi Dios.

⁷ A ntá kuítóhe ch'án ntáha tí kjuachaxin k'uéchóna ch'án la k'óna ch'án ijnko chojni ntoa chjasintajni la ko kjuich'e ch'án xra.

⁸ La éxi ijnko chojni k'uètoanhya kjuák'e ch'án la kjuínchexiteyéhe ch'án Dios káin asén ch'án kixin ik'uén ch'án, mé k'uénxin ch'án tí ntacruz.

⁹ Méxra Dios imá kjuikosáyehe tí jehé ch'án la ko kjuínchek'in ch'án ijnko ihnjé imá tjetoan.

¹⁰ Kixin ntá tsinhin káin chojni tí ihnjé Jesús ntá ts'ejóxin toch'in sín, mé tí sín siín nkaya nkajni la ko tí sín siín chjasintajni la ko tí chojni siín chrínki nche.

¹¹ La ko káin xín chojni tsochrónka sín kixin Jesucristo mé Ìnché sín mé xikaha tsjikosáyehe sín It'eni Dios.

Tí sín tinkáchónki Cristo tóyóhe éxi xrohi t'inkaséyanxin chjasintajni

¹² Jahará kichó ni imá tjuahará la xráxin kjuínchexiteyanará tí k'uék'ejóni. A ntá ijie la chrókjuínchexiteyanará kjónté ikjín tjén. Chrókujtqéhyará tí nkehe tsjanjon kjuachón la chrók'uayakonhéna jnkójina

¹³ kixin Diosntaxraxinkaonrá sjich'erá tí nkehe jína tjinkaon ch'án.

¹⁴ Káin xra ch'erá la chrókóninkákuènyará kichuárá la ko chrókjontehyará kichuárá

¹⁵ kixin tsqkohya ninkexró tsontáchro kixin jahará la chontará jie. Kixin jahará la mé tí xjeen Dios chróchontahyará jie, la tjejorá tí siín tí sín jínahya tjasin jie. Na ntá jahará chrók'uinkaséyanxin tí jehé sín éxi tí konotsé t'inkaséyanxin tí chjasintajni sitié.

¹⁶ Méxra jahará chrók'uayakonhéna jína tí tan tsjanjon kjuachón. Tí xikaha chrókjuínchexiteyará jnkójina ntá tió tsi Cristo tsqchéhe asenná kixin xikaha xra tjejoch'erá kixin ntá tsonóna kixin jehya ó chónkó kjuak'ékjit'a xra.

¹⁷ Kjónté chrók'uénxiqan la éxi nkehe chrókjuanchatóixixinrá Dios chrók'uikonrá tí janhan. Mé xikaha chrókjuintaxin tí nkehe chróchjehé ch'án kixin tinkachónkirá ch'án, la ntá mé janhan mé tsqchána la ko tjínkavan kixin káin rá xikaha chrók'uayéhéra kjuachéhe.

¹⁸ Méxra chrókócháhará jahará kjaxin la chrók'uayéhéra éxi tí kjuachéhe chonta.

Ch'in Timoteo la ko ch'in Epafrodito

¹⁹ Chonhan kixin tí tsjanjon Ìnchéni Jesús kjuachaxin ntá tjoka tsochr'an ch'in Timoteo tsjijitsjehe ch'án tí jahará kixin ntá tsqchána tsjnhan nkexrí tjejorá.

²⁰ Kohya í jnko nkexro chrókjuenkayáxin éxi tí janhan la ko chrókóxakonhen kixin jahará chrók'uejorá jína.

²¹ Káin tí í so sín tjeýá sín tí nkehe tóxrjnhin sín ó la jehya tí nkehe tóxrjnhin Jesucristo.

²² A ntá jahará ó nohará kixin ch'in Timoteo ó kjuakoxin ch'an kixin jina asen ch'an kixin jehe ch'an kjuít'akian ch'an xra kjuakoni tí tan jina. Éxi ijnko xjanna xikaha kjuínkítsana ch'an.

²³ Mé xikaha tjínkavan tsochr'an ch'an tsjijtsjehe ch'an tí jahará tíó tsonona nkexrí tsji tí xra kuéntana.

²⁴ La ko kjaxin chonhan kixin Ìnchéni tsjinkítsana kixin tjoka tsjasán kjaxinna.

²⁵ A ntá kjaxin tónhen asenná kixin t'ichjánxin tsochr'an kichó ni Epafrodito tsjiji ch'an tí tjeorá. Jehe ch'an mé jnkokóá ch'ekoni ch'an xra kjónté ninkakonhenni chojni. Jahará k'uechr'anrá ch'an ntihi kixin jehe ch'an tsjinkítsana ch'an kaín nkehe tjínkavan.

²⁶ Imá tóxakonhen ch'an tsjijtsjehe ch'an tí jahará kixin ó nohe ch'an kixin tsíkinhínra kixin k'uéníhi ch'an.

²⁷ Chaxín k'uéníhi ch'an ó mero chrók'uen ch'an, a ntá Dios kuikonóhehé tí jehe ch'an kjánchó jehya jehó ch'an, kjaxin kuikonóana Dios tí janhan kixin kánhyó chrók'uavá.

²⁸ Méxra tjínkavan tsochr'an ch'an kixin ó nona kixin tsqcháhará ts'ikonrá ch'an inaá la ko xikaha janhan í kánhyó chrók'uavá.

²⁹ Imá chrókócháhará chrókjuji ch'an kixin jehe ch'an mé ijnko kichó ni tinkáchónki Ìnchéni la ko chrókjuikosáyehérá ch'an éxi chrókjuikosáyehérá kaín tí í so sín éxi jehe ch'an.

³⁰ Jehe ch'an ó mero chrók'uenxin ch'an tí ch'ehe ch'an xra Cristo. Mé siin kjuaxikaon chrók'uenxin ch'an kixin jehe ch'an kjuínkítsana ch'an kixin jahará xitjahya ts'inkará tsjinkítsará tí janhan.

3

Tí nkehe chaxín sínkí

¹ A ntá ijie, kichó ni, chrókócháhará kixin jahará la kuénte Ìnchéni. A ntá tí janhan la xrahya tsokjatje tsokjian tí nkehe ó kjan kixin tíha la chrókjuinkítsa tí jahará.

² Chróchontará cuidado tí sín ch'e jínahya éxi konja la tóchrít'ó sín cuérpóé sín.

³ A ntá tí chojni chaxín chóna xroye la mé tí jeheni kixin jeheni chaxín xraxinkakonxinni Dios kjuachaxién Nchakuen ch'an la ko imá chéheni kixin tinkáchónkini Ìnchéni Jesucristo. Jehya kixin chrókuinkáchónkini kixin tí cuérpóéni chrókóchrít'ó tí cuérpóé chojni. Ninkexró antsí chróhóna kjuachaxin kixin chrókuitekaon tí nkehe a.

⁴ A ntá janhan kjaxin jina chróntáxrjan kixin chrókóchrít'ó tí cuérpóé chojni. Ninkexró antsí chróhóna kjuachaxin kixin chrókuitekaon tí nkehe a.

⁵ Janhan mé tsíkana xroye tí k'uéchonta ijní yaon la ko janhan mé tikiníxian tí sín israelita la tsík'axrjeníxina tí sín tsík'axrjenín ch'in Benjamín la kjaxin janhan mé hebreo la ko t'aná la naná la hebreo sín. La ko janhan mé tinkáchónkia tí ley éxi tinkáchónki tí sín fariseo.

⁶ A ntá imá k'uénínkakhonhan k'uéchonkíha tí sín tinkáchónki Jesús la ko imá kjuíntaxiteyáha tí ley la kohya ninkexró tsontáchro kixin chaxínhya tíha.

⁷ Ntá kaín tíha la tí ósé k'uékjenkayáxian janhan kixin sínkí tíha, a ntá ijie la tinkáchónkia Cristo la ntá tí nkehe k'uékóxrjina k'uékjít'a la ntá jie la ninkehó sínkíhya.

⁸ La kjaxin kaín xín nkehe t'íkuan éxi chónkó tíha kixin antsí má tjeotan tsochoxián Ìnchéni Jesucristo. Kaín kjuaxrexinkaon jínahya k'uéchonta la kjuíntak'itjáyana kixin ijie ó tinkáchónkia Cristo la kaín xín tí nkehe k'uéchonta la t'íkuan éxi chjínínó ó kixin ntá xikaha jina chrókjuak'ékian Cristo.

⁹ Chrókóchána kixin jnkokoá chrók'uejókoni ch'an. Tjéyáhya kixin tí ley chrókjuinín xín ijíeni tí chrókjuinchexiteyéhéni. Náhi. Tinkáchónkia Cristo la tsaáxinni kixin Dios la tsjakjiin tí ijíeni kixin tinkáchónkini ch'an.

¹⁰ Tí nkehe tjínkavan na tsochoxián Cristo la ko tsochonta tí kjuachaxin kjuakoxin ch'an tíó xechón ch'an la ko tjínkavan tsjasótexinna éxi kjuasóte ch'an la ko kjónté chrók'uénna éxi k'uénxin ch'an

¹¹ kixin ntá tjínkavan tsjácha tsoxechónna inaá.

Ch'in Pablo tjinkaon chrókjuacha ch'an

¹² Ntáxrjanhya kixin kjuácha kaín tíha la ko ntáxrjanhya kixin imá ntoá tjén. Kjánchó janhan tjínkavan tsjácha kaín tíha kixin Cristo Jesús mé kjueyána ch'an senó xikaha.

¹³ Kichóni, ntáxrjanhya kixin janhván kjuácha tíha. Náhi. Janhan mé ts'itjáyana kaín xín tí nkehe ó kúitohe senó la t'ichjánxin kaín asenná tjichráha tí nkehe naxa t'itjáyana tsjácha.

¹⁴ Kixin xikaha ntá chrókjuácha chrók'uayáha kaín tí nkehe jina tsjanjon Dios. Jehe ch'an la sinchexiteyá kaín tíha kixin tinkáchónkia Jesucristo.

¹⁵ Kaínni tí tinkáchónkini Jesús kaín asénni la méxra xikaha chrókjuenkayáxinni. A ntá tí ókjé nkexrí tjenkayáxinrá la Dios mé nchexraxinkaonrá ch'an kixin ntoáhya tíha.

¹⁶ A ntá t'ichjánxin chrók'uejóni éxi tí nkehe ó kjuachani.

¹⁷ Kíchóni, chrók'uejorá éxi kjuak'é janhan la ko chrótsjehérá nkexri tjejó tí í so chojni tjejóch'e éxi kjuakoni kixin xíkaha kjuakoharáni tí jahará.

¹⁸ Nchónhya xrjanakaxián senó la ntá xrjanka inaá la imá tsjanika kixin síin nchónhya sín tjejó sín éxi níinkakonhen sín tí Cristo k'uénxin ntacruz.

¹⁹ Tí sín a mé ts'itjáyan sín. Tí dios kuènte sín la mé tí nkehe ntáchro asén sín ó la ko tjinkaon sín chrókjuinchehnkexín sín tí nkehe chrókósuèxin sín. Jehó tjenkayáxin sín tí nkehe síin chjasintajni ó.

²⁰ A ntá jeheni kaín ni la mé chojni kuènte nkajni la tjejóchónhenni kixin ts'inkajinxin nkaya nkajni tí nkeexo tsaáxinni, mé Ìnchéni Jesucristo.

²¹ Ntá jehe ch'án mé tsjinki ch'án tí cuerpo náxrjónhya chóntani kixin ntá tí cuerpo chóntani tsoyóhe éxi tí cuerpo náxrjón chónta ch'án. Tíha mé tsoxiteyá kjuachaxián ch'án jíé kixin ó chónta ch'án kjuachaxin ts'etueñhen ch'án kaín xín nkehe.

4

Jnkochrixin chrókócháhará kixin tinkachónkirá Ìnchéni

¹ Jahará kichó ni imá tjuahará la ko imá tjínkavan chrókjuasántsajahará tí jahará kixin jahará imá nchechánará kixin jahará mé éxi ijnko nkehe ó kjuácha. Méxra jina chrók'uejorá chrókuinkachónkirá Ìnchéni kixin tjuahará kichó ni.

² Xrjanógha tjan Evodia la ko tjan Sintique kixin jnkokoá chrókjuenkayáxin sín kixin jehe sín la jnkokoá kichó sín kixin tinkáchónki sín Ìnchéni.

³ Jaha la jina k'uéjóni kjuich'eni xra, méxra xrjanógha tjínkita tí sín chjin kichó ni kixin jnkokoá chrókjuenkayáxin sín. Jehe sín kjaxin kjuich'e sín xra tíó kjuakoni tí tan jina tsaáxinni. Koi tí ch'in Clemente la ko í so sín kjuich'ekoni xra. Tí ihnjé sín la ó ts'inixín ts'inixín ihnje chojni tsaá.

⁴ Nchechéhérá asánrá jnkochrixin kixin tjejókoará Ìnchéni. Inaá kjatée xrjanika nchechéhérá asánrá.

⁵ Kaín chojni chrókónohe kixin jahará la chojni jínará. Chrórxáinkáonrá kixin í séhya tsokjan Ìnchéni.

⁶ Tóxakuanhyará ninkehó. Íchá jina chróchenkará Dios kaín xín nkehe la chrókjuancheherá ch'án kaín nkehe t'ichjánxinhanrá la kjaxin chrókjuancheherá ch'án kjuasáya.

⁷ A ntá jehe ch'án mé tsojtáhará kjuaxróxin. Jeheni tsjachahyani tienxinni tí kjuaxróxin kuènte ch'án kixin imá ijíé tíha. Tí kjuaxróxin mé ts'ayakonhen asánrá la ko ts'ayakonhen tí kjuaxrexinkaon kuéntará kixin jnkokoá tinkáchónkirá Cristo Jesús.

Tjenkayáxinrá tí nkehe jina

⁸ Méxra tsjixixín tétuanhanrá kichó ni. Tjenkayáxinrá kaín tí nkehe chaxín, la ko kaín tí nkehe kjuasáya, la ko tí nkehe ntoá la ko tí nkehe jina. Mé xíkaha tjenkayáxinrá kaín xín tí nkehe náxrjón la ko tí nkehe tóxrjínhin Dios.

⁹ Chrókjuich'erá kaín tí nkehe kjuákoahará la ko tí nkehe kuínhínrá xrjanika la ko tí nkehe kuétuanhánrá la ko tí nkehe k'uikonrá kjujt'a, mé kaín tíha chrókjuinchehiteyará la ntá tí Dios tjanjon kjuaxróxin mé ts'ejókoará ch'án.

Tí ofrenda kjuanjon tí sín filipenses tsjinkitsa sín tí ch'in Pablo

¹⁰ Ìnchéni imá nchechána kixin jahará xráinkáonrá tí janhan inaá. Ntáxrjanhya kixin tsík'itjáyanhanrá tí janhan kixin jahará xitjahya k'uékjínkitsará tí janhan.

¹¹ Jehya kixin ntáxrjan tíha kixin imá t'ichjánxinna kixin janhan na ó kuánna kjuaxróxin tjén kjónté tí nkehe chonta ó.

¹² Janhan ó kuánna tjén kjónté nóana la ko kjaxin ó kuánna tsochonta itsjé nkehe. Kjónté ichrén nkehe ts'átsinka la ó tsjácha kjónté á kjoné jina o náhi la kjónté á chróchonta ichrén nkehe ó á chróchontaha ninkehó la ántoséna.

¹³ Kaín xra tsjácha sjt'a kixin Cristo tsjinkitsana.

¹⁴ Kjánchó jahará jina kjuich'erá kixin kjuinkitsará kjuánjonrá nkehe t'ichjánxinna.

¹⁵ Tíó sákjuixian estado Macedonia la kjuankixian kjuakua tí tan tsaáxinni inaá la jahórá tí núnko chjasin Filipos ichr'anrá chichaon k'uayágha kixin cháhará kjuákoahará itén Dios.

¹⁶ Kjaxin tíó naxa kjuak'é chjasin Tetalónica la jahará ichr'anrá chichaon iso veces kixin kjuinkitsará tí nkehe k'uichjánxinna ntaha.

¹⁷ La jehya kixin tjínkavan kixin jehó nkehe chrók'uayágha. Náhi. Jehí tjínkavan kixin jahará antsí má chrókjuich'erá tí nkehe tjinkaon Dios kixin ntá antsí chrókjuachará.

¹⁸ Ó k'uayágha kaín nkehe tsikánjonrá la antsí itsjé chonta. Ó k'uayágha tí nkehe tsichr'anrá mé tí nkehe kuikao ch'in Epafrodito, la kaín tíha la ó tsjácha. Tíha la éxi yóhe ijnko nkehe xraxé náxrjón chróchjehérá Dios mé éxi ijnko iko chrók'oyánrá imá chrókóxrjínhin ch'án.

¹⁹ Tí Dios kuèntana mé tsotjáhará kaín xín nkehe naxa t'itjáyan tsákjára kixin chóna ch'án kaín xín nkehe imá náxrjón tjeté la tsjanjon ch'án kixin jahará la tinkachónkirá Cristo Jesús.

²⁰ Kjuasáyé It'éni Dios jnkochrírín. Mé xíkaha tsoxiteyá. Amén.

Tsjixixín nixja ch'ín Pablo

²¹ Janhan tjinkavan tsonixjehérá kaín tí sín tinkáchónki Dios la ko Jesucristo ntiha. Tí sín kichó ni tjejókoni ntihi nixjahará sín.

²² Kjaxin kaín tí sín tinkáchónki Dios la ko tí sín ch'ehe xra tí ch'ín t'etqan romano mé nixjahará sín.

²³ Tjánháha kixin Ìnchéni Jesucristo mé chrókjuintayaonrá ch'án kaín rá. Amén. Ó tjen.

Tí xroon tsíkjin ch'ín Pablo chr'énnen ch'án tí sín chjasin Colosas

Ch'ín Pablo ikjin xroon k'uáyéhe tí nínko chjasin Colosas

¹ Janhan Pablo tsíkjeýána Jesucristo t'ahá ch'án xra kixin xikaha tjinkaon Dios, la ko kichó ni Timoteo

² mé ikjinni tí xroon i tsochr'ánharáni tí jahará tsíkjinchetjóará Dios la ko kuítekáonrá Jesucristo tjejórá chjasin Colosas. Kjuasáýé It'éni Dios chrókjuintayaonrá kixin kjuaxróxin chrók'uejórá.

Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo

³ Jnkochr'ín tjancheheni kjuasáya Dios la ko tjanchiani kixin chrókjuintátsa ch'án tí jahará mé jehe ch'án It'é Ìnchéni Jesucristo.

⁴ Ó kuínhini kixin jina tinkáchónkirá Ìnchéni Jesucristo la ko tjuèhéra kaín tí sín ó tsíkjinchetjóá Dios.

⁵ Mé xikaha tjejochonhénra kixin ts'ayéhéra tí nkehe chóna Dios tjen nkaya nkajni. Jahará la xikaha tjejochonhénra kixin tjejotinhínra tí tan chaxín kuènte Dios tsaaxinni.

⁶ Tí tan i mé kuínhin chojni la itsjé sín tinkáki tekaon sín la tinkák'ánki tí kjuachaxin kuènte Dios kuènte chjasintajni. Mé xikaha kónhen tió kuínhínra la ko kuítekáonrá kixin chaxín tjuahará Dios.

⁷ Tíhi mé kjuáqohará kichó ni Epafras. Jehe ch'án la jnkokoá kjuich'ekoni ch'án xra kixin jehe ch'án la jina ch'ehe ch'án xra Cristo kixin xikaha tjinkítsa ch'án tí jahará.

⁸ Jehe ch'án mé kuí ch'án ntihi chrónka ch'án nkexri tjuèhéra kichuára kixin Nchakuen Dios tjinkítsa tí jahará.

⁹ Méxra xikaha tí yaon tió kuínhini nkexri tjejórá la títoehyani tjancheheni Dios kixin tsjinkítsa tí jahará kixin tsonohará jina nkexri tóxrjínhin ch'án la ko tjanchiani kixin tsjanjon ch'án kjuachaxin kixin tsiénxínra kaín nkehe kuènte ch'án.

¹⁰ Tjancheheni ch'án kixin jina chrók'uejórá kixin tinkáchónkirá Ìnchéni la ko chrókuítóehyará chrókjuich'erá éxi tóxrjínhin tí jehe ch'án. Ntá jina chrókjuachará chrókjuich'erá xra kuènte ch'án la ntá chrókónohará jina nkexri tjen Dios.

¹¹ Tjanchiani kixin jehe ch'án chrókjuintátsa kixin chrók'uejórá fuerte kixin tí kjuachaxin jíe kuènte ch'án kixin ntá chrókjuachará la kjónté ichrén nkehe chrókónhanra la chrókóninkákonhyará.

¹² La ko chrókócháhará chróchjehéra kjuasáya It'éni Dios kixin kjuanjon ch'án kjuachaxin kixin ts'áyéheni tí nkehe tí tjen tí t'inkaséyan mé tí nkehe ts'áyéhe kaín tí sín tsíkjinchetjóá tí jehe ch'án.

¹³ Jehe ch'án mé kuakitsjekjanxinni ch'án tí sitié la ntá kjuanjon ch'án kjuachaxin ts'ejóni tí t'etóan tí Xjeen ch'án, tjuèhe ch'án.

¹⁴ Jehe ch'án kjuínchekaáni ch'án kixin k'uenyákonhenni ch'án la tí injié ch'án mé kjuenka ch'án tí ijieni.

Kjuaxróxin ts'ejóni Dios kixin k'uenyákonhenni Cristo

¹⁵ Éxi tsjehe Cristo mé xikaha tsjehe Dios kjónté xitjahya t'ikonni tí jehe ch'án. Cristo la ó xráxin tjen tí naxa t'ónahya ninkehó.

¹⁶ Kjuachaxién tí jehe ch'án kjuich'énoxin Dios kaín tí nkehe siín nkajni la ko chjasintajni la ko kaín tí nkehe naxa t'ikonhyani la ko tí nkehe ó t'ikonni. Kjaxin kaín tí sín ángel t'etóan la ko chóna kjuachaxin la mé jehe ch'án kjuich'éna ch'án kixin sich'ehe sín ch'án xra.

¹⁷ Cristo la ó xráxin tjen kjónté naxa t'ónahya ninkehó la jehe ch'án t'ayakonhen ch'án kaín nkehe siín kixin tí kjuachaxin kuènte ch'án.

¹⁸ La kjaxin jehe Cristo mé tí kja t'etuenhen tí cuerpo mé tíha mé tí nínko. Jehe ch'án senó xechón ch'án kixin jehe ch'án mé ts'etuenhen ch'án kaín nkehe siín.

¹⁹ Dios tjinkaon chróchjéhe ch'án tí Xjeen ch'án kjuachaxin éxi tí kjuachaxin chóna tí jehe ch'án.

²⁰ Kjaxin tjinkaon Dios kixin kjuachaxién Cristo chrók'uixin kjuaxróxin nkuixin mé chjasintajni la ko nkaya nkajni. Mé xikaha tsjasin ch'án kjuaxróxin kixin jehe ch'án kjuák'enkáni ch'án ntacruz ik'uén ch'án.

²¹ Jahará la óse ikjin k'uék'ejorá la k'uéninkákonhénra Dios kixin tí nkehe jínahya k'uékjich'erá. A ntá jie la kjuaxróxin tjejokoará Dios

²² Kíxin k'uenyákonhánrá Cristo, kjuasóte tí cuérpóe ch'án. Mé xíkaha kónhen ch'án kíxin ntá tsjanjon ch'án tí jahará ts'áyéhe Dios kíxin kjuíntatjóará ch'án, a ntá jie la chontahyará ninkehó jie.

²³ Méxra xíkaha chrókuijóéhyará chrókuinkachónkirá Ìnchéni la ko chrókuijóéhyará tí nkehe tjejóchonhénrá kíxin ó kuinhínrá tí tan tsaáxinni. Tí tan i mé ó chrónka chojni kuénté chjasintajni la ko janhan Pablo kjaxin tjínkítsa xrjanka xíkaha.

Ch'ín Pablo ch'e ch'án xra kuénte nínko

²⁴ Méxra ijie la tjasótexinna kíxin tí jahará la chàna kíxin xíkaha mé tsjintaxín tjasóte janhan kíxin tí nkehe t'itjáyán tí naxa chrókjuasóte Cristo kíxin jehe ch'án mé kjuasóteyákonhen ch'án tí nínko mé tí cuérpóe ch'án.

²⁵ Mé xíkaha Dios kjueyána kíxin sít'a xra kuénte nínko kíxin xíkaha tí xra k'uetuanna ch'án kíxin ntá jína chrók'uejoxínrá tí jahará kíxin chrókjuintaxín chróxrjankaxián tí itan kuénte Dios.

²⁶ Tí nkehe ninkexró k'uénoehya tjemá ósé nchónhya nánó a ntá ijie kjuínchenohe Dios kaín tí sín tinkáchónki tí jehe ch'án.

²⁷ Dios tjínkaon chrókjuinchenohe tí jehe sín tí nkehe tjemá náxrjón tjehe ts'áyéhe tí sín jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejóchonhénrá ts'ayéhérá tí kjuachaxin jie kuénte ch'án.

²⁸ Jeheni mé chronkaxínni nkehe kuénte Cristo la nchexraxinkaonni kaín chojni la ko tjakoheni sín kíxin chrókuienxín sín jína. Ntá jnkojnko sín chrók'uánkí kjuaxrexinkaon kuénte sín kíxin tinkáchónki sín ch'án.

²⁹ Méxra xíkaha tí xra it'a la kaín asenná it'a xra tí kjuachaxién chjina Cristo.

2

¹ Tjínkavan chrókónohará kíxin nchónhya xra kjuít'a kíxin chrókjuínkítsa tí jahará la ko kjaxin tí sín tjejó chjasin Laodicea la ko kaín tí í so sín naxa t'íkonhya tí janhan.

² Tjínkavan kíxin jehe sín chrókóchéhe asén sín la ko jnkokoá chrókjuenkayáxin sín chrótjuehe sín kichó sín. Mé xíkaha chrók'uánkí kjuaxrexinkaon kuénte sín chrókuienxín sín jína kíxin ntá chrókónohe sín tí nkehe ninkexró k'uénoehya kuénte It'éni Dios, mé Cristo tíha.

³ Jehe ch'án chónka kaín xín kjuaxrexinkaon kuénte Dios la jehe ch'án mé nohe ch'án kaín nkehe.

⁴ Kaín tíha xrjanka kíxin ntá ninkexró chrókjuít'ayahyará tí jahará kíxin tí náxrjón chrónixja sín ó.

⁵ Kjonté tjenhya tí cuerpo kuéntana tí tjejórá la ntá nchakuenná la mé tjen ntíha kíxin xráxinkavan tí jahará la chàna kíxin t'íkuan kíxin jína tjejórá naxa tinkachónkirá Cristo.

⁶ Méxra xíkaha kuinkachónkirá Ìnchéni Jesucristo la mé xíkaha jnkokoá chrókjuenkayáxinkoará tí jehe ch'án.

⁷ Éxi jínko nta tsíkji nuéé nínka mé xíkaha chrókuinkachónkirá tí jehe ch'án éxi kjuakohará ch'án la ko chrókjuanchehérá Dios kjuasáya jnkochríxin.

Cristo tjanjon jínko ntia nixin

⁸ Chrókuijóéhyará kíxin ninkexró chrókjuít'ayahará kíxin tí nkehe ntoáhya chrókjuakohará sín. A ntá jehe sín chrónkahya sín éxi tjínkaon Cristo. Náhí. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuénte tí nkehe jínahya siín chjasintajni.

⁹ Kaínxín kjuachaxin chónka Dios mé chónka Cristo kjonté k'óna ch'án chojni.

¹⁰ La jahará chontará kaín kjuachaxin kuénte Dios kíxin ó tinkachónkirá Cristo. Jehe ch'án t'etuenhen ch'án kaín nkehe siín la ko t'etuenhen ch'án kaín nchakuen t'etqan.

¹¹ Kjaxin tió kjuankíxinrá tinkachónkirá Cristo ntá jehe ch'án kjuanjon ch'án jnko xroye k'uayéhérá kjánchó jehya tí xroye kuénte tí cuerpo. Náhí. Kjuakjlin ch'án tí jie k'uékóxrjínhanrá la kjuíntakaará ch'án, mé tíha mé tí xroye kjuanjon Cristo.

¹² Tí kuíkiterá jahará mé xíkaha éxi xravákoará Cristo. Ntá ó xechón tí jehe ch'án la kjaxinrá xechónrá kíxin ó kuítekáonrá tí kjuachaxin kuénte Dios kíxin Cristo la ó xechón ch'án inaá.

¹³ Jahará ósé la éxi tsík'en asánrá k'uék'ejorá kíxin tí jie k'uéchontará kíxin k'uéchonhyará Dios la k'uéchontahyará xroye kuénte ch'án. A ntá ijie la éxi xechónrá kíxin Cristo kjuatsen tí jie chontará.

¹⁴ Mé Dios kjuatsen ch'án kaín tí nkehe tsík'etqan ch'án ósé kjuachahyani nchexiteyáni la ko kjuatsen ch'án kaín tí jie k'uéchóntani kíxin Cristo kjuák'enkáni ch'án tí ntacruz la xíkaha kjuatsenxin ch'án tíha.

¹⁵ Cristo k'uenyákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchénta tí nchakuen jínahya kixin jehe ch'án kjuinchesuèhe ch'án tí sín jínahya noxín kixin jehe ch'án mé kjuacha ch'án.

Tjéyará tí nkehe siín nkaya nkajní

¹⁶ Méxra ninkexró chrókjontahyará kixin tí nkehe chrókjónterá o tí nkehe chrók'uirá o á tjíkosáyehérá tí yaon kia o tí nitjío nixin o tí yaon t'ok'éheni.

¹⁷ Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha.

¹⁸ Méxra chrókujtoéhyará kixin ninkexró chróntácho sín kixin ts'itjáyánrá kixin tinkachónkihyará tí sín ángel, tsixro sín. Tí sín a mé chrónkaxín sín tí nkehe éxí kotáchrién sín t'íkoxín sín la nchehnke sín kixin tí nkehe t'axrjeníxin kja sín ó.

¹⁹ A ntá jehe sín la chaxínhya tinkáchónki sín Cristo kixin jehe ch'án mé tí kja t'etuenhen kaín ní la jehe ch'án mé ch'éna ch'án jnkokoá cuerpo kuènte ch'án kaín ní la nchek'ánkí ch'án tí cuerpo kixin jehe ch'án t'ayakonhenni ch'án kixin xíkaha tjinkaon Dios.

²⁰ A ntá jahará la ó k'uénkoará Cristo la kuítghérá tí nkehe k'uék'etóan kuènte chjasintajni ó. ¿A ntá nkekuénté naxá tjejorá éxí tí chojni siín chjasintajni chrókjuinchesiteyará tí nkehe t'etóan sín?

²¹ Mé xíkaha t'etóan sín kixin jahará chrótsehyará tíha la chrókjóntehyará tí nkehe la chrókuákjáhýará nkehe.

²² Kaín tí nkehe ntáchro sín mé nixja kuènte tí nkehe tsjeje lá tíha mé t'axrjeníxin ikja chojni ó.

²³ Chaxín kixin jehe sín ntáchro sín kixin jína xíkaha sinchexiteyá sín kixin tinkáchónki sín tí sín ángel la nchehnkehya sín la ko itsjé nkehe ch'ehe sín cuérpoé sín, kjánchó kaín tí nkehe ch'e sín xíkaha la chónkó kixin tjinkítsahya kixin chrókuítghe sín tí nkehe ntoáhya tjenkayáxin sín.

3

¹ A ntá tí jahará la ó tsíxechónkoará Cristo. Méxra chrókjuéyará tí nkehe siín nkaya nkajní kixin Cristo la ntiha tjetjaxín ch'án tí tja chjina Dios.

² Chrókjuenkayáxinrá tí nkehe siín nkaya nkajní. Chrókjuenkayáxinhyará tí nkehe siín chjasintajni.

³ Kixin jahará la ó ik'uenrá la ntá ijie la Cristo la ko Dios chónthe tí kjuachón kuéntará.

⁴ Jehe Cristo mé chontaxínrá kjuachón jahará la tió tsokjan tí jehe ch'án ntá kjaxínrá ts'ejókoará ch'án ntá ts'íkonrá tí kjuachaxin jié kuènte ch'án.

Tí ntiantaxin la ko tí ntia nixin

⁵ A ntá chrókujtohérá kaín tí jié tjenkayáxinrá chjasintajni. Ninkexró chrókjuasinko jié chojni chjin ókjé, la ninkexró chrókjuich'e nkehe jínahya, la ko ninkexró chrókjuich'e ninkehó tí nkehe ntáchro asén sín, la ko kjaxín chrókóxrjénhya sín chróchénta sín itsjé nkehe kixin tíha mé yóhe tí chróxraxinkaon sín tí nkehe tsíkjanoya.

⁶ Méxra tí nkexro titekakonhya tí nkehe t'etóan Dios la tsonínkakohen Dios tí jehe sín la sinchekjasóte sín ch'án.

⁷ Mé xíkaha k'uékjich'erá jahará tí ósé.

⁸ Méxra ijie chrókujtohérá kaín tí kjuanínkaon la ko tí nkehe tjak'e asánrá la ko tí nkehe jínahya la ko tí t'antaxínhínrá kichuárá la ko tí nkehe jínahya t'axrjénir'ívará.

⁹ Chrókjuich'iyéhyará kichuárá kixin ósé xíkaha k'uékjich'erá a ntá jie la ó chrókujtohérá kaín tí nkehentaxin k'uékjich'erá.

¹⁰ A ntá jie la ó tsík'ónará ijnko chojni nixin. Dios tinkánchetjóará ch'án kixin ts'ónará éxí tí jehe ch'án kixin jehe ch'án kjuich'éna ch'án tí jahará. Mé xíkaha chrókjuixraká chróchoxínrá tí jehe ch'án jína.

¹¹ Jehya tjetóan á chojni judío o náhi o á chojni tsíka xroye o náhi o á chojni tsíkjixín kjín o náhi o á chojni noehya o á chojni ch'exón xra o á chojni t'etóan. Tí nkehe tjetóan la tinkáchónkini Cristo la jehó ch'án t'etuenhen kaín nkehe.

¹² Dios la tjuèhe ch'án tí jahará la tsíkjeýará ch'án kixin tsinkachónkirá ch'án. A ntá jahará la ó k'ónará ijnko chojni nixin la chrókujkonóhérá kichuárá la jína chrók'uejorá la ko chrókjuinchehnkehýará la ko chrókójjahýará la ko chrókóninkákonhyará.

¹³ Chrókóninkákuénhyará kichuárá la chrók'uitjáyánhanrá ichrén jié kjuasinhanrá í jnko chojni kixin Cristo la k'uitjáyénhen ch'án tí jié kjuasínrá la kjaxín jahará la xíkaha chrókjuich'erá.

¹⁴ Mé xíkaha chróttjuéhérá kichuárá la jnkokoá chrókjuenkayáxinrá.

¹⁵ Tí kjuaxróxin kuènte Cristo mé chrók'uegtuenhen asánrá kixin xíkaha kjuenkayáxin Dios k'uíyahará ch'án kixin chrók'ónará jnkokoá cuerpo kuènte ch'án mé xíkaha chrókjuancheherá ch'án kjuasáya.

¹⁶ Tí tan kuènte Cristo jnkochrìxín chróchónta asánrà. Mé xíkaha chrókjuákohérá kichuárá la chrókjuínchechéhérá kichuárá kaín kjuaxrexinkaon jína. Chrótsjerá salmo la ko himno la ko canto kuènte Dios la chrókjuancheherá Dios kjuasáya kaín asánrà.

¹⁷ Kaín xra chrókjuích'erá la ko tí nkehe chróntáchrórá la kaín táha chrókjuanchaxínrà ihnjé Ìnchéni Jesús la chrókjuanchehérá kjuasáya It'eni Dios kjuachaxièn Jesucristo.

Jnkójina chrók'uejóko kichó tí sín tinkáchónki Cristo

¹⁸ Jahará chojni chjin la chrókjuínchexiteyéhérá tí xiyará kixin mé t'ichjánxin xíkaha chrókjuích'erá kixin tinkáchónkirá Ìnchéni.

¹⁹ Jahará chojni ntoa la chrótuéhérá tí ichjiánrà la chrókóninkákuénhyará tí jehe tjan.

²⁰ Jahará chánjanrà la chrókjuínchexiteyéhérá it'ará la ko inará kaín nkehe chrók'uetqan sín kixin xíkaha mé tóxrjínhin Ìnchéni.

²¹ Jahará it'é xjan la chrókjuínchekóninkakonhyará tí xjaanrà kixin tí xíkaha la chrókjuínchek'ávahyará tí jehe xjan.

²² Jahará chojni ch'exón xra chrókjuínchexiteyéhérá tí lámóará ntihi chjasintajni. Jehya kixin tí tjejótsjehe sín ó chrókjuích'erá xra kixin ntá jína chrók'uejoxínrà. Náhi. Kaín asánrà chrókjuích'erá xra kixin ó nohará kixin xíkaha ch'eherá Ìnchéni xra.

²³ Kaín nkehe chrókjuích'erá la kaín asánrà chrókjuích'erá xra éxi chrókjuích'eherá xra Ìnchéni la jehya kixin éxi chojni ó chrókjuích'eherá xra.

²⁴ Ó nohará kixin Ìnchéni la sintakítõnhanrà tí nkehe chóna ch'án kixin jahará ch'eherá Cristo xra la jehe ch'án mé chaxín Ìnchéni.

²⁵ A ntá tí sín ch'e tí jínahya tsjacha sín tí nkehe jínahya kjuích'e sín kixin Dios la tikonóehya ninkexró ch'e tí nkehe jínahya.

4

¹ Méxra jahará lámorá la jína chrónixjehérá tí sín t'ahará xra. Chrórxáinkáonrà kixin kjaxinrà jahará chontará ijnko Dios tjan nkaya nkajni.

² Chrókuítóehyará nixjehérá Dios la ko chrókjuanchehérá ch'án kjuasáya.

³ Kjaxin tjanchehérá ch'án tsjinkítsa tí jeheni kixin tsjanjon Ìnchéni kjuachaxin chrókuínhin chojni tsochrónkaxinni tí itén Cristo. Tí xra k'uénoehya ninkexró mé tjechjínaxián jie.

⁴ Tsjanchehérá Dios kixin tsjinkítsa ch'án tí janhan kixin chrókjanxjan jína chrókjuákua éxi tjinkaon Dios.

⁵ A ntá jahará la jína chrókjuákohérá itén Dios tí sín naxa tinkáchónkihya Ìnchéni kixin kánhyó tiempo sín kixin tsjákorá.

⁶ Chrónixjehérá sín jnkójina kixin chrókóxrjínhin sín la chrókónohará chrókjuáteherá nkexrí tsixro jnkokjnko chojni.

Kjuixin nixja ch'ín Pablo

⁷ Kichóni Tíquico, mé ijnko nkexro jína tjinkítsa tí janhan ch'ehe Ìnchéni xra, mé tsjiji ch'án tsochrónka ch'án nkexrí tjeñ janhan.

⁸ Méxra kuétuanhan ch'án tsjiji ch'án tí tjejorá kixin tsonohará kixin nkexrí tjejóni kixin chrókócháhará.

⁹ Jehe ch'án la ko kjaxin ch'ín Onésimo mé tjuèheni kichó ni la ko jehe ch'án mé kjaxin jína ch'e ch'án xra, la mé tsjijtsjehe sín tí jahará. Jehe ch'ín Onésimo mé sín chjasánrà. Jehe sín mé tsochrónka sín kixin nkehe sítonhen tí tjejóni ntihi.

¹⁰ Ch'ín Aristarco mé jnkokqá tjechjinakian ch'án ntõechiso mé nixjahará ch'án la ko kjaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhénrà tí ch'ín Marcos tí tsjijtsjehe ch'án tí jahará la chjehérá ch'án kjuachaxin tsjak'e ch'án jína.

¹¹ Kjaxin nixjahará ch'ín Jesús, kjaxin tikjitéxin sín ch'ín Justo. Jehó tí sín a mé sín judío tinkáchónki Cristo, a ntá ijie tjinkítsa sín tí xra tjet'a la chrónkaxin sín nkehe kuènte tí kjuachaxin kuènte Dios. La tí sín a mé imá kjuínchchàna sín tí janhan.

¹² Ch'ín Epafra nixjahará ch'án. Mé jehe ch'án ch'ehe ch'án xra Cristo la jehe ch'án mé sín chjasánrà. Jehe ch'án jnkochrìxín chrónóehé ch'án Dios tjinkaon ch'án kixin kaín asánrà chrókjuínchekónkirá Dios éxi tjinkaon ch'án.

¹³ Ó nõna kixin ch'ín Epafra la tóxakonhen ch'án kixin tí jahará la ko tí sín tjejó tí chjasin Laodicea la ko Hierápolis.

¹⁴ Ch'ín Lucas, mé tí ch'ín ch'e xroqan, la kjaxin nixjahará ch'án la ko kjaxin ch'ín Demas nixjahará ch'án.

¹⁵ Nixjehérá tí sín kichó ni tjejó chjasin Laodicea la kjaxin nixjehérá tjan Ninfas la ko tí sín tójkotsé ntøe tjan.

¹⁶ Tió tsjixin sinchekuáxinrá tí xroon tsíkjihi tí tjejórá ntiha la ichr'anrá xroon sátsji sinchekuáxin tí sín tjejó ninko chjasin Laodicea la ko kjaxin sinchekuáxinrá tí xroon tsíkjihihi tí jehe sín tió tsjiji tí xroon tí tjejórá.

¹⁷ Kjaxin chenkará ch'ín Arquipo kixin chrókuinchexiteyá ch'án jína tí xra tsíkjanjon Ìnchéni sich'e ch'án.

¹⁸ Janhan Pablo tjaná kjinxiān tí palabra nixjəhará. Jahará chróxráxinkáonrá kixin janhan la tjechjina la Dios mé chrókjuintayaonrá. Amén. Ó tjen.

Xroon saoxín ikjin ch'ín Pablo chr'énnen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kíchó ni nínko chjasin Tesalónica kixin jnkokoá tinkáchónkini It'eni Dios la ko Ìnchéni Jesucristo. Kjuasáyé It'eni Dios la ko Ìchéni chrók'uejorá.

Tí sín óké chjasin mé kjuíncheyóhe sín tí sín Tesalónica

² Jnkoyaxón chjeheni Dios kjuasáya la ko t'ákjenxinni tí jahará kaín rá kixin jehe ch'án mé chrókjuinkitsa ch'án tí jahará.

³ Tió nixjeheñi It'eni Dios xraxinkaonni kixin kaín asánrá kuítekáonrá Ìnchéni, a ntá tjejoch'erá xra la ko imá tjuèhérá kichuára ntá jnkokoá tjejochonhénná tsokjan Ìnchéni Jesucristo.

⁴ Kíchóni jahará, imá tjuahará Dios la ó noheni kixin jehe ch'án tsíkjeýará ch'án tí jahará.

⁵ Na mé xikaha tió kjuíjini chjasánrá kjuakoharáni tí tan jina nixin tsaáxinni chrónkani na jehya iténni ó. Náhi. Kjaxin kjuachaxièn Nchakuen Dios kjuakoxinni la ko tí Nchakuen Dios mé kjuínchenoheni kixin tí itan kjuakoni la chaxín ntoá. Jahará la ó nohará jina kixin nkexrí k'uejóni tí tjejorá kixin xikaha chrók'uejorá chrókjuakoxinná.

⁶ Mé xikaha kjuíncheyóhérá tí jeheni la ko kjuíncheyóhérá tí Ìnchéni Jesucristo. A ntá tió kuínhinná tí itén Dios ntá kaín asánrá kuinkachónkirá Ìnchéni la ko kócháhará kixin tí Nchakuen Dios mé t'etuènnen asánrá kjónté nchónhya nkehe k'uatáinkará.

⁷ Mé xikaha kjuakuejinná kaín tí sín tinkáchónki Ìnchéni ntiha estado Macedonia la ko tí sín estado Acaya.

⁸ Jahará kjuakoxinná tí itén Dios la jehya jehó estado Macedonia la ko tí estado Acaya kjuakoxinná. Náhi. Na mé kaín chjasin chjinaxón ntiha kuínhin sín kixin nkexrí tinkáchónkirá Dios. A ntá jeheni na í t'ichjánxinhya í jnko nkehe naxa chróchronkani,

⁹ kixin ijie jehe sín mé tjejóchronka sín kixin nkexrí kjuíjini chjasánrá a ntá kaín rá kjuánjonrá kjuachaxin k'uejóni la ko kuítekáonrá tí itén Dios kjuakoharáni la ntá kuítóhérá kaín tí nkehe tsíkjangya kixin ntá kjuankixinná kuinkachónkirá Dios tjejochón chaxin.

¹⁰ La ko kjaxin tjejóchronka sín kixin jahará tjejochonhénná tsokjanxin nkaya nkajni tí Xjeen Dios na mé Jesús. Ó kjuínchexchón Dios tí Xjeen ch'án Jesús ntá jehe ch'án mé sinchekaáni kixin chrókjuasótexínhyani tí nkehe jínahya chrókjuasótexinni itsi.

2

Tí xra tsíkijeh'e ch'ín Pablo tí chjasin Tesalónica

¹ Kónohará kaín rá kíchó ni kixin jehya chónkó kjuíjini chjasánrá.

² Ó kónohará kixin senó tí sín chjasin Filipos k'uekjinchekjasóteni sín la ko k'uek'ántaxinhinni sín. Kjánchó Dios mé kjuínkitsa ntá chrakonhyani kjuakoharáni tí tan tsaáxinni kuènte Dios kjónté imá k'ueíninkakonhenni sín.

³ Kónohará kixin jehya ntoáhya kjuakoharáni la ko jehya ijnko nkehe náxrxónhya kjuakoni la ko kjuít'ayahyaráni ninkehó.

⁴ Náhi. Dios mé kjuéyá ch'án tí jeheni kixin chrókjuakoni tí tan tsaáxinni, mé xikaha ntoá tjakoni. Jehya kixin chojni ó nchechéheñi. Náhi. Nchechéheñi Dios tí nkexro nohe nkehe tónhen asénni.

⁵ Ó nohará kixin kjuích'iyaxínhyani itan imá náxrxón kixin xikaha chrókuakitsjexinni chichaon chrókjuachani. Náhi. Dios la ó nohe ch'án kixin xikahya kjuích'eni.

⁶ Tjeyáhyani kixin chojni chrókjuikosáyeheni sín la á jahará la o í so chojni. Náhi, xikaha ch'eni, kjónté chóntani kjuachaxin chrók'uetuanhanráni kixin chrókjuánjonrá nkehe chrók'uaýéheni kixin jeheni ch'eheni xra Cristo.

⁷ Jnkójina k'ueínixjeharáni k'uek'ejóni. Éxi yóhe ijnko iné xjan t'àyakonhen xjeen kixin ts'ánkí xjan mé xikaha jeheni k'uaýakonhanráni tí jahará.

⁸ Imá tjuàhará ntá jehya jehó tí itén Dios chrókjuakoharáni. Náhi. Kjónté chrók'uenxinni tí tjakoharáni kixin xikaha imá tjuahará.

⁹ Kíchóni, chrórxaxinkáonrá kixin tió k'uejóni chjasánrá la mé nchónhya xra kjuích'eni nchakotjin la ko tie ntá kjuachani chichaon k'uenaxinni nkehe sineni kixin tjinkakonhyani kixin chrótjeharáni xra chrókjuánjonrá nkehe chrókjoneni nachrohe k'uejóni ntiha kjuakoharáni itén Dios.

¹⁰ Jahará la ó nohará la ko ó nohe Dios kixin chaxín jína k'uejókoaráni jahará chojni tinkáchónki Ìnchéni. Nijnko nkexro ts'ekahyani jìe kixin ichrén nkehe jínahya chrókjuich'eni.

¹¹ Jahará ó nohará kixin kjuakoharáni la ko kjuínchechéni tí jahará jnkojnkora éxi ch'e ijnko it'é xjan tjuèhe xjeen ch'án.

¹² La ko k'uetuanhanráni kixin jína chrók'uejorá éxi tjinkaon Dios chrók'uejó tí sín tinkáchónki ch'án kixin jehe ch'án ó k'uíyahará ch'án kixin chrók'uyéhéra tí kjuachaxin kuènte ch'án.

¹³ Méxra jnkochrín tjancheheni Dios kjuasáya kixin tió kuínhínra tí tan jína kuènte ch'án kjuakoharáni na ntá kjuátsoanrá kixin chaxín tí tan jína kuènte Dios ntá jehya tan kuènte chojni a ntá kaín rá ó kuítekáonrá tí tan a ntá k'uíxitóxin ntjárá.

¹⁴ Mé xikaha jahará kíchó ni kjuasótiará kóninkakonhanrá tí sín chjasánra éxi yóhe kónhen tí sín kuènte Dios tinkáchónki Ìnchéni Cristo Jesús tí estado Judea kixin tió kjuankixin kuinkáchónki sín Ìnchéni ntá tí sín judío chjasén sín mé kjuankixin sín kóninkakonhen sín chrók'óyán sín.

¹⁵ A ntá tí sín judío a mé tsík'óyán sín Ìnchéni Jesús la ko tsík'óyán sín tí sín tsíchronka tí itén Dios ósé la xikaha kjaxin k'uinkíténi sín. A ntá xikaha kjuich'e sín la kóninkakonhen sín kaín chojni. A ntá Dios la kóxrjénhya ch'án kixin xikaha kjuich'e sín.

¹⁶ A ntá tjinkaonni kixin chrókjuakoheni tí sín jehya judío tí tan jína chrókuaáxin sín a ntá tí sín judío tjinkakonhya sín chrókjuakoni. Na mé xikaha imá nchek'ánkí sín tí jìe kuènte sín. A ntá xikaha kjuich'e sín ntá Dios sinchekjasóte ch'án tí jehé sín.

Ch'in Pablo tjinkaon ch'án sáchrókjuitsjehe ch'án inaá tí sín chjasin Tesalónica

¹⁷ Kíchóni, tió kuítóheni tí jahará a ntá kjónté ókjé k'uejóni la k'uéxraxinkaonni kaín asénni tí jahará la ko imá tjinkaonni chrókjuijitsjeheni tí jahará inaá.

¹⁸ Na mé xikaha janhan Pablo itsjé veces mé tjinkavan chrókjuasántsjaha tí jahará, a ntá tí ch'in Tsochren mé k'uínkakónna ntá xitjahya tsjasán.

¹⁹ ¿Nkehe tsoñhen tí xra tjejóch'eni tjejóchéxinni la ko nkekuènte tjejóchéheni? Jahará mé tsochéxinni tió tsi Ìnchéni Jesucristo kixin kuítekáonrá ch'án.

²⁰ Méxra jahará mé kóchéxinni kixin kuítekáonrá.

3

¹ Ntá imá kóxakonhenni. Ntá kjuenkayáxinni kixin chrókójína jehóni chrókuítóheni chjasin Atenas

² Na ntá ichr'ánni tí kíchó ni Timoteo a tsjijitsjehe ch'án tí jahará kixin kjaxin ixra kuènte Dios tjech'e ch'án tjejókoni ch'án tjako ch'án tí tan kuènte Cristo tsaáxinni. Ntá ichr'ánni ch'án kixin sintaxraxinkaonrá ch'án tí itén Ìnchéni la ko sinchechéhe ch'án asánra

³ kixin tsoxrjéhya asánra má kixin tí kjuaxróxinhya tjejot'atsinkará. Kixin xikaha ó nohará kixin t'ichjánxin tsjasótéxinni tí xra kuènte Ìnchéni.

⁴ Naxa k'uejóni jnkoá nihi la ó tjonkará kixin kaín ni kjuaxróxinhya tsoñhenni tsjasóteni. A ntá jìe la ó nohará kixin chaxín xikaha kónhen.

⁵ Méxra imá kóxakonna ntá ichr'an kíchó ni Timoteo kjuijitsjehe ch'án nkexrí tjejorá, a naxa tinkachónkirá Ìnchéni o ách'e ch'in Tsochren chrókjuachroera chrókuítóhéra tí ntje Ìnchéni a ntá chrókóchónkó kaín tí xra kjuich'eni kjuakoharáni.

⁶ Na ntá ó kjanxin ch'in Timoteo chjasánra Tesalónica chrónka ch'án kixin jína tjejorá naxa tinkachónkirá Ìnchéni, la ko naxa tjejorá tjuéhéra kichuára la ko chrónka ch'án kixin xraxinkaonrá tí jeheni tjinkaonrá chrókjuijitsjeheni tí jahará. Kjaxin jeheni xikaha tjinkaonni chrók'uikonni tí jahará.

⁷ Mé xikaha kíchó ni tjejót'atsinkani kjuaxróxinhya nihi na ntá kjónté kóchéhe asénni kuínhinni kixin kaín asánra naxa tinkachónkirá Ìnchéni.

⁸ A ntá kuínhinni xikaha kixin jína tjejorá naxa tinkachónkirá Ìnchéni Jesús a ntá antsí kóchéheni.

⁹ Ntá imá tsjancheheni Dios kjuasáya kixin xikaha imá chéhe asénni kixin tí jahará tinkachónkirá ch'án.

¹⁰ Tie la ko nchakotjin chronóheni Dios kixin tsjanjon ch'án kjuachaxin tsjijitsjeheni tí jahará inaá kixin naxa t'itjáyan iso nkehe chrókjuakoharáni naxa chrók'uíjtjárá nkexrí jína chrókuinkachónkirá Ìnchéni.

¹¹ Tjejótjancheheni T'eni Dios la ko Ìnchéni Jesucristo kixin chrókjuinkítsani ch'án chrókjuijitsjeheni tí jahará

¹² la ko tjancheheni Ìnchéni kixin chrókjuinkítsa ch'án tí jahará kixin antsí má chrótuéhéra kichuára la ko chrótuéhéra kaín xin chojni éxi yóhe tjuáhará.

¹³ Tjancheheni ch'án kixin syntaxraxinkaonrá ch'án kixin kaín asánrá chrókuitekáonrá ch'án kixin ntá tsochóntahya asánrá ninkehó jie nkayakon It'eni Dios tió tsokjan Ìnchéni Jesús tsikaó ch'án kaín tí sín ó tsikótjóa.

4

Nkexrí tóxrjnhin Dios chrók'uejóni

¹ Jahará kichó ni chronóaharáni la ko ntaxraxinkaonráni tí kjuachaxin ihnjé Ìnchéni Jesús kixin jína chrók'uejorá tinkachónkirá Ìnchéni éxí tjejoch'erá jie kixin éxí kjuakoharáni. Mé xikaha jína sinchechéhérá Dios.

² Ó nohará tí nkehe kjuakuaxinráni kjuachaxin kuente Ìnchéni Jesús.

³ Tí nkehe tjinkaon Dios kixin jína tjóa chrók'uejorá la ko chrókjuásinkoahyará jie í jnko chojni chjin ókjé.

⁴ Jnkojnkorá chrókónohará chróchontará jnkojnko ichjiánrá la ko jína chrók'uejorá chrótjuéhérá kichuárá.

⁵ Jehya kixin chrókjuakérá asánrá tí nkehe jínahya chrókjuich'erá éxí ch'e tí chojni chónhya Dios.

⁶ Nijnkorá chrókjuich'yehérá ichjién kichuárá xikaha kixin Ìnchéni mé imá sinchekjásóte ch'án tí chojni xikaha sich'e mé xikaha kjuíntaxraxinkaonráni senó.

⁷ Dios mé k'uíyeheni ch'án kixin jína chrók'uejóni, jehya kixin naḡa chrókjuasinni jie.

⁸ A ntá tí sín chóntehya kjuasáyé tí nkehe tjakoni na mé jehya kixin chóntehya sín kjuasáyé chojni. Náhi. Chóntehya sín kjuasáyé Dios, tí nkexro kjuanjon tí Nchakuen chótani.

⁹ A ntá tí tjuéhérá kichuárá la í t'ichjánxinhya naḡa chrókjinni tsochronkani kixin nkexrí chrótjuéhérá kichuárá kixin jehe Dios mé tjetjakohará ch'án nkexrí chrótjuéhérá kichuárá.

¹⁰ Xráxin xikaha tjejoch'erá tjuéhérá kaín tí sín kichó ni tjejó estado Macedonia. Kjánchó chronóaharáni kichó ni kixin antsi má chrótjuéhérá kichuárá.

¹¹ Tóxakonhanrá kixin kjuaxróxin chrók'uejorá. Jnkojnkorá nohará nketí xḡa chrókjuich'exinrá tjárá éxí k'uetuānhanráni.

¹² Na mé xikaha chrók'uikon tí sín chónhya Dios ntá chróchóntahará sín kjuasáya la ko chrók'uitjáyanhya ninkehó nkehe chrókuicháxinhanrá.

Itsi Ìnchéni Jesús

¹³ Kichóni, tjínkavan kixin chrókónohará nkehe tsonhen tí sín tsík'en. Na mé tjínkavan kixin kánhyó chrótsjankámará sín chrókóyóahyará tí sín tinkáchónkihya sín Ìnchéni naḡa chóenhya sín kixin chróxechón sín inaá.

¹⁴ Kuítekaonni kixin ik'uén Ìnchéni Jesús la ko xechón ch'án inaá la ko kjaxin titekaonni kixin Dios kjuínchexechón Jesús la ko tió tsokjan Jesús ntá sinchexechón Dios kaín xín tí sín tsík'en kuítekaon sín tí jehe ch'án.

¹⁵ Méxḡa chénkani tí jahará tí nkehe kjuako Ìnchéni kixin tí naḡa tjejóchónni tió tsi ch'án na kjónté naḡa tsitónxinhyani ntjia, naḡa tsochónhenni tí sín tsík'en.

¹⁶ Jehe Ìnchéni mé tsínkajinxin ch'án nkaya nkajni la ko itsen tsonixja ch'án kixin tí kjuachaxin jie kuente ch'án la ko ts'éya tí ángel t'etqan la ko tsontáchro tí trompeta kuente Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín.

¹⁷ A ntá chr'éxin kaín xínni tjejóchónni la ko kaín xín tí sín tsíxechón mé jnkokqá tsochrinni kixin tí kjuachaxin jie kuente Ìnchéni. A ntá xríkjan tjuj tsoxetani ch'án. Mé xikaha ts'ejókoni ch'án jnkochrixín.

¹⁸ Méxḡa xikaha chrókjuínchechéxínrá kichuárá tí tan í kixin xikaha tsonhen tió tsokjan Ìnchéni.

5

¹ A ntá tí yaon tsonhen tñhi kichó ni t'ichjánxinhya naḡa tsokjinni í jnko nkehe tsinhínrá.

² Jahará ó nohará jína kixin titàya itsi tí yaon tsokjan Ìnchéni éxí yóhe chrókui ijnko xíchee tí tie a.

³ Ts'ejó sín itsjo sín kixin ijie kjuaxróxin tjejó sín kaín sín la ko ninkehó nkehe tsonhen sín. Ntá xrinahya titàya itsi tí kjuaxlikaon jie la ko kjuachrakon mé ts'itjáyaxín tí kjuachón chróchónta sín éxí yóhe ijnko tjan tjejá xrinahya titàya tsjankixin ts'ontáki tjan kixin sinchekokjíhi tjan xjeen tjan na mé jehe tjan xitjahya tsontáchro tjan “Náhi”, mé xikaha jehe sín chóntahya sín nkerí tsaáxin sín.

⁴ Ntá jahará kichó ni sítíehya tjejorá ntá chróchrakonhyará tí yaon itsi Ìnchéni. Tí náhi chróchrakonrá éxí chrókui ijnko xíchee chrókjuintachrakonrá.

⁵ Ntá jie kaín rá mé tjejorá tí ntjia t'inkáséyan. Jeheni la jehya tjejóni tí ntjia sítie a.

⁶ Méxra xikaha chrók'uejójuahyani éxi tjejójua tí sín í so na mé chrók'uejótsjeheni chrókjuenkayáxinni jína.

⁷ A ntá tí sín t'ajua la tjejójua sín tí sitié ó la ko tí sín tókoan la tókoan sín tí sitié a.

⁸ A ntá jeheni na tjejóni tí ntia t'inkáséyan t'ichjánxin kixin jína chrók'uejóni chrókjuasinhyani jie. Chrókuinkáchónkini Ìnchéni la ko chrótjuèheni ch'án. Ntá jeheni na Ìnchéni ts'ayakonhenni ch'án tsaáxinni ch'án éxi tí ch'ín soldado t'inkáya ka tsík'óna chica kixin kohya nkehe tsonhen ntakuin ch'án. La ko chrók'uejóchónhenni itsi Ìnchéni tsaáxinni ch'án na mé éxi tí ch'ín soldado a xrasin ch'án nkehe tsík'óna chica t'ayakonhen kja ch'án kixin kohya nkehe tsonhen kja ch'án.

⁹ Kjueyáhya Dios tí jeheni kixin chrókjuinchejasóteni ch'án. Náhí. Kjueya ch'án tí jeheni kixin chrókuaáxinni Ìnchéni Jesucristo.

¹⁰ Jehé Jesucristo mé k'uenyákonhenni ch'án kixin chrók'uejókoni ch'án jnkochrín kjónté naxa tjejóchónni o kjónté ó tsik'enni tió tsokjan ch'án.

¹¹ Méxra xikaha chrókjuinchechéhérá kichuára la ko chrókjuínkĩsará kichuára kixin jína chrók'uejó sín éxi xráxin tjejoch'erá.

Ch'ín Pablo mé nchexraxinkaon ch'án tí sín tinkáchónki Cristo

¹² Kichóni chronoàharáni kixin chróchontehérá kjuasáyé tí sín tjejóch'e sín xra kuènte Dios ntíha tjejójtitaón sín ntia chrónka sín itén Ìnchéni.

¹³ Na mé chróchontehérá sín kjuasáya la ko chrótjuèhérá sín má kixin tí xra tjejóch'e sín. A ntá jahará kaín rá jnkójina chrók'uejokoará kichuára.

¹⁴ Méxra tétuanhanrání kichó ni kixin chrókjuéntuehérá tí sín tjinkakonhya sich'e sín xra la ko chrókjuinchechéhérá asén tí sín kóxrjé asén sín la ko chrókjuínkĩsará tí sín naxa noehya sín jína la ko chrókóninkákuénhyará ninkexró.

¹⁵ Tóxakonhanrá kixin chrókjuich'ehyará jínahya tí sín jínahya kjuít'ahará. Íchá jína chrókjuákoxinrá nkehe jína chrókjuich'erá kixin ts'ikon kaín xín chojni chjasintajni kixin jína tjejotjenkayáxinrá.

¹⁶ Méxra nchechéhérá asánrá jnkochrín.

¹⁷ Chrókjuítóehyará chrónixjehérá Dios jnkochrín.

¹⁸ Kjónté ichrén nkehe chrókónhanrá la chróchjehérá Dios kjuasáya kixin xikaha mé tjinkaon ch'án chrókjuákoxinrá kixin tinkáchónkirá Ìnchéni Cristo Jesús.

¹⁹ T'ók'ankahyará tí xrohi t'inkáséyanxín Nchakuen Dios.

²⁰ Chontehérá kjuasáyé nkehe tjako tí sín kichó ni chronkaxín sín kjuachaxín kuènte Nchakuen Dios.

²¹ Chrótsjehérá jína tí nkehe tjejóch'e sín. A ntá tí jína na chrókuítekáonrá.

²² Chrókjuítóh'érá kaín xín nkehe jínahya.

²³ Dios mé tjanjon kaín kjuaxróxin ntá tjancheheni ch'án kixin jehe ch'án sinchetjóará ch'án la ko ts'ayakonhen ch'án nchakuanrá la ko asánrá la ko cuerpo kuèntará kixin tsochóntahya ninkehó jie tió tsí Ìnchéni Jesucristo.

²⁴ Dios tí nixxro kjueyá tí jahará mé jína ch'án la ko kaín tí nkehe ntáchro ch'án la tsoxiteyá.

Ch'ín Pablo kjuixixín nixjehé ch'án sín la ko tjanchehe ch'án Dios kixin chrókjuincheyaon tí jehe sín

²⁵ Kichóni chrónóehérá Dios kixin tsjinkĩtsani ch'án kaín ni.

²⁶ La ko nixjehérá kaín xín tí sín kichó ni ntíha tseh'érá tja sín.

²⁷ T'etóanxínni tí kjuachaxín kuènte Ìnchéni kixin nchekuáxinrá tí xroon chr'anhánrá tsinhín kaín xín tí sín kichó ni ntíha.

²⁸ Kjuasáyé Ìnchéni Jesucristo sintayaonrá ch'án. Amén. Ó tjen.

Xroon yóxin ikjin ch'ín Pablo chr'énhen ch'án tí sín tinkáchónki Cristo chjasin Tesalónica

Ch'ín Pablo nixjehe ch'án tí sín Tesalónica

¹ Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni ñinko chjasin Tesalónica kixin jnkokqá tinkáchónkini It'éni Dios la ko Ìnchéni Jesucristo.

² Kjuasáyé It'éni Dios la ko Ìnchéni Jesucristo chrókjuintayaonrá ch'án kixin kjuaxróxin chrók'uejorá.

Dios sinchekitoxén ch'án tí ijje chojni tíó tsokjan Ìnchéni Cristo

³ Kíchóni chrókjuancheheni Dios kjuasáya jnkochrín kixin tí jahará. Na mé jína xíkaha chrókjuich'eni kixin tinkák'ánkí tí tinkachónkirá Ìnchéni Jesús la ko tinkák'ánkí tí tjuèhérá kíchuárá tjejorá ntíha.

⁴ Ntá chéheni chenkaní tí sín kichó ni kaín tí ñinkqe Dios kixin ñaxá tjákoxinrá kixin ñaxá tinkachónkirá Ìnchéni kjónté síin chojni ñínkakonhanrá la ko kjónté t'atsínkará itsjé kjuaxróxinhya.

⁵ Tíha mé tjákoxinrá kixin tjinkaon Dios tsotsjehe ch'án kixin á tsjachará ts'ikonrá tí kjuachaxin kuènte ch'án. Méxra xíkaha tjejtjasótexínrá jie.

⁶ Méxra ó nchoxon kixin sinchekjasóte Dios tí sín tjejónchekjasótíará jie.

⁷ Ntá tsjanjon ch'án kjuachaxin kixin ts'ok'áhará kixin ó kjuasótíará la ko kjaxin jeheni ts'ok'éheni tí yaon itsi Ìnchéni Jesús ts'inkajinxin ch'án nkaya nkajní tsíkqo ch'án kaín tí sín ángel t'etqan kuènte ch'án na mé tsíkqo ch'án xrohi nene.

⁸ Mé xíkaha itsi ch'án kixin sinchekjasóte ch'án tí sín kuitekakuenhya Dios la ko kuitekakonhya tí tan jína kuènte Ìnchéni Jesucristo chrókuaáxin sín.

⁹ A ntá tí sín kuitekakonhya mé tsjasóte sín jnkochrín ts'ítuenhen sín ts'axrjenta sín tí kohya Ìnchéni, í ts'ikonhya sín tí kjuachaxin t'etqanxín ch'án.

¹⁰ Xíkaha tsonhen tí yaon itsi Ìnchéni tsjikosáyehe ch'án kaín xín tí sín kjuinchetjóá ch'án la ko kaín tí sín kuinkáchónki sín ch'án la ts'ikon sín tí kjuachaxin jie kuènte ch'án. Mé xíkaha kjaxínrá jahará kixin ó kuitekáonrá tí nkehe kjuakoharáni.

¹¹ Mé xíkaha jnkochrín tjancheheni Dios kixin jína chrók'uejorá éxi tjinkaon ch'án chrók'uejó tí sín kjueyá ch'án, la ko tjancheheni Dios kixin chrótjáhará ch'án kjuachaxin kuènte ch'án kixin chrókjuinkjísará ch'án kixin chrókjuachará ch'erá kaín tí xra jína tjínkáonrá chrókjuich'erá kixin tinkachónkirá ch'án.

¹² Mé xíkaha kaín xínrá tsjikosáyeherá tí ihnié Ìnchéni Jesucristo la ko jehe ch'án mé kjaxin tsjikosáyahará ch'án kixin tinkachónkirá ch'án. Mé xíkaha kjuasáyé Dios la ko Ìnchéni Jesucristo kixin kujikonóeheni ch'án.

2

Tsonoxín ijnko ch'ín jínahya

¹ Kíchóni, a ntá tí tsi Ìnchéni Jesucristo la ko tsojnkotséni tí tjen ch'án jehe ch'án, méxra xíkaha chrónóaharáni

² Kixin chrókjuítóxinhyará tjoka tí nkehe chrókjuenkayáxinrá, la ko ní chróchrakonhyará tí chróntácho jnkójin nkexro tónohe sín kixin ó kjuixraká tí yaon itsi Ìnchéni, la ko chróchrakonhyará xíkaha chrókuínhínrá chróchronka ijnko chojni tjako, la ko chróchrakonhyará tí tsochronka sín kixin ó k'uáyéhe sín ijnko xroon éxi jeheni tsíkjanjoni chrónka kixin xíkaha tsonhen.

³ Tjtoéhyará kixin jnkójin nkexro chrókjuít'ayahará xíkaha. Ñaxá tsihya tí yaon ntá senó itsjé chojni tsonínkakonhen sín Dios, la ko tsonoxín ijnko ch'ín jínahya chóna jie, na ntá tíha mé tsjasóte jnkochrín.

⁴ Tsjak'e ch'án tsjanjonko ch'án kaín xín nkehe tinkáchónki chojni, mé tsjak'etjaxin ch'án nkaxenhen tí ñinkqe Dios kixin jehe ch'án mé sich'éna asén ch'án éxi Dios tí jehe ch'án.

⁵ Á xráxinkákonhyará kixin xíkaha k'uéxrxanka senó tí ñaxá k'uejóni jnkokqá?

⁶ Ntá jahará ó nohará nkehe tí kjuachaxin ñaxá chónthe kixin ñaxá tjexrakáhya tí yaon tsonoxín tí ch'ín jínahya.

⁷ Ntá jie imó ch'e xra tí kjuachaxin jínahya. Kjónté ñaxá t'itjáyan kixin sáchrókjuí tí nkexro chónthe.

⁸ A ntá tí ch'ín jínahya tsoñoxín ch'án. Ntá tió tsi Ìnchéni Jesús ntá tí itén ch'án ts'axrjexín ir'va ch'án ó mé ts'enxín tí jínahya a káxin mé xíkaha sinček'itjáyaxín ch'án tí jínahya tí kjuachaxín jié tsjìkəo ch'án.

⁹ Méxra tí ch'ín jínahya mé tsjìkəo ch'án tí kjuachaxín kuènte ch'ín Tsochren la mé xíkaha tsochónta ch'án kjuachaxín jié tsjìkəoxín ch'án sich'iyaxín ch'án tsjasín ch'án kjuaxroan ntoáhya.

¹⁰ Mé xíkaha kaín nkehe jínahya sich'iyexín ch'án tí sín xráxín ts'itjáyán sín káxin chrohya sín chrókuitekaon sín tí tan chaxín ntoá chrókuaáxin sín.

¹¹ Méxra tsítóhe Dios tí jehe sín káxin tsitekaon sín kaín nkehe chaxínhya

¹² Káxin ntá tsjasóte kaín tí sín kuítekakonhya sín tí tan chaxín chrókuaáxin sín na mé ǎntsí kóxrjínhín sín chrókjuasín sín jié tsjasótéxín sín.

Dios mé kjuéyá tí jehe sín káxin chrókuaá sín

¹³ Ntá jeheni chrókjuancheheni Dios kjuasáya jnkochrín káxin jahará kichó ni chojni tjuahará Ìnchéni káxin tí tsjìkəyá Dios tí jahará káxin senó chrókuaáxinrá tí Nchəkuen ch'án tsotjuáxinrá la ko tí itén ch'án chaxín ntoá kuítekáonrá.

¹⁴ Méxra xíkaha k'uiyáhará Dios káxin chrókuaáxinrá tí itén ch'án tjakoni káxin ntá tsjachará ts'ikonrá tí kjuachaxín jié kuènte Ìnchéni Jesucristo.

¹⁵ Mé xíkaha kichó ni, jína chrók'uejorá chrók'uitjáyanyará tí nkehe kjuakəharáni tío k'uejóni jnkokəá la ko tí nkehe chrónka tí xroon ikjinni k'uyayéhérá.

¹⁶ Ntá Ìnchéni Jesucristo la ko It'eni Dios na mé tí nkexro kjuasáyé ch'án tjuèhe ch'án tí jeheni la ko nchechéhe ch'án ǎsenni jnkochrín la ko kjuasáyé ch'án tjejóchónhenni itsi Ìnchéni

¹⁷ na mé sinchechéhe ch'án ǎsanrá la ko tsjanjon ch'án kjuachaxín káxin ntoá chrók'uejorá ntá jína chrónixjará la ko kaín xra jína chrókjuich'erá.

3

Nixjehérá Dios káxin tsjinkitsa kaín ni

¹ Méxra kjuixixín chrónóaharáni kichó ni káxin chrókjuanchehérá Dios káxin chrókjuinkitsa ch'án tí jeheni káxin tjoka sáchrókjuikjakoni itén Ìnchéni nkuixín káxin ntá tsinhin chojni la tsjikosáyehé sín ch'án éxi yóhé kuítekáonrá jahará.

² Kjaxin nixjehérá Dios káxin chrókjuinkitsani ch'án káxin kohya nkehe chrókónhenni tí siin chojni jínahya nínkakonhenni káxin kénhya sín tinkáchónki Ìnchéni.

³ Ntá Ìnchéni mé chaxín jína ch'án la jehe ch'án tsítóehya ch'án tí jahará naǎx tsjinkitsará ch'án káxin jína ts'ejorá la ts'ayakonhanrá ch'án káxin kohya nkehe jínahya tsoňhanrá.

⁴ Ó noheni káxin Ìnchéni la tsjinkitsa ch'án tí jahará káxin naǎx sich'erá xra éxi k'uetuanhanráni.

⁵ Ìnchéni tsjinkitsará ch'án tsoňohará káxin Dios la tjuahará ch'án la ko tsjinkitsará ch'án káxin chrókóninkákonhyará éxi kóninkakonhya Cristo.

T'ichjánxin chrókjuich'eni xra

⁶ Kichóni t'etəoxínni tí kjuachaxín ihnjé Ìnchéni Jesucristo káxin chrók'uaxrjekjanxínrá tí sín kichó ni tjinkakonhya sich'e xra la ko xrihya sín éxi kjuakəharáni.

⁷ Ó nohará káxin nkexrí chrók'uejorá chrókjuákəoxínrá éxi k'uejó tí jeheni káxin tí k'uejókoaráni la jehya káxin kjuich'ehyani xra.

⁸ Jehya káxin kjóneni niotjé jnkojín nkexro ntá chrókjuenkahyani. Náhí. Kóxakonhenni nchakotjin la ko tie kjuich'eni xra káxin ninkehó chón'tjəxínhyani tí jahará káxin chrókjuánjonrá tí nkehe chrókjóneni. Náhí.

⁹ Kjón'té chón'tani kjuachaxín chrókjuanchaharáni káxin chrókjuinkitsará tí jeheni kjánchó jeheni na kjuich'eni xra kjuakəoxínni káxin xíkaha jahará chrókjuich'erá xra.

¹⁰ Káxin tí naǎx k'uejóni jnkokəá ntiha k'uetəanni káxin: Tí nkexro tjinkakonhya ch'e xra la kjaxin chrókjonehya.

¹¹ Ó kuínhinni káxin tjejorá jnkojínrá ninkehó xra ch'ehyará ǎ ntá kjuach'ia ó xrikoará.

¹² A ntá tí kjuachaxién Ìnchéni Jesucristo t'etəoxínni la ko chrónóexínni tí sín a káxin chrókóninkakonhya sín chrókjuich'e sín xra káxin chrókjuacha sín chüchaon chrók'uite tí nkehe chrókjone sín.

¹³ Ntá jahará kichó ni, chrókóxrjéhyará chrókjuich'erá tí nkehe jína.

¹⁴ A ntá tí tjen jnkojín nkexro titekakonhya tí nkehe t'etəoxínni tí xroon i la tsjehérá jína nkexro tíha la ntá chrók'uitohyará ch'án la ntá chrókósuèhé ch'án.

¹⁵ Kjánchó jehya káxin chrókjuánjonkoará ch'án. Náhí. Chrókjuinchexraxinkáonrá ch'án jnkojína éxi ijnko chojni kichó ni.

Ó kjuixixín nixja ch'ín Pablo

¹⁶ Ìnchéni mé tjanjon tí kjuaxróxin la ko naxa tsotjáhará ch'án kjuaxróxin jnkochríxín kjónté ichrén nkehe chrók'uatsínkará. Jehé ch'án mé t'ayakonhanrá ch'án kaín rá.

¹⁷ Janhan Pablo tjaná mé kjinxián tí nkehe nixjahará. Mé xíkaha chrókuátsoanxínrá tí letra kaín carta tsíkjian.

¹⁸ Ntá Ìnchéni Jesucristo mé kjuasáyé sintayaonrá ch'án kaín rá. Amén. Ó tjen.

Tí xroon saoxín ikjin ch'ín Pablo chr'énnen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo kjueyána Jesucristo la ko Dios mé tsík'etuanna mé jehe ch'án mé tí nkexro nchekaá chojni. La ko kjaxin k'uetuanna Ìnchéni Jesucristo tí nkexro tjejóchónhenni itsi.

² Ikjian tí xroon chr'anhan jaha Timoteo. T'íkuan éxi xjanna tí jaha kixin jaha tinkáchónkia Cristo Jesús. Kjuasáyé It'éni Dios la ko Ìnchéni Jesucristo chrókjuintayavan ch'án la ko chrókjuikonógha ch'án kixin kjuaxróxin tsjak'e jaha.

Chrókjuinchehráxinkaon ch'án sín kixin chrókuitekakuenhya sín tí nkehe chaxínhya

³ Éxi xrxannógha tió sákjua estado Macedonia la mé jaha chrókuítgha tí chjasin Éfeso la ntaha chrókuétuénhén iso tí sín ntiha kixin chrókjuakohya sín tí nkehe ntoáhya.

⁴ La ko chrókuétuénhén sín kixin chrókuaahya sín kuenté tí cuento tsíchronka chojni tí ósé a. Tí tinhin sín tíha la imá tjachaxin kichó sín la ó chónkó tíha. Kaín tíha la i tsjinkítsahya kixin sinchexiteyéheni Dios kixin tinkáchónkini ch'án.

⁵ Tí nkehe tjinkaonni la chrótjuéheni kichó ni kaín ni kixin ó kótjóa asénni la ko ó noheni kixin jina tjenkayáxinni la ko kaín asénni tinkáchónkini Cristo.

⁶ Iso sín la kjuíchròe sín kixin itjo tí nkehe chónkó.

⁷ Tjinkaon sín chrók'óna sín maestro chrókjuako sín tí ley a ntá jehe sín tienxínhya sín tí nkehe tjako sín kjánchó ntáchro sín kixin ó ntoá tí nkehe tjako sín, ntá chaxínhya.

⁸ A ntá jeheni la ó noheni kixin tí ley la jina tí chrokjuakoni éxi tjinkaon Dios.

⁹ Ó noheni kixin tí sín tjasinhya jie t'ichjánxienhya sín tí ley tsík'etgan Moisés. Tíhi la t'ichjánxinhin tí sín titekakonhya la ko tí sín jiehe la ko tí sín jínahya tjasin jie la ko tí sín chóntahya kjuasáyé Dios la ko tí sín t'oyán it'é la ko iné sín la ko kaín tí sín tjáya.

¹⁰ La ko tí sín tjasinko jie ijnko chojni chjin ókjé la ko tí sín jnkokón ntoa sín takja kichó sín la ko tí sín teé chojni ntá nchekji, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kaín tí sín ch'e tí nkehe jínahya la nínkakonhen tí nkehe jina tjakoni.

¹¹ Tí nkehe tjakoni mé chaxín tí tan jina sinchekaá chojni la tí Dios tjetoan mé k'uetuanna kixin tsjákua tíha.

Ch'ín Pablo kjuanchehe ch'án kjuasáyé Dios

¹² Tjáncháha kjuasáyé Ìnchéni Jesucristo kixin imá kjuinkítsana ch'án la ko k'uikon ch'án kixin jina sít'aha ch'án xra ntá chjina ch'án tí xra i.

¹³ Mé xíkaha kjueyána ch'án kjónté senó imá k'uék'ántaxinhan tí sín tinkáchónki ch'án la ko k'uéchonkiha sín la ko chrók'oyán sín. Kjónté la Dios imá kuíkonógehe ch'án tí janhan kixin ó nohe ch'án kixin k'uéinkáchónkihya janhan tí jehe ch'án la ko k'uénonahya nkehe tí xra k'uékjít'a.

¹⁴ Méxra Ìnchéni antsí má kjuíncheyaoona kixin ntá kjuanjon ch'án kjuachaxin kixin tsinkáchónkia ch'án la ko tsótjuagh ch'án. Mé xíkaha kaín ni chóntani tí kjuachaxin tinkáchónkini Cristo Jesús.

¹⁵ Tíhi mé chaxín la kaín ni chrókuitekaonni. Ikui Jesucristo chjasintajni kixin sinchekaá ch'án tí sín kjuasin jie. Ntá janhan mé antsí má kjuásian jie.

¹⁶ Kjónté xíkaha kjuít'a la Dios antsí má kuíkonóana ch'án tí janhan kixin xíkaha kjuaxóxin Jesucristo kixin kónínkakonhya ch'án. Mé xíkaha tsjákuxián kaín nkexro tsitekaon tí jehe ch'án kixin tsochóna sín kjuachón jnkochrixin.

¹⁷ Ntá jnkochrixin tsochónteheni kjuasáyé tí Rey t'etgan. Jehe ch'án mé ijnko nkexro xrxán tjen la mé ijnko nkexro chónhya ts'en la xitjahya ts'ikonni ch'án. Jehó ch'án mé Dios la imá nohe ch'án. Amén.

¹⁸ Timoteo, éxi xjanna t'íkuan tí jaha, la kaín tí xra i tjaha kixin tsjanjonkoa tí jínahya la tsjacha kixin tinkáchónkia jina Ìnchéni la ko tjenkayáxian tí nkehe jina. Mé xíkaha sinchexiteyá tí nkehe kuínhín senó kixin tí sín kichó ni chrónkaxín ihnjé Dios.

¹⁹ Í so sín la kjuenkayáxinhya sín tí jina ntá kjuíchròe sín kuitgha sín tí nkehe tinkáchónki sín.

²⁰ Mé xíkaha kónhen ch'ín Himeneo la ko ch'ín Alejandro. Janhan kjuánjuan kjuachaxin kixin ch'ín Tsochren mé sinchekjasóte sín kixin mé xíkaha ts'itja sín kixin i ts'ántaxienhya sín Dios.

2

Nkexrí chrónixjeheni Dios

¹ A ntá saoxín la xrjanóaha kixin kaín chojni chrónixjehé sín Dios la chrókjuanchehe sín kjuasáyé ch'án kixin chrókjuinkitsa ch'án kaín xín chojni.

² Chrókjuanchia sín kixin Dios imá chrókjuinkitsa ch'án kaín tí sín t'etqan la ko tí sín gobierno kixin ntá kjuaxróxin ts'ejóni la ko sinchexiteyéhéni Dios la ko ntoá ts'ejóni.

³ Xikaha mé imá jína la tóxrjínhin Dios, mé tí nkexro tsaáxinni.

⁴ Jehé ch'án mé imá tjinkaon ch'án kixin tsaá kaín xín chojni la ko tjinkaon ch'án kixin tsonohe chojni tí nkehe chaxín ntoá.

⁵ Mé itjen jnkokoáxon Dios la ko itjen jnkokoáxon nkexro nixjayákonhenni kixin tsochóxinni Dios. Tiha mé Jesucristo mé k'óna chojni ikui ch'án chjasintajni.

⁶ Jehé Jesucristo mé k'uenyákonhenni kaín xinni, kjuenkayákonhen ch'án ijíeni kixin tsaáxinni ch'án. Táha mé xiteyá tí tsintácho Dios ósé kixin xikaha tsonhen ch'án.

⁷ Méxra tí xra mé kjueyána Dios kixin tsjikáqoha tí sín jehya judío kixin tsinkáchónki sín Jesucristo la ko tsonohe sín tí nkehe chaxín. Janhan mé tinkáchónkia Cristo la xrjanka tí nkehe chaxín mé t'ayahya.

⁸ Méxra tjínkavan kixin kaín tí sín ntoa mé chrónixjehé sín Dios la chrókjuaya sín tja sín la chrókótjóá asén sín la ko chrókóninkakonhya sín la ko chrókjuéhya sín kjuanínkaon.

⁹ A ntá tí chojni chjin mé ntoá chrók'uitsa sín ka la chrókjuinchehnkehya sín la ko chrókjuasin chóntahya sín kaxihí sín nkehe tjete xrxrjjo náxrjón la ko chrók'uitsahya sín ika imá tjete.

¹⁰ Íchá jína kixin tí chojni chjin chrókjuich'e sín tí xra jína éxí chrókjuich'e kaín tí sín tsíkjinchetjóá Dios.

¹¹ Tí chojni chjin t'ichjánxin chrókuinhen sín itén Dios la chrónixjahya sín la ko chrók'uetqanhya sín.

¹² A ntá janhan tjánjonhya kjuachaxin kixin chojni chjin chrókjuako tí nchónhya chojni siín la ko tjánjonhya kjuachaxin chrók'uetqenhen sín chojni ntoa. Jehé sín la tání sín chrók'uejé sín

¹³ kixin saoxín la Dios kjuích'éna ch'án tí ch'in Adán la ntá chr'éxin kjuích'éna ch'án tjan Eva.

¹⁴ A ntá ch'in Adán la ninkexró kjuích'iyehya ch'án. Náhi. Tí tjachjin mé tsíkitekakonhen tjan tí nkexro tsíkijich'iyehé tjan ntá xikaha xrankixixín k'uúxin jie.

¹⁵ A ntá tí chojni chjin la kjónté xikaha kjuích'e sín la Dios sinchekaá sín tí jína ts'ayakonhen sín xjeen sín la tí chaxin tinkáchónki sín Dios la ko tjuèhe sín ch'án la ko ntoá ts'ejó sín la ko jína tsjenkayáxin sín.

3

Jína chrók'uejé tí sín t'etqenhen tí nínko

¹ Ijngo nkehe chaxín tjónka. Tí nkexro tjinkaon sich'e xra kuènte nínko mé imá jína xra tjinkaon ch'án.

² Tí ch'in chrók'uetqan mé ntoá chrókjuak'e ch'án kixin kohya nkexro chrók'ueka ch'án jie la ko kjaxin chróchóna ch'án jnkokoá ichjién ch'án ó la ko kjaxin chrókjuak'e ch'án jína la ko chrókjuenkayáxin ch'án jína la ko chróchóna ch'án kjuasáyé ch'án la ko kjaxin jína chrónixjehé ch'án tí nkexro tjiji ntqé la ko kjaxin chrókónohe ch'án tí nkehe chrókjuako ch'án.

³ La ko kjaxin chrókókoanhya ch'án la ko chrókjuéhya ch'án kjuanínkaon la ko kjaxin chrókóxrjienhya ch'án kixin chrókjuacha ch'án nchónhya chichaon. A ntá chrókójihya ch'án la ko kjuaxróxin chrókjuak'e ch'án la ko chrókóxrjienhya ch'án chróchóna ch'án itsjé chichaon.

⁴ Jehé ch'án mé kjaxin jína chrók'uetqenhen ch'án tí sín tjejó ntqé ch'án la ko chrókjuentuéhe ch'án xjeen ch'án kixin tsitekaon xjan la tsjikosáyehé xjan it'é xjan.

⁵ Tí tsjachahya ch'án ts'etqenhen ch'án tí sín tjejó ntqé ch'án la zntá nkexrí chrók'uetqan ch'án tí nínko kuènte Dios?

⁶ Íchá jína kixin jehya ijngo nkexro na ntá k'uúxnenhen chrókjuako kixin tí nkexro na ntá k'uúxnenhen la imá chrókjuinchehnke ch'án la ntá chrókjuasin ch'án jie éxí kjuasin ch'in Tsochren ijje senó.

⁷ Kjaxin t'ichjánxin kixin kaín xín tí sín naxa tinkáchónkihya Ìnchéni mé tsochóna sín kjuasáyé tí ch'in t'etqan a. Tí náhi la ts'eka sín ch'án jie ntá tí xikaha la ch'in Tsochren tsjacha tsjachróde tí ch'in a ntá tsjasin ch'án jie.

Nkexrí chrók'uejé tí sín tsjinkitsa tí xra kuènte nínko

⁸ Kjaxin tí sín diácono ch'e xra kuènte nínko la kjaxin ntoá chrók'uejé sín kixin chróchónthehe sín kjuasáyé chojni. Kjaxin t'ichjánxin kixin chrókjuinchehiteyá sín tí nkehe

ntáχρο sín la ko chrókókoanhya sín la ko kǵaxin chróchóntiǵaxinhya sín itsjé chichaon chrókjuacha sín.

⁹ T'ichǵánxǵin chrókónohe sín jína tí nkehe tinkáchónki sín kǵixin jehe sín chrórxaxinkaon sín á nchoxon tí xǵa ch'e sín.

¹⁰ Saóxin chrótsjehe kaín chojni á ninkehó jǵe chóntahya tí nkexro la ntá tí chaxín jína jehe ch'án la ninkehó jǵe chóntahya ch'án ntá jína ts'ixenhen ch'án tí xǵa kuènté nǵnko.

¹¹ La ko kǵaxin tí chojni chjin mé chrók'uejó sín jína kǵixin chróchónta sín kǵuasáyé sín. Kǵaxin chrókuinkáchónkihya sín kǵuach'ia la ko jína chrók'uejó sín la ko chrókuinchexiteyá sín kaín nkehe.

¹² Tí sín diácono la mé chróchónta sín jnkokoá ichjién sín la jína chrók'ueǵuēnhen sín xjeen sín la ko jína chrók'ueǵoan sín nteǵ sín.

¹³ T'ichǵánxǵin iǵnko xǵa jína sich'e sín kǵixin ntá tsjacha sín ts'áyéǵe sín iǵnko nkehe jína tsjanjon ínchéni la ko kǵaxin tsǵsuēhya sín tsochrónka sín nkexri tinkáchónki sín Cristo Jesús.

Dios mé kǵuínchenoheni tí nkehe k'uēkǵienxǵinhvani

¹⁴ Tǵjǵnkavan tjoka chrókjuasántsǵahá tí jaha kǵánchó senó tsokǵian tí xroon i.

¹⁵ A ntá tí tsǵxǵrjenna isé ntá kǵjónté tǵsonoha nkexri chrók'uejó tí sín naǵa kǵéhya Dios mé tí sín t'óna nǵnkoē Dios tǵjehón. Jeheni kaín ni mé tǵjéjót'ayakonhenni tí tan chaxín ntoá.

¹⁶ Ninkexró chróntáχροhya kǵixin chaxǵnhya tí nkehe tinkáchónkini mé iǵnko nkehe imá jǵé tíha la ninkexró k'uénoehya tí senó a.

Dios mé ikui k'óna chojni;

ikui ch'án kǵuǵkoǵin ch'án kǵuǵchǵxién Nchǵkuen Dios chóna ch'án kǵixin jína tí jehe ch'án.

La ntá tí sín ángel mé k'uǵikon sín ch'án

la kuènté chǵasintajni mé ó kuínhin sín nkehe chrónka ch'án

ntá itsjé sín kuítekaon sín ch'án.

Ntá Dios k'uáyéǵe tí jehe ch'án nkaya nkajni.

4

Tí sín kuǵǵhe tinkáchónkihya Cristo

¹ A ntá ntáχρο Nchǵkuen Dios kǵixin tí chjina tsjeǵe chǵasintajni mé iso sín mé tsǵtǵhe sín í tsinkáchónkihya sín ínchéni la ntá tsítekaon sín nchǵkuen tí jínahya sich'iyehé sín la ko tsítekaon sín tí nkehe tjako tí sín demonio.

² Mé tsinhin sín tí nkehe tjako tí chojni tǵuáhya la ch'ia sín. Kǵjónté imá tsjasin sín jǵe la í tsǵsuēhya sín kǵixin éxi tsichǵán tí tǵnkayáxǵin sín la í tǵnkayáxǵinhya sín jína.

³ Jehe sín mé tǵjnkakonhya sín kǵixin chrókótehe chojni la ko kǵaxin tǵjnkakonhya sín kǵixin chrókǵóneni nto. A ntá jeheni ó noheni kǵixin Dios mé kǵuǵch'éna ch'án kaín xín nkehe ineni la tǵjnkakon ch'án kǵixin tí jeheni tinkáchónkini ch'án la ó noheni tí tan chaxín ntoá mé chrókjuancheheni ch'án kǵuasáya ntá chrókǵóneni.

⁴ Méxǵa kaín xín tí nkehe kǵuǵch'éna Dios la jína la kohya nkehe chróntáχροni kǵixin jehya jína sineni. Chrókjuancheheni Dios kǵuasáya la ntá jína chrókǵóneni

⁵ kǵixin tió tsǵrxaxinkaonni itén Dios la tsonixǵeheni ch'án la ntá sincheyaoon ch'án tí nkehe sineni.

Iǵnko chojni jína ch'ehe xǵa Jesucristo

⁶ Jaha tǵákohé tí sín kǵichó ni kaín tí nkehe i la ntá xǵikaha imá jína sich'ehé xǵa Jesucristo la ko ántsi tsǵjǵkǵtsa ch'án ts'ánki kǵuaxǵrexinkaon kuèntá tí tinkáchónkia tí tan kuènté ch'án la ko naǵa tǵákua tí nkehe jína ó xǵákoħa.

⁷ Jaha mé tahya kuènté tí cuento chónkó la ko tí nkehe ntoáhya tinkáchónki iso sín. A ntá jaha la chrókǵuǵéhya chrókuinkáchónkia Dios.

⁸ Tí chojni tsítán la jína tíha kǵánchó ántsi má tǵjetoan chrórxaxinkaonni Dios. Tíha la tsǵjǵkǵtsa kǵixin jína xritǵejóni iǵje la ko kǵaxin tsǵjǵkǵtsa kǵixin ts'áyéǵeni kǵuachón jnkochrǵxin tió tsokǵan ínchéni.

⁹ Kaín tíhi mé chaxín la kaín chojni chrókuítekaon.

¹⁰ Mé xǵikaha kǵjónté t'ántaxǵnhǵni chojni la jína ch'eni tí xǵa i kǵixin tinkáchónkini Dios tǵjehón. Jehe ch'án chaxín sinchekaá ch'án kaín tí chojni títekaon tí jehe ch'án.

¹¹ Kaín tíha mé t'ichǵánxǵin tsétoan la ko tsǵákua.

¹² Jaha chrókǵuǵéhya kǵixin chrokjuanoá sín kǵjónté naǵa ntasoyá. Chrókǵuǵǵexián tí sín tinkáchónki ínchéni nkexri chrónixǵa sín la ko nkexri ntoá chrók'uejó sín la ko nkexri chrótrǵehe sín Dios la ko nkexri chrókuítekaon sín ínchéni la ko nkexri tǵjóá chrók'uejó sín.

¹³ Nachrohe tsjasán la jaha sinchekuáxian tí xroon itén Dios kǵixin tsinhin kaín sín la ko sinchexǵaxinkávan kaín tí sín kǵichó ni la ko tǵákohé sín.

¹⁴ Sínchek'itjáyanhya tí kjuachaxién Dios k'uayéhé tió tí sín t'etōan kuente nínko kjuachaxién Dios k'uejotja tja sín chrítaón ikjá.

¹⁵ Chrókóxakonhan chrókjuínchexiteyá kaín tíha kíxín kaín chojni tsotsjehe sín kíxín jína noha.

¹⁶ Chrókjuenkayáxian jína tí nkehe tjákua kíxín jína chrókjuak'e jaha, chrókjuínchexiteyá kaín nkehe la ntá tí xíkaha sích'e la tsaá jaha la ko tí sín tjejótinhan tjákua la tsaá sín kjaxin sín.

5

Jína chrók'uejó tí sín tinkáchónki Cristo

¹ Jaha la chrókóninkákuenhya tí sín ó táda. Náhi íchá jína chrónixjehé sín jnkojína éxi chrónixjehé it'á. La kjaxin tí sín ntasoá chrónixjehé sín éxi chrónixjehé kíchuá mero.

² A ntá tí sín ó nána la mé chrónixjehé sín éxi chrónixjehé iná xíkaha. Kjaxin tí sín tjarisoá mé jnkojína chrónixjehé sín éxi chrónixjehé kíchuá mero la kjaxin chróchóntehé sín kjuasáya.

³ La ko kjaxin chrókjuínkítsa tí síchjin tsíok'án la ko nchekítōnhén sín nkehe sine sín tí chaxín kohya nkexro tsjinkítsa sín.

⁴ A ntá tí chojni chjín tsíok'án chóna xjeen o chóna ínté, a ntá tí jehe sín mé chrók'uitja sín chrókjuínkítsa sín kíxín sine tí sín kjéhya sín. Tíha mé chrókjuenkaxin sín tí it'é, iné sín kíxín kjuínchek'ánki sín, kíxín xíkaha mé jína tōxrjínjin Dios.

⁵ Tí tjan chaxín tsíok'án na jehó tjan tjan tjan mé jehó Dios tinkáchónki tjan la imá chrónóhehe tjan Dios tie la ko nchakotjin.

⁶ A ntá tí sín tsíok'án íxri sín tjasin sín jie la kjónté tjejóchón sín la éxi tsík'en sín xíkaha tjejó sín.

⁷ Tétuēnhén tí sín kíxín sínchexiteyá sín kaín tíha kíxín tsokohya nkexro tsjanchia jie.

⁸ A ntá tí nkexro tōxakuenhya kíxín tí sín naxa kjéhya la ko kjaxin tōxakuenhya kíxín tí sín tjejó ntōe ch'án mé xíkahó tjáqoxin kíxín nínkehó tinkáchónkihya ch'án Dios. Mé xíkaha antsí chóna ch'án jie a ntá tí sín tinkáchónkihya Ínchéni la kénhyó.

⁹ Tí ts'ínixín ihnjé tí sín tsíok'án la chrók'uínixín jehó tí sín chóna sesenta nánó la ko tí sín k'uechóna sín jnkokóá xii.

¹⁰ Kjaxin chrókjuáqoxin tjan kíxín jína ch'e tjan xra la ko chrókjuáqoxin tjan kíxín jína kjuínchek'ánki xjeen tjan la ko kjaxin jína nixjehe tjan tí nkexro tjiji ntōe tjan la ko kjaxin k'uayakonhen tjan tí sín tinkáchónki Cristo la nchehnkehya tjan la ko kjaxin kjuínkítsa tjan tí sín níhi la ko í so xra jína kjuích'e tjan.

¹¹ A ntá chrók'ueínixínhya ihnjé tí sín tsíok'án naxa tsjéhya nánó chóna kíxín tsontáchro asén sín kíxín í jnko chojni ntoa tsotēhe sín inaá la ntá tsítōhe sín íxra kuente Cristo.

¹² Ntá xíkaha tsjasin sín jie kíxín sínchexiteyáhya sín tí nkehe tsíntáchro sín.

¹³ Kjaxin sátsji sín ijnko nchia la í jnko nchia la ntá tsoséhe sín la ntá kjaxin xriko sín kjuach'ia la ko ch'éna sín kjuach'ia la kaín nkehe nixja sín la jehya jína tí xíkaha chrónixja sín.

¹⁴ Méxra tí sín tsíok'án naxa tjarisoá sín la íchá jína chrókótēhe sín chróchóna sín xjeen sín la ko chrók'uayakonhen sín ntōe sín. A ntá tí xíkaha la tí sín nínkakonhan la chrókjontahya sín tí jaha.

¹⁵ A ntá iso tí sín tsíok'án ó kuítōhe sín tinkáchónki sín Ínchéni kíxín ch'ín Tsochren tsíkjachrōe sín.

¹⁶ A ntá jnkojín chojni tinkáchónki Cristo ts'ikon sín kíxín tsíok'án tí síchjin kjéhya sín ntá t'ichjānxin tsjinkítsa sín kíxín sine tí sín a kíxín tsochóntiahya sín tí nínko tsjinkítsa. Méxra jehó tí sín chaxín tsíok'án chónahya nínkexró tsjinkítsa mé chrókjuínkítsa tí nínko.

¹⁷ Tí nkexro jína t'etōan xra kuente nínko la jehe sín chrókjuacha sín la ko kjaxin antsí chrókjuikosáyēhe chojni tí sín chaxín xra ó tjejóchronaxin sín la ko tjako sín.

¹⁸ Kíxín xroon itén Dios mé ntáchro kíxín: "Chrók'uejóyáhará kampoza ir'va tí koxinta tjejóch'e xra", la ko kjaxin ntáchro kíxín: "Tí sín ch'e xra la siín kjuachaxin chrókjuacha sín."*

¹⁹ Chrókuaaha kuenté jnkojín nkexro tsjika o kjuach'ia t'eka jie tí nkexro t'etōan xra kuente nínko. T'ichjānxin tsonoxín yaá o iy'á sín tsochrónka kíxín chaxín chóna jie tí nkexro a.

²⁰ Chrókjuéntuéhé tí sín tjasin jie nkayakon kaín sín kíxín ntá tsinhin tí í so sín kíxín tsochracon sín, í tsjasinnya sín jie.

²¹ Tétuanxian kjuachaxién Dios la ko Ínchéni Jesucristo la ko tí sín ángel kjuéyá ch'án kíxín jnkokón tsjéntuéhé kaín chojni la ko jnkokón tétuēnhén sín kaín tí nkehe xrxanka.

²² Chrókjuéyáhya chjini jnkojín sín kíxín ts'etōan sín xra kuenté nínko kíxín tí chróchóna sín jie la kjaxin jaha chrókuaamá tí jie. A ntá jaha chrókuitōhé kaín nkehe jínahya.

* 5:18 Deuteronomio 25.4, Mateo 10.10; Lucas 10.7

²³ Jaha la jnkoyaxón tóniha tjté tsaa. Jehya ìntá ó chrók'uaia. Kjaxin intsí xranvino chrók'uaia ntá chrókuítaxián jína.

²⁴ Tí ijíe jnkojín chojni la t'íkonni noxín tí naxá kuítogéxínhya ijíe sín. A ntá í so sín nóxínhya tjasin sín jìe kjánchó tió tsjixixín la tsonoxín tí jìe tjasin sín.

²⁵ Mé xíkaha kjaxin ó t'íkonni kixin iso chojni imá ch'e sín tí xra jína. A ntá í so sín kjónté t'íkonhyani la xitjahya tsjak'emá sín tí nkehe jína ch'e sín.

6

¹ Tí sín ch'exín xra mé t'ichjánxìn tsochóntehe sín kjuasáya tí lamo kuénte sín, kixin ntá tí í so sín la ts'ántaxiñhya sín ihnjé Dios la ko ts'ántaxiñhya sín tí nkehe tjakoni.

² A ntá tí sín ch'exín xra la chóna sín lámogé sín tinkáchónki Cristo la mé chrókuítogéhya sín tsjikosáyehe sín tí lamo kixin jnkokoá kichó sín. La mé antsí jína chrókuinjitsa sín kixin ó nohe sín kixin tjinkitsa sín ijnko nkexro tinkáchónki Cristo la chrótjuéhe sín kichó sín. Jaha mé tjákehé sín kaín tíha.

Tí nkehe tinkáchónkini tsochéxinni

³ Iso sín tjako tí nkehe jehó sín tjenkayáxin sín la tóyogéhya tí nkehe jína kjuako Ìnchéni Jesucristo la ko jehya tí nkehe tinkáchónkini.

⁴ Ó jehí nchehnke sín la nínkehó noehya sín. Tí ntoáhya nixja sín la tíha mé éxi ijnko chin chóna sín la tíha mé tjixín tí kjuachjinoxínhin la ko tjanjonko kichó sín la ko t'ántaxínhin sín kichó sín la ko chóntehya sín kichó sín kjuasáya.

⁵ Mé tí sín la náxrjónhya tjenkayáxin sín la jnkochrín tjanjonko kichó sín la noehya sín tí nkehe chaxín. Mé tjenkayáxin sín kixin tinkáchónki sín Ìnchéni kixin xíkaha chrókujuacha sín nchónhya chichaon, ichro sín. Jaha la chrókuítogé tí sín xíkaha ch'e.

⁶ Tí tinkáchónkini Ìnchéni la ijnko nkehe imá tjetoan la ko tjete tíha a ntá kjuaxróxin chrók'uejóni kjónté tí nkehe chónani ó.

⁷ A ntá tí kokjínini la nínkehó kuikohyani tí kuini chjasintajni la kjaxin tió ts'enni la nínkehó nkehe xitjahya sátsjikoni.

⁸ A ntá tí chónani nkehe sineni la ko chónani ikéni la kjónté táhó la chrókóchéheni.

⁹ A ntá tí sín tjinkaon sín imá chrókóríko sín mé tí sín a mé tsjichróde sín la lonjtí sín kixin xíkaha tjenkayáxin sín, la mé ts'itjáyaxín sín tíha.

¹⁰ Tí imá tjuéheni chichaon la tíha mé nuéé kaín nkehe jínahya. Jnkojín chojni imá tjinkaon sín tsochóna sín chichaon ntá tsjichróde sín tsítoghe sín tsinkáchónki Ìnchéni la tíha mé imá sinchekjásótexin sín asén sín.

Jína tí nkehe tinkáchónkini

¹¹ Jaha mé tinkáchónké Dios la tjtogé kaín tí nkehe i. Chrókuak'e ntoá la ko kaín asán chróxaráxinkávan Dios la ko chrókuinkáchónkia ch'án la ko chrótjuéhé kichua la ko chrókónínkákonhya tjoka la ko chrókuinchehnkehya asán.

¹² Tjanjonkoa kaín nkehe jehya tí jína la ko kaín asán tinkáchónkia Ìnchéni kixin ntá chrókujuacha chrók'uayéhé tí kjuachón jnkochrín kixin mé xíkaha k'uíyaha Dios tí jaha. Jaha la ó tsichrónka kixin tinkáchónkia Ìnchéni la ó kuínhin la ko k'uikon nchónhya chojni.

¹³ Nkayakon Dios, tí nkexro chjéhe kjuachón kaín xín tí nkehe síchón, la ko Jesucristo, tí nkexro tsichrónka jína nkayakon ch'ín Poncio Pilato, mé tétuanhan

¹⁴ kixin sijnchexiteyá kaín tí nkehe t'etogán Dios kixin í chrókuínkíhya tí nkehe chrókuinkáchónkia la ntá tsokohya ninkexró ts'eka jìe tió tsjixrakájia tí yaon tsokjan Ìnchéni Jesucristo.

¹⁵ Tsjixraká tí yaon kjueyá Dios ntá jehe ch'án mé tsjanjon ch'án kjuachaxin kixin itsi Jesucristo. Dios la jehó ch'án mé chóna ch'án kjuachaxin ts'etogán ch'án. Jehe ch'án mé tí Rey t'etuenhen kaín xín tí sín rey la ko jehe ch'án mé Ìnché kaín chojni.

¹⁶ Jehó Dios mé chónhya ts'en la tí tjen ch'án la imá t'inkaséyan la ko kohya nínkexró tsjacha tsoghjina tí tjen ch'án. Nínkexró k'uikonhya tí jehe ch'án la ko nínkexró xitjahya ts'ikon tí jehe ch'án. Tsjikosáyehe ch'án kixin jehe ch'án chóna ch'án kjuachaxin ts'etogán jnkochrín. Amén.

¹⁷ Tí sín chóna itsjé nkehe chjasintajni mé tétuenhén sín kixin sinchehnkehya sín la ko tétuenhén sín kixin tsochóntiáxínhya sín tí nkehe chóna sín kixin jnkochrínhya tsochóna sín tíha. Íchá jína chrókuinkáchónki sín Dios tjechón kixin jehe ch'án tjanjon ch'án kaín xín nkehe kixin mé xíkaha tjinkaon ch'án tsochéheni.

¹⁸ Tétuenhén sín kixin chrókuich'e sín tí nkehe jína kixin tí chaxín chrókóríko sín la chrókuinjitsa sín kichó sín la chrók'óxikayéhe sín tí nkehe chóna sín.

¹⁹ Mé xíkaha chrókujuacha sín tí nkehe tjete kixin chr'exín la jína chrók'uejó sín kixin chrókujuacha chróchóna sín tí kjuachón jnkochrín.

Kjuixixín k'utúenhen ch'in Timoteo

²⁰ Jaha Timoteo t'ayakohén tí xra la tiénhya tí nkehe ntoáhya nixja chojni. Ntáchro sín kixin imá nohe sín kjánchó chaxínhya tíha.

²¹ Iso sín ó xíkaha ntáchro sín kixin imá nohe sín la ntá kjuíchròe sín í tinkáchónkihya sin Ìnchéni. Dios chrókjuintayavan tí jaha. Amén. Ó tjen.

Tí xroon yóxin ikjin ch'ín Pablo chr'énhen ch'án tí ch'ín Timoteo

Ch'ín Pablo nixjehe ch'án tí ch'ín Timoteo

¹ Janhan Pablo mé kjueyána Jesucristo t'aha ch'án xra kixin xikaha tjinkaon Dios kixin mé xikaha ó chrónka ch'án kixin tsjanjon ch'án kjuachaxin tsochóna chojni kjuachón jnkochrixin tí tsinkáchónki sín Jesucristo.

² Ikjin tí xroon i chr'anhan jaha kichó ni Timoteo. T'ikuán éxi xjanna tí jaha mé imá tjuaha. Kjuasáyé It'eni Dios la ko Inchéni Jesucristo chrókjuintayavan ch'án la ko chrókujikonógha ch'án la ko chrótjáha ch'án kjuaxróxin.

Chróchrónka ch'án kixin tinkáchónki ch'án Jesucristo

³ Xráxinkavan tí jaha tió níxjaha Dios nchakotjin la ko tie la ko tjétjáncháha kjuasáyé Dios kixin imá tinkáchónka ch'án. Jehe ch'án mé t'aha xra kaín asenná éxi xikaha mé k'uékjich'e tí sín tsík'axrjenixinna.

⁴ Xráxinkavan jnkochrixin nkexrí tsjanja la tjínkavan kixin chrótsjahá tí jaha inaá kixin tsochéhe asenná.

⁵ Ó nóna kixin kaín asán tinkáchónkia Jesucristo. Kjaxin náchrja tjan Loida la ko iná tjan Eunice mé saoxín kuinkáchónki sín Inchéni Jesús la ntá ó nóna kixin kjá kjaxin jaha xikaha tinkáchónkia ch'án.

⁶ A ntá ijie ntáxráxinkavan kixin chrók'uitjáyannya tí kjuachaxién Dios kjuanjon ch'án k'uayéhé tió kjuaké tjaná chrítaón tí jaha.

⁷ Dios la kjuanjonhya Nchakuen ch'án kixin tsochrakonni. Náhí. Kjuanjon ch'án tí Nchakuen ch'án kixin tsochótani kjuachaxin la ko jina tsotjuèheni ch'án la ko jina tsjenkayáxinni.

⁸ Chrókósuàhya chróchronka kixin tinkáchónkia Inchéni la ko kjaxin chrókósuàhya chróchronka kixin janhan tjéchinaxián tí xrjanka itén ch'án. Kjóté la íchá jina chrókjuasótxián tí tjákua tí tan tsaáxinni kixin tí kjuachaxin kuènte Dios ó k'uayéhé.

⁹ Jehe Dios mé kuaáxinni la ko kjueyá ch'án tí jeheni kixin jina chrók'uejóni. La jehya tí xra jina kjuich'eni ntá chrókuaáxinni. Náhí. Kjuasáyé Dios kjueyá ch'án tí jeheni kixin tsinkáchónkini Jesucristo. Tí naxa xrankixixinhya chjasintajni mé tsíkjenkayáxin ch'án tíha kixin jehe ch'án mé imá tjuèheni ch'án.

¹⁰ Ntá jie ó kjuakoxin Dios kixin tjuèheni ch'án kixin ó kui tí nkexo tsaáxinni mé Jesucristo. Kjuínchek'itjáyán ch'án tí kjuachaxin k'uéchóna tí kjuach'én kixin kjuacha ch'án xechón ch'án inaá. Chronkaxin itén ch'án nkexrí tsaáxinni ntá ó kónoexinni kixin tí kjuachón kjuakoxin ch'án mé xitjahya ts'itjáyán.

¹¹ Dios mé k'uetuanna sátsjixrjanja itén ch'án la ko kjueyána ch'án tsjáqghá tí sín jehya sín judío tí tan jina.

¹² Mé xikaha tjétjasótxinxinna kaín tí nkehe i la kjóté tósuànahya kixin ó choxian jina tí nkexo tinkáchónkia. Mé ó nóna kixin chóna ch'án kjuachaxin ts'ayakonhenni ch'án tsjixrakájia tí yaon tsokjan ch'án. Méxra janhan tjahá ch'án asenná kixin ts'ayakonhen ch'án.

¹³ T'itjáyannya tjákua kaín nkehe jina ó kjuákoha. Naxa titekávan la ko tjuèhé kichuárá kixin tinkáchónkia Cristo Jesús.

¹⁴ Kjuachaxién tí Nchakuen Dios chótani jnkojnkoni mé t'ayakonhén jina tí tan tjákua kjuíntakitonhan Dios k'uayéhé.

¹⁵ Jaha mé ó noha kixin kaín tí sín estado Asia mé jehe sín kuítóna sín la ko kjaxin tí ch'ín Figelo la ko ch'ín Hermógenes.

¹⁶ Tjáncháha Inchéni kixin imá tsjikonóghé ch'án tí sín tjejó ntqé tí ch'ín Onesíforo kixin jehe ch'án mé imá kjuínkítsana ch'án la ko kósuèhya ch'án ikui ch'án kjóté tjéchinna.

¹⁷ Tí nantá kjuíji ch'án chjasin Roma ntá kuitoehya ch'án kjueyána ch'án hasta k'uitjana.

¹⁸ Tjáncháha Inchéni kixin tí yaon itsi ch'án ntá chrókujikonóghé ch'án tí ch'ín a kixin jaha ó noha jina kixin nkexrí kjuínkítsa ch'án tí janhan tí chjasin Éfeso kjaxin.

2

Kjuíncheyóxin ch'ín Pablo kixin jeheni éxi yóhé ijnko soldado jina kuènte Jesucristo

¹ Jaha xjeenni tákjá tí kjuachaxin kjuasáyé Jesucristo kjuanjon ch'án kixin tsjinkítsa kixin tinkáchónkini ch'án.

² Tí nkehe kuínhín kjuàkua nkayakon nchónhya chojni mé xíkaha chjehé tí xrà tí sín jína choxian jína ch'e xrà kixin ntá jehe sín mé xíkaha chrókjuakohe sín í so chojni inaá.

³ Jaha la kjónté nchónhya nkehe kjuasótia la chrókjuacha kixin ijnko soldado jína kuènte Jesucristo.

⁴ Kohya nijnko soldado jína ch'e xrà chrók'uixenhen ókjé xrà kixin t'ichjánxin jnkojínxón xrà sich'e ch'án kixin éxi tjinkaon tí nkexro t'etuenhen ch'án.

⁵ Mé xíkaha éxi yóhé ijnko nkexro tsotsítán. Ntá tsjachahya ts'áyéhe ch'án nijnko nkehe tí sinchexiteyèhya ch'án tí sín t'etgan.

⁶ La éxi yóhé ijnko nkexro ch'e xrà nonte ntá chóna ch'án kjuachaxin saoxín tsakja ch'án tí nkehe ts'óna.

⁷ Chrórxaxinkávan jína kaín tí nkehe xrjanka la ìnchéni mé tsjinkjtsa tsiénxian kaín nkehe.

⁸ Xráxinkávan kixin Jesucristo la ó xechón ch'án. Jehe ch'án mé k'uaxrjenixin ch'án ch'in rey David. Tíha mé tí tan jína tsaáxinni tjétjàkua.

⁹ Tí tan tjéxrjanka mé tjasótexinna. Tíha mé tjéchrontetoxinna éxi ijnko chojni tsíkjàya la kjónté tí itén Dios la jehya tjechrontetoxín cadena.

¹⁰ Méxra kjónté nchónhya t'atsinka tí janhan la ntáxiteyá kixin tí í so sín kjueyá Dios tsaáxin sín ch'án kixin tsochóna sín kjuachón jnkochríxin kixin tinkáchónki sín Jesucristo.

¹¹ Tíhi mé chaxín:

Tí jehe ch'án k'uénxinni ch'án a ntá chr'èxin ts'ejókoni ch'án.

¹² La tí tsjasótexinni tí jehe ch'án la ntá kjáxin ts'áyéheni kjuachaxin kuènte ch'án ts'etgòanni.

A ntá tí chrókjuinchemáni tí jehe ch'án na ntá kjáxin ch'án la xíkaha sich'e ch'án.

¹³ Kjónté nchexiteyèhyani ch'án la jehe ch'án tjenchexiteyá ch'án kixin Dios la xitjahya sich'ia ch'án.

Chrókjuich'eni tí xrà jína

¹⁴ Nchexraxinkávan sín kaín tí nkehe i. Dios tjetsjehe tétuenhén sín kixin chrókuítóhe sín tí nixja sín tjanjónxin sín kixin ó chónkó tíha la ninkehó sínkíhya. Tí xíkaha ch'e sín la sinchek'itjáyán sín tí sín tjejótinhin.

¹⁵ Sích'e xrà jína kixin tsóxrjínhin Dios tí xrà tjech'e a. Ntoa chrókjuàkua tí tan jína chaxín kixin ntá chrók'uichjánxinhya chrókósuàha.

¹⁶ La tjtóhé tí nkehe náxrjónhya la ko chónkó nixja iso sín kixin tí sín nixja xíkaha la antsí tsinkák'ánkí tí nkehe jínahya nixja sín.

¹⁷ Tí nkehe jehya jína tjako sín mé éxi yóhé ijnko iton sóa sitinkáchr'enka. Mé xíkaha tjako tí ch'in Himeneo la ko ch'in Fileto.

¹⁸ Jehe sín mé ó kjuixin kuítóhe sín tí ntja ntoá la ntáchro sín kixin ó kjuixin k'uátsínka tí tsoxechón chojni. Ntá xíkaha ch'iyehé sín tí í so sín la tsjitóxinhin sín tí nkehe tinkáchónki sín.

¹⁹ Kjánchó tí sín tinkáchónki Dios éxi yóhé tí xrò xránkixín tjt'ò xitjahya tsoxika la chóna éxi ijnko sello tí itén Dios ntáchro kixin: "Ìnchéni mé tjatsgan ch'án tí chojni kuènté ch'án",* la kjáxin ntáchro kixin: "Kaín tí sín tinkáchónki Cristo mé t'ichjánxin chrókuítóhe sín kaín nkehe jínahya," mé xíkaha ichro itén Dios.

²⁰ Ijnko nchia jié kuènte tí sín rico la síin vaso tsík'óna chica oro la ko vaso tsík'óna chica plata. La kjáxin síin nkehe tsík'óna ntachiso la ko nkehe tsík'óna nchetje. Iso la xrà ó tsík'óna kuènte tí xrà tjetuanhya.

²¹ A ntá ijnko chojni chrókuítóhe kaín jié chrókóyóhé éxi ijnko vaso tjóá jína kixin chrókuicháxinhin Ìnchéni. A ntá tí nkexro xíkaha chrókjuich'ehya tí nkehe jínahya kixin chrókuicháxinhin Ìnchéni tí xrà jína.

²² Tjtóhé kaín tí nkehe jehya tí jína tóxrjínhin í so tí sín ntasoá a. Chrókjuak'e tí ntja ntoá la ko kaín asán chrókuinkachónkia Cristo la ko chrótjuéhé kaín chojni la ko kjuaxróxin chrók'uejokoa kaín sín. Mé xíkaha chrók'uéjò kaín xín tí sín kótjóá asén mé kaín tí sín tinkáchónki Ìnchéni.

²³ Jaha chrókuahya kuènté tí sín lontj tjenkayáxinhya jína kixin jaha ó noha kixin xrahya chrókjuanjonko kichó sín.

²⁴ A ntá ninkexro ch'ehé xrà Ìnchéni chrókjuanjonko kichó sín kixin jína chrókjuinkjtsa kichó sín. Chrókónohe sín kaín nkehe jína chrókjuako sín la ko chrókónínkakuenhya sín kichó sín.

²⁵ Kaín asén sín jnkójina chrónixjehé sín tí sín titekakonhya kixin chróchónhen sín kixin Dios chrókjuinkjtsa tí sín a chrók'uixínki tí ntoáhya tjenkayáxin sín kixin ntá chrókónohe sín tí nkehe chaxín ntoá chrókjuich'e sín.

²⁶ Kixin t'ichjánxin chrókónohe sín nkexrí chrókuaáxin sín kixin ch'in Tsochren tjinkaon chrókjuich'iyehé sín ntá chrókjuasin sín jié.

* 2:19 Números 16.5; Juan 10.14

3

Nkexrí ts'ejó tí chojni chjasintajni tí yaon tsjixixín

¹ T'ichjánxin chrókónoha kixin tí yaon tsjixixín ntá itsi tí yaon kjuaxróxinhya ts'ejó chojni.

² Tí sín chjasintajni tsinkáchónkihya Ìnchéni mé imá chrók'ueṭoan sín jehó la ko imá tsoxrjinhin sín chichaon la ko sinchehnke sín la ko imá ts'ántaxínhin sín Dios. Sinchexiteyèhya sín it'é sín la ko iné sín la ko tsochóntahya sín kjuasáya la ko tsinkáchónkihya sín ninkehó dios.

³ Tsoṭjuèhya sín kichó sín la ko tsikonóḡehya kichó sín la ko tsjonta sín kichó sín la ko ninkexró tsochrakuenhya sín la ántosén sín tsjasin sín jie, la ko imá tsojjehe sín la ko imá tsonínkakonhen sín kaín nkehe jína.

⁴ Jehé sín mé sinchekji kichó sín la ko tsjenkayáxinhya sín jína la ko sinchehnke sín. Tsoṭjinkaon sín tsjeyá sín tí nkehe ntáchro asén sín ó a ntá tsjeyáhya sín Dios.

⁵ Jehé sín la éxí chojni tinkáchónki Dios xíkaha ts'ejó sín. Kjánchó chaxínhya. Tsinkáchónkihya sín tí kjuachaxin kuènte Dios chaxín ntoá.

Méxra jaha la chrókuankíehya tí chojni ch'e xíkaha.

⁶ Iso tí sín a mé ixri sín t'ixenhen ntḡe ókjé chojni la ch'iyehé sín tí chojni chjin lṭntj tjasin jie la nchexiteyèḡe sín kaín tí ntáchro asén sín.

⁷ La xráxín ó tinkák'itja sín kjánchó nunca kuénxínhya sín tí nkehe chaxín ntoá.

⁸ A ntá éxí yóḡe tí sín k'uékjinchexroan mé ch'ín Janes la ko ch'ín Jambres mé k'ueínínkakonhen sín ch'ín Moisés mé xíkaha tí sín tjako ijie nínnakonhen sín tí nkehe chaxin ntoá. Imá jínahya tí kjuaxrexinkaon kuènte sín la ko titekakonhya sín tí nkehe chaxin tinkáchónkini.

⁹ Kjánchó tsjachahya sín sich'ia sín isé kixin kaín chojni tsoṇohe kixin tí sín a mé lṭntj sín kixin éxí xíkaha tsikónhen tí yaá sín k'uékónínkakonhen ch'ín Moisés.

Tí nkehe kjuixixín k'ueṭuēnhen ch'ín Pablo tí ch'ín Timoteo

¹⁰ A ntá jaha mé ó kuitekávan tí nkehe kjuakua. Ó noha nkexrí kjuak'é janhan la ko ó noha tí xra kjuít'a janhan. Ó noha nkexrí tinkachónkia Ìnchéni la ko noha kixin tjokahya kónínkavan la ko noha nkexrí tjuahḡ chojni. Ó noha kixin kjónté kónínkaon chojni la kjuitoḡahya tí xra a

¹¹ kjónté chónkina sín la ko kjuasótena. Ó noha nkehe kónna tí chjasin Antioquía la ko Iconio la ko Listra. Chrók'óyánna sín la kjuínchekjuasótena sín kjánchó Ìnchéni mé kjuínkítsana kjónté kaín tí nkehe chrókónna.

¹² Kaínxín tí sín tjinkaon tjóá chrók'u'ejó sín nchexiteyèḡe Cristo Jesús la t'ichjánxin tsjasóte sín.

¹³ A ntá tí sín jínahya la ko tí sín ixri ch'ia sín mé ts'óna sín ántsí jínahya. Jehé sín xrich'ia sín la ch'iaxín sín nkehe jínahya.

¹⁴ Jaha la jína chrókjuak'e la í chrókjuínkíhya tí nkehe k'uitjá la ko tí nkehe ó kuitekávan. Jaha la ó noha tí nkexro kjuakḡa.

¹⁵ Jaha la desde xjanntsia k'uitjá nkexrí nixja xroon itén Dios la tíha mé tónoexínni kixin Cristo Jesús tsaáxinni kixin tinkáchónkini ch'án.

¹⁶ Ntá kuenté xroon Biblia kjuachaxién Nchakuen Dios kjuínkítsa tí nkexro ikjin la tíha mé jína tsoxrácuexinni tí nkehe chaxín la ko tíha mé jína tsjentuéheni la ko tsjinkítsani tsoṇoheni nkexrí chrók'uejóni ntoá

¹⁷ kixin tí nkexro tinkáchónki Dios chrókónohe jína la ko chrókjuacha sich'e kaín tí xra jína.

4

¹ Kjuachaxién Dios la ko Ìnchéni Jesucristo, tí nkexro itsi éxí ijnko rey la sinchekitḡexin ijje kaín chojni tjejóchón la ko tí chojni tsík'en,

² mé tétuanhan chrókjuakua itén Dios kaín asán kjónté á chrókuihin sín ḡ náhí. Nixjehé sín jnkojína kixin tsitekaon sín la ko tjéntuéhé sín jnkojína. Chrókónínkákonhya chrókjuakohé sín.

³ Itsi jnko yaon ntá tsoṭjinkakonhya sín tsinhin sín tí nkehe jína. A ntá sinchexiteyèḡe sín tí nkehe ntáchro asén sín ó. Tsjeyá sín nchónhya maestro tsjakḡe sín jehó tí nkehe tóxrjinhin sín chrókuihin sín.

⁴ Méxra tsítoḡe sín tí nkehe chaxín ntoá la ntá itsa sín kuènté kaín nkehe chaxínhya.

⁵ Méxra jaha jína chrókjuenkayáxian la chrókjuacha kjónté tsjasótia. Chrókjuintaxin chrókjuich'e xra chrókjuakohé chojni itén Dios tsaáxinni mé xíkaha sinchexiteyá jína tí xra chonta.

⁶ Ntá janhan ó kjuixraká tí hora tsjasótena la ko ó kjuixraká tí hora its'èn.

⁷ Ó kjuánjonkian jína kaín tí nkehe jínahya la ko ó kjuixinna tí xra kuèntana la ko kjuitoḡahya jína kuinkachónkia Ìnchéni.

⁸ A ntá ijie la tí nkehe tsjtonna mé tjechónhen kixin jína kjuak'é ntihi. Tíha mé tsjanjon Ìnchéni tí yaon itsi ch'án. Jehe ch'án mé ijnko juez jína. Jehya kixin janhván tsákjaá tí nkehe tsjanjon ch'án. Náhi, kjaxin kaín tí nkexro kuítekaon sin ch'án la ko chéhe sín tjejóchónhen sín tió tsi ch'án.

Ch'in Pablo k'uetqan tsjijitsjehe sín ch'án

⁹ Jaha chrókóxakonhan tjoka chrók'uinkatsjehé tí janhan

¹⁰ Kixin ch'ín Demas la kuítóhe ch'án tí janhan kixin imá kóxrjínhin ch'án tí nkehe kuènte chjasintajni. Sátsíkji ch'án chjasin Tesalónica. Ch'ín Crescente mé sátsíkji ch'án chjasin Galacia a ntá ch'ín Tito sátsíkji ch'án chjasin Dalmacia.

¹¹ Jehó ch'ín Lucas naḡa tjékjan ch'án. Tjikjéyá ch'ín Marcos la tsjúkuana ch'án ntihi kixin jehe ch'án mé jína tsjinkitsa ch'án tí xrá chonta ntihi.

¹² A ntá ch'ín Tíquico mé kuétuanhan ch'án sátsji ch'án chjasin Éfeso.

¹³ Tió ts'inka ts'inkakuana tí ka t'itsáte kuítóḡa chjasin Troas ntóé ch'ín Carpo la ko kjaxin ts'inkakuana tí libro kuèntana la ko koí tí tjoé iko tsík'óna xroon.

¹⁴ Tí ch'ín Alejandro tí ch'ín ch'e xrá ch'ica mé nchónhya nkehe jínahya kjuích'ena ch'án. Kjánchó Ìnchéni mé tsjenkehe ch'án kaín nkehe kjuích'e ch'án.

¹⁵ Jaha mé tóxakonhan kixin tí jehe ch'án kixin imá ninkakonhen ch'án tí nkehe tjakoni.

¹⁶ A ntá tí saoxín k'uèya tí síxree tí kjuia tí tjejó sín la ninkexró kjuinkitsahyana. Kaín sín me kuítóna sín janhván. Kjónté xíkaha la tjáncháḡa Dios kixin chrókuahya ch'án kuéntá kixin xíkaha kjuích'e sín.

¹⁷ Kjánchó Ìnchéni mé chaxín kjuínkitsana ch'án la kjuanjon ch'án kjuachaxin kixin tsjachana naḡa jína tsjakuá itén ch'án. Ntá kuínhin kaín tí sín jehya judío. A ntá Ìnchéni kjuínkitsana kixin kjónehya koxra.

¹⁸ Ìnchéni mé tsjinkitsana kixin naḡa tsonnahya kaín nkehe jínahya. Jehe ch'án mé ts'ayakonna ch'án ts'ixanhan tí tjet'etqan ch'án nkaya nkajni. Kjuasáyé ch'án kixin xíkaha jnkochrixín tsoxiteyá. Amén.

Ch'in Pablo kjuixixín nixja ch'án

¹⁹ Jaha nixjehé tí tjan Prisca la ko ch'ín Aquila la ko nixjehé tí sín síin ntóé ch'ín Onesíforo.

²⁰ Kuítóhe ch'ín Erasto chjasin Corinto. A ntá ch'ín Trófimo kuítóhe chjasin Mileto kixin kónihi ch'án.

²¹ Tóxakonhan chrók'uinka naḡa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kichó ni ntihi nixjaha sín jnkójina.

²² Ìnchéni Jesucristo chrók'uajikoa ch'an la Dios chrókjuintayaonrá kaín rá mé xíkaha tsoxiteyá. Amén. Ó tjen.

Tí xroon ikjin ch'ín Pablo chr'énhen ch'án tí ch'ín Tito

Ch'ín Pablo nixjehé tí ch'ín Tito

¹ Janhan Pablo mé t'ahá xrá Dios la ko tsíkjeýána Jesucristo káxin tsjáqohá tí í so sín tsíkjeýá Dios kjaxin káxin ts'itja sín tsonohe sín káxin nkexrí chrókuinkáchónki sín tí nkehe chaxín.

² Ntá ts'ejóhónhen sín tsochóna sín kjuachón jnkochríxín. Dios la xitjahya sich'ia la káin tí nkehe tsíchronka ch'án ósé tí naxá k'ónahya chjasintajni la mé xíkaha tsonhen.

³ Ntá tí yaon tsintáχρο Dios la mé jie ó xiteýá la ntá kónoxín tí tan kuénte ch'án. A ntá Dios tí nkexro tsaáxinni mé k'uetóan káxin sit'ahá ch'án xrá tsjákuá itén ch'án.

⁴ Ikjian tí xroon i chr'anhan jaha Tito. T'íkuan éxi chaxín xjanna tí jaha káxin yóini tinkáchónkini Jesús. Kjuasáyé It'éni Dios la ko Jesucristo tí nkexro tsaáxinni, chrókuintayavan la ko chrókujkonóhaha ch'án la ko chrótjáha ch'án kjuaxróxin.

Tí xrá sich'e tí ch'ín Tito chjasin Creta

⁵ Kujtoha jaha tí isla Creta káxin jaha chrókuétuénhen tí sín siín ntiha káxin nkexrí chrók'uejó sín la ko chrókónoxín nkexro ts'etóan kuénte jnkojnko nínko jnkojnko chjasin éxi tí kuétuánhan jaha.

⁶ T'ichjánxin káxin tí nkexro ts'etóan xrá kuénte nínko la jína chrókjuak'e káxin kohya nkexro chrók'ueka jie, la ko chróchóna jnkokoá ichjién la ko tí xjeen sín chrókuinkáchónki Ìnchéni káxin tsókohya nkexro chrókjuanchia jie káxin jehya tí jína tjejóh'e sín, la ko kjaxin chrókójiehya sín.

⁷ Mé xíkaha tí nkexro ts'áyehé tí xrá ts'etóan xrá kuénte nínko mé ts'etóan nkexrí tsonhen xrá kuénte Dios la ntá t'ichjánxin ijnko nkexro tsjenkayáxin jína, chrókjuasinhya jie. La chrókjuinehnehya la ko chrókóninkakonhya tjoka. La ko kjaxin jehya ijnko nkexro tókoan la ko jehya ijnko nkexro tjeýá kjuanínkaon la ko chrókóxrjjenhya sín chrókjuich'ia sín ntá chrókjuacha sín chichaon.

⁸ Kjaxin jína chrókjuak'e ch'án káxin tí tsjiji ijnko nkexro ntóe ch'án chrókjuanjon ch'án kjuachaxin chrókjuak'e tí nkexro a. La ko jína chrókjuak'e ch'án la ko jína chrókjuenkayáxin ch'án káxin ijnko nkexro ó tsíkjinchetjóá Dios la ko chróchóna ch'án kjuasáyé ch'án.

⁹ Kjaxin t'ichjánxin chrókuitóehya ch'án tí tan jína xráqohé ch'án káxin ntá jína tsjáqohé ch'án í so chojni tí nkehe ntoá la kjónté nkexro tjinkakonhya tsinhin la jína chróchenka ch'án chrókuinhin.

¹⁰ Siín itsjé tí sín nínkaon mé tí sín a la mé tí sín judío la mé nixja sín éxi lóntj sín mé xíkaha ch'iehe sín chojni.

¹¹ Tí sín a la chrók'uíkkehéni ir'va sín káxin tjachróe sín nchónhya chojni káxin tjako sín tí nkehe jehya jína káxin chrókjuich'ia sín chrókjuacha sín nchónhya chichaon.

¹² Ijnko ch'ín kuénte chjasin Creta la mé tsíchronka ch'án nkexrí tjejó tí sín chjasén ch'án. Ntáχρο ch'án káxin: "Káin tí chojni chjasénni mé imá ch'ia sín la ko imá jiehe sín la ko imá kóchjinka sín la ko séhe sín", mé xíkaha chrónka ch'án.

¹³ Tí nkehé tsíchronka ch'án mé chaxín ntoá. Méxra ántsi fuerte chrókjuéntuéhé sín káxin ntá jína chrók'uejó sín chróxraxínkaon sín Dios.

¹⁴ Nixjehé sín káxin chrókuaehya sín kuénte káin tí nkehe tsík'axrjeníxin kja tí sín judío tjako la ko chrókuitekakonhya sín tí nkehe t'etóan tí sín nínkakonhen tí nkehe chaxín.

¹⁵ Tí sín chaxín tjóá kjuaxrexínkaon kuénte sín ntá káin nkehe ch'e sín la jína. A ntá tí nkexro titekakonhya la tjuáhya kjuaxrexínkaon kuénte la kohya nínkehó nkehe jína tí kjuaxrexínkaon kuénte sín la káin nkehe tjenkayáxin sín mé tjuáhya.

¹⁶ Ntáχρο sín káxin chóxin sín Dios a ntá tí t'íkonní nkexrí ch'e sín ó noexínni káxin chaxínhya tíha la ch'ia sín. Jehé sín mé ntoáhya tjenkayáxin sín la ko jiehe sín la ko titekakonhya sín. A ntá tí xíkaha ch'e sín la, ¿nkexrí chrókjuich'e sín tí xrá jína?

2

Chrókjuako ch'ín Tito tí tan chaxín

¹ A ntá jaha chrókjuakua éxi tí chrónka tí tan jína chaxín.

² Tjákohé tí sín ó táda káxin chrókókoanhya sín la ko jína chrók'uejó sín la ko chróchóna sín kjuasáyé sín la ko chróchóna sín ijnko kjuaxrexínkaon jína la ko jína chrókjuinkáchónki sín tí nkehe chaxín la ko chrótuéhe sín kichó sín la ko chrókóninkakonhya sín kjónté tsjasóte sín.

³ A ntá kjaxin xíkaha tí sín ó nána la kjaxin jína chrók'uejó sín la kjaxin chrókjuinchekuáxinhya sín chrókjuinkáchónki sín kjuach'ia la ko kjaxin chrókókoanhya sín. Chrókjuakoxin sín ijnko kjuaxrexínkaon jína

⁴ Kíxin xíkaha chrókjuakuexin sín tí chojni chjin tjarisoá a kíxin chrótuèhe sín xii sín la ko chrótuèhe sín xjeen sín

⁵ la ko chrókjuich'e sín xra jína la ko ntoá chrókjuenkayáxin sín la ko jína chrók'uáyakonhen sín nchia ntóé sín la ko chrókójína sín la ko chrókuitekakonhen sín xii sín. Tí xíkaha chrókjuich'e sín chrókjuinchexiteyá sín la kohya nkexro chrók'uántaxínhin tí itén Dios tinkáchónkini.

⁶ Kjaxin xíkaha chrókjuinchexraxinkávan tí sín ntasoá kíxin jína chrók'uejó sín chróchóna sín kjuasáyé sín.

⁷ Jaha mé chrókjuákoéxian sín kaín nkehe jína la ko chrókjuákohé sín kíxin ntoá chrók'uejó sín.

⁸ Jaha la chrónixja tí nkehe jína kíxin kohya nkexro chrók'uántaxín la ntá xíkaha chrókósuèhe tí sín nínkaon la ntá kohya nkehe jínahya chróntáchoo sín kuènte tí jeheni.

⁹ Tétuènhén tí sín xrich'exón xra kíxin chrókjuinchexiteyèhé sín tí lamo kuènte sín la ko chrókójína sín la ko chrónixjankejehya sín tí nkexro ch'ehe sín xra

¹⁰ la ko kjaxin chrókueéhya sín kíxin jehya ijnko chojni chëe tí jehe sín. Ntá kaín chojni chrók'uikon sín kíxin tjákoxin sín kíxin náxrjón tí itén Dios chrókuaáxinni.

¹¹ Kíxin Dios mé kjuakoxin ch'án kíxin nkexrí tjuèhene ch'án kíxin jehe ch'án mé tsaáxin kaín chojni.

¹² Kjuasáyé Dios mé tjákohe ni ch'án kíxin chrókuítóhene kaín nkehe jie la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios.

¹³ Kjaxin chrók'uejóni jína kíxin chrókóchéhene chrók'uejóchónhenni tí yaon kjuachaxiéni Dios jie itsi Dios la ko Jesucristo tí nkexro tsaáxinni.

¹⁴ A ntá jehe ch'án mé k'uenyákonhenni ch'án kíxin tjínkaon ch'án tsaáxinni ch'án kíxin tsotjuáxin kaín jie chóntani kíxin ntá jeheni mé ts'onani ijnko chojni sich'ehe ch'án xra la ko tsóxrjinhjinni sich'eni kaín xra jína tjínkaon ch'án.

¹⁵ Tíhi mé chrókjuákua la ko chrókjuinchexraxinkávan sín la ko chrókuétuènhén sín kjuachaxiéni Dios. Chrókuítóéhya kíxin ninkexró chrókókjonièhya tí nkehe tjákua jaha.

3

Jína chrók'uejó tí sín tinkáchónki Cristo

¹ Chrókjuinchexraxinkávan sín kíxin sinchexiteyèhé sín tí gobierno la ko tsitekaon sín ichrén xra ts'etóan tí síxreé kíxin chrókjuich'e sín kaín xra jína ts'etóan tí sín a.

² La ko chrók'uántaxiènhya sín ninkexró la ko kjuaxróxin chrók'uejó sín la ko chrók'óna sín ijnko chojni jína la ko chrókjuakoxin sín kíxin jehya ijnko chojni nchehnke la chrókjuikosáyehé sín kaín chojni.

³ Jeheni kjaxin ósé k'uélontjini la ko k'uékitekakonhyani Dios. Chjini k'uék'ajini la k'uékóxrjinhjini kaín nkehe jínahya. La ko jehya jína k'uék'ejóni la ko k'uéchóntani kjuachjinoxínhin la ko k'uéchjinoxíènhenni í so chojni.

⁴ A ntá tí Dios tsaáxinni mé kjuakuejinnini ch'án kíxin jína ch'án la ko tjuèhe ch'án kaín chojni.

⁵ Jehe ch'án kuaáxinni ch'án la jehya kíxin ichrén xra jína chrókjuich'ehe ni ch'án. Náhí, ó jehi kuikónóhene ch'án la ntá kjuinchekaáni ch'án la ko kjuínchetjóani ch'án. Ntá kokjìhini njxin kíxin tí Nchakuen ch'án la mé k'uáyèxinni kjuachón njxin.

⁶ Kjuasáyé Jesucristo tí nkexro tsaáxinni ntá kjuínchekjìtonhenni Dios Nchakuen ch'án kíxin tsochóntani kjuachaxin kuènté ch'án.

⁷ A ntá xíkaha kjuasáyé ch'án kjuínchetjóani ch'án kíxin ntá tjejóchónhenni tí kjuachón jnkochríxín tsjanjon ch'án.

⁸ Kaín tíha mé chaxín. Tjínkávan kíxin jaha chrókuétóan kaín tíha kíxin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkítsa kaín chojni.

⁹ A ntá jaha mé tjtohé tí sín tjachaxin kíchó sín lontjì sín la ko tjtohé tí nkehe tinkáchónki sín kuènte tí sín tsik'axrjenixin sín la ko tjtohé tí sín tjanjonxin tí ley kuènte Moisés. Kaín tíha la ó chónkó la ninkehó kjuaxrexinkaon chóntahya.

¹⁰ Jnkojín nkexro tjínkaon tsjixrónkáxin tí tójnkotsé njnko ntiha la nixjehé ch'án jnkojína senó la ko yóxin inaá ntá tí titekakonhya ch'án ntá tjtohé sátsji ch'án

¹¹ Kíxin ó noha kíxin tí chojni xíkaha a mé ntoáhya tjenkayáxin sín kíxin jehó sín nchek'ánkí sín ijje sín.

Tí nkehe k'uetóan ch'ín Pablo

¹² Tí tsétuènhan ch'ín Artemas la ko ch'ín Tíquico kíxin tsjiji sín tí tjen jaha la ntá tjoka chrók'uinkatsjehé tí janhan chjasin Nicópolis kíxin ntiha tsjak'é ts'atsínkajia tí nchakuen kin.

¹³ Jína chrókjuínkĩtsa jaha tí ch'ín Zenas tí ch'ín nixjayákonhèn í jnko chojni la ko tí ch'ín Apolos la ko chróhjhé sín kaín tí nkehe t'ichjánxinhin sín tió sátsji sín kixin ninkehó nkehe chrók'uitjáyanhya tí t'ichjánxinhin sín.

¹⁴ Ntá tí sín í so chrók'uitja sín nkexrí sich'e sín tí xra jína la ko chrókjuínkĩtsa sín kichó sín ichrén nkehe t'ichjánxinhin sín kixin chrókjuákoqxín sín kixin jína tjejó sín.

Ó kjuixixín nixja ch'ín Pablo

¹⁵ Kaín tí nkexro tjékian janhan ntihi nixjahá sín jnkojína. Jaha mé nixjehé kaín tí sín tinkáchónki Inchéni ntiha mé kaín tí sín imá tjuèheni sín. Dios mé chrókjuincheyaonrá ch'án kaín rá. Amén. Ó tjen.

Tí xroon chr'énnen ch'ín Pablo tí ch'ín Filemón

Ch'ín Pablo nixjehé ch'ín Filemón

¹ Janhan Pablo tjéchinaxián tí xra kuènte Cristo Jesús tjékjian tí xroon i la ko kichó ni Timoteo kixin tí jaha Filemón ts'ayéhé. Jaha mé tjuaha kixin jnkokón tjejóch'eni xra kuènte Dios.

² Kjaxin chrókuinhin kaín tí sín tinkáchónki Ìnchéni tójnoktsé ntoa la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xra éxi tí jeheni.

³ Kjuasáyé It'éni Dios la ko Ìnchéni Jesucristo chrókjuintayaonrá ch'án kixin chrótjáhará ch'án kjuaxróxin.

Ch'ín Filemón tjuèhe ch'án chojni la ko tinkáchónki ch'án Jesús

⁴ Xráxin tjáncháha kjuasáyé Dios tí xráxinçavan tí jaha tí nixjáha Dios

⁵ kixin ó kuinhan kixin imá tinkáchónkia Ìnchéni Jesucristo la ko imá tjuèhé ch'án la ko kaín tí sín tinkáchónki Dios.

⁶ Tjáncháha Dios kixin tsjinkjtsa ch'án tí sín kuítekaon tió kjuákohe sín kixin ntá tsienxín sín jina nkexri kaín tí nkehe chóntani kixin kjuíncheyaonni Cristo Jesús.

⁷ Imá chàna kixin ó nòna kixin jaha kichó ni imá tjuèhé tí sín kichua ntiha la ko imá kjuínchechéhé asén tí sín tinkáchónki Ìnchéni.

Ch'ín Pablo chrónóghé tí ch'ín Filemón kixin tsikonóghé ch'án tí ch'ín Onésimo

⁸ Janhan na kjueyána Jesucristo t'aha ch'án xra méxra chonta kjuachaxin tsétuñhan jaha tí nkehe chrókjuich'e.

⁹ A ntá íchá jina jehó xrjannóaha tsitékáván kixin jaha tjuèhé tí janhan. Janhan Pablo mé ó tádana la ko tjéchinaxián tí xra kuènte Jesucristo.

¹⁰ Méxra xrjannóaha tsjinkjtsa tí ch'ín Onésimo. Jehé ch'án mé t'íkuan éxi xjanna kixin kjuankixin ch'án tsinkáchónki ch'án Jesucristo tí tjéchinakian ch'án ntihi.

¹¹ A ntá tí ósé ch'ín Onésimo mé kjuít'ahya xra jina. A ntá ijie ó nòna kixin imá jina sit'aha ch'án xra tí jaha la ko jina sich'ena ch'án xra kjaxin.

¹² Ntá ijie tsétuñhan ch'án tsjiji ch'án tí tjen jaha inaá. Chrótjuèhé ch'án éxi chrótjuèhé tí janhan.

¹³ Janhan tjínçavan chrókuitonakian ch'án ntihi kixin chrókjuinkjtsana ch'án chrínki tí chrókjuak'e jaha kixin tjéchinaxián tí itén Jesucristo.

¹⁴ Kjánchó tjínçakonhya tsjáncháha xikaha tí tjínçakonhya jaha. Jehya kixin jaha chrókjuinkjtsani kixin chrókuétuñhan xikaha. Náhi. Jehi tjínkaonni éxi jaha tóxrjínhan chrókjuich'e.

¹⁵ Tí ch'ín Onésimo kuitgha ch'án iso yaon a ntá jie la tsochonta ch'án jnkochrínin.

¹⁶ Ijie la jehya éxi ijnko chojni tsik'íná chrók'uikuan ch'án. Náhi. Ntá jie la éxi ijnko nkexro ch'e xra antsí jina mé éxi ijnko kichua chrótjuèhé ch'án. Janhan na tjuaha ch'án kjánchó tí jaha la antsí má chrótjuèhé ch'án. Jehya éxi chojni ó chrók'uikuan ch'án. Náhi. Chrók'uikuan ch'án éxi ijnko kichua kuènte Ìnchéni.

¹⁷ Méxra tí chaxín t'ikuan tí janhan éxi kichó ni jnkokoá tinkáchónkini Ìnchéni ntá chrók'uayéhé ch'án éxi chrók'uayéhé tí janhan.

¹⁸ A ntá tí ichrén nkehe kuaáha ch'án o ichrén nkehe síkáha ch'án la janhan tsjénkaha tíha.

¹⁹ Janhan Pablo mé tjaná kjjnxián tí xroon i na mé janhan tsjénkaha tíha. A ntá janhan tjínçakonhya chrókjuintaxraxinkáván tí jaha kixin kaín tí nkehe tjasikána tí janhan kixin kjuákohá jaha.

²⁰ Méxra kichó ni tsótsenkáván sich'e tí nkehe tjáncháha chaxín tinkáchónkia Ìnchéni. Mé xikaha sijnchechéhé asenná kixin jaha mé kichó ni tinkáchónki Cristo.

²¹ Méxra ikjian tí xroon i chr'anhan kixin ó nòna kixin jaha la sijnchexitayá tíha la ko ó nòna kixin jaha la sich'e antsí má que tí nkehe tjáncháha jaha.

²² Kjaxin tjáncháha kixin tjéyá ijnko nchia tsjak'é. Tjéchinhan kixin jahará la nixjehérá Dios la ntá Dios chrókjuanjon kjuachaxin kixin chrókjuasantsjahará.

Kjuixixín nixja ch'ín Pablo

²³ Kjaxin ch'ín Epafras mé nixjehará ch'án jnkójina. Jehé ch'án mé tjéchinakian ch'án jnkokoá tí ntoéchiso ntihi kixin kjaxin tinkáchónki ch'án Cristo Jesús.

²⁴ Ch'ín Marcos la ko ch'ín Aristarco la ko ch'ín Demas la ko ch'ín Lucas mé kaín sín nixjaha sín jnkójina. Jehé sín mé tjínkjsana sín tí xra.

²⁵ Tjéjáncháha Ìnchéni Jesucristo kixin sintayaonrá ch'án kaín rá. Amén. Ó tjen.

Tí xroon k'uáyéhe tí sín Hebreos

Dios nixjaxin ch'án tí Xjeen ch'án

¹ A ntá tí imá ósé Dios mé nixjehe tí sín tsík'axrjeníxinni nchónhya veces kixin nchónhya nexri chrókiexín sín, nixjaxin ch'án tí sín k'uéchrónka tí itén ch'án.

² A ntá jie tió tsjixixín Dios nixjaxin ch'án tí Xjeen ch'án, na mé Dios kjuích'éna ch'án kaín xín nkehe síin kixin kjuachaxiéntí Xjeen ch'án, mé tí nkexro k'uáyéhe kaín xín nkehe.

³ Jehe ch'án mé t'inkaséyanxín ch'án tí kjuachaxin kuénte Dios, la ko jehe ch'án mé kjaxin éxí tsjehe Dios xikaha tsjehe tí jehe ch'án. Jehe ch'án t'aykonhen ch'án kaín xín nkehe síin kixin tí kjuachaxin jie chóna tí tan nixja ch'án. A ntá kjuixin kjuínchetjóá ch'án tí jie chónani, ntá sákjuí ch'án kjuák'etjaxin ch'án tí tja chjina It'é ch'án tí tjen ch'án t'etóan ch'án nkaya nkajní.

Tí Xjeen Dios imá t'etóan, a ntá tí sín ángel la kényó

⁴ Tí Xjeen Dios k'uáyéhe ch'án kjuachaxin ts'etuenhen tí sín ángel, kixin tsík'áyéhe ch'án tí kjuachaxin kuénte It'é ch'án, a ntá imá t'etóan ch'án, a ntá tí jehe sín la náhi.

⁵ Méxra Dios ntáchehya nijngo ángel kixin:

Jaha mé Xjanna,

janhan mé kjuít'ána tí jaha ijie.

la ko kjaxin ntáchrohya Dios kuénte nijngo ángel kixin:

Janhan mé chrók'óna It'é ch'án,

la ko jehe ch'án mé chrók'óna xjanna.*

⁶ A ntá tió kui tí jnkokoá Xjeen Dios chjasintajni, ntá ntácho Dios kixin:

Kaín tí sín ángel kuénte Dios chrókjuikosáyehe tí jehe ch'án.†

⁷ A ntá ntácho Dios kuénte tí sín ángel kixin:

Tí sín ángel ch'ána ch'án éxí xrjnto kixin nchakuen sín ó,

la ko tí sín ch'ehe ch'án xra la ch'ána ch'án éxí xrohinene.‡

⁸ A ntá ntáche ch'án tí Xjeen ch'án kixin:

Tí trono kuéntá itjen jnkochrín, jaha Dios,

la mé jaha mé ijngo nkexro t'etóan jina.

⁹ Jaha tóxrjnhan tí nkehe jina, a ntá ninkákonhén tí nkehe jinahya.

Mé xikaha tí Dios tsíkjeýá jaha, la Dios kuéntá kjuíntacháha má,

a ntá tí í so sín k'uájikoa la kánhyó.§

¹⁰ Kjaxin ntácho kixin:

Jaha Inchéni, tí xrankixixín kjuích'éna chjasintajni,

la ko jaha kjuích'éna nkajní.

¹¹ Táha mé ts'itjayan, a ntá jaha la tsjak'e jnkochrín.

Kaín tíha tsontaxín éxí iké chojni,

¹² éxí ijngo iké chojni xikaha tsoxrát'o,

ts'ixinkí éxí ijngo iké chojni.

A ntá jaha la ts'ixitóxinhya jnkochrín tsjak'e,

a ntá tí kjuachón chonta jaha la nunca tsjejehya.*

¹³ Dios la ntáchehya nijngo tí sín ángel kuénte ch'án kixin chrók'uejó sín tja ch'án chjina ntahó chrók'uetóan sín, tsjixinjian kaín xín tí sín níinkakonhen sín la chrókjuachahya sín chrók'uetóan sín.†

¹⁴ Kaín tí sín ángel mé nchakuen sín ó mé ch'ehe Dios xra mé k'uituenhen sín tsjinkjtsa tí sín ts'áyéhe kjuachaxin tsaá sín.

2

Chrókjoniehyani tí nkehe tsaáxinni

¹ Mé xikaha chrókjuenkayáxinni jina tí nkehe ó kuínhinni kixin chrókjuetóehyani tí ntja ó kuájkani.

² A ntá tí tan tsíchrónka tí sín ángel ósé la mé tsikónoxín kixin chaxín tíha. A ntá tí sín kuítekakonhya sín tí tan jina kuínhin sín la kjuasin sín jie, na mé kjuasóte sín la táhó mé kjuacha sín.

* 1:5 Salmo 2.7; 2 Samuel 7.14; 1 Crónicas 17.13 † 1:6 Deuteronomio 32.43 ‡ 1:7 Salmo 104.4 § 1:9 1.8-9 Salmo 45.6-7 * 1:12 1.10-12 Salmo 102.25-27 † 1:13 Salmo 110.1

³ ¿Xá nkexrí chrókuaáni tí chrókuahyani kuentá tí nkehe jié chrókuaáxinni? Jehe Ìnchéni tsíchrónka ch'án saoxín nkexrí chrókuaáxinni, a ntá chr'éxin tí sín tsíkinhin mé kjuakohé sín tí jeheni.

⁴ Méxra Dios kjuakoxin ch'án kjuaxroan jié la ko kjuachaxin jié kixin chaxín tíha, la ko noexínni kaín tí kjuachaxién Nchakuen ch'án tsík'áyéheni éxi tjinkaon ch'án tsjanjon ch'án.

Jesucristo k'óna ch'án chojni

⁵ Dios la tsíchjéha tí sín ángel kjuachaxin kixin chrók'uetqan chjasintajni chr'éxin éxi tí jie tjeónixjani.

⁶ Náhí. Éxi nixja xroon itén Dios chronkaxin kixin:

¿Xá nkexéhe tí chojni a, jaha It'eni Dios, kixin imá xráxinkávan tí jehe ch'án?

¿Xá nkexro tíha kixin imá tóxakonhan kixin tí jehe ch'án?

⁷ Jaha tsíkijh'éna ch'án éxi ijnko chojni t'etuanhya kjánchó kánhyó isé, a ntá tí sín ángel antsi má k'uéchónta sín kjuachaxin, a ntá jie la imá kjuikosáyehe ch'án;

⁸ la jaha tsíchjéhe ch'án kjuachaxin kixin kaín nkehe ts'etuenhen ch'án.*

Mé xikaha ntáchro tíha kixin tsíchjéhe Dios tí chojni kjuachaxin kixin chrók'uetuenhen ch'án kaín xín nkehe, ntá Dios kuitqehya ninkeho nkehe chrókuitekakuenhya ch'án. Kjánchó naxa t'ikonhyani kixin á kaín nkehe titekakonhen ch'án.

⁹ Kjánchó ó noheni kixin Jesús la tsíkijh'éna Dios éxi chojni t'etuanhya kjánchó kánhyó isé, a ntá tí sín ángel antsi má k'uéchónta sín kjuachaxin. Dios mé tjuéhe kaín xín chojni ntá tjinkaon ch'án kixin ch'in Jesús chrók'uenyákonhen kaín chojni. A ntá jie tsík'áyéhe ch'án kjuachaxin náxrjón la ko Dios tjikosáyehe tí jehe ch'án kixin tí kjuasóte ch'án, ik'uén ch'án.

¹⁰ Kaín nkehe síin la kuente Dios la ko tjeó kixin tí kjuachaxin kuente tí jehe ch'án. A ntá Dios tjinkaon ch'án kixin kaín sín tí xjeen ch'án chrók'uejó sín tí tjen ch'án tí t'inkaséyan. Méxra Dios kjuanjón Ìnchéni Jesucristo kixin tsjasóte ch'án kixin ntá jina kjuakoxin ch'án kixin ntá jehe ch'án tsaáxinni ch'án.

¹¹ Kaín tí sín tsíkótjóá la ko tí nkexro kjuínchetjóá na mé chóna jnkokoá It'é. Méxra tí Xjeen Dios tósuehya ch'án tsontáchro ch'án kixin kichó ch'án tí jehe sín.

¹² Éxi ntáchro tí xroon itén Dios kixin:

Tsochénkani tí sín kichó ni kixin nkexro tí jaha, tsjikosáyahani tsotsjeni himno tí tójkotsékoni tí sín kichó ni.†

¹³ Kjaxin ntáchro kixin:

Janhan titekávan Dios.‡

La ko kjaxin ntáchro inaá kixin:

Ntihi tjékan tí xjeen Dios tsíkjanjon ch'án tsík'ayáha.§

¹⁴ A ntá tí xjeen chojni mé jnkokoá kichó la k'óna nto la ko ijni; la kjaxin ch'in Jesús xikaha tsík'óna ch'án nto la ko ijni kixin jina its'en ch'án kixin jina sinchek'itjayan ch'án tí nkexro chóna kjuachaxin t'óyan chojni, na mé t'axrjéxin kixin diablo tíha,

¹⁵ mé xikaha chrókjuínchekaá ch'án kaín tí sín chrakonhen sín tí kjuach'en, tjejó sín éxi t'ítuenhen sín kaín yaon tjejó sín.

¹⁶ Kjaxin kuihya ch'án kixin chrókjuínkítsa ch'án tí sín ángel. Náhí. Ikuí ch'án kixin tsjinkítsa ch'án tí sín tsík'axrjeníxin ch'in Abraham.

¹⁷ A ntá t'ichjánxin chrókóyóhe ch'án éxi tí sín kichó ch'án kixin jina chrók'óna ch'án nchat'á t'etqan kuente Dios la chrókuikonóhenni ch'án, ntá jina tsjatsen ch'án ijje kaín chojni kixin k'uenyákonhenni ch'án.

¹⁸ Kixin jehe ch'án kjuasóte ch'án la ko tí Jínahya tjinkaon chrókjuachroe ch'án la kjuachahya, a ntá jie la jina tsjinkítsa ch'án tí sín chrókjuachroe tí Jínahya kixin chrókjuasinhya sín jie.

3

Antsi tjeotan ch'in Jesús, a ntá ch'in Moisés la kánhyó

¹ A ntá kichó ni, jahará la tsíkótjóará, la mé Dios tsík'iyahará ch'án kixin ts'ónará xjeen ch'án, a ntá chrórxaxinkáonrá jina Cristo Jesús na mé jehe ch'án mé tí apóstol la ko tí nchat'á t'etqan kuente tí nkehe tinkáchónkini.

² Tí ch'in Jesús jina kuitekakonhen ch'án Dios, mé tí nkexro tsík'eyá ch'án sich'ehe ch'án xra, éxi kjaxin ch'in Moisés jina kjuich'e ch'án xra k'uáyakonhen ch'án ntqe Dios.

³ Dios antsi kjuikosáyehe tí ch'in Jesús, a ntá ch'in Moisés la kénhyó, éxi antsi tjikosáyehe sín tí nkexro kjuich'éna ijnko nchia, a ntá tí nchia la kénhyó tjikosáyehe sín.

* 2:8 2.6-8 Salmo 8.4-6 † 2:12 Salmo 22.22 ‡ 2:13 Isaías 8.17,18 § 2:13 Isaías 8.17,18

⁴ Jnkojnko nchia k'óna kixin siín nkexro kjuích'éna, kjánchó Dios mé kjuích'éna kaín nkehe siín.

⁵ Ch'ín Moisés jína kjuích'e ch'án xra k'uáyakonhen ch'án tí nchia kuènte Dios. Tí xra kjuích'e ch'án mé k'uénixja ch'án kuènte tí nkehe tsonáchro Dios chr'éxin.

⁶ A ntá Cristo la mé Xjeen Dios tí jehe ch'án, ntá kjuínchexiteyá ch'án jína la t'ayakonhen ch'án tí nchia kuènte Dios, la tíha mé jeheni, kixin tí tsítóehyani ch'án la naxa tsinkáchónkini ch'án ntá tsochéheni kixin tí nkehe tjejóhónhenni.

Ts'ok'éheni tí tjen Dios

⁷ Mé xikaha éxí ntáchro Nchakuen Dios nixja xroon itén Dios kixin:

A ntá jie tí chrókuinhínrá tí nkehe ntáchro Dios,

⁸ chrókjuích'ehyará éxí kjuích'e tí sín ósé kuítekakonhya sín Dios tí yaon kjuích'ehe sín prueba Dios tí nteje.

⁹ A ntá ntaha tí sín tsik'axrjenixínrá ósé kjuích'èna sín prueba, kjónté cuarenta nánó k'uíkon sín tí xra kjuít'a.

¹⁰ Méxra kóninkakonhan tí chojni a, ntáxrjan kixin: "Xrácín xrichoe asén sín, tjinkakonhya sín tsochóxin sín ntjaná."

¹¹ Méxra kóninkakonhan tí jehe sín, ntátjan sín

kixin chaxín tsoxiteyá kixin ts'ixenhya sín ts'ok'éhe sín tí tjén janhan.*

¹² Kichóni, chrókóxakonhanrá kixin chrókókohya nijnko tí jahará chróchontará asánrá jínahya chrókuítoghérá Dios tjechón chrókuítekakuenhyará tí jehe ch'án.

¹³ Chrókjuínchechéhérá kichuárá jnkojnko yaon naxa tjen tiempo kixin nijnko tí jahará chrókjuenkayáxinrá kixin naxa chrókjuásinrá jie, í chróntáchrohya asánrá kixin naxa chrókójahará.

¹⁴ A ntá tí chrók'uejóni jnkojína hasta tsjixixín éxí kuinkáchónkini tí xrankixixín, ntá siín kjuachaxín ts'ejókoni Cristo.

¹⁵ Mé xikaha ntáchro kixin:

A ntá jie tí chrókuinhínrá jahará tí nkehe ntáchro Dios,

chrókjuích'ehyará éxí kjuích'e tí sín ósé kuítekakonhya sín Dios.†

¹⁶ ¿A ntá nkexro tí sín kuínhin itén Dios, a ntá tí chr'éxin kuítekakonhya sín? ¿Á jehya kaín tí sín tsikakitsjéxin ch'ín Moisés tí nación Egipto?

¹⁷ ¿A ntá nkexro tí kóninkakonhen Dios tí cuarenta nánó? ¿Á jehya tí sín kjuasin jie k'uénxin nteje?

¹⁸ ¿A ntá nkexro ntáche Dios kixin chaxín tsoxiteyá kixin ts'ixenhya sín ts'ok'éhe sín tí tjen tí jehe ch'án? ¿Á jehya tí sín kuítekakonhya?

¹⁹ A ntá ó noheni kixin kjuachahya sín k'uixenhen sín kixin kuítekakonhya sín.

4

¹ Méxra, tsíntáchro Dios kixin tsjanjon ch'án kjuachaxín ts'ixenhenni ts'ok'éheni tí tjen ch'án, a ntá tóxakonhenni kixin ách'e jnkojín tí jahará chrókjuachahyará chrók'uixenhenrá ntíha.

² Kixin kjáxin jeheni kuínhinni itén ch'án tsaáxinni éxí kuínhin tí jehe sín, kjánchó tí jehe sín la ninkehó kjuínkĩtsahya sín tí tan jína kuínhin sín, kixin kjónté kuínhin sín tí tan na kuítekakonhya sín.

³ A ntá jeheni kuítekaonni, ntá ts'ixenhenni ts'ok'éheni ntaha, éxí tsíntáchro Dios kixin:

Méxra kóninkakonhan sín tí jehe sín ntátjan sín kixin chaxín tsoxiteyá

kixin ts'ixenhya sín ts'ok'éhe sín tí tjén janhan.*

Kixin Dios la tíó kjuixinhin ch'án xra kjuích'éna ch'án chjasintajni ntá kjuák'e ch'án k'ok'éhe ch'án.

⁴ Mé xikaha í jnko nketí nixja tí xroon itén Dios chrónka kuènte tí yaon yatoxín ntáchro kixin: Kjuixinhin Dios kaín xra ntá kjuák'e ch'án k'ok'éhe ch'án tí yaon yatoxín.†

⁵ A ntá inaá ntáchro tí xroon itén Dios kixin:

Ts'ixenhya sín ts'ok'éhe sín tí tjén janhan.‡

⁶ Kjánchó naxa t'itjáyán jnkojín chojni chrók'uixenhen sín chrók'ok'éhe sín. A ntá tí sín saoxín kuínhin tí tan chrókuaáxin sín la k'uixenhya sín kixin kuítekakonhya sín tí tan a.

⁷ Méxra Dios tsíkjeýá ch'án í jnko yaon, mé tí yaon jie, a ntá chr'éxin nixjaxín ch'án tí nkehe tsíchronka ch'ín David éxí ntáchro tí xroon itén Dios kixin:

A ntá jie tí tsinhínrá tí nkehe ntáchro Dios, chrókjuínchexiteyará. §

* 3:11 3.7-11 Salmo 95.7-11 † 3:15 Salmo 95.7-8 * 4:3 Salmo 95.11 † 4:4 Génesis 2.2 ‡ 4:5 Salmo 95.11

§ 4:7 Salmo 95.7-8

⁸ Kíxín tí chrókjuanjon ch'ín Josué kjuachaxin kíxín chrók'ok'éhe tí sín israelita,* ntá Dios la í chrónixjahya ch'án kuènte í jnko yaon.

⁹ A ntá naxa tjechónhen tí ts'ok'éhe tí sín tinkáchónki Dios;

¹⁰ Kíxín tí nkexro ts'ixenhen ts'ok'éhe tí tjen Dios tsíkjinin ch'án tí xra kuènte ch'án éxí yóhe kjaxin Dios kjuixinin ch'án tí xra kuènte ch'án ntá kjuák'e ch'án k'ok'éhe ch'án.

¹¹ T'ichjánxin kíxín kaín asénni chrókjueyáni nkexrí chrók'uixenhenni chrók'ok'éheni, kíxín chrók'óyehyani éxí tí sín kuítekakonhya.

¹² Kíxín tí itén Dios la mé tjechón la ko chóna kjuachaxin. Tíha la imá taté, a ntá kánhyó taté tí chica espada yánjin taté, la tíha mé t'ixenhen tí nínka asén chojni la ko nchakuen chojni hasta tí nkaya asén chojni. Tíha mé nchexraxinkaon chojni kaín nkehe tjenkayáxin sín la ko kaín nkehe ntáchro asén sín.

¹³ Kohya ninkehó nkehe tsíklich'ena Dios tsjacha chrók'uejóméhe tí jehe ch'án kíxín kaín nkehe la noxín siín t'íkon tí nkexro ts'áyéhe kuéntá.

Jesús mé tí nchat'á imá tjeotan

¹⁴ Jesús tí Xjeen Dios mé tí nchat'á tjeotan kuénténi mé k'uixenhen tí tjen Dios la méxra chrók'úteghyani tí tinkáchónkini tí jehe ch'án.

¹⁵ Méxra jehe ch'án mé tí nchat'á tjeotan kuénténi mé tsjinkítsa ch'án tí jeheni kíxín fuérteghyani kíxín kjaxin tí Jínahya chrókjuachroe tí jehe ch'án éxí sítónhen tí jeheni, kjánchó jehe ch'án la ninkehó jje kjuasinhya ch'án kjónté xíkaha kónhen ch'án.

¹⁶ Méxra kaín asénni chrókóchjineheni Dios tí tjen ch'án t'etöan ch'án kíxín chrók'úkonógheni ch'án la ko chrókjuinkítsa ch'án tí jeheni tí nkehe chrók'uichjánxinhinni.

5

¹ Kaín nchat'á t'etöan tsíkónoxín la chojni ó, tsík'áyéhe xra tsonixayákonhen chojni nkayakon Dios, la ko tsjanjon nkehe la ko iko its'en kíxín ts'itjáyáxin tí jje kuènte chojni.

² Kjaxin tí nchat'á a la fuérteghya kíxín chojni ó, a ntá chrókóninkakuenhya ch'án tí sín noehya la ko tí sín tsíkjichroe.

³ Kjaxin jehe ch'án, kíxín fuérteghya ch'án t'ichjánxin tsjanjon ch'án iko its'en kíxín tí jje chóna ch'án jehe ch'án éxí tjanjon ch'án nkehe kuènte tí í so chojni chóna jje.

⁴ Ninkexró xitjahya jehó sich'ena asén nchat'á t'etöan. Náhí. Jehó tí sín tsíkjeýá Dios tsík'áyéhe tí xra éxí tsík'áyéhe ch'ín Aarón.

⁵ Mé xíkaha Cristo, kjuich'énahya ch'án jehó ch'án asén ch'án nchat'á t'etöan. Náhí. Dios mé kjuikosáyehe ch'án mé tsíkjanjon tí xra éxí tsintáchro kíxín:

Jaha mé xjanna;

Janhan mé kjuít'ána ijje.*

⁶ Kjaxin í jnko nketí nixja xroon itén Dios ntáchro kíxín:

Jaha mé ijnko nchat'á tsjak'e jnkochrírín,

éxí yóhe k'uékjak'e ch'ín Melquisedec.†

⁷ Tíó kjuák'e Cristo ntihi chjasintajni imá tsjánka ch'án la ko itsen chrónóghé ch'án Dios, kíxín Dios chóna kjuachaxin chrókjuincheaká ch'án kíxín chrók'uenhya ch'án; la Dios la kuínhin kíxín xíkaha kuítekaon ch'án.

⁸ Méxra Cristo, kjónté Xjeen Dios, la kuítekaon ch'án kjuínchexiteýá ch'án kjónté tí kjuasote ch'án.

⁹ Mé kjuínchexiteýá ch'án, ntá kjuacha ch'án k'óna ch'án tí nkexro sincheaká jnkochrírín kaín tí chojni sinchexiteýéhe tí jehe ch'án.

¹⁰ A ntá Dios mé tsíklich'ena ch'án nchat'á t'etöan éxí yóhe kjuák'e ch'ín Melquisedec.

Jehya jína chrók'útegheni tí tinkáchónkini Ìnchéni

¹¹ Chóntani nchónhya nkehe chróchrónkani kuènte tíha, kjánchó imá xra chróchrónkaxínni tíha kíxín tiénxinhyará jahará.

¹² Ntá k'uátsínka nchónhya tiempo, a ntá ó jína chrók'ónará maestro, ntá náhi kíxín naxa t'ichjánxinhanrá nkexro chrókjuakohará inaá tí nkehe xrahya kuènte itén Dios. Éxí xík'ónará lontrá, t'ichjánxin chrók'uirá tsjen inaá kíxín xitjahya sinterá nkehe cha.

¹³ A ntá tí sín t'í tsjen ó, na mé yóhe chánjan takí tsjachahya sín tsjeýá sín nkexrí chrók'uejó sín jína.

¹⁴ Á ntá tí nkehe cha mé ine tí chojni nteöo kíxín ó nohe sín tí nkehe jína la ko tí nkehe jínahya.

* 4:8 Josué 22.4 * 5:5 Salmo 2.7 † 5:6 Salmo 110.4

6

¹ Naşa chrókjueyáni kixin jína chrókuenkayáxinni éxí chojni nteto. Chróchenkahyani tí jahará ijie tí nkehe kánhyó xra tsíxrakohará tí xrankíxixín kuènte Cristo. Náhi. T'ichjánxínhya naşa chrókuakoharáni kixin chrókuítoghérá tí jie k'uékjásinrá chrók'uénxinrá, la ko nkexrí chrókuinkachónkirá Dios,

² la ko nkexrí chrókuikite chojni, la ko nkexrí ts'ejotja tjára chrítaón tí sín tinkáchónki Cristo, la ko nkexrí tsoxechón chojni tsík'en, la ko nkexrí chrókuítogéxín ijie chojni.

³ A ntá tí Dios chrókuajanjon kjuachaxín la chrókuakoni í so nkehe.

⁴ A ntá tí sín ó tsík'áyéhe sín tí xrohi, la ko ó tsjéxín sín tí nkehe kjuanjon Dios, la ko tsík'áyéhe sín tí Nchakuen Dios,

⁵ la ko kóxrjnhín sín tí nkehe jína kuènte itén Dios, la ko kónohe sín nkexrí tí kjuachaxín tsochóna tí chjasintajni chr'éxín,

⁶ a ntá tí chrókuítoghe sín Dios, í chrókuinkáchónkihya sín, ntá xitjahya tsokjan sín inaá, kixin tí xíkaha la éxí chrókuak'enkanı sín ntacruz tí Xjeen Dios inaá la ko chrókuanoá sín ch'an nkayakon nchónhya chojni.

⁷ Éxí nonte jnkojnko vez t'aniá chrin la tsjátan la ts'óna jína, a ntá kjuacha tí sín kjuích'e xra kixin Dios kjuíncheyaoon ntiha.

⁸ A ntá tí t'óna ntach'í la ko kach'í la ninkehó sínkíhya la tsonínkakohenen Dios, la tí tsjixixín mé tsoche.

Tí nkehe tjejóchónhenni mé tjinkítsa kixin jína ts'ejóni

⁹ Kjóté nixjani xíkaha, kíchó ni, ó noheni kixin chaxín jína tjejorá k'uitjará tí ntja tsaáxinrá.

¹⁰ Kixin Dios la jína, la ts'itjáyenhya ch'an tí xra jína tjejoch'erá kixin tjuèherá kichuárá, mé xíkaha kjuákoxinrá kixin kjuínkítsará tí kichuárá tinkáchónki Cristo la naşa tjejótjinkítsará sín xíkaha.

¹¹ Tjinkaonni kixin jnkojnkorá chrókuákoxinrá hasta tsjixixín kixin chontará kjuachéhe chrókuínkítsará kichuárá kixin chaxín ts'ayéherá tí nkehe tjejochonhénra.

¹² Tjinkakonhyani kixin chrókjanrá chrókósáhará. Náhi. Tjinkaonni kixin chrókuákoxinrá éxí tí sín chaxín tinkáchónki Ìnchéni tjejóchónhen sín ts'áyéhe sín tí nkehe tsintáchro Dios kixin tsjanjon ch'an.

¹³ A ntá Dios, tíó tsintáchro ch'an kixin tsjanjon ch'an nkehe ts'áyéhe tí ch'in Abraham la jehó Dios k'uákjenxin asén kixin kohya nkexro antsí tjeoan chrók'uákjenxin ch'an.

¹⁴ Ntáchro ch'an kixin chaxín sincheyaoon ch'an tí ch'in Abraham la ko nchónhya chojni ts'axrjenixin tí jehe ch'an.*

¹⁵ Ch'in Abraham kjuák'echónhen ch'an isé kixin ts'áyéhe ch'an tí nkehe tsintáchro Dios.

¹⁶ A ntá tíó t'ákjenxin chojni ijnko nkexro la mé t'ákjenxin sín ijnko nkexro antsí tjeoan, a ntá jehó sín la náhi. A ntá ts'ákjenxin sín tí xíkaha kixin ijnko nkehe tsoxiteyá, a ntá kohya nkexro tsoatáchro ninkehó.

¹⁷ Méxra Dios k'uákjenxin ch'an asén ch'an tsintáchro ch'an kixin chaxín tsoxiteyá, kixin tjinkaon ch'an chrókuákoxin ch'an noxín kixin chrókónohe tí sín ts'áyéhe tí nkehe tsjanjon ch'an kixin sinchexiteyá ch'an tí nkehe tsintáchro ch'an la í tsjitóxiénhya ch'an ninkehó tíha.

¹⁸ Mé xíkaha siún yaá nkehe xitjahya ts'ixitóxin, kixin Dios la xitjahya sich'ia; kixin tíha Dios nchenoexinni kixin chaxín tsoxiteyá, la mé jeheni kjuancheheni ch'an kixin chrók'uayakonhenni ch'an la ko tjejóchónhenni tí nkehe tsjanjon ch'an.

¹⁹ Tí tjejóchónhenni xíkaha la jína ts'ejó asénni éxí yóhe tí ntabárco chóna gancho tjechrúéxin kixin kohya nketi sátsji. Méxra xíkaha kjaxín tí nkehe tjejóchónhenni la sátsíkji hasta nóton tí ka cortina tjen nkaxenhen njnko tjen nkaya nkajní,

²⁰ tí senó k'uixenhen Jesús kuakitjehe ch'an ijnko ntja ts'ixenxinni. Mé xíkaha jehe ch'an k'óna ch'an nchat'á t'etean jnkochrixín éxí yóhe kjuák'e tí ch'in Melquisedec.

7

Ch'in Jesús mé nchat'á éxí yóhe k'uékjak'e ch'in Melquisedec

¹ Tí ch'in Melquisedec mé k'ué rey kuènte chjasin Salem la ko nchat'á kuènte Dios tjen nkaya nkajní. A ntá tíó ch'in Abraham kjanxin ch'an tí tsíkikjanjonko ch'an tí í so sín rey, kjuacha ch'an, ntá ch'in Melquisedec kjuixinhin ch'an ntja ikui ch'in Abraham, ntá jehe ch'in Melquisedec kjuíncheyaoon ch'an tí ch'in Abraham.

² A ntá tí ch'in Abraham ch'éhe ch'an tí ch'in Melquisedec diezmo kaín xín nkehe tsíkja cha ch'an tí tsíkikjanjonko ch'an tí sín rey.* A ntá ihnié ch'in Melquisedec mé t'axrjéxín saoxín

* 6:14 Génesis 22.16-17 * 7:2 7.1-2 Génesis 14.17-20

kixin “ijnko rey jina”; a ntá jehe ch'án k'ué rey kuènte chjasin Salem, tíha mé t'axrjéxin kixin “kjuaxróxin”; la mé xikaha jehe ch'án mé “ijnko rey tjanjon kjuaxróxin”.

³ A ntá ch'ín Melquisedec la noehya sín nkexro it'é ch'án la ko nkexro iné ch'án la ko nkexro tsík'axrjénixin ch'án; la ko noehya sín nkesá tsíkokjéhi ch'án la ko nkesá tsík'en ch'án. Mé xikaha tóyóhé tí Xjeen Dios kixin jehe ch'án mé ijnko nchat'á jnkochrín.

⁴ A ntá jie, tsjehérá kixin imá t'etóan tí ch'ín Melquisedec kixin tí ch'ín Abraham k'uaxrjénixini, la tsíchjéhe ch'án tí ch'ín Melquisedec diezmo tí nkehe tsíkjacha ch'án tí tsíkjanjanko ch'an tí sín rey.

⁵ Éxi nixja ley tsík'etóan ch'ín Moisés, kixin tí sín nchat'á tsík'axrjénixin tí ch'ín Leví chóna sín kjuachaxin tsjanchehe sín kaín xín chojni diezmo kjónté naḡa kjéhya sín, tsík'axrjénixin sín tí ch'ín Abraham éxi tí jehe sín.

⁶ A ntá ch'ín Melquisedec, kjónté tsík'axrjénixinhya ch'án tí ch'ín Leví, na mé kjuich'ehe ch'án cobra tí ch'ín Abraham, mé tí ch'ín tsík'áyéhe tí nkehe tsintácho Dios. Mé xikaha tí ch'ín Melquisedec tsíkjincheyaon ch'án tí ch'ín Abraham.

⁷ Kohya nkexro tsintácho kixin chaxínhya kixin tí nkexro ncheyaon la antsí má t'etóan, a ntá tí nkexro tsíkóyaon la t'etóanhya. Náhi.

⁸ A ntá tí tjejóni, tí sín t'áyéhe tí diezmo la mé chojni ts'en ó. Kjánchó ntácho tí xroon itén Dios kixin tí ch'ín Melquisedec mé ijnko chojni naḡa tsík'enhya, la naḡa tjechón.

⁹ Mé t'axrjénixin kixin ch'ín Leví la ko kaín xín tí sín nchat'á tsík'axrjénixin ch'án, mé tí sín t'áyéhe sín diezmo jie, la mé kjaxin jehe sín tsíkjenkehe sín diezmo tí ch'ín Melquisedec tíó tsíkjenka ch'ín Abraham,

¹⁰ Kixin naḡa tjiko cuerpo kuènte ch'án tí sín ts'axrjénixin ch'án, naḡa kokjéhya sín tíó xeta ch'án tí ch'ín Melquisedec.

¹¹ Tí sín nación Israel tsík'áyéhe sín tí ley kixin tí sín nchat'á levita, mé tsík'axrjénixin sín tí ch'ín Aarón. A ntá jie tí chaxin chrókjuacha sín chrókjuentoá sín tí sín tinkáchónki tí ley, la í t'ichjánxinhya naḡa chrókónoxin í jnko nchat'á í chrókóyóehya éxi tí ch'ín Aarón. A ntá kjuachahya sín xikaha ntá t'ichjánxin chrókónoxin ijnko nchat'á chrókóyóhe éxi tí ch'ín Melquisedec.

¹² A ntá tí chrók'uixinkí tí nchat'á la kjaxin chrók'uixinkí tí ley.

¹³ A ntá tí xroon itén Dios chrónka tíhi kuènte Ìnchéni. A ntá jehe ch'án la tsík'axrjénixin ch'án í jnko nkexro kuènte Israel la kohya ninkexro tsík'óna nchat'á tsík'axrjénixin tí sín a.

¹⁴ Kixin ó noxín kixin Ìnchéni tsík'axrjénixin ch'án tí ch'ín Judá, a ntá ch'ín Moisés la chrónkahya ch'án ninkehó kuènte tí sín ts'axrjénixin tí ch'ín a tíó nixja ch'án kuènte tí sín nchat'á.

¹⁵ A ntá tíhi la antsí má kónoxin kixin tí nchat'á nixin la tóyóhe éxi ch'ín Melquisedec

¹⁶ Kixin tíó k'óna ch'án nchat'á la jehya kixin xikaha chrók'etóan ijnko ley kixin nkexro chrók'uaxrjénixin ch'án. Náhi. Ó jehí k'óna ch'án nchat'á kixin tí kjuachaxin chóna ch'án la xitjahya ts'itjáyan.

¹⁷ Kixin nixja Dios kixin nkexrí tjeen tí jehe ch'án, ntácho kixin:

Jaha mé ijnko nchat'á tsjak'e jnkochrín,
éxi yóhe k'uékjak'e ch'ín Melquisedec.†

¹⁸ Méxra tí nkehe k'uék'etóan senó mé ch'ehya xra jie kixin kánhyó kjuachaxin k'uéchóna la ko kjuachahya,

¹⁹ Kixin tí nkehe k'uetoan ch'ín Moisés kjuachahya kjuínchetjóá ninkehó nkehe. A ntá jie chónani ijnko nkehe antsi jina tjejóchónhenni kixin tíha mé antsi jina tsqchjineixini Dios.

²⁰ A ntá tíó ntácho Dios tíha la tsík'ákjenxin ch'án asén ch'án jehó ch'án.

²¹ La ntá tí í so nchat'á, tíó tsíkónoxin sín, tsík'ákjenxinhya Dios asén ch'án. A ntá tíó tsíkónoxin tí nchat'á í la Dios tsík'ákjenxin ch'án asén ch'án. A ntá ntácho xroon itén Dios kixin:

Ìnchéni tsík'ákjenxin asén ch'án
a ntá ts'ixitóxinhya tí nkehe tsintácho ch'án:
“Jaha mé ijnko nchat'á tsjak'e jnkochrín
éxi yóhe k'uékjak'e ch'ín Melquisedec.”‡

²² Méxra ch'ín Jesús ntácho kixin tí pacto t'etóan ch'án la antsí má jina, a ntá tí pacto senó la náhi.

²³ Ntá k'uixin nchónhya sín nchat'á, kjánchó nkák'en sín, ntá xitjahya naḡa chrókjuich'e sín tí xra a.

²⁴ A ntá ch'ín Jesús la ts'enhya ch'án la t'ichjánxinhya kixin í jnko nkexro chrókjuakja tí xra kuènte ch'án chrók'óna nchat'á.

²⁵ Méxra jehe ch'án tsjacha sinchekaa ch'án jnkochrínin tí sín tsochjinehe Dios kixin tinkáchónki sín tí jehe ch'án kixin itjen ch'án jnkochrínin chrónóhehe ch'án Dios kixin chrókjuinchekaáni ch'án.

²⁶ Mé xikaha Jesús mé tí nchat'á t'etōan t'ichjánxinhinni; jehe ch'án mé ijnko nkexro tjóá, chóntahya ninkehó jie, la ko tjenkákjanhya ch'án tí sín tjasin jie, a ntá sákjuí ch'án nkaya nkajní.

²⁷ Ntá tóyóhehya tí í so nchat'á t'etōan, kixin t'ichjánxin ts'óyan sín iko tsjanjon sín tsochjéhe sín Dios kaín yaon, saoxín kixin tí jie kuente sín, a ntá chr'éxin kixin tí jie chóna tí í so chojni. A ntá ch'ín Jesús jnkokoaxón vez kjuanjon asén ch'án ik'uéen ch'án.

²⁸ Tí ley k'uék'etōan ch'ín Moisés t'etōan kixin chojni naxa chóna jie chrók'óna nchat'á, a ntá Dios tsík'ákjenxin asén ch'án tió kjuixin k'óna tí ley, ntáchro ch'án kixin tí Xjeen ch'án mé ts'óna nchat'á t'etōan kixin jina kjuínchexiteyá ch'án jnkochrínin.

8

Ch'ín Jesús nixjxin ch'án ijnko pacto nixin

¹ Tí nkehe antsí má tjeoan chrónkani la mé tíhi kixin tí nchat'á kuenteni mé t'etōan ch'án, la ko tjetjxin ch'án nkaya nkajní, nó chjina tí trono t'etōanxin Dios,

² k'óna ch'án nchat'á tí nínko chaxín tsíkjh'éna Ìnchéni, la jehya chojni tsíkjh'éna tíha.

³ Kaín nchat'á t'etōan tsík'áyéhe xra kixin tsjanjon nkehe la ko iko its'en. Méxra Jesucristo t'ichjánxin kixin tsjanjon ch'án ichrén nkehe.

⁴ Tí chrókjuak'e ch'án chjasintajni, chrók'ónahya ch'án nchat'á kixin naxa sín nchat'á tjanjon nkehe k'uetōan tí ley tsík'áyéhe ch'ín Moisés.

⁵ A ntá tí sín nchat'á k'uékjanjon nkehe tóyóhó tí nkehe sín nkaya nkajní. Noheni kixin tóyóhó kixin tió ch'ín Moisés chrókjuich'éna ch'án nínko la ntáche Dios tí jehe ch'án kixin: "Tjenkayáxian jina, a ntá s'ich'éna jaha éxí tí nkehe kjuákuáxian chrítaón jna."*

⁶ A ntá tí nchat'á t'etōan kuenteni tjech'e ch'án xra antsí jina kixin jehe ch'án mé tí nkexro nixjxin tí pacto nixin tsintáchro Dios chrónka tí nkehe jina tsonhen chr'éxin.

⁷ A ntá tí pacto tsík'etōan saoxín la tí chróxiteyá jina, la t'ichjánxinhya chrók'óna yóxin pacto.

⁸ A ntá Dios k'uikon kixin kjuínchexiteyáhya tí sín a, éxí ntáchro xroon itén Dios kixin:

Ntáchro Ìnchéni kixin: Itsi ijnko yaon

mé tsánjuan ijnko pacto nixin tsochóna tí sín nación Israel la ko tí sín chjasin Judá.

⁹ Jehya xikaha tí pacto kuétuanhan tí sín tsík'axrjenixinrá ósé,

tí yaon kjuinkítsa sín k'uaxrxéxin sín tí nación Egipto;

kjánchó kjuínchexiteyáhya sín tí pacto kuétuanhan sín,

méxra kuitōha sín, ichro Ìnchéni.

¹⁰ Tí pacto tsétuanhan tí sín chjasin Israel tió ts'atsínka tí yaon a, mé xikaha tíhi, ichro Ìnchéni:

Sintaxráxinkavan asén sín tí ley tsétōan,

a ntá tí kjuaxrexinkaon kuente sín tsokjian tí nkehe tsétuanhan sín.

A ntá janhan ts'óna Dios kuente sín,

a ntá jehe sín mé ts'óna chjasin kuéntana.

¹¹ Ts'ichjánxinhya naxa tsjakohe kichó sín

kixin chróchóxin sín Ìnchéni,

kixin kaín sín tsochóxinna sín,

kjonté chojni imá ntsínsí la ko chojni imá hyé.

¹² Sintak'itjayan tí nkehe jínahya kjuích'e sín

la ko í tsoxráxinkakonhya inaá tí jie chóna sín.†

¹³ Xikaha nixja Dios kuente tí pacto nixin ts'etōan ch'án kixin tsikóntaxin tí pacto saoxín k'uetōan ch'án, tíha mé tinkákóntaxin la ko tinkákjeje, na í sheya ts'itjayan.

9

Tí nínko chjasintajni la ko tí nínko nkaya nkajni

¹ A ntá tí pacto saoxín t'etōan nkexrí chrórxaxinkaonni Dios, kixin tí nínko ntihyó chjasintajni.

² A ntá tí nínko k'uékjak'e mé tí cuarto saoxín k'uekjinchek'in sín tí Cuarto Tjóá, tí kjuák'e tí candelero la ko tí mesa tjejúkjen tí niotja k'uéxraxinkakonxin sín Dios.

³ Nóton tí yóxin ka cortina kjuák'e tí cuarto k'uékjinchek'in sín tí Cuarto Antsi Tjóá.

⁴ Ntíha k'uékjak'e tí altar tsik'óna chica oro k'uékjakaxin sín tí chjincó la ko k'uékjak'e tí ntacajón chr'ísímá chica oro tjenkáyá tí pacto. Nkaxenhen tí ntacajón k'uékjak'e ijnko

* 8:5 Éxodo 25.40 † 8:12 8.8-12 Jeremías 31.31-34

nchésen tsik'óna chica oro k'uék'inka maná k'óna niotja, la ko kjaxin k'uékjak'e tí nta k'uékjixin ch'in Aarón kjuankixin k'uayan nta ntahte, la ko kjaxin ntiha kjuák'e tí xro chóna tí tan k'uetoan Dios.

⁵ Chritaón tí ntaçajón k'uék'ejó yaá ángel tsíkjanoya tsikjentoá kanenge chritaón tí kjuák'e tí kjuachaxin kuente Dios; ntaha k'uékjixin tí jie k'uéchóna chojni. A ntá ijie la t'ichjánxinhya naça tsonixjani kuente tíha.

⁶ A ntá xikaha k'uéjéó tí nkehe a, a ntá tí sín ncha'tá jnkoyaxón t'ixenhen sín tí cuarto saoxín kuente njnko kixin tí xra ch'e sín kuente njnko.

⁷ A ntá tí yóxin cuarto jehó tí ncha'tá t'etoan t'ixenhen ch'án jnkokoá vez jnkojnko nánó; a ntá tí t'ixenhen ch'án t'ichjánxin ts'ixenko ch'án ijnié iko tsochjéhe ch'án Dios tsotjuáxin ijie ch'án la ko ijie tí i so chojni.

⁸ A ntá tí Nchakuen Dios nchenoexínni tíhi kixin nachrohe k'uékjich'e xra tí cuarto saoxín la naça tjexrankehya kixin chrók'uixenhenni tí Cuarto Antsí Tjóá.

⁹ Kaín tíha tjakoñin ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyan sín xitjahya nchenoexín sín kixin á chaxín kótjóá tí jie k'uéchóna sín kixin xikaha k'uéxraxinkaon sín Dios.

¹⁰ A ntá tíha jehó t'etoan kuente tí nkehe chrókjóna sín la ko tí nkehe chrók'ui sín la ko tí chrók'ónti sín kixin chrókótjuáxin ijie sín, kaín tíha mé k'uítuenhen sín kuente cuerpo ó la jehó k'uéchóna kjuachaxin tí naça kjuinkíhya Dios nkexrí chróxraxinkaon sín ch'án.

¹¹ A ntá ó kui Cristo, jehe ch'án mé ncha'tá t'etoan kuente tí nkehe antsí jina itsi. A ntá tí njnko ch'e ch'án xra la antsí jina la ko antsí noá, la jehya chojni tsíkjich'ena tíha kixin jehya chjasintajni ntihi tjen.

¹² Tíó k'uixenhen Cristo tí Cuarto Tjóá, la jehya kixin chrókjuanjon ch'án ijnié kotentsó la ko ijnié koxintáxjan. Náhi. Ijnié ch'án kjuanjon ch'án; mé xikaha k'uixenhen ch'án jnkokoá vez ntiha mé xikaha kjuenka ch'án kixin chrókuaáxinni jnkochrixin.

¹³ A ntá tí ijnié koxinta la ko ijnié kotentsó la ko tí nteso kuente tí koxintáxjan tsichexín tí altar tikitexín tí sín tjuáhya la mé tíha chóna kjuachaxin tsotjuáxin tí chritaón ó.

¹⁴ A ntá tí xikaha, la kjá antsí má chóna kjuachaxin tí ijnié Cristo. Kixin tí kjuachaxin Nchakuen Dios tjen jnkochrixin, la Cristo kjuanjon asén ch'án ik'uén ch'án k'uáyéhe Dios, la jehe ch'án la ninkehó jie chónahya ch'án. A ntá ijnié ch'án nchetjóá tí nkehe kjuich'eni senó chrók'uenxínni kixin ntá jie la jina chrókjuich'eheñi xra Dios tjechón.

¹⁵ Méxra Jesucristo nijaxin ch'án tí pacto njxin k'uetoan Dios. Kixin k'uenyákonhenni Cristo ntá tsotjuáxin tí jie kjuasinni kjuinchexiteyáhyani tí pacto k'uítuenhenni senó; kixin tí sín k'uíyehé Dios la jina chrók'uáyéhe sín tí nkehe tsejehya kixin jehe ch'án xikaha tsintáchro ch'án tsjanjon ch'án.

¹⁶ A ntá tí siín ijnko nkehe tsintáchro ijnko chojni kjuák'e na ntá ik'uén la t'ichjánxin tsonoxín kixin chaxín tsik'en tí nkexro tsíkjich'ena.

¹⁷ A ntá tí nkehe tsintáchro ch'án la sínkíhya tí naça tjechón tí nkexro tsíkjich'ena; jehó tíó chrók'uen ch'án mé sínki.

¹⁸ Méxra tí pacto xrankixixín tsik'etoan Dios kjuankixin kjuich'e xra kixin k'uítji ijni.

¹⁹ Ch'in Moisés tsichrónka ch'án kaín nkehe tsik'etoan tí ley kuínhin kaín tí chojni; a ntá chr'éxin kuákja ch'án ichjoén kolélo kjátse la koí ntarama hisopo, ntá kjuinchekjatjaxin ch'án ijnié koxintáxjan la ko ijnié kotentsó tsíkjiko inta, ntá kuikjanjin ch'án tí libro chóna ley la ko kuikjanjin ch'án kain tí chojni.

²⁰ A ntá ntáchro ch'án kixin: "Tí jni i tsoxiteyáxin tí pacto k'uetoan Dios chrókjuinchexiteyéherá jahará."*

²¹ Tí ch'in Moisés kjaxin kuikjanjin ch'án jni tí njnko la ko kaín nkehe t'ichjánxin tí nkaxenhen njnko.

²² Kixin xikaha ntáchro tí ley kixin kaín nkehe la chrókótjuáxin tí jni; a ntá xitjahya chrókótjóá tí jie tí chrók'uixikjanjinhya jni.

Tí ik'uén Cristo mé tsjinín ijieni

²³ Méxra t'ichjánxin kixin ik'uén iko kótjuáxin tí nkehe a, táha mé tóyóhó tí nkehe siín nkaya nkajni; a ntá tí nkehe chaxín kuente nkaya nkajni t'ichjánxin ijnko nkehe antsí jina chrók'uen.

²⁴ A ntá Cristo k'uixenhya tí njnko tsíkjich'énaxín chojni tja, táha mé ijnko nkehe tóyóhó tí njnko chaxín. Náhi. Jehe ch'án mé k'uixenhen ch'án tí nkaya nkajni, a ntá jie mé tjen ch'án tí tjen Dios nijaxin ch'án kaín ni.

²⁵ A ntá jehe ch'án la jehya jnkoyaxón k'uixenhen ch'án ntiha k'uenyákonhenni ch'án. Náhi. A ntá tí ncha'tá t'etoan t'ixenhen tí Cuarto Tjóá jnkojnko nánó kixin tsjanjon ch'án ijnié ko ó.

* 9:20 9.19-20 Éxodo 24.6-8

²⁶ A ntá tí xíkaha chrókónhen Cristo la t'ichjánxin kixin jnkoyaxón chrók'óyan sín ch'án desde tí k'óna tí chjasintajni. A ntá jie la ó chjina, tsjixraká tsjeje chjasintajni, a ntá kónoxin Cristo la ik'uén ch'án jnkokoá vez kixin tsjinxín ijíeni.

²⁷ Mé xíkaha kaín ni its'enni jnkokoá vez, a ntá chr'éxin tsitogexín ijíeni.

²⁸ Mé xíkaha kjaxin Cristo jnkokoá vez ik'uén ch'án kixin tsjinxín ijíe nchónhya chojni. A ntá chr'éxin itsi ch'án inaá, jehya kixin naxa tsjatsen ch'án ijíe chojni. Náhi. Sinchekaá ch'án tí chojni ó tsíkótjóa tjejóchónhen itsi ch'án.

10

¹ A ntá tí ley k'uetgoanxín ch'in Moisés la tóyóhó tí nkehe jina tsi la jehya tí nkehe chrókuaáxinni. Méxra tí ley kjuachahya kjuínchetjóa tí sín kóchjinehe Dios kjuanjon sín iko its'en jnkojnko nánó.

² A ntá tí chrókjuacha tí ley chrókjuínchetjóa ijíe sín, ntá chrókjuenkayáxinhya sín kixin naxa chróhónta sín jie, la chrókuítehe sín, í chrókjuanjonhya sín iko its'en.

³ A ntá xíkaha ich'e sín t'óyan sín ko, la jnkojnko nánó xraxinkakonxín sín tí jie tsíkjasin sín

⁴ kixin ijnjé koxinta la ko ijnjé koténtsó xitjahya tsjinxín ijíe chojni.

⁵ A ntá tió Cristo kui chjasintajni ntáche ch'án Dios kixin:

Tjinkákonhya jaha iko its'en la ko tjinkákonhya jaha ninkehó nkehe chrók'uayéhe. Náhi.

Jaha tsíkjih'éna ijnko cuerpo kixin tsochonta janhan.

⁶ Jaha tóxrjlanhya iko tsíchjan la ko tí í so nkehe chrókjuanjonni chrókjuakjinxian ijíe.

⁷ A ntá ntátjan ch'án kixin: “A ntá ijie la ntíhi tjén janhan kixin sintaxitéyá tí nkehe tóxrjlanhan jaha Dios,

éxi nixja xroon chrónka nkexrí chrókjuít'a.”*

⁸ Senó ntáchro kixin Dios tjinkakonhya la ko tóxrjienhya ch'án iko its'en chrókjuanjonni la ko ninkehó nkehe chrókjuanjonni chrókjuinxín ijíeni kjónté tí ley k'uetgoan kixin xíkaha chrókónhen.

⁹ A ntá chr'éxin tsintáchro kixin: “A ntá k'uinka janhan kixin sintaxitéyá tí nkehe tóxrjlanhan jaha Dios,” ichro ch'án. Mé xíkaha kjuatsen ch'án tí ko k'uék'óyan sín ósé, a ntá jehe ch'án kjuanjon ch'án ijnko nkehe nixin.

¹⁰ Dios kjuínchetjuáxinni kixin Jesucristo kjuínchexitéyá éxi tóxrjinhin Dios kixin tí cuerpo kuénte ch'án kjuanjon ch'án ik'uén ch'án jnkokoáxón vez para jnkochrín.

¹¹ A ntá kaín nchat'á judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjinxín ijíe chojni.

¹² A ntá Jesucristo mé jnkokoá vez k'uenyákonhenni ch'án kixin tsotjuáxin ijíeni la tíha mé sich'e xra jnkochrín. A ntá kjuixin ntá sákjuí ch'án kjuák'etjaxin ch'án nó tí tja chjina kuénte Dios.

¹³ A ntá ntíha tjechónhen ch'án tsjinxinjan kaín tí sín nínkakonhen ch'án tsjachahya sín ts'etgoan sín.

¹⁴ Mé xíkaha jnkokoá nkehe kjuích'e ch'án chjéhe ch'án Dios, kixin jina ts'ejó tí sín ó tsíkótjóa.

¹⁵ A ntá tí Nchakuen Dios nchenoheni tíhi kixin senó tsintáchro kixin:

¹⁶ Tí pacto tsotjahá tí jehe sín tió ts'atsínka tí yaon a, ichro Inchéni;

Sintaxráxinkavan asén sín tí ley tsétoan,

a ntá tí kjuaxrexinkaon kuénte sín tsokjian tí nkehe tjínkavan.†

¹⁷ Kjaxin ntáchro kixin:

Í tsoxráxinkakonhya inaá tí ijíe sín la ko tí nkehe jínahya kjuích'e sín.‡

¹⁸ Mé xíkaha tí ó kótjóa ijíeni la t'ichjánxinhya í so nkehe chrókjuanjonni chrókótjuáxin tí ijíeni.

Méxra t'ichjánxin tsochjineheni Dios

¹⁹ Kichóni, a ntá la í kohya kjuachrakon ts'ixenhenni tí Cuarto Antsí Tjóá tí tjen Dios kixin kjuachaxién ijnjé Jesucristo,

²⁰ chréheni tí ntja nixin mé tí ntja tjechón kuakitjehé ch'án nóton tí ka cortina, tíha mé tí cuerpo kuénte ch'án.

²¹ Jesús mé tí nchat'á tjetooan kuéntení t'etgoan tí ntqe Dios.

²² Méxra xíkaha chrókóchjineheni Dios kaín asénni chrókuinkáchónkini ch'án chaxín kixin jehe ch'án tsíkjinchetjóa ch'án asénni kixin chrókjuenkayáxinhyani kixin naxa chóntani jie kixin tí cuerpo kuéntení kótjuáxin tí ntá jehó.§

²³ Chrókuíteghyani chrók'uejóchónhenni tí nkehe tinkáchónkini kixin Dios la chaxín sinchexitéyá ch'án tí nkehe tsintáchro ch'án.

* 10:7 10.5-7 Salmo 40.6-8 † 10:16 10.16-17 Jeremías 31.33-34 ‡ 10:17 10.16-17 Jeremías 31.33-34 § 10:22 Ezequiel 36.25

²⁴ Chrókjuéyáni nkexrí chrókjuinkĩtsani kichó ni kixin chrótuèheni kichó ni la chrókjuich'eni tí nkehe jína.

²⁵ Chrókuítøehyani chrókójnkotséni, chrókóyøehyani éxi tí sín í tójnkotséhya sín. Náhi. Chrókjuinchechéheni kichó ni antsí má jie kixin ó noheni kixin í séhya tsokjan Ìnchéni.

²⁶ A ntá tí naxa chrókjuenkayáxinni chrókjuasinni jie tí ó noheni tí nkehe chaxín, la kohya í jnko nkexro chrók'ueyákønhenni chrókótjuáxin tí jie chóntani.

²⁷ A ntá jehó itjen tí kjuachrakon jie tsitøexín jie la ko tí xrohi tjeche ts'itjáyanxín tí sín nínkakonhen Dios.

²⁸ A ntá tí tjen jnkojín nkexro titekakonhya tí ley k'ueøøanxín ch'ín Moisés, la tsoxoxín yaá o y'á tí sín tsík'ikon tí jie tsíkjasin sín, tíha mé ts'enxín sín la kohya nkexro tsikonøøe tí jehe sín.

²⁹ ¿Á tjenkayáxinhyará kixin antsí má chrókjuasóte tí sín kuítekakuenhya tí Xjeen Dios la ko chóntehya sín kjuasáya tí ijñé ch'án la ko t'ántaxínhjn sín tí Nchakuen Dios tjuèheni? Kixin tí jñi chrónkaxín kixin ts'etøanxín tí pacto la ko tí jñi k'ujímáxinni.

³⁰ Noheni kixin tsintáçro Ìnchéni kixin: "Janhan mé tóna tace sɔntakitøaxián ijje chojni la ko janhan tsjénkaḡa sín."* Kjaxin tsintáçro kixin: "Ìnchéni sinchekitøexín ijje tí sín tinkáchónki ch'án."[†]

³¹ Méxra kjuachrakon jie chrók'uanótjenyáni tí tja Dios tjechón.

³² A ntá chrórxáinkáonrá jahará tí nkehe tsíkønhen ósé kixin tíó jahará nantá tsík'ayéhérá tí nkehe t'inkaséyan, a ntá kjuachará kjónté tí nchónhya nkehe tsíkønhanrá.

³³ A ntá jnkojín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuínkĩtsa tí sín tsík'ekon.

³⁴ A ntá jahará kuikønøhérá tí sín tjejóçhina ntøechiso, a ntá jahará kóninkákonhyará kjónté k'uaxrjahará kaín nkehe chontará, kixin ó nohará kixin nkaya nkajni chontará nkehe antsí jína chónhya tsjeje.

³⁵ Chrókuítøéhyará tí nkehe tinkáchónkirá kixin ó nohará kixin tíha mé ts'ayéxinrá nkehe chr'éxin.

³⁶ Kjaxin jahará t'ichjánxin chrók'uejochonhénra chrókøninkákonhyará kjónté ichrén nkehe chrókønhanrá, kixin sɔch'erá tí nkehe tjinkaon Dios, kixin xɔkaha chrók'uyayéhérá tí nkehe tsintáçro tí jehe ch'án.

³⁷ Kixin xɔkaha ntáçro xroon itén Dios kixin:

Kánhyó sé

itsi tí nkexro tsi, í sinchexrjenhya.

³⁸ Tí sín kótjóá asén mé tjejóçhónxin sín kixin tinkáchónki sín Dios;

a ntá tí sín tsitøe tí janhan la í tsoçhanahya tí xɔkaha ch'e sín.[‡]

³⁹ Kjánçhó jeheni jehya xɔkaha chrókuítøeheni chrókuinkáchónkihiani tí jehe ch'án kixin ntá chrókjuasinni jie chrók'uitjáyanxinni. Náhi. Tinkáchónkini ch'án la tíha chrókuaaxinni.

11

Tí fe

¹ Tí fe chóntani la mé noexinni chaxín kixin tsoxiteyá ts'ayéheñi tí nkehe tjejóçhønheni, la ko noexinni chaxín kixin kjónté ijnko nkehe t'ikonhyani la chaxín tjen.

² Tí sín tsík'axrjenixinni ósé la kóxrjínhjn Dios kixin k'uechóna sín fe.

³ Tí fe mé noexinni kixin Dios tsík'ich'éna kaín nkehe tí kjuachaxin tí nixja ch'án la ko noexinni kixin tí nkehe t'ikonni mé tsík'óna tí nkehe t'ikonhyani.

⁴ A ntá tí fe k'uechóna ch'ín Abel mé k'óyán ch'án ijnko kolélo chjéhe ch'án Dios. Tíha ijnko nkehe antsí jína kjuanjon ch'án, a ntá tí nkehe tsíkjanjon ch'ín Caín la náhi. Méxra Dios kóxrjínhjn tí nkehe kjuanjon ch'ín Abel ntá ntáçro Dios kixin jína tí ch'ín a. Kjónté ó tsík'en ch'ín Abel la tí nkehe tsík'ich'e ch'án naxa tjákoçxin kixin jína tí fe k'uechóna ch'án.*

⁵ A ntá tí fe k'uechóna ch'ín Enoc la Dios sátsikjiko tí jehe ch'án la k'uénhya ch'án, a ntá k'uitjahya sín ch'án kixin Dios sátsikjiko. Naxa sákjuíhya ch'án la xráxin kóxrjínhjn Dios nkexrí k'uekjak'e ch'án.[†]

⁶ A ntá tí chróçhønahyani fe la xitjahya chrókjuinchechéheni Dios, kixin t'ichjánxin kixin tí sín chrókóçhinehe sín Dios chrókuitekaon sín kixin chaxín itjen ch'án la ko jehe ch'án tsjenkehe ch'án tí sín xritjeyá sín tí jehe ch'án.

⁷ A ntá tí fe k'uechóna ch'ín Noé tí Dios chénka tí jehe ch'án tí nkehe naxa k'uíkønhya ch'án tsoñhen, la kuítekaon ch'án kjuich'éna ch'án ntabarçø kixin tsaáxin ch'án la ko tí sín naxa kjéhya ch'án. Tí fe k'uechóna ch'án kjuakoçxin kixin tí í so chojni chjasintajni la jínahya sín

* 10:30 Deuteronomio 32.35-36 † 10:30 Deuteronomio 32.35-36 ‡ 10:38 10.37-38 Habacuc 2.3-4 * 11:4 Génesis 4.3-10 † 11:5 Génesis 5.21-24

tsjasóte sín. A ntá kóxrjnhin Dios tí jehe ch'an kíxin kuítekaon ch'an la tí xra kjuích'e ch'an mé kuaáxin ch'an.‡

8 A ntá tí fe k'uechónta ch'in Abraham tí k'uúyehę Dios tí jehe ch'an la kuítekaon ch'an sákjui ch'an tí nonte tsjanjon Dios ts'áyehę ch'an, ntá k'uaxrxjin ch'an chjasen ch'an kjónté noehya ch'an nketi nó sátsji ch'an.‡

9 A ntá tí fe k'uechónta ch'in k'uekjak'e ch'an tí nonte chrókjuanjon Dios, éxi jehya nontęę ch'an tíha. Kjuák'e ch'an nchia tsík'óna ka, la ko kjaxin xikaha k'uechónta ch'in Isaac la ko ch'in Jacob la ko kjaxin jehe sín tsik'áyehę sín tí nkehe tsintáchro Dios.*

10 A ntá ch'in Abraham k'uekjak'echónhen ch'an tí chjasin tsikjich'éna Dios ts'itjáyanhya.

11 A ntá tí fe k'uechónta tjan Sara kjónté ó nána tjan, k'uáyehę tjan kjuachaxin sich'éna tjan ijnko xjan; a ntá kjuích'éna tjan ijnko xjan kíxin kuítekaon tjan kíxin Dios sinchexiteyá tí nkehe tsintáchro ch'an.†

12 Kjaxin xikaha ch'in Abraham, kjónté ó mero chrók'uen ch'an kíxin ó táda ch'an, la k'uaxrxjenixin ch'an nchónhya chojni éxi konotsé siin nkajní o éxi nchesen siin chrínta ntayaon, xitjahya ts'ekini.‡

13 A ntá kain tí chojni a ik'uén sín k'uáyehya sín tí nkehe tsintáchro Dios kíxin chrók'uáyehę sín, a ntá k'uechónta sín fe, la kjónté ikjín k'uúikon sín la ko kuítekaon sín kóchéhę sín. Mé xikaha k'uechrónka sín kíxin tí chjasintajni jehya chjasén sín.

14 Mé xikaha k'uénixja sín la tienxíni jína kíxin naxa xritjeyá sín nketi chrók'óna chjasén sín.

15 A ntá tí chrórxaxinkaoon sín tí chjasin tsík'axrxjin sín ntá jína chrókjan sín ntíha inaá.

16 Kjánchó tjinkaon sín ijnko chjasin antsí má jína, tíha mé chjasin nkaya nkajní. Méxra Dios la tosuéhya ch'an kíxin chrókjuinчек'in sín ch'an tí Dios kuénte tí jehe sín, kíxin ó tjechónhen tí chjasin ts'áyehę tí jehe sín.

17 A ntá fe k'uechónta ch'in Abraham kíxin Dios kjuích'e prueba tí jehe ch'an kjuanchia tí xjeen ch'an Isaac, a ntá kjuíquao ch'an chrók'óyán ch'an, chrókjuanjon ch'an. Tjechónhen ch'an chrókjuanjon ch'an kjónté jnkokqáxon xjeen ch'an tsíkjanjon Dios‡ tsintáchro kíxin:

18 "Tí ch'in Isaac ts'axrxjenixin nchónhya xjan."*

19 A ntá ch'in Abraham kjuátsoan ch'an kíxin Dios imá chóna kjuachaxin, la kjónté chojni tsik'en na nchexechón ch'an, la éxi yóhę chrók'uen tí xjeen ch'in Abraham ntá chrók'uáyehę ch'an inaá.

20 A ntá tí fe k'uechónta ch'in Isaac kjuíncheyaoon ch'an tí xjeen ch'an ch'in Jacob la ko Esáu, kíxin jína ts'ejó sín.†

21 A ntá tí fe k'uechónta ch'in Jacob tíó chjina its'en ch'an kjuíncheyaoon ch'an jnkojnko tí xjeen ch'in José, a ntá tí nta tjaxin ch'an kjuisójjixin ch'an nixjehe ch'an Dios.‡

22 A ntá tí fe k'uechónta ch'in José tíó chjina its'en ch'an tsintáchro ch'an kíxin tí sín israelita la chr'éxin ts'axrxjin sín chjasin Egipto, tsík'etooan ch'an kíxin tíó sátsji sín la sátsjiko sín tí huesoę ch'an.‡

23 A ntá tí fe k'uechónta it'é la ko iné ch'in Moisés tíó kokjíhi ch'an kjuak'emą sín ch'an iní nitjó kíxin tsík'ikon sín kíxin ijnko xjan ntoa náxrjón tsjehe ch'an, la ko chrakuenhya sín tí nkehe tsík'etooan tí ch'in rey kíxin chrók'óyán sín xjan.*

24 A ntá tí fe k'uechónta ch'in Moisés tíó kónteto ch'an la chrohya ch'an its'in ch'an xjeen tí tjan xjeen ch'in rey Egipto.†

25 Náhi. Kjueyá ch'an kíxin kjónté chrókjuasóteko ch'an tí sín tinkáchónki Dios, la kóxrjienhya ch'an kíxin séhya náxrjón chrókjuak'e ch'an chrókjuasin ch'an jie. Náhi.

26 Kjuenkayáxin ch'an kíxin antsí tjeetoan chrókjuasótexin ch'an tí tinkáchónki ch'an tí Cristo itsi chr'éxin, a ntá kánhyó tjeetoan chróchóna ch'an kain nkehe tjeete siin chjasin Egipto. Kjuenkayáxin ch'an kíxin chrók'uáyehę ch'an tí nkehe chrókjuanjon Dios.

27 A ntá tí fe k'uechónta ch'in Moisés sákjuixin sín tí chjasin Egipto,‡ chrakonhya ch'an kjónté kóninkaoon tí ch'in rey, a ntá kuitoehya ch'an tí tinkáchónki ch'an Dios kíxin éxi t'ikon ch'an tí Dios ninkexró t'ikonhya.

28 A ntá tí fe k'uechónta ch'in Moisés kjuasin ch'an tí kia pascua, k'uetooan ch'an kíxin chrókuikjanjin sín jni† tí puerta, kíxin tí ángel t'óyán chojni chrókjuincheníehya nijnko tí xjan sao kuénte tí sín Israel.‡

‡ 11:7 Génesis 6.13-22 § 11:8 Génesis 12.1-5 * 11:9 Génesis 35.27 † 11:11 Génesis 18.11-14; 21.2 ‡ 11:12 Génesis 22.17 § 11:17 Génesis 22.1-14 * 11:18 Génesis 21.12 † 11:20 Génesis 27.27-29,39-40 ‡ 11:21 Génesis 47.31-48.20 § 11:22 Génesis 50.24-25 * 11:23 Éxodo 1.2; 2.2 † 11:24 Éxodo 2.10-12 ‡ 11:27 Éxodo 2.15 § 11:28 Éxodo 12.21-30

²⁹ A ntá tí fe k'uéchonta tí sín israelita k'uátòye sín tí Ntayaon Kjátse kíxin k'óna nche xamá, a ntá tió tí sín Egipto tjinkaon sín chróchréhe sín xikaha la kjánchó kjuínhin sín tí nta a.*

³⁰ A ntá tí fe k'uéchonta tí sín israelita la xítjen tí tjt'ò t'ínkáuènxín tí chjasin Jericó, tió kjuixin k'uántatjen sín yato yaon tí chjasin a.†

³¹ A ntá tí fe k'uéchonta tí tjan Rahab, na mé ijnko tjan k'uéchonta nchónhya chojni ntoa, ntá k'uénkohya tjan kaín tí sín jjehe kuitekakonhya, kíxin tsíkjanjon tjan kjuachaxin kíxin kjuaxróxin tsíkítghe nteje tjan tí sín israelita kjuíjitsàya sín tí chjasin Jericó.‡

³² ¿Nkehe naxa chróntáxrjan? Sintak'itjáyán tiempo naxa chrónixja kuènte ch'ín Gedeón, la ko ch'ín Barac, la ko ch'ín Sansón, la ko ch'ín Jefté, la ko ch'ín David, la ko ch'ín Samuel, la ko tí sín profeta.

³³ Kíxin tí fe k'uéchonta tí jehe sín kjuacha sín k'uetòan sín jína ókjé chjasin, la ko jína kjuínchekitòexín sín ijje chojni, la ko k'uáyéhe sín tí nkehe tsíntáchro Dios kíxin tsjanjon ch'án, la ko k'uikjehe sín ir'va koxra,

³⁴ la ko k'uanka tí xrohi chróchexín sín, la ko kjuachahya tí espada chrók'uenxín sín. A ntá tí sín chrakon la kófuérte sín, k'óna sín chojni tsehe kjuacha sín kjuánjonko sín tí sín soldado tsíkijxin ókjé.

³⁵ Kjaxin k'uék'ixin chojni chjin k'uáyéhe ínaá tí chojni tsík'en kuènte sín tsíxechón ínaá.

A ntá í so sín la kjuasote sín k'uénxin sín kíxin kjuínchemáhya sín kíxin kuínkáchónki sín Dios kíxin ó nohe sín kíxin tsoxechón sín antsí jína ínaá.

³⁶ A ntá í so sín kjuasóte sín la nchónhya chojni kjuanoá tí jehe sín, la ko tsík'ekon sín la ko kjaxin cadena chróntetoxín sín k'uejóchjina sín.

³⁷ Í so sín la ixro k'uénxin sín, la í so sín cierra chrít'oxin sín, la í so sín la nchónhya nkehe kjuasótéxín sín, la í so sín k'uénxin sín espada, la í so sín k'uék'aji sín tsík'ínkàya sín tjeje kolélo la ko tjeje kotèntso, nóa sín, kjuasóte sín, kjuaxróxinhya la náxrjónhya k'uejó sín.

³⁸ A ntá tí sín chjasin ntiha kjuikosáyehya tí sín a la ntá k'uínkíté sín, la tí sín a la chóntahya chjasén sín la sákjui sín nteje, la ko jna, la ko tjo síxra la ko tòye.

³⁹ Kaín tí sín a kónhen sín prueba kíxin á chaxín chóna sín fe la kjónté xikaha k'uáyéhya sín tí nkehe tsíntáchro Dios kíxin tsjanjon ch'án

⁴⁰ kíxin Dios kjuenkayáxin ch'án ijnko nkehe antsí jína kíxin jehó jnkokoá chrók'uáyèkoni sín tí nkehe tsjanjon ch'án.

12

Jehó Cristo chrókuínkáchónkini

¹ Méxra tí jeheni la tsík'antátjenni nchónhya chojni tsíkjakoxin sín tí fe k'uéchonta sín, la ntá chrókuítgheeni ntáha kaín tí nkehe t'ínkákohen, la ko tí jje chrókujachroeni, a ntá chrókuich'eni jína tí xra chóntani la ntá chrókuachani antsí má chrókónoheni.

² Jehó Jesús chrókuínkáchónkini kíxin jehe ch'án kjuanjon tí fe chóntani kíxin jína kjuakoxin ch'án kjuínchexiteya ch'án, la kjuasótéxín ch'án tí ntacruz, la kuáhya ch'án kuéntá kósuèhya ch'án tí nkehe kónhen ch'án ik'uén ch'án, kíxin nohe ch'án kíxin tsjixin tsjasóte ch'án ntá náxrjon tsjak'e ch'án la ko tsóchéhe ch'án kíxin tsjak'etjaxin ch'án tí tja chjina tí trono kuènte Dios.

³ Méxra chrókjuenkayáxinrá jahará nkexrí kjuakoxin ch'ín Jesús. Tí sín chóna jje imá kjuínchekjasóte tí jehe ch'án la kjónté jahará xikaha chrókjuasóterá la chrókóxrjéhyará chrókuínkáchónkirá ch'án.

⁴ A ntá jahará naxa k'uénxinhyará tí tjanjonkoará tí jje.

⁵ ¿Á k'uitjáyánhanrá tí jahará tí nkehe ntaxraxinkaonrá Dios kíxin éxi xjeen ch'án t'ikon ch'án tí jahará? Éxi ntáchro xroon itén Dios kíxin:

Xjeenni, tóninkákonhya tí nkehe tjentuáha Ínchéni, chrók'uaváhya tí chrókjuentuáha ch'án.

⁶ Kíxin Ínchéni mé tjentuéhe tí sín tjuèhe ch'án la ko nchekjasóte kaín tí sín ts'áyéhe ch'án ts'óna xjeen ch'án.*

⁷ Chrókuítekaonrá tí nkehe t'etòan Dios kíxin Dios t'ikon kíxin éxi xjeen ch'án tí jahará. ¿Á síin ijnko it'é xjan chrokuentuéhya tí xjeen?

⁸ A ntá tí chrókjuentuáhyará Dios tí jahará éxi tjentuéhe ch'án kaín tí xjeen ch'án, ntá jahará kjá jehya xjeen ch'án chaxín.

⁹ A ntá tí naxa k'uéchánjani, na mé it'èni ntihi chjasintajni kjuentuéhe tí jeheni, la jeheni kjuikosáyeheni sín. A ntá xikaha antsí chrókjuínchexiteyéheeni It'èni tjen nkaya nkajni kíxin chróchóntaxínni kjuachón.

* 11:29 Éxodo 14.21-31 † 11:30 Josué 6.12-21 ‡ 11:31 Josué 2.1-21 * 12:6 Job 5.17; Provérbios 3.11-12

¹⁰ It'èni ntìhi chjasintajni kjuentuèhèni ch'án kjónté kánhyó sé éxi nkexrí kóxrjnhjn ch'án; a ntá It'èni Dios tjentuèhèni ch'án kixin jnkojína chrók'uejóni, kixin chrók'ónani tjóá kixin jehe ch'án la tjóá ch'án.

¹¹ Chaxin ninkehó xikaha chrókjuinčekjasóte Dios tí jeheni chrókóxrjnhjinni tí nantá chrókónhenni kixin tí kjuatjóté. A ntá xikaha ts'itjaxínni tí kjuaxróxin éxi ijnko nkehe náxrjón kjuachani.

Tí sín tjanoá tí kjuasáyé Dios

¹² Méxra tjísójirá tí tjará tsikóxrjé la ko tóch'inrá chóntahya fuerza,

¹³ la ko chrókjuéyará tí ntja ntoá. A ntá tí tótará níhi xitjahya tjixinrá chrókuitóhe jína la ko chrókónéhya inaá.

¹⁴ Chrókóxakonhanrá kixin kjuaxróxin chrók'uejorá kaín rá, jnkojína tjóá chrók'uejorá. A ntá tí tjuaáya chrók'uejorá la xitjahya ts'ikonrá Ìnchéni.

¹⁵ Chrókóxakonhanrá kixin nijnkorá chrókuitóéhyará tí kjuasáyé Dios la ko nijnkorá chrók'ónahará éxi ijnko nuèe ka tsjá chóna veneno chrókóníexín tí í so chojni.

¹⁶ Nijnko tí jahará chrókjuásinkoará jje ijnko chojni chjin ókjé, la ko chrókjóniéhyará tí nkehe tjóá éxi kjuích'e ch'ín Esaú, kixin jnkoqá comida kjuínčekjixin ch'án tí nkehe chrókóna ch'án kixin xjan saó jehe ch'án.[†]

¹⁷ Jahará ó nohará kixin chr'éxin, tíó tjínkaon ch'án kixin chrókjuinchéyaon it'é ch'án tí jehe ch'án la í xitjahya tsoyaon ch'án kixin kohya nkexrí chrók'uixitóxin tí nkehe tsikjich'e ch'án kjónté imá chrótsjánka ch'án.[‡]

¹⁸ A ntá jahará la jehya kóchjinará éxi kóchjina tí sín israelita tí jnā jína chrótsé sín tí síchr'ákjen xrohí, tí tjen tí sítié t'inkaséyanhaya la ko tí chjéhe xrintó.

¹⁹ Na ní tsíkienhyará tí tsíntáchro trompeta, la ko tí itén Dios níxja. A ntá tí sín tsikinhin tí tan a na mé chronóa sín kixin í chrónixjahya ch'án inaá.[§]

²⁰ Mé xikaha ichro sín kixin tsjachahya sín sinchéxiteyá sín tí nkehe k'uetóan ch'án kixin “Tí nkexro tsinkátja tí jnā mé its'en, la ixro la o chica lanza chrók'óyánxin sín, la kjónté ijnko ko tsinkátja va tí jnā la chrók'uen.”*

²¹ Ijnko kjuachakon jíé tí nkehe k'uíkon sín la kjónté ch'ín Moisés tsíntáchro ch'án kixin: “Kjaxin síxřánkana chrakonna.”[†]

²² A ntá jahará tsíkóchjineherá tí jnā Sión, tí chjasén Dios tjechón, mé tí Jerusalén itjen nkaya nkajní, la ko nchónhaya míles ángel

²³ tsikójkótsé sín kixin tsóchjéhe sín kjuasáyá Dios, la ko tí sín tsíkójkótsé sín tsík'óna sín xjeen Dios saoxin ts'ínixín ihnjé sín nkaya nkajní. Jahará tsíkóchjineherá Dios, jehe ch'án mé Juez sinčekitóexín ch'án ijje kaín chojni, la ko tsíkóchjineherá tí nchakuen chojni jína ó tsíkjinchetjóá Dios,

²⁴ la ko tsíkóchjineherá ch'ín Jesús, jehe ch'án mé níxjaxin ch'án tí pacto níxin kixin tí ijnié ch'án k'uítji kjuínchetjuáxinni ch'án. A ntá antsí jína chrónkaxín tí ijnié ch'án, a ntá kánhyó tí ijnié ch'ín Abel.

²⁵ Chrókóxakonhanrá chrókuítekákonhénrá tí nkexro tjenixja. Kixin tí sín kjuanoá Dios tíó kjuínchéxaxinkaon ch'án tí jehe sín ntíhi chjasintajni ó la kuaáhya sín; a ntá antsí má xitjahya chrókuaáni tí chrókuítekakuenhyani tí nkexro nchéxaxinkaonni kuixjn nkaya nkajní.

²⁶ A ntá tí itén Dios tí yaon a kjuínčekinkí nonte. A ntá jie tsíntáchro ch'án kixin: “A ntá inaá jehya nonte ó sintakinkíá. Náhi. Kjaxin nkajní sintakinkíá”,[‡]

²⁷ A ntá tí tsíntáchro ch'án kixin “inaá” mé t'axrjéxin kixin tsjakjlin ch'án tí nkehe jína tsinkí, a ntá tsítóhe ch'án tí nkehe xitjahya tsinkí.

²⁸ A ntá tí ts'áyéheni tí kjuachaxin kjuanjon Dios la xitjahya ts'ixinkí tíha. Méxra chrókjhéheni Dios kjuasáya chróxaxinkaonni ch'án chróchrakqnhenni ch'án

²⁹ kixin tí Dios kuènteni mé éxi ijnko xrohí tsjacha sinček'itjáyan kaín nkehe.[§]

13

Nkexrí chrók'uejóni kixin chrókóchéhe Dios

¹ Méxra chrókuitóéhyará chrójtjuèherá kichuárá.

² Chrók'uitjáyanhyará chrókjuánjonrá kjuachaxin chrókuitóhe ntóará tí sín tsíkjinjn kjín. Mé xikaha kjuích'e iso sín la kjónté ángel tsík'áyéhe sín la kónoehya sín.*

³ Xrácinkáonrá tí sín tjejóchjina éxi kjaxinrá chrók'uejochjinakoará tí jehe sín. Xrácinkáonrá tí sín tsik'ekon éxi kjaxin tí jahará xikaha chrókónhanrá kjaxin.

† 12:16 Génesis 25.29–34 ‡ 12:17 Génesis 27.30–40 § 12:19 Éxodo 19.16–22, 20.18–21 * 12:20 Éxodo 19.12–13

† 12:21 Deuteronomio 9.19 ‡ 12:26 Hageo 2.6 § 12:29 Deuteronomio 4.24 * 13:2 Génesis 18.1–8, 19.1–3

⁴ Kaínra chróchonteherá kjuasáya tí kótehe chojni. A ntá jahará tsíkótahará la jína chrók'uejkoará kichuárá chrótjuèhérá kichuárá. A ntá tí sín tjinkaon tsochónta chojni chjin ókjé la Dios sinchekjasóte sín kixin xikaha ich'e sín.

⁵ Kénhyó má chrókórxjínhanrá itsjé chichaon. Chrókócháhará kjónté tí kánhyó tsjé chon-tará; kixin tsintáchro Dios kixin: "Janhan na tsjtoahya tí jahará la ko ts'itjáyannahya tí jahará."[†]

⁶ Mé xikaha chrakonhyani tsontáchroni kixin:

Ìnchéni mé tjinkitsani,

méxra chróchrakonhyani kjónté ichrén nkehe chrókuich'ehe ni chojni.[‡]

⁷ Chrórxáinkáonrá tí sín kjuinkitsa tí jahará kjuakohará sín itén Dios, chrókuenkayáxinrá nkexri k'uejé sín ntá xikaha chrókóyohará sín éxi tí fe k'uéchónta sín.

⁸ Jesucristo mé itjen ch'án ijna la ko ijie la ko jnkochrixin.

⁹ Chrókujtóghyará chrókuakohará chojni ijnko nkehe ókjé chrókuinkachónkirá. Íchá jína tí asánra chrók'uaýéhe fuerza kixin Dios tjuahará la jehya tjetoan chrókuinchexiteyéheni tí nkehe t'etóan nkehe sineni. Mé xikaha tí sín kjuich'e xikaha kjuinchexiteyá tí nkehe k'uituenhen sín nkexri chrókjóné sín la ninkehó kjuinkitsahya tíha.

¹⁰ A ntá jeheni chóntani í jnko altar kixin k'uenyákonhenni Cristo la ntiha kohya kjuachaxin chrókjónexín tí nchat'á kjuich'e xra nkaxenhen njnko ósé.

¹¹ A ntá tí nchat'á t'etóan judío kjuiko sín tí ijnjé ko nkaxenhen tí Cuarto Antsí Tjóá kixin tí nkehe la tsjatsen tí ijje sín. A ntá tí cuérpóé tí ko kjuakaxin sín ikon tí chjasin k'uejé sín.

¹² Kjaxin Ìnchéni Jesús kjuasóte ch'án k'uénxin ch'án ikon chjasin kixin tsotjuáxin kaín ijje chojni tí ijnjé ch'án.

¹³ Tsochréheni Ìnchéni Jesús éxi k'uénxin ch'án ikon chjasin kjónté tsjasóteni éxi kjuasóte tí jehé ch'án kjuikosáyehya sín tí jehé ch'án.

¹⁴ A ntá ntihi chjasintajni chóntahyani njnko chjaséni chrók'uitjáyannya; a ntá xritjeyáni tí chjasin itsi chr'éxin.

¹⁵ Méxra chrókujtóghyani chrókuikosáyeheni Dios kixin Jesucristo k'uenyákonhenni ch'án. Tí xraxinkaonni ch'án la yóhé tí ko tsík'en tsichjéhe sín Dios. Yóhé xikaha chrókjuanjoni kixin ir'vani ó chrókuikosáyexinni ch'án.

¹⁶ Chrók'uitjáyanyará chrókuich'erá xra jína la ko chrókuinkitsará kichuárá. Tí xikaha chrókuich'erá la imá tórxjínjin Dios.

¹⁷ Chrókuitekákonhénra tí sín tjakohará chrókuinchexiteyéhéra tí jehé sín. Jehé sín mé t'ayakonhen sín asánra kixin jehé sín la ó nohe sín kixin tsjanjon sín kuéntá tí tjen Dios. Tsjinkitsará sín kixin tsochéhé sín sich'e sín xra la tsonínkakonhya sín. A ntá tí chrókuinchek'ávára sín, ntá ninkehó tsjachahya sín tsjinkitsa sín tí jahará.

¹⁸ Nixjehérá Dios kixin tí jeheni kaín ni, kixin chaxín jína kjuenkayáxinni la ko tjinkaonni kixin jína chrók'uejóni.

¹⁹ Tjánchá xra ó kixin chrónixjehérá Dios kixin chrókjuanjon ch'án kjuachaxin kixin tjoka chrókjan janhan chrók'uejóni.

Tjanchia ch'án kixin chrókóyaon sín

²⁰ Tí Dios tjanjon kjuaxróxin, mé tí nkexro kjuinchexechón Ìnchéni Jesucristo kjónté tsík'en ch'án, jehé Jesucristo mé tí Pastor tjetoan t'ayakonhen tí kolélo, la tí ijnjé ch'án mé tsoxiteyáxin tí pacto sich'e xra jnkochrixin,

²¹ jehé Dios mé tsjinkitsa tí jahará kixin jína chrók'uejorá la ko kaín xra jína chrókuich'erá kixin xikaha tjinkaon ch'án; kixin jehé ch'án t'etuenhenni ch'án kaín nkehe nkexri tjinkaon ch'án kixin tí kjuachaxin chónta Jesucristo. Mé xikaha chjéheni Cristo kjuasáya jnkochrixin. Amén.

²² Kichóni, xrjanóahará kixin tóninkákonhyará kixin tí palabra xrjanca sjntaxraxinkáonrá. Méxra ikjian tí xroon kjónté kánhyó tsjé nixja ts'ayéhéra.

²³ Chrókónohará kixin kichó ni Timoteo la í tjechjinhahya ch'án jie. Tí tjoka tsi ch'án la tsjasánkian ch'án tí tsjasántsjahará tí jahará.

²⁴ Nixjehérá jnkójina kaín tí sín tjtaón ntja tjako la ko kaín tí sín kichó ni tinkáchónki Dios. Tí sín tinkáchónki Ìnchéni tjejó Italia mé nixjahará sín.

²⁵ Dios sintayaonrá ch'án kaín rá. Amén. Ó tjen.

Tí xroon tsíkjin ch'ín Santiago

Tí ch'ín Santiago tsíkjin ch'án xroon ts'áyéhe kaín tí sín tsíxikayéhe

¹ Janhan Santiago mé t'ahá xrá Dios la ko Ìnchéni Jesucristo nixjahá kaín tí sín tsík'axrjenixin tí teyó xjeen ch'ín Israel tsíxikayéhe sátsíkji kuenté chjasintajni.

Dios mé tsjanjon tí kjuaxrexinkaon jína

² Jahará kichó ni, chrókócháhará kjónté chrók'uats'ínkará ichrén nkehe náxrxjónhya.

³ Ó nohará kixin tí ichrén nkehe chrókónhanrá kixin tinkachónkirá Ìnchéni la t'ichjánxin chrókjuachará la chrókóninkákonhyará.

⁴ Chrókónohará kixin tí chrókóninkákonhyará la tíha mé ijnko xrá jína chaxín kixin ntá jahará ijnko chojni chaxín kjuacha titekaon la í t'itjáyanyha ninkehó.

⁵ Tí jnkójín tí jahará t'itjáyan kjuaxrexinkaon la chrókjuancheherá Dios la Dios mé chrótjáhará ch'án tíha. Jehé ch'án mé xráxín tsjanjon ch'án kaín nkehe ts'áyéhe tí chojni tjanchia la tsóninkakonhya ch'án.

⁶ Tió chrókjuancheherá Dios nkehe la kénxín asánrá chrókjuanchiará la chrókjóhya asánrá ninkehó. A ntá tí chojni tjo asén la éxi nta yaon tjiko xrínto ijnko lado la í jnko lado.

⁷ A ntá tí xíkaha itjo asén sín la chróntáchróhya sín kixin chrók'uáyéhe sín ichrén nkehe chrókjuanjon Ìnchéni.

⁸ A ntá tí nkexro xíkaha tjenkayáxin ijnko nkehe ijie la í jnko nkehe ntóye la jnkokóahya nkehe tjenkayáxin.

⁹ Tí kichó ni tinkáchónki Cristo la kjónté nòa chóntahya itsjé nkehe chjasintajni la kjónté xíkaha chrókóchéhe kixin tí tinkáchónki ch'án Ìnchéni la antsí má sínkí tíha.

¹⁰ A ntá tí nkexro rico kjónté chrók'uitjáyan tí nkehe chóna la antsí chrókóchéhe kixin tinkáchónki ch'án Ìnchéni, kixin tí nkehe chóna ch'án la kánhyó sínkí la ts'itjáyan éxi itsjo tsík'óna ka.

¹¹ Tió tsjítjon yaon la tsosóa imá la tí ka tsóxámá la ko tí tsjo la ts'ánótjen la tí náxrxjón tsjehe la tsjehe. Mé xíkaha tsønhen tí ch'ín rico, ts'itjáyan ntá tsítóhe ch'án tí xrá k'uéchénta.

Tí nkehe tsønhen chojni

¹² Náxrxjón tí nkexro tsjacha ts'atsínka tí nkehe náxrxjónhya tsønhen. A ntá tí tsjacha ch'án ts'atsínka kaín tí nkehe náxrxjónhya tsønhen ntá ts'áyéhe ch'án tí corona kuènte kjuachón kixin Dios tsíntáchro ch'án kixin tíha mé tsochjéhe ch'án tí sín tjuéhe ch'án.

¹³ A ntá jnkójínrá tí chróntáchro asánrá chrókjuich'erá ichrén nkehe jínahya, la chróntáchróhyará kixin Dios tsíkjanjon kjuachaxin xíkaha sjich'erá kixin Dios la tjinkakonhya chrókjuich'e ch'án nkehe jínahya la ko tjinkakonhya ch'án chrók'uetqan ch'án kixin ninkexró chrókjuich'e ijnko nkehe jínahya.

¹⁴ A ntá jnkójín chojni tí ó jehó tjenkayáxixin asén tí jínahya la mé xíkaha tsjachroe, tsjasin sín jie.

¹⁵ Mé xíkaha tí nkehe jínahya tjenkayáxin chojni mé tjixin tí jie. La mé xíkaha ts'ánkí tí jie la ntá tíha ts'enxín chojni.

¹⁶ Kichóni, chrókjuich'iyéhyará asánrá.

¹⁷ Kaín nkehe jína ntoá t'áyéheni mé tjixin nkajní tí tjen Dios tí nkexro kjuich'éna kaín tí xrohi kuènte nkajní. Jehé ch'án mé Dios jnkochrixín la jehé ch'án mé xitjahya ts'ixitóxin.

¹⁸ Jehé ch'án kjuanjon ch'án kjuachón k'uáyéheni kixin tí tan ntoá nixja ch'án, kixin éxi tí nkehe senó tsík'óna, mé xíkaha tjinkaon ch'án chrók'óna tí jeheni.

Tí nkehe chaxín chrókuinkáchónkini

¹⁹ Méxra chróxráxinkáonrá tíhi jahará kichó ni. Kaínrá chrók'uejorá chrókuinhínrá jína la tjokahya chrónixjará kixin tjokahya chrókóninkáonrá.

²⁰ A ntá tí chojni tjoka tóninkaon la ch'ehya tí xrá jína éxi tóxrjínjin Dios.

²¹ Méxra títóhérá tí nkehe tjuáhya la ko tí nkehe jínahya kjuachjinoxínhin síin nkúxín la chrókjuinchehnkehyará, chrók'uayéhérá tí itén Dios chrók'uinka nkaya asánrá. Tí tan a mé chóna kjuachaxin kixin chrókuaáxinrá.

²² Jehya kixin chrókuinhónrá; jahará chrókjuich'erá éxi tí nkehe tjako tí tan a. A ntá tí náhi la jahórá ch'iyehérá asánrá.

²³ A ntá tí chojni tsinhón tí tan la ntá sinchexiteyáhya la éxi ijnko chojni tsjéxín xrosentá tí kon ó.

²⁴ A ntá tí k'uíkon tí kon la sátsji la tuénxín k'uitjáyenhen nkexrí tsjehe.

²⁵ A ntá tí nkexro k'uitjáyenhya tí nkehe kuínhin la mé tsjehe ch'an jína tí ley chaxín ntoá, mé tí nkehe chaxín tsaáximi la titekaon ch'an jína la ich'e ch'an nkehe t'etqoan tíha la ntá náxrjón tsjak'e kixin kjuínchexiteyá ch'an.

²⁶ A ntá jnkojín nkexro tjenkayáxin kixin imá tinkáchónki ch'an Dios kjánchó tí noehya tsochjéhe freno nejan la jehó ch'iyehé asén la ninkehó sínkíhya tí nkehe tinkáchónki ch'an.

²⁷ A ntá tí nkexro tinkáchónki Dios chaxín jína la ko tjasinnya jje nkayakon It'eni Dios la mé tíhi: mé chrókuinkitsa tí chojni nóè la ko tí chojni k'an chóntahya nkehe sine sín o níhi sín, la ko chrókuasinhya tí jje jínahya síin chjasintajni.

2

Jnkokón chrókuikosáyehé kichó ni

¹ Kichóni, jahará tinkáchónkirá Ìnchéni Jesucristo imá tjeoan la t'ichjánxin chrókuikosáyehérá kaín chojni jnkokón.

² Éxi ijnko chojni rico chrók'uixenhen tí tójnkotsérá la chóna koch'aninko oro la ko chóna iké náxrjón, a ntá tíha kjaxin chrók'uixenhen ijnko chojni nóa chóna iké ntaxin.

³ A ntá tí chrókuikosáyehérá tí chojni t'itsa ka jína la tsontácherá ch'an kixin: "Ntíhi antsí jína tjak'e." A ntá tí chojni nóa tsontácherá ch'an kixin: "Jaha la tjak'éxian totá tíha o tjak'e nonte ó."

⁴ Mé xikaha la jnkokónhya tjikosáyehérá kichuárá la tí nkehe jínahya tjenkayáxinrá.

⁵ Kichóni tjuahará, tsinhínrá tíhi: Dios tsíkjeýá tí sín nóa ntíhi chjasintajni kixin antsí má tsinkáchónki sín tí jehé ch'an kixin ts'áyéhe sín tí kjuachaxin kuente ch'an éxi tsintáchro ch'an tsochjéhe ch'an tí sín tjeùhe ch'an.

⁶ A ntá jahará mé tjikosáyehyará tí sín nóa. A ntá tí sín rico mé tjikosáyehérá. ¿Á jehya tí sín rico tjanchia sín jje sátjiko sín tí jahará nkayakon tí sín t'etqoan ní?

⁷ ¿La á jehya jehé sín t'ántaxínhin sín tí ihnjé Cristo tjikosáyeheni?

⁸ A ntá jahará la jína tjejoch'erá tí nchexiteyará éxi t'etqoan tí ley éxi níxja tí xroon itén Dios kixin: "Chrótjeùherá kichuárá éxi tjeùxíná asánrá".

⁹ A ntá tí jnkokónhya tjikosáyehyará chojni la ntá xikaha la tjásinrá jje la nchexiteyáhyará éxi tí níxja tí ley kuente Dios.

¹⁰ A ntá ijnko nkexro titekaon kaín tí ley la ntá kjuínchexiteyáhya jnkokoá tí nkehe tjeoan la mé tí xikaha la kjuínchexiteyáhya kaín tí nkehe t'etqoan tí ley.

¹¹ Ntá Dios tsintáchro kixin: "Chrókuákjahyará í jnko chojni chjin ókjé", la kjaxin tsintáchro ch'an kixin: "T'oyánhyará kichuárá." A ntá tí nkexro kuákjahya í jnko chojni chjin ókjé kjánchó kjuàya la kjuínchexiteyáhya tí nkehe t'etqoan tí ley.

¹² A ntá jahará chrónixjará la ko chrókuínchexiteyará kixin chrókuanchiahya jje tí ley sincheakaáni.

¹³ A ntá tí nkexro kuikonóehya í jnko chojni la kjaxin tsikonóehya Dios tí jehé. A ntá tí nkexro kuikonóehé kichó la mé xikaha tsjacha tsaáxin ch'an tí yaon tsjixixín tsitqoxín jje.

Tí fe ch'ehya xra la tsik'en

¹⁴ Kichóni, ¿nkehe tsoñhen ntáchrorá kixin chontará fe a ntá ninkehó nkehe jína tjákoxinhyará? ¿Á ntáchrorá kixin xikahó chrokuaáxinrá?

¹⁵ Éxi ijnko kichó ni ntoa o kichó ni chjin chóntahya iké o chóntahya nkehe sine sín t'ichjánxinhin sín jnkojín yaon.

¹⁶ Ntá jnkojín tí jahará tsontácherá sín kixin: "Sátjia jnkojína la ko ts'itsa ká la ko sinte jína." A ntá tí kjuánjonhyará tí nkehe t'ichjánxinhin tí cuerpoé sín la sínkíhya tí nkehe ntáchrorá.

¹⁷ La mé xikaha tónhen tí fe la tí tjákoxinhyará ninkehó nkehe jína kjuich'erá la éxi nkehe tsik'en tí ntáchrorá.

¹⁸ A ntá jnkojín chojni tsontáchro kixin: "Jaha chonta fe a ntá janhan it'a tí xra jína." Tí xikaha la jaha tjákoxian tí fe kjónté kohya xra la janhan tsjákoxian tí fe la ko tí xra jína tjét'a.

¹⁹ Jaha titekávan kixin jnkokoá Dios itjen la chaxín jína xikaha, kjánchó kjaxin tí jínahya titekaon tíha la ko síxránká chrakon.

²⁰ T'ónahyará lqntj. Jahará la nohará kixin tí fe ch'ehya xra la chónkó tíha.

²¹ Dios kóxrjínhin tí nkehe chrókuich'e ch'in Abraham, tí nkexro k'uaxrenixinni ósé, tíó chrók'óyan ch'an tí xjeen ch'an Isaac la chrókjuanjon ch'an chrók'uáyéhe Dios.

²² Chrókónohará kixin tí fe k'úechóna ch'in Abraham la kjuákoxin ch'an tí xra kjuich'e ch'an la ntá xikaha kjuákoxin ch'an kixin antsí má kuinkáchónki ch'an Dios.

²³ Mé xikaha xiteyá éxi ntáchro xroon itén Dios kixin: "Abraham kuítekaon Dios la ntá Dios ntáchro kixin jína ch'an", la ntá Dios kjuínchek'in ch'an amigo kuente ch'an.

²⁴ Chrókónohará jahará kixin Dios la t'áyéhe ch'an chojni la nchetjóá ch'an kixin tí xra jína ch'e sín la jehya kixin jehó chrókuinkáchónki sín ch'an.

²⁵ Mé kjaxin xikaha kónhen tí tjan Rahab, tí tjan k'uéchonta nchónhya chojni ntoa. Jehe tjan kjuanjon tjan kjuachaxin kútohe ntøe tjan tí sín kjuitsjehe chjasén tjan la ko kjuinkitsa tjan sákjuixin sín ókjé ntja, a ntá Dios la kóxrjínhin tí nkehe kjuich'e tjan.

²⁶ Éxí tí cuerpoé chojni chónthaha nchakuen la tsík'en la kjaxin xikaha tí fe la tsík'en tí ninkehó tjákoxínhya tí nkehe jina chrókujuich'e sín.

3

Tí kjuachaxin chóntha nejen chojni

¹ Kíchóni, chrók'ónaha tí jahará nchónhya maestro kixin tí ntoáhya chrókuàkorá la tíha mé chrókjuasótiaxinrá imá.

² Kaínni chónthani jie, a ntá tí nkexro ninkehó jie ntáchrohya la ijnko chojni jina tíha la ó tsjacha ch'án ts'etuenhen ch'án kuenté tí cuerpo kuènte ch'án.

³ Éxí tí kokatøe tsochóntha chica freno tí ir'va va kixin tsitekaon va la sátsjiko tí inché va la tsjacha ch'án ts'etuenhen kuenté tí cuerpo kuènte va.

⁴ Tjenkayáxinrá kjaxin nkexri tjejó tí ntabárcø kjónté imá jie la tsjacha tí xrintø chjéhe tjan sátsjiko, la ntá tí ch'ín tjiko la kjónté ijnko nta ntsí la tsjacha ch'án sátsjikoxin ch'án tí tjinkaon ch'án sátsjiko ch'án.

⁵ Mé xikaha tí ir'va chojni. Kjónté ijnko nkehe imá ntsí kuènte tí cuerpo kjánchó nchónhya nkehe jínaha ntáchro éxí ijnko xrohi ntsí la tsjacha tsochéxin kuenté ijnko jná jie.

⁶ Mé xikaha tí ir'vani la éxí ijnko xrohi kixin nchónhya jie t'axrxjén la éxí ijnko veneno nchenihi cuerpo mé xikaha mé tsjasixín kuenté cuerpoé chojni jie. La tí kjuachaxin kuènte ir'vani la mé tjixín tí infierno la tíha mé tjixín tí ts'itjáyanxinni.

⁷ Tí chojni la tsjacha sinchesáncho káin ko jiehe la ko tí ko xritjaká la ko tí konche la ko tí ko sínkankí ntayaon la mé xikaha kjuacha sín nchesáncho sín va.

⁸ A ntá tí ir'va chojni la kohya nijnko chojni tsjacha sinchesáncho. Tíha mé jínaha la xitjahya tsosáncho. Tíha mé éxí ijnko nkehe chóntha nchónhya veneno ts'enxín chojni.

⁹ Tí ir'vani la kjaxin tjikosáyexinni It'éni Dios la tíha kjaxin t'ántaxénxinni chojni tsíkijich'éna Dios éxí tsjehe tí jehe ch'án.

¹⁰ Kjaxin tí ir'vani t'axrxjén tí nkehe itsjeni kuènte Dios la kjaxin tíha t'ántaxínxinni. Kíchóni, xikahya chrókujuich'erá.

¹¹ Jnkokoá tòye xitjahya ts'axrje ntá xé la ko kjaxin ntá tsjá.

¹² Kíchóni, zá jina tí nta higuera chrók'óna to aceituna o tí nta to uva chrók'óna to higo? Kjaxin xitjahya ijnko tòye chrók'uaxrje ntá xínta la ko ntíha kjaxin chrók'uaxrje ntá xé.

Tí kjuaxrexinkaon jina

¹³ Tí tjen jnkojín nkexro tí tjejórá nohe jina la ko tienxín la chrókuákoxín ch'án jnkojína la ko chrókuinchehnkexínhya ch'án tí nkehe imá nohe ch'án.

¹⁴ A ntá tí jahará chóntha kjuachjinoxínhin asánrá la tjinkáonrá jahórá chrókuétoanrá. A ntá tí xikaha la chrókuinchehnkexínhyará tí nkehe nohará kixin tí xikaha la ch'iyará la tjinkáonhyará chróchroñkará tí nkehe chaxín ntoá.

¹⁵ A ntá tí xikaha sinchehnkerá la jehya tí kjuaxrexinkaon kuixín tí tjen Dios. Tí xikaha la kjuachaxin kuènte chojni chjasintajni ó la ko kuènte ch'ín Tsochren.

¹⁶ A ntá tí xikaha sín kjuachjinoxínhin la ko tjinkaon chojni jehó chrók'uetøan la ntá xitjahya tsonhen xrá yóxin kixin xikaha sín nkehe jínaha.

¹⁷ A ntá tí sín kjuaxrexinkaon jina tsíkixín tí tjen Dios la saxóxin tjejó chojni jina la ko kjaxin kjuaxróxin tjejó sín la ko náxrjón tjejó sín la ko jnkojína nixjehe kichó sín la ko kjaxin tjkonøehe kichó sín la ko tí xrá jina tjejóch'e sín la tí nkehe ntoá nixja sín.

¹⁸ Tí nkexro tjejá tí kjuaxróxin xikaha chrók'uénka sín kjuaxróxin la ko xikaha chrójtá sín tí nkehe jina.

4

Tí tjanjonxin chojni

¹ ¿Nketí tjixín tí guerra la ko tí kjuanínkaon tjanjonkoaxínrá kichuárá? Táha la mé jahórá t'axrjenínrá káin tí kjuanínkaon a.

² Jahará tjinkáonrá tsochontará ichrén nkehe ntá chontahyará ntá tónínkáonrá t'oyánrá kichuárá. Tóchjinoxínhanrá kixin tsjachahyará sincheyóherá í so chojni ntá tónínkáonrá. Jahará ts'ayéhyará tí nkehe tjinkáonrá kixin tjanchehyará Dios.

³ La tí tjanchiará la ts'ayéhyará kixin ntoáhya kjuanchiará kixin tjinkáonrá chrókuicháxinhanrá ó la chrókuinchehnkexínrá.

⁴Jahará chojni titekakonhya Dios. ¿Á noahyará tí jahará kixin tí imá tsotjuèhéra chjasintajni la ntá tsoninkákonhénra Dios? A ntá tí jnkójnra tjinkáonra tsotjuèhéra chjasintajni la tsokjanra tsoninkákonhénra Dios.

⁵¿Á tjenkayáxinra kixin tí nkehe ntáchro xroon itén Dios la á chónkó? Ntáchro xikíhi: “Tí Nchakuen Dios kjuanjón ch'an k'uayéhéra la tjuahará ch'an la tsoninkaon tí tsitohéra ch'an.” Mé xikaha ichro Dios.

⁶Kixin Dios la imá tjinkitsani ch'an, méxra ntáchro xroon itén Dios kixin: “Dios la ninkakonhen tí chojni nchehnke a ntá tjinkitsa ch'an tí chojni nchehnkehya.”*

⁷Méxra chrókjuinchehnkehýará. Íchá jina chrókuítekaonra Dios la chrókjuánjonhyará kjuachaxin tí jínahya chrók'uetuñhanra ntá chrók'uikon tí jínahya kixin chrók'uetuñhanya ntá sáchrókjui.

⁸Chrókóchjineherá Dios, la tí jehe ch'an kjaxin tsóchjinhahará ch'an. Jahará chojni chóna jie la chrókjonemará tjára. Chrókjuinchetjóára asánra kixin chrótuèhéra Dios la kánhyó chrótuèhéra chjasintajni.

⁹Chrók'uavará la ko chrótsjanará. Chrókjuínkíra tí tjanorá la chrótsjanará la chrókjuínkí tí cháhará la chrók'uavará.

¹⁰Chrókjuinchehnkehýará chróxráxinkáonra Ìnchéni a ntá jehe ch'an chrókjuínkítsa ch'an antsí chrókónohará.

Chrók'uántaxienhyani kichó ni

¹¹Kichóni, chrók'uántaxienhyará kichuára. A ntá tí nkexro t'ántaxínhin ijnko kichó la ntá jehe ch'an t'ántaxínhin ch'an tí ley, la t'eka jie tí ley. A ntá tí t'eka ch'an jie tí ley la mé t'óna juez chrínkí chrókuítekaon tí ley.

¹²Kixin jnkokó nkexro kjuanjón tí ley la tí nkexro a mé tí juez la jehe ch'an sinchekaá ch'an chojni la ko sinchekjásote ch'an chojni. ¿A ntá nkexro tí jaha kixin chrókjuanchéhé jie tí kichuá?

Í noehyani nkehe tsonhen ntóye

¹³A ntá jie jahará chrókuinhínra tíhi kixin tsintáchrórá kixin: “Tjie o ntóye sáchrokjuini ijnko chjasin la ntiha chrók'uejóni ijnko nánó chrókjuinchekjini nkehe chrókjuachani chichaon.”

¹⁴A ntá jahará noahyará nkehe tsonhen ntóye kixin tí tjejóchónni la éxi ijnko tjuí nonte ts'ikonni a ntá tuénxín ts'itjáyán.

¹⁵Íchá jina chróntáchrórá kixin: “Tí tjinkaon Ìnchéni la naxa chrók'uejóchónni la chrókjuich'eni tíhi o tíha.”

¹⁶A ntá jahará tí nixjará la imá ihnkerá la kaín tí kjuahnke la mé jínahya.

¹⁷A ntá tí nkexro nohe chrókjuich'e tí nkehe jina la ntá ch'ehya xikaha la mé antsí tjasin jie.

5

Tí nkehe chrókuinhin tí sín rico

¹Jahará rícorá chrókuinhínra tíhi. Chrótsjanará la ko chrók'uíyatorá kixin tí nkehe tsonhanra tsjasótiará.

²Tí nkehe rícoxínra la ó tsíkótje la ko tí ka chontará la ó tsik'in kué.

³Tí oro la ko tí plata chontará ó tsikóchjisen. Tíha mé tjakoxin kixin nkexrí tsonhen ntóará tsoche. ¿Nkehe tsonhen kjuásintonra nkehe kixin ó tsi tí yaon tsjixixín?

⁴A ntá tí nkehe chrókjuacha tí sín kjuít'ahará xra la kjuénkehýará sín la ntá tjanchia sín jie tí jahará la t'èya sín, ntá Ìnchéni imá t'etóan mé kuínhin kixin xikaha ichro tí sín kjuich'e xra.

⁵A ntá ntíhi chjasintajni la náxrjón tjejora la kaín nkehe tóxrjínhanra ch'erá la éxi iko imá jina ine la tsíkótsanra la ntá itsji yaon ntá its'en la mé xikaha tsonhanra.

⁶Kixin jahará la kjuinchekjásótera la k'oyánra chojni ninkehó jie chónthya kjónté kohya nkehe kjuít'ahará sín.

Chrókóninkakonhyani chróchónhemi la chrónixjeheni Dios

⁷Méxra kichó ni, chrókóninkákonhyará chróchonhénra tsokjanjian Ìnchéni. Éxi tí ch'in ch'e xra nontje chónhen xrakoa chrin senó la ko tí chrin tsjixixín ntá tsotjá ch'an tí nkehe náxrjón k'óna.

⁸Mé xikaha jahará la kjaxin chrókóninkákonhyará chróchonhénra chrókóxrjéhyará kixin tí yaon itsi Ìnchéni la ó chjina tsi.

⁹Kichóni, chrókóninkákonhyará kichuára kixin ntá chrókjuanchahya Dios jie tí jahará kixin Dios la mé tí juez la ó tjen ch'an tí ntója puerta.

* 4:6 Proverbios 3.34

¹⁰ Kíchóni, chrókuankíhírǎ éxí tí sín k'uéchrónka itén Dios k'uéchrónkaxín sín kjuachaxin ihníé Ìnchéni. Jehe sín kjónté kjuasóte sín la kónínkakonhya sín.

¹¹ A ntá jeheni ntáchroni kixin kóchéhe tí sín a kjónté kjuasóte sín la kjuacha sín. Jahará la ó kuinhínǎ kixin nkexrǐ kónhen ch'ín Job. Ó nohará kixin Ìnchéni kjuínkǐtsa ch'án hasta kjuixixín kixin Ìnchéni la imá jína ch'án la kujkonóghé ch'án tí ch'ín a.

¹² A ntá kíchó ní, chrókuakjénxínhyará ihníé Dios tjen nkaya nkajní la ko ní chjasintajni la nijnko nkexro chrók'uakjénxínhyará. Tí chróntáchorá chaxín la chaxín la tí náhí la náhí kixin Dios la chrókjuinchekjásótiahyará.

¹³ A ntá jnkojín tí jahará náxrjónhya tjejerá la chrónixjehérá Dios, a ntá jnkojínǎ náxrjón tjejerá la chrótsjerá kuènte Dios.

¹⁴ A ntá tí jnkojín nkexro níhi la chrók'uíyehé sín tí sín táda t'etóan kuènte nínko kixin ntá chrónixjehé sín Dios kixin tí sǐnníhi la ko chróchjéhe sín aceite tí sín a kjuachaxín ihníé Ìnchéni.

¹⁵ Chrónixjehérá Dios kain asánǎ kixin tí sǐnníhi chrókuítóhe jína la ntá Ìnchéni chrókjuinkǐtsa sín, a ntá ichrén jǐe kjuasin sín la jehe ch'án sinchejtǐtǐjǎyan tíha.

¹⁶ Méxra chróchenkará kíchuárá tí jǐe chontará la ko chrónixjehérá Dios kixin chrókuítóhará jína. Tí nixjehé Dios ijnko chojni jína tinkáchónki Ìnchéni la chónǎ nchónhya kjuachaxin tíha.

¹⁷ Tí ch'ín Elías, tí nkexro k'uéchrónka itén Dios, mé ijnko chojni éxí tí jeheni la jehe ch'án kjuanchehe ch'án Dios kain asén ch'án kixin ts'aniáhya chrin la ntá k'uániáhya chrin chjasintajni iní nánó ko t'ó.

¹⁸ A ntá chr'éxǐn kjuanchehe ch'án Dios kixin ts'aniá chrin la ntá k'uániá chrin ínaá chjasintajni la jína k'óna tí nkehe k'uénkǎ sín.

¹⁹ Kíchóni, tí jnkojín chojni chrókjuichroe chrókuítóhe tí nkehe ntoá la í jnko nkexro chrókjuinkǐtsa kixin chrókǐan tí nkexro a

²⁰ la chrókónohará tí jahará kixin jnkojín chojni tjínkǐtsa ijnko nkexro chónǎ jǐe tsokǐanxín tí ntǐa jínahya k'uék'aji ch'án la ntá ó kjuínkǐtsa kixin tsaáxin asén tí ch'ín a kixin ts'itǐjǎnyahya ch'án la ntá chrók'uitǐjǎyan tí nchónhya jǐe k'uéchónǎ ch'án. Ó tjen.

Tí xroon saoxín tsíkjin ch'ín Pedro

Ch'ín Pedro ikjin ch'án xroon chr'énnen ch'án tí sín tinkáchonki Ìnchéni tjejó ókjé

¹ Janhan Pedro, mé kjueyána Jesucristo t'ahá ch'án xra mé ikjian tí xroon chr'anhánrá jahará sátsikjirá ókjé chjasin tjejorá, mé tjejorá estado Ponto, la ko Galacia, la ko Capadocia, la ko Asia, la ko Bitinia.

² Kjueyará It'éni Dios kixin jehe ch'án tsíkjenkayáxin ch'án ósé xikaha. Kótuáxinrá Nchakuen ch'án kixin chrókuitekáonrá ch'án la ko kótuáxinrá ijnié Jesucristo. Kjuasáyé ch'án chrókuintayaonrá ch'án kixin ántsi chrókuájkjára tí kjuaxróxin kuénte ch'án.

Tjejóchónhemi kixin jehe ch'án sinchekaáni ch'án

³ Tjancheheni kjuasáyé Dios mé It'é Ìnchéni Jesucristo kixin kjuasáyé jehe ch'án kujkonóeheni ch'án kixin éxi kokjexínni nixin kixin xechón Jesucristo. Mé xikaha tjejóchónhemi sinchekaáni ch'án.

⁴ Mé xikaha ts'ayéhérá jahará tí nkehe tsjanjon Dios chóna ch'án nkaya nkajni mé ijnko nkehe chónhya ts'itjáyán, la ko chónhya tsokjita, la ko chónhya tsoxamá.

⁵ Dios mé t'ayakuanxínrá ch'án tí kjuachaxin kuénte ch'án kixin jahará tinkachónkirá ch'án kixin ntá tsjacha tsaára éxi tsíkjenkayáxin ch'án ósé mé tjinkaon ch'án kixin chrókuáará tí tsjixixin tsjeje chjasintajni.

⁶ Méxra xikaha chróócháhará kjónté ichrén nkehe chrókónhanrá iso yaon kixin jehi t'ichjánxin xikaha itsjé nkehe chrókónhanrá.

⁷ Méxra tí tinkachónkirá Ìnchéni la t'ichjánxin tsjachará nchónhya nkehe chrókónhanrá éxi yóhe chica oro xikaha t'ichjánxin ts'atsínka tí siín xrohi tsotsjexin sín á chaxin jina kohya nkehe tsónhen. A ntá ántsi má sínkí tí tinkachónkirá Ìnchéni a ntá tí chica oro la kénhyó sínkí kixin tí chica oro la chóxin tsjeje. Mé xikaha tí tinkachónkirá Ìnchéni t'ichjánxin xikaha tsónhanrá kixin tsontáchro Dios kixin jina kjuachará ntá ts'ayéhérá kjuachaxin tíó tsi Jesucristo.

⁸ Jahará tjeuhérá Jesucristo kjónté k'uikonhyará ch'án. Ijie tinkachónkirá ch'án kjónté t'ikonhyará ch'án la ko tócháhará ijnko kjuachéhe imá jie kohya nkehe sincheyóhemi kixin imá náxrjón tíha.

⁹ Mé xikaha k'uitjará nkexri tsaáxin asánrá. Tíha mé tí nkehe tjejochonhénrá tinkachónkirá.

¹⁰ Mé xikaha tí sín profeta tsíki ósé la kjueyá sín nkexri chrókuááxin chojni la ko k'uechrónkaxin sín tí nkehe kjuasáyé Dios chrókjuanjon ch'án chrók'uyayéhérá tí jahará.

¹¹ Nchakuen Cristo kjuínchenohe tí sín k'uechrónka itén Dios kixin Cristo tsjasóte la ko chr'éxin ts'ayéhe ch'án tí kjuachaxin jie. A ntá tí sín k'uechrónka mé tjinkaon chrókónohe sín nkexro tíha la ko nkesá tsónhen tí nkehe chrónkaxin Nchakuan Ìnchéni.

¹² Kjánchó Dios kjuínchenohe tí jehe sín kixin tí nkehe chrónka sín jehya kixin tjoka chróxiteyá tí k'uejó sín. Náhi. Hasta tí tjejóni jie mé ó xiteyá tíha. Tí nkehe chrónka sín la mé yóhe tí nkehe kuínhínrá, mé tí tan tsaáxinni k'uechrónkaxin tí sín kjuakohará kixin tí kjuachaxin Nchakuen Dios kujxin nkaya nkajni mé kjuínkítsa tí jehe sín. Kjaxin tí sín ángel tjinkaon sín chrók'uinkon sín nkexri tíha.

Dios k'uyéhe ch'án tí jeheni kixin tjóá chrók'uejóni

¹³ Méxra chrókjuenkayáxinrá jina nkehe chrókjuich'era kixin chrók'uejorá jnkójina. Káin asánrá chrók'uejochonhénrá kixin tí nkehe sintakjtonhanrá Dios tíó tsi Ìnchéni Jesucristo.

¹⁴ Éxi ijnko xjan titekaon mé xikaha jnkójina chrók'uejorá jahará, chrókjuenkayáxinhyará éxi k'uejkayáxinrá senó naxa k'uechonhyará Dios.

¹⁵ Náhi. Jnkójina tjóá chrók'uejorá kixin Dios k'uyáhará la mé jina ch'án la ko tjóá ch'án.

¹⁶ Kixin ntáchro xroon itén Dios kixin: "Jahará chrók'uejorá tjóá kixin janhan na mé ijnko nkexro tjóá."*

¹⁷ Tí ntáchrorá jahará kixin It'ará mé Dios la ko ó nohará kixin jehe ch'án sinchekitoexin ch'án ijje jnkójnko chojni, kixin t'ikon kixin jnkokón sínkí jnkójnko chojni, a ntá jahará chrórxáinkáonrá ch'án jnkochrín tí naxa tjejochónrá ntili chjasintajni.

¹⁸ Dios mé kjuíntakaará ch'án kixin chrók'uejohyará éxi k'uekéjé tí sín tsik'axrenixínrá. Jahará ó nohará jina kixin tí nkehe k'uínáxinrá tsaáxinrá jehya ijnko nkehe chrók'uejé éxi chica oro o chica plata.

* 1:16 Levítico 11.44

¹⁹ Náhí. Ná mé k'uínáxinrá ijnié Jesucristo imá tjete. Jehé ch'an mé k'óyán sín la k'uáyéhe Dios éxi ijnko kolélo ninkehó xéhya va.

²⁰ Kíxin Cristo mé ósé tsíkónoxín ch'an tí naxá k'ónahya chjasintajni. Kjánchó jehya tuénxín kónhen tíha hasta tí chr'éxin ntá kónoxín ch'an kíxin jína chrók'uejoxínrá tí jahará.

²¹ Ntá xíkaha kónhen Cristo a ntá jie jahará la kuítekáonrá Dios, mé tí nkexro kjuínchexechón Cristo la ko kjuikosáyehe ch'an. Mé xíkaha jahará tinkachónkirá Dios la ko tjejochonhénrá sintakaará ch'an.

²² A ntá jie ó kuítekáonrá tí tan chaxín ntoá kíxin tjinkitsará Nchakuèn Dios. Tíha mé kótjuáxin asánrá kíxin ntá tsotjuèhérá kichuárá. Mé xíkaha chrótjuèhérá kichuárá kaín asánrá.

²³ Méxra jahará kokjihará nixin, jehya kíxin naxá chrók'uaxrjeníxinrá it'ará chjasintajni ntiho ts'itjáyan. Náhí. Kokjiaxinrá itén Dios itjen jnkochrixin.

²⁴ Kíxin ntáchro xroon itén Dios kíxin:
Kaín chojni chjasintajni tóyóhe kayoa ó,
a ntá tí kjuachaxín chóna la tóyóhe itsjo t'óna kayoa.
Tí ka la tsoxámá a ntá tí tsjo la ts'anótjen

²⁵ a ntá tí tan kuènte Ìnchéni la tsjak'e jnkochrixin.†
Tí tan í mé tsaáxinni la kuinhínrá tí jahará.

2

¹ Méxra tjtóhérá kaín nkehe jínahya, la ko kaín kjuach'ia, la ko tí ntoáhya tjenkayáxinrá, la ko tí kjuachjinoxínhin, la ko tí xrikoará kaín xín kjuach'ia.

² Chrók'uejorá éxi chánjan na ntá tsíkókjilhi la itsjen ó chrók'ui, mé xíkaha jahará chrók'uejorá itén Dios, tíha mé chrókónohará la chrók'uánkixin kjuaxrexinkaon kuéntará kíxin chrókuaáxinrá,

³ tí chaxín kjuátsoganrá kíxin Ìnchéni la jína.

Cristo mé tí xro tjechón

⁴ Chrókóchjineherá Ìnchéni, mé jehé ch'an me éxi tí xro tjechón. A ntá tí chojni la kuítekakonhya tí xro a, a ntá Dios la kjueyá ch'an tí xro a imá tjete sínkí.

⁵ Mé xíkaha Dios kjuich'énará tí jahará éxi xro tjechón la Dios chrók'uejorá ch'an tí jahará jnkokoá nínko kuènte ch'an, la mé ts'ónará nchát'á tsíkjinchetjóá Dios, a ntá chrók'uejorá ch'an tí nkehe tóxrjínhin ch'an kíxin tinkachónkirá Jesucristo.

⁶ Mé xíkaha kjaxin xroon itén Dios ntáchro kíxin:
Tsjaké chjasin Jerusalén ijnko xro t'etqan ts'óna nchia, ijnko xro tsíkónoxín imá tjete sínkí
a ntá tí sín tsitekaon tí jehé ch'an mé tsoxuehya sín.*

⁷ A ntá jahará ttekáonrá tí xro kíxin imá tjete. A ntá tí sín kuítekakonhya, la mé tsoxiteyá éxi ntáchro xroon itén Dios kíxin:

Tí xro náxrjónhya kuítqenta tí sín ch'éna tjat'o,
mé ijie mé k'óna tí xro tjejoan.†

⁸ La ko kjaxin tsoxiteyá tí nkehe ntáchro xroon itén Dios kíxin:

Tí xro mé tsóténkixín sín la mé tíha ijnko tjo tsjitsínkaxín sín.‡

Kjánchó jehé sín kóténkixín sín tí xro kíxin kuítekakonhya sín tí itén Dios mé xráxin tsíkjtqenxín sín xíkaha tsohnen sín.

Tí sín tinkáchónki Dios

⁹ A ntá jahará tsík'axrjeníxinrá tí sín tsíkjejá Dios la ko tsík'ónará nchát'á ch'eherá xra tí rey, la ko tsík'ónará ijnko nación tjóá, la ko tsík'ónará ijnko chjasin kuènte Dios kíxin ntá tsochronkará tí xra náxrjón kuènte Dios. K'uíyáhará ch'an kíxin ts'axrjéxinrá tí sítié ntá ts'ixenhénrá tí síin xrohi náxrjón t'inkaséyan kuènte ch'an.

¹⁰ A ntá jahará tí ósé la jehya chjasén Dios, a ntá jie la tsík'ónará chjasén ch'an. Tí ósé la Dios k'uékikonóahyará. A ntá jie la kuikonóahyará Dios.

Chrók'uejóni ch'eheni xra Dios

¹¹ Kichóni, xrjanóahará tí jahará kíxin éxi chojni tsíkjixín ókjé chrók'uejorá ntihi chjasintajni chrók'uejorá kjuachaxín chrókóxrjínhin asánrá tí nkehe síin chjasintajni, mé tí nkehe tjanjonko asánrá.

¹² Jína chrók'uejorá tí síin tí sín chónhya Dios kíxin kjónté t'antaxínhanrá sín éxi chojni jínahya chóna jie tí jahará, ichro sín, la ntá tí chrók'uikon sín kíxin jína tjejoch'erá xra ntá tsjanchehe sín Dios kjuasáya tsjixraká tí yqon tsjanchia ch'an nkehe tí xra kjuich'erá.

† 1:25 1.24-25 Isaías 40.6-8

* 2:6 Isías 28.16

† 2:7 Salmo 118.22

‡ 2:8 Isaías 8.14

¹³ Jahará tinkachónkirá Ìnchéni chrókjuinche xiteyéhérá kaín tí sín t'etqan kuènte chjasintajni, á tí ch'in rey kixin imá t'etqan ch'án,

¹⁴ o á tí ch'in gobernador ichr'án Dios kixin sinche kjasóte ch'án tí sín tjasin jie, a ntá tsjikosáyehe ch'án tí sín ch'e tí nkehe jina.

¹⁵ Dios tjinkaon kixin jina chrók'uejorá kixin tí sín noehya la ko tí sín lqntj la kohya jie ts'ekará sín tí jahará.

¹⁶ Chrók'uejorá éxi chojni t'tituenhya, a ntá tí kjuachaxin chontará jehya kixin chróchontaxinrá kjuachaxin kixin chrókjuich'erá tí jínahya. Náhí. Chrókjuakoxinrá éxi chojni ch'ehe Dios xra.

¹⁷ Chrókjuikosáyehe káin chojni. Chrótjuéhérá tí sín kichó ni, la ko chróchonteherá Dios kjuasáya, la ko chrókjuikosáyehe káin chojni. Chrótjuéhérá tí ch'in gobiernu t'etqan.

Tóyóexin éxi tí nkehe kjuasótéxin Cristo

¹⁸ Jahará chojni ch'exón xra, chrókjuinche xiteyéhérá tí lámgará, chróchonteherá kjuasáye sín, kjónté tí sín jina la o tí sín jínahya.

¹⁹ Tíha mé ijnko nkehe jina chrókjuakoxinrá kjónté chrókjuasótiaxinrá ijnko nkehe jínahya kixin xikaha mé chrókjuinche xiteyéhérá Dios.

²⁰ A ntá tí tjejoch'erá ichrén nkehe jínahya, ntá nche kjasótiaxinrá sín la ÷nkehe tsonhen kixin chrókóninkákonhyará? A ntá tí chrókjuasótiaxinrá ijnko nkehe jina la ntá chrókjuachará chrókóninkákonhyará, la tíha mé tóxrjínjin Dios.

²¹ Méxra xikaha k'uíyahará Dios kixin Cristo kjuasótéyákonhánrá. Tíha mé kjuakoxin ch'án kixin mé xikaha chrókjuich'erá.

²² Kixin Cristo la ninkehó jie kjuasinhya ch'án la ko ninke xro kjuich'yehya ch'án,

²³ la ko ninkehó kjuatéehya ch'án tió k'uántaxinjin sín ch'án; a ntá tió kjuínche kjasóte sín ch'án la ninkehó k'ókjanxinhya ch'án. Náhí. Jehé ch'án kjuanchia ch'án kixin Dios ts'ayakonhen tí jehe ch'án kixin Dios mé ntoá nche kitóexin ijje chojni.

²⁴ Cristo mé kuamá ch'án tí ijéni kixin tí cuérpóe ch'án kjuák'enkání ntacruz kixin éxi tsík'enni k'uék'ejóni kixin tí jie k'uéchóntani, a ntá jie chrók'uejóni jnkójina. Kixin Cristo kjuasóte ch'án, chrít'ó ch'án kixin jahará chrókuitóaxinrá jina.

²⁵ A ntá jahará k'uék'ejorá éxi kolélo tsíkjichroe. A ntá jie k'uitjará tí nkexro ts'ayakonhen asánrá.

3

Nkexrí chrók'uejó tí sín tsikótéhe

¹ Kjaxin jahará chojni chjin ó tsikótahará chrókuitekákónhénrá tí xiýará, kixin kjaxin jnkójin tí sín titekakonhya itén Dios chrókuitekaon sín kixin jina tjen tí tjachjin, kjónté t'ichjánxinhya chróchrónka tjan kixin jina tjen tjan,

² kixin chrók'uiikon sín xikaha kixin jina tjen tí tjachjin chóna kjuasáye tjan.

³ Chrókjuinchehnkexinhyará nkehe náxrjón chróchontará la ko tí nkehe náxrjón chróchóna kaxihará la ko nkehe náxrjón tsík'óna chica oro la ko tí ikará imá náxrjón.

⁴ Náhí. Chrókjuinchejinará asánrá, kixin tí nkehe náxrjón chrók'uitjáyanyha na mé tí asén chojni tójeehya la ko náxrjón. Tíha mé imá sínkí nkayakon Dios.

⁵ A ntá tí ósé xikaha k'uékjenkayáxin tí chojni chjin jina. Jehé sín mé kuinkáchónki sín Dios la ko kjuínche xiteyéhe sín xii sín.

⁶ Mé xikaha kjuich'e tjan Sara kjuínche xiteyéhe tjan tí ch'in Abraham, mé kjaxin ntá chro tjan kixin inché tjan tí jehe ch'án. A ntá tí jahará tí jjeen tí jehe tjan la chrókjuinche xiteyará jina la ko ninkehó kjuachrakon chróchontahará.

⁷ Kjaxin jahará chojni ntoará tsikótahará chróchonteherá ichjiánrá kjuasáya kixin ó nohará kixin kánhyó tsehe tjan la ko ó nohará kixin yóirá tjáhará Dios tí kjuachón. Xikaha chrókjuich'erá ntá tió chrónixjehérá Dios la kohya nkehe chrók'uinkákonhen.

Tí sín tjasótéxin sín kixin jina kjuich'e sín

⁸ Méxra, jnkokóá chrókjuenkayáxinrá káin rá chrókjuikonóehérá kichuárá, chrótjuéhérá kichuárá. Jnkójina chrónixjehérá kichuárá la chrókjuinchehnkexinhyará asánrá.

⁹ Tí ichrén nkehe jínahya chrókjuít'ahará sín la jahará la xikahya chrókjuich'ehérá sín. Tí chrók'uántaxinhanrá sín la jahará chrók'uantaxienhyará sín. Náhí. Íchá jina chrókjuancheherá Dios kixin chrókjuincheyaon ch'án sín kixin Dios la k'uíyahará ch'án kixin chrók'uayéhérá kjuachaxin kuènte ch'án.

¹⁰ Kixin:

Tí nkexro tjinkaon tsotjuéhe asén kixin jina chrókjuak'e káin yaon la chrónixjahya ch'án ninkehó nkehe jínahya la ko ninkehó kjuach'ia chrók'uaxrxjéninhyha ir'va ch'án.

11 Tí nkexro la chrókuítøhe tí nkehe jínahya la íchá jína chrókuich'e tí nkehe jína, la ko íchá jína chrókjuéyá ch'án kjuaxróxin chrókjuak'e ch'án.

12 Kíxin Ìnchéni t'ayakonhen tí nkexro jína la ko tinhin ch'án tí nixjehe sín ch'án,

á ntá tí sín ch'e tí jínahya la tjinkítsahya ch'án.*

¹³ Xá nkexro chrókjuuit'ahará nkehe jínahya tí jahará tjeoch'erá nkehe jína?

14 Kjonté chrókjuasótexínrá tí nkehe jína tjeoch'erá kjonté la chrókócháhará chróchrakuenhyará nínkexró la ko chróchrakonhyará.

15 Náhi. Íchá jína chrókuíkosáyehérá Cristo nkaya asánrá kíxin Ìnchárá. Chrók'uejorá listo chrókjuáteherá tí nkehe chrókjuanchankíhará kaín chojni kíxin nkexrí tinkachónkirá Ìnchéni, la chrókjuínchehnkehyará la kjuasáya chrókjuáteherá.

16 Chróchontará ijnko kjuaxrexinkaon jína kíxin ntá tí sín xrich'ia sín t'ántaxínhanrá sín kjonté jína tjejorá tinkachónkirá Cristo la mé chrókósuèhe sín kíxin tí nkehe ntáchro sín la ntoáya.

17 Íchá jína chrókjuasótiaxínrá kíxin tí jína tjeoch'erá tí xíkaha tjinkaon Dios, á ntá chrókósuáhará chrókjuasótiaxínrá tí ichrén jìe chrókjuich'erá.

18 Kíxin Cristo kjuasóte ch'án la ko k'ueñxin ch'án tí jìe kuènteni, ónaá k'ueñ ch'án kíxin para jnkochrín. Jehe ch'án la jína ch'án la kjuasóteyákonhenni ch'án kjonté jínahyani, kíxin ntá jína sáchrókjuíkoni ch'án tí tjen Dios. Á ntá ik'ueñ ch'án éxi chojni, á ntá Nchakuen ch'án la k'ueñhya mé xechón inaá,

¹⁹ Kíxin tí Nchakuen ch'án sákjuíkakohe tí nchakuen tí sín tsík'en tjejóhjna.

20 Tí sín a mé kuítekakonhya sín tí ósé tíó kjuák'e ch'ín Noé na mé Dios la kónínkakonhya ch'án kjuák'echónhen ch'án nachrohe sí'tóna tí arca, na mé ijníkóá chojni kuítekaon sín mé kuaá sín tí kuítøe sín ntá.

21 Tí ntá a mé tóyóhe tí tikitéxin chojni ijie kíxin tí xíkaha tsonhenni la tsaáxinni ijie. Á ntá tí tikite chojni la jehya kíxin tsotjuáxin tí cuerpo. Náhi. Tsjancheheni Dios kíxin sinchetjóá ch'án tí tjenkayáxinni. Á ntá tí nkehe tsaáxinni la mé tí xechón Ìnchéni Jesucristo,

22 mé tí nkexro sátsíkji nkaya nkajni itjen ch'án itja chjina Dios. Á ntá jehe ch'án la mé t'etuenhen tí sín ángel la ko tí sín t'etøan.

4

Chrókuich'eheni Dios xra éxi tí kjuachaxin kjuanjon ch'án

1 Méxra éxi Cristo kjuasóte tí cuérpøe ch'án ntá kjaxínrá kjonté xíkaha chrókjuasóterá chrókóxakuanhyará kíxin tí nkexro kjuasóte tí cuérpøe la ó kuítøhe tí jìe.

2 Á ntá tí naça chrók'uejochónrá intsí la chrók'uejorá éxi tóxrjínhjn Dios. Jehya éxi k'uekóxrjínhanrá.

3 Á ntá tí ósé nchónhya nkehe k'uekjich'erá éxi ch'e tí sín naça chónhya Dios. K'uek'ejorá k'uekjenkayáxínrá tí nkehe jínahya la ko k'uekjásínrá jìe k'uechontará ókjé chojni chjn la ko k'uekókoanrá la k'uekjásínrá kia ntá ntiha kjuánjonxin chojni la ko k'uekinkachónkirá tí nkehe tsíkjanøya.

4 Á ntá ijie la jahará t'itohyará tí sín a kíxin tí jínahya ch'e sín. Méxra xíkaha t'ántaxínhanrá sín.

5 Á ntá tí jehe sín tsjanjon sín kuentá tsochénta sín tí nkexro tjechónhen sinchekitøexín ijìe tí sín tjejóhón la ko tí sín tsík'en.

6 Méxra kjonté tí sín tsík'en tsíxrákøhe sín tí itén Dios kíxin tí nchakuen sín chrók'uejé éxi tjinkaon Dios kjonté naça k'uejé sín ntihi chjasintajni la kuítøexín tí ijìe sín éxi tsitøexín ijìe kaín chojni.

7 Ó kuichjina tsjeje chjasintajni á ntá xíkaha chrók'uejorá jnkójina la ko chrók'uejotsjehérá chrónixjehérá Dios.

8 Tí nkehe imá tjeøan kíxin antsí chrótuèhérá kíchuárá. Á ntá tí tjuèhérá kíchuárá la mé tíha chrók'uitjáyanxín tí nchónhya jìe chontehérá kíchuárá.

9 Chrókjuánjonrá kjuachaxin chrókuiítøhe jnkójín kíchuárá ntøará chrókónínkákuénhyará nijnko tí jehe sín.

10 Jnkójnkorá nkehe tí xra tjáhará Dios k'uayéhérá chrókjuínkitsará kíchuárá. Xíkaha jína chrókjuákøxínrá tí kjuasáyé ch'án tjáhará ch'án kíxin nchónhya xra k'uayéhérá.

11 Tí jnkójnra tjínkáonrá chrónixjará ichrén nkehe la chrónixjará éxi nixja itén Dios. Tí jnkójnra tjínkáonrá chrókjuínkitsará la chrókjuákøxínrá tí kjuachaxin tjáhará Dios. Kaín tí xra chrókjuich'erá chrókjuanchehérá Dios kjuasáya kíxin kjuasáyé Jesucristo tinkachónkirá tí

* 3:12 3.10-12 Salmo 34.12-16

jehe ch'án. Kíxin jehe ch'án la kaín tí kjuachaxin síin la kuènte ch'án jnkochrín. Mé xíkaha chaxín. Amén.

Íchá jína chrókjuasótexínni kíxin tí tinkáchónkini Cristo

¹² Kíchóni, chrókókakuanhará kjónté ichrén nkehe jínahya chrókónhanrá. Ó jehi t'ichjánxin xíkaha tsonhanrá. Chróntáchrohyará kíxin ókjé nkehe tjasótiaxínrá.

¹³ Náhi. Íchá jína chrókócháhará kíxin xíkaha chrókjuasóterá éxi kjuasótexín Cristo, kíxin kjaxinrá tsocháhará imá tió ts'ikonrá tí kjuachaxin tsíkao Ínchéni tí itsi ch'án.

¹⁴ Chrokócháhará tí t'ántaxínhanrá sín kíxin tinkachónkirá Cristo kíxin tí Nchakuen Dios chóna kjuachaxin t'ayakonhanrá. Jehe sín t'ántaxínhin sín ch'an, a ntá jahará tjikosáyehérá ch'án.

¹⁵ A ntá tí jnkojínrá tjetotjasóterá chrókójehya kíxin ichrén nkehe chrókjuich'erá chrókjuàyará o chrókuegerá o ichrén nkehe jínahya chrókjuich'erá o chrókjiatérá kjuanínkaon kuènte ókjé chojni.

¹⁶ Náhi. A ntá jnkojínrá chrókjuasótiaxínrá kíxin tinkachónkirá Cristo la chrókósuàhyará. Náhi. Chrókjuanchehérá Dios kjuasáya kíxin xíkaha kónhanrá.

¹⁷ Ntá jie ó kui tí tsitqexín ijíé chojni mé xrankíxixín tí sín tsík'óna xjeen Dios. A ntá tí xíkaha tsitqexín ijíé tí jeheni xrankíxixín, a ntá íchá tí ó tsjixixín tí sín titekakonhya tí itén Dios.

¹⁸ Íchá tí sín jína la ko xíkaha tsonhen sín ntá tsaá sín a ntá íchá tí sín jínahya chóna jie kjá antsi tsjasóte sín.*

¹⁹ A ntá tí nkexro tjasóte éxi tjinkaon Dios la kjónté xíkaha la naxa chrókjuich'e sín nkehe jína la ko chrókjuanjón sín asén sín chrók'uayakonhen Dios mé tí nkexro kjuich'éna sín la mé jehe ch'án xráxin jína ch'án.

5

Tí k'úituenhen tí sín t'etoan kuènte njnko

¹ Tjinkávan tétuanhan tí chojni t'etoan kuènte tí njnko tjejerá ntiha kíxin kjaxin janhan tétuan kuènte njnko éxi tí jehe sín, a ntá janhan mé k'uikuán kíxin nkexrí kjuasóte Cristo, la ko kjaxin janhan mé tsochonta kjuachaxin kuènte Dios éxi tsochóna tí jehe sín tió itsi Ínchéni chr'éxin.

² Jahará chrók'uayakonhénrá tí kolélo kuènte Dios ntiha kíxin xíkaha tí xra k'uayéhérá. Jnkojína chrókjuínksará sín éxi tjinkaon Dios la jehya kíxin ijnko chojni chrók'uetuanhanrá chrókjuich'erá xra, la ko kjaxin jehya kíxin imá chrókóxrjínhanrá chichaon. Náhi. Kaín asánrá chrókjuich'erá xra jína.

³ Jehya jahará kuèntará tí jehe sín kíxin chjini chrókuétueghénrá sín. Náhi. Jnkojína chrókjuákoéxínrá tí jehe sín.

⁴ A ntá tió tsi tí Pastor chaxín t'etoan ntá jahará ts'ayéhérá ijnko corona náxrjón tsjehehya.

⁵ Kjaxin jahará ntasoará chrókjuínchexiteyéhérá tí sín t'etoan kuènte njnko. Kaínrá chrókjuínchexiteyéhérá kíchuará chrókjuínchehnkehyará kíxin:

Dios la tsonínkakohenen tí sín nchehnke,

a ntá tí sín nchehnkehya mé tsjinkítsa ch'án.*

⁶ Méxra chrókjuínchehnkehyará, chrókjuínchexiteyéhérá Dios kíxin jehe ch'án imá ts'etoan ch'án kíxin tsjixraká tí yaon mé jehe ch'án tsojtáhará ch'án kjuachaxin kíxin tsétoanrá.

⁷ Chróchjehérá Dios kaín tí kjuaxrexinkaon chontará kíxin kjaxin jehe ch'án tóxakonhen ch'án tí jahará.

⁸ Chrókóxakonhanrá jína chrók'uejorá. A ntá ijie ixri tí nkexro núnkakohanrá mé tí ch'ín Tsochren éxi ijnko koxra tsjánka va xritjeyá va nkehe sine va.

⁹ Tjánjonhyará kjuachaxin kíxin jehe ch'án chrókjuacha ch'án chrókjuachroerá ch'án, kíxin ó nohará kíxin kaín tí sín kíchuará nkuíxín chjasintajni xíkaha tjetóttjasóte sín kíxin tinkáchónki sín Ínchéni.

¹⁰ Kjánchó kánhyó sé tsjasótiará, a ntá Dios antsi tsjinkítsará ch'án kíxin tsjachará ts'ejorá jína. A ntá jehe Dios a mé tjuahará ch'án la k'uíyáhará ch'án kíxin ts'ejokoará ch'án jnkokóá tí tjen Jesucristo chóna kjuachaxin jnkochrín.

¹¹ Jehe ch'án tsjancheheni ch'án kjuasáya kíxin chóna ch'án kjuachaxin ts'etoan ch'án jnkochrín. Amén.

Kjuixixín nixja ch'in Pedro

* 4:18 Proverbios 11.31 * 5:5 Proverbios 3.34

¹² Ch'in Silvano mé t'íkuañ ijnko kichó ni jína mé kjuínkítsa ikjinni tí xroon kjónté kánhyó tsjé nixja, la ntaxraxinkáonrá kixin kjuíntayaonrá Dios ntá xíkaha kjuakoxin ch'án kixin chaxin tjuahará ch'án. Méxra xíkaha jína chrók'uejorá kixin tjuahará ch'án.

¹³ Tí nínko tjen Babilonia mé tsíkjeýá Dios éxí tsíkjeýá ch'án tí jahará nixjohará sín la ko kjaxin nixjohará ch'in Marcos, mé éxí xjanna t'íkuañ tí jehe ch'án.

¹⁴ Nixjehérá kichuára jnkojína. Kjuaxróxin chrók'uejorá tinkachónkirá Jesucristo. Amén.

Xroon yóxin tsíkjin ch'ín Pedro

Ch'ín Pedro chr'énnen ch'án tí xroon tí sín tinkáchónki Cristo

¹ Janhan Simón Pedro, na mé t'ahā xrā Jesucristo. Ikjian tí xroon ts'ayéhérá jahará ó tinkachónkirá Ìnchéni éxi tinkáchónkini jeheni kixin Dios la ko Jesucristo tí nkexro sinchekaáni na mé jina ch'án.

² Sintayaonrá Dios la ko ąntsí ts'ayéhérá kjuaxróxin kixin ó nohará nkexrí tjen Dios la ko Ìnchéni Jesús.

Jina chrók'uejó tí sín tinkáchónki Jesús

³ Dios kjuanjon kjuachaxin tsochóntani kaín nkehe t'ichjánxinhinni kixin chrók'uejóni jina chrórxaxinkaonni tí jehe ch'án. Kixin ó noheni nkexrí tjen tí nkexro k'uíyeheni kixin tí kjuachaxin jié chóna ch'án la ko tí xrā imá jié kjuich'e ch'án.

⁴ Mé xíkaha kjuanjon ch'án kaín xín tí nkehe a, táha la mé imá jié la ko imá tjete sínkí. Mé xíkaha kjuakoxin ch'án kixin chrók'uayéhérá kjuachaxin chrók'uejorá éxi tjinkaon ch'án la ko chrókujtohérá tí nkehe jínahya kixin chrók'uitjāyanxínhyará tí nkehe k'uékjenkayáxinrá siin chjasintajni.

⁵ A ntá jahará tinkachónkirá Ìnchéni la kjaxin chrókjuéyará kixin chrók'uejorá jnkojína; a ntá tí jina tjejorá ntá chrókjuachará ąntsí chrókónohará;

⁶ a ntá tí kónohará ntá chrókjuachará chrókjuenkayáxinrá jina; a ntá tí tjenkayáxinrá jina ntá chrókjuachará chrókóninkákonhyará tjoka; a ntá tí tóninkákonhyará ntá chrókjuachará chaxin xráxinkáonrá Dios;

⁷ a ntá tí chaxin xráxinkáonrá Dios ntá chrókjuachará chrórtjuèhérá kichuárá; a ntá tí tjuehérá kichuárá ntá chrókjuachará chrórtjuèhérá kaín chojni.

⁸ A ntá xíkaha tjejoch'erá tinká'ánki tí kjuaxrexinkaon kuéntará, ntá jehya kixin chónkó kuinkachónkirá Ìnchéni Jesucristo.

⁹ A ntá tí nkexro ch'ehya xíkaha la mé éxi ijnko chojni t'ikonhya o ijnko chojni t'ikonhya jina, kixin ó k'uitjāyehen kixin Ìnchéni ó kjuixin kjuínchetjóá tí jié k'uéchóna ósé.

¹⁰ Méxra xíkaha kichó ni jnkojína chrók'uejorá kixin ntá tsonohará jina kixin Dios tsíkjayará tí jahará la ko tsik'iyahará ch'án kixin xíkaha jina chrókjuenkayáxinrá, a ntá xitjahya chrókjuichroerá.

¹¹ A ntá xíkaha chrókuítekáonrá ntá tsotjāhará Dios kjuachaxin ts'ixenhenrá tí tjen Ìnchéni Jesucristo t'etqan ch'án jnkochrixin. Jehe ch'án mé tí nkexro kjuínchekaáni.

¹² Méxra titoahya ntáxráxinkáonrá kaín tí nkehe i, kjónté ó nohará tí nkehe ntoá kjuákoahará.

¹³ Ntáxrjan kixin jina tí naxā tjen chrókjuıntaxráxinkáonrá kaín tí nkehe a

¹⁴ kixin Ìnchéni Jesucristo kjuínchenóna kixin í séhya its'én janhan.

¹⁵ Na mé kaín tíha tjét'a kixin tió its'én, ntá jahará tsoxráxinkáonrá jnkochrixin kaín tí nkehe kjuít'a.

Tí sín k'uíkon tí kjuachaxin kuènte Cristo

¹⁶ Tí nkehe kjuákoaharáni kuènte tí kjuachaxin kuènte Ìnchéni Jesucristo la ko nkexrí itsi ch'án na mé jehya ijnko cuento kjuích'éna chojni chrókjuich'iyaxin. Náhí. Ikonni k'uíkonxinconi Ìnchéni la ko tí kjuachaxin kuènte ch'án.

¹⁷ K'uíkonni tíha tió It'éni Dios kjuikosáyehe ch'án tí Xjeen ch'án, la ntá kuínhinni nixja Dios tjen nkaya nkajni ntáchro ch'án kixin: “Tíhi mé xjanna tjuahā ch'án. Imá chàna kixin nchexiteyá ch'án éxi tjínkavan janhan,” ichro Dios.

¹⁸ Mé kuínhinni itén Dios kuixin nkaya nkajni kixin xíkaha ntáchro tió k'uejókoni Ìnchéni chrítaón tí jnā tjóá.

¹⁹ Mé xíkaha k'uéchrónka tí sín tsíkjin itén Dios ósé ntá noexinni kixin chaxin tsoxiteyá. A ntá jahará chrók'uejorá chrókuinhinrá jina nkehe k'uéntáchro sín kixin tí tan mé éxi ijnko xrohi t'inkaséyanxin tí sítié tsjixrakájia tí yaon ts'inkaséyan itsi tí konotsé t'inkaséyanxin tí nchítjen mé xíkaha ts'inkaséyanxin nkaya asánrá.

²⁰ A ntá tjetean chrókónohará tíhi: kixin ninkehó xroon itén Dios tsik'óna jehó chojni chrókjuacha chrókiexin.

²¹ Náhí. Tí sín k'uéchrónka itén Dios la nixjahya sín tí nkehe jehó sín chrókjuenkayáxin sín. Náhí. Tsíkjinchetjóá Dios tí jehe sín, a ntá Nchakuen Dios kjuínkítsa k'uénixja sín itén Dios.

2

Tí sín tjako kjuach'ia
(Judás 4-13)

¹ Kjaxin k'uek'ixin tí sín ntoáhya k'uechrónka itén Dios tí chjasin Israel, mé kjaxin xíkaha tí jie ts'ixin maestro sit'ayahará. Jehé sín tsochr'ákjenhen sín iso nkehe ntoáhya ts'itjáyaxín tí nkehe chaxín tsaáxinni la xíkaha sinchemá sín tí Ìnchéni chrókuaáxinni. Tíha mé tsjixin tsjasótéxin tí jehe sín.

² Nchónhya chojni tsochréhe sín tí nkehe jínahya ch'e sín. A ntá tí xíkaha ch'e sín la ts'ántaxinXín chojni tí ntjia ntoá kuente Ìnchéni.

³ Tsóxrjínhin sín tsochóna sín nchónhya chichaon, ntá tsjanchiáxinrá sín chichaon tí nkehe ntoáhya tsjakohará sín. A ntá tí nkehe ts'itjáyaxín sín tjechónhen la kohya nkerí tsaáxin tí jehe sín kixin ósé tjechónhen xíkaha tsonhen sín.

⁴ Dios la kjónté tí sín ángel kjuasin jie la kuikonóehya ch'án sín la k'uetóan ch'án kixin sátsji sín tsjasóte sín sátsjik'ikjehé sín tí sítié na tjejóchjina sín tsjixrakájia tí tsitóexín ijíé sín.

⁵ La ko kjaxin kuikonóehya Dios tí sín k'uejó chjasintajni ósé ntá ichr'án ch'án ntá kujtée tí sín jínahya, a ntá Dios kjuíncheakaá jehó tí ch'in Noé, na mé tí nkexro kjuako tí tan jina la ko kjuíncheakaá ch'án tí yato sín ó.*

⁶ Kjaxin Dios kjuínchek'itjáyán tí chjasin Sodoma la ko tí chjasin Gomorra iche hasta k'óna nteso, kixin chrókónohe chojni jínahya ts'ejó chr'éxin kixin xíkaha tsonhen sín.†

⁷ Kjánchó Dios kjuíncheakaá ch'án tí ch'in Lot kixin ijnko chojni jina tí jehe ch'án la ko imá kóxakohen ch'án tí k'uikon ch'án tí jie kjuasin tí sín jínahya.

⁸ Tí ch'in Lot mé jina asén ch'án mé k'uekjak'e ch'án tí sín tí sín jínahya ntá kaín yaon kóxakohen asén ch'án k'uikon ch'án la ko kuínhin ch'án tí nkehe jínahya k'uekjich'e sín.‡

⁹ A ntá Ìnchéni na sincheakaá ch'án tí sín kaín asén kuítekaon tí jehe ch'án kjónté nchónhya kónhen sín. A ntá tí sín jínahya la sinchekjasóte ch'án tí yaon tsitóexín ijíé chojni.

¹⁰ Dios antsí sinchekjasóte ch'án tí sín nchexiteyéhe tí nkehe jínahya ntáchro asén sín a ntá nchexiteyéha sín tí nkehe t'etóan Ìnchéni. Titekakohenya sín la ko chrakohenya sín chrók'uantaxínhin sín tí sín ángel chóna kjuachaxin.

¹¹ A ntá tí sín ángel imá tsehe sín la ko imá chóna sín kjuachaxin la kjónté tjinkakohenya ts'ántaxínhin tí sín a nkayakon Ìnchéni.

¹² A ntá tí chojni a la éxi yóhe iko tjenkayáxinhya ninkehó la nchexiteyéhe tí nkehe ntáchro asén, la kokjíhi kixin ts'óyan kichó ó. T'ántaxínhin sín tí nkehe tienxínhya sín, mé xíkaha its'en sín éxi its'en tí ko a.

¹³ Tíha mé tsjasótéxin sín kixin jehe sín kjuínchekjasóte í so chojni. Xráxín tóxrjínhin sín ich'e sín tí nkehe ntáchro asén sín. Ijnko kjuatósuehe kixin tjejontaxín sín ntekoará sín tí kia chontará la kjónté tí xíkaha la naxa tjasin sín jie.

¹⁴ Kohya nijnko chojni chjin chrokjuasinkohya sín jie. Tóxrjéhya sín tjasin sín jie tsjasótéxin sín.

¹⁵ Kuítóhe sín tí ntjia ntoá ntá chréhe sín ntjia kuente ch'in Balaam xjeen ch'in Beor, kixin kóxrjínhin ch'án chrókjuacha ch'án nchónhya chichaon tí nkehe jínahya chrókjuich'e ch'án.

¹⁶ A ntá t'ichjánxin tsjasóte ch'án kixin tí jie kjuasin ch'án. A ntá ijnko kolócho chjin xitjahya nixja la xrinahya nixja itén chojni la kjuentuéhe tí ch'in Balaam kixin tí jie chóna ch'án ntá kuítóhe ch'án tí nkehe jínahya chrókjuich'e ch'án.§

¹⁷ Tí chojni tjako mé éxi yóhe tóye tjáhya ntá la ko éxi tjuj tjakáko xrjnto ó; ó kjuixin k'uituenhen sín sátsji sín tí imá sítié tsjasóte sín jnkochríxín.

¹⁸ Kaín nkehe jínahya nixja sín, a ntá tí jie tjasin sín tóxrjínhin sín chojni chjin ókjé ntá tjachroexín sín tí sín na ntá tjinkaon chrókuítóhe sín tí jie.

¹⁹ Chrónka sín kixin kaín nkehe jínahya la jina, kixin jehe sín nchexiteyéhe sín tí nkehe jínahya ntoáhya; kixin jnkojnko chojni mé nchexiteyéhe tí nkehe kjuacha k'uetuénhen sín.

²⁰ A ntá tí nkexro ó chóxin Ìnchéni Jesucristo tsaáxinni mé kuítóhe sín tí nkehe chrók'uitjáyaxín sín kuente chjasintajni. A ntá chr'éxin tí chrókuakja sín ntjia jínahya inaá tí chrókjuacha tí jínahya chrókjuachroe sín, a ntá antsí má jínahya chrókónhen tí jehe sín.

²¹ Íchá jina chrókónoehya sín tí ntjia joan. A ntá jehya jina tí ó nohe sín ntá tsitóhe sín tí nkehe k'uetóan Dios kuínhin sín.

²² A ntá tí jehe sín kjuínchexiteyá sín éxi ntáchro tí proverbio kixin: “Tí konja t'ókjan ntá xíkjan xíkjine inaá,* la ko tí cochíno na ntá tsík'ónti tjóá ntá xíkjan kjiankí tí nchet'o kjíta.”

* 2:5 Génesis 6.1-7.24; 8.18 † 2:6 Génesis 19.24 ‡ 2:8 2.7-8 Génesis 19.1-16, 29 § 2:16 Números 22.35-46 * 2:22 Proverbios 26.11

3

Tiô tsi Ìnchéni

¹ Kíchóni tjuahará tíhi la xroon yóxin ikjian ts'ayéherá. Yóí tí xroon a ntaxrâxinkáonrá kixin jina chrókjuenkayáxinrá.

² Chrórxâxinkáonrá tí nkehe tsíchronka tí sín k'uéchronka itén Dios ósé la ko tí nkehe k'uetóan Ìnchéni, mé tí nkexro tsaáxinni, kjuakohará tí sín kjueyá ch'án.

³ Tjetoan chrókónohará tíhi kixin tí yaon tsjixixín la itsi chojni tsjanoá tí tan jina kuénte Ìnchéni, la sinchexiteyéhe sín kaín nkehe jinahya ntáchro asén sín.

⁴ Tsjanchankí sín nkehe kónhen tí nkehe tsintáchro Cristo kixin tsokjan ch'án, kixin desde ik'uén tí sín tsik'axrjenixinni k'uéjé ósé la xikahó naxá sitónhen éxí tió k'óna chjasintajni.

⁵ Tí sín a titekakonhya sín kixin ósé k'uénixja Dios ntá k'óna nkajni la ko chjasintajni na mé kjuin tí ntá ntá kuítqhe nonte xámá.

⁶ A ntá tí ntá k'uitjâyanxín chjasintajni inaá.

⁷ A ntá tí nkajni la ko tí chjasintajni naxá tjejó jie tjejóchónhen tsoche kixin xikaha k'uetóan Dios kixin xrohi tsochexín tí yaon tsjixixín tsitogexín ijie chojni la ko kaín tí sín jinahya tsjasóte sín.

⁸ A ntá kíchó ni, chrók'uitjâyanhyará kixin Ìnchéni tí ijnko yaon t'ikon ch'án éxí mil nánó la ko mil nánó t'ikon ch'án éxí ijnko yaon ó.*

⁹ Ntá Ìnchéni í séhya sinchexiteyá ch'án tí nkehe tsintáchro ch'án la jehya éxí tjenkayáxin í so chojni kixin ó má sé tjejóchónhen sín. Náhí. Jehí tjechónhen ch'án kixin ninkexró chrók'uitjâyanhya kixin tjinkaon ch'án kixin kaín chojni chrókjan sín chrókuinkáchónki sín Dios.

¹⁰ A ntá tí yaon tsokjan Ìnchéni mé tsí éxí xíchge itsi tí tie. A ntá tí nkajni ts'itjâyan, la mé nchónhya kjuachrakon ts'ixikónhen ts'ixikóvékjan. A ntá kaín nkehe sínkáni nkajni na mé ts'itjâyan tsoche, la ko tí chjasintajni tsoche la ko kaín nkehe síni.

¹¹ A ntá tí xikaha kaín nkehe ts'itjâyan, a ntá jahará la jina chrók'uejorá chrórxâxinkáonrá Dios.

¹² Chrók'uejochonhénrá tí yaon itsi Dios chrókóxakonhanrá chrókjuich'erá xra kixin ntá tjoka chrókui Ìnchéni. A ntá tí yaon tsjixixín mé ts'itjâyan nkajni tsoche, la ko kaín nkehe tsóxika ts'itjâyan kixin imá tsosóa.

¹³ A ntá jeheni tjejóchónhenni nkajni nixin la ko chjasintajni nixin éxí tsintáchro Dios kixin tsjanjon ch'án. A ntá ntiha la mé imá náxrjón la ko kjuaxróxin ts'ixín tí chojni jina.

¹⁴ Méxra xikaha kíchó ni, nachrohe tjejochonhénrá kixin itsi tí yaon tsonhen xikaha la kaín asánrá chrókjuéyará jnkojina chrók'uejorá kixin ts'ikon Dios kixin kjuaxróxin tjejorá chontahyará jie.

¹⁵ Chrókónohará kixin naxá tjechónhen Ìnchéni, tjokahya itsi ch'án kixin í so chojni naxá chrókuiteakon sín ch'án. Kjaxin xikaha tsíkjin tí kíchó ni Pablo tí xroon chr'ánhanrá ch'án éxí tí kjuachaxién Dios tsík'áyéhe ch'án chrónka xikaha.

¹⁶ Jnkojnko tí xroon tsíkjin ch'án nixja xikaha la imá xra chrókiénxín chojni. A ntá tí sín noehya la ko tí sín kánhyó tinkáchónki Ìnchéni ntá tienxínhya sín la ntá ntoáhya tjako sín nkexrí t'axrxéjin tí nixja tí xroon tsíkjin ch'án la ko kjaxin ntoáhya tjako sín í so nkehe nixja xroon itén Dios. Ntá xikaha jehó sín tjejá sín nkehe ts'itjâyanxín sín.

¹⁷ Méxra kíchó ni, ó nohará tí nkehe senó, ntá chrókóxakonhanrá kixin chrókjuachruèhyará tí kjuach'ia xriko tí sín jinahya ntá chrókuitqhérá tí nkehe jina ntoá tinkachónkirá.

¹⁸ Íchá jina antsí má chróchoxinrá Ìnchéni Jesucristo, mé tí nkexro sinchekaáni la ko antsí chrók'uáánkí tí kjuachaxién ch'án chróchontará. Méxra tsjikosáyhéni ch'án ijie la ko jnkochríxín. Amén. Ó tjen.

* 3:8 Salmo 90.4

Tí xroon saoxín tsíkjin ch'ín Juan

Tí tan tjanjon kjuachón

¹ Ikjinni tí xroon í ts'ayéherá kixin tsonohará kuènte tí nkexro xráxín kjuák'e tí naxa t'ónahya chjasintajni, mé tí nkexro kuínhinni nixja la ko tí nkexro k'uikoxín konni. Kixin tí nkexro mé k'uikonni la ko tí nkexro kuákoxín tjani, mé tí nkexro nixja tí tan tsjanjon kjuachón.

² Kjuakoxín ch'án nkexrí kjuák'e ch'án, a ntá kaín tí jeheni k'uikonni ch'án, mé xíkaha chrónkaxínni nkexrí kjuák'e ch'án; a ntá tjakuexinni tí jahará nkexrí tjen tí kjuachón jnkochrín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni.

³ Chrónkaxínni tí nkehe k'uikonni la ko tí nkehe kuínhinni, kixin kjaxínrá jnkokoá chrókuinkachónkirá éxí tinkáchónkini tí jeheni, éxí tí jeheni jnkokoá tinkáchónkini It'eni Dios la ko tí Xjeen ch'án Jesucristo.

⁴ Mé xíkaha ikjinni tí nkehe í, kixin chrókjuintaxín chrókócháhará la ko chrókóchéni.

Dios mé tí xrohi

⁵ Tí tan í mé Ínchéni Jesucristo kjuakohe tí jeheni, a ntá jie tjakoħaráni tí jahará, kixin Dios mé tí xrohi, a ntá kohya ninkehó sítié tí tjen tí jehe ch'án.

⁶ A ntá tí tsontáchroni kixin tinkáchónkini tí jehe ch'án, a ntá naxa ixrini tí ntja sítié, na mé xíkaha ch'iani kixin ch'ehyani tí nkehe ntáchroni.

⁷ A ntá tí xritjejóni tí t'inkaséyan kixin tí Dios mé jehe ch'án tí t'inkaséyan, na mé xíkaha jnkokoá tinkáchónkini ch'án, a ntá tí ijníé Xjeen ch'án Jesucristo mé ts'íjmáxin kaín jie chóntani.

⁸ Tí chróntáchroni kixin ninkehó jie chóntahyani, mé xíkaha la jehóni ch'iyeheni asénni, a ntá tí nkehe chaxín la chóntahyani.

⁹ A ntá tí tsontáchroni kixin chóntani jie, a ntá tsonoheni chaxín kixin itjen ijnko Dios la jína ch'án la ts'itjáyenhen ch'án kaín jie chóntani la ko sinchetjóáni ch'án kixin kaín tí nkehe jínahya kjuích'eni.

¹⁰ A ntá tí tsontáchroni kixin kjuasinhanyi ninkehó jie, la éxí chróntáchroni kixin Dios la ch'ia ch'án, a ntá tí xíkaha tsixroni la chaxínhya tsík'áyéhe ni tí tan kuènte ch'án.

2

Cristo mé tsonixjayákonhenni ch'án

¹ Kichóni, éxí xjanna t'íkuan tí jahará, a ntá tjékjian tí xroon ts'ayéherá tsochronka kixin chrókjuásinhayá jie. A ntá tí jnkojínrá chrókjuásínrá jie la chóntani ijnko nkexro tsonixjayákonhenni nkayakon It'eni Dios, tíha mé Jesucristo, la jehe ch'án mé ijnko nkexro jína.

² Jesucristo mé k'uenyákonhenni ch'án kixin tí jie chóntani; a ntá jehya ijléni ó. Náhi. Ijje kaín chojni síin chjasintajni.

³ Tí tsitekaonni tí nkehe k'ueŋtoan Dios ntá tsoñoexínni chaxín kixin chóxinni ch'án.

⁴ A ntá jnkojín nkexro ntáchro kixin chóxin Dios, a ntá titekakonhya tí nkehe tsík'etoan Dios, la mé ch'ia la noehya tí nkehe chaxín.

⁵ A ntá tí nkexro titekaon tí nkehe tsík'etoan Dios la chaxín tjuèhe Dios; mé xíkaha noheni kixin chaxín jnkokoá tjejókoni ch'án.

⁶ Tí nkexro ntáchro kixin chaxín tinkáchónki Dios chrókjuak'e éxí kjuák'e Jesucristo.

Tí mandamiento nixin

⁷ Kichóni, méxra tí nkehe tjékjian jehya ijnko nkehe nixin tsík'etoan Dios. Náhi. Tíha mé tí nkehe k'uyéherá tí xrankixín, mé tí mandamiento ósé tjen, mé tí nkehe ó tsikínhínrá.

⁸ Kjánchó tí nkehe ikjian mé yóhe ijnko nkehe nixin, éxí kjuakoxín Cristo mé xíkaha tjakoxínni, kixin tí sítié la tinkák'itjáyán kixin ijie la ó t'inkaséyanxín tí xrohi chaxín.

⁹ A ntá tí nkexro tsontáchro kixin ixri tí t'inkaséyan, a ntá naxa nínkakonhen kichó, na mé tí xíkaha naxa itjen tí sítié a.

¹⁰ A ntá tí nkexro tjuèhe kichó mé tjen tí t'inkaséyan, a ntá xíkaha jína tjen, chóntahya jie la chrókjuachruèhya ch'án ninkexró kixin chrókjuasin sín jie inaá.

¹¹ A ntá tí nkexro nínkakonhen kichó mé tjejó sín la ko ixri sín tí sítié a la ko noehya sín nketí nó sátsji sín kixin tí sítié la kjuích'éna ntakótán sín.

¹² Éxí xjanna t'íkuan tí jahará, la méxra tjékjian tí xroon ts'ayéherá kixin tsonohará kixin kjuachaxin ihníé Dios kjuínchetjuáxinrá tí ijjará kixin k'uenyákonhenni Ínchéni Jesucristo.

¹³ Jahará it'é xjan, ikjian tí xroon ts'ayéhérahá jahará kíxin choxínrahá tí nkexro tjen tí xrankíxixín. A ntá jahará ntasoírahá kjaxin ikjian tí xroon ts'ayéhérahá jahará kíxin kjuacharáháyá kíxin kjuachaháyá tí Jínahya chrók'uetuáñhanrá.

Ikjian tí xroon ts'ayéhérahá jahará chánjanrá, kíxin choxínrahá It'éní.

¹⁴ A ntá jahará it'é xjan ikjian tí xroon ts'ayéhérahá kíxin ó choxínrahá tí nkexro itjen tí xrankíxixín tí naxá t'ónahya chjasintajni. Ikjian tí xroon ts'ayéhérahá jahará ntasoírahá, kíxin naxá fuérterá, la ko k'uayéhérahá tí itén Dios, la ko kjuacharáháyá kíxin kjuachaháyá Tsochren chrók'uetuáñhanrá.

¹⁵ Chrótjuéhyará tí chjasintajni la ko ni tí nkehe síin chjasintajni. A ntá tí chojni tjuéhe tí chjasintajni, na mé chaxínhya tjuéhe sín It'éní Dios.

¹⁶ Kíxin ninkehó tí nkehe chrókjuañjon chjasintajni chrókjuáñxin tí tjen It'éní Dios. Tí nkehe tjinkaon tsjanjon chjasintajni na mé tíhi, mé tí nkehe jínahya chrókjuich'eni, la ko tí chrókjuak'e aséni tí nkehe ts'ikonní, la ko tí kjuahñke xrikoni kíxin itsjé nkehe chróchóntani.

¹⁷ A ntá tí chjasintajni sitínkákjeje la ko tí nkehe jínahya tjenkayáxin chojni; a ntá tí nkexro nchexitéyá tí nkehe tórxjññin Dios mé ts'ejó sín jnkochrínin.

Tí nkehe chaxín la ko tí nkehe kjuach'ia

¹⁸ Éxí xjanna t'íkuan tí jahará, la chrókónoharáháyá kíxin ó kuichjina tí yaon tsjixixín. Jahará ó kuínhínrahá kíxin ó tsi tí nkexro nínkakonhen Cristo. A ntá ijie tínkákónoxín nchónhya tí sín a, mé noexínni kíxin ó kuichjina tí yaon tsjixixín.

¹⁹ Jehé sín tsík'axrjekjanxín sín tí tjejóni; kjánchó chaxínhya kuínkáchónki sín éxí tínkáchónkini. Náhi. Tí chaxín chrókjuínkáchónki sín éxí tínkáchónkini la chrók'uaxrjekjanxínhya sín tí tjejóni, naxá chrók'uejókoni sín jnkokoá. A ntá xíkaha kónhen k'uaxrjekjan sín kíxin tsonoxín kíxin kuínkáchónkihya sín éxí tínkáchónkini.

²⁰ A ntá jahará la Cristo tsíkjanjon Nchakuen ch'án tsík'ayéhérahá kain rá, ntá jie tiénxinrá intsi kuénte ch'án.

²¹ Ikjian tí xroon ts'ayéhérahá kíxin ó nohará tí nkehe chaxín, jehya kíxin chrókónoharyará; jahará la ó nohará kíxin nijnko kjuach'ia tixínhya tí nkehe chaxín.

²² ¿Xá nkexro tí ch'ia? Mé tí nkexro ntáchro kíxin Jesús la jehya tí Cristo. Tí nkexro a mé nínkakonhen Cristo, mé titekakonhya It'éní Dios la ko tí Xjeen ch'án.

²³ A ntá tí nkexro titekakonhya tí Xjeen Dios la kjaxin chóntahya sín tí It'é ch'án, a ntá tí nkexro chrónka kíxin chóxin tí Xjeen Dios mé kjaxin chóxin sín tí It'é ch'án.

²⁴ Méxra tí nkehe tsíkinhínrahá tí xrankíxixín la chrórxáñkáoñrahá jnkochrínin. A ntá xíkaha tí chrórxáñkáoñrahá jnkochrínin tí nkehe tsíkinhínrahá tí xrankíxixín, la kjaxin xíkaha jnkokoá chrókjuínkáchónkirá tí Xjeen Dios la ko tí It'é ch'án.

²⁵ Kíxin Jesucristo tsintáchro ch'án kíxin tsjanjon ch'án tí kjuachón jnkochrínin.

²⁶ Méxra xíkaha tjejkian tí xroon í ts'ayéhérahá kíxin chrókónoharáháyá kuénte tí sín tjinkaon chrókjuít'ayahará.

²⁷ Kjánchó jahará la ó chontará Nchakuen Dios tsítjahará Jesucristo, a ntá xíkaha la í t'ichjánxínhya kíxin ókjé nkexro chrókjuakohará, kíxin tí Nchakuen Dios mé tjakohará kain xín nkehe, mé tjako tí nkehe jína la jehya kjuach'ia tíha. A ntá chaxín chrókjuínkáchónkirá Cristo éxí kjuako tí Nchakuen ch'án.

²⁸ A ntá jie éxí xjanna t'íkuan tí jahará, chrókjuítjuéhyará chrókjuínkáchónkirá Cristo, kíxin tíó tsi ch'án la antsi chróchoxínrahá ch'án la ko chrókósuáhyará chrókóchjinará tíó tsi ch'án,

²⁹ Kíxin ó nohará kíxin Jesucristo la jína ch'án. A ntá chrókónoharáháyá kíxin kain nkexro jína la xjeen Dios tíha.

3

Tí sín xjeen Dios

¹ Chrókónoharáháyá kíxin It'éní Dios, imá tjuéhe tí jeheni kíxin nchek'in ch'án xjeen ch'án tí jeheni, la mé chaxín jeheni tíha. Mé xíkaha tí sín chjasintajni chónhya sín tí jeheni kíxin jehé sín la xráxin chónhya sín Dios.

² Mé xíkaha kíchó ni, ó tsík'ónani xjeen Dios, a ntá naxá tjákoqxínhya ch'án nkehe tsonhenni tí tsjixixín. Kjánchó ó noheni kíxin tíó itsi Inchéni Jesucristo la ts'ónani éxí tí jehé ch'án, kíxin ts'ikonní kíxin nkexrí tjen tí jehé ch'án.

³ A ntá kain nkexro tjejóchónhen tí tsi ch'án la chrókuitóhe sín ijje sín kíxin tsojtjóá sín kíxin jehé ch'án la tjóá ch'án.

⁴ Kíxin kain tí nkexro tjasin jie mé jínahya ch'e sín, kíxin tíó tjasin chojni jie la mé xíkaha kuítetekakonhya sín tí ley a.

⁵ Jahará ó noharáháyá kíxin Jesucristo kui chjasintajni kíxin tsjatsen ch'án tí ijjeeni, a ntá jehé ch'án la ninkehó jie chóntahya ch'án.

⁶ Mé xikaha kaín tí sín chaxín tinkáchónki tí jehe ch'án la mé tjasinhya sín jie; a ntá kain tí sín tinkákjasin jie la tsík'íkonhya sín ch'án la ko xráxin chónhya sín ch'án.

⁷ Éxi xjanna t'íkuan tí jahará; méxra chrókuítóehyará kixin ninkexró chrókjuít'ayahará; a ntá tí nkexro ch'e nkehe jína la jína ch'án, kixin Ìnchéni la jína ch'án.

⁸ A ntá tí nkexro xritjasin jie la mé kuènte tí Jínahya; kixin tí Jínahya mé kjuankíxin kjuasin jie desde tí xrankíxixin k'óna chjasintajni. Méxra tí Xjeen Dios mé kui chjasintajni kixin sinchek'itjáyan ch'án kaín tí xra kjuich'e tí Jínahya.

⁹ Nijnko tí chojni tsík'axrjeníxin Dios naxa chrónkákjasin jie, kixin ó chóna tí kjuachón kjuanjon Dios; la í xitjahya naxa chrókjuasin jie kixin ó tsík'óna xjeen Dios.

¹⁰ Mé xikaha tónoxín kixin nkexro tí xjeen Dios la ko nkexro tí xjeen tí Jínahya, kixin tí nkexro ch'ehya tí jína la ko tjuèhya kichó mé jehya xjeen Dios tíha.

Chrótjuèheni kichó ni

¹¹ Méxra tí tan tsíkinhínra tí xrankíxixin mé tíhi, kixin chrótjuèheni kichó ni.

¹² Chrókjuich'ehyani éxi kjuich'e ch'ín Caín, kixin jehe ch'án mé kuènte tí Jínahya, kixin k'óyán ch'án tí kichó ch'án. ¿Nkekuènte kixin k'óyán ch'án? Kixin tí ch'in Caín la tí nkehe jínahya kjuich'e ch'án, a ntá tí kichó ch'án la kjuich'e ch'án tí nkehe jína.

¹³ Kichóni, chróchrakonhyará tí nínkakonhanrá tí sín sín chjasintajni.

¹⁴ A ntá noheni kixin k'uatínkani tí kjuach'én, a ntá kjuachón, mé noexíni tíhi kixin tjuèheni kichó ni. Tí nkexro tjuèhya kichó la éxi tsík'en sín xikaha xritjeó sín.

¹⁵ Kaín tí nkexro imá nínkakonhen kichó na mé chojni tjàya tíha, la ko ó nohará kixin ijnko chojni tjàya la xitjahya tsochóna kjuachón jnkochríxin.

¹⁶ Ó noheni kixin nkexro tí tjuèheni, kixin Ìnchéni Jesucristo mé k'uenyákonhenni ch'án; kjaxin jeheni kjónté chrók'uenyákonhenni tí sín kichó ni.

¹⁷ A ntá tí tjen ijnko nkexro rico t'íkon kixin ijnko tí kichó ch'án t'ichjánxínhin nkehe, a ntá tí tsjinkítsahya tí kichó, ¿a ntá nkexrí chrótjuèhe ch'án Dios kain asén ch'án?

¹⁸ Éxi xjanna t'íkuan tí jahará, méxra chrótjuèxínhyani tí kichó ni tí tan náxrxón chrónixjani ó. Náhi. Chrókjuakoxínni tí nkehe jína chrókjuich'eni.

Jína tsochjineheni tí tjen Dios

¹⁹ Tíha mé noexíni kixin chaxín ntoá tjejóni, a ntá chrókónoheni kixin chaxín tjejóni éxi tjinkaon Dios.

²⁰ A ntá t'joni asénni kixin chónatani ichrén jie, a ntá Dios la imá nohe ch'án la nohe ch'án kaín nkehe tónhen asénni.

²¹ Mé xikaha kichó ni, tí tjohya asénni kixin naxa ichrén nkehe jínahya tjenkayáxinni, a ntá antsí jína tsochjineheni tí tjen Dios,

²² a ntá jehe ch'án tsjanjon ch'án kaín nkehe tsjancheheni ch'án, kixin nchexiteyéheni tí nkehe k'uetóan ch'án la ko ch'eni tí nkehe tóxrjínhin ch'án.

²³ Tí nkehe tsík'etóan ch'án la mé tíhi kixin chrókuítekaonni tí Xjeen ch'án Jesucristo, la ko chrótjuèheni kichó ni éxi k'uetóan ch'án.

²⁴ Tí nkexro nchexiteyéhe tí nkehe k'uetóan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexíni kixin jehe ch'án tjejókonni ch'án kixin tí Nchakuen ch'án tsikjanjon ch'án.

4

Tí Nchakuen Dios la ko tí nchakuen tí nkexro nínkakonhen Cristo

¹ Kichóni, chrókuítekákonhyará kaín tí sín ntáchro sín kixin Nchakuen Dios mé nixjxin tí jehe sín. Náhi. Chrótsjehérá tí nkehe ch'e sín kixin chrókónohará kixin á chaxín chóna sín Nchakuen Dios o náhi, kixin tí chjasintajni la ixri nchónhya chojni ch'ia, ntáchro sín kixin nixja sín tí itén Dios.

² A ntá xikaha mé chrókónoaxínra kixin á chaxín chóna sín Nchakuen Dios kixin kaín tí sín chaxín titekaon sín kixin Jesucristo ikui éxi chojni mé chóna sín Nchakuen Dios.

³ A ntá tí nkexro titekakonhya kixin xikaha tsíki Jesús, na chónahya sín Nchakuen Dios. Náhi. Chóna sín tí nchakuen tí nkexro nínkakonhen Cristo. Jahará ó kuínhínra kixin itsi tí nchakuen a, a ntá jie ó tsíki chjasintajni.

⁴ T'íkuan tí jahará éxi xjanna, kixin jahará la ó titekáonrá Dios, a ntá kjuachará kixin kjuachahya tí sín ch'ia chrók'uetóan, kixin tí nkexro tjejókoará la imá t'etóan, a ntá tí nkexro t'etóan chjasintajni la kánhyó t'etóan.

⁵ Kixin jehe sín la kuènte chjasintajni ó, méxra nixja sín tí nkehe kuènte chjasintajni ó. A ntá tí chojni kuènte chjasintajni ó mé tjejótinhin sín.

⁶ A ntá jeheni mé xjeen Dios. A ntá tí sín chónin Dios mé tjejótinhin sín tí nkehe tjakoni. A ntá tí nkexro chónhya Dios mé tjinkakonhya sín chrókuinhin sín tí nkehe tjakoni. A ntá

tíha mé tjatsəanxínni nkexro chóna tí Nchakuen tí nkexro chaxín la ko nkexro chóna tí nchakuen tí nkexro xrich'ia.

Dios mé tjuèheni

⁷ Kíchóni, méxra chrótjuèheni kíchó ni, kixin tí tjuèheni kíchó ni mé tixín tí tjen Dios. Kaín nkexro tjuèhe kíchó mé xjeen Dios, la ko chóxin Dios.

⁸ A ntá tí nkexro tjuèhya kíchó na mé chónhya Dios kixin Dios la xráxín tjuèhe chojni.

⁹ Dios la ó kjuakoxín ch'án kixin tjuèhe tí jeheni kixin tsíchr'án ch'án tí jnkokoá Xjeen ch'án chjasintajni kixin tsochóntaxínni kjuachón tí jehe ch'án.

¹⁰ A ntá tí tjuèheni Dios la mé tíhi: jehya kixin jeheni k'uetjuèheni tí jehe ch'án. Náhí. Jehe ch'án mé xráxín tjuèhe ch'án tí jeheni, a ntá ichr'án ch'án xjeen ch'án k'uenyákonhenni kixin tsotjuáxin tí jie chóntani.

¹¹ Kíchóni, a ntá tí xikaha Dios tjuèhe tí jeheni, a ntá kjaxinni jeheni xikaha chrótjuèheni kíchó ni.

¹² A ntá Dios la ninkexró k'uikonhya. Kjánchó tí chrótjuèheni kíchó ni la Dios ts'ejókoni ch'án, a ntá tsjinkjtsa ch'án kixin chaxín tsotjuèheni kíchó ni.

¹³ Tíhi mé noexínni kixin tjejókoni Dios la ko jehe ch'án tjejóko tí jeheni kixin tsíkjanjon ch'án tí Nchakuen ch'án chóntani.

¹⁴ Jeheni mé k'uikonxín konni la mé chrónkaxínni kixin It'éni Dios tsíchr'án ch'án Xjeen ch'án kixin tsaáxin chojni síin chjasintajni.

¹⁵ A ntá jnkójín nkexro titekaon la ko chrónkaxín kixin Jesús mé Xjeen Dios mé tjejóko Dios la ko Dios mé tjejóko tí jehe sín.

¹⁶ Mé xikaha mé noexínni la ko titekaonni kixin Dios la tjuèhe tí jeheni. Dios mé xráxín tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín.

¹⁷ Mé xikaha chaxín chrótjuèheni Dios kixin ntá chróchrakonhyani tí yaon tsitəoxín ijiéni kixin ó noheni kixin Jesucristo la tjuèheni ch'án la ko jeheni la kjaxin tjuèheni tí jehe ch'án.

¹⁸ Kixin tí tjuèheni Dios la kohya kjuachrakon. Tí chaxín tjuèheni Dios la tíha mé tsakitsje tí kjuachrakon. A ntá chojni chrakon mé chaxín tsjasóte. A ntá jnkójín chojni chrakon la mé chaxínhya tjuèhe Dios.

¹⁹ A ntá jeheni la tjuèheni Dios kixin jehe ch'án senó tjuèhe ch'an tí jeheni.

²⁰ A ntá jnkójín nkexro ntáchro kixin jehe mé tjuèhe Dios, a ntá tuénxín nínkakonhen kíchó mé kjuach'ia xriko. Tí tjuèhya ch'án tí kíchó chóxin ch'án, la kjaxin xitjahya tsotjuèhe Dios kixin tsík'ikonhya ch'án Dios.

²¹ Tíhi mé tsík'etəon Jesucristo kixin tí nkexro tjuèhe Dios la mé kjaxin chrótjuèhe kíchó.

5

Tí tinkáchónkini Dios la tsjachahya tí chjasintajni

¹ Kaín nkexro titekaon kixin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxin tsotjuèhe tí xjeen tí nkexro a.

² A ntá tí tjuèheni Dios la ko nchexiteyáni tí nkehe t'etəon ch'án, a ntá noheni kixin kjaxin tjuèheni tí sín tsík'óna xjeen Dios.

³ Tí tjuèheni Dios la t'ichjánxin kixin chrókuitekaonni tí nkehe k'uetəon ch'án, kixin tí nkehe t'etəon ch'án la jehya ijnko nkehe imá xra

⁴ Kixin kaín chojni tsík'óna xjeen Dios tsjacha, la ntá tí chjasintajni la náhi. A ntá tí tinkáchónkini Inchéni la mé tsjachaxínni la tsjachahya tí chjasintajni.

⁵ A ntá tí sín tinkáchónki kixin Jesús mé tí Xjeen Dios mé tsjachahya tí chjasintajni ts'etuenhen sín.

Tí nkehe chrónkaxín nkexrí tjen tí Xjeen Dios

⁶ Tió kui Jesucristo la kjuakoxín tí intə la ko tí jni. La jehya kixin jehó tí intə kjuakoxín ch'án. Náhí. Kjaxin intə la ko ijni kjuakoxín ch'án. A ntá tí Nchakuen Dios mé chrónkaxín tíha, kixin tí Nchakuen Dios la chaxín ntoá.

⁷ Síin iní nkexro chrónkaxín nkaya nkajni: ijnko la It'éni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha.

⁸ A ntá síin iní tí nkehe chrónkaxín ntihi chjasintajni, mé tí Nchakuen Dios, la ko tí intə la ko tí jni; a ntá tí iní mé jnkokón chrónka.

⁹ ¿Á chrókuitekaonni tí nkehe chrónka chojni ó? A ntá tí nkehe tsíchrónka Dios, antsí má tjetəon kixin táha la Dios tsíchrónkaxín kixin nkexrí tjen tí Xjeen ch'án.

¹⁰ Tí nkexro titekaon tí Xjeen Dios na mé asén ó tónoxín tíha. A ntá tí sín titekakonhya sín Dios, la ntáchro sín kixin Dios la ch'ia ch'án kixin kuitekakonhya sín tí nkehe tsíntáchro Dios kixin nkexrí tjen Xjeen ch'án.

¹¹ Tí nkehe tsíchrónka Dios mé tíhi kixin tsjanjon ch'án kjuachón jnkochrín, a ntá tí kjuachón mé chóna tí Xjeen ch'án.

¹² A ntá tí nkexro chóna tí Xjeen Dios mé kjaxin chóna kjuachón; a ntá tí nkexro chónahya tí Xjeen Dios la mé chónahya kjuachón.

Chrónkaxín nkehe kuènte kjuachón

¹³ Tí nkehe mé kjinni kixin jahará ó titekáonrá tí Xjeen Dios, kixin mé tsoñoaxínrá kixin chaxín chontará kjuachón jnkochrín.

¹⁴ Tíhi mé chóxixínni Dios kixin noheni kixin ichrén nkehe tsjancheheni ch'án éxí tjinkaon ch'án la jehe ch'án la tsinhin ch'án.

¹⁵ A ntá tí xíkaha ó noheni kixin Dios tjetinhin tí nkehe nixjeheni ch'án, a ntá kjaxin ó noheni kixin ó chónani tí nkehe kjuancheheni ch'án.

¹⁶ A ntá jnkójínrá ts'ikonrá ijnko kichuárá tjasin jie, a ntá tí jehya ijnko jie chrók'uenxín ch'án, la chrókjuanchehéra Dios kixin chrókjuinchexraxinkaon ch'án kixin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. A ntá tí jie chrók'uenxín chojni la ntáxrjan kixin íchá jina chrókjuanchehyará Dios kixin chrókjuinkítsa tí ch'ín a.

¹⁷ Kaín nkehe jínahya la ijie tíha. Kjánchó sún jie ts'enxínhya chojni.

¹⁸ Ó noheni kixin tí nkexro tinkáchónki It'éni Dios tjasinhya sún jie, kixin tí Xjeen Dios tjinkítsa tí jehe sún, a ntá tí Jínahya tsjachahya tsjachroe tí jehe sún.

¹⁹ Ó noheni kixin Dios t'ayakonhen tí jeheni, a ntá tí Jínahya chóna kjuachaxin t'etuenhen kuenté chjasintajni.

²⁰ Ó noheni kjaxin kixin Xjeen Dios kui, la ko kjuínkítsa ch'án tí jeheni kixin chrókónoheni nkexri tjen Dios chaxín. A ntá tjejókoni jnkokóá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxínni ch'án kjuachón jnkochrín.

²¹ Éxí xjanna t'íkuān tí jahará, la títóhéra tí dios tsíkjanoya. Amén. Ó tjen.

Yóxin xroon tsíkjin ch'ín Juan

¹ Janhan mé ijnko nkexro ó táda t'ayakonhen nínko mé ikjian tí xroon ts'áyéhe tí sín tsíkjeýá Dios tójnko tsé sín ntiha, la mé chaxín tjuahá sín: a ntá jehya janhván, la kjaxín kain tí sín chóxin tí tan chaxín.

² Tjuahará tí jahará kixin tí tan chaxín ó chóna asénni, tíha mé ts'ejókoni jnkochríxín.

³ It'éni Dios la ko Ìnchéni Jesucristo mé Xjeen Dios chrókjuintayaonrá ch'án la ko chrókujkonóahará ch'án la ko chrótjáhará ch'án kjuaxróxin kixin chaxín tjuahará ch'án.

⁴ Imá chána k'uikuán kixin isorá tjejorá títékáonrá tí nkehe chaxín, éxí tsík'etóan It'éni Dios.

⁵ A ntá jie jahará kichó ni, xrjanóahará kixin chrótjuèhérá kichuára. Méxra xíkaha tjékjian tí xroon i, la jehya ijnko nkehe nixin tsík'etóan Dios. Náhi. Tíha la mé tí nkehe tsík'áyéheñi tí kjuák'e Ìnchéni Jesucristo.

⁶ A ntá tí tjuèheñi kichó ni la mé tíhi kixin chrók'uejóni éxí tsík'etóan Dios; a ntá tí nkehe tsík'etóan Dios la mé ó tsíkinhínra jahará tí senó kixin chrótjuèheñi kichó ni.

Tí chojni xrich'ia

⁷ Nchónhya chojni chjasintajni xrich'ia sín titekakonhya sín kixin Jesucristo kui k'óna chojni. A ntá tí chojni xíkaha mé ixri xrich'ia la ko nínkakonhen Cristo.

⁸ Chrókóxakonhanrá kixin chrók'uitjáyanhya tí xra kjuich'erá kixin naxá chrók'uayéhérá tí nkehe tsjintaxín ts'ayéhérá.

⁹ A ntá tí sín ijnko nkexro kuitqhe tí nkehe kjuako Cristo ntá kjuichroe la mé chónahya sín Dios; a ntá tí nkexro títqehya tí nkehe kjuako Cristo mé chóna sín It'éni Dios la ko tí Xjeen ch'án.

¹⁰ A ntá jnkojín sín chrókjujitsjehe tí jahará, a ntá ntoáhya chrókjuako sín, la chrókjuánjonhyará kjuachaxín chrókuitqhe tí sín a ntqará la ko ni chrónixjeéhyará sín jnkojína.

¹¹ A ntá tí nkexro tsonixjehe tsontáchro kixin: “¿Á jína k'uinka?” na mé éxí tóxrjinhin sín tí nkehe jínahya ich'e tí sín a.

Tí tan tsjixixín

¹² Chonta nchónhya nkehe chrókuinhínra jahará, kjánchó tjínkakonhya chrókjian xroon ó. Náhi. Tjínkavan kixin tjoka chrókjuasántsajahará tí jahará tsonixjahará kixin chrókjuintaxín chrókóchéheñi.

¹³ Tí sín kichuára tójnko tsé kuènte nínko ntihi, mé tí sín kjaxín tsíkjeýá Dios, mé nixjahará sín. Amén. Ó tjen.

Tí nixin xroon tsíkjin ch'ín Juan

¹ Janhan mé tí nkexro t'ayakonhen nínko mé tjékjian tí xroon ts'áyéhe tí ch'ín choxian, mé tí ch'ín Gayo tí ch'ín chaxín tjuəhə.

² Kíchóni, tjáncháha Dios kixin éxi jaha jina tjen tinkachónkia Ínchéni la jina chrók'uaxrje kaín xra ch'e la ko jina chrókjuak'e jaha.

³ Imá kóchána tió kui iso tí sín kichó ni chrónka sín kixin jina tjákoxian tí tan chaxín.

⁴ Kohya ijnko nkehe antsí má nchechána éxi tió kúnhəhə kixin tí sín t'íkuan éxi xjanna tjejtitekaon sín tí tan chaxín

⁵ Kíchóni, chaxín jina tjech'e xra tjínktsa tí sín kichó ni la ko antsí tjínktsa tí sín tsíkjin óké chjasin.

⁶ A ntá tí tsíkójkotsé tí sín kichó ni la tsíchrónka sín kixin nkexri tjuéhé tí jehe sín. Jaha chrókjuinktsa tí nkehe t'ichjánxinhin sín tí sátsji sín. Xíkaha mé tóxrjinhin Dios.

⁷ Tió sákjuí sín kjuankixin sín chrónka sín itén Ínchéni la chrohya sín chrók'uáyéhe sín ninkehó nkehe kuente tí sín chónhya Dios.

⁸ Méxra tí jeheni t'ichjánxín chrókjuinktsani tí jehe sín kixin tsjacha sín tsochrónkaxín sín tí tan chaxín ntoá.

Ntoáhya kjuako ch'ín Diótrefes

⁹ Janhan ikjian ijnko xroon k'uáyéhe tí sín tójkotsé ntiha. Kjánchó ch'ín Diótrefes kuitekakonhya ch'án tí nkehe k'uetuənhenni ch'án kixin tjinkaon ch'án chrók'uetəan ch'án jehó ch'án.

¹⁰ Méxra xíkaha tí sátsjia ntiha tsonixjahə ch'án kixin tí kjuach'ia ntáchro ch'án t'ántaxinhin ch'án tí jeheni. Jehya táhó ich'e ch'án. Kjaxin tjanjonhya ch'án kjuachaxin ts'ejó tí sín kichó ni tjji; a ntá tí sín tjinkaon chrókjuanjon kjuachaxin la t'etəan ch'án kixin tsjanjonhya sín kjuachaxin la ko t'etəan ch'án kixin tsəhjinahya sín tí tójkotsé tí chojni.

¹¹ Kíchóni chrókjuákoxinhya tí nkehe jínahya. Íchá jina chrókjuákoxian tí nkehe jina. Tí nkexro ich'e nkehe jina na mé kuente Dios. A ntá tí nkexro ich'e nkehe jínahya la mé tsík'ikonhya sín Dios.

Jina tjákoxin tí ch'ín Demetrio

¹² Kaín sín ntáchro sín kixin jina tjákoxin tí ch'ín Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

Kjuixixin nixja ch'án

¹³ Janhan chonta nchónhya nkehe tsontáxrjan, kjánchó tjínkəkonhya tsokjian ó

¹⁴ kixin tjínkəvan tjoka ts'íkuan tí jaha, a ntá tsjoni.

¹⁵ Kjuaxróxin chrókjuak'e jaha. Kaín nkexro choxian ntihí nixjaha sín. Tétuənhan nixjehé jnkojnko tí sín chóxinni.

Tí xroon tsíkjin ch'ín Judas

¹ Janhan Judas, t'aha xra Jesucristo, la sana mé Jacobo la mé ikjian tí xroon í ts'áyéhe tí sín tsíkjeýá It'eni Dios tsíkjinchetjóá ch'án kixin tsinkáchónki sín ch'án. Mé xíkaha Jesucristo t'ayakonhen ch'án tí jehe sín.

² Imá kuikonóahará ch'án ntá ts'ayéherá kjuaxróxin kixin tjuahará ch'án.

Tí sín ntoáhya tjako

(2 Pedro 2.1-17)

³ Kichóni, imá tjínkavan tsokjian tí xroon ts'ayéherá tsochrónka nkexrí tsaáxinni kaín ni. A ntá t'íkuan kixin t'ichjánxin tsokjian tí xroon ts'ayéherá tsoxrjanóaxínrá kixin jína chrókiéxinrá nkehe chrókuáteherá kixin nkexrí tinkachónkirá Ìnchéni kixin tí fe la mé ónaá tsík'áyéhé tí sín tsíkjinchetjóá Dios.

⁴ A ntá jie ó kuik'ixenhen iso sín ch'ia tí tjeorá. A ntá ósé nixja xroon itén Dios kuènte tí sín a kixin tsjasóte sín. Jehe sín la chojni jínahya ntá ntáchro sín kixin tinkáchónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etqan, la ko titekakonhya sín Ìnchéni Jesucristo.

⁵ Jahará kjónté ó nohará la jehí tjínkavan sintaxráxinkáonrá inaá kixin Ìnchéni Dios kuakitsjexín ch'án Egipto tí sín chjasin Israel, ntá kjónté xíkaha la chr'éxin kjuínchek'itjáyán ch'án tí sín kuitekakonhya sín tí jehe ch'án.*

⁶ Kjaxin tí sín ángel kuitekakonhya sín tí k'uetqan Dios ntá kuítóhe sín tí kjuachaxin tsíkjanjon Dios tsík'áyéhe sín la ko kuítóhe sín tí k'uék'ejó sín jína, a ntá jie Dios k'uetqan ch'án kixin ts'ejóhchina sín tí síti la ts'ejóchónhen sín tsjia tí yapon tsitogexín ijíe sín.

⁷ Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhe sín tí sín ángel kuitekakonhya la kjuasinko sín jie chojni chjin ókjé la ko kjuasinko sín jie kichó sín kjónté jnkokón ntoa sín. Tíha mé chrórxaxinkakonxin kaín chojni kixin nkexrí tsonhen tí sín titekakonhya tsjasótéxin sín tí xrohi jnkochrín sín t'ankahya.

⁸ Méxra kjaxin tí chojni a kotáchrién sín tsík'ikonxin kixin ó nchoxon chrókuasinko sín jie chojni chjin ókjé la ko chrókuitekakonhya sín tí kjuachaxién Ìnchéni la ko chrók'uántaxínjin sín tí sín ángel chóna kjuachaxin t'etqan.

⁹ A ntá tí ch'ín arcángel Miguel kjuánjonko ch'án tí ch'ín Tsochren la ko ikjo sín kjuánjonxin sín nkehe tsonhen tí cuerpo kuènte ch'ín Moisés.† A ntá jehe ch'án kjónté xíkaha la kjuínchekjasótehya ch'án tí ch'ín Tsochren. Jehó ntáche ch'án kixin: “Ìnchéni mé tsjentuáha tí jaha.”

¹⁰ A ntá tí chojni i t'ántaxínjin sín tí nkehe tienxínhya sín la tjenkayáxin sín éxi ko tienxínhya nchexiteyéhe tí nkehe ntáchro asén, mé xíkaha tí nkehe jínahya kjuích'e sín ts'itjáyánxin.

¹¹ jNòa tí jehe sín! Chr'éhe sín éxi kjuích'e ch'ín Cain.‡ Tjínkaon sín chrókuacha sín chichaon ntá ntoáhya kjuích'e sín éxi kjuích'e Balaam, la ko its'en sín éxi ik'uén ch'ín Coré kixin kuitekakonhya sín.§*

¹² Ijnko kjuatósuehe kixin tjejóyákjanxin sín tí siín kia náxrjón chontará, kixin tjejóne sín la ko tjejóti sín chéhe sín la kjónté xíkaha la ninkehó kjuasáya chóntahya sín. Tjejó sín éxi tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxi tjuj chóntahya ntá tjakáko xrintq; la ko éxi injno nta t'ónahya to tí nitjó chrók'óna to, éxi yáya tsík'en tsík'axrjenkixin nuéé.

¹³ Jehe sín na mé éxi ntayaoon jiehe sixróji lóxrjo ó chóntahya ntá jína mé xíkaha chónkó tí nkehe ch'e sín mé injno kjuatósuehe tíha; la ko éxi konotsé kjuíchroe sákjuí ókjé; a ntá tjechónhen sátsji sín tsjasóte sín síti jnkochrín.

¹⁴ A ntá kjuák'e ch'ín Adán, a ntá yatqxin chr'éxin kui ch'ín Enoc nixjaxin kjuachaxién Dios ntáchro ch'án kixin k'uikon ch'án itjen Ìnchéni kuikqao nchónhya mil tí sín ángel kuènte ch'án,

¹⁵ kixin sinchekitogexín ch'án ijíe kaín tí sín jínahya kixin kaín tí jínahya kjuích'e sín la ko kaín nkehe k'uénixja tí sín jínahya k'uántaxínjin sín tí jehe ch'án.

¹⁶ Xráxin tóxrjénhya sín nkehe sitónhen la ko ixri sín tjonta kichó sín. Jehó xritjeýá sín tí nkehe tóxrjénjin sín tjenkayáxin sín. Ihnke sín nixja sín la ko itjo sín jína chojni kixin ntá tí sín a chrókuinkitsa jehe sín.

Nchexraxinkaon ch'án tí sín tinkáchónki Cristo

* 1:5 Éxodo 12.51 Números 14.29-30 † 1:9 Deuteronomío 34.6 ‡ 1:11 Génesis 4.3-8 § 1:11 Números 31.16 * 1:11 Números 16.1-3

¹⁷ A ntá jahará kichó ni, xráxinkáonrá kixin tí sín tsíkjejá Ìnchéni Jesucristo

¹⁸ ntáchro sín kixin tí yaon tsjixixín tsjejejin chjasintajni ts'ixin chojni tsitekakonhya sín ts'ántaxínjin sín tí nkehe tjinkaon Dios la ko tsotjinkaon sín sinchexiteyéhe sín tí nkehe jínahya ntáchro asén sín ó.

¹⁹ Tí sín a mé tjinkaon ts'óxika tí sín jnkokoá tjejótojnkotsé kixin naxá tóxrjínjin sín sich'e sín nkehe siín chjasintajni kixin chóntahya sín Nchakuen Dios.

²⁰ A ntá jahará kichó ni tjuahará, antsí jína chrók'uejorá tinkachónkirá Ìnchéni. Chrónixjeexínrá Dios tí kjuachaxin kuente Nchakuen ch'án.

²¹ Jína chrók'uejorá kixin tjuahará Dios ts'ejochonhénrá tí yaon tsokjan Ìnchéni Jesucristo kixin kjuasáyé ch'án tsotjáhará ch'án kjuachón jnkochrín.

²² Chrókujikonóghérá tí sín naxá tienxínhya.

²³ Jnkojín sín chrókjuínchekaará chrókuakitsjekjanxínrá sín chríkjan xrohi, la ko chrókujikonóghérá í so sín kjánchó chróchontará cuidado tí jehe sín kixin kjónté ti iké sín kjaxin chóna jię.

Tjanchia ch'án kjuasáya

²⁴⁻²⁵ Jnkokoá Dios tjen mé imá nohe ch'án la ko sinchekaáni ch'án la chóna ch'án kjuachaxin ts'ayakonhenni ch'án kixin chrókjuasinhyani jię la ko tió tsjijini tí tjen ch'án la ninkehó jię chróchóntahyani, imá tsqchéheni tí tjen ch'án ntiha. Kjuasáyé Dios imá chóna ch'án kjuachaxin t'etoan ch'án la ko kjuínchekaáni ch'án kjuachaxin Ìnchéni Jesucristo. Jehé ch'án jnkochrín tjen ch'án chóna ch'án kénxín kjuachaxin. Amén. Ó tjen.

Tí nkehe chrónka Jesucristo k'uíkon ch'ín Juan

1 18

Kaín tí nkehe i mé chénka Dios Jesucristo kixin jehe ch'án tsochéna tí sín ch'ehe ch'án xra tí nkehe tjoka tsonhen. Ntá Jesucristo kjuínchenohe ijnko ángel kuènte ch'án kixin nkexrí chrókonohe tí ch'ín Juan ch'ehe ch'án xra.

² A ntá jehe ch'án mé k'uituenhen ch'án ntá chrónkaxín tí nkehe chaxín tsintácho Dios la ko tí nkehe chrónka Jesucristo la ko kaín tí nkehe tsík'ikon ch'án nkexrí kjuakoxín Dios.

³ Náxrjón tjejó tí sín nchekuáxin tí xroon i la ko kjaxín tí sín tjejótinhin tí palabra chrónka nkehe tsonhen la ko tóxrjinhin sín titekaon sín nkehe nixja tí xroon i kixin ó kuichjina tí hora tsoxiteyá tíha.

Ch'ín Juan ikjin ch'án xroon ts'áyéhe tí yato nínko

⁴ Janhan Juan ikjian tí xroon tsochr'anhan tí yato nínko tjejó estado Asia. Jahará chrók'uayéherá kjuasáyé Dios la ko kjuaxróxin. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá la ko kjaxín tí yato Nchakuen ch'án tjejó tí trono t'etóanxín ch'án mé tjanjon kjuaxróxin.

⁵ La ko kjaxín kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankixín xechón kjónté tsík'en kixin tjetoan ch'án kixin t'etuenhen ch'án kjónté kaín tí sín rey la ko tí sín t'etóan síin chjasintajni. Jehe ch'án mé tjuéheni ch'án la ko tí ijnjé ch'án mé k'uíjmáxinni kaín tí jje chóntani.

⁶ Jehe ch'án mé tsíkjanjon kjuachaxín tsík'ónani nchát'a kixin sich'ehe ni xra It'éni Dios. Tí kjuachaxín kuènte ch'án mé ts'etóan jnkochríxín. Mé xíkaha tsoxiteyá. Amén.

⁷ Ts'ikon chojni kixin Cristo la ó tsi chríkjan tjuj. Kaín chojni ts'ikon ch'án la ko kjaxín tí sín k'uékónínkakohenen tí jehe ch'án tsíkjinchekjasóte sín ch'án mé ts'ikon sín ch'án la ko kaín chojni chjasin síin chjasintajni tsotsjánka sín tíó ts'ikon sín tí jehe ch'án. Mé xíkaha tsonhen. Amén.

⁸ Janhan mé tí xrankixín la ko tí tsjixín éxi tí letra xrankixín A la tsjixín Zeta. Mé xíkaha ichro Ìnchéni Dios, tí nkexro imá t'etóan. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án inaá.

Ch'ín Juan tsík'ikon ch'án kixin Cristo chóna kjuachaxín

⁹ Janhan Juan mé ijnko kichó tí jahará mé tjékian Jesús la ko tí kjuachaxín kuènte Dios chonta la mé jahará la ko jeheni jnkokón tjejótjasóteni la jehe ch'án tjinkitsani kixin tsjachani. Kjuákua itjen Dios éxi chrónka Jesucristo la mé tíha kjuak'échjinaxián tí isla it'ín Patmos.

¹⁰ A ntá ijnko yaon xraxínkakonxínni Ìnchéni la ikui kjuachaxín Nchakuen Dios tí tjén tí janhan la kuñhan kixin nóton tí janhan ijnko nkexro nixja imá itsen éxi itén ijnko trompeta.

¹¹ Mé ntácho ch'án kixin:

—Janhan mé tí xrankixín la ko tí tsjixín éxi tí letra xrankixín A la tsjixín Zeta. Mé tsokjian jaha ijnko xroon kaín tí nkehe k'uíkuan kixin tsochr'enhén tí yato nínko tjejó tí estado Asia na mé tí nínko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

¹² Ntá nkátjía tsjahá kixin nkexro itén tí tjenixjana ntá xrináhya k'uíkuan yato candelero tsík'óna chica oro.

¹³ A ntá chríkjan tí yato candelero k'uíkuan ijnko nkexro éxi yóhe Xjeen Dios tsík'óna chojni. Ntá tí iké ch'án la ika kjínjin tjenkáya ch'án hasta tsík'óyóhe toté ch'án la ko mé chóna ijnko cinta jehó oro tjenkáni ntauquin ch'án.

¹⁴ Tí kaxihí ch'án la tjóá éxi kaxree kolélo tjóá o éxi chrinta tsjehe la ko tí ikon ch'án la éxi xrohí nene tsjehe.

¹⁵ Ntá tí toté ch'án la éxi chica sine tjákini na ntá tsík'axrxéxin tja. A ntá tí itén ch'án la itsen éxi tóvéntó nchónhya ntarío.

¹⁶ A ntá tí tja ch'án chjina mé chóna yato konotsé. A ntá tí ir'va ch'án k'uaxrxéxin chica espada iyo, yánjin taté. A ntá imá tjákini tsjehe ikon ch'án la éxi yaon t'inkaséyanxín imá.

¹⁷ A ntá tí k'uíkuan xíkaha la kjuáchr'itsinka toté ch'án éxi tsík'énna. A ntá jehe ch'án kjuak'etja tja ch'án chjina chritaón tí janhan ntá nixjana ch'án ntácho ch'án kixin:

—Chrakonhya jaha. Janhan mé tí xrankixín la ko tí tsjixín.

¹⁸ Janhan tí nkexro tjechón. Ik'uén, a ntá ijje la tjéchuán inaá la itjén jnkochríxín. Amén. Janhan chonta llave kuènte chojni its'en la ko kuènte tí síin tí sín tsík'en.

¹⁹ Méxra ikjian jaha tí nkehe k'uíkuan mé tí nkehe síin ijje la ko tí nkehe tsonhen chr'éxin.

²⁰ Ninkexró k'uékiénxínhya nkexrí t'axrjéxín tí yato konotsé k'uíkuan chonta tjana chjina, la ko tí yato candelero tsík'óna chica oro. Mé tí yato konotsé t'axrjéxín ḱxín tí yato ángel t'ayakonhen tí yato nínko la ko tí yato candelero k'uíkuan me kjaxín t'axrjéxín tí yato nínko.

2

Tí tan k'uáyéhe tí yato nínko: Tí tan k'uáyéhe tí sín chjasín Éfeso

¹ Tsokjian tí nkehe ts'áyéhe tí ángel t'ayakonhen tí nínko Éfeso: “Xíkaha ichro tí nkexro chóna yato konotsé itja ch'án chjina la ko xritjak'e ch'án jnkosiné tí yato candelero tsík'óna oro. Ntáchro xíkíhi:

² Janhan nóna kaín tí xra ch'erá la ko nóna ḱxín tóxrjíanhyará tí sín jínahya. Janhan la ó nóna ḱxín kjuich'erá prueba tí sín ntáchro ḱxín apóstol tí jehe sín la ntá jehya la ntá kónoxín ḱxín xrich'ia tí jehe sín.

³ Nchónhya kjuasótíará la kjónté chonhénrá kóninkákonhyará la imá kjuich'erá xra ḱxín tinkachónkirá nina la ko nunca kóxrjéhyará.

⁴ Kjánchó tjánchá ijnko jje tí jahará ḱxín tinkachónkihyará éxi kjuankíxixínrá k'uétjuanará.

⁵ Méxra chróxráxinkáonrá ḱxín ó kuitóhérá tí k'uétjuanará la ntá chrókjuinkirá tí nkehe tjenkayáxinrá la ko chrókjuich'erá xra éxi tí kjuankíxixínrá. A ntá tí náhi, la tjoka tsjasán la tsjakíyan tí candelero tí tjejorá tí nunca tsjínkíhyará tí nkehe jínahya tjenkayáxinrá la tí tsokjanhyará tsoxráxinkáonrá Dios.

⁶ Kjánchó chrókónohará ḱxín tóxrjína tí nkehe tjejoch'erá ḱxín tóxrjíanhyará tí xra ch'e tí sín nicolaítas ḱxín kjaxín janhan nínkakonhan tí nkehe ch'e sín.

⁷ Tí nkexro tjinkaon chrókuinhin la chrókuinhin sín tí nkehe nixjéhe Nchakuen Dios tí nínko ntáchro ḱxín: Tí sín tsjacha sinchexiteyána sín la tsotjahá sín kjuachaxin sine sín tí to'óna tí nta tjanjon kjuachón itjen tí tjen Dios.”

Tí tan k'uáyéhe tí sín chjasín Esmirna

⁸ Ikjían tí nkehe ts'áyéhe tí ángel t'ayakonhen tí nínko Esmirna: “Xíkaha ichro tí nkexro xránkixixín la tsjixixín, mé tí nkexro ik'uén la ntá jie tjechón:

⁹ Janhan la ó nóna kaín nkehe tjejoch'erá. Ó nóna ḱxín nkexrí tjejótjasótíará la ko ó nóna ḱxín nòará kjánchó jehya. Náhi. Jehe sín mé tójnkoité sín tí nínkoé tí jínahya.

¹⁰ Kjánchó chrakonhyará kjónté tsjasótíará. Tí ch'ín Tsochren tsochr'ánxanhanrá ntóechiso jnkojín tí jahará ḱxín tsotsjéxín nkexrí tí jahará ntá t'ichjánxin tsjasótíará iso yaon. Kjánchó chrókuitóhéhyará Dios kjónté chrók'uénrá ntá janhan tsotjáhará tí kjuachón chr'éxin.

¹¹ Tí nkexro tjinkaon chrókuinhin la chrókuinhin tí nkehe nixjéhe Nchakuen Dios tí nínko: Tí nkexro tsjacha sinchexiteyána sín la í tsjasótehya, la tí yóxin its'en chojni la í ts'enhya tí jehe sín.”

Tí tan k'uáyéhe tí sín chjasín Pérgamo

¹² Tsokjian tí nkehe ts'áyéhe tí ángel t'ayakonhen tí nínko Pérgamo: “Mé xíkaha ichro tí nkexro chóna chica espada yánjín taté:

¹³ Janhan ó nóna kaín nkehe tjejoch'erá la ko ó nóna nketí tjejorá ḱxín tí tjejorá la t'etóan ch'ín Satanás la kjónté la jína kuinkachónkirá tí janhan. Jahará kuitóhéhyará kuinkachónkirá tí janhan kjónté tí yaon tsík'en ch'ín Antipas, ijnko nkexro kjuínchexiteyána jína. Jehe sín tsík'óyánxin sín ch'án tí tjejorá ntiha ḱxín ntaha t'etóan ch'ín Satanás.

¹⁴ Kjánchó janhan tjánchá ijnko jje tí jahará ḱxín iso nkehe ntoáhya ch'erá. Siín ntiha chjasín Pérgamo sín tjejorá iso sín tjinkakonhya sín tsítóhe sín tí nkehe k'uékjako ch'ín Balaam, tí nkexro k'uék'etuenhen ch'án tí ch'ín Balac ḱxín tí sín israelita chrókjuasin sín jje chrókjóné sín tí nkehe tsíkjokehe sín tí nkehe tsíkjanoya la ko chróchóna sín chojni chjin ókjé chrókjuasinko sín jje.

¹⁵ Kjaxín xíkaha tí tjejorá la siín iso sín tjinkakonhya sín tsítóhe sín tí nkehe tjako tí sín nicolaítas. Janhan mé tjinkakonhya tí sín a.

¹⁶ Méxra chrókjanrá chrókuinkachónkirá Dios. A ntá tí náhi, la tjoka tsjasán tí tjejorá la tsjánjonkianxian sín tí espada t'axrjéxín ir'va.

¹⁷ Tí nkexro tjinkaon chrókuinhin la chrókuinhin sín tí nkehe nixjéhe Nchakuen Dios tí nínko ntáchro ḱxín: Tí nkexro tsjacha sinchexiteyána sín la tsotjahá sín kjuachaxin chrókjóné sín maná tjechónhen la ko tsotjahá sín ijnko xro tjóá la tí xro la ts'ínixín ihníé sín nixin chónhya ninkexró. Jehó tí nkexro ts'áyéhe mé tsoñohe.”

Tí tan k'uáyéhe tí sín chjasín Tiatira

¹⁸ Tsokjian tí nkehe ts'áyéhe tí ángel t'ayakonhen tí nínko chjasín Tiatira: “Mé xíkaha chro tí Xjeen Dios, tí nkexro ikon éxi yóhe xrohi nene sit'axrjéxín la ko toté éxi chica sine tjákini tsjehe.

¹⁹ Janhan ó ñona kaín tí nkehe tjejoch'erá la ko ó ñona kixin tjuanará la ko tinkachónkirá tí janhan la ko ó ñona tí xra tjejoch'erá la ko ó ñona kixin tjejochonhénrú tóninkákonhyará. La ko ó ñona kixin antsí tjejoch'erá xra ijie ntá tí kjuankixínrú la kénhyó.

²⁰ Kjánchó tjánchíá ijnko jie tí jahará kixin tjánjonrá kjuachaxin tjako tí tjan Jezabel. Kjaxin ntáchro tjan kixin nixja tjan itén Dios kjánchó ch'iyehé tjan tí sín ch'ena xra kixin kjaxin sín chrókjuasinko sín jie chojni chjin ókjé la ko chrókjóné sín tí nkehe tsík'oyán sín tsíkjokehé sín tí nkehe tsíkjanoya.

²¹ A ntá janhan ó kujtoha tjan intsí kixin chrókjuinkí tjan tí tjenkayáxin tjan kjánchó tjinkakonhya tjan sich'e tjan xikaha la tjinkakonhya tjan chrókútohe tjan tí jie tjasinko tjan chojni ntoa.

²² A ntá jie tsjánjuan kjuachaxin tsoníhi tjan tsjak'eták'á tjan cama la ko kjaxin tsjasóte kaín tí nkexro kjuasinko tjan jie tí nunca tsítóehya sín tí nkehe tjinkaon tjan sich'e tjan.

²³ A ntá janhan ts'oyán tí xjeen tí jehe tjan. Ntá kaín tí njnko tsonoxín sín kixin janhan choxian nkehe tónhen asén kaín chojni. A ntá jnkojnko tí jahará la tsjénkaha ná nkexrí tí xra kjuich'erá.

²⁴ A ntá tí í sorá tjejorá chjasin Tiatira tí chréhyará tí nkehe ntoáhya tjako sín la ko tjinkákonhyará chrókónohará tí nkehe jínahya kuénte ch'in Tsochren la xikahó la í tsétuanhyará í jnko xra.

²⁵ A ntá jahará la tí nkehe ó chontará la t'ayakonhénrú hasta tsokjan janhan.

²⁶ A ntá tí sín tsjacha sinchexiteyána sín la ko xikaha sich'e sín hasta tsjixixín kixin janhan tjínkavan xikaha chrókjuich'e sín na mé janhan tsjánjuan kjuachaxin ts'etuenhen sín kaín nación.

²⁷ Na mé xikaha T'aná mé chjina kjuachaxin tsétoan la kjaxin xikaha jehe sín mé ts'etuenhen sín tí nación yóhe chróchónta sín ijnko chica vara kixin chróchjéhe sín tí chí chrók'ókuen tí chí tsík'óna nchetje.

²⁸ Me kjaxin tsotjaha sín tí konotsé tí tji nchítjen.

²⁹ A ntá tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko."

3

Tí tan k'uáyéhe tí sín chjasin Sardis

¹ Tsokjian tí nkehe ts'áyéhe tí ángel t'ayakonhen tí njnko chjasin Sardis: "Xikaha ichro tí nkexro chóna yato Nchakuen kuénte Dios la ko chóna tí yato konotsé: Janhan ñona kaín nkehe ch'erá, ó ñona kixin éxí tsík'en tí xra ch'erá kjónté nchehnerá kixin tjejochónrá.

² T'ayará. Naxa t'ayakonhénrú kjónté í tsjéhya tí nkehe kuítóhe kixin kjaxin tíha mero its'en. Ó k'uíkuan kixin tí xra ch'erá la t'ikon tí Dios kuéntana kixin ntoáhya.

³ Chróxráxinkáonrá tí nkehe tsíxrahohará la ko tíha chrókjuich'erá la chrókjanrá chróxráxinkáonrá Dios. A ntá tí naxa tjejochrinrá la titàya tsjasán éxí ijnko síchee la tsonohyará nkesá tíha.

⁴ Kjánchó naxa siín iso chojni ntaha chjasin Sardis naxa kjuínchekjitahya sín iké sín la jehe sín la ts'ájikjan sín kixin chóna sín ka tjóá kixin jehe sín la jina sín.

⁵ Tí sín tsjacha sinchexiteyána sín la ts'áyéhe sín ka tjóá ts'inkáya sín la ko tsoxíkahya ihnjé sín chóna tí libro ts'inixín ihnjé tí sín tsaá la ko tsochoxian sín nkayakon T'aná la ko nkayakon tí sín ángel kuénte ch'an.

⁶ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko."

Tí tan k'uáyéhe tí sín chjasin Filadelfia

⁷ Tsokjian tí nkehe ts'áyéhe tí ángel t'ayakonhen tí njnko chjasin Filadelfia: "Xikaha ichro tí nkexro tjóá la ko chaxín mé tí nkexro chóna llave kuénte ch'in rey David. A ntá tí tsakitjehé ch'an puera la ninkexró tsjachahya ts'ikjéhe, a ntá tí ts'ikjéhe ch'an puera la ninkexró tsjachahya tsakitjehé.

⁸ Janhan ó ñona kaín nkehe tjejoch'erá. Kjuaké tí tjejorá ijnko puera xitjehé la ninkexró xitjahya ts'ikjéhe. Kjónté intsíkoá kjuachaxin chontará la jahará kjuínchexiteyará tí nkehe kjuákua la ko kjuínchemáhyará tí janhan.

⁹ Tí sín tsíkiteakon Satanás la ntáchro sín kixin judío sín kjánchó jehya sín, xrich'ia sín la chr'éxín tsétuanhan sín ts'ejóxin toch'in sín chrínkí totará la ntá tsonhe sín kixin chaxín janhan tjuahará.

¹⁰ Ó kuítekáonrá tí nkehe kuétuanhanrá la jina tjejorá la mé xikaha janhan ts'ayakonhanrá tí ichrén nkehe tsonhanrá tíó tsi tí nkehe tsonhen kuénté chjasintajni kixin ó jehí xikaha tsonhen kaín chojni tjejó chjasintajni.

¹¹ Janhan mé tjoka ts'inka. Méxra t'ayakonhénrú tí nkehe chontará kixin ninkexró chrókuakitsjahará tí nkehe ó kjuachará.

¹² Tí nkexro tsjacha sinchexiteyàna la ts'óna sín columna kuènte ñinko kuènte Dios kuèntana la nunca xitjahya sátsjixin sín ntíha. La janhan tsokjian ihñé tí Dios kuèntana tsjiko sín la ko tsokjian ihñé chjasén Dios kuèntana mé tí Jerusalén ñixin tsixin nkajní tí tjen Dios kuèntana. Kjaxin tsokjian ñina ñixin tsochónta sín.

¹³ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí ñinko."

Tí tan k'uáyehé tí sín chjasin Laodicea

¹⁴ Tsokjian tí nkehe ts'áyehé tí ángel t'ayakonhen tí ñinko chjasin Laodicea: "Xikaha ichro tí nkexro chaxin ntoá mé tí nkexro chrónka tí nkehe chaxin. Tí kjuachaxièn ch'án kjuich'énaxin Dios kaín nkehe.

¹⁵ Ó ñona kaín nkehe tjejoch'erá. Ó ñona kixin jahará la ní jehya kinrá o sóará. Chrókóchaxin chrókókinrá o chrókóchaxin chrókósóará.

¹⁶ A ntá jahará la yásoará la jehya ikinrá la jehya sóará. A ntá ijie ir'va ó tsíkia tí jahará la ts'itjia.

¹⁷ Ntáchrorá kixin jahará rícorá la imá jina tjejorá la ko ninkehó t'itjáyannya tí tjejorá, ichrorá. Kjánchó chontahyará kjuachéhé la ko jehya jina tjejorá la ko ñóará la ko ntakótánra la ko tjóchinrá.

¹⁸ Méxra ijie ntaxraxinkáonra janhan sintakjihará tí nkehe oro náxrjón ts'ík'axrxéjin tja kixin ntá chaxin ts'ónará rico. La ko janhan sintakjihará ika tjóá kixin ts'ínkayará ntá tsjünhanrá kjuatósuehé kixin í tjóchinhyará. La ko janhan tsánjuan xroan kolirio tsjiankí ikonrá kixin ts'ikonrá.

¹⁹ Janhan mé tsjénuhá kaín tí sín tjuahá. Méxra íchá jina chrókjan sín chrókuinkáchónki sín Dios.

²⁰ Tsjehérá janhan itjén ntója puerta, tjét'eya. A ntá jnkójín nkexro chrókuinhin tí tanná ntá chrókuakitjehé tí puerta ntá chrók'uixanhan ntöe sín la chrókjónékian sín la ko jehé sín la ko janhan.

²¹ A ntá tí sín chrókjuacha chrókjuinchexiteyàna la tsánjuan kjuachaxin ts'ejókjan sín tí tétöanxian ntíha la éxi xikaha janhan kjuacha ntá T'aná kjuanjón kjuachaxin tjékian ch'án tí tjen ch'án t'etöan ch'án ntíha.

²² Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí ñinko."

4

Tí sín tjikosáyehe Dios nkaya nkajní

¹ Ntá chr'éxin janhan k'uikuán ijnko puerta tjexrankéhé nkaya nkajní. Ntá kuñhan ijnko itén nkexro éxi trompeta mé tí nkexro nixjana tí xrankixixín, ntá jehé ch'án nixjana ch'án, ntáchro ch'án kixin:

—T'it'ótjen ntíhi ntá tsjáqoha kaín nkehe tsonhen chr'éxin.

² Ntá tuénxin ikui tí kjuachaxin kuènte Nchakuen Dios k'uayáha ntá k'uikuán tí trono itjen nkaya nkajní ntá ntíha tjetjaxin ijnko nkexro.

³ A ntá tí ch'ín tjetjaxin tí trono mé tjákini tsjehe éxi ixro jaspe o ixro cornalina. A ntá jnkontatjen tí trono itjen ijnko konchecha tjákini tsjehe éxi ijnko xro esmeralda.

⁴ A ntá kjaxin jnkontatjen tí trono k'uikuán í so veinticuatro trono kjaxin tjejótjaxin veinticuatro sín táda, iké sín la tjóá la ko tjejóya kja sín corona tsík'óna ch'ica oro.

⁵ A ntá tí trono kuènte Dios la ntíha sit'axrxéjin tí sitjónkixin la ko sitjonta. A ntá nkayakon tí trono a kjaxin tjejóche yato xrohi la mé tí yato Nchakuen Dios.

⁶ A ntá nkayakon tí trono la kjaxin itjen ijnko ntayaon éxi xroxro tsjehe.

A ntá tí jnkosiné la ko jnkontatjen tí trono tjejó noó nkexro tjejóchón chóna nchónhya ikon nkayakon la ko nóton.

⁷ A ntá tí nkexro tjechón k'uikuán saoxín mé éxi koxra tsjehe. A ntá tí nkexro yóxin tóyóhé éxi koxinta, a ntá tí nkexro ñixin tsjehe éxi chojni. A ntá tí noóxin la éxi kotjuanhnko xritjaká tsjehe.

⁸ A ntá jnkójnko tí noó nkexro tjejóchón chóna injón kanenge sín la chóna nchónhya ikon nóton la ko nkaxenhen, la nchakotjin la ko tie títöehya sín ntáchro sín kixin:

Santo, santo, santo,

Ínchéni Dios, jaha chonta kaín kjuachaxin, jaha xráxin tjen la ko itjen ijie la ko jaha ts'inka ínaá.

⁹ A ntá tí nkexro tjejóchón jnkoyaxon tió tjanchia sín kjuasáyé Dios la ko tjikosáyehe sín ch'án la ko nixjehé sín ch'án chjéhe sín kjuasáyé tí nkexro tjetjaxin tí trono mé tí nkexro tjechón jnkochrixin.

¹⁰ La ntá tí veinticuatro tí sín táda tjejóxin toch'in sín nkayakon ch'án ntíha la tjikosáyehe sín tí jehé ch'án kixin jehé ch'án tjechón jnkochrixin la ko tjakjinjin sín corona tjoka sín tí tjen tí trono la ntáchro sín kixin:

¹¹ Ìnchéni Dios kuènteni, jaha la imá jína la t'ayéhé kjuasáya kíxin tjikosáyahani tí jaha kíxin tí kjuachaxin chonta; kíxin jaha kjuich'éna kaín nkehe síin kíxin jaha kóxrjínhan xíkaha k'óna.

5

Tí libro la ko tí Kolélo

¹ A ntá tí tja chjina tí nkexro tjetjaxin tí trono, k'uíkuan ijnko libro mé tsíkjin sín nkaxenhen la ko nóton la ko mé tsíkjèxin yato sello.

² La k'uíkuan ijnko ángel chóna kjuachaxin ntá kjuanchankí ch'án itsen ntáchro ch'án kíxin:

—¿Nkexro tí jína chrókjuacha chrókuakitjehe tí libro la ko chrókóchrítõn tí sello chóna?

³ La ninkexró ní nkajní 0 ní chjasintajni 0 ní chrínkí nonte tsjachaha tsakitjehe tí libro la ní komáhya sín.

⁴ A ntá janhan la imá tsjanka kíxin naḡa tónoxínhya ninkexró chrókjuacha chrókuakitjehe tí libro 0 chrókjuinchekuáxin tí libro 0 chrókomá nkehe tí ntáchro tí libro.

⁵ Ntá ijnko tí sín táda ntá nixjana ntáchro kíxin:

—Tsjankahya, tsjehé ntihi tí Koxḡa k'uaxrjeníxin Judá la ko tsík'axrjeníxin rey David. Mé kjuacha la ó tsjacha tsakitjehe tí libro la ko tsóchrítõn tí yato sello —ichro ch'án.

⁶ A ntá jnkõsiné tí trono la ko tí tjejó tí noó tí nkexro tjejóchón la ko jnkõsiné tí tjejó tí sín táda ntaha mé k'uíkuan tjejín toté ijnko Kolélo tsjehe éxi tsík'óyán sín mé chóna yato ntéé la ko yato ikon. A ntá tí kon mé tí yato Nchakuen Dios la táha mé tsík'ítuenhen t'ayakonhen kuenté chjasintajni.

⁷ A ntá tí Kolélo a kuákja tí libro itjen tja chjina tí nkexro tjetjaxin tí trono.

⁸ A ntá tió k'uáyéhe ch'án tí libro la ntá tí noó sín tjejóchón la ko tí veinticuatro tí sín táda k'uejõxin toch'in sín nkayakon tí Kolélo. A ntá kaín tí jehe sín chóna sín ison arpa la ko xraá sín ihntí tsík'óna chüca oro tsíkaón chjincõ. Tiha mé oración nixjehe Dios kaín tí sín tsíkjinchetjóá ch'án.

⁹ Itsje sín nkehe nixin ntáchro kíxin:

Jaha mé ijnko nkexro jína kjuacha kuákja tí libro la ko kóchrítuan tí sello; kíxin tsík'óyán sín tí jaha la ko tí ijniá k'uenaxian tí jeheni ts'áyéhe Dios, mé ts'áyéhe ch'án kenxín chojni kjónté nkexrí tsjehe sín la ko kjónté nkexrí nixja sín la ko chojni kénxín chjasin la ko kaín nación.

¹⁰ Jaha tsíkjjch'énani reyes la ko nchät'á sich'ehe ni xḡa Dios kuènteni, la ko jaha tsíkjánjuan kjuachaxin ts'etõanni chjasintajni.

Mé xíkaha ichro sín.

¹¹ Ntá tuénxín k'uíkuan la ko kuínhan itén nchónhya sín ángel tjejó sín jnkontatjen tí trono la ko tí sín tjejóchón la ko tí veinticuatro tí sín táda. Nchónhya millones la ko millones tí jehe sín.

¹² Itsen nixja sín ntáchro sín kíxin:

Tí Kolélo tsík'óyán sín, tíha mé kjuacha k'uáyéhe kjuachaxin ts'etõan la ko k'uáyéhe tí nkehe tjeje kuènte Dios, la ko tí kjuaxrexinkaon jína la ko kjuachaxin sich'e xḡa la ko mé xíkaha tjikosáyeheni ch'án.

¹³ Kjaxin kuínhan kíxin kaín nkehe kjuich'éna Dios síin nkajní la ko chjasintajni la ko tí nkehe síin chrínkí nonte la ko kaín nkehe síin ntayaon la kono tíha mé ntáchro kíxin: Chjeheni kjuasáya tí nkexro tjetjaxin tí trono la ko tí Kolélo kíxin chóna kjuachaxin jnkochrínxín.

¹⁴ A ntá tí noó sín tjejóchón ntáchro sín kíxin:

—Xíkaha tsonhen. Amén.

La ko tí veinticuatro tí sín táda k'uejõxin toch'in sín la chjéhe sín kjuasáyé tí nkexro tjechón jnkochrínxín.

6

Tí yato sello

¹ A ntá k'uíkuan kíxin tí Kolélo kóchrítõn tí xránkíxixín tí yato sello ntá kuínhan ijnko tí noó tí noó tí sín tjejóchón nixja ch'án éxi kjónta, la ntáchro ch'án kíxin:

—Xrákiá tsjehé.

² Ntá k'uíkuan ijnko kokatè tjóá. A ntá tí nkexro tjejen tí kokatè chóna ch'án ijnko arco tí tja ch'án la tsík'áyéhe ch'án ijnko corona. Jehe ch'án mé kjuacha ch'án la naḡa xíkajaha ch'án inaá.

³ A ntá tí Kolélo kóchrítōn tí yóxin sello ntá kuññan tí nkexro yóxin tjechón ntáchro kixin: —Xrákiá tsjehé.

⁴ Ntá sákjuí í jnko kokate kjátse. A ntá tí ch'in tjejen k'uáyéhe ch'an kjuachaxin tsjakjini tí kjuaxróxin siin chjasintajni kixin ntá chojni mé ts'óyan kichó sín kixin jehe ch'an mé tsik'áyéhe ch'an ijnko espada ijié.

⁵ A ntá tí Kolélo kóchrítōn tí nixin sello la ntá kuññan nixja tí nixin nkexro tjechón ntáchro kixin:

—Xrákiá tsjehé.

Ntá k'uikuán ijnko kokate tié. A ntá tí nkexro tjejen tí kokate chóna itja ch'an ijnko báscula.

⁶ La ntá kuññan itén ijnko nkexro jnkosiné tí tjejó tí noó sín tjejóchón mé ntáchro kixin:

—Jehó ijnko kilo trigo ijnko chichaon denario la ko iní kilo cebada ijnko chichaon denario. Kjánchó chrókjuñchek'itjáyanhya tí aceite la ko tí vino. (Tíha mé t'axrjexin tsokjinta.)

⁷ A ntá tí Kolélo kóchrítōn tí noóxin sello ntá kuññan tí noóxin tí nkexro tjechón ntáchro kixin:

—Xrákiá tsjehé.

⁸ Ntá k'uikuán ijnko kokate sine. A ntá tí ch'in tjejen va a mé it'in ch'an Muerte. A ntá nóton tí jehe ch'an la ikui nkehe tóyóhe tí tjejó tí sín tsik'en. Jehe ch'an k'uáyéhe kjuachaxin ts'etqan ch'an noóxin parte chjasintajni kixin ntá ts'óyan kichó sín la tsokjinta la ko ts'enixin sín ichin la ko kaín ko jiéhe siin chjasintajni mé tsjaya va.

⁹ A ntá tí Kolélo kóchrítōn tí n'óxin sello ntá k'uikuán chrínki tí altar tí asén tí sín tsik'enixin tí tan kuente Dios tsíchrónka sín.

¹⁰ Ntáchro sín itsen kixin:

—Jaha mé Inchéni tjóá jina la jaha mé sinchexiteyá tí nkehe tsintáchrúa, ¿la nkesá sinchekitexián ijje tí sín siin chjasintajni tsik'óyan tí jeheni? —ichro sín.

¹¹ A ntá tí sín a mé k'uáyéhe sín iké sín tjóá ntá k'uituñhen sín naḡa ts'ok'éhe sín í so yaon tsoxetajia tí número tí kichó sín ch'ehe xra Cristo naḡa ts'enixin sín éxi k'uén tí jehe sín.

¹² A ntá tí Kolélo kóchrítōn tí injonxin sello ntá xrinahya imá kuinki nonte. A ntá tí yaon la kótié éxi ika tjiko chojni tsik'en. A ntá nitjó k'óna kjátse éxi jni.

¹³ A ntá konotsé sit'ánótjenxin nkajni sitjitsínka nonte éxi yóhe tí inta t'óna to higo la síxènjn tí to yoa tió tsjixraya tí nta kixin tí imá fuerte chjéhe xrintō.

¹⁴ A ntá nkajni k'uitjayan éxi ijnko xroon tsíxreya. Ntá kaín jna la ko tí nonte ntsínsí siin jnkosiné ntayaon sákjuí ókjé.

¹⁵ A ntá kaín tí sín reyes siin chjasintajni la kjaxin tí sín t'etqan la ko chojni rico la ko comandante la ko tí sín chóna kjuachaxin la ko kaín tí sín ch'exón xra la ko tí chojni náhi mé k'uixenhen sín tjo siin nteje ts'ejómáxin sín.

¹⁶ Ntáche sín tí jna la ko tí tjo kixin:

—Xrákiá xrátja tí jeheni nchemáni kixin chrók'uikonhyani tí nkexro t'etqan tjetjaxin trono la ko chrókjuasótehyani tí kjuachakon jie tsjanjon tí Kolélo.

¹⁷ Kixin ó kui tí yaon imá jie kuente kjuachakon la, ¿xa nkexro chrókjuacha chrók'uejó ntíha?

7

Tí sín israelita chóna sello

¹ A ntá chr'éxin k'uikuán noó sín ángel tjejóxin toté sín la jnkojnko sín tjejó sín tí chrínta chjasintajni chónthehe sín tí noó xrintō kixin tsochjéhya xrintō chjini chrítaón chjasintajni la ko ní chrítaón ntayaon la ko nijnko tí nta yoa.

² Kjaxin k'uikuán í jnko ángel kjuixin nó tjítōxin yaon la chóna sello kuente Dios tjechón. Ntá tí ángel mé k'uiyéhe ch'an itsen tí noó ángel tsik'áyéhe kjuachaxin sincheníhi nonte la ko ntayaon.

³ Ntáchro ch'an kixin:

—Náhi, sincheníehya nonte la ko ntayaon la ko kjaxin tí nta la náhi tí naḡa tsíkahya sello totjen tí sín ch'ehe xra Dios kuènteni.

⁴ Kuññan tí número tí sín tsíka sello la me ciento cuarenta y cuatro mil kain tí sín tsik'axrjenixin tí sín israelita.

⁵ Teyó mil tí sín tsíka sello tsik'axrjenixin tí Judá la ko teyó mil tí sín tsíka sello tsik'axrjenixin Rubén la ko teyó mil tí sín tsíka sello tsik'axrjenixin sín Gad

⁶ la ko teyó mil tí sín tsíka sello tsik'axrjenixin sín Aser, la ko teyó mil tí sín tsíka sello tsik'axrjenixin sín Neftalí la ko teyó mil tí sín tsíka sello tsik'axrjenixin sín Manasés

⁷ la ko teyó mil tí sín tsíka sello tsik'axrjenixin sín Simeón la ko teyó mil tí sín tsíka sello tsik'axrjenixin sín Leví la ko teyó mil tí sín tsíka sello tsik'axrjenixin sín Isacar

⁸ la ko teyó mil tí sín tsika sello tsík'axrjeníxin sín Zabolón la ko teyó mil tí sín tsíka sello tsík'axrejeníxin José la ko teyó mil tí sín tsika sello tsík'axrjeníxin sín Benjamín.

Sín nchónhya chojni chóna ka tjóá

⁹ Ntá kjuíxin tíha ntá k'uíkuan nchónhya chojni kaín xín nación la ko kaín xín nkexri tsjehe sín la ko kaín xín nkíva la ko kaín xín chjasin mé tjejóxin toté sín nkayakon tí trono la ko nkayakon tí Kolélo. Nchónhya sín la kohya ninkexró tsjacha ts'ekin nkekjaín tí jehe sín la tjejóya sín ka tjóá la tjejóya kajni tja sín.

¹⁰ Kaín sín itsen nixja sín ntáchro sín kíxin:

Dios kuènteni mé kjuíncheakaáni.

Jehe ch'án mé tjetjaxín tí trono tí tjen tí Kolélo kjuíncheakaáni.

¹¹ Kaín tí sín ángel tjejóxin toté sín jnkotaťjen tí trono la ko jnkotaťjen tí sín táda la ko tí noó sín tjejóhón la ntá k'uejóxin toch'in sín la k'uísen sín hasta káxin ikja sín nonte nkayakon tí trono la tjanchehe sín kjuasáye Dios.

¹² Ntáchro sín kíxin:

Amén. Kjuíncheyaonni Dios la tsochjéheni Dios kjuasáya kíxin kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyeheheni tí kjuachaxin kuènte ch'án kíxin tjinkítsani ch'án jnkochrín. Amén.

¹³ A ntá ijnko tí sín táda kjuanchankína, ntáchro kíxin:

—A ntá tí sín tjejóya ika tjóá la, ¿xá nkexro tíha? la ko ¿xá nketí tsíkjixín sín?

¹⁴ Ntá janhan ntáxrjan kíxin:

—Inchéni, jaha ó noha. Ntá jehe ch'án ntáchro ch'án kíxin:

—Tí sín i tsíkjixín sín tí kjuaxróxinhya k'uék'ejó sín, la tí sín a mé tsíjen sín iké sín la ko tsíkóťjuáxin ijníé tí Kolélo.

¹⁵ Méxra xíkaha ntá ijie tjejó sín nkayakon tí trono kuènte Dios la tjejóch'ehe sín xra Dios nchakotjin la ko tie tí nkaxenhen njínko kuènte ch'án. A ntá tí nkexro tjetjaxín chrítaón tí trono mé t'ayakonhen ch'án sín.

¹⁶ A ntá tí sín a mé ts'enixnhya sín kjinta la ko ts'enixnhya sín ñnta la ko tsochjánxinhya sín yaon la ko ni sóa kohya nkehe sich'ehe sín.

¹⁷ Kíxin tí Kolélo tñen jnkosiné tí trono mé t'ayakonhen ch'án tí jehe sín éxi iko kuènte ch'án la ko sátjiko ch'án tí tjía ntá tjanjon kjuachón la Dios mé sinchexámá kaín tí ntákon tí jehe sín.

8

Tí yatoxín sello la ko tí ihnti oro

¹ A ntá tí Kolélo kóchrítón tí yatoxín sello kuènte tí libro la ntá kohya ninkehó ruido nkajní chjina it'ó hora.

² Ntá tuénxín k'uíkuan yato ángel tjejóxin toté nkayakon Dios la jnkojnko sín k'uáyéhe sín jnkojnko trompeta.

³ Ntá chr'éxin ikui í jnko ángel xraá ihnti tsík'óna chica oro la kjuák'exín toté nkayakon tí altar. K'uáyéhe ch'án nchónhya chjincó tsjak'e ch'án kíxin sátsjiko tí oración kuènte kaín tí sín tsíkjinchetjóá Dios kíxin tsjak'e chrítaón tí altar oro nkayakon tí trono.

⁴ A ntá tí ihnchi kuènte chjincó chríinxín tja tí ch'in ángel tí tjen Dios la ko kjáxin tí oración kuènte chojni tsíkjinchetjóá Dios.

⁵ A ntá tí ch'in ángel kuákja ch'án tí ihnti kjuíncheakaón ch'án xrinta kuènte xrohi kuènte tí altar la ik'ue ch'án chjasintajni. La ntá kjóna la ko nchónhya ruido la ko sítjónkíxin la ko kuínki nonte.

Tí trompeta

⁶ A ntá tí yato ángel mé chóna sín jnkojnko trompeta ó yaxinhin sín kíxin ts'ánoa sín.

⁷ A ntá tí ángel saoxín k'uánoa trompeta ntá k'uániá toni la ko xrohi sínkíkjan jñj mé xíkaha ikui chrítaón chjasintajni. A ntá iche níxin parte nonte la ko níxin parte tí nta la ko kaín tí kayoa síin.

⁸ A ntá tí yóxin ángel k'uánoa trompeta la ijnko nkehe yóhe tsjehe éxi ijnko jñj jíe tjeche la sákjuí kjuíankí ntayaon la ntá níxin parte tí ntayaon la k'óna jñj.

⁹ A ntá tí níxin parte kaín tí nkehe síin tí ntayaon la ik'uén la ko níxin parte kaín tí ntabárcó la xíka.

¹⁰ A ntá tí níxin ángel k'uánoa trompeta la ntá xringhya k'uánótjen ijnko konotsé jíe k'uánótjénxín nkajní mé tjeche éxi ijnko xrohi jíe. K'uánótjen chrítaón níxin parte ntárió la ko tí sí'axrje ntá.

¹¹ Tí konotsé mé it'in Itsjá la tsíkiankí níxin parte tí ntá ntá kótsjá tí ntá la nchónhya chojni ik'uén kíxin tí ntá xíkaha tsíkótsjá.

¹² **A** ntá tí noóxin ángel k'uánoa trompeta la kjuíncheníhi ijnko níxin parte tí yaon la ko níxin parte tí nitjó la ko níxin parte tí konotsé. Méxra tí níxin parte kuítqhe sítié la í kohya t'inkaséyan tí níxin parte tí nchakotjin la ko tí tie.

¹³ Ntá tuénxín k'uíkuañ la ko kuññan ijnko ángel tjetjaká jnkosiné nkajní t'èya ch'án itsen, ntáchro ch'án kíxin:

—Nòa tí sín tjejó chjasintajni tió tsontáchro tí trompeta ts'ánoa tí iní ángel ínaá.

9

¹ **A** ntá tí n'óxin ángel k'uánoa trompeta la k'uíkuañ ijnko konotsé tsík'ánótjenxín nkajní chrítaon chjasintajni ntá k'uáyéhe tí llave kuènte tí tòye ñinka.

² **A** ntá tuénxín xitjehe tí tòye ñinka ntá ntiha chriinxín nchónhya ihnchi kuènte tja ntá tí t'inkaséyanxín yaon la ko tí xriñto k'uúxin tié kíxin tí ihnchi kuènte tí tòye.

³ **A** ntá tí ihnchi mé k'uaxrjexín kochjoa xriñjaká chrítaon chjasintajni. **A** ntá tí kochjoa k'uáyéhe kjuachaxin éxi tí chóna konchjā sijn chjasintajni.

⁴ K'uítuenhen va kíxin sincheniehya va tí kayoa sijn chjasintajni la ko ninkehó nkehe yoa la ko ninkehó ntayoa. Jehó chojni chóntahya sello kuènte Dios tí totjen mé sincheníhi va.

⁵ Kjánchó k'uáyéhya va kjuachaxin ts'óyan chojni. Jehó sinchekjoté va chojni hasta in'ó nitjó la tí kjuatjoté mé yóhe kjuatjoté éxi chojni tsíkjinehe konchjā.

⁶ **A** ntá tí yaon a tsotjinkaon chojni chrók'uen sín la ntá xitjahya its'en sín. Kjónté tjinkaon sín chrók'uen sín la tí muerte sátsíkji ókjé.

⁷ **A** ntá tí kochjoá éxi kokaṭe tsjehe, listo tjen sátsjikjanjon va. **A** ntá tí ikja va itjen nkehe tóyóhe ijnko corona tsík'óna oro la ko tí kàre la tóyóhe éxi kàre chojni.

⁸ **A** ntá tí kaxree va tsjehe tóyóhe éxi kaxihi chojni chjin, a ntá tí neno va la tóyóhe neno koxra.

⁹ **A** ntá tí cuérpoé la tjejkjanjin nkehe tsík'óna chica kíxin kohya nkehe tsonhen va. **A** ntá ruido kuènte kaneneñ la éxi nchónhya carro tinkánkákjen kokaṭe tió xritinká tí sijn kjuanínkaon.

¹⁰ **A** ntá tí ntané va mé tsjiate chojni la éxi ntané konchjā, la tíha mé tsochóna kjuachaxin sincheníhi chojni hasta in'ó nitjó.

¹¹ **A** ntá tí kochjoá mé chóna ijnko nkexro t'etqan mé ijnko ángel kuènte tí tòye ñinka. Tí ángel mé nkiva hebreo mé it'in Abadón la nkiva griego la mé Apolión mé t'axrjexin kíxin táha mé sinchek'itjāyan nkehe.

¹² Mé xikaha kónhen tí kjuachrakon xrankixixín. **A** ntá naṭa t'itjāyan yaá ínaá.

¹³ **A** ntá tí injonxín ángel k'uánoa trompeta la kuññan ijnko itén nkexro k'uaxrjexín tí tjejó tí noó ntéé kuènte tí altar oro tí tjen Dios.

¹⁴ **A** ntá tí itén tí nkexro ntáche tí injonxín ángel chóna trompeta kíxin:

—Tjasintankehé tí noó ángel kuènte tí jínahya tjejóchroé chjinaxón tí ntarío jíé it'in Eufrates.

¹⁵ Ntá xikaha xintankehe tí noó sín ángel kíxin ts'óyan sín tí níxin parte chojni. Mé xikaha yaxínhin sín sátsji sín tí hora la tí yaon la tí nitjó la tí nánó.

¹⁶ Ntá kuññan tí número tí soldado la ko tí kokaṭe la doscientos millones.

¹⁷ Mé xikaha xriñahya k'uíkuañ tí kokaṭe. **A** ntá tí sín tjejójen kokaṭe la tí ntakuin sín chóna nkehe tsík'óna chica kjátse la azul la sine. **A** ntá tí kokaṭe la ikja la éxi kja koxra la tí ir'va la k'uaxrjexín xrohi la ko ihnchi la ko azufre.

¹⁸ **A** ntá níxin parte chojni tsík'enxín tí iní clase tí chin tsík'axrjexín ir'va kokaṭe mé xrohi la ihnchi la azufre.

¹⁹ Tí kjuachaxin chóna tí kokaṭe la k'uaxrjexín ir'va va la ko tí ntané va. **A** ntá ntané la éxi konche tsjehe la tí kja va mé sincheníhi chojni.

²⁰ **A** ntá tí í so chojni kuítqhe k'uénxinhya tí chin a la kjónté kjuinkíhya sín tí nkehe tjenkayáxin sín la kuítqehya sín tinkáchónki sín nchakuen jínahya la ko tí nkehe tsíkjanoya chica oro la ko chica plata la ko chica bronce la ko ixro la ko inta, mé tí nkehe t'ikonhya la ko tienhya la ko tjihya.

²¹ La kjónté xikaha la kuítqehya sín tí nkehe jínahya ch'e la ko tí chrók'óyan kíchó la ko tí nchekjiko kíchó la ko tí chóna sín chojni chjin ókjé la ko tí tjinkaon sín chrókueé.

10

Ijnko ángel la ko tí librito nsí

¹ Ntá k'uíkuañ í jnko ángel imá chonta kjuachaxin k'uínkajinxín nkajní tjenkakjan ch'án tjuj la ko ijnko konchechā chrítaon tí ikja ch'án. **A** ntá tí kàre ch'án imá tjákini tsjehe éxi yaon, a ntá tí toté la éxi xrohi sichr'ákjen.

² Tjexraá ch'án ijnko libro ntsi tjexrankehe, la ntá toté ch'án chjina la chrítaón ntayaon la ntá toté ch'án kjon la chrítaón nche.

³ Ntá xrínahya k'uèya ch'án itsen éxi ijnko koxra tsjánka va tí tónínkaon va mé xíkaha k'uèya la yato kjónta kjuáteyá tí itén ch'án.

⁴ Ntá kjuixin ntáχρο tí yato kjónta la chrókjian ntá kuínhan ijnko itén nkexro nkaya nkajni ntáχρο kíxin:

—Chróchronkahya tí nkehe ntáχρο tí yato kjónta la ko ni chrókjinhya tíha.

⁵ Ntá tuénxín tí ángel k'uíkuan ijnko toté tjekjen ntayaon la ijnko toté tjekjen nche ntá kjuaya tja chjina nó nkajni.

⁶ Ntá kjuasin ch'án testigo tí nkexro tjen jnkochríxin mé tí nkexro a mé kjuich'éna nkajni la ko chjasintajni la ko ntayaon la ko kain xín nkehe síin la ntáχρο ch'án kíxin:

—Í séhya má naxa tsoxrjen

⁷ ntá tsjixraká tí yaon tí yatoxín ángel ts'ánoa trompeta ntá tsoxiteyá tí nkehe jehó Dios nohe kíxin xíkaha tsíchénka ch'án tí sín k'uékjich'ehe ch'án xra ósé k'uéchronka sín itén ch'án.

⁸ A ntá tí itén nkexro kuínhan k'uaxrjexín nkaya nkajni ntá xínixjana inaá ntáχρο kíxin:

—Sátjia tákjá tí libro ntsi tjexrankehe tjexraá tí ángel itjen toté ch'án chrítaón ntayaon la ko chrítaón nche.

⁹ Ntá sákjuia kjuáncháha tí ángel tí libro ntsi ntá jehe ch'án ntáχρο ch'án kíxin:

—Tákjá la inte. A ntá tí ir'va la tsóxé éxi tsjen kjánchó tí tsaa la tsotsjá.

¹⁰ Ntá kuákjaá tí libro ntsi tjexraá tí ángel ntá kjoné. A ntá ir'va kóxé éxi tsjen ntá chr'éxin la kótsjá nkaya tsena.

¹¹ Ntá tuénxín k'uètuanna ch'án kíxin:

—Inaá tsochronkaxián itén Dios tsinhin nchónhya chjasin la nación la ko nkiva la ko tsinhin tí sín reyes.

11

Iyó testigo

¹ A ntá chjina ch'án ijnko ntavara éxi tji tsjehe tsjáχροaxián ntá ntáχρο ch'án kíxin:

—T'àyá tjáχροa nkaxenhen njnko kuente Dios la ko tí altar la tékia nkekjaín nkexro tjejó ntíha tinkáchónki Dios.

² Kjánchó tí ntásin itjen ntója njnko la tjáχροahya kíxin táha ó tsík'áyéhe tí sín tsíkjixin kjín la ntá jehe sín tsjikosáyehya sín tí chjasin tjóá Jerusalén ijnko cuarenta y dos nitjó.

³ A ntá mé janhan tsochr'an iyó testigo kuéntana tsonixjaxinna mil doscientos sesenta yaon. Tí iké sín la ika tíe ts'ejóya sín.

⁴ Tí yaá testigo i mé iyó nta olivo la ko iyó candelero tjejó tí tjen Inchéni kuente chjasintajni.

⁵ A ntá tí jnkojín sín tjínkaon sich'ehe sín dañó la jehe sín la xrohi ts'axrjexín ir'va sín la tsoche kain tí sín nínkakonhen sín la mé xíkaha its'en kain tí sín tjínkaon sich'ehe sín dañó tí jehe sín.

⁶ A ntá tí testigo i chónka kjuachaxin ts'ikjehe nkaya nkajni kíxin í ts'aniáhya chrin tí tsonixja sín kuente Dios la ko kjáxin chónka sín kjuachaxin tsontáche sín tí ntá kíxin ts'óna jni la ko sinchekjasótexín sín chojni chjasintajni nchónhya clase chin nchónhya veces éxi tí tjínkaon sín.

⁷ A ntá tí kjuixinhin sín tí xra ntá tí ko jiehe ts'axrjexín tí tòye njnka mé tsjankíxin tsjanjonko tí jehe sín ntá tsjacha va ts'óyan va tí jehe sín.

⁸ A ntá tí cuérpé sín tsitóhe sítsínka tí calle kuente chjasin jié tí tsíkjak'enkani sín Inchéni ntacruz mé tí chjasin mé kjáxin nchek'in sín Sodoma la ko Egipto.

⁹ A ntá iní yaon ko t'ó la kain chojni itsjé chjasin la ko kain nkexri tsjehe sín la ko nchónhya nkiva la ko nchónhya nación ts'ikon sín tí chojni tsík'en tjejósínka sín ntíha la ko tsjanjonhya sín kjuachaxin tsoxravá tí chojni tsík'en a.

¹⁰ A ntá tí sín tjejó chjasintajni tsochéhe sín kíxin xíkaha tsík'en tí sín a la antsí má tsochéhe sín la tsochr'án sín nchónhya nkehe nchekitonhen kichó sín kíxin xíkaha ik'uén tí yaá sín k'uéchronka itén Dios kíxin jehe sín kjuaxróxinhya k'uék'ixin sín tí chjasintajni tí k'uék'ejó tí sín a.

¹¹ A ntá chr'éxin ó k'uátsínka iní yaon ko t'ó la ntá Dios kjuínchexechón tí iyó tí sín a inaá la k'uàya sín inaá la ntá kain chojni k'uíkon la imá chrakon sín.

¹² Ntá tuénxín tí iyó sín testigo kuínhin sín ijnko nkexro nixja itsen nkaya nkajni ntáχρο kíxin:

—Chriyan xrakía antsí ntíhi.

Ntá chriinxín sín nkajni ijnko tjuj. A ntá kain tí sín nínkakonhen sín la k'uíkon sín kíxin xíkaha kónhen sákjuj tí iyó sín a.

¹³ Ntá tuénxín imá kuínkí nonte la ntá ijnko ite parte chjasin ntiha la k'uitjáyán la yato mil chojni tsík'en kixin tí kuínkí nonte. A ntá kaín tí sín xéhe imá chrakon sín la kjuankixin sín tinkáchónki sín Dios la tjanchia sín kjuasáya.

¹⁴ Mé xikaha kónhen tí yóxin kjuaxikaon la ntá tuénxín itsi tí nixin kjuachrakon ínaá.

Tí yatoxín trompeta

¹⁵ A ntá tí yatoxín ángel k'uánoa trompeta ntá kuínhin sín ijnko tan nkajní itsen ntáchro kixin:

A ntá tí sín k'uáyéhe kjuachaxin kuente chjasintajni la ó kjaxin nchexiteyéhe sín

Ínchéni Jesucristo

kixin jehe Jesucristo mé ts'etqan ch'án jnkochríxín.

¹⁶ A ntá tí veinticuatro tí sín táda tjejótxajín sín trono nkayakon Dios la mé k'uísén sín hasta káxin ikja sín nonte la tjanchehe sín kjuasáya Dios.

¹⁷ Ntáchro sín kixin:

Tjáhani kjuasáya jaha Ínchéni Dios imá chonta kjuachaxin.

Jaha itjen la ko xráxin tjen la ko jaha ts'inka ínaá.

Kixin jaha k'uayéhe kjuachaxin jié kixin xráxin tétqan.

¹⁸ A ntá kaín tí nación kónínkaon,

a ntá ó kui tí yaon jaha sínchekjasóte sín

la ko kjaxin jaha sínchekitqexián ijíe tí sín tsík'en

la ko tsjénkehé tí sín kjuít'aha xra chrónkaxín itán

la ko tí sín ó kjuínchetjóá la ko tí sín kjuikosáyehe tí ihniá,

mé tí chojni nteto la ko tí sín chánjan ntsintsí.

Jaha tjoka sínchek'itjáyán tí sín chrókjuinчек'itjáyán chjasintajni.

¹⁹ A ntá xitjehe tí nínkqe Dios tjen nkaya nkajní, a tí nkaxenhen kónoxín tí caja tjinká tí nkehe tsík'etqan Dios. A ntá sítjónkixin la ko nchónhya ruido sítjonta la ko kuínkí nonte la ko imá tsánka k'uániá toni.

12

Tí chojni chjin la ko tí dragón

¹ A ntá kónoxín nkajní ijnko kjuaxroan jié mé ijnko chojni chjin iké tjákini éxí yaon tsjehe la chrínki tqté tjan itjen nitjó. A ntá tí kja tjan tjenkáya ijnko corona chóna teyó konotsé.

² A ntá tí chojni chjin a mé tjejá tjan la t'èya tjan kixin tjté tjan kixin sínchekokjíhi tjan xjeen tjan.

³ Kjaxin kónoxín íjnko kjuaxroan nkajní mé ijnko dragón kjátse chóna yato kja la ite ntéé la jnkojnko corona jnkojnko kja. [Tí dragón mé ijnko kots'aja jié.]

⁴ Tí ntané mé nkánkákjen nixin parte konotsé kuente nkajní la ik'ue chrítaón chjasintajni. A ntá tí dragón kjuák'e chók'èxin tí tjen tí chojni chjin mero tsokjhi xjeen kixin tjinkaon tjoka chrókjone tí xjan tsokjíhi.

⁵ A ntá tí xjan kjuínchekokjíhi tjan mé xjan ntoa kixin jehe ch'án mé ts'etuénhen ch'án kain nación la tsochóna ch'án ijnko vara chica ts'etqanxín ch'án. Ntá tí xjeen tjan la mé Dios sákjuiko tí tjen ch'án t'etqan ch'án.

⁶ A ntá tí chojni chjin la kuínká tjan sákjuí tjan nteje kixin tsíkjincheyóxin Dios nketí sátsji tjan kixin ntaha tsoxranjon nkehe sine tjan mil dos cientos sesenta yaon.

⁷ Ntá chr'èxin xrínahya k'uúxin kjuanínkaon jié nkajní la mé tí arcángel Miguel la ko tí í so ángel xríko ch'án mé kjuánjonko sín tí dragón, la tí dragón la ko tí ángel kuente mé kjuánjon sín.

⁸ Kjánchó kjuachahya tí dragón la kohya lugar kuente nkaya nkajní.

⁹ Mé xikaha kuakitsjexín sín tí dragón nkajní. Jehe mé tí konche ósé ikjí mé nchek'in sín diablo la ko Satanás. Jehe mé k'uékjich'iyehé tí chojni kuente chjasintajni. Jehe la ko tí sín ángel kuente k'uaxrjexín ntiha la kjuitsínka chjasintajni.

¹⁰ Ntá kuínhan itén ijnko nkexro nkaya nkajní itsen nixja ntáchro kixin:

—Ó kui tí tsaáxinni tí kjuachaxién tí Dios kuénténi la ko tí kjuachaxin t'etqan Cristo kixin ó k'uaxrjexín nkajní tí nkexro t'eka jié tí kichó ní mé kjuanchia jié nchakotjin la ko tie nkayakon Dios kuénténi.

¹¹ Tí sín kichó ní la kjuacha sín kuaáxin sín kixin tí ijníe tí Kolélo k'uitjáyán la ko kixin jehe sín chrónkaxín sín tí tan tsík'áyéhe sín la chrakonhya sín kjónté chrók'uenxín sín.

¹² A ntá jie la tócháhará kaín rá tjejorá nkajní. Ntá nóa tí sín tjejó chjasintajni la ko ntayaon kixin k'uínkajin tí ch'ín diablo la imá nínkaon ch'án kixin ó nohe ch'án kixin í kánhyó sé tsjak'e ch'án.

¹³ Ntá tí ch'ín dragón ó nohe kixin k'uánótjexín nkajní ikui chjasintajni ntá sákjuichréhe tí chojni chjin chóna tí xjan ntoa kixin chrókjuinчек'itjáyán tjan.

¹⁴ Kjánchó tí chojni chjin k'uáyéhe yaá kanenge kuente kotjuanhnko ijié kixin jina tsjaká tjan sátsji nteje kixin ntá ikjin tsitöhe tí konche. Sátsji tjan kixin ntiha tsoxranjon nkehe sine tjan iní nánó ko t'ó.

¹⁵ A ntá tí konche mé k'uaxrjexín ntá ir'va kixin ts'óna ijnko ntario kixin tjinkaon va chrók'uátjoáko tí tjan a tí ntá a.

¹⁶ A ntá tí nonte kjuinkítsa tí tjan a kixin xitjehe ir'va nonte la kaín tí ntá k'uaxrjexín ir'va tí konche la ntahó sákjuí k'uúixenhen.

¹⁷ A ntá tí dragón la imá kónínkakohen tí tjan a ná imá kónínkaon kjuánjonko tí í so sín naxá kjéhya tí tjan a kixin naxá titekaon sín tí nkehe tsik'etöan Dios la naxá tinkáchónki sín tí nkehe tsichrónka Jesucristo.

13

Tí yaá bestia

¹ Tí kjuak'é chrínta ntayaon ntá ntaha k'uikuán chriinxín ijnko bestia chóna yato kja la ko ite ntée chojni t'ántaxínhin Dios.

² Tí bestia k'uikuán mé tóyóhe kotigre la chóna toté éxi toté ko oso la ko tí ir'va la éxi ir'va koxra. Tí dragón kjuanjón kjuachaxin imá ts'etöan tí bestia a.

³ A ntá ijnko kja tí bestia chóna ijnko tsichrí't'ó jié chóna chrók'uénxín ntá tsíkítóhe jina ntá kuente chjasintajni la chrakon chojni ntá chréhe sín tí bestia.

⁴ Kjuikosáyehe sín tí dragón kixin jehe kjuanjón tí kjuachaxin k'uáyéhe tí bestia ntá kjaxin kjuikosáyehe sín tí bestia la ntá chro sín kixin:

—Xá nkexro chrókóyóhe tí bestia la xá nkexro chrókjuacha chrókjuanjónko tí jehe?

⁵ Kjaxin tí bestia k'uáyéhe kjuachaxin tsonáchro kixin chóna kjuachaxin má la ts'ántaxínhin Dios la tsochóna kjuachaxin cuarenta y dos nitjó.

⁶ Ntá mé xíkaha kjuích'e k'uántaxínhin Dios la ko k'uántaxínhin ihnjé Dios la ko k'uántaxínhin tí njnko tjen nkaya nkajní la ko kaín tí sín tjejó ntiha.

⁷ Kjaxin tsik'áyéhe kjuachaxin tsjanjonko tí sín tinkáchonki Dios hasta tsjacha ts'etuenhen tí sín ntá k'uáyéhe kjuachaxin ts'etuenhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín nación.

⁸ A ntá tí bestia mé kaín xín chojni siín chjasintajni mé tsjikosáyehe sín tí bestia. Tí chojni a mé ts'inixínhya ihnjé tió k'óna chjasintajni, mé ts'inixínhya ihnjé sín tí libro ts'inixín ihnjé tí sín tsaá. Tí xroon a mé chóna tí Kolélo tsik'óyan sín.

⁹ La jnkojín nkexro tjinkaon chrókuinhin la chrókuinhin tíhi.

¹⁰ Tí nkexro sátsjiko tsjik'ikjehe í so chojni la kjaxin ch'án ts'ikjehe ch'án la tí nkexro tsjayaxín espada la kjaxin espada ts'enxín. A ntá tí nkexro tinkáchónki Dios la t'ichjánxin tsonínkakonhya la ko tsochóna fe.

¹¹ A ntá chr'éxin k'uikuán í jnko bestia k'uaxrjexín nonte, chóna yaá ntée éxi tsjehe ntée coronta la mé nixja éxi nixja tí dragón.

¹² Tí bestia la chóna kaín xín kjuachaxin éxi k'uéchóna tí bestia saoxín tí k'ué la t'etuenhen tí sín siín chjasintajni kixin tinkáchónki sín tí bestia saoxín mé tí bestia tsichrí't'ó kja ntá tsíkítóhe jina.

¹³ Kjaxin kjuasin kjuaxroan jié hasta xrohi k'uánójtjénxin nkajní ikui nonte ntá nchónhya chojni k'uúkonxín kon sín kixin xíkaha kónhen.

¹⁴ Mé xíkaha tí bestia tsik'áyéhe kjuachaxin kjuasin kjuaxroan tí tjen tí bestia saoxín la kjuích'iyehé nchónhya chojni siín chjasintajni. La ntá k'uétuenhen tí sín siín chjasintajni sich'éna sín ijnko nkehe tsikjanoya éxi yóhe tsjehe tí bestia tsichrí't'oxín espada la kjónté xíkaha naxá kjuák'echón.

¹⁵ A ntá tí yóxin bestia k'uáyéhe kjuachaxin tsochjéhe kjuachón tí nkehe tsikjanoya tóyóhe tí bestia saoxín kixin ntá tí nkehe tsikjanoya la jina tsonixja la ko jina ts'etöan its'en kaín nkexro tinkáchónkihya tí jehe.

¹⁶ Kjaxin ts'etöan kixin kaín chojni tsochóna marca, á chojni hyé o chojni ntsínsí, la á chojni rico, la á chojni nóa la á chojni ch'exón xra la ko chojni náhi, mé kaín sín tsochóna sín marca, á tja sín chjina o totjen sín.

¹⁷ Ntá ninkexró xitjahya ts'ena la ko ninkexró xitjahya sinchekji tí chónahya sín marca o ihnjé tí bestia o chónahya sín número kuente ihnjé tí bestia.

¹⁸ T'ichjánxin chrókiénxínrá tíhi. Tí nkexro tienxín la chrókónohe tí número chóna tí bestia kixin tíhi mé tí número chóna ijnko chojni la mé tí número mé seiscientos sesenta y seis.

14

Tí nkehe itsje tí ciento cuarenta y cuatro mil

¹ A ntá k'uikuan tí Kolélo tjexin toté chrítaon tí jnā Jerusalén. Jehé ch'án tjeko ch'án ciento cuarenta y cuatro mil chojni ts'ínixín totjen sín ihnjé tí Kolélo la ko ihnjé It'é ch'án.

² Ntá tuénxín kuinhan ijnko itén nkexro kujxin nkaya nkajní mé ijnko ruido éxi nchónhya ntario la ruido éxi sitjonta itsen la éxi ijnko ruido nchónhya chojni it'in sín isón arpa.

³ Itsje sín nkehe nxin nkayakon tí trono la ko nkayakon tí noó nkexro tjejóchón la ko tí sín táda. Nijnko nkexro chrók'uitjahya tí nkehe tjejótsje sín; jehó tí sín ciento cuarenta y cuatro mil mé sín tsikaá k'uék'ejó chjasintajni.

⁴ Tí sín a mé k'uéchóntahya sín itsje chojni chjin la tjóá sín la chréhe sín tí Kolélo kjónté nketí k'uáji. Tí sín a mé kuaá sín tí k'uék'ixín chojni k'uékjasin jie la ko tí sín a mé éxi ijnko ofrenda xrankixín k'uáyéhe Dios la ko tí Kolélo kjaxin.

⁵ Kónoxínhya ninkehó kjuach'ia k'uaxrjexínhya ir'va sín. La tí sín la ninkehó jie chóntahya sín tí tjejó sín nkayakon tí trono kuénte Dios.

Tí nkehe chrónka tí iní ángel

⁶ A ntá k'uikuan í jnko ángel tjetjaká jnkosiné nkajní chrónka tí tan tsaáxinni jnkochríxin tsinhin tí sín síin chjasintajni, mé tsinhin kaín nación la ko kaín nkexri tsjehe chojni la ko kaín xín tan la ko kaín chjasin.

⁷ Ntá t'èya itsen ntáchro kixin:

—Chróchakonrá la chrórxáinkáonrá Dios la chróchjehérá ch'án kjuasáya kixin ó kjuixraká tí yaon sinchekitoxén ch'án ijie chojni. Tjikosáyhérá ch'án kixin jehé ch'án kjuích'éna ch'án nkajní la ko chjasintajni la ko ntayao la ko tí sít'axrje ntā.

⁸ Ntá xíki yóxin ángel, ntáchro kixin:

—Ó kjuixin kjuítsínka, ó kjuixin kjuítsínka tí chjasin jie Babilonia. Mé ntiha kujxin tí vino kókuaxín sín kaín nación ntá kjuasin sín jie chónka sín chojni chjin ókjé.

⁹ Ntá xíki tí nixin ángel nixja itsen, ntáchro kixin:

—Jnkojín sín tsjikosáyehe sín tí bestia la ko tí nkehe tsíkjanoya kuénte o tsitqhe sín tsochónka tí marca tí totjen sín o tí tja sín,

¹⁰ mé t'ichjánxin its'i sín tí vino tsjasótexín sín kujxin tí tjen Dios kixin xikaha tjechónhen tí kjuanínkaon kuénte Dios ntá ntiha tsjasótexín sín tí xrohi la ko azufre mé xikaha tsonhen tí sín a ts'íkon tí sín ángel kuénte Dios la ko tí Kolélo.

¹¹ Tí ihnchi kuénte xrohi sítjasótexín sín síchriin jnkochríxin la tí sín a kuinkáchónki tí bestia la ko tí nkehe tsíkjanoya kuénte o chónka sín ihnjé kuénte.

¹² A ntá tí sín tinkáchónki Dios la kuítekaon sín tí nkehe k'uetqan ch'án la ko naxā jína tinkáchónki sín Jesús mé t'ichjánxin chrókuítqehya sín titekaon sín ch'án.

¹³ Ntá kuinhan itén ijnko nkexro kujxin nkajní ntáchro kixin:

—Ikjian tñi: “Náxrjón tjejó tí nkexro kjónté its'en sín ijie o chr'èxin kixin tinkáchónki sín Ìnchéni.” Kjā jína, ichro Nchakuen Dios, kixin tí jehé sín ts'ok'éhe sín kixin ó kjuích'e sín xra la tí xra kjuích'e sín mé kjuacha sín.

Tí nkehe tsík'óna chjasintajni

¹⁴ Ntá xrinahya k'uikuan ijnko tjuj tjóá la chrítaon tí tjuj tjetjaxin ijnko nkexro éxi yóhe tsjehe tí Xjeen Dios Tsík'óna Chojni tjenkáya ijnko corona tsík'óna chica oro tí kja ch'án la ko ijnko chica hoz imá taté tjexraá ch'án.

¹⁵ A ntá nkaxenhen njnko mé k'uaxrjexín í jnko ángel itsen nixja ch'án nixjehé ch'án tí nkexro tjetjaxin chrítaon tjuj ntáchro ch'án kixin:

—Tjankíxian tatexian chica hoz kixin ó kjuixraká tí yaon tsotjá tí nkehe síin chjasintajni kixin tí nkehe tsík'óna chjasintajni la ó tsícha.

¹⁶ Ntá tuénxín tí nkexro tjetjaxin chrítaon tjuj ntá kjuínchek'átsínka ch'án chica hoz kuénté chjasintajni la kjuenájín ch'án nkehe tsík'óna chjasintajni.

¹⁷ Ntá k'uaxrjexín í jnko ángel tí njnko tjen nkaya nkajní la kjaxin sákjuiko ch'án ijnko chica hoz imá taté.

¹⁸ Ntá sákjuixin í jnko ángel tí tjen altar la chónka ch'án kjuachaxin kuénte xrohi la itsen k'uíyehé ch'án tí nkexro chónka tí chica hoz imá taté la ntáchro ch'án kixin:

—Tjankíxian tatexian tí chica hoz taté la tjankíxian itjā tí racimos to uva tsík'óna chjasintajni kixin ó tsichjé to —ichro ch'án.

¹⁹ A ntá tí ángel kjuínchek'átsínka tí chica hoz chrítaon tí nonte ntá chrínjin tí to uva tsík'óna tí nonte ntiha. Ntá sákjuík'enka ch'án to tí tjat'o ts'ényaxín sín to. Tíha mé t'axrjexín kixin xikaha Dios sinchekjasóte chojni.

²⁰ A ntá tí to uva tsík'ényaxín sín tjat'o tí ikon chjasin a ntá tí tjat'o a mé k'uaxrjexín nchónhya jñi noixín éxi tí freno tjinká ir'va kokatē la trescientos kilómetro kjínxin sátsíkji tí jñi a.

15

Tí yato tí ángel la ko tí chin tsjixixín

¹ Ntá k'uikuán tí nkajní í jnko kjuaxroan jíé mé ijnko kjuachrakon: mé tí yato sín ángel kuikao tí yato chin tsjixixín tsonéxín chojni. Tíha mé tí kjuaninkaon kuénte Dios tsjixixín.

² Kjaxin k'uikuán ijnko nkehe tóyóhé ijnko ntayaon tsík'óna éxí xrosentá tsínkíkjan xrohi. La tí sín tsíkjacha kixin kuinkáchónkihya sín tí bestia la ko tí nkehe tsíkjanoya kuénte la ko kuáhya sín tí número kuénte ihnié tí bestia mé tjejóxin toté sín chjinxaxón ntayaon tsík'óna éxí xrosentá la ko chóna sín isón arpa tsíkjanjon Dios tsík'áyéhe sín.

³ Itsje sín isón k'uétsje ch'in Moisés, tí nkexro kjuích'ehe xra Dios la ko isón kuénte tí Kolélo la mé ntáchro kixin:

Imá ijíé tí kjuaxroan kuéntá kixin kaín nkehe tsíkijch'éna.

Jaha Ínchéni Dios kaín kjuachaxin chonta.

Ntoá la ko chaxín tí ntja kuéntá.

Jaha mé ijnko Rey t'etqan kuénte chjasintajni.

⁴ ¿Xá nkexro chrakuanhya tí jaha Ínchéni?

¿Xá nkexro tjáhya kjuasáya kixin jaha mé ijnko nkexro jína tjóá?

Kuénté chjasintajni tsjikosáyehe sín tí jaha

kixin k'uíkon sín tí xra tsíkijch'e la jína tíha.

⁵ Kjuixin tíha la k'uikuán nkajní tjebrankehe tí njnko la ko tí cuarto tjóá t'inkachjina tí nkehe tsík'etqan Dios.

⁶ A ntá tí njnko a k'uaxrjexín yato ángel kuikao yato chin. Tí iké sín la ika tjete tjóá tjákini. A ntá tí cinta chóna ntakuin sín mé jehó oro.

⁷ A ntá ijnko tí noó tí nkexro tjejóchón mé kjuanjon ijnko copa k'uáyéhe jnkojnko tí yato ángel mé copa tsík'óna chica oro tsíkaón tí nkehe tsjasótéxín chojni kuixín tí tjen Dios tí nkexro tjechón jnkochríxín.

⁸ A ntá tí nkaxenhen njnko la tsíkaón ihnchi kuixín tí kjuachaxin jíé kuénte Dios la nijnko nkexro xitjahya ts'ixenhen ntiha tsjixinjian ts'átsínka tí yato tí chin kuikao tí yato ángel.

16

Tí copa tjínká nkehe tsjasótéxín chojni

¹ Ntá kuñhan ijnko itén ijnko nkexro imá itsen k'uaxrjexín nkaxenhen njnko, ntáche tí yato sín ángel kixin:

—Sátjia tikíkjanjian chrítaón chjasintajni tí nkehe tjía tí yato copa la táha mé tsjasótéxín chojni kuixín tí tjen Dios —ichro ch'án.

² A ntá tí ángel saoxín sákjuik'itji tí nkehe tjía tí copa chrítaón chjasintajni. A ntá kaín tí chojni chóna marca kuénte tí bestia la ko tjikosáyehe sín tí nkehe tsíkjanoya kuénte tí bestia mé tsík'ayan sín tosóa, imá tjetéhe sín.

³ A ntá tí yóxin ángel sákjuik'itji tí nkehe tjía copa chrítaón ntayaon. A ntá tí ntayaon la k'óna jni éxí jnié ijnko chojni tsík'óyán kichó la kaín ko sinkánki ntayaon ik'uén.

⁴ A ntá tí nxín ángel sákjuik'itji tí nkehe tjía copa chrítaón ntario la ko chrítaón tí ntá sit'axrje tòye, la ntá tí ntá k'óna jni.

⁵ Ntá tuénxín kuñhan nixja tí ángel kuénte ntá ntáchro kixin:

—Jaha mé ijnko nkexro jína kixin kjuinchekitqexián ijíé chojni. Íchéni jaha ijnko Dios jína, ósé tjen la ko naxa tjen ijie

⁶ Kixin jehe sín k'óyán tí sín tinkáchónki tí jaha la ko tí sín tsíchrónka itan la ntá jaha Ínchéni chjehé sín jni its'ín sín kixin mé xikaha sítjasóte tí jehe sín.

⁷ Kjaxin kuñhan nó altar ijnko nkexro ntáchro kixin:

—Chaxín Ínchéni Dios, jaha mé chonta kaín kjuachaxin la ntoá jína kjuinchekitqexián tí ijie a.

⁸ A ntá tí noóxin ángel sákjuik'itji tí nkehe tjía copa chrítaón yaon, a ntá tí yaon antsí k'uáyéhe kjuachaxin tsosóa kixin tsochjánxin chojni tí sóa kuénte.

⁹ A ntá kaín chojni chjánxin tí imá sóa kuénte yaon la k'uántaxínhin sín ihnié Dios mé jehe ch'án mé tí nkexro chóna kjuachaxin kuénte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

¹⁰ A ntá tí in'óxin ángel sákjuik'itji tí nkehe tjía copa chrítaón tí trono t'etqanxín tí bestia. A ntá kaín tí k'uéchóna kjuachaxin k'uék'etqan tí bestia la k'uúxin tié. A ntá tí chojni a la netja nejen sín kixin tjetéhe sín.

¹¹ La kjónté xikaha la kjuinkíhya sín tí nkehe jínahya ch'e sín. Náhi. Íchá má k'uántaxínhin sín Dios tjen nkaya nkajní kixin tjetéhe sín kixin xikaha kónhen sín.

¹² A ntá tí injonxín ángel sákjuik'itji tí nkehe tjiá copa chrítaón ijnko ntario jié it'in Eufrates. A ntá tí ntario la kjuixié kixin jina tsakitjehe sín ijnko ntia tsjixín tí sín rey tsjixín nó tjtioxín yaon.

¹³ A ntá k'uikuán kixin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjexín iní nchakuen tí jínahya éxi korána tsjehe.

¹⁴ Tíha mé nchakuen tí jínahya kjuasixín sín kjuaxroan. A ntá sákjuikjinchekójkotsé kain rey sín chjasintajni kixin tsjanjon sín ijnko yaon jié kuènte Dios chóna kain kjuachaxin.

¹⁵ "Tsjehe, janhan titàya ts'inké éxi ijnko xichee. Chéhe tí nkexro tjejótsjehe la t'ayakonhen tí iké kixin ts'itjáyannya kixin chrók'uajihya sín tjóchin sín la chrókósuèhya sín kixin chrókónoxín kixin tjóchin sín."

¹⁶ A ntá tsojnkotsé tí sín rey tí nonte it'in Armagedón nkiva Hebreo.

¹⁷ A ntá tí ángel yatoxín sákjuik'itji nkehe tjiá copa chrítaón tí xrinto ntá nkaxenhen njnko nkaya nkajni k'uaxrjexín ijnko itén chojni itsen nixja mé kuixín tí tjen tí trono la ntáχρο kixin:

—Ó kjuixin kónhen tíha.

¹⁸ A ntá sitjónkixin la ko ruido sitjonta la ntá imá kuínki nonte fuerte. La desde tí kjuankixin k'uixin chojni chjasintajni la xikahya kónhen kuínki nonte a ntá jie antsí fuerte kuínki nonte.

¹⁹ A ntá tí chjasin jié xitjehe nonte la iní k'óna, chjenca. La koi kain chjasin sín chjasintajni tsík'oya. A ntá Dios xraxinkaon kixin chrókjuínchekjasóte tí sín sín tí chjasin jié Babilonia la k'uetóan ch'án its'i sín tí vino tsjasótexín sín kixin mé xikaha kónínkaon ch'án.

²⁰ A ntá kain tí nonte sinkátoón ntayaon k'uánianki ntá la ko tí jna k'uitjayan.

²¹ A nta nkajni k'uánótjexín toni ijié xratja chojni mé cuarenta kilo yexín jnkojnko toni. A ntá chojni na antsí má k'uántaxínjin sín Dios kixin tí xikaha kónhen sín xratja sín toni la imá kjoté sín.

17

Tsjasóte tí tjan jínahya

¹ A ntá ikui ijnko tí yatoxín ángel chóna tí yato copa la ntáχρο ch'án kixin:

—Xrákiá tsjáqoha nkexri tsjasóte tí chojni chjin tjasin jie tjetjaxín tjan chrítaón tí nchónhya ntá.

² Tí sín rey t'etoan chjasintajni kjuasinko tjan jie la ko tí chojni sín chjasintajni kókuaxín sín tí vino a mé kjaxín kjuasixín sín jie.

³ A ntá tuénxín Nchakuen Dios sákjuikian nteje ntá k'uikuán ijnko chojni chjin tjetjaxín chrítaón ijnko bestia kjátse la kuenté tí ko a la simá ihnjé náxrjónhya tsík'ántaxénxín sín Dios la chóna yato kja la ko ite ntéé.

⁴ A ntá jehe tjan chóna tjan iké tjan morado la ko kjátse la teyá tjan chica oro la ko xro náxrjón la ko perla. Tjexraá tjan ijnko copa tsík'óna chica oro tsikaón nkehe jínahya tsjasixín tjan jie.

⁵ Tí totjen tjan ts'inixín ijnko ihnjé kohya nkexro tienxín. "Tíha mé tí chjasin jié Babilonia, mé iné tí chojni chjin tjasin jie la ko kain chojni jínahya ch'e sín chjasintajni."

⁶ Ntá kónona kixin tí tjan a la tsékanxín tí ihnjé tí sín tinkáchónki Dios la ko tí ihnjé tí sín tsík'enxín tí chrónka sín kixin tinkáchónki sín Jesús. Ntá k'uikuán xikaha imá chrakonna.

⁷ A ntá ijnko ángel ntáχρο ch'án kixin:

—¿Nkekuénté chrakuan? Ntá ijie sjintanoha tí nkehe tienxínnya chojni kuènte tí tjan a la ko kuènte tí bestia tjeqjen tjan chóna yato kja la ko ite ntéé.

⁸ Tí bestia k'uikuán jaha kjuák'e ósé la ijie tjechónhya kjánchó senó tsochrjinxín tí tòye njnka ntá chr'éxin ts'itjayan. A ntá tí sín sín chjasintajni ts'inixínnya ihnjé sín tí libro ts'inixín ihnjé chojni tsaá desde k'óna chjasintajni, la mé jehe sín tsochrakon sín tió ts'ikon sín tí bestia kjuák'e ósé la tsík'en la ntá ijie xikjan inaá.

⁹ Tí jnkojin nkexro chrókienxín la mé tí yato kja la t'axrjexín yato jna tjeqjen tí chojni a.

¹⁰ A ntá tí kja kjaxín t'axrjexín yato rey la ntá in'ó tí sín rey la í t'etuánhya sín ijie la ijnko tí jehe sín t'etoan ijie la í jnko naxa tjihya. A ntá tió tsi jí yatoxín la í kánhyó sé ts'etoan.

¹¹ A ntá tí bestia kjuák'e senó la ijie tjechónhya mé tí jnixín rey la jehe ch'án kuènte tí yato rey la chr'éxin la ts'itjayan.

¹² A ntá tí ite ntéé tsík'ikuan mé ite rey naxa t'etuánhya. A ntá ijie la ts'áyehé sín kjuachaxin ts'etoanko tí bestia kjánchó kánhyó sé.

¹³ Tí ite tí rey la jnkokoá tsjenkayáxin sín la tsjanjon sín kjuachaxin kuènte sín kixin ts'etoan tí bestia.

¹⁴ Tsjanjonko sín tí Kolélo a ntá tí Kolélo la tsjacha ts'etoan kixin jehe ch'án mé Inché kain chojni la ko jehe ch'án mé tí Rey ts'etuénhen kain rey la ko tí sín tjejóko ch'án mé tsík'íyehé Dios la tsík'eyá ch'án sín la jina nchexiteyá sín.

¹⁵ Kǵaxin ntáchro tí ch'ín ángel kǵixin:

—Tí ntá k'uíkuan la chrítaón tjetǵaxin tí chojni chjin tjasin jié la mé t'axrǵexin kǵixin nchónhya chjasin la ko nchónhya chojni la ko nchónhya nación la ko nchónhya nkíva.

¹⁶ A ntá tí bestia k'uíkuan la ko tí ite ntéé la tíha mé tsonínkakenhen tí tjan tjasin jié la tsitoge tjan tjóhín tjan la sine tí bestia tí nto chóna cuérpogé tjan la ko tsoche tí huésogé tjan.

¹⁷ Dios tsík'etuenhen asén sǵin kǵixin xǵikaha sich'e sǵin éxí tjinkaon ch'án kǵixin jnkokoǵá tsjenkayáxin sǵin la ko tsjanjon sǵin kjuachaxin kuènte tí sǵin rey kǵixin ts'etqan tí bestia tsoxiteyája tí nkehe tsintáchro Dios.

¹⁸ A ntá tí chojni chjin k'uíkuan la táha mé tí chjasin jié t'etqan tí sǵin rey t'etqan chjasintajni.

18

Kǵuítsinka chjasin Babilonia

¹ Ntá chr'éxin k'uíkuan í jnko ángel k'uínkajinxin nkajní chóna nchónhya kjuachaxin ntá chjasintajni antsí k'uínkaséyanni tí tjákini tsjehe ch'án.

² Ntá k'uíyato ch'án itsen ntáchro ch'án kǵixin:

—Ó kǵuítsinka, ó kǵuítsinka tí chjasin jié Babilonia. Ntá tí jínahya ó kjuacha k'uíxehen t'etqan ntiha la ntiha síin kaín xín clase nchakuen jínahya la ko síin kǵaké ko xritjaká tjuáhya la ko jínahya.

³ A ntá kaín xín nación kókuaxin tí vino kjuínchekji tjan ntá kjuasinko tjan sǵin jié la ko tí sǵin rey t'etqan chjasintajni kǵaxin kjuasinko tjan jié. La tí sǵin nchekji nkehe chjasintajni kórkoxin sǵin kǵixin k'uéna tjan nchónhya nkehe.

⁴ Ntá kuínhan í jnko itén nkexro kuǵxin nkaya nkajní ntáchro kǵixin:

—T'axrǵexinrá tí chjasin ntiha kǵixin tí jahará tinkachónkirá tí janhan kǵixin chrók'uícayahará tí jjié sǵin la ko chrókjuasótéxínhyará tí nkehe tsonhen sǵin.

⁵ Kǵixin tí nchónhya jié tinkák'ánkí hasta kjuixraká nkajní la Dios ó nohe tí tje chóna sǵin.

⁶ Ch'eherá tjan éxí tí jehe tjan kjuích'ehe tjan í so chojni kǵixin xǵikaha tsjasótéxín tjan. Chrókjuenkehérá tjan iyó veces éxí tí tsíkjich'éna tjan ik'ui í so chojni.

⁷ Antsí chrókjuasóte tjan tóyohé tí nkehe kjuích'ehe tjan kǵixin kjuínchehenke tjan la ko k'uéchóna tjan kaín nkehe tóxrǵínjin tjan. Jehe tjan ntáche asén tjan kǵixin: “Ntíhi tjetǵaxian éxí jnko reina. Jehya ik'ána kǵixin chrókjuasótena.”

⁸ Mé xǵikaha kǵaxin jnkokoǵá yaon itsi tí kjuaxikaon tsonhen tjan mé its'en tjan la ko tsjasótéxín tjan kjinta la tsoche tjan kǵixin Inchéni imá chóna kjuachaxin la jehe ch'án sinchekjasóte ch'án tjan.

⁹ A ntá tí sǵin rey síin chjasintajni tsíkjasinko sǵin tjan jié la ko nchónhya nkehe kjuínchexenko sǵin tjan la mé tsotsjánka sǵin la ts'éya sǵin tió ts'ikon sǵin ts'aya ihnchi tió tsoche tjan.

¹⁰ Ntá jehe sǵin tsitoge sǵin ikjín kǵixin chrakon sǵin kǵixin xǵikaha tsjasóte tjan la tsontáchro sǵin kǵixin:

—Nòa tí jaha chjasin jié Babilonia, chjasin imá t'etqan kǵixin titáya kjuasótia.

¹¹ Tí sǵin xrinchekji nkehe la kǵaxin tsjánka sǵin, t'éya sǵin kǵixin xǵikaha kónhen tí chjasin ntiha kǵixin kohya nkexro ts'enǵehe sǵin tí nkehe sinchekji sǵin.

¹² Kjuínchekji sǵin chica oro la chica plata la ko ixro náxrǵón la ko perla la ko ika náxrǵón lino la ko ka seda la ko ika color morado la kǵátse la ko kǵaxin kaín xín clase nta náxrǵón xraxé la ko tí nkehe tsík'óna neno elefante la ko inta náxrǵón la ko bronce la ko ixro chica la ko ixro mármol.

¹³ Kǵaxin xrinchekji sǵin canela la ko xroǵan xraxé náxrǵón la ko chjincó la ko xroǵan mirra la ko crema la ko vino la ko aceite la ko harina náxrǵón la ko noa trigo la ko iko tamá nkehe la ko kolélo la ko kokate la ko carreta la ko chojni ch'exón xra kǵaxin kjuínchekji sǵin.

¹⁴ Tsontáche sǵin tí chjasin a kǵixin:

—Í chontahya kain to tjete imá k'uékóxrǵínhan. Ó k'uítǵayan kaín nkehe náxrǵón tjete k'uéchonta.

¹⁵ Tí sǵin k'uékjinchekji tí nkehe la kóricó sǵin kǵixin kjuacha sǵin tí xra kjuích'ehe sǵin tí chjasin ntiha. Ikjín k'uéjo sǵin kǵixin chrakon sǵin kǵixin xǵikaha kónhen kjuasóte tí chjasin. Tsjánka sǵin la t'éya sǵin

¹⁶ la tsontáchro sǵin kǵixin:

—Nòa tí chjasin jié. Éxí jnko chojni chjin tsík'itsa ka lino náxrǵón la ko ika morado la kǵátse la ko teyá nkehe oro la ko xro náxrǵón tjete la ko perla.

¹⁷ A ntá jnkorato koá kjuixin kjuéje tí nkehe imá tjete —ichro sǵin.

Kaín tí nkexro t'etqan tí ntabárcq la ko tí sǵin tsík'ixenhen tí ntabárcq la ko tí sǵin ch'e xra chrítaón ntayaon kuitoge sǵin ikjín

¹⁸ la tió k'uíkon sǵin tí ihnchi síche tí chjasin ntiha la k'óyako sǵin kǵixin:

—ǵxá nkexéhe í jnko chjasin chrókóyóhe tí chjasin jié í?

¹⁹ La tǵlǵkanjin kja sín nche la tsjáńka sín t'eya sín kǵxin:

—Nòa tí chjasin jié. Kóricó tí sín k'uéchóńta ntabárcq chritaón ntayaon kǵxin tí chjasin í la ntá jńkorató koá kjuixin k'uíťǵyan tí nkehe chóna sín.

²⁰ A ntá jahará tjejorá nkajńi tócháhará kǵxin xǵkaha kónhen tí chjasin a. Tócháhará jahará k'uájikoará Īńchéni la ko jahará k'uéchronkará itén Dios la ko kań rá kuinkachónkirá tí jehe ch'án kǵxin Dios kjuínchekjasóte tí chjasin a kǵxin tí jié kjuasin sín kjuínchekjasótiará sín tí jahará.

²¹ A ntá ińko ch'ín áńgel chóna kjuachaxin kjuatsen ińko xřǵ éxi ińko xřǵ jié kuénte molino la k'uenki ch'án ntayaon la ntá ntáchro ch'án kǵxin:

—Mé xǵkaha tsǵnhen tí chjasin Babilonia, tí chjasin jié la nunca ts'ikonhya chojni chr'éxin.

²² Nunca tsienhya sín música kuénte isón arpa la ko flauta la ko trompeta tí ntǵa la ko ninxeró xitjahya sich'e ninkehó xřǵ ntiha la ko kǵxin tsienhya sín ninkehó tóvéntó xřǵ molino.

²³ Í ts'inkaséyanxínhya xrohi kuénte ninkehó lámpara la kǵxin í tsienhya sín ts'ixin kia tsotǵhe chojni ntiha. Tí sín k'uékjinčekji nkehe ntiha la imá k'uék'etǵan kuénte chjasintajńi la tí sín k'uékjich'iyehé tí sín siń chjasintajńi la k'uékjich'e sín jíńahya, k'uédkjinchexřǵan sín.

²⁴ A ntá tí chjasin jié ntiha tsíkónoxin ińjé tí sín tsík'en k'uéchronka itén Dios la ko tí sín tinkáchónki tí jehe ch'án la ko kain tí sín tsík'enxín chjasintajńi.

19

¹ Ntá chr'éxin ntá kuńńhan itén nchónhya nkexro tjejó nkaya nkajńi itsen nixja, ntáchro sín kǵxin:

ǵAleluya! Kjuasáyé Dios kuaáxinni la ko jehe ch'án t'inkaséyanxín ch'án tí jeheni la imá chóna kjuachaxin Dios kuénteni.

² Kǵxin jehe ch'án ntoá kjuínchekjasóte ch'án tí tjan kjuasin nchónhya jié kǵxin jehe tjan kjuachroe tjan chojni siń chjasintajńi kǵxin tí nkehe jíńahya k'uékjich'e tjan. Dios kjuínchekjasóte tjan kǵxin k'óyan tjan tí sín k'uékjich'ehe ch'án xřǵ.

³ La ntá kǵxin inaá xántáchro kǵxin:

—ǵAleluya! Kjuasáyé Dios kǵxin tí ihńchi síchexín tí jehe tjan tsotǵehya chriin hasta tí ntihi.

⁴ A ntá tí veinticuarto tí sín táda la ko tí noó nkexro tjejóchón tjejóxin toh'in sín hasta káxin kja sín nonte kjuikosáyéhe sín Dios tí nkexro tjetǵxin tí trono la ntáchro sín kǵxin:

—ǵAmén! ǵAleluya! ǵKjuasáyé Dios!

⁵ Ntá xřínahya kuńńin sín itén ińko nkexro tjen nó trono ntáchro kǵxin: Chjehérá kjuasáya tí Dios kuénteni kań rá ch'ehérá ch'án xřǵ

la kuítekákonhénrá ch'án,

mé kań tí jahará kǵjonte chánjan ntsínsí ǵ chojni ntǵeto.

Tí kia tsotǵhe tí Kolélo

⁶ Kǵxin kuńńhan nkehe éxi itén nchónhya chojni éxi nchónhya ntǵarío sitóvéntó la ko imá itsen siťjonta la ntáchro kǵxin:

ǵAleluya! Kjuasáyé Īńchéni ó kjuankǵxin t'etǵan Īńchéni Dios kuénteni chóna kań kjuachaxin.

⁷ Chrókóchéheni la chrókjuikosáyeheni Dios kǵxin ó kjuixraká tí ǵaon ts'ixin kia kuénte Kolélo.

La tí tjan tsotǵhe la tsíkóyaxínńin tjechónhen,

⁸ mé tsík'áyéhe kjuachaxin tsík'itsa ka lino náxřjón tǵóá tǵákiní.

A ntá tí ka lino náxřjón a mé t'axřjexín kǵxin tí jíńa k'uéjó tí sín tinkáchónki Dios.

⁹ Ntá tí ch'ín áńgel k'uetǵan ch'án kǵxin:

—Ikjjan tíhi: “Náxřjón tjejó tí nkexro k'uáyéhe kjuachaxin sátsji tí kia tsotǵhe tí Kolélo.”

A ntá ntáchro ch'án inaá kǵxin:

—Tí palabra a mé chaxín ntoá nixja Dios.

¹⁰ Ntá kjuak'éxián toh'ian toťé tí áńgel kǵxin chrókjuikosáyaha ch'án, kǵjánchó jehe ch'án ntáchro ch'án kǵxin:

—Xǵkahya chrokǵujch'e kǵxin janhan kǵxian t'aha xřǵ Dios éxi tí jaha la ko éxi tí sín kǵchuá kuíteǵehya kuítekaon tí tan jíńa chřónka Jesús. Jehó Dios mé chrókjuikosáyehé jaha.

Tí nkehe k'uéchronka Jesús mé k'uéchronka tí sín profeta.

Tí nkexro kjuák'ekjen kǵkǵte tǵóá

¹¹ Ntá k'uikuǵan kǵxin nkajńi tǵexrankǵhe la ntaha kónoxin ińko kǵkǵte tǵóá la ko tí nkexro tǵekjen va mé it'in jíńa la ko Chaxín kǵxin ntoá kjuínchekitǵexín ch'án iǵjé chojni la ko ntoá kjuánjńko ch'án chojni.

¹² A ntá tí ikon ch'an mé tjákiní éxí xrohi nene xikaha tsjehe. A ntá tí kja ch'an la chóna nchónhya corona la ko ts'inixín ijnko ihnjé ijnko nkexro la jehó ch'an mé nohe ch'an tíha.

¹³ Tjenkáya ch'an ijnko ka tsik'ixikjanjin jni ntá ihnjé ch'an mé Itan Kuènte Dios.

¹⁴ Chréhe tí sín soldado kuènte nkajní. Iké sín mé ka lino náxrxón tjóá la tjejókjén sín kokaṭe tjóá.

¹⁵ Ir'va tí jehe ch'an k'uaxrxjén espada imá taté kixin táha mé tsjik'óyánxin ch'an tí sín siín káin nación la ko ts'etqanxín ch'an ijnko chica vara. Jehe ch'an mé sinchekitoexín ch'an ijjé sín éxí t'énxin sín to uva toté sín mé xikaha ts'etueñhen ch'an kixin its'i sín vino tsjasótexín sín kixin mé xikaha tsixín tí kjuanínkaon kuènte Dios chóna káin kjuachaxin.

¹⁶ Iké ch'an mé ts'inixín kixin jehe ch'an me Rey t'etueñhen káin rey la ko jehe ch'an mé Inché káin chojni.

¹⁷ Ntá tuénxín k'uikuán ijnko ángel tjejin toté tí tjen yaon la k'uéyato ch'an itsen k'uéyatohe ch'an tí ko xritjaká, ntáχρο ch'an kixin:

—Xrákirá tójkotsérá ntihi kixin Dios tsjanjon nkehe sinterá ijje.

¹⁸ Sinterá cuerpo kuènte reyes la ko sinterá cuerpo kuènte tí sín comandante la ko cuerpo kuènte chojni jiehe la ko nṭoṭe kokaṭe la ko cuerpo kuènte tí sín tsíkjiták'á va la ko cuerpo kuènte káin chojni libre o chojni ch'exón xra la chojni hyé o chojni ntánsí.

¹⁹ K'uikuán tí bestia la ko tí sín reyes t'etqan chjasintajni la ko tí soldado kuènte sín, tsíkójkotsé sín tsjanjonko sín tí nkexro tjejkjen kokaṭe la ko koi tí sín soldado kuènte ch'an.

²⁰ A ntá itsé sín tí bestia kixin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'an kjuaxroan náxrxón nkayakon tí bestia mé xikaha kjuich'e tí nkexro ntoáhya kjuako, kjuich'iyehé ch'an tí sín tsíkítóhe tsika marca kuènte tí bestia la ko kjuikosáyehé sín tí nkehe tsíkjanoya kuènte tí bestia. Ntá tí bestia la ko tí nkexro ntoáhya kjuako itén Dios mé k'uítueñhen sín sátsji tí siín xrohi tsoche tjejóchónxinín sín tsochéxin azufre.

²¹ A ntá tí í so sín la ts'énxín tí espada k'uaxrxjén tí ir'va tí nkexro tjejkjen tí kokaṭe tjóá la káin ko xritjaká ts'ixín tí siín tí cuerpo kuènte tí jehe sín la hasta tsokjehe va sine va.

20

Tí mil nánó

¹ Ntá xrináhya k'uikuán ijnko ángel k'uínkajinxín nkajní tjexaa llave kuènte tí tóye nínka la ko ijnko cadena jie tjexaa ch'an.

² A ntá tí ángel a itsé tí dragón mé tí konche ósé kjí mé tíha tí ch'in diablo la ko Satanás la kjuak'echroé ch'an ijnko mil nánó.

³ Ich'án ch'an sákjuí tóye nínka ntá k'uikjehe ch'an la ko kjuak'e ch'an ijnko sello chrítaón puerta kixin ntá tí dragón chrókjuich'iyehya tí chojni siín káin nación hasta chrók'uatánsinkajia tí mil nánó. A ntá ts'atsínka tí mil nánó ntá tsoxintankehe kjánchó séhya its'e.

⁴ Ntá tuénxín k'uikuán tí trono la ko tí sín tjejótxajin tsik'áyehe sín kjuachaxin sinchekitoexín ijjé chojni. Kjaxin k'uikuán asén chojni tsichrinjin kja kixin kuítekaon sín Jesús la ko tsichronkaxin sín itén Dios. Jehe sín la kuinkáchónkihya sín tí bestia la ko tí nkehe tsíkjanoya kuènte la ko kuítóehya sín ikuá sín marca tí totjen sín o tí itja sín. Mé k'uikuán kixin tsíxechón sín la ko ts'etqanko sín Cristo ijnko mil nánó.

⁵ Ntá í so chojni tsík'en la naxa xechónhya hasta ts'atsinkajia tí mil nánó. Tíha mé xrankixín tsoxechón chojni.

⁶ Náxrxón tjejó tí sín tsíkjinchetjóá Dios mé tí sín a mé senó tsoxechón sín. A ntá tí yóxin chrók'uen sín la tíha chónahya nínkehó kjuachaxin naxa xikaha chrókónhen sín. Jehe sín mé ncha't'á kuènte Dios la ko kuènte Cristo la ts'etqanko sín ch'an tí mil nánó.

⁷ A ntá ts'átsínka tí mil nánó ntá ch'in Satanás tsoxintankehe tí kjichroé.

⁸ La sátsjikjich'iyehé tí chojni siín kuenté chjasintajni la ko sátsjikjich'iyehé tí chjasin Gog la ko Magog. La tsojnkotsé sín kixin tsjanjon sín la ko tí soldado kuènte tí jehe sín. Nchónhya sín tsojnkotsé ntiha éxí tí nchesen siín ntayaon.

⁹ Mé xikaha sátsji sín tí tonxín la ko tí tekaxín nonte la ts'ántatjen sín tí tjejó tí sín tsíkjinchetjóá Dios mé tí chjasin jie tjehe ch'an. A ntá xrohi tsixín nkajní kixin tsochexín tí sín jinahya ts'itjáyanxín sín.

¹⁰ A ntá tí diablo tsíkjich'iyehé tí jehe sín kjaxin sátsji tsochexín xrohi la ko azufre tí sátsíkji tsichexín tí bestia la ko tí nkexro ntoáhya kjuako itén Dios. Mé ntiha mé tsjasótexín nchakotjin la ko tie jnkochríxin.

Tsitoexín ijjé chojni tí tjen tí trono jie tjóá

¹¹ Ntá k'uikuán ijnko trono jie tjóá la ko tí nkexro tjetjaxín nó ntiha. A ntá tí tjen ch'an ntiha la ó k'uitjáyankoá nonte la ko nkajní la í kónoxínhya inaá tí nonte.

¹² Ntá k'uikuān tí sín tsík'en; chojni hyé la ko chojni ntsínsí tjejóxin toté sín nkayakon Dios la ntá xitjehe iso libro la ko xitjehe í jnko libro ts'ínixín ihnjé tí sín tsaá. Ntiha tsitōexín ijíe chojni tsík'en éxí nixja tí í so libro nkehe tí xrā kjuíuch'e sín ts'ínixín ntiha.

¹³ Tí sín tsík'enxín ntayaon la ntiha xrakuaxín sín la tí sín sátsíkji tí síin chojni tsík'en la ntiha xrakuaxín sín kaín sín tsoqchjina sín tsitōexín ijíe jnkojnko sín káxin nkexrí tí xrā kjuíuch'e sín.

¹⁴ Ntá tí kjuachaxin kuente kjuach'én la ko tí tsík'ejó tí asén tí sín tsík'en sátsji tsoche tí xrohi tsochexín, mé tí muerte yóxin tíha.

¹⁵ La ko ntaha sátsji tí chojni ts'ínixínhya ihnjé sín tí libro ts'ínixín ihnjé chojni tsaá.

21

Nkajní nixín la ko nonte nixín

¹ Ntá k'uikuān ijnko nkajní nixín la ko ijnko nonte nixín káxin tí nkajní saoxín la ko tí nonte saoxín tsík'itjáyan la ko kjaxín kohya ntayaon.

² Janhan Juan k'uikuān tí chjasin jíe tjóá. Táha mé tí Jerusalén nixín k'uínkajínxín nkajní kuixín tí tjen Dios la kuente tsikóyóxin éxí ijnko chojni chjin tsoqēhe tsík'itsa káxin tsákja tí xii.

³ Ntá kuínhan ijnko itén ijnko nkexro itsen kuixín nkajní ntáχρο káxin:

—Dios itjen tí síin chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuente sín.

⁴ Jehe ch'án mé sínchexámá kaín ntákon sín la í tsokohya nkexro its'en la tsokohya nkexro tsotsjánka la ko ts'áváhya sín la ko tsokohya kjuatjoté káxin kaín tí nkehe k'uékónhen ósé la ó kjuixín k'uátsínka.

⁵ A ntá tí nkexro tjetjaxín tí trono ntáχρο ch'án káxin:

—Janhan mé t'ána kaín nkehe nixín.

Kjaxín ntáχρο ch'án káxin:

—Ikjian tíha káxin tíha mé palabra chaxín la chrókuítekáván kaín tíha.

⁶ Ntá chr'éxin chrónka ch'án káxin:

—Kaín nkehe la ó kjuixín tsík'óna. Janhan la tí xrankíxixín la ko tí tsjixixín éxí tí letra xrankíxixín A la ko tsjixixín Zeta. Tí nkexro t'enxín ntā la janhan tsoqjaha sín tí ntā its'i sín mé tí ntā tjanjon kjuachón la ninkehó ts'ixinkíéhya sín tíha.

⁷ Tí nkexro tsjacha tsitōehya tí janhan la ts'áyéhe sín kaín tí nkehe tsoqjaha sín. La janhan mé ts'óna Dios kuente sín, a ntā jehe sín mé xjanna ts'íkaan tí jehe sín.

⁸ A ntá tí chojni chrakon la chojni titekakonhya la tí sín chjínqoxínhin la ko tí chojni ts'óyan kichó la ko tí chojni tsákja chojni chjin ókjé la ko tí chojni xrinchexroan la ko chojni tinkáchónki nkehe tsíkjangya la ko kaín chojni ch'ia mé tí sín a mé ts'ítuhenen sátsji sín tí síin xrohi tsochexín sín azufre tíó itsi tí yóxin muerte.

Tí Jerusalén nixín

⁹ Ntá ikui ijnko tí yatōxin ángel chóna tí yatōxin copa tsíkaón tí yatōxin chin tsjixixín tsjasótéxin chojni. Ntá ntáχρο ch'án káxin:

—Xrákia tsjákōha tí tjan tsoqēhe tí Kolélo.

¹⁰ Ntá k'uikuān ijnko nkehe kjuakōxín Nchakuen Dios la ntá tí ángel sákjuíkian ijnko jna jíe la ko noi la kjuakona ch'án tí chjasin jíe tjóá mé tí Jerusalén ts'ínkajínxín nkajní tsíkixín tí tjen Dios.

¹¹ A ntá tí chjasin a mé tjákiníxín kjuachaxin kuente Dios. A ntá tjákiní éxí ijnko xro imá náxrjón tjeje éxí xro jaspe éxí xrosenta tsjehe.

¹² A ntá jnkontatjen tí chjasin chóna tjat'ō noi la chóna teyó puerta la jnkojnko ángel jnkojnko puerta tjejónta la ihnjé tí teyó tí sín tsík'axrjenixín sín Israel ts'ínixín jnkojnko puerta.

¹³ La iní puerta la nó tjtōxín yaon la iní puerta la nó norte la iní puerta la nó tjiatōxin yaon la iní puerta la nó sur.

¹⁴ Tí tjat'ō tsík'antatjen tí chjasin chóna teyó xro chóntaxín fuerza tí tjat'ō la jnkojnko ihnjé tí teyó tí sín k'uájiko tí Kolélo a mé ts'ínixín jnkojnko tí xro a.

¹⁵ A ntá tí ángel tjenixjana chóna ijnko nta vara oro, éxí tji tsjehe, tsjachōaxín tí chjasin la tí puerta kuente chjasin la ko tí tjat'ō t'ínkakuénxín.

¹⁶ Tí chjasin la cuadrada la tí kjinjinxín jnkokón la ko tonxín la jnkokón. A ntá tí ángel kjuachōaxín tí chjasin tí nta vara éxí tji tsjehe tsíkjachōa ch'án tí chjasin mé chóna dos mil dos cientos kilómetro tí kjinjinxín la ko tí ntētoxín la ko tí tonxín la jnkokón.

¹⁷ Ntá tsíkjachōa ch'án tí tjat'ō tsíkjintajin tí chjasin a la chóna sesenta y cuarto metro káxin éxí tjachroa chojni chjasintajni mé xíkaha kjuachōa tí ángel.

¹⁸ Tí tját'ò tsík'ántatjen tsík'óna xro jaspe, a ntá tí chjasin tsík'óna jehó chica oro tóyóhe jehó xrosenta tjóá.

¹⁹ Tí xro tsík'óna xrankíxixín tsík'ántatjen tí tját'ò la nchónhya xro chjini náxrjón tsínkíkjan. A ntá tí xro xrankíxixín la jaspe, a ntá tí xro yóxin la zafiro, la tí xro nixin la ágata, a ntá tí nooxin la esmeralda.

²⁰ A ntá tí n'óxin xro la xro mármol la tí injonxin la cornalina, la tí yatoxin la crisólito, a ntá tí jnixin la berilo, la tí xro naxin la topacio, la tí texin la crisoprasa. A ntá tí tejnkoxin la jacinto, a ntá tí teyóxin la amatista.

²¹ A ntá tí teyó puerta mé tjejó perla la jnkojnko puerta tsík'óna jnkokoá perla. A ntá tí ntia jíé kuénte chjasin la tsík'óna jehó chica oro éxi xrosenta tsjehe.

²² Ntaha la k'uikónhya ninkehó nínko tí chjasin a, kixin Inchéni Dios chóna kaín xín kjuachaxin la jehe ch'án la ko tí Kolélo mé tí nínko ntiha.

²³ Tí chjasin a mé t'ichjánxinhya yaon la ko ni nitjó ts'inkaséyanxín. Kixin tí t'inkaséyanxín la Dios la ko tí Kolélo mé tí xrohi kuénte.

²⁴ A ntá tí chojni kuénte kaín nació tsikaá la ts'ikonxín tí xrohi kuénte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchénta sín.

²⁵ A ntá tí puerta kuénte chjasin la tsík'jehya tí nchakotjin la ntaha la tsokohya ts'ixin tie.

²⁶ Ntaha sátsjiko kaín xín nació tí nkehe náxrjón k'uéchénta sín chjasintajni.

²⁷ A ntá ntaha mé xitjahya ts'ixenhen ninkehó nkehe tjuáhya, la ninkexró chjinoxínhin o chojni ch'ia. Jehó ts'ixenhen tí sín ts'ínixín ihnié tí libro ts'ínixín ihnié tí sín tsaá, mé tí libro chóna tí Kolélo.

22

¹ A ntá tí ángel kjuákona ijno ntario tjóá, a ntá tí nta a mé tjanjon kjuachón. Táha mé t'ikonxíni éxi xrosenta la mé k'uaxrxéxin tí trono kuénte Dios la ko tí Kolélo.

² A ntá jnkosiné tí calle tjeotan kuénte tí chjasin a la ko nanánko tí ntario ntiha itjen tí inta tjanjon kjuachón mé t'óna to teyó veces jnkojnko nánó kixin t'óna to jnkojnko nitjó. Tí ka kuénte tí nta la xroan tsitoxén jina tí nació sín ntiha.

³ La mé ntiha tsokohya ninkehó kjuachjinoxínhin la tí trono kuénte Dios la ko kuénte tí Kolélo la ntiha tjen tí chjasin. La tí sín ch'ehe ch'án xra la mé tsjikosáyehe sín ch'án.

⁴ Ts'ikon sín tí kàré Dios la ko tsochóna sín ihnié ch'án tí totjen sín.

⁵ Ntiha la tsokohya ts'ixin tie la tí sín sín ntiha la t'ichjánxinhya sín xrohi kuénte lámpara la ko ni xrohi kuénte yaon kixin Inchéni Dios mé ts'inkaséyanxín sín ntiha la ko tsochóna sín kjuachaxin kuénte Dios jnkochrixín.

Tí itsi Inchéni la kánhyó sé

⁶ A ntá tí ángel mé nixjana ch'án ntáchro kixin:

—Tí itan a mé chaxín la chrókuitekákónhén tí tan a. La ko Inchéni mé tí Dios nchexraxinkaon tí sín nixja kjuachaxin ihnié ch'án mé ichr'án ch'án tí ángel kuénte ch'án kixin tsjakuexín ch'án tí sín ch'ehe ch'án xra, tí nkehe tjoka tsonhen.

⁷ —¡Tjoka ts'inka janhan!

Náxrjón tjejó tí sín titekaon tí itén Dios nixja tí libro i.

⁸ Janhan Juan, kuñhan la ko k'uikuán tíha. A ntá chr'éxin kjuixin kuñhan la ko k'uikuán tíha ntá kjuak'éxian toch'ian chrínkí toté tí ángel kixin xíkaha kjuákona la ntá chrókuikosáyaha ch'án.

⁹ A ntá jehe ch'án ntáchro ch'án kixin:

—Xíkaha sích'e kixin janhan kjaxin t'aha xra Dios éxi tí jaha xíkaha la ko éxi tí sín kíchuá mé tí sín nixja itén Dios la ko kaín tí sín tjinkaon chrókuitekaon nkexrí nixja tí libro i. Mé jehó Dios chrókuikosáyehé.

¹⁰ Kjaxin k'ueguanna ch'án kixin:

—Chrókuak'echjinahya tí nkehe jahvá kuinhín kuénte Dios éxi nixja tí libro i kixin ó kuichjina tí yaon tsoxiteyá.

¹¹ A ntá tí sín ch'e jínahya ája nohe sín ch'e sín tí jínahya. A ntá tí nkexro ntoáhya ch'e la ája nohe ch'e tí nkehe ntoáhya. A ntá tí nkexro ch'e nkehe toxrjínhin Dios la naxa chrókuich'e xíkaha la ko tí nkexro tsíkjinchetjóá Dios la naxa jina chrók'uejó sín chrókuitekaon sín tí jehe ch'án.

¹² —Chaxín tjoka ts'inka janhan la ts'inkakian tí nkehe tsotjahará jnkojnkorá kixin nkexrí tí xra chuich'erá.

¹³ Janhan mé tí xrankíxixín la ko tí tsjixixín la janhan mé tí saxón la ko tí tsjixixín éxi tí letra xrankíxixín A la tsjixixín Zeta.

¹⁴ Náxrjón ts'ejó tí nkexro tsikjen iké kixin tsochóna sín kjuachaxin tsoghjinehe sín tí nta tjanjon kjuachón kixin jina ts'ixenxín sín tí puerta kuénte chjasin.

¹⁵ **A** ntá ntója tsitöhe tí chojni jínahya kuítekakonhya la ko tí chojni nchexroan la ko tí sín chóna nchónhya chojni chjin la ko tí chojni tjàya la ko tí chojni tinkáchónki tí nkehe tsíkjangya la ko tí chojni tóxrjínhjin xrich'ia.

¹⁶ —Janhan Jesús mé ichr'an tí ángel kuèntana kixin tsochénka kaín njinko kaín tíha. Janhan mé k'uaxrjenixian tí rey David la ko janhan tí konotsé itji tí chjina t'inkáséyan.

¹⁷ Tí Nchakuen Dios la ko tí sín tinkáchónki tí Kolélo ntáchro kixin:

—Xrákiá.

La tí sín tjejótinhin la ntáchro sín kixin:

—Xrákiá.

A ntá tí nkexro t'enzín ntá tjinkaon ntá la chrók'ui tí ntá tjanjon kjuachón la ninkehó ts'ixinkíhya tíha.

¹⁸ Kaín nkexro tjejótinhin itén Dios ts'ínixín tí libro i la chrókónohe sín tíha: Jnkojín sín chrókjuich'éna í so nkehe chrónixja la Dios mé ántsí sinchekjasóte tí jehe sín tsoníhi sín éxí nixja tí libro i.

¹⁹ **A** ntá jnkojín nkexro tsjatsen jnkojín palabra chóna tí libro i la Dios tsjatsen tí nkehe chrók'uáyéhe sín chóna tí libro ts'ínixín ihnjé tí sín tsaá la ko Dios tsjatsen tí nkehe chróchóna sín tí tjen tí chjasin tjóá kixin éxí nixja tí libro i.

²⁰ **A** ntá tí nkexro chrónkaxín tí tan i mé ntáchro kixin:

—Tjoka ts'inka janhan.

Amén. ¡Xrákiá. Inchéni Jesús!

²¹ Inchéni Jesucristo mé sincheyaoaná kaín rá. Amén.